


Mbia Cheẽ



New Testament in Sirionó (BL:srq:Sirionó)

Mbia Cheë
New Testament in Sirionó (BL:srq:Sirionó)

copyright © 1977 Wycliffe Bible Translators, Inc.

Language: Sirionó

Translation by: Wycliffe Bible Translators, Inc.

Sirionó [srq], Bolivia

Copyright Information

© 1977, Liga Bíblica Mundial del Hogar. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Sirionó

© 1977, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Contents

SAN MATEO	1
SAN MARCOS	43
SAN LUCAS	69
SAN JUAN	114
HECHOS	147
ROMANOS	192
1 CORINTIOS	212
2 CORINTIOS	231
GÁLATAS	243
EFESIOS	250
FILIPENSES	256
COLOSENSES	261
1 TESALONICENSES	266
1 TESALONICENSES	270
1 TIMOTEO	272
2 TIMOTEO	277
TITO	281
FILEMÓN	284
HEBREOS	285
SANTIAGO	299
1 PEDRO	304
2 PEDRO	310
1 JUAN	313
2 JUAN	318
3 JUAN	319
JUDAS	320
APOCALIPSIS	322

EL SANTO EVANGELIO SEGÚN SAN MATEO

Jesucristo i ñiinda amei

¹ Ñ ndei Jesucristo i ñiinda ã. David rei ei tuchi. Abraham abe no.

² Abraham ndei Isaac ndu. Isaac ndei Jacob ndu no. Jacob ndei Judá ru no. Judá nongue abe ru. ³ Judá rei Fares ndu.

Zara ru abe no. (Tamar rei ũquĩsi.) Fares ndei Esrom ndu. Esrom ndei Aram ndu.

⁴ Aram ndei Aminadab ndu. Aminadab ndei Naasón ndu. Naasón ndei Salmón ndu.

⁵ Salmón ndei Booz ndu. (Rahab ndei esi.) Booz ndei Obed ndu. (Rut rei esi.) Obed ndei Isaí ru.

⁶ Isaí rei David ndu. David ndei ererecua. David ndei Salomón ndu. (Urías ninisi rei esi.) ⁷ Salomón ndei Roboam ndu. Roboam ndei Abías ru.

Abías rei Asa ru. ⁸ Asa rei Josafat ndu. Josafat ndei Joram ndu. Joram ndei Uzías ru.

⁹ Uzías rei Jotam ndu. Jotam ndei Acáz ru. Acáz rei Ezequías ru. ¹⁰ Ezequías rei Manasés ru. Manasés rei Amón ndu.

Amón ndei Josías ru. ¹¹ Josías rei Jeconías ru. Jeconías nongue abe ru. Ũquĩ ngue siqui abae judíos rerao mose Babilóniaa nda.

¹² Jeconías rei Salatiel ndu no. Salatiel ndei Zorobabel ndu. ¹³ Zorobabel ndei Abiud ndu. Abiud ndei Eliaquim ndu. Eliaquim ndei Azor ndu. ¹⁴ Azor ndei Sadoc ndu. Sadoc ndei Aquim ndu. Aquim ndei Eliud ndu. ¹⁵ Eliud ndei Eleazar ndu. Eleazar ndei Matán ndu. Matán ndei Jacob ndu. ¹⁶ Jacob ndei José ru. José quia María quereco nguiã. María rei Jesús si. Cristo, i equia ee.

¹⁷ Nyebe cator ce generaciones jaaja. Sã Abraham nane siqui no. David siqui mose, catorce generaciones cote. Abae judíos rerao mose Babilóniaa, catorce que aque abe mose cote ra. Cristo nyaacuquia mose que catorce aque mose cot e no nda.

Jesucristo nyaacuquia mose

¹⁸ Jesucristo chaacuquia tasenei na jėje. María rei esi. María que siquichõ ndei quia José ninisirã nda. Nyucuaaque ru eã ngue siqui rei ra. Nguiirĩ ngue eteachõ nguiẽ

ye ra. Siquiã ndaque José rese. Espíritu Turã ae que eriirĩ mondo erie ye ra. ¹⁹ José turãte que eriqui rei ra. Eireĩte que eriqui mae María rio rese ra. —Seninisirã eã nda cote reae. Ahui rei ra esi mbia mbiiranua ndeae, i rei que ndua ndua uchi angui re ra.

María siqui reĩ nguia emo ndese ee reaẽ. ²⁰ José que ndua ndua quia erese ra. Ndua ndua mose que ángel mo ndu eque re cuu ra. Angel que ñee ee ra. —David riirĩ ño nde re. María eisi turã ño neninisirã. ¡Ndeireĩ ngũiã ño jě! Emo ngue siqui ãte quia erese ra. Espíritu Turã ae que eriirĩ mondo erie ye ra. ²¹ Nguiirĩ nda etea. “Jesús” ere chõ eriirĩ je. Ae quia ra mbia sirõ tuchi eicuã si, i que ángel ñee José je cuu ra. ²² Eĩ nda Dios cheẽ io cote. Ae Dios cheẽ mbuchecuaa mbesa cose nae, ũquĩ nda io cote. Ñ ndei embesa ji ã:

²³ ¡sã jě! Nyucuaaque ruã nda nguiirĩ tea. Emanuel, i ra eriirĩ je.

Dios riqui nanderese co, i ñi Emanuel nde, i que embesa ji cose ra.

²⁴ José que ñnumba cote ra. Angel cheẽ ndui si que María rerequia turã cote ra. ²⁵ José que siqui eã mbei erese ra. Nguiirĩ ndea chee. Jesús i que José eriirĩ je ra.

²⁶ José que siqui eã mbei erese ra. Nguiirĩ ndea chee. Jesús i que José eriirĩ je ra.

²⁷ José que siqui eã mbei erese ra. Nguiirĩ ndea chee. Jesús i que José eriirĩ je ra.

²⁸ José que siqui eã mbei erese ra. Nguiirĩ ndea chee. Jesús i que José eriirĩ je ra.

²⁹ José que siqui eã mbei erese ra. Nguiirĩ ndea chee. Jesús i que José eriirĩ je ra.

³⁰ José que siqui eã mbei erese ra. Nguiirĩ ndea chee. Jesús i que José eriirĩ je ra.

³¹ José que siqui eã mbei erese ra. Nguiirĩ ndea chee. Jesús i que José eriirĩ je ra.

³² José que siqui eã mbei erese ra. Nguiirĩ ndea chee. Jesús i que José eriirĩ je ra.

³³ José que siqui eã mbei erese ra. Nguiirĩ ndea chee. Jesús i que José eriirĩ je ra.

³⁴ José que siqui eã mbei erese ra. Nguiirĩ ndea chee. Jesús i que José eriirĩ je ra.

³⁵ José que siqui eã mbei erese ra. Nguiirĩ ndea chee. Jesús i que José eriirĩ je ra.

³⁶ José que siqui eã mbei erese ra. Nguiirĩ ndea chee. Jesús i que José eriirĩ je ra.

³⁷ José que siqui eã mbei erese ra. Nguiirĩ ndea chee. Jesús i que José eriirĩ je ra.

³⁸ José que siqui eã mbei erese ra. Nguiirĩ ndea chee. Jesús i que José eriirĩ je ra.

³⁹ José que siqui eã mbei erese ra. Nguiirĩ ndea chee. Jesús i que José eriirĩ je ra.

⁴⁰ José que siqui eã mbei erese ra. Nguiirĩ ndea chee. Jesús i que José eriirĩ je ra.

⁴¹ José que siqui eã mbei erese ra. Nguiirĩ ndea chee. Jesús i que José eriirĩ je ra.

⁴² José que siqui eã mbei erese ra. Nguiirĩ ndea chee. Jesús i que José eriirĩ je ra.

⁴³ José que siqui eã mbei erese ra. Nguiirĩ ndea chee. Jesús i que José eriirĩ je ra.

⁴⁴ José que siqui eã mbei erese ra. Nguiirĩ ndea chee. Jesús i que José eriirĩ je ra.

⁴⁵ José que siqui eã mbei erese ra. Nguiirĩ ndea chee. Jesús i que José eriirĩ je ra.

⁴⁶ José que siqui eã mbei erese ra. Nguiirĩ ndea chee. Jesús i que José eriirĩ je ra.

⁴⁷ José que siqui eã mbei erese ra. Nguiirĩ ndea chee. Jesús i que José eriirĩ je ra.

⁴⁸ José que siqui eã mbei erese ra. Nguiirĩ ndea chee. Jesús i que José eriirĩ je ra.

2

Mbia aquiatu nyo: Jesús itãquieĩ ndea

¹ Jesús que nyaacuquia Belén nda. Judea, i que hue ibi je ra. Herodes rei hue jenda mbia rerecua Jesús nyaacuquia mose. Mbia aquiatu mo ngue ngaẽ huee ra. Tenda semba si que ecuaẽ Jerusalén nda.

² Ũquĩ ngue ñee ngaẽ judíos je ra. —¿Mangue judíos rerecua mangue re? Ae nyaacuquia ramo nae ¿mangue mangue re? Uremae ngue nysitata embae rese ra. Ureico mose ure récuua. Nyebe urechu nguiã erea co. Urecoi rã urenia ndese ñee ee. ¿Ma eriqui ma nde? i que mbia aquiatu ñee judíos je ra. ³ Herodes que jirandu erese ra. “Judíos rerecua nyaacuquia” i mose, Herodes que pare pare i tuchi quia ra. Siqui turã eã cote. Jerusalén jenda abe que ndua ndua jate quia erese ra. ⁴ Herodes que “jenyu” i sacerdote rerecua ja je ra. Embesasa ja je abe que “jenyu” i ra. —¿Mangue ra Cristo nyaacuquia mangue re? “Hue ra

⁵ Herodes que jirandu erese ra. “Judíos rerecua nyaacuquia” i mose, Herodes que pare pare i tuchi quia ra. Siqui turã eã cote. Jerusalén jenda abe que ndua ndua jate quia erese ra. ⁶ Herodes que “jenyu” i sacerdote rerecua ja je ra. Embesasa ja je abe que “jenyu” i ra. —¿Mangue ra Cristo nyaacuquia mangue re? “Hue ra

⁷ Herodes que jirandu erese ra. “Judíos rerecua nyaacuquia” i mose, Herodes que pare pare i tuchi quia ra. Siqui turã eã cote. Jerusalén jenda abe que ndua ndua jate quia erese ra. ⁸ Herodes que “jenyu” i sacerdote rerecua ja je ra. Embesasa ja je abe que “jenyu” i ra. —¿Mangue ra Cristo nyaacuquia mangue re? “Hue ra

⁹ Herodes que jirandu erese ra. “Judíos rerecua nyaacuquia” i mose, Herodes que pare pare i tuchi quia ra. Siqui turã eã cote. Jerusalén jenda abe que ndua ndua jate quia erese ra. ¹⁰ Herodes que “jenyu” i sacerdote rerecua ja je ra. Embesasa ja je abe que “jenyu” i ra. —¿Mangue ra Cristo nyaacuquia mangue re? “Hue ra

¹¹ Herodes que jirandu erese ra. “Judíos rerecua nyaacuquia” i mose, Herodes que pare pare i tuchi quia ra. Siqui turã eã cote. Jerusalén jenda abe que ndua ndua jate quia erese ra. ¹² Herodes que “jenyu” i sacerdote rerecua ja je ra. Embesasa ja je abe que “jenyu” i ra. —¿Mangue ra Cristo nyaacuquia mangue re? “Hue ra

¹³ Herodes que jirandu erese ra. “Judíos rerecua nyaacuquia” i mose, Herodes que pare pare i tuchi quia ra. Siqui turã eã cote. Jerusalén jenda abe que ndua ndua jate quia erese ra. ¹⁴ Herodes que “jenyu” i sacerdote rerecua ja je ra. Embesasa ja je abe que “jenyu” i ra. —¿Mangue ra Cristo nyaacuquia mangue re? “Hue ra

¹⁵ Herodes que jirandu erese ra. “Judíos rerecua nyaacuquia” i mose, Herodes que pare pare i tuchi quia ra. Siqui turã eã cote. Jerusalén jenda abe que ndua ndua jate quia erese ra. ¹⁶ Herodes que “jenyu” i sacerdote rerecua ja je ra. Embesasa ja je abe que “jenyu” i ra. —¿Mangue ra Cristo nyaacuquia mangue re? “Hue ra

¹⁷ Herodes que jirandu erese ra. “Judíos rerecua nyaacuquia” i mose, Herodes que pare pare i tuchi quia ra. Siqui turã eã cote. Jerusalén jenda abe que ndua ndua jate quia erese ra. ¹⁸ Herodes que “jenyu” i sacerdote rerecua ja je ra. Embesasa ja je abe que “jenyu” i ra. —¿Mangue ra Cristo nyaacuquia mangue re? “Hue ra

¹⁹ Herodes que jirandu erese ra. “Judíos rerecua nyaacuquia” i mose, Herodes que pare pare i tuchi quia ra. Siqui turã eã cote. Jerusalén jenda abe que ndua ndua jate quia erese ra. ²⁰ Herodes que “jenyu” i sacerdote rerecua ja je ra. Embesasa ja je abe que “jenyu” i ra. —¿Mangue ra Cristo nyaacuquia mangue re? “Hue ra

²¹ Herodes que jirandu erese ra. “Judíos rerecua nyaacuquia” i mose, Herodes que pare pare i tuchi quia ra. Siqui turã eã cote. Jerusalén jenda abe que ndua ndua jate quia erese ra. ²² Herodes que “jenyu” i sacerdote rerecua ja je ra. Embesasa ja je abe que “jenyu” i ra. —¿Mangue ra Cristo nyaacuquia mangue re? “Hue ra

²³ Herodes que jirandu erese ra. “Judíos rerecua nyaacuquia” i mose, Herodes que pare pare i tuchi quia ra. Siqui turã eã cote. Jerusalén jenda abe que ndua ndua jate quia erese ra. ²⁴ Herodes que “jenyu” i sacerdote rerecua ja je ra. Embesasa ja je abe que “jenyu” i ra. —¿Mangue ra Cristo nyaacuquia mangue re? “Hue ra

²⁵ Herodes que jirandu erese ra. “Judíos rerecua nyaacuquia” i mose, Herodes que pare pare i tuchi quia ra. Siqui turã eã cote. Jerusalén jenda abe que ndua ndua jate quia erese ra. ²⁶ Herodes que “jenyu” i sacerdote rerecua ja je ra. Embesasa ja je abe que “jenyu” i ra. —¿Mangue ra Cristo nyaacuquia mangue re? “Hue ra

nyaacuquia” ¿i embesa ji re? i que Herodes ñee ee ra. ⁵ Ūquĩ ngue ñee Herodes je ra. —Nyaacuquia ra Belén de Judea. † que embesa ji ra:

⁶ Sucha ñetē tuchi rei Belén. Belén de Judea.

Mbia ch̄cua tuchi ra Belén cote.

Hue jenda mo nda mbia rerecuarā tuchi cote.

Ae ra serimba Israel jenda teaquiato tuchi quia cote,

i que Dios cheẽ embesa ji ra, i que sacerdotes ñee Herodes je ra.

⁷ Nyebe Herodes “jenyu” i nguiã ūquĩ mbia aquiato je. Ñee ngue ūquĩ ísaa ra. —¿Manosete nyasitata embae rese jemaende? i que ñee ee ra. ⁸ Herodes que ūquĩ mbia aquiato mondochoi Belén cote ra. —Jēso Belén. Nyaacuquia ramo je rese jēirandu tuchi. Jē erea mose, sembiirandu se. † nda se abe aso mae erese. † nda acoi senia ndese se abe ñee ee, i rei que Herodes ñee ee ra. ⁹ Mbia aquiato que nyoĩ cote ra. Ae nyasitata rese eriqui mae nyii nae, aque nyasitata que oso bei quia mbia rēta ra. Tiba que ee Belén arō cote ra. ¹⁰ Nyebe mbia aquiato ia tuchi nguiã mae mose nyasitata tiba rese cote. ¹¹ Mbia aquiato que ique tuchúaa cote ra. Huee que ãquẽ itãquieĩ ndiqui ee cote ra. Usi rese. María, i equia ee. Ngoi que ngũiã ndese eitãquieĩ je cote ra. Ñee turã ngue ee ra. Mbae que esirō mondo Jesús je cote ra. Oro. Mbae mbushimbusa abe no. Mirra abe no. ¹² Dios que ñee mbia aquiato je cote ra. —Jēsochĩ nda ñee Herodes mbiirandu jē, i que Dios ñee ee cuu ra. Nyebe echoi nguiã Herodes abi nguécuaa.

José nyoĩ uchã Egíptoo

¹³ Aquere que Dio s ángel mo mondo ñee José je ra. Ñee ngue ee cuu ra. —Herodes ra eitãquieĩ sequia sequia. Iquia serite equia co. Jēso uchã. ãquẽ jendao sunuña Egíptoo. Esi rese. Huee jēingochō. Acheẽ jee ra ndeje huee, i que Dios ñee José je ra. ¹⁴ José que ñumumba juã cote ra. ãquẽ ngue ecuruchoi isa usi rese ra. Nyoĩ que Egipto quiti ra. ¹⁵ Chi arete que Egíptoo ra. Ererecua Herodes que mano cote ra. Dios cheẽ ngue

ique cote ra. Eĩ ngue Dios cheẽ embesa ji ra: Seriirĩ ngue aru Egipto si ra, i que embesa ji ra.

Herodes ãquẽ itãquieĩ iquia ja

¹⁶ Herodes que paama i tuchi cote ra. —Mbia aquiato semb̄rĩ irĩ ñochĩ. Nyebiã ñochĩ ecuaẽ ñee seje, i que ra. Nyebe que soldados mondo mbia riirĩ nacue iquia ja cote ra. ãquẽ itãquieĩ ngu e eiquia iquia ja quia Belén jenda ra. Hue rurubinda ja abe no. Ngata ramo je abe iquia ja. Nyasitata nyecua quia mbia je nae, aque mosenda ãquẽ itãquieĩ iquia ja. ¹⁷ Herodes ūquĩ iquia mose que Dios cheẽ ique cote ra. Ae Jeremías mbesa quia:

¹⁸ Mbia Ramá jenda nyeseo tuchi.

Eya eã tuchi nguiirĩ ndese.

Emo embia aroneãte.

Eriirĩ nguia mano jate nguiã ee, i que embesa ji ra.

¹⁹ José chi mose Egipto que Herodes mano nyee ra. Nyebe Dios ángel mo mondo nguiã ñe e José je. ²⁰ —José, echumumba rã. Jēso Israel cote. ãquẽ abe erao. Esi rese. Ae ãquẽ iquia serite quia nae, ūquĩ ngue mano cote ra, i que ángel ñee José je cuu ra. ²¹ José que ñumumba cote ra. Nyoĩ que nyebi Israel quiti cote ra. ãquẽ ngue equerao esi rese ra. ²² Herodes riirĩ ngue siqui Judea jenda rerecuarā cote ra. Arquelao, i que ee ra. José jirandu mose erese que esiquiche cote ra. Oso sereãte que huee cote ra. Dios que ñee ee cuu ra. Nyebe esi nguiã Galilea cote. ²³ Sucha tubiriã mo ngue chi Galiléaa ra. Nazaret, i que hue je ra. José que nyoĩ bei hue, hue jendarā cote ra. Nyebe Dios cheẽ mbesa ji ique nguiã cote. † ngue Dios cheẽ nda: Nazaret jenda ra Jesús, i que Dios cheẽ nda.

3

Juan el Bautista Dios chẽ senei senei

¹ Emo mose que Juan el Bautista Dios cheẽ nenei nenei mbia je cote ra. Dios cheẽ ngue esenei senei nguia mbia je turúquiaa ra. ² —Jendua si jēicuã ndese. Jendua si Dios rese. Dios ra tu mbia rerecuarā tuchi cote, i beite que Juan nguia ñee nda. ³ Sã Isaías embesa nyii no:

Emo ndiqui ñeemombo mombo turúquiaa huee.

“Sã emo ndiqui ñeenda mbuquiche no, eĩ jenyete si chõ nguia jẽ abe icoquiato nandererecua je”, i equia turúquiaa huee,

i que Isaías embesa ra. Juan nĩ si que embesa ra. ⁴ Quiicuã mbuaera chõ ngue Juan irao ra. Mbae ire chõ ngue enumbicuasa no nda. Tucu mbuae chõ ngue eu quia no nda. Irao quiaa rĩnda abe. ⁵ Jerusalén jenda que ngaẽ ngaẽ tuchi quia echeẽ andu ra. Judea jenda abe no. Ama Jordán nimia nduinda abe no. ⁶ Mbia huicuã nenei nenei mose Dios je, ũquĩ mose que Juan ndiqui bautizar i ee ra. Ama Jordán ye.

⁷ Fariseos tubiriã abe que ngaẽ ngaẽ tuchi quia Juan ndea ra. Saduceos tubiriã abe no. Juan ngue ñee asite ũquĩ je ra. — Mbei rã ño jẽingo nguia ã. Mbae icuã nda tu mbia je nae, ¿ũquĩ nĩ ño jenyu quia uchã serea co re? ⁸ Jẽ mbae icuã ndecha mose Dios je, mbae turã jẽsaã saã mbei quiatu quia ee cote. ⁹ “Abraham ndiirĩ nducucha chõ nande re. Nyebe ra Dios nandemingo bei” jjenyechĩ nda jẽ! Dios Abraham ndiirĩ nducucha chao arõte raque sita je. ¹⁰ Ira rã si chõ mbia riqui nguia ã. Sã ira mo ndiqui ia turã no. Sã emo ndiqui ia eã no. Aque quia ra mbia maña cote. Erei sacua. Eĩ serĩ serĩ ño Dios nguia mbia je co, mbia mbae turã naa eã mose.

¹¹ I je chõ aico nguia bautizar i mbia je co. Jẽ ndua ndua si mose Dios rese. Co chi emo ndu quia serui co. Ae quia equirãcuã tuchi sesi re. Ae quia eturã tuchi sesi re. Ae quia ra bautizar i mbia je Espiritu Turã je. Mbia chiã mbitirõ sacua. Sã tata riqui mbae mbitirõ no. ¹² Ae ra mbia umbae mĩ icúe. Eeturã achõ ño embae re. Ae embae eã nae, ũquĩ nda eséi cote. ũquĩ ndeisa ra ua eã mbei tata. Sã mbia quiata a chiqui chiqui no. Sã ea mĩ icúe no. Sã echuruique mombo tátaa no, i que Juan ñee mbia je ra.

Juan bautizar i Jesús je

¹³ Jesús que tu Galilea si cote ra. Tu que Juan ndea Ama Jordán nda. Juan bautizar i sacua ee. ¹⁴ Juan ngue teã teã ndei ee ra. —¿Mañi ae ra bautizar i ndeje re? Nde chõ bautizar ere seje ae, i rei que Juan ñee Jesús

je ra. ¹⁵ Jesús que ñee ee ra. —Bautizar ere rei seje. Dios cheẽ ndui si mbae nandesaã turã ja quia, i que Jesús ee ra. Juan ngue eno i chee ee ra. ¹⁶ Juan ngue bautizar i ee ra. Jesús que usẽ oso ama si cote ra. Ibei que nyiequia ee cote ra. Espiritu Turã ngue nguichi nyurushi rã nda. Nguichi que eu Jesús rese ra. ¹⁷ Ibei jenda que ñee nda. —Seriirĩ ño co re. Sechesequa chõ co re. Seyate erese, i que Dios ñee Jesús je ra.

4

Jesús tambicuã, i raque Satanás

¹ Turúquiaa que Espiritu Turã Jesús rerao ra. “Tã tae Jesús je”, i sacua diablo Jesús je. ² Huee que Jesús riqui arete ra. Cuarenta días. Mbae mo ngue eu eã mbei aque mose ra. Eriãcuãte que cote ra. ³ Aque mose tuchi que diablo si ee ra. Embicuã sacua. —Nde Dios riirĩ mose, mbichae esaã ã sita je. † nda ereu, i rei que diablo ñee ee ra. ⁴ Jesús que ñee ee ra. —Tei. Sã embesa ji ñee no: “Mbia chiu achõ nda mbia mingo eã. Dios cheẽ nguia ra mbia mingo nguia”, i que embesa ji ra, i que Jesús ee ra. ⁵ Aquere que diablo ererao Jerusalén nda. Querao que suruchui ibate Dios chuchua arõ nda. ⁶ Ñee ngue Jesús je ibate ereco mose ra. — Nde Dios riirĩ mose, eo oso íbii no. Dios ra ndereaquiato. Sã embesa ji riqui i ñee no: Dios ra ángeles mondo ndereaquiato sacua. Oje ra ndeisi. Nembuquichi mingue rae.

Sita ra cua iã ndei je, i que embesa ji ra, i rei que diablo ñee Jesús je ra. ⁷ Jesús que ñee diablo je ra. —Sã embesa ji ñee no: “ ‘Ma Dios sereaquiato. Tã tae ee no’, jjenyechĩ nda Dios je”, i ñi Dios cheẽ nde, i que Jesús ñee diablo je ra. ⁸ Aquere que diablo ererao ibi ibate mo nda. Ibate tuchi ererao cote. Diablo que ibi teacuquia ja ee ra. Ishonda abe reacuquia ja ee. ⁹ Diablo que ñee ee ra. —Sembae ja chõ ibi re. Ibi turã ja. Ndeico mose serese, tamondo ja ndeje. Serimbarã mose nde, tamondo ja ndeje, i rei que diablo ñee Jesús je ra. ¹⁰ Jesús que ñee ee ra. —Quiatúae sesi ae, Satanás. ¿Mañi nda se nderimbarã nde? “Dios ae rese chõ jeingo”, i que embesa ji ñee ndesẽ, i que Jesús ee ra. ¹¹ Diablo que

oso erecha cote ra. Angeles que ngaë Jesús reaquiату cote ra.

Jesús mbia mbaaquiату quiату ramo

12-13 Aque mose que mbia rerecua Juan tarõ cárcel nda. Jesús jirandu mose etarõ ndese que esi Galilea cote ra. Nazaret, i que sucha tubiriã je ra. Aquere que esi siri Capernaum cote ra. Ama ndisha ji. Zabolón abe ji. Neftalí abe ji. Huee que Jesús si siri ra. 14 Isaías chimbesa Dios cheë ngue ique cote ra. Jesús siqui mose huee. Eï ngue Isaías embesa cose ra:

15-16 Mbia hue jenda ja que siqui itondáruu nyii ra.

Zabolón jenda. Neftalí jenda.

Ama ndisha ji jenda.

Ama Jordán ndobeinda.

Ae judíos eã Galilea jenda nae, ùquĩ abe no.

Ûquĩ mbia que siqui ja rei itondáruu nyii ra.

Nyaashĩ ngue tu ee cote ra,

i que Isaías embesa ra. 17 Aque mose bei chõ ngue Jesús riqui ñee mbia je cote ra. — Jendua si Dios rese. Mbia rerecuarã tuchi ra Dios namo jiri, i que Jesús quia ñee mbei mbia je cote ra.

Jëingo serui, i Jesús uchimbaaquiaturã je

18 Emo mose que Jesús si quia ama nimia ndui ra. Ama Ndisha Galilea. Huee que mae Simón Pedro rese ra. Enongue rese abe que mae nda. Andrés, i equia ee. I que eu sira mbuasa mondo mondo ii ra. Sira resenda bei rei ùquĩ. 19 Jesús que ñee ee ra. —i Serui bei chõ jëingo jë! Taembaaquiату quiату. Mbia teendu endu bei quia seje cote, i que Jesús ee ra. 20 Nyoï ja que erui ra. Sira mbuasa si que echoi hui ra. 21 Pe jiri que mae Jacobo rese ra. Enongue rese abe. Juan, i equia ee. Eru abe que siqui erese ra. Zebedeo, i equia ee. Huee que echi ja canoa ye sira mbuasa mbitirõ tirõ nda. —Jëingo serui, i que Jesús Jacobo je ra. Juan je abe. 22 Jesús cheë nduibe tuchi que echoi erui ra. Canoa ndecha. Ngu abe recha.

Jesús mbia tubiriã mbaaquiату

23 Jesús que ngata tuchi quia Galilea rĩ nda. Mbia que embaaquiату quiату quia mbia chumunua nuásaa ra. Dios cheë turã ngue esenei senei nguia ee ra. Mbia rasi chumumbara que embucherõ cherõ nguia

ra. 24 Mbia Siri a jenda que jirandu tuchite chee erese ra. Nyebe eriqui nguiã erasi rurucuaë cuaë jate ee. Erasi chumumbara. Mbia aba checuayã nyireco abe no. Mbia quiachã quiachã je abe no. Mbia umi sayã je abe no. Jesús que embucherõ cherõ ja quia ra. 25 Mbia tubiriã tuchi que siqui Jesús rui cote ra. Galilea jenda. Decápolis jenda abe no. Jerusalén jenda abe no. Judea jenda abe no. Ama Jordán ndobeinda abe no. Uquĩ jenda siqui ja Jesús rui.

5

Jesús mbia mbaaquiату quiату ibi ibate

1 Mbia tubiriã ngu e chi Jesús rese ra. Nyebe Jesús nyui nguiã ibi ibate mo ndese ra. Ngoï que huee ra. Echimbaaquiату que esichã ngaë nda. 2 Jesús que embaaquiату quiату ra.

Ae eyate riqui

3 Eï ngue ñee ee ra:

—Ae siqui mingue quia nae, eya chõ ùquĩ nde. Ûquĩ nda siqui Dios rese.

4 Ae nyeseo quia nae, eya chõ ùquĩ nde. Dios ra embia tuchi.

5 Ae eseteãte riqui nae, eya chõ ùquĩ nde. Ibi ja ra embae cote.

6 Ae siqui turã sete quia nae, eya chõ ùquĩ nde. Dios ra embucuata turã nguia.

7 Ae eya eãte riqui mbia rese nae, eya chõ ùquĩ nde. Dios ia eãte ra ùquĩ ndese.

8 Ae echiã turãte riqui nae, eya chõ ùquĩ nde. Ûquĩ nda mae Dios rese.

9 Ae mbia mingo turã nguia nyiese nae, eya chõ ùquĩ nde. “Seriirĩ” i ra Dios ùquĩ je.

10 Mbia icuã icuã mose jëturã je, jëya tuchi rae. Jenderecua tuchi chõ Dios riqui nguiã co.

11 Mbia ñee icuã mose jëje serĩ, jëya tuchi rae. Mbia icuã icuã mose jëje serĩ. Mbia ñee ñooño mose jeni, jëya tuchi rae.

12 Jeñimbia chõ nguia ùquĩ mose. Dios quia ra mbae turã tuchi mondo jëje ibate. Mbia icuã icuande jëje nyii. Eï ngue mbia icuã icuã nguia Dios rimba je nyii no nda.

Tata rendi rã ndei Dios quiato

13 Embiquesa rã ño jëingo nguiã mbia je ã. Sã embiquesa turãte no. Eise

quiachamba mose, eicuã tuchi ra cote. Mbia ra emombo chõ cote. Mbia ra irõ ño erese. ¹⁴ Tata rã ño jëingo nguiã mbia Dios quiatoã je ã. Mbia sucha cuasu raã mose ibi ibátee, mbia ra mae ja erese. ¹⁵ Sã nandeico lámpara mendi no. Sã nandeico eati eã no. Sã nandeico emi eã mbaequi re no. Erendi checua chõ nda nandemi nguiã. Mbia resae ja sacuã. ¹⁶ Eĩ jenyete si chõ nguia tata turã na. Mbae resae turã mbia je. Eĩ jenyete mose ra mbia mae jëturã ndese. Ñee turã nda jendu ibatenda je cote.

Jesús mbia mbaaquiato quiato Moisés chimbésari

¹⁷ Dios chee ique ja sacuã ño achu nguiã co. Moisés chee mbutiã sacuã eã ño ngue achu nguiã. Dios chee mbuchecua chee mbutiã sacuã eã ño ngue achu nguiã. ¹⁸ Tachee nyecua jëje. Moisés chee nda ique ja. Ibei ra ua. Ibi abe ra ua no. Moisés chee nguia ra ua eã mbei. Ique ja chee rae. ¹⁹ Dios chee tubiriãte raque mbia je, mbia echee mumbayã sacuã. Emo echee mi mumba mose, Dios biãte ra ũqui, Dios siqui mose ererecuarã tuchi cote. “Dios chee mi emumba”, i mose emo, Dios biãte ũqui. Ae echee mumbayãte quia nae, Diosbi tuchi chõ ũqui nde. Ae ñee nguia mbia je nae, “Dios chee jemumbayã ja” i quia mbia je nae, Diosbi tuchi chõ ũqui nde. ²⁰ Tachee nyecua jëje. Fariseos uturã saã saã tuchi raque. Embesasa abe uturã saã saã tuchi raque. ¡Jë nguia jëingo turã tuchi ũqui si jë! Jë jëingo turã eã mose ũqui si, jëingo eã nda Dios rese, Dios siqui mose mbia rerecuarã.

Paama jenyechi nda emo je, i Jesús

²¹ Amei ñee ngue jeñandu rei ra. “Mbia mo nda ereiquiachí. Nde mbia mo iquia mose, nde abe ra mbia ndeiquia arõte”, i rei que amei nda. ²² Se quia tachee nyecua jëje. Jë paama i choño mose jenongue je, mbia ra jeiquia arõte. “Ndeaquiatuã nde” jenyete mose jenongue je, mbia ra jëiquia arõte. “Ndearacuayã nde” jenyete mose jenongue je, jëso arõte ra tata cuasu. ²³⁻²⁴ Nembae ofrenda rerao mose Dios je, endua rã nyii, emondo nonde ee. Ndenongue mo paama i mose ndeje, ofrenda esecha rã oso ñee ndenongue je. Jeñimbuturã na nguia nyii.

Aquere quiato eso nyebi ofrenda mee Dios je cote. ²⁵ Emo mbia rerecuã mbutueta queta mose nderi, ndeturã ño ee. Echee turã ño ee. Jë ae chõ jeñimbuturã jenyete. I nda ndererao icuã eã. Ndererao mose ra ndetarõ mbei cárcel. ²⁶ Huee ra ereico bei. Nembae mondo ja tuchi chee ee.

Emo mae mose cuña mo ose ose, adulterio i ũqui je

²⁷ Amei ñee ngue jeñandu rei ra. “Emo ninisi rese ra jëingochí”, i rei que ra. ²⁸ Se quia tachee nyecua jëje. Emo mae icuã mose cuña mo ndese, “aque rese nda aico raã ña” i mose, ũqui abe eicuãte. Siqui raanguia erese chõ ũqui nde. ²⁹ Nderesa mae mose mbae icuã ndese, echoo mombo. Nderesa nemingo serí mose mbae icuã nde se, echoo mombo. Coche nderesa mi eremombo nguiã. I nda nderete osoã tata cuásuu. ³⁰ Ndeo nemingo mose mbae icuã ndese, echisia mombo. Coche ndeo mombo nguiã. Ndequiato cutinda raque. I nda nderete osoã tata cuásuu.

Jeninisi ra jemombochí jë, i Jesús

³¹ Amei ñee ngue jeñandu rei ra. “Emo ngünisi mombose mose, sã emombo chõ. Papel mbesa ji emondo ee”, i rei que amei nda. ³² Se quia tachee nyecua jëje. ¡Jeninisi ra jemombochí jë! Jeninisi siqui mose emo ndese, ũqui mose mi ño jeninisi jemombo arõte raque. Jë emombo choño mose, jëingo jeninisi mingo adulterio rese ũqui. Ae emombo ji quereco cote nae, ũqui abe eicuãte no. Adulterio, i chõ ũqui je re.

Jurar jenyete jirichí nda jë

³³ Amei ñee ngue jeñandu rei ra. “Jurar jenyete mose Dios je, jeñee nda jembuchebichí ee”, i rei que amei nda. ³⁴ Se quia tachee nyecua jëje. ¡Jurar jenyete eã mbei tuchi jë! Ibei rí abe jurar jenyete eã jë. Dios recua chõ ibei re. ³⁵ Ibi rí abe jurar jenyete eã jë. Dios ironguia chõ ibi re. Jerusalén ni abe jurar jenyete eã jë. Dios mbae tuchi chõ Jerusalén nde. ³⁶ Jeãqui ni abe jurar jenyete eã jë. Jëa mi mo jembushí aroneate. Co mi jemondei aroneate no. ³⁷ ¡Jurar jenyete eã jë! “Ae” jenyete chõ. “Tei”

jenye chõ. Ûquĩ mii ño jeñee. Jurar jenye mose, eicuãte ùquĩ.

Emo icuã mose jêje, jêturã ño ee

³⁸ Amei ñee ngue jeñandu rei ra. “Emo nderesa mungue mose, nde abe aque resa emungue. Emo ndererĩ siquio mose, nde abe ereĩ esiquio”, i rei que amei nda. ³⁹ Se quia tacheẽ nyecua jêje. Mbae icuã nda jêsaãchĩ mbia icuã je. Emo ucua mose nderitii rese, nderitii ribisho abe eteacuquia ee. ⁴⁰ Emo demandar i mose ndeje, “nembae camisa emondo seje” i mose, emondo chõ ee. Ndeirao nongue abe emondo ee. ⁴¹ “Sembae mbae usi erao jiri seje”, i mose emo ndeje, peebe jiri erao ee. ⁴² Emo ache ache i mose ndeje, emondo ee. “Mbae mo prestar ere seje” i mose emo, emondo ee.

⁴³ Amei ñee ngue jeñandu rei ra. “Ae eturãte riqui ndeje nae, echesequa erese. Ae ndeucuãyã nguia nae, nde abe eucuãyã” i rei que amei nda. ⁴⁴ Se quia tacheẽ nyecua jêje. Echesequa chõ ndeucuãyãsa rese. Mbae turã esaã ño nguia ee. Ae ñee icuã nguia nderĩ nae, echeẽ turã ño nguia nde ee. Ae eicuãte riqui ndeje nae, ùquĩ nii eico ñee turã Dios je. ⁴⁵ Eĩ jenye mose ra Ibatenda riirĩ turã tuchi jê. Dios quiarei eturã mbia ja je. Mbia turã je. Mbia icuã je abe no. Dios quiarei tenda mbusẽ turã mbei mbia turã je. Eicuã je abe no. Dios quiarei ama mbuchaaqui turã mbei mbia turã je. Eicuã je abe. ⁴⁶ Ae eturãte riqui mbia jêje nae, ùquĩ achõ je jêturã mose, eicuãte ùquĩ. Mbia icuã abe mbae turã saãte uquiato achõ je. Eĩ jenyechĩ nda jê. ⁴⁷ Jêquiato achõ je jeñee turã mose, aba biãte ùquĩ. Eĩ ño Dios quiatoã abe nguia ñee turã uquiato je. ⁴⁸ Jê nguia jêingo turã mbei mbia ja je. Sã jendu Ibatenda turã mbei riqui no.

6

Mbae turã jêsaã nyecuayã ño nguia

¹ “Sã mbia mae ja sechio turã ndese”, jenyechĩ nda mbae turã naa mose. Mbia resaa achõ nda mbae turã jêsaã saãchĩ jê. Ûquĩ jêsaã saã mose ra jendu Ibatenda mbae turã mee eã jêje. ² Jêingo mose

mbae mee mee mbaecha reã je, jemondo checuayã ño nguia ee. Mbia mbiirandu randu eã. Ae uturã saã saã nguia nae, ùquĩ na nda jêingochĩ. Dios ra mbae turã mee eã ùquĩ je. “Sã mbia mae ja sechio turã ndese”, jenyechĩ nda jê. ³ Mbae turã jêsaã mose, jêsaã mingue chõ. ⁴ Mbae turã jêsaã nyecuayã ño. Jêingo mose mbae turã naa naa nyecuayã, Dios ae ra mae jêturã ndese. Ae quia ra mbae turã mee nyecua jêje cote.

Eĩ jenye chõ ñee Dios je, i Jesús

⁵ Jeñee mose Dios je, jeñee mingue chõ nguia ee. Uturã naa naasa rã nda jêingochĩ. Ûquĩ ndiqui nyoĩ choĩ mbiásaa ñee sacua Dios je ùquĩ. “Sã mbia mae ja serese secheẽ mose Dios je”, i equia ùquĩ. Mbia riqui mae jate raque erese. Dios quia ra mbae turã mee eã ee. ⁶ Nde ñeese mose Dios je, nde ae chõ echeẽ nguia ee ndechuchúaa. “Sa mbia mae ja serese”, erechĩ nda jê. Nde a e chõ echeẽ nguia ee. Dios ae ra siqui nderese. Dios ae mbae icua ja nguia. Ae quia ra mbae turã mee ndeje cote.

⁷ Nde ñee mose Dios je, hue rĩ beite ra ereicochĩ ñee ee. Eĩ ño Dios icuasa reã nguia ñee ndaque Dios je. “Hue rĩ urecheẽ mbei mose ra Dios ureandu”, i rei nguia. ⁸ Ûquĩ na nda jêingochĩ. Ae mbae ãte riqui jêje nae, ùquĩ Dios icuate quia co. Jeñee nonde ee. “Mbae embu ure je”, jê i nonde ee. ⁹ Eĩ jenye chõ nguia ñee Dios je: Paba Ibatenda, sã mbia ñee turã mbei quia nderĩ.

¹⁰ Mbia rere cuarã ja sacua echu jei íbii. Sã mbia ibatenda riqui siqui beite ndebi rese no.

Sã mbia ibi jenda abe riqui ndebi rese.

¹¹ Ae ra ureu namo, ùquĩ embu rã urechiurã.

¹² Ae uresaã icuã icuã ndeje nae, ùquĩ embutiã ná uresi. Sã ureico tesarei mbia icuã icuã mose ure je no.

¹³ “Mbae icuã jêsaã” jichĩ nda emo ure je jê! Urereaquiatu bei quia mbae icuã si.

Nde mii ño mbia rerecuarã nde.

Nde mii ño ndequirãcuã nde.

Nde mii je mbia ñee turã sacua mbei. Amén.

Eĩ jenye chõ ñee Dios je. ¹⁴ Mbia icuã icuã mose jêje, jêtesarei chõ esi. Eĩ jenye mose

ra Dios Ibatenda abe jeicuã mbutiã jësi. ¹⁵ Jëtesarei eã mose mbia icuã si, Dios abe ra jëicuã mbutiã eã jësi.

“Sã mbia mae ja serese” jenyechĩ nda hui mose jenyiu si

¹⁶ Jenyiu si jëhui mose Dios je, “sã mbia mae jate seyayã ndese”, jenyechĩ nda ñee. Jendesa ia eã techĩ nda aque mose jë. Eĩ ño uturã naa naasa nguiã. Mbia nda mae ja rei nguiã erese. Dios quia ra mbae turã mee eã ee. ¹⁷ Ndehui mose ndechiu si Dios je, ndeya chõ eico. ¹⁸ Sã mbia jiranaã nderiãcuã ndese. Sã Dios ae jirandu nderiãcuã ndese. Dios quia mbae icua jate nguiã. Ae quia ra mbae mee ndeje cote.

Jembaerã ibatenda rese quia jëingo ndua ndua

¹⁹ “Mbae turã tamunua nu a sembaerã aa íbii”, jenyechĩ nda jë. Chicuaquiareĩ nda eu arõte. Emo embuquiachã arõte jësi. Eichoi arõ ndete no. ²⁰ Ibate quia mbae jemunua nua jembaerã. Ibate quia ra chicuaquiareĩ eu eã. Ibate quia ra jembaerã ichoi eã mbei. Ibate quia ra emo embuquiachã eã jësi. ²¹ Jembaerã chi mose ibate, Dios rese ra jëingo ndua turã. Jembaerã chi mose íbii, ibi jenda mii ndese ra jëingo ndua.

Nanderesa mbae resae nanderete je

²² Nanderesa quiarei mbae resae nanderete je. Nanderesa turã mose, nanderete abe ra oso turã. ²³ Nanderesa icuã mose, nanderete abe ra oso icuã icuã no. Tat a rendi rá jëingo bei. Uquí mose ra jëingo jiri jiriã itondáruu.

Mbae isiquia Dios quiato eã

²⁴ Erimba mii mo siqui aronea ererecua nyeremo ndese. Ererecua nyeremo mose, huee ra erimba ererecua nongue ucuayã. Ererecua nongue ra ebite. Eĩ si chõ mbia re. Ae ndua beite quia mbae isiquia rese nae, ũquí siqui aroneate Dios rui. Ae siqui beite quia Dios rese nae, ũquí nguiarei ndua eã jiri mbae isiquia rese.

Dios uquiato teaquiatu bei

²⁵ “¿Mbae ra nandeu re?” jenyechĩ nda quicoi coi jë. “¿Ma tiru ra nandemingue re?” jenyechĩ nda quicoi coi no jë. Mbia

chiu ae ra mbia mingo eã. Mbia irao abe ra mbia mingo eã no. ²⁶ Sã nguireĩ no. Mbae tiquiyã ndaque. Mbae ishao eã ndaque no. Mbae ruacuã eãte raque embae no. Dios ae quiarei embuquiaru quiaru bei. Jë nguiarei Dios queteamba tuchi nguireĩ si. Dios ae jembuquiaru nguiã jë no. ²⁷ Mbi a ae ra tiarõ eã. “Se ra atiarombe”, i raque ndua ndua uchiangui re. Dios ae mbia mbutiarõ nguiã. ²⁸ “¿Ma tiru ra nandemingue re?” jenyechĩ nda pare pare i jë. Sã mbae uti no. Sã mbae uti turãte riqui no. Mbae ao ao eã ndaque. Ninyu mburirã ndirã eã ndaque. ²⁹ Dios ae chõ mbae uti mbuturã nguiã. Mbae uti quiarei eturã jiri Salomón si. Salomón turãte raque. ³⁰ Sã Dios quiata mbuturã no. Quiata mano jeite raque. ¿Mañi nda Dios jembirao eã jë nde no? ¿Mbaerã jëingo Dios icuayãte re? ³¹ “¿Mbae ra nandeu re?” jenyechĩ nda pare pare i jë. “¿Mbae ra nandembei re?” jenyechĩ nda pare pare i jë. “¿Ma tiru ra nandemingue re?” jenyechĩ nda eno jë. ³² Eĩ ño Dios quiatoã nguiã. Jë nguia jendu Ibatenda tesareia mbeite nguiã jësi. ³³ Jë nguia jëingo tuchi Dios rese jenderecuarã. Sã Dios turãte no. Uquí na ño jëingo. Uquí mose ra Dios mbae mee mee mbei jëje. Jenyurã. Jeñimbeirã abe no. Jëiraorã abe no. ³⁴ “Mbae tiã ñochĩ nda seje isamami nde”, jenyechĩ nda pare pare i jë. Isamaminda rese ra jendua nduachĩ namo jë. Namonda mii ndese jendua namo no. Isamami nguiatu jendua isamaminda rese.

7

“Eicuãte que co ra”, jenyechĩ nda emo nii

¹ “Co que eicuãte ra”, jenyechĩ nda emo nii. “Jëicuãte” iã nda Dios jëje chã. ² Mbia icuã mose, jeñeechĩ nda ee. Jëturã mose ee, Dios abe ra eturã jëje. Mbae jemee mee turã mbia je. Dios abe quia ra mbae mee tuchi jëje cote. Jë embisẽ mee mose emo je, Dios abe ra embisẽ mee jëje no. ³ ¿Mbaerã jëingo “eicuã” i emo je re? Jë jëicuã tuchi mose esi. “Mbae ñetẽ ndiqui nderésaa aque”, jenyechĩ nda emo je, jë mbae cuasu rerequia mose jendésaa jë nguiatu. ⁴⁻⁵ “Mbae turã ndese chõ jëingo”,

jenyechĩ nda jẽ jẽicuã mose jẽ. “Mbae ñetẽ tasirõ nderesa si”, jenyechĩ nda mbae cuasu siqui mose jendésaa jẽ. Jẽ nguia jêturã jêsaã saã ñote nguiã aque. Jẽ nane nguia jêturã ndiqui. Aquere quia jeñee emomingo turã cote. ⁶ Sã mbia mondiqui perro rã si no. Teasu socoi quia rã abe no. Ûquĩ nguiarei mbia icuã mbei Dios cheẽ andure. Dios cheẽ isi teã teã. Dios cheẽ jêsenei eã ùquĩ je cote. Emo je quia jêsenei cote.

Jeñee mose Dios je, mbae ra emondo jêje

⁷ Jeñee mbei mose Dios je, mbae ra emondo jêje. Jẽ mbae mondequia mose, jêtea rae. Jẽ eiquesa mbuu mbuu mose, ùquĩ mose ra embuquiata jêje no. ⁸ Ae ñee mbeite quia Dios je nae, mbae ra Dios mondo ee. Ae mbae mo sequia beite quia nae, tea rae. Ae eiquesa mbuu mbuu quia no nae, equia ra ee no. ⁹ Jendiirĩ “mbichae embu seje” i mose, ¿sita ra eru mee ee re? ¹⁰ Jendiirĩ “sira embu seje” i mose, ¿mbei ra eru mondo ee re? ¹¹ Mbia icuã nyee mbae turã mondo mondo quia nguiirĩ je ã. Jendu Ibatenda quia ra mbae turã tuchi mee jêje, jeñee mose ee. ¹² Sã jêyate riqui mbia siqui turã mose jêje no. Eĩ jenye si chõ nguia siqui turã mbia je no. Moisés chimbesa tuchi chõ ùquĩ nde. Dios quiato cose ndare chimbesa ja chõ ùquĩ nde.

Eiquesa chumumbi

¹³ Eiquesa chumumbi rĩ ño jêso ique jẽ. Aque ñeenda oso quia tata cuasu nae, eicoi chõ aque re. Ae eiquesa ngasẽ nguia tat a cuasu nae, eicoi chõ aque no nde. Hue rĩ mbia tubiriã ndiqui nguiã ùquĩ. ¹⁴ Ñeenda nongue rui quiatu ngasẽ nguia Dios je. Aque ñeenda quiarei echumumbi. Echumumbi chõ aque ñeenda iquesa re. Mbia mii mii ño siqui nguiã aque ñeenda rui. Ûquĩ nguia ra Dios mingobei.

Sã ira ae ia ae ae no

¹⁵ Ae Dios cheẽ senei ñooño nguia nae, aba mbiirĩ irĩsa chõ ùquĩ nde. Ûquĩ ndei Dios quiato raã ñooño. Mbia mbiirĩ irĩsa Dios rii. ¹⁶ Sã ira ae e a ae ae no. Uva a rã eã nda nyu a ia no. Ea ae eno nde. Higo a rã eã nda isio rashĩ a no. Ea ae eno nde. ¹⁷ Eĩ si chõ mbia no nde. Mbia turã nda siqui mbae

turã ndese. Mbia icuã nda siqui mbae icuã ndese no. ¹⁸ Ira turã mose, ea abe ra eturã. Nyiabi aronea. Ira icuã mose, ea abe r a eicuã no. Ei rã si ra ea. ¹⁹ Ira mo ia turã eã mose, nyisia rae. Mendi rae. ²⁰ Dios cheẽ nenei neneisa chõ jẽicua rã. Dios cheẽ ndui si eriqui turã mose, Dios quiato chõ ùquĩ nde. Dios cheẽ ndui eã mose, Dios quiato eã ño ùquĩ no nde.

Mbia ra ique ja eã

²¹ “Sererecua” i rei mbia tubiriã nguiã seje ã. Ûquĩ nguia nda ique ja eã nguiã serécuaa. Ae siqui Seru Ibatenda cheẽ ndui nae, ùquĩ mii ño nda ique serécuaa. ²² Aque mose ra mbia ñee tuchi seje. “Jesús, ndecheẽ ngue urembuchecua checua tuchi quia mbia je resẽ. Aba checuayã ngue urejea jea tuchi quia mbia si nderĩ ndesẽ. Mbia mae sayã ngue uresaã saã tuchi quia nderĩ ndesẽ”, i tuchi i rei ra mbia seje. ²³ Ûquĩ je ra acheẽ. “Co aico jẽicuayã mbeite co resẽ. Jêso serecha. Mbae icuã aosa chõ jênde”, ae ra ee.

Tuchua nyeremo

²⁴ Ae siqui serese, ae secheẽ mumbayã nguia nae, ùquĩ nguiarei eturã tuchi. Tuchua ãtã aosa rã ño ùquĩ nde. Sã eaquiato mo tuchua ao sita turã arõ no. ²⁵ Ama nyaaqui mose, amandi cuasu raque. Quiririã abe ichu ichu raque tuchu a je. Tuchua mbuquiata aroneate. Sita turã arõ nguia ngue uchuchu a ao nguiã. Eĩ si chõ secheẽ mumbasa rã a nde. Tuchu a ãtã aosa rã si. ²⁶ Ae secheẽ mumba quia eandu mose nae, eaquiato na ño ùquĩ nde. Sã eaquiato mo uchucharã ao no. Aque quiarei ibi ribicoi tuchiã. Sita quiishĩ arõchi chõ uchuchua ao nguiã. ²⁷ Ama nyaaqui mose, amandi cuasu ee cote. Quiririã abe ichu ichu tuchua je. Aque quiarei iãcuã mbucoi asi mondo. Eĩ si chõ secheẽ mumbasa re, i que Jesús ra.

²⁸ Jesús que hui ucheẽ si cote ra. Mbia que nyuruira tuchi echeẽ andu ra. ²⁹ Ererecua rã ño ngue eriqui nguiã mbia mbaaquiato quiatu.

8

Jesús mbia leproso mbucherõ

¹ Jesús que nguichi ibi ibate si cote ra. Mbia cuabête que siqui erui ra. ² Emo ndasi que tu ee ra. Leproso, i que aque erasi je ra. Tu que ngoi ngũĩã ndese ñee Jesús je ra. —Sererecua, nde sembucherõse mose, sembucherõ se, i que ñee Jesús je ra. ³ Jesús que oco erese cotê ra. —Echerõ cote, i que ee ra. Echeẽ mosebe que nyerõ nda. ⁴ Jesús que ñee ee ra. —¡Erecheẽchĩ nda mbia mo je jẽ! Eso nderasiã ndeacuquia sacerdote je cote. Moisés cheẽ ndui si chõ mbae mo emondo Dios je. Eĩ nda mbi a jirandu nderasiã ndese cote, i que Jesús ñee ee ra.

Jesús soldado rerecua rimba mbucherõ

⁵ Jesús que oso sucha tubiriã Capernaum cote ra. Soldado rerecu a mo ngue tu ñee ee ra. Capitán ngue ae ra. ⁶ —Sererecua, serimba rasite riqui sechuchua huee. Erasi tuchi. Umi umi sayã tuchi, i que capitán ñee Jesús je ra. ⁷ —Taso embucherõ, i que Jesús echeẽ mose ra. ⁸ Capitán ngue ñee Jesús je ra. —Seicuãte aico co, Jesús. Sechuchua ra ereiquechĩ. Echeeño. Ndecheẽ achõ ño emondo serimba mbucherõ sacua. ⁹ Se abe sererecua riqui co. Echeẽ amumba aroneate quia co. Se abe soldados rerecua aico nguiã co no. Secheẽ abe emumbayãte quia co no. Eso, i mose, secheẽ mumbayãte no. Echu, i mose, secheẽ mumbayãte no. Se neẽ mose serimba je, secheẽ mumbayãte no. Ndequirãcuã na eãte raque se, i que capitán ñee Jesús je ra. ¹⁰ Echeẽ andu mose que Jesús nyuruirate ra. Ñee ngue ngue-senda je ra. —Tacheẽ nyecua jẽje. Capitán ndiqui seicua tuchite co. Seicua tuchite equia judíos mo si co. ¹¹ Tacheẽ nyecua jẽje. Ae judíos eã emo jenda ja nae, ùquĩ tubiriã nda siqui Dios rese. Dios siqui mose mbi a rerecuarã. Ùquĩ tubiriãte ra quiaru turã Abraham ndese. Isaac rese. Jacob rese no. Judíos eã ndaque ùquĩ. ¹² Dios quia ra judíos mombo itaicuee. Itondáruu. Huee ra nyeseo tuchi cote. Erasite ra huee cote, i que Jesús ñee judíos riĩ nda. ¹³ Jesús que ñee capitán je cote ra. —Eso chõ ndechuchúaa cote. Ereico seicuate co. Nyebe ndecheẽ amumba eã nguiã nderimba mbucherõ, i que Jesús ee ra. Jesús cheẽ mosebe que erimba nyerõ nda.

Jesús Pedro ninisi si mbucherõ

¹⁴ Jesús que oso Pedro chuchua cote ra. I que Pedro chari rasi u nyaara ee ra. Eracu tuchi que ra. ¹⁵ Jesús que oco ari o rese ra. Eracu que ti i cote ra. Ari que juã cote ra. Mbae que echao chao quia mbia chiurã cote ra.

Jesús mbia rasi chumumbara mbucherõ

¹⁶ Itondaru ramo mose que mbia erasi rurucuaẽ cuaẽ tuchi Jesús je ra. Ae aba checuayã quereco qui a nae, ùquĩ ndurucuaẽ tuchi Jesús je. Aba checuayã ngue usẽ usẽ nguia mbia si Jesús cheẽ mose ra. Erasi chumumbara que embucherõ cherõ tuchi quia ra. ¹⁷ Ùquĩ mose que Isaías cheẽ io cote ra. Eĩ ño ngue Isaías embesa cose ra: “Dios rucucha que nandeicuã sirõ nandesí ra. Dios rucucha que nanderasi sirõ nandesí no nda”, i que Isaías embesa ra. Ùquĩ ngue io cote ra.

Jesús rui taico, i raque emo

¹⁸ Mbia cuabête que Jesús mamate ra. Nyebe Jesús ñee nguiã uchimbaaquiato je. —Nyao rã sobei, i rei que ee ra. ¹⁹ Aque mosete que embesasa mo ñee ee ra. —Taico bei nderese. Ndeso mose manguiti, se abe ra aso bei quia nderese, i rei que ñee Jesús je ra. ²⁰ Jesús que ñee ee ra. —¿Mbae rasi ra eresaã saã serese re? Eoita quia ecua jiri re. Nguireĩ nguia equisa jiri no nde. Se quia sequisayã mbei re, i que Jesús ee ra. ²¹ Echimbaaquiato mo ngue ñee ee ra. —Sererecua, sã paba mano na. Aquere quia ra aico bei nderui cote, i rei que Jesús je ra. ²² Jesús que ñee ee ra. —Sã mbia ataque chõ nderu chati. Eico chõ serui nde, i que Jesús ñee ee ra.

Jesús quiririã icuã icuã mbutiba; ama ndebera abe

²³ Jesús que ua canoa ye cote ra. Uchimbaaquiato rese. ²⁴ Ama ndiit e re mose que quiririã icuã icuã ndu ee ra. I rebera que ique ique tuchi quia canoa ye ra. Jesús que uque oso quia canoa ye ra. ²⁵ Nyebe echimbaaquiato Jesús mumba nguiã. —Urembaaquiatusa, echumumba. Ureraaro nã. Nandemanochĩ nda re, i que ñee Jesús je ra. ²⁶ Jesús que ñee uchimbaaquiato u je ra. —¿Mbaerã jẽsiquichete riqui re? ¿Seicuayãte equia ã

nde? i que Jesús ñee ee ra. Nyuruã ngue ñee asite quiririã je cote ra. Ama je abe no. Quiririã ngue ti i echeẽ mose cote ra. Ama abe. ²⁷ Echimbaaquiatu que nyuruira tuchi mae Jesús quirãcuã ndese ra. —Quiririã echeẽ mumbayã ñochĩ. Ama abe echeẽ mumbayã ñochĩ, i que ñee ñee nyue cote ra.

Jesús aba checuayã icuã jea

²⁸ Jesús que ngasẽ ama ndobei cote ra. Gadara, i que hue ibi je ra. Amei mo nyeremo ngue ngaẽ ngasẽ Jesús je ra. Mbia raaque tãsa si chõ ngue ecuaẽ ngasẽ Jesús je ra. Aba checuayã icuã ño ngue siqui tuchi nguiã ùquĩ ñiangui re ra. Aba checuayã ño ùquĩ mbũcuã tuchi nguiã. Nyebe mbia mo hue rurubiã mbei nguiã. ²⁹ Ùquĩ ngue ñee asite cuaẽ Jesús je ra. —¿Mañi ere ra equia ure je re, Jesús? Dios rucucha chõ nde re. ¿Urembasi jei sacua ño erechu aa re? i que ñee tuchi Jesús je ra. ³⁰ Chiasu socoli tubiriã ngue chi quiaru huee rurubi ra. ³¹ Nyebe aba checuayã icuã ñee jate nguiã Jesús je. —Nde urejea mose mbia si, chiasu chiangui re ureso rã, i que aba checuayã ñee Jesús je ra. ³² —Eno, i que Jesús ee ra. Nyebe aba checuayã usẽ ja nguiã amei ñia si cote. Chiasu chiangui re que echoi ja ra. Chiasu que uchã ja choi nyiichere ama nimia mbucu rĩ nda. Ama ndisha ye que echoi ja mano nda. ³³ Chiasu raarõsa mundite que ra. Mae mose erese. Nyoĩ que mbia mbiirandu jate chiasu rese ra. —Jesús que amei mbucherõ nda. Aba checuayã ngue ejea esi ra, i que maesa erese ñee mbia ataque je ra. ³⁴ Nyebe hue jenda nyoĩ ja nguiã ñee Jesús je. —Eso rã urerecha urerecha si, i jate que hue such a jenda ñee Jesús je ra.

9

Jesús emi sayã mo mbucherõ

¹ Jesús que ua canoa ye cote ra. Nyoĩ que sobei ra. Ngasẽ ngue uchuchúaa cote ra. ² Mbia que erasi mo curucuaẽ quisa ye ee ra. Emi sayãte que ae ra. —Erurucuaẽsa riqui seicua ùquĩ, i que Jesús ñee uchiangui re ra. Nyebe ñee nguiã emi sayã je. —Echimbã chõ, Echo. Ndechisaã mbae icuã

ambutiã nguia ndesi a, i que Jesús ñee umi sayã je ra. ³ Embesasa que ñee nyue ra. —Jesús riqui Dios ibatenda raã naa ñochĩ co, i que ñee nyue ra. ⁴ Jesús que ùquĩ ndua ndua icuate quia ra. Nyebe ñee nguiã ee cote. —¿Mbaerã jẽingo ndua ndua icuã nde? ⁵ ¿Ma mbaranguiatuã eã jiri jẽje re? ¿Mbia icuã mbutiã esi ere? ¿Mbia rasi mbucherõ ere no? ¿Ma mbaranguiatuã eã jiri jẽje re? ⁶ Dios rucucha rei se. Mbia chiao icuã mbutiã aquiatu chõ se re. Sequirãcuã tateacuquia jẽje, i que Jesús ñee ee ra. Ñee ngue erasi je cote ra. —Ehuã na. Ndechuchua eso cote. Ndequisa abe erao, i que Jesús emi sayã je ra. ⁷ Emi sayã ngue juã asi oso ra. ⁸ Mbia que nyuruira ja u mae emi sayã ngata rese ra. Mbia que ñee turã ja Dios quirãcuã ñi cot e ra.

—Serui bei eico, i Jesús Mateo je

⁹ Mateo, i que emo je ra. Ae que impuestos isi isi bei quia mbia rerecua mbaerã nda. Jesús que ngasẽ ee cote ra. Ngoi que huĩ plata isi isi impuestorã nda. —Serui bei eico, i que Jesús ñee ee ra. Ae Mateo juã oso nguiã erui. ¹⁰ Emo mose que Jesús nyoĩ quiaru erese ra. Impuestos isi isiquia ata que chi quiaru erese huee ra. Echimbaaquiatu abe rese. Mbia icuã mo abe que chi quiaru erese no nda. ¹¹ Fariseos que ñee icuãte Jesús chimbaaquiatu je ra. —¿Mbaerã Jesús riqui quiaru mbia icuãte rese re? i que ñee nda. ¹² Nyebe Jesús ñee nguiã ee. —Sã mbia rasiã ndiqui aba mbucherõsa requia eãte no. Sã erasi chõ ndiqui erequia no. ¹³ ¿Ã embesa ji jẽicuayãte re?

“Mbae mo jemee seje”, ae eã nguiã jẽje co. “Jẽya eã ño mbia rese”, ae chõ nguiã jẽje co, i que embesa ji ra. Ùquĩ embesa ji jẽicua jiri ae. “Jenyu seje”, aeã ngue u nguiã mbia turã je. Mbia icuã je chõ ngue achu nguiã “jenyu seje” i, i que Jesús ñee ee ra.

Jesús chimbaaquiatu hui ãte uchũu si

¹⁴ Juan ñimbaaquiatu que ngasẽ ñee Jesús je ra. —Ure quia ureico nguiã hui hui urechiu si ã. Fariseos chimbaaquiatu abe hui hui quia uchũu si no. ¿Mbaerã ndechimbaaquiatu riqui hui ãte uchũu si ã nde? i que ñee Jesús je ra. ¹⁵ Jesús que ñee

ee ra. —Sã emo ndiqui ngũinisirã isi ramo no. Sã eresenda iate riqui quiaru erese no. Sã eriqui hui aroneate uchü si aque mose no. Sã eru riqui mano emo mose no. Aque mose quiatu ra equiato hui uchü si cote. ¹⁶ Sã emo ndiqui tiru yasu m̄ aroneate tiru ima sorei rese no. Eyasu ra nyaacua quiata eima si. Soro icoi tuchi ra cote. ¹⁷ Sã emo mbaeri rasi ramo nderecoquiatu eã eriru ima ye no. Mbae ire ima ye ererecoquiatu aronea ño ñene. Eri rasi ra ñimatã ño mbae ire ndoro. Eri ra uchẽ ja. Mbae ire abe mb̄cuãte ra cote. Mbaeri yasu quia nda equerecoquiatu nguiã mbae ire yasu ye. Soroã sacua, i que Jesús ñee ee ra.

Jesús Jairo riirĩ mbucherõ; ari mo abe mbucherõ

¹⁸ Jesús cheẽ mose que judío rerecua mo ngasẽ ee ra. Jesús jii que ngoi ñee ee ra. —Qui seriirĩ si mano namote qui. Nyao rã erea. Ndeoco mose erese, quera si rae, i que ñee Jesús je ra. ¹⁹ Jesús que juã oso erese ra. Echimbaaquiuiatu abe nyoĩ erese. ²⁰ Ari rasi mo abe que oso quia mbia ite rĩ nda. Eruqui nda uchẽ mbei quia ee ra. Doce años nyee. Eruqui nda tibayã mbei ee ra. Ari que tu Jesús quite quti erichã nda. Jesús irao ai rese que oco cote ra. ²¹ —Seoco mose Jesús irao rese ra acherõ, i nda ra. ²² Jesús que uba ñee ari je ra. —Coche ñene, Echo. Seicuate que se ra. Nyebe arembucherõ nguiã, i que Jesús ñee ari je ra. Aque mose tuchi que eruqui tiba ee cote ra. ²³ Jesús que ngasẽ nyee judío rerecua chuchua ra. Mbia que nyeseo seo quia ãquẽ ndaque rese ra. Mbia que irasei rasei eraaque tiquia nonde ra. ²⁴ Jesús que ñee ee ra. —¡Qui jê! Jêso ja itaicuee. Eriirĩ mano eã ño nguiã. Uque chõ ñene, i que ñee mbia je ra. Mbia que iquia iquia echeẽ mose ra. ²⁵ Jesús que mbia mondo ja chee itaicuee ra. Oso que i que eraaque rea cote ra. Eraaque o que eisi ra. Quera si que cote ra. Nyuruã ngue cote ra. ²⁶ Mbia hue jenda que jirandu jate erese ra. Jesús eraaque mbuquera rese.

Jesús eresayã nyeremo mbucherõ

²⁷ Jesús que oso hue si cote ra. Mbia resayã nyeremo ngue nyoĩ erui ra. Ñee mombo mombo que Jesús je ra. —¡Jesús!

¡David rucucha! ¡Ndeyayã ño urerese jê! i que ñee Jesús je ra. ²⁸ Jesús que oso ique tuchúaa cote ra. Ae eresayã nyoĩ nguiã erurubi. Jesús que ñee ee ra. —¿Sequirãcuã jembucherõ arõte reĩ nguiã jêje re? i que Jesús ñee ee ra. —Ae, i que eresayã ñee ja ee ra. ²⁹ Ae Jesús oco nguiã eresa rese cote. —Seicua mose ra jaembucherõ, i que ra. ³⁰ Eresa que nyerõ ja ee cote ra. —Sã mbia jiranua serese, i tuchi rei que Jesús ñee ee ra. ³¹ Eresayã ngue Jesús cheẽ mumba tuchi ra. Nyoĩ que mbia mbiirandu tuchi Jesús rese hue rĩ ja ra.

Jesús echeẽ nguiã mbucherõ

³² Jesús so mose que mbia echeẽ nguiã mo curucuaẽ ee ra. Aba checuayã icuã ngue siqui aque chiangui re ra. ³³ Jesús que aba checuayã icuã jea esi ra. Echeẽ nguiã ngue ñee turã cote ra. Nyebe mbia tubiriãte chi nguiã nyuruira mae erese. —Emo ngue ũquĩ saã eã mbeite quia aa Israel ra, i que nyuruira jate ra. ³⁴ Fariseos quiatu que ñee icuãte Jesús rĩ nda. —Satanás quirãcuã je chõ Jesús riqui nguiã aba checuayã jea jea mbia si co, i rei que fariseos ñee nda.

Jesús ia eã tuchi mbia tubiriã ndese

³⁵ Jesús que nyoĩ sucha mbuchesea sea ja ra. Mbia mbaaquiatu quiatu ja ra. Mbia chumunua nuásaa jate. Dios cheẽ ngue esenei senei tuchi quia ee ra. Mbia rasi chumumbara que embucherõ cherõ nguia ra. ³⁶ Mbia rasi rasi tuchi que ee ra. Mbia ia eã tuchi que ee ra. Mbia quiachã je rã ngue ee ra. Sã oveja riqui quiachã jate eraarõ iriã no. Eĩ si chõ mbia nguiã Jesús je. Nyebe Jesús ia eã tuchi riqui nguiã erese. ³⁷ Jesús que ñee uchimbaaquiatu je ra. —Secheẽ andusa reã ndei etubiriã jiri. Secheẽ nenei neneisa quia rei co m̄ jiri. ³⁸ Jeñee nguia Dios je. “Dios, ndecheẽ nenei neneisa mo emondo tuchi. Mbia mbiirandu randu sacua”, jenyẽ chõ nguia Dios je. Sã mbaecha mbia mo mondo mbae a ireĩ ishao shao equiche mose no, i que Jesús ñee ee ra.

10

Jesús mbia doce irabo uchimbaaquiaturã

1 Jesús que “jenyu” i uchimbaaquiatu doce je ra. Uquirãcuã ngue emee uchimbaaquiatu je cote ra. Aba checuayã icuã jea jea sacuã mbia si. Mbia rasi chumumbara mbucherõ cherõ sacuã abe no. 2 A ño echimbaaquiatu ã nde:

Simón (Pedro, i abe que mbia quia ee ra.)

Andrés (Simón nongue rei Andrés.)

Jacobo (Zebedeo riirĩ ndei Jacobo.)

Juan (Jacobo nongue rei Juan.)

3 Felipe

Bartolomé

Tomás

Mateo (Impuestos isi isiquia rei Mateo.)

Jacobo (Alfeo riirĩ ndei Jacobo.)

Lebeo (Tadeo, i abe que ee ra.)

4 Simón el Cananista

Judas Iscariote (Aque que Jesús mondo mbia icuã je ra.)

Ûquí ja que Jesús irabo ra.

Jesús uchimbaaquiatu doce mondo ucheẽ nenei nenei sacuã

5 Jesús que ùquí mondo ja ucheẽ nenei nenei sacuã nda. Emondo nonde que ñee ee ra. —Judíos achõ jembaaquiatu quiatu quia. Jẽsochĩ nda judíos eã je. Samaria jenda chuchua abe ra jẽsochĩ. 6 Israel jenda chõ jembuchesea sea oso. Ovejas quiachã je rã ño Israel jenda re. 7 Jẽso mose, secheẽ jẽsenei senei mbei quia ee. “Mbia rerecuarã tuchi ra Dios cote”, jenyee oso secheẽ nenei nenei judíos je. 8 Mbia ire rasi jembucherõ cherõ nguia. Mbia rasi chumumbara jembucherõ cherõ nguia. Mbia raaque abe jembuquera quera quia. Aba checuayã icuã abe jẽjea jea quia mbia si. Sequirãcuã ngue amee ñooño jẽje. “Mbae mo jemee na seje eribishorõ”, ae eã tuchi se quia jẽje co. Nyebe jẽ abe mbae turã jẽsaã ñooño mbia je. “Mbae embu se”, iã mbia je. 9 Mbae mo nda jendaochĩ icua jẽso mose. Mbae isiquia mo nda jendaochĩ icua. Mbae isiquia ñete mo nda jendaochĩ icua. 10 Mbae riru mo abe ra jendaochĩ no. Jẽrao nongue abe ra jendaochĩ no. Jẽiyao nongue abe ra jendaochĩ no. Jenyitochoquia abe ra jendaochĩ. Ae je ra mbae turã jẽsaã saã nae, sã ùquí ae riqui jembuquiaru quiaru turã mingo. 11 Jengasẽ mose sucha tubiriã mo, mbia turã mo jẽtea huee. Aque chuchua mii

ño jẽingo uque. Tuchua ra jembuchesea seate chĩ jẽingo mose huee. Ae ra jengue nyii nae, hue tuchua bei chõ jẽingo uque.

12 Jẽique mose emo nyuchúaa, hue jenda je jeñee turã no. Saludar jenyee turã ee no. 13 Hue jenda siqui turã mose, Dios quirãcuã jemee ee. Siqui turã eã mose, Dios quirãcuã jẽisibe esi. 14 Hue jenda jẽisi sereã nea mose, jẽhui chõ esi. Hue jenda jeñee andu sereã mose, jẽso chõ hue si. Jẽi tubi jembutomo tomo ee. 15 Tacheẽ nyecua jẽje. Ae ra jeñee isi sereã nae, ùquí nda Dios mbasi tuchi. Uquiatoã nda embasi ja aque mose. Sodoma jenda ra Dios mbasi raque. Gomorra jenda abe no. Ae jeñee isi sereã nae, ùquí nguia ra embasi tuchi Sodoma jenda si. Gomorra jenda abe si.

Mbia icuã icuã tuchi ra jẽje, i Jesús

16 A aico jemondo secheẽ nenei nenei sacuã mbia je a. Sã nyacua icuãte riqui oveja je no. Eĩ si ra mbia icuã icuãte jẽje. Oveja seteã na ño jẽingo. ¡Jẽaracua chõ nguia jẽ! Sã mbei aracuate riqui no. Mbae icuã mo nda jẽsaãchĩ jẽ. Sã nyurushi riqui mbae icuã naa eã mbeite no. 17 ¡Sã jẽ! Mbia icuã icuãte ra jẽje. Jemburĩ irĩ ndae. Jemee mee icuã nda mbia rerecuã je. Jẽiruã nua nda mbia chumunuásaa. 18 Mbia icuã icuãte ra jẽje serĩ. Mbia rerecuã je ra jenderao icuã. Eĩ jenyee mbia rerecuã mbiirandu randu serĩ. Judíos eã abe mbiirandu randu serĩ. 19 Jemee mose mbia rerecuã je, pare pare jenyechĩ nda jẽ. “¿Manyae ra ùquí ñee ndibishorõ nde?” jenyechĩ nda pare pare i jẽ. Dios ae chõ nda jembucheẽ turã nuiã nguia mbia je aque mose. 20 Jẽ ae ra jeñee eã. Espiritu Turã ae nda jembucheẽ nguia mbia je. 21 Jenongue ra jemondo chee mbia icuã je. Jẽiquia sacuã. Jendu abe ra jemondo chee mbia icuã je. Jendiirĩ abe ra jemondo chee mbia icuã je. Mbia icuã nda jemo iquia iquia chee. 22 Mbia ra jẽucuyã jate serĩ. Ae ra siqui bei serese, ùquí nda Dios mingo bei. 23 Mbia icuã icuã mose jẽje sucha moo, jẽso chõ sucha tubiriã nonguee. Tacheẽ nyecua jẽje. Achu jeibe ra se. Sucha Israel jenda jembuchesea sea ja eã mose chõ nda achu jei.

²⁴ Jengasu ra jěsaã saãchĩ sesi jě. Se chõ jembaaquiatusa re. Embaaquiatusa quia ecuasú jiri echimbaaquiatusa si re. Ererecua quia ecuasú jiri erimba si re. ²⁵ Coche jěingo nguiã se rá si. Sã mbia icuã icuãte riqui seje no. Eĩ si ra eicuã icuã jěje no. Sã mbia “Satanás” i ñee icuã seje no. Eĩ si ra ñee icuã icuã jěje no. Serimba je no.

Dios riqui jendeaquiatusa bei co

²⁶ Jěsiquiche quichechĩ nda ñee icuã icuã je si jě. Ae mbia saã nyecuayã cuayã nguia nae, ùquĩ nda nyecua ja cote. Ùquĩ nda mbia icua ja cote. ²⁷ Ae rĩ aico ñee nyecuayã cuayã jěje nae, ùquĩ jěsenei senei turã mbuchecua mbia je cote. Ae asenei senei nguia jěísaa nae, ùquĩ jěsenei senei turã mbuchecua mbia je cote. ²⁸ Ae “taiquia” i quia jeni nae, ùquĩ si ra jěsiquichechĩ jě! Ae aba mombo serite quia tata cuasu nae, aque si quiatusa jěsiquiche. Aque si quiatusa jěsiquiche tuchi jě. ²⁹ Aba queteamba eã jiri raque nguireĩ. Mbae isiquia mumba eãte raque nguireĩ. Dios quia ra tesareia nguireĩ mo si. Nguireĩ mo ngoi mose íbii, Dios riqui eicua jate ã. ³⁰ Dios riqui jě mii mii icua jate co. Jěa mii mii abe eicua jate quia co. ³¹ Jěsiquichechĩ nda jě. Dios quiatusa queteã tuchi nguia jendese nguireĩ mo si.

Jesús quiatusa chõ se re, jenyechecua chõ nguia mbia je

³² “Jesucristo quiatusa chõ se re”, ae i quia mbia je nae, ùquĩ ñi nda acheẽ turã se abe. “Sequiatusa chõ ã nde”, ae ra Paba Ibatenda je. ³³ “Jesucristo quiatusa chõ se re”, ae i ãte quia mbia je nae, ùquĩ ñi nda acheẽ turã eã se abe. “Sequiatusa eã ño ùquĩ nde”, ae ra Paba Ibatenda je.

Achu chõ nguie mbia mbuchao chao nyesi resẽ, i Jesús

³⁴ ¿Achu reĩ mbia mbuturã turã sacua serimba je jěje re? Tei. Achu chõ nguie mbia mbuchao chao nyesi resẽ. Mbia icuã icuã nda uchue serĩ. Emo emo nda siqui serui. Emo emo nda siqui icuã icuãte ee. ³⁵ Emo nda eicuãte ngu je serĩ. Cuña mo nda eicuãte usi je no. Acuan mo nda eicuãte uchari je serĩ no. ³⁶ Tuchua jenda

ra nyao nyao nyesi. Emo nda siqui serese serimbarã. Eataque ra nyao nyao esi. ³⁷ Ae nyesequa tuchi quia ngu rese sesi nae, ùquĩ nda serimbarã eã. Ae nyesequa tuchi quia usi rese sesi nae, ùquĩ nda serimbarã eã no. Ae nyesequa tuchi quia nguiirĩ ndese sesi nae, ùquĩ abe ra serimbarã eã no. ³⁸ Ae ra siquiã serui, ùquĩ nda serimbarã eã. Ñe mano sereãte serĩ, ùquĩ nda serimbarã eã. ³⁹ Sã mbia nduate quia serese. Ae nduate quia nyiese nae, ùquĩ nda nyoĩ eãte ibate. Ae ndua eãte quia nyiese nae, ùquĩ nguia ra nyoĩ ibate.

Dios ra mbae turã mondo mbia turã je

⁴⁰ Ae ra eturã ndiqui jěje nae, seje abe chõ nda eturã ndiqui. Ae eturã ndiqui seje nae, semondosa je abe chõ eturã ndiqui nguiã. ⁴¹ Ae eturã ndiqui Dios cheẽ mbuchecua je nae, Dios ra mbae turã mondo ee. Sã mbae turã mee ucheẽ mbuchecua je no. Ae eturã ndiqui echiã mbuquishĩ ji je nae, ùquĩ je abe ra Dios mbae turã mondo no. ⁴² Tacheẽ nyecua jěje. Emo sechimbaaquiatusa iseĩ mbiu turã mose serĩ, mbae turã abe ra Dios mondo aque je no, i que Jesús ñee uchimbaaquiatusa je ra.

11

Juan el Bautista mbia mondo ñee Jesús je

¹ Jesús que hui ñee uchimbaaquiatusa doce je cote ra. Aquere que esi Dios cheẽ nenei nenei hue rurubinda je cote ra.

² Juan ngue chĩ cárcel nda. Hue eñi mose que jirandu Cristo chisaã ndese ra. Uchimbaaquiatusa nyeremo ngue emondo Jesús rea ra. Ñee sacua ee. ³ —Jěso ñee Jesús je. “‘Cristo ra tu’, i beite equia ã nae, ¿ae nde re? ¿Cristo ra uresaarõ arõ mbei quia re?” jenyese oso Jesús je, i que Juan uchimbaaquiatusa mondo erea ra. ⁴ Jesús que ñee Juan nimba je ra. —Ae rese jemae nae, ùquĩ jěsenei oso Juan je. Ae jeñandu nae, ùquĩ abe no. ⁵ Eĩ jenyese chõ ñee Juan je: “Jesús que eresayã mbucherõ nyerõ nguia ra. Ecuatayã abe mbucuat a cuata. Eire rasi abe mbucherõ nyerõ. Eraaque abe mbuquera quera. Ucheẽ turã nguie esenei senei tuchi quia mbaecha reã je ra”, jenyese oso Juan mbiirandu. ⁶ Emo hui eã mbei

mose sesi, aque ia tuchi ra siqui cote, i que Jesús ucheẽ mondo Juan je ra.

⁷ Juan ñimondo que nyebi nyo: Juan ndea cote ra. Jesús que ñee mbia ja je Juan ñii cote ra. —¿Mbae rese mae jẽso turúquiaa re? ¿Quiririã idioi ichu ichu rese chõ jẽso mae nde? Quiririã ndese mae eã ngue jẽso resẽ. ⁸ ¿Emo irao turã ndese jẽso mae nde? Ûquĩ ndese eã ngue jẽso mae ndesẽ. Eirao turã siquiã nguiã turuquia ñi. Ae siqui quia mbia rerecua chuchua nae, ùquĩ nguia eirao turã ndiqui nguiã. ⁹ Juan ndese mae ño ngue jẽso turúquiaa resẽ. Dios cheẽ nenei neneisa tuchi chõ ae mbia mo si re. Ae chõ mbia mingoquiato quiato nguiã se ñee sacua mbia je. ¹⁰ Sã embesa ji riqui ñee no:

Secheẽ nderaosa tamondo ndenonde.

Ae ra mbia mingoquiato ndeje, nde ñee sacua ee,

i que embesa ji ñee nda. Juan ñii ño embesa ji riqui nguiã ñee. Nyebe Juan ndu nguiã senonde. ¹¹ Tacheẽ nyecua jẽje. Juan el Bautista quiarei i tuchi raque mbia ñiinda ja si. Ae ra siqui tuchi Dios rese erimbarã cote nae, ùquĩ nguia ra i tuchi Juan si cote. ¹² Juan Dios cheẽ nenei nenei namo mosenda bei chõ mbia riqui nguiã ngaẽ ngaẽ Dios cheẽ andu ã. Mbua bite Dios siqui mose mbia rerecuarã. ¹³ Juan tu nonde chõ embesa ji riqui nguiã ñee j a serĩ. “Dios rucucha ra tu emo mose”, i serĩ. Sechu eã mose. Juan nane ngue “co eru quia co” i ñee nda. ¹⁴ Sã embesa ji riqui ñee nyii no. “Elías raanguia ra tu mbae mbuquiche ja Cristo tu nonde”, sã i embesa ji no. Juan ñii ño eriqui nguiã ñee. ¹⁵ Jẽisa mose, isecheẽ jeñandu turã na!

¹⁶ Mbua namonda siqui turã eãte quia aba cheẽ ndui ã. Mbua riirĩ na ño eriqui nguiã ã. Sã mbua riirĩ ndiqui ñumbusarei sarei no. ¹⁷ Sã eriqui ñee ñee nyue no. “Flauta que ambucheẽ ñee ndei jẽje ra. ¿Mbaerã jenyuruqui sereã nea nde?” sã i chõ nyue no. “Mbae aba mbua eã ngue ambucheẽ ñee ndei jẽje resẽ. ¿Mbaerã jẽyate erese re?” sã i chõ mbua riirĩ nyue no. Ûquĩ na si chõ mbua riqui nguiã aba cheẽ mumba ã. ¹⁸ Juan el Bautista que tu rei mbua je ra. Mbua que eisi turã ã a nda.

“Co eriqui quiaru sereãte nanderese co. Co eriqui mbae mbei sereãte nanderese co”, i chõ mbua quia ee ã. “Aba checuayã ndesenda”, i chõchĩ equia ee ã. ¹⁹ Aquere que achu se abe ra. Aquiaru rei nguiã jendese co. Mbae abe ambei rei nguiã jendese co. Se abe que seisi turãya nda. “Quiaru tuchi je”, i chõchĩ seje. “Mbae mbeisa”, i abe que seje no nda. “Mbua icua quiato chõ ñene”, i chõ ngue seje no nda. Ae earacuate nae, Dios aracua abe ra eicua.

Jesús ia eã mbua sucha tubiriã jenda rese

²⁰ Ae mbua je Jesús uquirãcuã ndeacuquia cuquia tuchi nae, ùquĩ ngue Jesús isi eã mbei ra. Nyebe Jesús riqui nguiã ñee asi asi mbua hue jenda je. ²¹ —Seya eãte jendese, Corazín jenda. Seya eãte jendese, Betsaida jenda. Jendasi tuchi rae. Mbua mae sayã ngue asaã saã jẽje nae, ùquĩ naa mose Sidón jenda je, eĩ nda Sidón jenda huicua secha rei. Eĩ nda Tiro jenda abe huicua secha rei. Eĩ nda eya eãte rei huicua ndese. ²² Jẽ nguia jẽicua jẽsecha sereãte rei. Nyebe ra Dios jembasi mbasi tuchi ùquĩ si quiato. Dios mbua icua mbasi mbasi mose. ²³ Jẽcuasu jẽsaã saã tuchi techĩ nguia re, Capernaum jenda. Nyebe ra Dios jemondo tuchi tata cuasu. Mbua mae sayã ngue asaã saã jẽje nae, ùquĩ naa mose Sodoma jenda je, eĩ nda Sodoma jenda huicua secha rei. Eĩ nda Dios hue sucha cuasu mbutiã eã ndei. ²⁴ Jẽ nguia jẽicua jẽsecha sereãte rei. Nyebe ra Dios jembasi mbasi tuchi Sodoma jenda si. Dios mbua icua mbasi mbasi mose, i que Jesús ñee nda.

Jesús aba quenea mboseĩ

²⁵ Jesús que ñee Dios je cote ra. —Seyate aico nderese co, Paba. Ibi jenda rerecua ja chõ nde re. Ibei jenda abe rerecua ja chõ nde no nde. Ndecheẽ ngue erembuchecu a eã mbua aquiato je ra. Mbua riirĩ naanguia je chõ ngue ndecheẽ erembuchecu nguiã. ²⁶ Ûquĩ ño ngue eturã ndeje ra, Paba, i que Jesús ra. ²⁷ —Seru que mbae mondo ja seje ra. Paba mii ño seicua tuchi nguiã. Paba riirĩ mii tuchi chõ se re. Se mii ño Paba aicua tuchi nguiã no. Ae je ra Paba ateacuquia nae, ùquĩ mii ño nda Paba icua tuchi nguiã serese. ²⁸ Jenguenea

mose, jenyu chõ seje. Jenguenea tamboseĩ na jẽsi. Taambia mingo. ²⁹ Seseteã ño aico nguiã se. Aico mingue chõ nguiã se co. Jeñimbaaquiatu jiri serĩ. Jeñimbucha chõ serese. Eĩ jenyu mose ra jeñia pare pare i eã cote. Jẽya bei ra jẽingo cote. ³⁰ Ae siqui serimbarã nae, ũquĩ iate riqui ã. Secheẽ mbaranguiatuã eãte aba je, i que Jesús ñee nda.

12

Jesús chimbbaaquiatu mbae a ishao shao sábadu mose

¹ Sábado mose que Jesús si quia mbiaco ite ite rĩ emo mose ra. Echimbbaaquiatu riãcuãte que eriqui ra. Nyebe que quiata a ucua mĩ mĩ nyoĩ quia ecuã mose ra. Equiti quitire oo je que echoĩ quia eachãaña cote ra. ² Fariseos mo ngue ñee ee ra. —¿Mbaerã ndechimbbaaquiatu riqui mbae ishao shao sábadu mose re? Co mose chõ mbia riqui uquenea ucua resẽ, i que fariseos ñee Jesús je ra. ³ Jesús que ñee ee ra. —¿Embasa ji rese jemaẽ eã David rĩ nyii re? David riãcuãte que aque mose ra. Eresenda abe riãcuãte que eriqui aque mose no nda. ⁴ David que ique Dios chuchúaa aque mose ra. Mbichae Dios chuchua jenda que eu ra. Mee mee ngue nguesenda abe je ra. Eriãcuãte quiatu ngue re. Sacerdote achõ mbaerã ndaque mbichae. ⁵ ¿Moisés chimbresa rese jemaẽ ãte sacerdote rĩ nde? Sábado mose que quieĩ quieĩ rei Dios chuchua ra. “Dios cheẽ mumbasa”, i ãte quia mbia nguiã ñee ee. ⁶ Tacheẽ nyecua jẽje. Secheẽ nguiã i tuchi jiri nguiã Dios chuchua si co. ⁷ Co embasa ji jẽicuayãte quia ã. “Sebite jẽya eã jẽingo mose mbia rese. Sebiãte ofrenda jemee ñooño mose”, i Dios quia co. Jẽingo ũquĩ icuayãte ã. Eĩ nda jeñee icuã eãte rei mbia turã je. ⁸ Sábado rerecua bei chõ se re, i que Jesús ñee fariseos je ra.

Jesús emo o tomei mbucherõ

⁹ Jesús que oso mbia chumunuásaa cote ra. ¹⁰ Huee que eo tomei mo ndiqui ee ra. Mbia que Jesús mbucheẽ icuã sete ra. Nyebe ñee nguiã ee. —¿Eicuãte erasi mbucherõ sábadu mose re? ¿I ere? Echeẽ ure je jẽ, i que mbia ñee Jesús je ra. ¹¹ Jesús

que ñee ee ra. —Sã jenimba oveja mo ndiqui jaã no. Ngoi oso ibicua mo ye no. ¿Sábado mose ra jenosẽ ibicua si re? Ae. Jenosẽ jei rae. Sábado mose raque. ¹² Dios queteamba tuchi chõ mbia riqui nguiã oveja si ã. Coche nandeico nguiã mbae turã naa naa sábadu mose, i que Jesús ñee mbia je ra. ¹³ Ñee ngue eo tomei je cote ra. —Ndeo emee secuti, i que ee ra. O que emee Jesús cheẽ mose ra. Aque mosechi que eo nyerõ cote ra. ¹⁴ Nyebe fariseos paama i nguiã Jesús je. Mbia mbucherõ mose sábadu mose. —¿Mañi nande ra Jesús je re? Nandeiquia rei ra reae, i tuchi que eu ñee nyue ra.

Isaías chimbresa ique Jesús rĩ

¹⁵ Jesús que jirandu ũquĩ ñee ndese ra. Nyebe esi nguiã hue si. Mbia tubiriã ngue nyoĩ erui ra. Jesús que mbia rasi mbucherõ cherõ ja quia ra. ¹⁶ —¿Mbia ra jembiianduchĩ serese jẽ! i que Jesús ñee ee ra. ¹⁷ Aque mose que Isaías chimbresa ique cote ra. Eĩ ngue Isaías embesa mĩ Jesús rĩ nda: ¹⁸ Serimba chõ co re. Co que airabo ra. Sechesequa chõ ae re. Seyate aico erese co. Espiritu Turã tamondo tuchi ee. Ae ra secheẽ turã senei senei ja mbia je. ¹⁹ Eicuã icuã eã nda emo je. Ñee icuã eã ndae. Ucuasu ra esaã saã eã mbia je. ²⁰ Siqui turãte ra equia equirãcuã nea je. Siqui turãte ra equia eaquiãtuã je no. Mbia ra siqui turã nyee erui ererecuarã. ²¹ Mbia ja ra ndua turã mbei erese cote, i que Isaías embesa cose ra. Ũquĩ ngue ique cote ra.

Aba checuayã quirãcuã Jesús quereco co, i raque mbia

²² Mbia que eresayã mo curucuaẽ Jesús je ra. Echeẽ aquiãtuãte abe que ra. Aba checuayã icuã nguiãtu ngue siqui nguiã echiangui re. Jesús que embucherõ nda. Nyebe mae turã nguiã cote. Ñee turã abe cote no. ²³ Mbia que nyuruira ja mae erese ra. —David rucucha chõ Jesús riqui re, i chõ ngue mbia quia ndua ndua ra. ²⁴ Fariseos que echandu ja ra. Nyebe ñee icuã icuã nguiã Jesús je. —Ab a checuayã icuã nderecua tuchi chõ Satanás nde. Satanás quirãcuã je chõ Jesús riqui nguiã aba

checuayã icuã jea jea mbia si co, i rei que fariseos ñee icuã Jesús je ra. ²⁵ Jesús que ùquĩ ndua ndua icuate ra. Nyebe ñee nguiã ee. —Gobierno icuã icuã mose nyue, ua rae. Tuchuamo jenda icuã icuã mose nyue, ua ra eno. ²⁶ ¿Mañi nda Satanás aba checuayã jea mbia si re? Erimba chõ nyeresẽ. Satanás icuã icuã mose nyue, equirãcuã nda ua no. ²⁷ “Satanás quirãcuã je chõ Jesús riqui nguiã aba checuayã jea jea mbia si”, jenye chõchĩ nguia seje ã. ¿Aba uquirãcuã mee jenimba je jẽ nde? Aba checuayã icuã jea nonde re. ¿Satanás uquirãcuã mee jenimba je serese re? ²⁸ Dios quirãcuã je quiatu aico nguiã aba checuayã jea jea mbia si co. “Dios quirãcuã ndese chõ ureico nguiã mae”, jenye eã ñochĩ equia ã. ²⁹ Satanás quirãcuã tuchite raque. Umbae rese ngueteãte raque. “Sembae chi turãte a”, i raque. Dios quiarei equirãcuã tuchi Satanás si. Dios Satanás mbae sirõ ja arõte quia esi co. Dios Satanás mbae mbutiã ja arõte quia co. ³⁰ Ae siqui ãte quia serese nae, eicuã ño ùquĩ ndiqui nguiã seje. Ae secheẽ senei senei eãte quia mbia je nae, ùquĩ icuã ño eriqui nguiã seje. ³¹ Tacheẽ nyecua jẽje. Emo siqui icuã mose, Dios eicuã mbutiã arõte esi. Emo ñee icuã mose, Dios echeẽ icuã mbutiã arõte no. Emo ñee icuã mose Espiritu Turã ñi, ùquĩ icuã nguiatu ra Dios mbutiã eã mbei esi. ³² Emo ñee icuã mose serĩ, Dios echeẽ icuã mbutiã arõte. Emo ñee icuã mose Espiritu Turã ñi, ùquĩ icuã nguia ra Dios mbutiã eã mbei. Mbae ua ja mose chee ra Dios ùquĩ ñee icuã mbutiã eã mbei.

Sã ira ae ea ae ae no

³³ Ira turã mose, ea abe ra eturã no. Ira icuã mose, ea abe ra eicuã no. Mbia ira icua mose, ea abe ra eicua. Nyiabiã ndae. Sã ira ae ea ae ae no. ³⁴ Mbei rã ño jẽingo nguiã. Jẽicuã ño jẽingo nguiã. Nyebe jeñee turã aquiatu ãte riqui ã. Ae rese mbia riqui ndua ndua uchiangui re nae, ùquĩ ñi sí ra ñee. ³⁵ Mbia turã nda ñee turã. Echiangui renda quia eturãte re. Nyebe eriqui nguiã ñee turã. Mbia icuã nguia ñee icuã nguiã. Echiangui renda quia eicuãte riqui nguiã. Nyebe eriqui nguiã ñee icuã. ³⁶ Tacheẽ nyecua jẽje. Emo ñee ñooño mose, Dios ra

ñee asite aque je. Dios mbia icuã ndea rea mose. ³⁷ Emo ñee turã mose, echiangui renda turã ño ñene. Nyebe ra Dios ñee asiã ee. Emo ñee ñooño mose, echiangui renda icuã ño ñene. Nyebe ra Dios ñee asi ùquĩ je, i que Jesús ñee nda.

Mbia mae sayã esaã ure je, i bei mbia Jesús je

³⁸ Fariseos mo ngue ngaẽ Jesús rea ra. Embesasa abe que ngaẽ erea ra. Ñee ngue ee ra. —Mbia mae sayã esaã na ure je, i rei que ñee Jesús je ra. ³⁹ Jesús que ñee ee ra. —Jẽicuãte riqui co mosenda jẽ ja ã. “Mbia mae sayã esaã ure je”, jenye beite equia ã. Mbia mae sayã mii ño nda asaã jẽje. Jonás na si. ⁴⁰ Sã Jonás ndiqui raque tres días sira rie ye no nae. Jonás na sí ra asaã mbia je. Tres días ra aico ibicua rie. ⁴¹ Nínive jenda quia eturã jiri co mosenda si re. Dios ra co mosenda mbasi tuchi Nínive jenda si. Sã Nínive jenda huicua ndecha Jonás ñee mose ee no. Aico raque ñee jẽje co mosenda je co. Jẽ secheẽ jemumbate chõ chĩ nguia ã. Se quia raque ererecua tuchi Jonás si. Nyebe ra Dios jembasi tuchi mbia icuã ndea rea mose. ⁴² La reina de Seba quia eturã jiri mbia co mosenda si re. Dios ra co mosenda mbasi tuchi la reina de Seba si. Sã la reina de Seba tu isho si tuchi Salomón ñee andu no. Se quia acheẽ ndaque quia jẽje. Searacua tuchi raque se quiatu Salomón si. Secheẽ jemumbate chõchĩ nguia ã. Nyebe ra Dios jembasi tuchi mbia icuã ndea rea mose.

Aba checuayã icuã nyebi u mbia chiangui re

⁴³ Aba checuayã icuã usẽ mose emo ñia si, ngata bei chõ nguiã. “¿Mangue ra seque-nea aucua que re?” i chõ nguiã. Uquenea ucua sacua mo etea eãte. ⁴⁴ “Tasobe rei nyebi. Ae si achu usẽ, aque chiã ye sí taso”, i que aba checuayã nda. Nyebi si mose u, mbia chiã oreãte que ee ra. Echiã ndecoteã eãte que ee ra. Tuchua tii ji raãte que ee ra. ⁴⁵ Aba checuayã icuã ngue nguesenda siete queru cote ra. Ique ja que echoi aque chiangui re cote ra. Ae chiangui re aba checuayã icuã siete riqui nae, aque icuã i i tuchi que eriqui cote ra. Aba checuayã mii ngue siqui eye nyii ra. Etubiriãte cote.

Aque icuã tuchi cote nyii si, i que Jesús mbia je ra.

Jesús nongue ngae erea usi resē

⁴⁶ Jesús ñee mbei mose que esi ngaē ndei ee huee ra. Jesús nongue ja rese. Chichō ja chō ngue taicuee ra. Ñee serete que ee ra. ⁴⁷ —Hue ndesi riqui nderequia taicuee huee. Ndenongue rese, i que emo Jesús mbiirandu ra. ⁴⁸ Jesús que ñee umbiirandusa je ra. —¿Aba je chō aico “taĩ” i chã? ¿Aba je chō aico “senongue” i no ña? i que Jesús ñee nda. ⁴⁹ Jesús que o mee uchimbaaquiato cuti ra. —Ã je chō aico nguiã “taĩ” i. Ã je chō aico nguiã “senongue” i no. ⁵⁰ Ae Paba Ibatenda cheē mumbayã nguia nae, ũquĩ je chō aico nguiã “senongue” i. Ũquĩ je chō aico nguiã “taĩ” i no, i que Jesús ñee ee ra.

13

Emo mbae eĩ mombiquia mbiquia

¹ Aque mose sí que Jesús si usē tuchia si ra. Tuchia si que esi ngoi ama ndish a nimíaa nda. ² Mbia que ngaē ngaē ja quia Jesús rea ra. Nyebe Jesús ua oso nguiã ngoi canoa ye. Mbia quiatu que chichō ama nimíaa ndese ra. ³ Jesús que embaaquiato quiatu tuchi quia ra. Ejemplos que esaã saã tuchi ee ra. —Sã emo si rei mbae eĩ mombiquia mbiquia no. ⁴ Sã emo ndiqui uqui uqui ñeenda rui no. Sã nguireĩ ndiqui ngaē eu no. ⁵ Sã emo emo ndiqui uqui sita arō no. Sita aronda suri jei raque. Ibi ererate quia ñene. ⁶ Tenda ibate mose que eriqui ñimama mano nda. Erao eãte quia ñene. Nyebe mano jei nguiã. ⁷ Sã emo ndiqui uqui uqui nyu réndaa no. Sã nyu abe riqui suri erese no. Nyu ruri que ehati asi u eriquisã nda. ⁸ Sã emo ndiqui uqui uqui ibi túraã no. Ũquĩ nguiatu que ia turã nda. Sã emo ia cien no. Sã emo ia sesenta no. Sã emo ia treinta no. ⁹ Jēisa mose, jsecheē jeñandu turã na!

Dios riqui ucheē mbiassa jaaja jēje co, i uchimbaaquiato je

¹⁰ Jesús chimbaaquiato que ñee nye-cuayã Jesús ísaa ra. —¿Mbaerã ejemplos achō eresenei senei mbia je re? i que

echimbaaquiato ñee ee ra. ¹¹ Jesús que ñee ee ra. —Mbia rerecua tuchi quiarei Ibatenda. Ae riqui nguiã ucheē mbiassa asa ja jēje co. Mbia ataque quia siqui sereã erese co. Mbia ataque je quia eriqui nguiã ucheē mbiassa eã jiri. ¹² Emo umbae rerequia mose, Dios ra emo mondobe ee. Emo embae eã mose, Dios ra embae sirō ja esi. ¹³ Nyebe aico nguiã ejemplos achō nenei nenei mbia je co. Eanduchō sacuã. Eicua turã ndocoĩ. ¹⁴ Mbia eanduchō mose que Isaías chimbessa ique cote ra: Mbia ra secheē ñandu raque.

Icuayã nguiatu rae.

¹⁵ Eãquĩ ãtãte riqui ã.

Secheē andu sereãte equia ã.

Mae sereãte equia sechiao rese ã.

Ndua eã mbei equia serese ã.

Nyebe ra ambitirō eã mbei,

i que Dios cheē Isaías chimbessa rese ra. ¹⁶ Jē nguiatu Dios cheē jeñandu turãte nguiã ã. Jē nguiatu jemaerete serete nguiã Dios chiaose ã. Nyebe jēyate jēingo nguiã ã. ¹⁷ Tacheē nyecua jēje. Ae jeñandu quia secheē ã nae, Dios cheē mbuchecuasa ñiinda ã ñandu serete raque. Mbia turã ñiinda abe ã andu serete raque. Ñandu eã mbeite equia ã. Jē ae chō jēingo nguiã eandu ã cote. Jē ae je chō echecua riqui nguiã.

Jesús ucheē mbiassa uchimbaaquiato je mbae eĩ ñi

¹⁸ Secheē tambiasa jēje cote. Mbae eĩ mombiquia mbiquia ji rĩ. ¹⁹ Ae uqui uqui ñeenda rui nae, Dios cheē andu chooñosa rã ño ũquĩ nde. Icuã eãte quia ñene. Nyebe diablo ru nguiã Dios cheē ndirō echiangui si. ²⁰ Ae uqui uqui sita arō nae, mbia mo na ño ũquĩ no nde. Dios cheē andu mose, isi turã ndaque. Eyate raque erese. ²¹ Mbia icuã icuã mose ee Dios cheē ñi, hui jei chō nguiã esi. Mbae rao eã naanguia chō ũquĩ nde. ²² Ae uqui uqui nyu réndaa nae, mbia mo na ño ũquĩ no nde. Dios cheē andu turã ndaque. Siqui bei eã ño nguiã erui. Umbaerã achō ndese chō eriquichĩ nguiã ndua. “Mbaecha tuchite ra se”, i bei chō nguiã ndua ndua. Nyebe hui chō nguiã Dios cheē si. Nyebe Dios cheē ndiqui nguiã ia eã mbeite ee. ²³ Ae uqui uqui ibi túraã nae, mbia mo na ño ũquĩ no nde. Ũquĩ

nguiatu Dios cheẽ ñandu turã nguiã. Icuã icua turã ño nguiã. Nyebe eriqui bei nguiã erese. Ia ia bei raanguia cote. Emo emo ia cien. Emo ia sesenta no. Emo ia treinta no, i que Jesús ucheẽ mbiasa ñee nda.

Mbae icuã suri trigo turã ndese

²⁴ Jesús que ejemplo nongue senei ee ra. –Sã emo trigo eĩ mombiquia mbiquia úcoo no. Ûquĩ na ño Dios rimba riqui nguiã ã. ²⁵ Sã trigo eĩ mombiquiasa uque cote no. Sã emo tu nyu eĩ mombiquia mbiquia trigo eĩ mumbara mbara no. ²⁶ Trigo eĩ ngue obo cote ra. Nyu abe que suri erese ra. ²⁷ Nyebe erimba ñee nguiã echa je. “Trigo eĩ achõ eremombiquia mbiquia reĩ nguiã seje. ¿Mbaerã nyu abe riqui suri suri erese re?” i que ererecua je ra. ²⁸ Ererecua que ñee ee ra. “Seucuâyãsa chõ ñquĩ nde. Nyu eĩ mombiquia mbiquia chõchĩ trigo eĩ mumbara mbara”, i que ererecua ñee nda. –¿Ureso ra eriqui riqui re? i rei que erimba ñee nguerecua je ra. ²⁹ Ererecua que ñee nda. “Tei. Nyu riqui riqui mose ra trigo abe riqui riquichĩ nde. ³⁰ Sã echichõ ja. Eucua mose ja chee. Ea ireĩ mose quiatu ra acheẽ serimba je cote. Serimba ra nyu rane siqui siqui aque mose cote. Nyu ra esei cote. Aquere quia ra trigo a ishao shao erereco quiatu sacua sechuchua cote”, i que echa ñee nda, i que Jesús ñee nda.

Mbae eĩ na ño Dios rimba re

³¹ Jesús que ejemplo mo senei mbia je ra. –Mbae eĩ na ño Dios rimba re. Sã mbia mostaza eĩ tiquia no. ³² Eñetẽ tuchite raque mbae eĩ mo si. Suri oso quia cote. Ecuasu tuchite chee cote. Ira rã ño cote re. Nguireĩ nguichi quichi chee erãquiã ndese. Eĩ si chõ Dios rimba re. Ûquĩ mĩ ndaque nyii. Ñimbeta tuchi cote. Mbae eĩ na, i que Jesús ñee nda.

Levadura rã ño Dios rimba re

³³ Jesús que ejemplo mo senei mbia je ra. –Levadura rã ño Dios rimba re. Sã mbia levadura ñetẽ mondo mbichae ao ramo mose no. Sã levadura riqui oso mbichae mbuchimatã ja no. Eĩ si chõ Dios rimba re, i que Jesús ñee nda.

Jesús ejemplos senei tuchi mbia je

³⁴ Eĩ ño ngue Jesús quia mbia tubiriã mbaaquiato quiato ejemplos je ra. Ejemplos achõ ngue esenei senei mbia mbaaquiato sacua nda. ³⁵ Nyebe Dios cheẽ mbuchecua chimbasa ique cote. Eĩ ño echimbasa re: Ejemplos je mbia tambaaquiato quiato. Ae mbia icuayã mbeite quia nae, ñquĩ tambuchecua mbia je, i que embesa ji ra, i que Jesús ñee nda.

Jesús ejemplo mbuchecua nyu eĩ nĩ

³⁶ Jesús que mbia mondo ja cote ra. Aquere que esi ique tuchu a mo nda. Echimbaaquiato que ecurubite ñee ee ra. –Ae ejemplo eresenei mbia je nyu eĩ nĩ nae, ñquĩ embiasa jiri ure je, i que ñee ee ra. ³⁷ Jesús que ñee ee ra. –Ae trigo eĩ mombiquia mbiquia nae, se rã ño ae re. ³⁸ Ae ibii emombiquia mbiquia nae, mbia ja rã ño ñquĩ ibi re. Trigo eĩ turã na ño Dios quiato re. Nyu eĩ icuã na ño diablo quiato no nde. ³⁹ Ae mbae eĩ icuã mombiquia mbiquia nae, aba checuayã nderecua rã ño ñquĩ nde. Mbae a ishao shao raanguia ra ibi ua mose cote. Mbae a ishao shaosa rã ño angeles re. ⁴⁰ Sã mbia riqui nyu mombo mombo tátaa nae, eĩ si ra Dios uquiatoã mombo tátaa ibi ua ja mose no. ⁴¹ Serimba ángeles ra amondo mbi a rea rea ja. Ae mbae icuã saã uquia quia mbia je nae, serimba ra ñquĩ sirõ ja. ⁴² Serimba ra ñquĩ mombo mondo tata cuásuu. Nyeseo seo tuchi ra tátaa. Huee ra ureĩ quiti quiti tuchi. ⁴³ Ae Dios mbuturã nae, ñquĩ nininya tuchi ra tenda rã si cote. Eru ibatenda siqui mose mbia rerecuarã tuchi.

Tesoro rã ndei Dios cheẽ

⁴⁴ Dios cheẽ nguiirĩ nĩ ndei eturã tuchi mbae ja si. Eturã tuchi tesoro si no. Sã amei mo tesoro ati ji rea ibii no. Tesoro turã tuchi que ee ra. Amei ia tuchi que erea mose ra. Sã amei vender i ja umbae je no. Aque ibi isi sacua. Tesoro mĩ ndese ndua.

Dios cheẽ ndei perla turã na

⁴⁵ Dios cheẽ nguiirĩ nĩ ndei eturã tuchi mbae ja si. Sã comerciante mo perlas turã ndequia requia no. ⁴⁶ Perla turã tuchite mo ndea mose, aque mĩ ndese chõ eriqui

nguiã ndua ndua cote. Sã vender i ja umbae je aque perla ribishorõ no.

Dios ra mbia icuã quirirõ

⁴⁷ Sira mbua mbua ji rã ño Dios rimba re. Sã emo tarafa mondo ii no. Sira chumubarate que embua ra. ⁴⁸ Sã sira mbuasa mbisẽ tuchi riqui no. Sã echa econosẽ serao usẽ cote no. Echa que ngoi sira turã irabo rabo cote ra. Sira icuã ndirirõ ndirõ emombo sacuã. ⁴⁹ Eĩ si ra Dios mbae ua ja mose. Dios ra ángeles mbu mbia icuã mombo sacuã mbia turã si. ⁵⁰ Eicuã nda emombo tata cuásuu. Nyeseo seo tuchi ra tátaa. Huee ra ureĩ quiti quiti tuchi. ⁵¹ ¿Secheẽ jëicuate rei quia ã nde? i que Jesús ñee mbia je ra. —Ae, i que ñee Jesús je ra. ⁵² Jesús que ñee ee ra. —Embesasa mo siqui mose serese, mbaecha rã ño aque re. Sã mbaecha riqui umbae ima ndirõ mbia je emo mose no. Umbae yasu abe rirõ emo mose no, i que Jesús ñee mbia je ra.

Mbia Nazaret jenda Jesús isiteã

⁵³ Jesús que ũquĩ ejemplos senei ja mbia je ra. Hue si que esi cote ra. ⁵⁴ Oso que ngasẽ nguecua Nazaret cote ra. Oso que mbia mbaaquiato judíos chumunuásaa ra. Nyebe mbia nyuruira tuchi nguiã ñee nyue. —¿Mangue eriqui ñimbaaquiato tuchite re? Nandemae sayã esaã saã tuchichĩ nguia re. ⁵⁵ Ira mbitirõ tirõsa ririñ ño ndaque. María abe ririñ ño ndaque no. Jacobo nongue chõ ndaque. José abe no. Simón abe no. Judas abe no. ⁵⁶ ã echari abe riqui ja raque nanderese ã. ¿Mañi equia mbae i cua ja tuchite re? i que mbia Jesús recu a jenda ñee nyue ra. ⁵⁷ Nyebe mbia hue jenda riqui Jesús isiteã nde. Jesús que ñee ee ra. —Dios cheẽ mbuchecuasa ishonda cheẽ nguia ra mbia isi turã mbei. Nguecua jenda cheẽ achõ nguia ra eisi turã eã. Ngõngue cheẽ achõ nguia ra eisi turã eã no, i que Jesús ñee nguecua jenda je ra. ⁵⁸ Hue jenda mbia que Jesús icua eãte ra. Isiteã ño ngue ra. Nyebe Jesús mbia mae sayã naa eã jiri nguiã ee huee.

14

Mbia Juan el Bautista iquia

¹ Mbia que jirandu ja Jesús rese cote ra. Herodes abe que jirandu erese ra. Ererecua que ae ra. ² Juan el Bautista Jesús riqui reĩ ee reaẽ. Ae que ñee ngũimba je Jesús rĩĩ nda. —Sechiquia quera si chõchĩ. Juan el Bautista quera si chõchĩ. Nyebe eriqui nguiã mbia mae sayã naa naa co, i que Herodes ñee Jesús rĩĩ nda. ³⁻⁴ Herodes que Juan isi icuã nyii ra. Nyucua que mondo tarõ nda. Paama i nda Juan je ra. —iNde ndenongue ninisi erereco aroneate jẽ! i quiatu que Juan ñee ee nyii ra. Herodes siqui mose nõngue ninisi rese. Herodías, i que enongue ninisi je ra. Felipe, i que enongue je ra. ⁵ —Juan taiquia, i rei que Herodes ñee nda. Mbia ataque quiarei siqui tuchi Juan ndese. Dios cheẽ mbuchecuasa, i chõ mbia nguiã Juan je. Nyebe Herodes siquiche jiri nguiã Juan iquiayã aque mose. ⁶ Herodes mbae cumpleaños mose, Herodías ririñ ngue nyuruqui ruqui mbia ja je aque mose ra. Nyucuaaque que ae ra. Herodes ia tuchi que mae nyucuaaque nyuruqui rese ra. ⁷ —¿Mbae ra amee ndeje re? Echeẽ ño seje. “Sebite co” nde i mose, aque tamondo ndeje. Acheẽ ñooño eã ño nguiã ndeje a, i que Herodes ñee nyucuaaque je ra. ⁸ Esi quia ñee ñee nguia nyucuaaque je nyii reaẽ. Nyebe nyucuaaque ñee nguiã Herodes je. —Juan el Bautista ãquĩ emee na seje mbia chiu riru ye, i que nyucuaaque ñee ererecua Herodes je ra. ⁹ Ererecua chosoi que oso serĩ tuchi echeẽ andu mose ra. —Acheẽchĩ se quia ee. A seresenda chi ja quiaru serese a resẽ. ã seandu ja chõchĩ. Nyebe ra secheẽ ambuchebi eã ee, i que ererecua uchiangui re ra. —Juan ãquĩ emee ee, i que ngũimba je cote ra. ¹⁰ —Juan ãquĩ jendoso oso cárcel. Jemondo nyucuaaque je, i que ra. ¹¹ —Juan ãquĩ ngue ecurucuaẽ mbia chiu riru ye cote ra. Mee ngue nyucuaaque je cote ra. Nyucuaaque que emee usi je cote ra. ¹² Juan ñimbaaquiato que ngaẽ Juan ndaque rea ra. Nyati que suruchoi ra. Nyoĩ que Jesús mbiirandu erese cote ra.

Jesús mbichae tubiã saã mbichae mije

¹³ Jesús jirandu mose Juan ndese que esi turúquiaa ra. Ama ndui que esi canoa

ye ra. Mbia que jirandu randu erese ra. Nyebe nyoï ja nguiã erui ibi rĩ. Sucha ja ja jenda. ¹⁴ Jesús que usê canoa si cote ra. Mbia tubiriã ndese que mae nda. Eya eã tuchite que erese ra. Erasi que embucherõ cherõ nda. ¹⁵ Tenda nyesece mose que echimbaaquiatu ñee ndei ee ra. —Mbae ãte a turúquiaa. Tenda abe nyesece. Mbia emondo rã sucha tubiriã nia. Sã echoi bei uchirã isi, i rei que echimbaaquiatu ñee Jesús je ra. ¹⁶ —Sã echoi eã. Jeño mbae je-mondo ee echirã, i que Jesús ñee ee ra. ¹⁷ —Tei. Mbae quia ra aba mondo ee. Cinco chõ ngue mbichae ra. Sira abe nyeremoñote nyeresẽ, i que echimbaaquiatu ñee Jesús je ra. ¹⁸ —Jembu rã seje, i que Jesús ra. ¹⁹ Ñee ngue mbia tubiriã je cote ra. —Jengoi ja quiata tose, i que ra. Jesús que mbichae cinco sirõ cote ra. Sira nyeremo abe no. Mae ngue ibate ra. Gracias, i que ñee Dios je ra. Mbichae que esiquio quio cote ra. Mee ngue uchimbaaquiatu je ra. Echimbaaquiatu que emee mee mbia ja je cote ra. ²⁰ Mbia que embuquiaru ja tuchi cote ra. Miãtã tuchi que ra. Mbia huisa tubiriã ngue cote ra. Sira rire. Mbichae rire abe no. Doce iru que mbia mombisẽ esique sique je ra. ²¹ Ae mbichae u sira rese nae, etubiriã tuchite que ra. Cinco mil ndobei. Cuña abe etubiriã. Mbia riirĩ abe etubiriã no.

Jesús ngata i arõ

²² Aquere que Jesús uchimbaaquiatu mondo ja canoa ye ra. —Jẽ nane jẽso sobei. Mbia tambui turã na mondo uchuchúaa se nyii, i que ra. ²³ Jesús que mbia tubiriã mbui turã mondo uchuchúaa cote ra. Ae ae que oso sita ibate rĩ cote ra. Ñee sacua Dios je. Huee que ae ae riqui itondaru chee ra. ²⁴ Canoa yenda que chi bei quia ama ite rĩ nda. Quiririã ngue tu icuã icuã ee ra. I rebera que tu asi asi tuchi ee ra. ²⁵ Nguira cheẽ mose que Jesús ngasẽ ee ra. I arõ ngue esi quia ngata ra. ²⁶ Echimbaaquiatu que mae erese ra. Echiã ngue cuaãcuã i tuchi ra. Ngata mose i arõ. —Aba checuayã ño tu nguiã aque, i rei que tasẽ tasẽ nda. Siquiche tuchi que ra. ²⁷ —Jẽsiquichechĩ nguiã. Se chõ nyeresẽ, i jeite que Jesús ñee ee ra.

²⁸ Pedro que ñee ee ra. —Nde mose, echeẽ seje. “Echu ngata i arõ”, ere seje, i que Pedro ñee Jesús je ra. ²⁹ —Quiatuchu, i que Jesús ñee ee ra. Ae Pedro nguichi nguiã canoa si i rese irõ. Oso nda ngata i arõ Jesús rea chã nde. ³⁰ Pedro mae mose quiririã icuã ndese que esiquichete ra. I que oso quia ñiimi nda. —¡Sererecua! ¡Senonosẽ na se! i que ñee Jesús je ra. ³¹ Ae Jesús o mondo nguiã eo isi. —Seicuayã ñochĩ. ¿Mbaerã ereico seicuayãte re? i que Jesús ñee ee ra. ³² Ua mose canoa ye que quiririã tiba cote ra. ³³ Canoa yenda que ñee turãte Jesús je cote ra. —Dios rucucha tuchi chõ nde riqui re. ¡Ae bei jẽ! i que ee ra.

Jesús mbia Genesaret jenda mbucherõ cherõ

³⁴ Ngasẽ nyee que sobei cote ra. Genesaret, i que hue ibi je ra. ³⁵ Hue jenda que jirandu ja erese ra. Hue rurubinda abe que mbia mbiirandu erese ra. Mbia que er asi curucuaẽ cuaẽ ja Jesús je cote ra. ³⁶ —Sã mbia rasi oco oco rã ndeirao ai rese, i tuchi que mbia Jesús je ra. Ae oco erese nae, ùqui ngue nyerõ nyerõ ja ra.

15

Mbia chiangui renda ae chõ emb#cuã nguiã

¹ Aquere que fariseos mo ngaẽ ñee Jesús je ra. Embesasa mo abe que ra. Jerusalén jenda chõ ùqui ja re. ² Ùqui ngue ñee Jesús je ra. —¿Mbaerã ndechimbaaquiatu riqui nanderamei ñee mumba mumba beite re? Echoi quiiriã mbei chõ quiaru nguiã, i que ñee asite Jesús je ra. ³ Jesús que ñee ee ra. —¿Mbaerã jẽingo Dios cheẽ mumba mumba jẽ nde? Jenamei ñee ndese chõte jẽingochĩ nguiã ã. Siqui rocoi Dios cheẽ ndese. ⁴ Dios que ñee mbia je cose ra. “Jẽturã ño jẽingo jendu je. Jẽsi je abe no. Emo ñee icuã mose ngu rĩ, ùqui jẽiquia. Emo ñee icuã mose usi abe rĩ no, ùqui abe jẽiquia no”, i quia que Dios ñee mbia mbaaquiatu cose ra. ⁵⁻⁶ Dios cheẽ jenyabi tuchi chõchĩ nguia mbia mbaaquiatu quiatu ã. “Ae nda amee neĩ jẽje, ùqui ngue amee ja Dios je ra”, i mose emo ñee ngu je, “coche ñene” jenyẽ chõchĩ nguiã ee. Mbae mee eã mose ngu

je. Usi abe je. Nyebe jëingo nguiã mbia mbaaquiату icuã icuã ùqui. Jenamei ñee achõ ño jësenei senei nguiã mbia je ùqui. Dios cheë nenei nenei ndocoï ee. ⁷ Jëturã jësaã ñooño ño nguiã ùqui. Jeni tuchi chõ ngue Isaías embesa nguiã cose. Eï ngue Isaías embesa cose ra:

⁸ Æ mbia ñee turã ndaque quia seje ã.

Uchiangui re quia eriquiãte nguiã serese ã.

⁹ Ñee turãte raque equia seje ã.

Amei ñee achõ ño esenei seneichï nguiã mbia je.

Dios cheë mii nenei nenei ndocoï ee, i que Isaías embesa jeni nda, i que Jesús ñee ucuasu raã naasa je ra.

¹⁰ —Jenyu rã secheë andu, i que Jesús ñee mbia tubiriã je ra. —Secheë jëicua rã jeñiangui re. ¹¹ Mbia chiu embicua eã nguiã. Echiangui renda chõ embicua nguiã. Echiangui renda chõ usë nguiã echuru rï echeë mose. Ùqui ño embicua nguiã, i que Jesús mbia mbaaquiату ra.

¹² Echimbaaquiату que ngaë ñee Jesús ísaã cote ra. —¿Ereicuayãte ere? Ndecheë ngue fariseos mbupaama ite ra, i que echimbaaquiату ñee nyecuayã ee ra.

¹³ Jesús que ñee ee ra. —Ae ira Paba Ibatenda chutã eã nae, ùqui nda esiqui ja erao resebe. Ùqui ira rã ño fariseos riqui nguiã ã. ¹⁴ Eresayã na ño fariseos riqui nguiã. Sã eresayã mo “ñeenda tateacuquia jëje” i raque emo je no. Quiachã ja chõ ndae, i que Jesús ñee ee ra. ¹⁵ Pedro que ñee ee cote ra. —Erecheë ngue namo, “ùqui nda mbia mbicua” ere que, ùqui embuchecua rã ndecheë ure je, i que Pedro ee ra. ¹⁶ Jesús que ñee ee ra. —¿Jë abe jëicuayãte quia re? ¹⁷ Ae mbia u quia nae, oso chõ nguiã erie ye. Echique rui chõ eriqui nguiã oso oso. Usë nyee. ¹⁸ Mbia chiangui renda chõ embicua nguiã usë mose echuru rï.

¹⁹ Aba chiangui renda quia aba mundua icuã icuãte nguiã. Nyebe mbia riqui nguiã emo iquia. Siqui siqui emo ninisi rese. Emo ndu rese abe no. Siqui siqui eruã ndese no. Mbae mbuquiachã quiachã no. Ñee ñooño abe no. Ñee icuã icuã no. ²⁰ Mbia chiangui renda ja chõ ùqui nde. Ùqui ño mbia mbicua icuã nguiã ùqui ao ao mose.

Uchoi quiiriã mose quiaru, ùqui nguia ra mbia mbicua eã, i que Jesús ñee nda.

Ari mo Jesús icua

²¹ Jesús que nyoï hue recha cote ra. Ngasë ngue Tiro jii cote ra. Sidón jii abe no. ²² Ari mo Canaán jenda que siqui huee ra. Ae que tu ñee Jesús je ra. —David nducucha chõ nde re, Jesús. ¡Ndeyayã ño serese jë! Aba checuayã icuã ndiqui seriirï mbasi mbasi co, i tuchi que ari ñee Jesús je ra.

²³ Jesús que ñee ãte ee ra. Echimbaaquiату que ngaë ñee Jesús je ra. —Ari emondo chõ uchuchúaa. Eñi mbeichï ñee nande je a, i que echimbaaquiату ñee Jesús je ra.

²⁴ Jesús que ñee ee ra. —Sã ovejas mo quiachã no. Ùqui na ño judíos riqui nguiã ã. Judíos achõ je chõ ngue Dios sembu nguiã, i que Jesús ee ra. ²⁵ Ari que tu ngoi ngüiã ndese ñee Jesús je ra. —Sererecua, seriirï embucherõ na seje, i que ari ñee Jesús je ra.

²⁶ Jesús que ñee ee ra. —Judíos rese rane taico mbae raã naa. Ahuï aronea judíos si, mbae raã naa mbiamo je, i que Jesús ee ra. ²⁷ Ari que ñee ee ra. —Aicuate raque se, Sererecua. Mbiamo ndaque ure. Judíos eã ndaque ure. Ure abe je chõ mbae esaã ae. Seriirï embucherõ seje ae, i que ari ñee ee ra. ²⁸ —Seicuate equia co, Ari. Nderiirï tambucherõ ndeje, i que Jesús ñee ari je ra. Aque mosechi tuchi que eriirï nyerõ nda.

Jesús mbia rasi chumumbara mbucherõ

²⁹ Jesús que oso hue recha cote ra. Oso que equia ama nimia ndui ra. Ama Ndisha Galilea nimia ndui. Hue si que esi sita ibate cote ra. Huee que ngoi huee ra. ³⁰ Mbia que ngaë ngaë tuchi quia ee huee ra. Erasi chumumbara rurucuaë cuaë tuchi ee. Ecuatayã. Eresayã. Echeë ngüiã. Eo icuã. Mbia que ùqui ndasi chono ja Jesús i jii ra.

Jesús que ùqui mbucherõ ja ra. ³¹ Nyebe mbia riqui nguiã nyuruira tuchi mae erese. Echeë ngüiã ñee turã mose. Eo icuã mbu-turã mose. Ecuatayã ngata turã mose. Eresayã mae turã mose. Nyebe mbia ñee turã ja nguiã Dios rii.

Jesús mbichae tubiriã saã mbichae mii je

³² Jesús que ñee uchimbaaquiату ísaã cote ra. —Seyayãte aico ã mbia tubiriã ndese co. A echi arete serese tres días a. Embae mo

eãte echurã aa. Eriãcuã amondo sereãte echuchúaa. Eriãcuã nda eiquia ñeenda cúa, i que Jesús ra. ³³ Echimbaaquiato que ñee ee ra. —Turúquiaa chõ nandeico a resẽ. ¿Mañi nda aba ã mbuquiaru ja re? Mbae eã tuchite a resẽ, i que echimbaaquiato ñee Jesús je ra. ³⁴ —¿Manya mbichae jembae re? i que Jesús ee ra. —Siete mbichae. Sira ñetẽ mo ndese, i que ee ra. ³⁵ Jesús que mbia mbucoi ja íbii ra. ³⁶ Mbichae que eisi ja o je ra. Sira ñetẽ abe no. Gracias, i que Dios je ra. Mbichae que esiquio quio mbia je cote ra. Sir a rese. Mee ja que uchimbaaquiato je cote ra. Ũquĩ ngue emee mee mbia ja je cote ra. ³⁷ Mbia que eu ja ñimbio chee ra. Mbichae sique sique que emunua nua ja ra. Sira sique rese. Siete iru que emombisẽ nyee ra. ³⁸ Mbichaecua rei mbia cuatro mil. Cuña abe abe. Mbia riirĩ abe abe no. ³⁹ Jesús que mbia mondochoi ja cote ra. Jesús que ua canoa ye cote ra. Oso que Magdala quiti cote ra.

16

Mbia mae sayã eteacuquia ure je, i fariseos

¹ —Tã nande rã Jesús je, i que fariseos ñee nyue ra. Saduceos rese. Nyebe ũquĩ ngaẽ nguiã ñee Jesús je. —Mbia mae sayã esaã na ure je. I nda “Dios chimbu” ure tuchi ndeje, i rei que ñee Jesús je ra. ² Jesús que ñee ee ra. —Ibei jẽicuate raque ũquĩ. Ibei ireĩ ndese jemaie mose eresaitõ, “ama nda nyaaquiã” jenyẽ chõ nguiã eicua. ³ Ibei ireĩ ndese jemaie mose eresaitõ ndabe, “nyaaqui rae”, jenyẽ chõ nguiã eicua ũquĩ no. Ibei jẽicuate raque quia ã. Ae Dios teacuquia jẽje nae, ũquĩ jẽicuayã mbei chõchĩ nguiã ã. Ae ra tu icuãte mbia je nae, ¿mbaerã jẽingo ũquĩ nguiatu icuayãte re? ¿Mbaerã jẽingo jẽaracua raã naa nde? ⁴ Mbia icuã ja chõ ã nde. Ae siqui ibi rĩ namo nae. Hui jate equia Dios si ã. “Mbia mae sayã esaã ure je”, i chõchĩ equia seje ã. Aque mii nda asaã jẽje. Jonás na si ra asaã jẽje, i que Jesús ñee nda. Oso que erecha cote ra.

Fariseos mbia mbaaquiato icuã, i Jesús

⁵ Jesús chimbaaquiato que uchurã curuchoi eã nda. Tesarei que esi nyoĩ mose

sobei ra. ⁶ Jesús que ñee ee ra. —Mbichae mbuchimatãsa rã ndei fariseos cheẽ. Saduceos cheẽ abe no. Ũquĩ ñee ndese ra jẽingochĩ jẽ, i que Jesús ee ra. ⁷ —Mbichae quiato ngue nanderuã nguiã. Nyebe eriqui nguiã ñee nande je ũquĩ, i rei que echimbaaquiato ñee nyue ra. ⁸ Jesús que echeẽ ñee icuate ra. Nyebe ñee nguiã ee. —¿Mbaerã jẽingo “mbichae nanderuãchĩ” i re? ¿Mbaerã jẽingo seicuayãte re? ⁹ Ae riĩ aico ñee jẽje nae, ¿ũquĩ jẽicuayã mbeite quia re? Se mbichae mbeta mose ¿ũquĩ si jẽtesarei chõ nde? Cinco mbichae mbeta mose mbia cinco mil je, ¿manya iru jemombisẽ mbichae sique sique je re? ¹⁰ Siete mbichae mbeta mose mbia cuatro mil je ¿manya iru jemombisẽ mbichae sique sique je no? ¹¹ Secheẽ mose jẽje nyii, “mbichae mbuchimatãsa rã ndei fariseos cheẽ”, i mose jẽje, secheẽ jẽicua rã. Mbichae riĩ aico ñee ãte jẽje co. Fariseos cheẽ ndese jẽingo eã sacua ño aico nguiã ñee jẽje. Saduceos cheẽ ndese abe jẽingo eã sacua, i que Jesús ra. ¹² Echimbaaquiato que eicua chee ra. —Mbi chae mbuchimatãsa riĩ eã ño eriqui ñee nande je re. Ae fariseos senei senei icuã nguiã mbia mbaaquiato nae, ũquĩ nii ño eriqui ñee nde. Saduceo ñee nii abe no, i que echimbaaquiato eicua ramo cote ra.

Cristo chõ nde resẽ, i Pedro Jesús je

¹³ Jesús que nyoĩ Cesarea de Filípoo cote ra. Huee que ñee uchimbaaquiato je cote ra. —Mbiarã ngue achu íbii ra. ¿Aba aico reĩ se mbia je re? i que Jesús ñee ee ra. ¹⁴ Echimbaaquiato que ñee ee ra. —Juan el Bautista ereico reĩ nguiã mbia je co. Elías ereico reĩ nguiã emo je no. Jeremías ereico reĩ nguiã emo je no. Dios cheẽ nenei neneisa mo ereico reĩ nguiã emo je no, i que echimbaaquiato ñee Jesús je ra. ¹⁵ —¿Aba aico reĩ jẽje co re? i que Jesús ee ra. ¹⁶ —Cristo chõ nde resẽ. Dios riirĩ ño nde resẽ, i que Pedro ee ra. ¹⁷⁻¹⁸ Jesús que ñee Pedro je cote ra. —Ndeyate ereico co, Simón. Mbiamo nembiirandu eãte quia serese co. Paba Ibatenda mii ño nembiirandu nguiã serese. Jonás ndiirĩ ndei nde. Tacheẽ tuchi ndeje. “Pedro” i chõ equia ndeje co. “Sita” i ñi Pedro je re. Aque sita arõ ño nda sembae

iglesia achao. Satanás nda esiquisã eãte. Satanás quirãcuãte raque. Mbia iquiasa raque ae no. Ae ra sembae iglesia siquisã eã mbei. ¹⁹Mbae tamee ndeje. Llave tamee ndeje. Aque je ra Dios recua iquesa erembuquiata quiata mbia je. Mbia ique sacua. Ae je ra erembuqui ata, ùquĩ nda ique. Ae je ra erembuquiata eã, ùquĩ nda ique eã, i que Jesús ra. ²⁰Jesús que ñee uchimbaaquiata ja je cote ra. —“Jesús rei Dios chimondo” jenyechĩ nda emo mbiirandu jẽ, i que ee ra.

Mbia ra seiquia, i Jesús

²¹Aque mose bei que Jesús umano nonde senei senei uchimbaaquiata je ra. —Paba ra sererao Jerusalén. Huee ra amei seiruã nu a tuchi. Sacerdotes rerecua abe ra sembasi mbasi tuchi no. Embesasa abe no. Seiquia rae. Tres días mose ra aquera si, i que Jesús ñee ee ra. ²²Pedro que Jesús querao pe jiri ñee sacua ee ra. —Mbia ra jeĩ jeichĩ ndeje jẽ. Mbia ra ndeiquiachĩ jẽ, i rei que Pedro ñee asi ee ra. ²³Jesús que uba ñee Pedro je ra. —Ehui chõ sesi, Satanás. ¿Mbaerã ereico seriquisã quisã nde? Mbia ndua rã ño ereico nguiã ndua. Dios ndua rã eã, i que ñee Pedro je ra.

²⁴Jesús que ñee uchimbaaquiata je cote ra. —Emo siquise mose serui, sã hui ja mbae ubi si. Sã cruz umbaerã ndui se rã si. Sã eriqui serui bei cote. ²⁵Emo ndua bei mose nguenco rese, ereco ra ua esi. Emo hui mose nguenco si seje, ùquĩ nda siqui bei. ²⁶Emo nguenco mumba chooño mose, eya eã mbei rae. Mbaecha rete raque. Emo nguenco mumba chooño mose, mbae mo eãte ereco ribishorõ sacua. ²⁷Dios ra sembu si íbii uquirãcuã je. Ibatenda rese ra achu ángeles. Ae mbae turã saã saã nguia nae, ùquĩ je ra mbae turã amondo se tu mose. Ae mbae icuã saã saã nguia nae, ùquĩ je ra mbae icuã amondo no. ²⁸Tacheẽ nyecua jẽje. A jengu a nae, jemo nda jemae sechu rese. Achu ra mbia rerecuarã tuchi cote. Jemo jemano eã mose r a achu mbia rerecuarã tuchi cote, i que Jesús ra.

17

Jesús nyicuabo uchimbaaquiata résaa

¹Tenda seis uare que Jesús uchimbaaquiata na”, ae rei ngue nguiã ndechimbaaquiata mo nderao sita íbátee ra. Pedro. Jacobo. Juan

abe no. Jacobo nongue rei Juan. Ùquĩ ngue equerao ja mbia tiásaa ra. ²Jesús que nyicuabo erésaa ra. Eruba que ñimbiasu ra. Tenda nininya rã tuchi que eruba ra. Eirao abe nininya tuchi que ra. Eiraoshĩ nininya tuchi que ee ra. ³Mbia nyeremo ngue nyecua u ibate si ra. Jesús nininya mose que echi ñee ñee erese ra. Moisés que enongue ra. Elías que enongue ra. ⁴Pedro que ñee Jesús je ra. —Sembaaquiatusa, nandecu turãte a. Sucha ñetẽ uresaã saã na, ndebi mose. Enongue nembraerã. Enongue Moisés mbaerã no. Enongue Elías mbaerã no, i rei que Pedro ñee Jesús je ra. ⁵Pedro cheẽ mosete que ibeishĩ ndu eite ñi nda. Abamo ñee mo ngue ehandu ibeishĩ qui re ra. —Co rei sebi tuchi seriirĩ co. Seya tuchite aico erese co. Echeẽ jeñandu bei quia, i que Dios ñee ee ibeishĩ qui re ra. ⁶Echimbaaquiata que siquichete eandu mose ra. Echeẽ mose que echoi nyaara nguie quti ra. ⁷Jesús que esichã oco oco erese ra. —Jẽhuã na. Jẽsiquichechĩ nda jẽ, i que ñee ee ra. ⁸Echimbaaquiata soboiba mose que mae Jesús mii ndese cote ra.

⁹I ecuaẽ nguia nguichi mose sita ibate si que Jesús ñee ee ra. —Ae rese jemae namo nae, ùquĩ nda jẽsenei seneichĩ emo je jẽ. Seraaque quera si mose, aque mose ramo ño jẽsenei senei mbia je cote, i que Jesús ñee ee ra. ¹⁰Echimbaaquiata que ñee ee cote ra. —¿Mbaerã “Elías rane nda tu Cristo si” i embesasa re? i que ñee Jesús je ra. ¹¹Jesús que ñee ee ra. —Ae bei. Coche Elías rane tu nguia mbae mbitirõ ja. ¹²Elías que tu ra. Mbia que eicuayãte ra. Mbia icuã icuã jate que eriqui ee ra. Eĩ si ra mbia icuã icuã seje no, i que Jesús ee ra. ¹³Echimbaaquiata que Jesús cheẽ icua ramo cote ra. —Juan el Bautista rii ño eriqui ñee nde, i que Jesús cheẽ icua ramo cote ra.

Jesús aba checuayã jea mbia riirĩ mo si

¹⁴Ngasẽ ngue mbia ja je cote ra. Emo ngue ngoi nguiã ndese ñee Jesús je ra. ¹⁵—Seriirĩ embucherõ na, Sererecua. Tẽ i beite que equia ra. Titi titi i beite que equia no nda. Erasi tuchite. Ngoi coi beite tátaa. Ama ye abe ngoi coi beite. ¹⁶“Seriirĩ embucherõ je. Mbia mbucherõ aquiata ño eriqui

re, i que eru ñee Jesús je ra. ¹⁷ Jesús que ñee cote ra. —¿Mañi jenyé quia seicuayãte re? ¿Secheẽ jemumba tuchi chõ nguia re? ¿Ñimbirãcuã mbeite ra aba quia jêje re? i que Jesús ra. —Eriirĩ jendu rã seje, i que cote ra. ¹⁸ Jesús que ñee asite aba checuayã je cote ra. Aba checuayã ngue usẽ eriirĩ si cote ra. Aque mose tuchi que eriirĩ nyerõ cote ra. ¹⁹ Aquere que echimbaaquiato ñee Jesús ísaa ra. —¿Mbaerã ureico aba checuayã jea aroneate mbia si re? i que ñee Jesús je ra. ²⁰ Jesús que ñee ee ra. —Seicuayãte jiri quiato nguia ã. Tacheẽ nyecua jêje. Sã mostaza eĩ ñetête riqui raque no. Jẽ seicua ñetẽ mose, mbae ra asaã ja jêje. “Eso pe jiri”, jenyé mose co sita ibate je, siri ra oso pe jiri jeñee nguire. Jẽ seicua mose, mbae jẽ saã ja arondete. ²¹ Aba checuayã ngue ajea namo, ùquĩ nda jêjea eã jeñee eã mose Dios je. Ùquĩ nda jêjea eã, jêhui eã mose jenyi si, i que Jesús ñee ee ra.

Mbia ra seiquia, i si Jesús

²² Galilea rĩ ngue Jesús riqui ngata uchimbaaquiato rese ra. Jesús que embaaquiato quiato quia ra. —Mbiarã ngue achu ra. Mbia ra semee mbia icuã je. ²³ Mbia icuã nda seiquia. Tres nyaashĩ mose r a aquera si, i que Jesús ra. Echimbaaquiato ia eã tuchi que echeẽ mose ra.

Jesús mbae isiquia mondo impuestos pagar i sacuã

²⁴ Ngasẽ ja que Capernaum cote ra. Ae impuestos isi isi quia Dios chuchua jenda nae, ùquĩ ngue nyoĩ ñee Pedro je ra. —¿Jenderecua impuestos mee eã nguia Dios chuchua jenda je re? i que ñee Pedro je ra. ²⁵ —Impuestos emee mee mbeite quia co, i que Pedro ee ra. Pedro que oso ique tuchúaa cote ra. Jesús rane ngue ñee ee ra. —I ere, Pedro. ¿Aba je mbia rerecua riqui “impuestos jemee na seje” i re? I eã nda nguiri je. Mbiamo je chõ nda ñee nguia, i que Jesús ee ra. ²⁶ —Ae. Mbiamo si ra eisi, i que Pedro ñee ee ra. Jesús que ñee ee cote ra. —Eriirĩ nda impuestos mee eã ee resẽ. ²⁷ Dios riirĩ ndaque se. Impuestos nandemee ndei Dios chuchua jenda je. Sã mbia ndua icuã eã nande rese. Quiato ama

ndíshaa. Sira mbabasa emondo ii. Ae rane nda sira erembua nae, aque churu ye ra mbae isiquia mo eretea. Aque emee serao impuestos isi isiquia je. Sembae impuestos sacuã. Nembae sacuã abe no, i que Jesús ñee Pedro je ra.

18

Ererecua tuchi ra se, i jaaja Jesús chimbaaquiato nyue

¹ Aque mose que echimbaaquiato ñee jate Jesús je ra. —¿Aba ra ererecua tuchi ure nderese re? i que ñee Jesús je ra. ² Jesús que ãquẽ mo mbucoi miĩ eite re ra. ³ Ñee ngue mbia je cote ra. —Tacheẽ nyecua jêje. Dios quiti jemba eã mose ra jenderecua eã mbei Dios. Mbia riirĩ na jêingoã mose ra jenderecua eã mbei Dios no. ⁴ Ae siqui quia cocheete nae, ùquĩ nda mbia rerecuarã nyee Dios rese. Ae siqui quia mbia riirĩ n a nae, ùquĩ nda mbia rerecuarã nyee Dios rese. ⁵ Ae eturã ndiqui mbia riirĩ je seriĩ nae, seje abe chõ eturã ndiqui nguia.

Mbae icuã nda nandesã uquiachĩ emo je

⁶ Ae ra mbae icuã saã uquia seicua mo je nae, ùquĩ nda mbae rasi saã tuchi cote. Ùquĩ nda aba mombo chõ ama ndisha ye nyii re chã. Sita resebe ecua ji mondo. I nda mbae icuã naa uquia eãte rei seicua je. ⁷ Mbae icuã nguiarei siqui bei tuchi mbia mbicua nonde. Ae ñee nguia mbia je nae, “mbae icuã esaã” i nae, eicuã tuchi chõ ùquĩ nde. Ae “mbae icuã esaã” i nae, ùquĩ nda mbae rasi saã tuchi cote. ⁸ Ndeo nemingo mose mbae icuã ndese, ndeo echisia mombo. Coche rei ra ereso ibate ndeo miĩ nderequia, siqui bei sacuã huee. Ndei nemingo mose mbae icuã ndese, ndei echisia mombo no. Coche rei ra ereso ibate ndei miĩ nderequia, siqui bei sacuã huee. Oso rocoĩ tata cuásuu, ndeo nyeremo nderao. Ndei nyeremo nderao. Tata ra uqueã mbei huee no. ⁹ Nderesa nemingo mose mbae icuã ndese, nderesa echoo. Coche rei ra ereso ibate nderesa miĩ nderequia. Nemombo rocoĩ tata cuásuu, nderesa nyeremo nderao.

Oveja quiachã je

¹⁰ Seririĩ ñetẽ mo nda jẽucuãyãchĩ jẽ. Angeles riqui eraarõte ã. Angeles riqui Paba rese ibate pe. ¹¹ Se que achu quiachã je rea ra. ¹² Sã emo nimba quiachã oveja no. Cien ndei ngue erimba re. Co mii ngue quiachã ee ra. Aque esi quia quiachã je requia aque. Eataque recha. Noventa y nueve recha. ¹³ Tacheẽ nyecua jẽje. Echa quiachã je rea mose, eyate que erese ra. Eya tuchi que erese ovejas ataque si ra. Quiachã eã je si. ¹⁴ Sã jendu ibatenda abe no. —Sã aque mii quiachã eã seririĩ ñetẽ mo, i chõ Dios nguiã co.

Emo mbae icuã naa mbei mose ndeje, etesarei sarei bei chõ

¹⁵ Nderesenda icuã mose ndeje, eso ñee ee. “Ã ngue eresaã mbae icuã nda”, ere chõ ñee eísaa. Ndecheẽ andu turã mose, nderesenda que erembitirõ turã nda. ¹⁶ Ndecheẽ andu sereã mose, emo abe erao ñee sacuaã ee. Aque mii nda reae. Nyeremo nda re no ae. Ûquĩ abe ñee sacuaã ee. Jeñee ja mose ee hue rĩ ja, jẽandu turã arõte. ¹⁷ Ûquĩ andu sereã mose, jeñee mbia chumunuásaa cote. Sã mbia ñumunua je ñee ja ee. Ûquĩ ñee andu sereã mose, jemombo chõ cote. Dios quiatoã naanguia jësaã ño ee cote. Mbia icuã naanguia jësaã ño nguia ee cote. ¹⁸ Tacheẽ nyecua jẽje. Jẽ mbae mo ndiquisã mose, Dios abe ra esiquisã. Jẽ mbae mo ndiquisã eã mose, Dios abe ra esiquisã eã no. ¹⁹ Tacheẽ nyecua jẽje. Jẽ nyeremo ndua turã mose hue rĩ sí, “co embu ure je” jenyete turã ja mose Dios je, Paba Ibatenda ra emondo jẽje. ²⁰ Jẽ nyeremo ñumunua mose serĩ, aico chee nguiã jendese jẽite re huee, i que Jesús uchimbaaquiatu je ra.

²¹ Pedro que ñee Jesús je ra. —Seresenda icuã mbei mose seje ¿manyas veces ra atesarei eicuã si re? ¿Siete veces ra re? i que Pedro ra. ²² Jesús que ñee ee ra. —Tei. Siete veces eã. Eata tuchi quia ñene. Setenta veces siete quia ñene, i que Jesús ee ra.

Jendesenda icuã si chõ jëtesarei

²³ Sã ererecua mo ndiqui no. Dios rã si chõ ererecua re. Sã ererecu a cuenta raã naa ja ngũimba je no. ²⁴ Cuenta raã naa mose que erimba mo ndurucuaã ee ra. Aque que deber i tuchi quia ee ra.

²⁵ Mbae ãte que erimba mbae pagar i sacuaã nda. Nyebe ererecua ñee nguiã. “Embae je vender nande ja rã. Eriiriĩ abe je vender nande. Eninisi abe no. Ae abe je vender nande. I nda cuenta ua jiri”, i rei que ererecua ñee nda. ²⁶ Erimba ia eã tuchi que echeẽ andu ra. Ngoi que ngũiã ndese ñee nguerecua je ra. “Sererecua, eico tochi chõ seje ae. Mbae tamondo ja chee ndeje”, i que erimba ra. ²⁷ Ererecua ia eã tuchi que erese ra. “Mbae emondo eã ndei seje pagar i sacuaã”, i chõ nyee que ee ra. Hui chõ nyee que esi ra. ²⁸ Erimba que usẽ ndei oso quia ra. Aque mosechi que ngasẽ nguesenda mo je ra. Deber i müite rei ee reaẽ. “Pagar ere rã seje”, i que echosoi isi ra. ²⁹ Eresenda que ngoi ngũiã ndese ñee ee ra. “Eico tochi chõ seje ae. Mbae tamondo ja chee ndeje”, i que eresenda ñee ee ra. ³⁰ “Nya” i chõ ngue enongue echeẽ mose ra. Cárcel chõ ngue ererao chee matã nda. Mbae mondo ja chee sacuaã ee. ³¹ Eresenda ataque ia eã tuchi que mae erese ra. Nyebe echoi nguiã ñee ererecua je. ³² Nyebe ererecua “echu” i nguiã ee. “Serimba icuãte chõ ereicochĩ nde re. Ae deber ere seje, ùquĩ nii ngue acheẽ eãte ndeje. Seya eãte que nderese nde ñee mose seje nyii. ³³ ¿Mbaerã ndeya eã eã ño ndenongue rese nde re? Sã ñi seya eãte nderese nyii no”, i que ererecua ñee ee ra. ³⁴ Ererecua que paama i tuchi ee ra. “Jëiruã nua tuchi, pagar i ja chee”, i que ererecua ñee mbia je ra, i que Jesús mbia mbaaquiatu quiatu ra. ³⁵ —Eĩ sí ra Paba Ibatenda paama i jẽje, jëtesareiã mose jendesenda icuã si, i que Jesús mbi a je ra.

19

Jesús ñee mbia ngũinisi mombo je ri

¹ Jesús cheẽ uare que esi Galilea si cote ra. Ama Jordán ndobei que esi sobei cote ra. Judea bei chõ hue ja ibi re. ² Mbia que nyoi ja tuchi quia eru ra. Huee que mbia rasi mbucherõ cherõ tuchi ra. ³ Fariseos mo ngue nyoi Jesús riichã nda. —Tã nande Jesús je no. Ma ñee Dios cheẽ abi, i que ñee nyue ra. —¿Coche mbia ngũinisi jea ubiã mose re? i que ñee Jesús je cote ra. ⁴ Jesús que ñee ee ra. —¿Embasa ji rese jëingo mae ãte re? “Dios mbia ao mose, nyeremo ngue

echao ra. Erăcuē ngue echao ra. Eninisiră abe que echao no nda. ⁵ Nyebe ra emo ndiqui ngūinisi rese bei. Ngu si isho. Usi si abe no. Ngūinisi rese siqui bei sacuã. Co mii na siqui sacuã nyiese”, i ñi embesa ji re. ⁶ Nyeremo siqui rã eã ño cote re. Co mii siqui rã ño ũquĩ cote re. Ae Dios mbucha nyiese nae, sã ũquĩ huĩ eã mbei nyesi, i que Jesús ñee ee ra ⁷ Fariseos que ñee ee cote ra. —¿Mbaerã Moisés ñee ũquĩ nde? “Jeninisi jea nonde, papel mbesa je jemondo ee”, i ee re, i que ra. ⁸ Jesús que ñee ee ra. —Jëaquē ātāte quiatu ngue re. Nyebe Moisés embesa nguiã jëje ũquĩ. Ũquĩ i āte que Dios mbia ao ramo mose nyii ra. ⁹ Ae ngūinisi jea nae, eninisi siquiã ndaque emo ndese, eicuã tuchi chõ ũquĩ nde. Ae ngūinisiră mo ndeabe mose, adulterio i que ũquĩ je ra, i que Jesús ñee ee ra.

¹⁰ Echimbaaquiātu que ñee ee ra. —Mbaeiaie mose ngūinisi jea mose ¿mbaerã nguiātu ra ngūinisiră ndea re? i rei que echimbaaquiātu ñee nda. ¹¹ Jesús que ñee ee ra. —Mbia ja riqui ũquĩ icua eāte ā. Ae Dios mbaaquiātu quiātu nae, ũquĩ mii ño siqui nguiã eicua ā. ¹² Ae eninisi sereã mbeite nae, ũquĩ nda siqui tură, eninisiã ndaque rae. Emo nyia o ji mose, ũquĩ abe ra siqui tură, eninisiã ndaque rae. Emo ngūinisiră nderequia eã mose Dios rii, ũquĩ abe ra siqui tură, eninisiã ndaque ra eno. Ae ra “coche seninisiã aico nguiã co” i mose, sã eriqui bei eninisiã, i que Jesús ñee ee ra.

Jesús mbia riirĩ isi tură tură

¹³ Mbia que nguiirĩ ngurucuaē cuaē nguia Jesús je ra. Jesús o noono sacuã eãquĩ arõ. Jesús ñee sacuã Dios je erĩ. —¿Mbaerã jendiirĩ jendu quia co re? i rei que Jesús chimbaaquiātu ñee mbia je ra. ¹⁴ Jesús que ñee nda. —Tei. Jëhui chõ esi. Sã nguiirĩ ndurucuaē cuaē seje. Eĩ ño Dios rimba nguiã. Ucuasu raã naa eã. Mbia riirĩ na, i que Jesús ñee ee ra. ¹⁵ Jesús que o chono ñono mbia riirĩ arõ nda. Aquere que esi ngata cote ra.

Acuanĩndu mbaecha mo ñee Jesús je

¹⁶ Acuanĩndu mo ngue tu ñee Jesús je ra. —Mbia mbaaquiātusa turăte nde. ¿Mbae

tură mo nda asaã Dios je semingo bei sacuã nde? i que ñee Jesús je ra. ¹⁷ Jesús que ñee ee ra. —¿Mbaerã ereico etură i seje re? Dios mii ño etură ndesē. Nde ndeico beise mose, Dios cheē emumbayã ja, i que Jesús ñee e e ra. ¹⁸ —¿Mbae ra amumbayã Dios cheē nde? i que acuanĩndu ee ra. Jesús que ñee ee ra. —“Mbia mo nda ereiquiachĩ. Emo ninisi rese ra ereicochĩ. Mbae mo nda erembuquiachãchĩ. Erecheē ñooñochĩ nda emo nii. ¹⁹ Ndetură ño nderu je. Ndetură ño ndesi abe je. Sã erechesecua ndechiese no nae, eĩ ere si chõ nyesecua nde ji jenda rese”. Dios cheē ja chõ ũquĩ nde. Mbia echeē mumbayã sacuã, i que Jesús ñee acuanĩndu je ra. ²⁰ Acuanĩndu que ñee ndei ee ra. —Ũquĩ ngue amumbayã ja bei quia ra. Señetē mosenda bei. ¿Mbae mo abe ra asaã nde? i que acuanĩndu ñee Jesús je ra. ²¹ Jesús que ñee ee ra. —“Taico tură tuchi”, nde i mose, ã abe esaã. Nembae emondo mondo ja mbia mbaecha reã je. Nde ũquĩ naa mose, mbae tubiriã nda nembae, ndeico mose ibate. Nembae mondo ja mose mbaecha reã je, serui eico cote, i que Jesús ee ra. ²² Acuanĩndu Jesús cheē andu mose que echosoi oso serite cote ra. Eyayāte que oso ra. Mbaecha tuchite quiātu ngue ae re.

²³ Jesús que ñee uchimbaaquiātu je cote ra. —Tacheē nyecua jëje. Mbaranguiātu āte mbaecha je ngasē sacuã ibate siqui bei sacuã huee. ²⁴ Sã ticuasú mo ndiqui oso aroneate ique aguja sorei rĩ no nae. Eĩ si chõ mbaecha no nde. Oso aronea ibate Dios rese, i que Jesús ra. ²⁵ Echimbaaquiātu que nyuruira tuchi echeē andu ra. —¿Aba quia ra oso Dios rea ibate re no? i que echimbaaquiātu Jesús je cote ra. ²⁶ Jesús que mae erese ñee ee ra. —Ae mbia saã aroneate quia nae, Dios mii ño nda esaã, i que Jesús ee ra. ²⁷ Pedro que ñee Jesús je ra. —Ure que urembae ureséch a ja ra. Siqui sacuã nderui. ¿Mbae ra eremeé ure je re? i que Pedro ñee nda. ²⁸ Jesús que ñee ee ra. —Tacheē nyecua jëje. Dios mbae mbiasu ja mose ra ererecua tuchi rei se cote. Mbia ra mae ja serese aque mose. Aque mose ra jë abe ererecua. Jë doce. Trono jaaja ra jembraerã cote. Judíos rerecua ja ra jë.

29 Emo umbae secha ja mose siqui sacua serui, embae ra asibishorõ tuchi ee cote. Ae uchuchua secha. Ae ngõngue secha. Ae ngu secha. Ae usi secha. Ae ngũinisi secha. Ae nguiirĩ secha. Ae umbae ibi secha no. Ûquĩ mbae ja ra asibishorõ tuchi cien veces. Aquere ra siqui bei tuchi Dios rese ibate cote. 30 Ae rane eriqui nyii nae, ùquĩ nda siqui mbia rui tuchi cote. Ae siqui quia mbia rui tuchi nyii nae, ùquĩ nane nda cote, i que Jesús ra.

20

Ae rane eriqui nyii nae, ùquĩ nda siqui mbia rui tuchi cote

1 Jesús que mbia mbaaquiato quiatube no nda. —Dios rei mbia rerecua tuchi. Sã mbaecha mo ndiqui no. Sã mbaecha uva tubiriãte riqui embae no. Sã mbaecha mbia mo ndea rea umbae ishao shao sacua no. Nyaashi namo mose. 2 “Denario mii tamondo mondo ja jêje. Sembae ishao shao sacua tenda mondo chee”, i que emondochoi úcoo cote ra. 3 Tenda chui mose que mae emo ndecoteã eã ndese ra. 4 —Jê abe jêso sembae ishao shao. Mbae mo tamee jêje, i que ee ra. Nyoĩ que echeẽ mose ra. 5 Tenda nandeite re mose que echa emo mondo choi cote ra. Umbae ishao shao sacua. Eĩ si que echa tenda chaara ramo mose no nda. 6 Tenda ireĩ mose abe que mae emo ndecoteã eã ndese no nda. “¿Mbaerã jêingo tenda mondochooño siqui rocoĩ mbae mo ndese a re?” i que echa ñee ee ra. 7 “Emo ngue ‘mbae mo esaã seje’ i ãte ure je ra”, i que ee ra. “Jêso jê abe sembae ishao shao. Mbae mo tamee jêje”, i que echa ee ra. 8 Itondaru ramo mose que echa ñee mbia reaquiatusa je ra. “‘Jenyu’ ere sembae ishao shaosa je. Pagar ere rã ùquĩ ja je. Ae ique ramo eresaitõ nae, ùquĩ nane je pagar ere. Ae rane ique nyii nae, ùquĩ je pagar ere hui bei cote”, i que echa ñee nda. 9 Ae ique eresaitõ nae, ùquĩ nane je que denario mii mee mee nda. 10 Ae rane ique nyii nae, ùquĩ ngue ñee ñee u nyue ra. “Eata jiri ra emee nande je reae. Nande rane ngue uva a nandeishao shao”, i rei que eu ñee ñee nyue ra. Ûquĩ je abe que denario mii mee mee nda. 11 Pagar i mose ee que

ñee asi asi echa je ra. 12 “Ae ique ramo eresaitõ nae, ùquĩ ngue mbae ishao shao eã jiri resẽ. Eresaitõte que ique. Ure quiato que tenda uremumba rei uva a ishao shao ndeje. ¿Mbaerã mbae isiquia ereme ee ure rã si chõ nde?” i que ñee echa je ra. 13 Echa que ñee ùquĩ mo je ra. “Mbae icua mo asaã eãte ndeje resẽ. ‘Denario mii’, nande que ñee nyii resẽ. 14 Quiato nembae denario rerao cote. Ae ique ramo nae, ùquĩ je abe denario tamee mee nde rã si. 15 Sembae ae rese aico nguiã. Sembae amondose mose emo je, ¿amondo aroneate se re? Se sembae mee mose emo je, ¿ndebiãte ùquĩ nde?” i que echa ñee ee ra. 16 Ae rane eriqui nyii nae, ùquĩ nda siqui mbia rui tuchi cote. Ae siqui quia mbia rui tuchi nyii nae, ùquĩ nane nda cote. “Jenyu serui” i tuchi Dios quia mbia ja je co. Mbiam mii mii ño eisirõ sirõ nguiã co, i que Jesús ñee nda.

Mbia ra seiquia, i si Jesús

17 Jesús que ngata oso quia Jerusalén quiti ra. Uchimbaaquiato que equerao mbia tiãsa ñee sacua ee ra. 18 —Co nyao quia Jeusalén co. Huee ra mbia semee sacerdotes rerecua je. Embesasa abe je. “Jesús jêiquia”, i ra seriĩ. 19 Semee nda judíos eã je cote. Seiquia sacua. Mbiam ra secheẽ saã saã. Seiruã nua abe ra eno. Sembucha chee ra iquia ira rese. Tres nyaashi mose ra aquera si, i que Jesús ñee ee ra.

Ererecuarã ure, i raque Jacobo, Juan ndese

20 Ari mo ngue oso Jesús riichã nda. Jacobo si. Juan si. Zebedeo riirĩ ngue ùquĩ nda. Ari que oso Jesús riichã nguiirĩ ndese ra. Ngoi que nguiã ndese ñee Jesús je ra. —Mbae mo esaã na seje, i que ee ra. 21 —¿Mbae ra aba saã ndeje re? i que Jesús ñee ari je ra. Ari que ñee ee ra. —Ndeico mose ererecua tuchi, sã seriirĩ abe riqui ererecuarã nderese. Sã seriirĩ ngoi ja u ndejii. Enongue chí ngoi ndequito cuti. Enongue ndequiato cutiã no, i rei que ari ñee Jesús je ra. 22 Jesús que ñee ee ra. —Ae riĩ jêingo ñee seje nae, jêirandu turã eãte ùquĩ ndese. Ae rasi ra asaã tuchi nae, ¿ùquĩ ndasi ra jêsaã jê abe re? i que Jesús ee ra. “Ae”, i que ari riirĩ ñee ee ra. 23 Jesús que ñee ee ra. —Ae

bei. Ae rasi ra asaã tuchi nae, ùquĩ ndasi ra jěsaã tuchi raque jě abe. “Ererecuarã ure”, jenyete que seje, ùquĩ asaã aroneate se jěje. Paba ae quiatu ra ùquĩ saã. Ae ebite, ùquĩ nda emi ererecuarã, i que Jesús ra. ²⁴ Echimbaaquiato ataque que jirandu erese ra. Echimbaaquiato diez. Paama i que Juan je ra. Jacobo je abe. ²⁵ Jesús que “jenyu” i ñee uchimbaaquiato ja je cote ra. —Mbia ataque rerecuia riqui ucuasu raã naa tuchi ngũimba je ùquĩ. ²⁶ Ùquĩ nda jěsaãchĩ jě. “Ererecuia ra se”, i mose jemo, saã aque riquichõ uataque rimbarã. ²⁷ Jemo “se rane jě” i mose, saã ùquĩ ndiqui bei mbae turã naa naa uataque je. ²⁸ “Sã mbia mbae turã naa naa seje”, ae eã ngue u ra. “Se quiatu mbae turã tasaã saã mbia je”, ae u nguĩã. Co achu quia mano mbia tubiriã ndiquicharõ sacuaã co, i que Jesús ñee nda.

Jesús mbia nyeremo ndesayã mbucherõ

²⁹ Jesús que ngata oso quia Jericó si ra. Uchimbaaquiato rese. Mbia tubiriã ngue nyoĩ quia erui ra. ³⁰ Eresayã nyeremo ngue chi ñeenda jie ee ra. Eresayã ngue jirandu Jesús ucua rese ra. Ñeemombo mombo que Jesús je ra. —¡Sererecuia! ¡David rucucha! ¡Ndeya eã ño urerese jě! i que eresayã ñee Jesús je ra. ³¹ —¡Jěquiriri chõ jě! i tuchi rei que mbia ñee ee ra. —¡Sererecuia! ¡David rucucha! ¡Ndeya eã ño urerese jě! ibe que eresayã ñee Jesús je ra. ³² Jesús que tiba ñee ee cote ra. —Jenyu rã. ¿Mañi ae ra jěje re? i que Jesús ñee eresayã je ra. ³³ —Ureresa embuturã na, Urererecuia, i que eresayã ñee ee ra. ³⁴ Jesús ia eã tuchi que erese ra. Oco ja que eresa rese ra. Aque mose tuchi que eresayã ndesa turã ja cote ra. Mae turã ngue cote ra. Jesús rui que echoĩ quia cote ra.

21

Jesús ngasẽ Jerusalén

¹ Jesús que Jerusalén curubite nyoĩ quia ra. Betfagé, i que hue sucha je ra. Ibi ibate mo abe que chĩ huee ra. Monte de los Olivos, i que hue je ra. Hue si que Jesús uchimbaaquiato nyeremo mondo ra. ² Ñee ngue ee ra. —Achi súchaa chõ jěso rã. Burro cuasa ra chĩ nguiĩ ndese jěje huee. Ùquĩ

jenyura seru seje. ³ Emo ñee mose jěje, “¿mbaerã nda jenyura re?” i mose jěje, jeñee ee. “Nandererecuia que ‘jendu’ i ra. Mondo jeibe ra jěje”, jenyete ee, i que Jesús ñee ùquĩ nyeremo mondo ra. ⁴ Embesa ji cheẽ io sacuaã ño ngue ùquĩ nda. I embesa ji huĩ a:

⁵ Jeñee Jerusalén jenda je.

“¡sã jě! Jendererecuia ru quia jěje burro ato co.

Ucuasu esaã saã eãte u quia co.

Burro riirĩ átoo eru quia co”, jenyete ee,

i que embesa ji huĩ nyii ra. ⁶ Ùquĩ nyeremo ngue Jesús mondo cote ra. Ae riĩ Jesús ñee ee nae, ùquĩ ngue nyecua ja ee cote ra. ⁷ Burro que ecuruchoĩ Jesús je ra. Huiirao que echono ñono burro quite arõ nda. Burro riirĩ quite arõ abe. Jesús que nyui eato cote ra. ⁸ Jesús que ngata rei oso quia burro átoo ra. Mbia tubiriã ngue huiirao mbiitee tee nyoĩ quia ibi rĩ enonde ra. Emo emo ngue sindo mbiitee tee ee no nda. Jesús oso sacuaã hue rĩ. ⁹ Mbia ia tuchi que tasẽ tasẽ nda. —Co nandererecuia ru quia ngasẽte co. Co Dios chimbu ru quia ngasẽte nande je co. David rucucha ru quia co. Dios turã tuchi riqui nande je co, i tuchi que mbia quia ñee nda. Ae nyoĩ quia Jesús nonde nae, ùquĩ. Ae nyoĩ quia erui nae, ùquĩ abe no. ¹⁰ Jesús que ngasẽ Jerusalén cote ra. Mbia hue jenda ia tuchi que o o ja erese ra. —¿Aba co re? i tuchi que equia Jesús riĩ nda. ¹¹ Mbia ataque que echeẽ sibishorõ nda. — Dios chimondo chõ co re. Jesús i equia ee. Nazaret de Galilea jenda chõ ae re, i que ñee nda.

Jesús mbia mbusẽ Dios chuchua si

¹² Jesús que oso Dios chuchúaa ra. Huee que mbia riqui mbae isi isi bei ra. Mbae mondo mondo abe mbae isiquia ribishorõ. Ùquĩ ja que Jesús mombo hue si ra. Ae mbae isiquia sibishorõ shorõ nguia, ùquĩ mbae abe que embuchiichere chere ja mesa ra. Mesa aronda resebe. Ae nyurushi cuasu mondo mondo mbia je mbae ribishorõ nae, ùquĩ nenda abe que embuchiichere chere ra. ¹³ Jesús que ñee ùquĩ ja je ra. —“ ‘Mbia cheẽsa Dios je’, i ra mbia Dios chuchua je”, i rei que embesa ji huĩ nda. Jě nguia jěicuã tuchite Dios chuchu a je re. Mbae

mbuquiachãsa chuchua jësaãte chĩ nguiã ee, i que Jesús ñee asite ũquĩ je ra.

¹⁴ Jesús siqui mose Dios chuchúaa, mbia resayã ngue nyoĩ nyoĩ erea huee ra. Mbia cuatayã abe no. Jesús que ũquĩ mbucherõ ja ra. ¹⁵ Ererecua cuabête que chi mae icuã icuã erese ra. Sacerdote rerecua abe no. Embesasa abe no. Jesús chisaã turã ndese mae mose que paama ite ee no ra. —David rucucha turãte riqui co, i mose mbia riirĩ Jesús rĩĩ, ũquĩ mose que ererecua paama i ja Jesús je ra. ¹⁶ —¿Mbia riirĩ ñee erechandu quia re? i que ũquĩ ñee Jesús je ra. Jesús que ñee ee cote ra. —Ae. ¿Embasa ji rese jemae eãte re? “Dios ra mbia riirĩ mbucheẽ turã uturã ñĩ”, i que embasa ji ra, i que Jesús ñee ererecua je ra. ¹⁷ Jesús que oso mbia rerecua recha ja cote ra. Sucha tubiriã abe recha. Oso que Betániaa nda. Huee que itõ nda.

Jesús ñee icuã higo i je

¹⁸ Isamamimbe que Jesús choi sí quia sucha tubiriã nda. Eriãcuãte abe que nyoĩ quia ra. ¹⁹ Higo i mo ndese que mae ñeenda jie ra. Siichã ndei que oso ra. Ea eãte que ee ra. Ero achõte chõ ngue ee ra. Nyebe Jesús ñee nguiã higo i je. —Ndea eã mbei r a cote, i que Jesús ñee ee ra. Aque mosebe tuchi que esi quia ñimama mano nda. ²⁰ Echimbaaquiату que nyuruira tuchi mae erese ra. —¿Mañi higo i quia ñimama asite mano nde? i que ñee Jesús je ra. ²¹ Jesús que ñee ee ra. —Tacheẽ nyecua jêje. Ae asaã higo i je nae, jê abe ra ũquĩ jësaã serã sí, jê Dios jêicua tuchi mose. Jeñee nyee ra sita ibate mo je. “Esiri rã oso am a ndisha ye”, jenye chee ra sita ibate mo je. Sita ibate ra jeñee mumbayã jê Dios jêicua tuchi mose. ²² “Ã emondo seje”, jenye mose Dios je, mondo r a jêje. “Dios ra emondo seje”, jenye mose jeñiangui re, Dios ra emondo jêje, i que Jesús ra.

¿Aba nembu re? i mbia ñee Jesús je

²³ Jesús que oso Dios chuchúaa ra. Huee que eriqui mbia mbaaquiату quiату ra. Sacerdote rerecua que nyoĩ ñee ee amei ndese ra. —¿Mbaerã ereico mbia mbaaquiату quiату Dios chuchúaa re? ¿Aba “ũquĩ esaã saã” i ndeje re? i que ererecua

ñee ja Jesús je ra. ²⁴ Jesús que ñee ee ra. —Se rane tacheẽ jêje. Se rane preguntar tae jêje. Secheẽ jësbishorõ turã mose, ũquĩ mose quiату ra jeñee asibishorõ turã se abe. ²⁵ ¿Aba ñee Juan je re? “Eso bautizar i mbia je” i ee re. ¿Dios eã ño ere? Jeñee seje, i que Jesús ee ra. Ererecua que ndua ndua ja u cote ra. Ñee ñee ngue u nyue ra. —¿Mañi nande ra echeẽ ndobeishĩ nde? “Dios que Juan mbu ra”, nande aroneate ñee ee. Nyebe ra ñee nande je. “¿Mbaerã jëingo eãte eruĩ re no?” i quiarei ra nande je. ²⁶ “Dios eã ngue embu ra”, nande aroneate ñee ee no. Mbia ataque ra paama i tuchi nande je. Juan quiату tuchi quiarei mbia, i que ererecua u ñee ñee nyue ra. ²⁷ Ererecua que ñee nyee Jesús je cote ra. —Ureicuayãte. Aba chõ Juan mbu bautizar i sacua mbia je, i que ererecua ñee ja Jesús je ra. Jesús abe que ñee ee cote ra. —Se abe tacheẽ eã ndei jêje no. Ae “ã esaã” i seje nae, aque rĩĩ nda acheẽ eã jêje no, i que Jesús ererecua je ra.

Acuanindu ndua ndua si

²⁸ Jesús que ñeembe ee ra. —I ra ã jêje reae. Sã amei mo ndiirĩ nyeremo no. “Quiату rã uvas ishao shao seje”, i que amei nguiirĩ ndiqui je ra. ²⁹ “Nya” i rei que eriirĩ ndiqui ñee ngu je ra. Aquere que ndua si chõ oso uvas ishao shao ra. ³⁰ “Quiату rã uvas ishao shao seje”, i rei que amei ñee nguiirĩ nduinda je cote ra. “Se quiату taso, Paba”, i rei que ee ra. Osoã ño ngue ra. ³¹ ¿Ma ngu cheẽ mumbayã ũquĩ mo nde? i que Jesús ñee judíos rerecua je ra. —Eriqui chõ ngue ngu cheẽ mumbayã ndesẽ, i que ñee ee ra. Jesús que ñee ee ra. —Tacheẽ nyecua jêje. Cuñandu ata ata riqui Dios cheẽ andu turã jësi ã. Impuestos isi isiquia abe riqui Dios cheẽ andu turã jësi ã. ũquĩ nda siqui tuchi Dios rese jësi. ³² “Eĩ jenye chõ siqui turã Dios je”, i rei que Juan el Bautista jembaaquiату quiату ra. Jê nguiату que echeẽ jemumbate ra. Cuñandu ata ata quiату que echeẽ isi turã nda. Impuestos isi isiqui a rese. ũquĩ ndese mae mose abe que jêya eã eã jêicua ndese no nda. Jê echeẽ isi turã sacua.

Uva raarõsa icuã icuã nguerecua je

³³ ã abe jeñandu. Sã mbia ibicha mo ndiqui no. Sã eriqui uva i tiquia tiquia no. Sã etarõ no. Uva rique rirurã abe que echao ra. Sucha ibate mo abe que echao ra. Uco raarõ turã ja sacua. “Sembae uvas jësaarõ”, i que emo je cote ra. Ae que oso isho itõte cote ra. ³⁴ Uva quiche mose que ngũimba mo mondo rei umbaerã ndea ra. ³⁵ Uva raarõsa que erimba mbucuasẽ icuã ño nda. Iruã nua ño ngue ra. Echa que ngũimba nongue mo abe mondo rei erea ra. Eraarõsa que aque iquia ra. Enongue que echei chei tuchi mbuqui sita je ra. ³⁶ Eĩ eĩ mbei que eraarõsa quia echa rimba ja je ra. ³⁷ Aquere que echa nguiirĩ mondo erea cote ra. “Ireĩ ireĩ jiri ra seriirĩ si”, i rei que ra. ³⁸ Uva raarõsa mae mose erese que ñee nyue ra. “iCo eriirĩ ndu quia co cote jẽ! iNandeiquia rei jẽ! f nda uvas nandembaerã ae tuchi cote”, i que ñee nyue ra. ³⁹ Eraarõsa que eriirĩ isi icuã cote ra. Curuchoi que pe jiri iquia ra. Mano ngue cote ra. ⁴⁰ ¿Mañi nda echa quia eraarõsa je cote re? i que Jesús ñee mbia je ra. ⁴¹ Mbia que ñee ee ra. —Echa ra eraarõsa icuã iquia ja cote. Uva i ra emondo emo je eraarõ sacua cote. Uquĩ nguia ra embaerã mee turã turã ee equiche mose, i que mbia ñee Jesús je ra.

⁴² Jesús que ñee mbia je ra. —¿ã embesa ji rese jemae ãte re?

Sã emo ndiqui tuchia ao sita je no.

Sita mo ngue equirirõ mombo ra.

Eicuãte eriqui reĩ nguiã ee.

Aquere Dios emundua si erese. “Earonda sacua turambi chõ eriqui re”, i ndua si uchimombo rese.

Uchimombo que esirõ si cote ra.

Dios chiao chõ uquĩ nde.

Dios chiao turã tuchi riqui nande je ã,

i ñi embesa ji re. ⁴³ Tacheẽ nyecua jẽje. Jenderecua eã nyee ra Dios cote. Ae mbiamo

nda Dios icua nae, uquĩ nderecua quia ra Dios cote. ⁴⁴ Ae ra ngoi aque sita arõ nae,

uquĩ nda huẽ. Aque sita ngoi mose emo arõ, uquĩ nda mano no, i que Jesús ra. —Aque

sita rã ndei se, i chõ ngue re.

⁴⁵ Sacerdote rerecua que Jesús cheẽ ñandu ja ejemplos ra. Fariseos abe echandu ja. —Urerĩ ño eriqui nguiã ñee co, i que

ndua ndua ra. ⁴⁶ Paama i tuchi que Jesús je ra. Jesús nda eisi icuã nguiã ña. Siquiche quiatu que mbia si ra. —Dios cheẽ na si tuchi chõ Jesús riqui nguiã ñee co, i jate quiatu que mbia ataque quia ra.

22

Jenyu quiaru serese, i raque emo uquiato je

¹ Jesús que ejemplo mo senei mbia je ra. ² —“Jenyu serea”, i raque Dios quia emo emo je co. Sã ererecua mo ndiqui ñee mbia je no. “Jenyu quiaru serese”, i rei que uquiato je ra. Eriirĩ ngũinisi rea ramo mose. ³ Mbae quiche ja mose que ngũimba mo mondo rei mbia mbiirandu ra. Mbia que ngaẽ sereã nea ja chõ erea ra. ⁴ Ngũimba mo ngue emondobe rei erea ra. “Mbae quiche jate que ra. Ticuas quira tuchi que equishĩ nda. Eriirĩ ngũinisirã isi ramo ndese jëso mae. Jëso quiaru erese”, i rei que erimba mbia je ra. ⁵ Ae je “jenyu” i nae, uquĩ ngue echeẽ mumba ja chõ nda. “Co aso quia seco co”, i que emo nda. “Co aso quia mbae mo naa naa se co no”, i que emo no nda. ⁶ Mbia que teã teã ja ra. Ererecua rimba iruã nua ño ngue ra. Eiquia chee. ⁷ Uquĩ mose que ererecua paama i tuchi ra. Soldados que emondo ngũimba iquiasa iquia iquia ra. Echuchua abe rei rei. ⁸ Ererecua que ñee ngũimba je cote ra. “Mbae quiche chi ja raque a. Ae je ‘jenyu’ ae rei nyii nae, sã uquĩ ngaẽ eã. Eicuãte quia ñene. ⁹ Jëso ñee mbia ja je. Ishonda ja je. ‘Jenyu ja ererecua riirĩ ngũinisi rerequia ramo ndese mae’, jenye oso quia mbia mbuchesea sea”, i que ererecua ñee nda. ¹⁰ Erimba que nyoĩ mbia mbiirandu randu ja ra. Mbia turã mbiirandu. Mbia icuã abe mbiirandu randu no. Mbia que ngaẽ tuchi cote ra. Tuchia itãyã nyee que ra.

¹¹ Ererecua que ique mbia tubiriã ndese mae cote ra. Emo irao icuãte que chi ee huee ra. Tiru ererecua chimondo emingue eã ñochĩ nguia reaẽ. ¹² Ererecua que ñee ee ra. “Seriirĩ ndiqui ngũinisirã isi a resẽ. ¿Mbaerã ndeirao turã eremingue eã nde?” i que ererecua ñee ee ra. Ñee eãte que ererecua cheẽ mose ra. ¹³ Ererecua que ñee

ngũimba je cote ra. “Co jëisi jë. Eo jenyucua. Ei abe jenyucua. Jenosë serao mombo itaicuee itondaruqui re. Huee ra nyeseo tuchi. Huee ra urei quti quti tuchi”, i que ererecua ñee nda. ¹⁴ “Jenyu serui” i tuchi Dios quia mbia ja je co. Mbia mii mii ño eisirõ sirõ nguiã co, i que Jesús ñee nda.

¿Impuestos ra uremee ererecua je re? i mbia ñee Jesús je

¹⁵ —Jesús nandembucheë icuã na. I nda mbia paama i ee, i que fariseos ñee ñee nyue ra. ¹⁶ Nyebe fariseos uchimbaaquiatu mo mondochoi nguiã Jesús rea. Herodes chimbaaquiatu rese. Jesús mbucheë icuã sacua ño ñuqui nde. Uturã ngue esaã ñooño Jesús je ra. —Jesús, co ereico mbia mbaaquiatu quiatu turãte co. Ndeturãte ereico mbia ja je co. Co ereico turãt e mbia mbuchiabiã co. Mbia erembaaquiatu quiatu turãte quia Dios icha rii co. ¹⁷ Nyebe urechu nguiã ñee nde je a. ¿Coche mbia mbae isiqui a mee mee Romano nderecua je re? ¿Uremee nda ee re? ¿Uremee eã nda ee re no? i que ñee Jesús je ra. ¹⁸ Jesús que ñuqui icuã icuate ra. Nyebe ñee nguiã ee. —¿Mbaerã jëingo “i nda Jesús ucheë nyabi”, i serii nde? ¹⁹ Mbae isiquia mo jëteacuquia imbu seje, i que ee ra. Mbia que eteacuquia ee ra. ²⁰ —¿Aba mbae nombre ñi mbae isiqui a rese a re? ¿Aba ñuqui aingue abe ñi a re? i que Jesús ee ra. ²¹ —Romano nderecua, i que ñee Jesús je ra. Jesús que ñee ee cote ra. —Romano nderecua mbaerã jemee ño ee. Dios mbaerã jemee ño ee no, i que Jesús ee ra. ²² Mbia que nyuruira jate u Jesús cheë andu ra. Nyoi ja que erecha cote ra.

Mbia raaque ra quera si, i Jesús

²³ —Mbia raaque ra quera eã mbei, i que mbiamo nguia ñee nda. Saduceos i que ñuqui je ra. Ñuqui mo ngue nyoi ñee Jesús je ra. ²⁴ —Sererecua, ñ ngue Moisés mbesa nande je ra: “Eo mano mose eriiriã, sã enongue mano je ninisi rerequia erendaque re. Sã tiiri ngõngue raaque rii”, i que Moisés embesa nande je ra. ²⁵ Eriqui mo ngue siqui urerese ra. Seis que eribi ra. Eriqui que ngüinirã quereco rei ra. Mano ño ngue tiiri ndocoï ngüinisi recha ra. Enongue que

nguiqui checha quereco rei cote ra. ²⁶ Ae abe que mano ño tiiri ndocoï no nda. Ñuqui seis que ngõngue checha quereco ja rei ra. Mano ja chõ ngue tiiri ndocoï no nda. ²⁷ Eninisi eru checha que mano nyee chõ cote no nda. ²⁸ Siete rei que eru nyii ra. Mbia raaque quera si ja mose, ¿abate ra equereco cote re? i que saduceos ñee Jesús je ra. —Ma Jesús ñee icuã, i chõ ngue re. ²⁹ Jesús que ñee ee ra. —¿Mbaerã jëingo Dios cheë icua eãte ñe? Jëingo Dios cheë abi tuchi ñe. Jëingo Dios quirãcuã icua eãte ñe. ³⁰ Ae raaque ra Dios mbuquera si nae, ñuqui nda ngüinisi quereco eã mbei huee cote. Ñuqui nda ngu quereco eã mbei huee cote no. Angeles rã mbei ra mbia riqui huee ibate cote. ³¹ Mbia raaque quera si rii ño ngue Dios jembiirandu rei ra. ¿Embesa ji rese jemae ãte re? ³² Ñe ño Dios cheë embesa ji re:

Abraham nderecua chõ aico nguiã se co.

Isaac nderecua abe.

Jacob rerecua abe no,

i que embesa ji ra. Ñe ngue mano ndei nyii ra. Ereco siqui bei chõ nguiã namo ñe. Mbia raaque rerecua eã ño Dios re. Mbia reco rerecua chõ ae re, i que Jesús ñee mbia je ra. ³³ Mbia tubiriã ngue chi nyuruira tuchi eandu ra. Jesús mbae icua ja mose.

Echesequa tuchi quia Dios rese

³⁴ Jesús cheë aquiatu tuchi que ra. Nyebe saduceos cheë mbutiba nguiã. Fariseos jirandu mose erese que ñumunua ñee nyue ra. ³⁵ —Se chõ tacheë Jesús je. Ma Jesús ñee icuã, i rei que fariseo mo nda. Embesasa que ae ra. ³⁶ —Jesús, Dios cheë tubiriãte riqui ñe ndesë. Mbia echeë mumbayã sacua. ¿Ma Dios cheë ndiita tuchi ma nde? i que fariseo ñee Jesús je ra. ³⁷ Jesús que ñee ee ra. —Ñe ño Dios cheë ndiita ñe nde: “Echesequa tuchi quia Dios rese. Ndechiã je. Neai je abe. Nendua ndua je abe”. ³⁸ Ñuqui ño Dios cheë ndiita ñuqui nde. Ñuqui ño Dios cheë ñiinda ñuqui nde. ³⁹ Ñe abe rei ñuqui nduinda ñe no: “Sã ereico nyesequa ndechiese no. Eï ere si chõ nyesequa mbia rese”. ⁴⁰ Moisés chimbesa tuchi chõ ñuqui nde. Dios quiato cose ndare chimbesa ja chõ ñuqui nde, i que Jesús ra.

¿Aba rucucha Cristo re?

⁴¹ Fariseos chichõ mose ñumunua ngue Jesús ñee ee ra. ⁴² —¿Aba rucucha Cristo re? ¿Aba jenyee equia ee re? i que Jesús ñee ee ra. —David nducucha chõ ñene, i que fariseos ñee nda. ⁴³ Jesús que ñee ee cote ra. —¿Mbaerã David “sererecua” i ee re no? Espiritu turã embucheẽ mose. ⁴⁴ ã ngue David ñee nda: Dios que ñee Cristo sererecua je ra: “Ecoi sejii. Nde abe ra ererecua serese. Ae ndeucuyãte quia nae, ùquĩ je ra ndequirãcuã ateacuquia tuchi. Ndequirãcuã tuchi chee ra ùquĩ sí”, i que Dios ñee sererecua je ra, i que David ra. ⁴⁵ David sí chõ “sererecua” i nguiã Cristo je. Cristo David rucucha mose, ¿mbaerã David “sererecua” i ee re? i que Jesús fariseos je ra. ⁴⁶ Ùquĩ ngue ñee aquiatuãte Jesús cheẽ ndibishorõ nda. Aque mose bei que mbia preguntar i eã mbei Jesús je cote ra.

23

Jesús ñee asi fariseos je

¹ Jesús que ñee uchimbaaquiatu je ra. Mbia tubiriã je abe no. ² —Fariseos rã nda jëingochĩ jë. Embesasa rã abe ra jëingochĩ jë. “Ure quia Moisés chimbasa ureicuate nguiã ure ã”, i chõ nguiã. ³ Coche jëingo nguiã echeẽ mumbayã ndaque. Erã sí quia nda jëingoã nguiã. Echeẽ turã turãte raque. Siqui turã eãte quiatu nguiã. ⁴ Dios cheẽ embeta mbeta tuchichĩ nguiã mbia je ã. Mbia echeẽ mumbayã aroneate chee quia ã. Eya eã eãte eriqui mbia rese ã. ⁵ Mbae turã naa mose, mbia mae sacuã erese chõ ùquĩ nde. Tiru huirao ibi quitinda ai mbicoi tuchi equia ã. Dios cheẽ mbesa ji echucua bei quia uchiba cúa rese ã. Mbia mae sacuã erese chõ eriqui nguiã ùquĩ naa naa ã. ⁶ Aba mbia eã tuchi fariseos. “Serendarã turã nguiatu se jë”, i tuchi equia mbia chumunua nua mose ã. ⁷ “Sã mbia ererecua i nande je”, i beite equia ã. Ebi tuchi “mbia mbaaquiatusa” i mose ee. ⁸ “Mbia mbaaquiatusa rei se”, jenyechĩ nda jë. Se mii ño jembaaquiatusa re. Nyiesenda chõ jë nde. ⁹ “Paba” jenyechĩ nda mbia mo je jë. Jendu mii ño siqui nguiã ibate pe.

¹⁰ “Ererecuarã se”, jenyechĩ nda eno. Se mii ño jenderecua re. ¹¹ Jemo siqui mingue mose, mbae raã naa mose uataque je, aque quia ra ererecuarã. ¹² Ae ucuasu raã naa nguia nae, mbia ñetẽ nda Dios saã ño ùquĩ je. Ae siqui mingue quia nae, mbia rerecuarã ño nda Dios saã ùquĩ je.

¹³ Aba mbia eã tuchite jë, Embesasa. Aba mbia eã tuchite jë abe no, Fariseos. Jëcuasu jësaã saãte quia ã. Jëingo sereãte quia Dios rese ã. Mbia siquise mose Dios rese, jëingo emingo eãte erese ã no. ¹⁴ Aba mbia eã tuchite jë. Eru cheecha mbae jembutiã tiã ñochĩ nguia ã. Ùquinde jëingo chõchĩ ñee oco oco Dios je ã no. “I nda mbia mae nanderese” jenyee chõchĩ equia ã. Nyebe ra Dios jembasi tuchi cote. ¹⁵ Aba mbia eã tuchite jë, Embesasa. Aba mbia eã tuchite jë abe no, Fariseos. Jëcuasu jësaã saãte quia ã. “Jëingo ure ru” jenyee bei chõchĩ equia mbia je ã. Ùquĩ mo siqui mose jendui, eicuã tuchi chõ ùquĩ abe cote re.

¹⁶ Aba mbia eã tuchite jë. Sã eresayã mo ndiqui emo ndesayã mbuti echiba rese no. Ùquĩ na ño jë nde. Jëaquiatuã ño mbia mbaaquiatu quiatuchĩ nguiã. “Jurar jenyee mose Dios chuchua riĩ, coche jeñee jembuchebi nguiã”, jenyee chõchĩ nguia mbia je ã. “Jurar jenyee mose oro Dios chuchua jenda riĩ, ùquĩ mose quiatu jeñee jembuchebi aroneate nguiã”, jenyee chõchĩ nguia mbia je ã. ¹⁷ ¿Oro quiatu i tuchi jiri Dios chuchua si re? ¿Mbaerã jëaquiatuãte riqui re? ¹⁸ “Jurar jenyee mose altar riĩ, coche jeñee jembuchebi nguiã”, jenyee chõchĩ nguia mbia je ã. “Jurar jenyee mose ofrenda altar jenda riĩ, ùquĩ mose quiatu jeñee jembuchebi aroneate nguiã”, jenyee chõchĩ nguia mbia je ã. ¹⁹ Eresayã na tuchi chõ jëingochĩ nguiã. ¿Mbaerã jëaquiatuãte riqui re? ¿Ofrenda quiatu i tuchi jiri altar si re? ²⁰ Jurar jenyee mose altar riĩ, earonda abe riĩ ño jëingo nguiã jurar i ofrenda. ²¹ Jurar jenyee mose Dios chuchua riĩ, Dios abe riĩ ño jëingo nguiã jurar i. Dios abe quia siqui nguiã uchuchua huee. ²² Jurar jenyee mose ibei riĩ, Dios renda abe riĩ ño jëingo nguiã jurar i. Dios sí riĩ abe no.

²³ Aba mbia eã tuchite jê, Embesasa. Aba mbia eã tuchite jê abe no, Fariseos. Jêcuasu jêsaã saãte quia ã. Décimo jeme me ndaque quia Dios je mbae ñetê ñii. Comino. Menta. Anís. Dios cheẽ ndiita quiatu jemumba mumbate nguiã. Dios jêicua rá nyii. Jêingo turã na nyii. Jêya eã na mbia rese nyii. Aquere quiatu mbae ñetê jêsaã cote. ²⁴ Sã eresayã mo ndiqui emo ndesayã mbuti echiba rese no. Ûquĩ na ño jê nde. Mbae ñetê jêsaã turã turãte raque quia ã. Dios cheẽ ndiita quiatu jemumba mumbate nguiã. ²⁵ Aba mbia eã tuchite jê, Embesasa. Aba mbia eã tuchite jê abe no, Fariseos. Jêcuasu jêsaã saãte quia ã. Sã emo ndiqui i riru irei irei earonda no. Eimi nguiatu eirei quiiriãte re. Eĩ ño jê no nde. Jêturã aba reã ño jêaronda no nde. Jeñiangui renda quiatu eicuã icuãte re. Mbae quia jembuquiachã quiachãte nguiã. Mbae abe quia jenyosei icuã icuãte nguiã. ²⁶ Eresayã na tuchi chõ jêingochi jê nde, Fariseos. Jeñiangui renda rane nguiatu jêirei. Jêaronda abe ra equishĩ cote.

²⁷ Aba mbia eã tuchite jê, Embesasa. Aba mbia eã tuchite jê abe no, Fariseos. Jêcuasu jêsaã saãte quia ã. Mbia raaque tãsa rá ño jêingo nguiã. Eati ji turãte raque. Eimi ye quiatu mbia raaque quiangue chi nguiã hue. Eroo cúí abe no. ²⁸ Eĩ si chõ jê nde. Jêaronda turãte aba reã ndiqui raque mbia je. Jeñiangui rend a quiatu eicuãte re.

²⁹ Aba mbia eã tuchite jê, Embesasa. Aba mbia eã tuchite jê abe no, Fariseos. Jêcuasu jêsaã saãte quia ã. Ae mbia turã mano cose nae, ùquĩ tãsa jembiiã turã mbeite raque quia ã. Dios cheẽ mbuchecuasa tãsa abe no. ³⁰ “Cose ureico mose, i nda ureicuã eãte rei Dios quiato je. Ureramei na eã”, jenyete raque equia ã. ³¹ “Mbia iquia iquiasa riirĩ ño ure re”, jenyete equia ùquĩ. Jendu rá si tuchi jê. Mbia i quiasa. ³² Jenamei icuã na si chõ jêingo no. ³³ Mbei tásie rá tuchi chõ jê nde. Eĩ jenyete bei oso quia aque ngasẽ nyee tata cuasu. ³⁴ Nyebe ra Dios cheẽ mbuchecuasa amondo mondo quia jêje. Mbia mbaaquiatusa ra amondo jêje. Mbia aracua abe no. Jê nda sechimondo emo emo jêiquia. Emo emo nda jêiruã nua mbia chumunuásaa no. Jêico ico ra

equia erese eiquia chee. ³⁵ Ae Dios quiato iquia iquia quia cose nae, ùquĩ ñii nda Dios jembasi cote. Sã mbia Abel iquia cose no. Sã mbia Zacarías abe iquia Dios chuchua jii no. Berequíás riirĩ ndei aque. Sã mbia Dios quiato iquia iquia bei cose no. ³⁶ Ûquĩ ja riĩ nda Dios jembasi cote. Acheẽ nyecua quia jêje a.

Jesús ia eã tuchi Jerusalén jenda rese

³⁷ Tacheẽ na jêje, Jerusalén jenda. Seya eãte aicochĩ jendese co. Hue jêingo mbia iquia iquia beite hue. Dios cheẽ mbuchecuasa iquia iquia. Dios chimondo abe iquia iquia no. Sã nguira riqui nguiire reaquiato mondo ujeoqui re no. “Eĩ tae jendeaquiato”, ae beite rei nguiã jêje co. Secheẽ jêisi sereã mbei chõchĩ nguia ã. ³⁸ ¡Aico jendecha a cote jê! ³⁹ Jemae mae eã nda serese cote. Sechube mose ibate si, aque ramo mose ra jemae serese cote. “¡Co chi Dios rucucha ru quia co cote jê!” i ra mbia seisi turã aque mose cote, i que Jesús ñee nda.

24

Mbia ra Dios chuchua mbucoi ja, i Jesús

¹ Jesús que oso usẽ Dios chuchua si cote ra. Ecuata mose que echimbaaquiato ñee ee ra. —Sã Dios chuchua turã tuchite jê, i que ñee ee ra. ² Jesús que ñee ee ra. —Tacheẽ nyecua rá jêje. Ae rese jêingo mae ã nae, ùquĩ nda mbia mbucoi ja cote. Sita mo nda chi eã nyichuarõ Dios chuchua cote. Mbia ra Dios chuchua mbucoi ja tuchi cote, i que Jesús ñee nda.

Mbae ua ja nonde chõ ã nde

³ Jesús que chĩ ngoi huee ibi ibátee mo nda. Monte de los Olivos i que hue je ra. Echimbaaquiato que ngasẽ ñee eísaa ra. —¿Manosete ra ùquĩ nde? ¿Mbae ra urembiirandu nderese ndechu serĩ mose re? ¿Mbae ra urembiirandu mbae ua ja serĩ mose re no? i que echimbaaquiato ñee Jesús je ra. ⁴ Jesús que ñee ee ra. —Jêtesa jiri quia jê. Mbia mo nda jembirĩ irĩchĩ ñee jêje jê. ⁵ “Cristo chõ se re”, i ra mbia ñee ata atate jêje. Ûquĩ ñee nda jeñanduchĩ jê. Ûquĩ nda mbia mbirĩ irĩ jate. Ñee ñooño je chõ ùquĩ nde. ⁶ Mbia ra guerras saã saã tuchi.

Mbia ra ñee ñee tuchi quia nyiquia iquia je rii. Uqui mose ra jësiquichechi jë. Uqui ja rane nda nyecua raque. Aque mose ra mbae ja ua eã ná. ⁷ Mbia ra guerras saã tuchi chee. Nyiquia iquia tuchi rae. Mbia riãcuã tuchi ra aque mose no. Emo ñooñoa tuchi ra mbia rasi. Mangue chooñoa tuchi ra ibi nyere nyere. ⁸ Jembasi ramo mose chõ nda uqui nde. Aquere ra jembasi tuchi cote.

⁹ Mbia icuã icuã tuchi r a jëje seri. Nguerecua je ra mbia jenderao rao tuchi. Jëiquia chee rae. Mbia mangue chooñoa jenda ra jëucuyã tuchi seri. ¹⁰ Ae siqui quia serui nae, uqui tubiriã nda hui sesi uqui mose cote. Uqui nda nyiucuyã. Uqui nda nguerecua mbuqueta queta tuchi ngõngue rii. ¹¹ “Dios cheë mbuchecua chõ se re”, i ra mbia ñee ata atate jëje. Uqui nda mbia mbiiri iri tuchi. ¹² Mbia icuã icuã tuchi ra cote. Aba cheë mumba mumba beite ra cote. Mbia ra nyecua eã tuchi nyese cote. ¹³ Ae ra siqui bei serese, uqui nda Dios mingo bei. ¹⁴ Sequiato r a Dios cheë turã senei senei ná mbia ja je nyii. Mangue chooñoã jenda ja je. Aquere ra mbae ua ja cote.

¹⁵ Dios cheë mbuchecua rei Daniel. Ae que embesa Mbae Mbutiãsa Icuã nii nda. “Dios rendaque re taico se quiatu”, i ra equia huee. (Ae ra mae nguia sechimbesa rese nae, sã uqui eicua.) ¹⁶ Jemae mose Mbae Mbutiãsa Icuã ndese, jeña esi. Ae siqui quia Judéaa, sã uqui uchã jei choi ibi ibátee mo. ¹⁷ Ae ra siqui tuchia quite rese, sã uqui iqueã nyo uchuchua uquichi mose. Sã echoi chõ uchã hue si bei, umbae rirõ ndoco. ¹⁸ Ae ra siqui úcoo, sã uqui nyebiã ngaë huirao rea. Sã hue si bei chõ echoi uchã. ¹⁹ Aba mbia eã tuchi ra emo aqũe ndiru rerequia mose aque mose. Nguiri mbuquiambu je abe no. ²⁰ “Nyisei mose eã urechã” jenze Dios je. “Sábado mose eã abe urechã”, jenze abe Dios je no. ²¹ Mbia ra mbae rasi saã tuchi aque mose. Mbae rasi que mbia saã eã jiri nyii ra. Aque ramo mose ra mbae rasi raã tuchi cote. Mbae ua bei sacua ño uqui nde. ²² Ae rasi ra mbia saã tuchi nae, uqui nda Dios mbujua jiri uquiato rii. ¹ nda emo ñimbiãcuã eã

tuchi rei uqui ndasi je. ²³ “A Cristo riqui a jë” i mose emo jëje, “nyia” jenzechi nda uqui ñee mose jë. “Hue Cristo riqui hue jë” i mose emo jëje, “nyia” jenzechi nda eno jë. ²⁴ “Cristo chõ se re”, ichõño nda mbia ñee ata atate jëje. “Dios cheë mbuchecua chõ se re”, ichõño nda mbia ñee ata atate jëje no. Mbia mae sayã nda esaã saã tuchi mbia mbiiri iri sacua. Uqui Dios quiato abe chee mbiiri iri arõte. ²⁵ Uqui nonde chõ aico nguia jembirandu randu co. ²⁶ “Hue Cristo riqui turuquia hue”, ichõño nda mbia jëje seri. “A Cristo riqui tuchia a”, ichõño nda emo jëje seri no. Uqui mose ra “nyia” jenzechi jë. ²⁷ Sã ama ndiqui pirirã i ibei resae ja no, eã nda sechu mose. Mbia ra mae ja serese. ²⁸ Sã urubu riqui mae ja mbae raaque rese no. Eã si ra seicua mae ja sechu rese no.

Dios riiri nda tube ibate si

²⁹ Mbia uqui ndasi raã ja mose r a tenda checuyã mbei cote. Nyasi abe no. Nyasitata ra ngoi ngoi. Ibei jenda abe ra quiata quiata chee cote no. ³⁰ Aque mose ra achu ibei rese. Senininya tuchi ra sechu mose. Sequirãcuã tuchi ra sechu mose no. Mbia ra mae ja tuchi sechu rese mangue chooñoa jenda ja. Mbia ia eã tuchi ra nyeseo mae mose serese. ³¹ Angeles serimba ra amondo corneta mbuche sacua. Uqui nda mbia sechisiro munua nua ja seje cote. Ishonda ja. Mangue chooñoa jenda ja. ³² Sã higuera riqui no. Sã ira mo ndiqui no. Ero quira usë ja mose, “iraro itõ ndacu ra cote”, i chõ mbia nguia aque mose. ³³ Eã si ra mbae ua ja nonde. Ae rii aico ñee jëje nae, uqui ndese jemae mose, “mbae ra ua ja cote” jenze ra cote. ³⁴ Tacheë nyecua jëje. Ñ mbia riqui ngata ibi ã nae, uqui emo emo nda manoã mbae ua ja nonde. ³⁵ Ibei ra ua. Ibi abe ra ua no. Secheë nguia ra ua eã mbei.

³⁶ Manosete chõ nda mbae ua ja. Aico eicuyãte co. Mbia mo abe eicuyãte quia ã no. Angeles abe eicuyãte quia ã no. Paba mii ño eicua nguia co. ³⁷ Sã Noé mosenda mbia siqui sereãte Dios rese cose no. Eã si ra mbia siqui sereã Dios rese sechu nonde no. ³⁸ Sã Noé mosenda mbia quiaru chooño

no. Ndua rocoĩ Dios rese. Ngũinisirã ngue equereco chooño ndua rocoĩ Dios rese no nda. Noé que ique chee arca ye ra. Amandi cuasu nonde. ³⁹ Ama ngue uchi u quia mbia iquia ja nonde cote ra. Mbia mbua tuchi que ra. Eĩ ae ra u mbia mbua tuchi sechu mose. ⁴⁰ Sechu mose ra mbia nyeremo siqui úcoo. Co miĩ nda arao. Enongue ra siquichõ. ⁴¹ Cuña nyeremo nd a chi raque mbua tocho no. Co miĩ nda arao. Enongue ra siquichõ. ⁴² Jêtesa bei quiatu quia serese. Ae mose ra achu, aque tenda rese jêiranuate riqui ã. ⁴³ Mbaecha mo jirandu mose mbae mbuquiachãsa rese, “co isa ra eru” i mose, ùquĩ mose nda uqueã nde chaẽ. I nda mbae mbuquiachãsa mbae sirõ eã ndei. ⁴⁴ Jêingoquiatu bei quiatu quia seraarõ arõ. Jendua eã mose serese ra achu jembuate.

Erimba echeẽ mumbayã mose, eya tuchi rae

⁴⁵ Dios rimba aba cheẽ mumbayã je aico ñee a. Dios rimba aquiatu je aico ñee a. Sã ererecua mo ñee ngũimba turã je no. “Sembae esaarõ turã ja quia secutiã. Serimba ataque embuquiaru quiaru turã secutiã”, i que ererecua ee ra. ⁴⁶ Erimba echeẽ mumbayã mose, ererecua ia tuchi ra eru mose. Erimba abe ra eya tuchi no. ⁴⁷ Ererecua ra ngũimba miĩ umbae raarõ mbei sacuã cote. ⁴⁸ Sã erimba ndua ndua uchiangui re no. “Sererecua ra tu jei ãte” i ndua ndua. ⁴⁹ Hue ñee icuã icuã uataque je hue cote. Iruã nua cote. Quiaru chooño cote. Mbae mbei chooño abe cote. Quiacua quiacua mbia icuã ndese cote. ⁵⁰ Sã ererecua ruchĩ nguia ngũimba mbuate aque mose cote jẽ. ⁵¹ Ererecua ra eiruã nua tuchi. Mombo rae. Mbae rasi ra esaã tuchi. Ae ucuasu saã saã nguia nae, ùquĩ ndese ra mbae rasi raã tuchi cote. Nyeseo seo tuchi ra equia. Ureĩ nda equiti quiti tuchi.

25

Nyucuaaque icoquiatu je

¹ Nyucuaaque icoquiatu je rã si rei Dios rimba. Sã nyucuaaque diez nyoĩ quia emo ngũinisi nderequia ramo ndese maenno. Lamparina nendi que ecuruchoi ja quia ra. ² Cinco que icoquiatu je ra. Cinco

que icoquiatuã je no nda. ³ Ae icoquiatuã nae, ùquĩ ngue mbae quira curuchoi eã umbae lamparina mombisẽ sacuã nda. ⁴ Ae icoquiatu nae, ùquĩ ngue mbae quira curuchoi botella ye ra. Lamparina ye abe. ⁵ Ae ra ngũinisi isi rei nguia ee, aque que itõte ee ra. Nyucuaaque reesi esi chee que ra. Uque uque ja chee que ra. ⁶ Itondiite mose que to i andu cote ra. “Co erurã ndu quia co cote jẽ. Jẽso mae erese cote”, i que mbia tasẽ tasẽ ee ra. ⁷ Nyucuaaque que nyuruã ja cote ra. “Nandembae lamparina nandemombisẽ mbisẽ ja”, i rei que ra. ⁸ Ae icoquiatuã nae, ùquĩ ngue ñee ndei icoquiatu je ra. “Urembae uque uquete. Mbae quira ñetẽ jemee mee na ure je”, i rei que uataque je ra. ⁹ “Ateẽ. Nande ja chayãte ra resẽ. Emo jêisi chõ oso icua”, i que icoquiatu je ñee ee ra. ¹⁰ Nyoĩ rei que equia eisi cote ra. Ecutiã ngue erurã ndu cote ra. Nyucuaaque icoquiatu je que nyoĩ ique erese ra. Ngũinisirã isi ramo ndese mae. Quiaru abe que echoi erese ra. Eiquesa que ematã cote ra. ¹¹ Icoquiatuã je abe que ngaẽ nyee ra. I que eiquesa matã ji mi ee ra. “Embuquiata rã ure je”, i rei que ñee eru je ra. ¹² Eru que ñee ee ra. “Tei. Jaẽicuayã tuchite se”, i que eru ñee ee ra, i que Jesús ñee mbia je ra. ¹³ — Jêingoquiatu bei quia jẽ. Ae mose ra achu, ùquĩ jêicuayãte quia ã.

Ererecu a mbae isiquia mbuchao chao ngũimba je

¹⁴ Sã ererecua mo mbae isiquia mee mee ngũimba je no. Eĩ si chõ Dios nguia mbae mee mee ngũimba je. Ererecua oso serĩ mose que umbae mbae isiquia mee mee ngũimba je ra. Embaata ata sacuã ño ngue emee nguia ee. ¹⁵ Cinco mil que emee emo je ra. Dos mil enongue je no. Un mil que enongue je no nda. “Jenya chõ tamee mee jêje jẽ”, i que ñee ee ra. Secha que oso isho cote ra. ¹⁶ Ae je ererecua cinco mil mondo nae, aque que negocio saã saã mbae isiquia je ra. Mbae isiquia que embaata tuchi ra. ¹⁷ Ae je ererecua dos mil mondo nae, aque abe que negocio saã saã mbae isiquia je ra. Mbae isiquia que embaata tuchi no nda. ¹⁸ Ae je ererecua un

mil mondo nae, aque que ibi sibicoi mbae isiquia rerecoquiato sacua nda. ¹⁹ Emo mose tuchi que ererecua ru cote ra. Ñee ngue ngũimba je cote ra. “Jenyu sembi-irandu sembae mbae isiquia rese cote”, i que ñee ee ra. ²⁰ Ae je cinco mil mondo nae, aque rane ngue tu ñee nguerecua je ra. “Cinco mil que ereme e ndei seje nae, ũqui ngue ambaata ra. Cinco mil que aisibe ra”, i que emee ja nguerecua je ra. ²¹ Ererecua que ñee ee ra. “Coche ñene. Nde quiarei serimba turã tuchi. Mbae ñetẽ ngue eresaã turãte nde ra. Nyebe ra mbae tubiriã ereteaquiato seje cote. Ndeya bei tuchi ra ereico serese cote”, i que ererecua ñee ee ra. ²² Ae je ererecua dos mil mondo nae, aque que tu ñee nguerecua je cote ra. “Dos mil que ereme e ndei seje nae, ũqui ngue ambaata ra. Dos mil que aisibe ra”, i que emee ja nguerecua je ra. ²³ Ererecua que ñee ee ra. “Coche ñene. Nde quiarei serimba turã tuchi. Mbae ñetẽ ngue eresaã turãte nde ra. Nyebe ra mbae tubiriã ereteaquiato seje cote. Ndeya bei tuchi ra ereico serese cote”, i que ererecua ñee ee ra. ²⁴ Ae je ererecua un mil mondo nae, aque que tu rei ñee nguerecua je cote ra. “Nde que ere queteate quiato nguiã mbae rese. Ndechitiquia eã abe ereishao shaote quia co. ²⁵ Nyebe asiquiche tuchi nguiã mbae isiquia mee mose seje. Nyebe ahati nguiã ibi je. Co é co resẽ”, i que ñee nguerecua je ra. ²⁶ Ererecua que ñee ee ra. “Aba rimba biã tuchi quiarei nde. Ndetomei tuchi chõ eriqui re. Sequeteã mose mbae rese ndeje, ¿mbaerã secheẽ eremumba re? ²⁷ Sembae mbae isiquia eremonaõ ñochĩ banco. I nda eata jiri sechu mose cote re chã”, i que ererecua ñee asite ee ra. ²⁸ Ererecua que ñee mbi a hue jenda je cote ra. “Mbae isiquia jësirõ na esi un mil. Ae diez mil quereco nae, aque je jemondo. ²⁹ Ae embae tubiriãte nae, aque je mbae tamondobe. Ae embae ãte nae, embae ñetẽ tasirõ ja esi. ³⁰ Co que serimba icua tuchi ra. Jemombo itondaruqui re. Mbae rasi ra esaã tuchi huee. Huee ra nyeseo tuchi. Ureĩ nda equiti quiti tuchi”, i que ererecua ñee nda.

Jesús ra mbae emo emo mingo icúe umbaerã

³¹ Sechu mose íbii mbae rerecuarã, ángeles sembae ra semama tuchi aque mose. Serenda nininya tuchi ra aque mose. ³² Mbae mangu chooña jenda ja ra chi ñumunua huee aque mose. Mbae emo emo nda achono icúe sembaerã aque mose. Sã oveja raarõsa riqui ovejas no icúe chivos si no. ³³ Uquiato cuti ra ovejas no. Uquiato cutiã nda chivos no no. ³⁴ Eĩ ae ra se mbae rerecua tuchi mose. Acheẽ nda mbae sequiatio cutinda je. “Jenyu serese. Jenderecua turã tuchi ra aico jêje. Paba turãte riqui jêje co. Paba que jêirabo nyii mbae ao nonde ra. Jêingo sacua serese. ³⁵ Seriãcuã mose que mbae jemee seje ra. Seisei mose que sembiu ra. Sechuchua eã mose que seisi turã no nda. ³⁶ Seirao eã mose que tiru jemee seje ra. Serasi mose que jêso mae serese ra. Seico mose cárcel que jêso mae serese no nda”, ae ra ñee sequiatio cutinda je. ³⁷ Sequiatio cutinda ra ñee seje cote. “¿Manose mbae uremee ndeje nderiãcuã mose re? ¿Manose ureso nembiu ndeisei mose re? ³⁸ ¿Manose ure ndeisi turã ndechuchua eã mose re? ¿Manose tiru uremee ndeje ndeirao eã mose re? ³⁹ ¿Manose ureso mae nderese nderasi mose re? ¿Manose ureso mae nderese ndeico mose cárcel re?” i tuchi ra ñee seje. ⁴⁰ Aque mose ra acheẽ ee. “Tacheẽ nyecua jêje. Senongue mo mbaech a reã ndaque. Ae turã jêsaã senongue mo je nae, seje eraã naanguia chõ ũqui nde”, ae ra ñee ee. ⁴¹ Acheẽ nda sequiatio cutiã quitinda je cote. “Jêso sesi. Mbae turã nda jëisiã seo jenda. Jêso tata cuásuu. Ae Dios chiao tata, diablo mbasi sacua. Diablo rimb a abe mbasi sacua. Ũqui tata ra uqueã mbei. ⁴² Seriãcuã mose que mbae mo jemee eãte seje ra. Seisei mose que sembiu eãte no nda. ⁴³ Sechuchua eã mose que seisi turã eã nda. Seirao eã mose que tiru jemee eãte seje ra. Serasi mose que jêso eãte mae serese ra. Seico mose cárcel que jêso eãte mae serese no nda”, ae ra sequiatio cutiã quitinda je. ⁴⁴ Sequiatio cutiã quitinda ra ñee seje cote. “¿Manose mbae mo uremee eã ndeje nderiãcuã mose re? Ndeisei mose abe no. Ndechuchua eã mose abe no.

Ndeirao eã mose abe no. ¿Manose uresoã nderea nderasi mose re? ¿Manose uresoã nderea ndereco mose cárcel nde no?” i ra sequiato cutiã quitinda ñee seje. ⁴⁵ Acheẽ nda ee. “Mbae turã jẽsaã eã mose emo je, seje eraã eã naanguia chõ ãquĩ nde”, ae ra sequiato cutiã quitinda je. ⁴⁶ ãquĩ nda nyoĩ ja tata cuasu cote. Huee ra mbae rasi raã mbei tuchi cote. Sequiato cutinda quia ra siqui turã mbei ibate cote, i que Jesús ñee nda.

26

Jesú nandeisi tarõ, i ja ererecua nyue

¹ Aquere que Jesús ñee uchimbaaquiatu je cote ra. ² —Dos días mose ra fiesta de la pascua cote. Aque mose ra mbia icuã semee ererecua je seiquia sacuaã, i que Jesús ñee nda. ³ Sacerdote rerecua que ñumunua ja cote ra. Amei ja rese. Embesasa rese abe no. ãquĩ ngue ñumunua ja u Caifás itaicuee ra. Caifás rei sacerdote rerecua tuchi. ⁴ Caifás itaicuee que ãquĩ nyi ñee ñee Jesús rĩ nda. —Jesús nandembĩrĩ irĩ jẽ. Eisi sacuaã. Etarõ sacuaã. Eiquia sacuaã cote, i que u ñee ñee nyue ra. ⁵ —Fiesta mose eã ño nandeisi jẽ. Mbia ra paama i tuchi nande je, i que u ñee ñee nyue ra.

Cuña mo aba mbusimbusa turã ichusẽ Jesús ãquĩ ndese

⁶ Jesús que siqui Simón Leproso chuchúaa ra. Betania, i que hue je ra. ⁷ Cuña mo ngue tu erea hue ra. Aba mbusimbusa mo ngue equeru Jesús je ra. Embisẽ tuchi que equeru ra. Mbae isiquia mumbasa tuchi que ãquĩ nda. Ichusẽ ja que Jesús ãquĩ ndese equiaru mose ra. ⁸ Echimbaaquiatu que chi ja mae erese ra. Paama i que cuña je ra. ⁹ —¿Mbaerã eichusẽ ñooño nde? Mbae isiquia ribishorõ ño nda aba emondo re. Mbaecha reã je emee mee sacuaã, i que echimbaaquiatu ñee nyue ra. ¹⁰ Jesús que echeẽ ñandu ra. Ñee ngue ee ra. —¿Mbaerã jẽingo ñee ãquĩ nde? Sã cuña ae riqui ae. Ae esaã seje nae, eturãte seje ãquĩ. ¹¹ Mbaecha reã nguia ra chi arete íbii a. Se quia nda aico bei eã nguia jendese aa. ¹² Seati nonde chõ ngue cuña aba mbusimbusa ichusẽ nguia serese. ¹³ Tacheẽ nyecua jẽje. Mbia Dios cheẽ turã nenei nenei mose

mangue chooñoa jenda ja je, cuña nyisaã abe ra esenei senei. Mbia ndua turã ja sacuaã echisaã abe rese, i que Jesús ñee uchimbaaquiatu je ra.

Jesús tamee jẽje, i Judas mbia icuã je

¹⁴ Judas Iscariote, i rei que Jesús chimbaaquiatu mo je ra. Aque que oso ñee sacerdote rerecua je ra. ¹⁵ —Jesús tamee jẽje. ¿Mbae ra jemee seje eribishorõ nde? i que Judas ñee sacerdote rerecua je ra. Sacerdote rerecua que mbae isiquia ata mee ee ra. Treinta que ra. ¹⁶ —Mbia eãsa quiatu Jesús tamee jẽje, i que Judas ñee ee ra.

Jesús quiaru uchimbaaquiatu rese

¹⁷ Fiesta que tu cote ra. Aque fiesta mose bei que mbia riqui oveja iquia iquia querabe ra. Mbichae mbuchimatã iriã ngue eu eu quia aque mose querabe no nda. Fiesta nonde que echimbaaquiatu ñee Jesús je ra. —¿Mangue ra oveja urembuchi mangue ndechiurã nde? i que ñee Jesús je ra. ¹⁸ Jesús que ñee ee ra. —Jẽso sucha cuasu. Jeñee aque je. “Jesús que urembu ñee ndeje ra. ‘Ndechuchua oveja tau sequiato rese semana nonde’, i que Jesús ucheẽ mbu ndeje ra”, jenyee aque je, i que Jesús ñee nda. ¹⁹ Echimbaaquiatu que nyoĩ erea Jesús cheẽ nguire ra. Oveja que embuchi huee cote ra.

²⁰ Itondaru ramo mose que Jesús chi quiaru uchimbaaquiatu rese huee cote ra. ²¹ Quiaru mose que Jesús ñee ee cote ra. —Tacheẽ nyecua jẽje. Jemo nda semondo mbia icuã je, i que ñee uchimbaaquiatu je ra. ²² Echimbaaquiatu ia eã tuchi que echeẽ mose ra. —¿Se ra aremondo ee re? i ja jate que ñee Jesús je ra. ²³ Jesús que ñee ee ra. —Ae chi quiaru serese aque plato ye sí a nae, aque tuchi ra semondo mbia icuã je. ²⁴ Dios cheẽ ndui sí tuchi ra amano ndaque. Ae ra semee mbia icuã je, aque ra mbae rasi saã tuchi quia. Aba mbia eã tuchi ra aque. “Taĩ sembuchecua jirichĩ nguia curi”, i chee ra aque, i que Jesús ra. ²⁵ —¿Se ra aremondo mbia icuã je re? i que Judas ñee Jesús je ra. Jesús rĩ ñeende mbia icuã je nyii. “Ae” i que Jesús echeẽ mose ra.

²⁶ Quiaru que u ra. Jesús que mbichae sirõ nda. Gracias i que Dios je ra. Siquio que mbuchao chao ee cote ra. —Å mbichae jëu. Serete chõ ã nde, i que Jesús ñee ee ra. ²⁷ Vino mbeisa que esirõ cote no nda. Gracias i que Dios je ra. Mondo que uchimbaa quiatu oo cote ra. —Jembei mbei ja. ²⁸ Seruqui chõ ã nde. Mbia icuã mbutiã sacuã ño seruqui re. Dios cheë yasu rui si chõ seruqui riqui nguiã mbia icuã mbutiã co. ²⁹ Tacheë nyecua tuchi jëje. Vino mo nda ambei eã mbei cote. Paba mbia rerecua tuchi mose, aque mose ramo nguia nda ambei nguiã jendese cote, i que Jesús ñee nda.

Jesús aicuayãte resë, ichõño nda Pedro serĩ, i Jesús

³⁰ Irasei rasei que cote ra. Nyoï que Monte de los Olivos ra. ³¹ Jesús que ñee uchimbaaquiato je ra. —Jëireĩ ireĩte ra serĩ co isa. Jeñimboseĩ mboseĩ nda oso serecha co isa. Sã embesa ji riqui ñee no: “Dios ra oveja raarõsa iquia. Oveja ra ñimboseĩ nyoï cote”, sã embesa ji riqui i no. ³² Seraaque quera sire ra aso se rane jendarõ Galilea, i que Jesús ra. ³³ Pedro que ñee ee ra. —Seataque ra ireĩ ireĩte raque ndesi. Se quia ra aireĩ ireiã mbei ndesi, i rei que Pedro ñee ee ra. ³⁴ Jesús que ñee ee ra. —Tacheë nyecua ndeje, Pedro. Ngaira cheë nonde ra erecheë ñooño tres veces serĩ namo, Pedro. “Jesús aicuayãte resë”, ere chooño ño nda serĩ, i que Jesús ñee ee ra. ³⁵ Pedro que ñee ee ra. —Mbia seiquia arõte raque nderĩ, acheë ñooño eã nda nderĩ, i rei que Pedro ra. Eĩ ja que ñee nda.

Jesús ñee ngu je

³⁶ Jesús que oso Getsemaní cote ra. Uchimbaaquiato rese. —Jengoĩ rã u aa. Taso rã ñee Paba je pe jiri se, i que Jesús ee ra. ³⁷ Pe quiti jiri que Pedro rerao ra. Zebedeo riirĩ nyeremo ndese. Eya eã ndasi tuchi que tu ee aque mose ra. ³⁸ Ñee nguë ùquĩ je ra. —Seya eã ndasi tuchi aico co. Seya eã ndasi ra seiquia chee. Jenguchõ na jë aa. Jëtesa tesa bei u aa, i que Jesús ñee ee ra. ³⁹ Jesús que oso pe quiti jiri cot e ra. Nyibi que u ngüã ndese ñee Dios je

ra. —Paba, ùquĩ ndasi asaã sereãte raque quia co. Ae sebite riqui nae, ùquĩ ndese semingo eã. Ae ndebite riqui nae, ùquĩ ndese quiatu semingo, i que Jesús ñee Dios je ra. ⁴⁰ Nyebi que u uchimbaaquiato je cote ra. I que eu uque ja ee cote ra. Ñee nguë Pedro je ra. —Jëingo areã ñochĩ tesa serese se ñee mose Dios je. ⁴¹ Jëtesa tesa u. Jengue eã u ñee Dios je. Mbae icuã tã i eã sacuã jëje. Jëingo serete raque serese. Mbae icuã nguiatu jembuti mbutite nguiã, i que Jesús ee ra. ⁴² Osobe que ñee Dios je pe jiri cote ra. —Paba, nde ñee mose seje, “mbae rasi ra eresaã” nde i mose seje, asaã nda se, i que ñee Dios je ra. ⁴³ Nyebi que u uchimbaaquiato je cote ra. I sí que u uque ee no nda. Eresa quiatu nguë eshiu shiute nguiã. ⁴⁴ Jesús que osobe erecha ñee Dios je ra. Tres veces que aque cote ra. Hue rĩ si que ñee Dios je ra. ⁴⁵ Uchimbaaquiato jii que esi ñee ee cote ra. —Jengue cote. Jenguënea jëucua cote. Semondo ra mbia icuã je cote. Sei quia sacuã. ⁴⁶ Jëhuã cote. Nyao cote. Ae ra semee mbia icuã je, co eru quia semee sacuã co cote, i que Jesús uchimbaaquiato je ra.

Mbia icuã Jesús isi suruchoi

⁴⁷ Jesús cheë mosebe tuchi que Judas ru erea ra. Jesús chimbaaquiato rei que ae ra. Aque rese que mbia cuaë tuchi quia ra. Tiquise abe que ecurucuaë nguia ra. Ira jua abe no. Sacerdote rerecua chõ ùquĩ mbucuaë nguia reaë. Amei abe. ⁴⁸ Judas ñee nyecuayã nguiatu quia ùquĩ je nyii reaë. —Ae ritii ra asiite, aque chõ ñene. Aque jëisi serao, i quia equia ee nyii reaë. ⁴⁹ Jesús riichã nguë esi saludar i ee cote ra. Jesús ritii que esiite ee cote ra. ⁵⁰ —¿Mbaerã erechu serea re? i que Jesús ee ra. Mbia que ngaë Jesús isi ecua cote ra. ⁵¹ Ùquĩ mose que Jesús rimba mo uchuuru sirõ tiquise ra. Sacerdote rerecua rimba rese que tiquise uru ra. Eisa que echisia ra. ⁵² Jesús que ñee ee ra. —Ndechuuru emingue chõ eriru ye. Nde emo nyiisha mose tiquise je, nde abe ra emo ndeisha. ⁵³ ¿Ndeiranuate ángeles rese re? Se ñee mose Paba je, ángeles tubiriã tuchi nda embu seje re chaë. Sereaquiato sacuã. ⁵⁴ “Ángeles

embu rã sereaquiatu”, ae eã nda Paba je. Ūquĩ mose ra embesa ji ique eã cote. Sã embesa ji riqui ñee no: “Mbae rasi ra esaã tuchi” i no, i que Jesús ñee Pedro je ra. ⁵⁵ Jesús que ñee mbia ja je cote ra. —¿Mbaerã jenyu quia tiquise rurucuaẽ serea co re? Ira jua abe no. Mbae mbuquiachãsa rea rocoĩ jenyuchĩ nguia serea co. Tenda que amumba mumba beite rei quia jendese Dios chuchua resẽ. Mbia que ambaaquiato quiatu bei rei quia huee resẽ. ¿Mbaerã seisiã nyucua aque mose re? ⁵⁶ Embesa ji ique sacua ño jẽicuã icuã ndiqui nguia seje ã, i que Jesús ra. Echĩmbaquiato que nyoĩ ja chee uchã Jesús recha ra.

Jesús mbia curuchoi mbia rerecua je

⁵⁷ Ae Jesús isi nae, ũquĩ ñgue ecuruchoi sacerdote rerecua je ra. Huee que embesasa chi ja ñumunua nda. Amei ererecua ja abe. ⁵⁸ Pedro que embuchurucha rucha oso quia erui ra. Ngasẽ nyee que sacerdote rerecua itaicuee ra. Huee que ngoi sacerdote rimba mo ndese ra. —Mañi nda mbia Jesús je reae, i que hui ngoi eraarõ arõ nda. ⁵⁹ Sacerdote rerecua que chi ja huee ra. Amei mbia rerecua ja abe no. Mbia rerecua ja tuchi. —Jesús nandei quia, i rei que ñee ñee nyue ra. —¿Mbae i ra abam bia je Jesús riicharã nde? i rei que u ñee ñee nyue ra. ⁶⁰ Emo emo ñgue ngaẽ ndei ñee icuã icuã Jesús riĩ nda. Ūquĩnde que mbia nyeremo ngaẽ ñee ñooño Jesús riĩ nda. ⁶¹ —Jesús que ñee ñooño Dios chuchua riĩ nda. “Dios chuchua ra ambucoi. Tres días mose ra achaobe”, i que urechandu Jesús cheẽ nda, i que ũquĩ ñee ñooño Jesús riĩ nda. ⁶² Sacerdote rerecua que juã ñee Jesús je ra. —¿Echeẽ nda eresibishorõ eã mbei re? ¿Mbae i equia nderĩ nde? i que Jesús je ra. ⁶³ Jesús que ñee eã mbei echeẽ mose ra. Sacerdote rerecua que ñeembe ee ra. —¿Dios rucucha nde re? ¿Cristo nde re? Diósaa echeẽ ure je, i que sacerdote rerecua ñee ee ra. ⁶⁴ Jesús que ñee ee ra. —Ae. Dios rucucha chõ se re. Tacheẽ nyecua jẽje. Jemaẽ nda serese se coi mose Dios quirãcuã jii. Sechu mose abe ibeishĩ ndese, i que Jesús ee ra. ⁶⁵ Sacerdote rerecua que paama i tuchi Jesús cheẽ mose ra. Huĩrao que endoro ndoro chee ra.

Ñee ñgue ererecua ataque je ra. —Jesús riqui Dios rucucha raã naa co. Jeñandu jate equia ã. Sã mbia mo nandembiirandube eã cote. Nandemae ndei ñgue erese re. ⁶⁶ ¿jẽje re? ¿Mañi nande ra equia re? i que sacerdote rerecua ñee ererecua ataque je ra. —Eicuã tuchi que ra jẽ. Sã mbia equia, i jate que ererecua ñee Jesús riĩ nda. ⁶⁷ Mbia que ñinimbu nimbu Jesús ruba rese cote ra. Ucuu ucuu abe que erese ra. Emo emo ñgue eritii mbeete ete o je ra. ⁶⁸ Ñee ñgue ee ra. —“Cristo chõ se re”, ere ñi equia. Aba chõ ucuu nderese chã. Ma eicu no, i que mbia ñee icuã icuã ee ra.

Jesús aicuayãte reseẽ, ichõño Pedro

⁶⁹ Pedro que chi mbeite ngoi itaicuee ra. Nyucuaaque mo ñgue tu ñee ee mbia rimba mo nda. —Jesús resenda que nde abe ra. Galilea jenda, i que nyucuaaque ñee ee ra. ⁷⁰ Pedro que ñee ee ra. —Tei. Ndecheẽ aicuayãte, ichõño ñgue Pedro mbia resaa ñee ee ra. ⁷¹ Pedro que oso quia eiquesa cuti cote ra. Nyucuaaque nongue que ñee mbia je eriĩ nda. —Co abe que Jesús resenda ra. Nazaret jenda, i que ñee mbia je ra. ⁷² —Tei. Jesús aicuayãte, ibe que Pedro ñee icuã ee ra. ⁷³ Ae chi huee nae, ũquĩ mo ñgue ñee Pedro je cote ra. —Jesús resenda chõ nde abe resẽ. Ndecheẽ aba chiicuate resẽ, i que ñee ee ra. ⁷⁴ Pedro que jurar i tuchi ñee ee ra. —Aicuayã tuchite se resẽ, i que ñee ñooño nda. Aque mose tuchi que nguira ñee cote ra. ⁷⁵ Pedro que ndua Jesús cheẽ ndese cote ra. Sã Jesús ñee ee nyii no. —Nguira cheẽ nonde ra erecheẽ ñooño tres veces seriĩ, sã Jesús i ee nyii no. Ūquĩ ndese que Pedro ndua cote ra. Nyebe esi nguia usẽ nyeseo tuchi.

27

Mbia Jesús curuchoi Pilato je

¹ Nyaashĩ namo mose que sacerdote rerecua ndua hue ri ja ra. Amei mbia rerecua ja abe no. Hue ri ja ndua Jesús iquia sacua. ² Jesús que echucua suruchoi Pilato je ra. Pilato rei mbia rerecua, hue jenda ja rerecua.

Judas uchosoĩ mumbi nyiquia

³ Mbia ra Jesús iquia, i mose Judas je, eya eã tuchi que ũquĩ mose ra. —Jesús amee jirichĩ nguiã mbia je, i que ra. Nyebe mbae isiquia mondobe nguiã sacerdote rerecua je. Amei ererecua je abe no. ⁴ —Mbae icuã tuchi asaãchĩ. Jesús seteã tuchi ameechĩ jėje. Eiquia sacua, i que Judas ñee nda. —Nde quia rei. Ure eã ñene, i ja que ererecua ñee ee ra. ⁵ Judas que mbae isiquia mbaba asi mombo mondo íbii ra. Dios chuchúaa. Oso que uchosi mumbi nyi quia cote ra. ⁶ Sacerdote rerecua que mbae isiquia sirõ ibi si cote ra. —Mbia ribishoronda chõ ã mbae isiquia re. Nyebe nandemondo eã ofrendarã, i que ñee ñee nyue ra. ⁷ Aquere que sacerdotes ibi mo isi aque mbae isiquia je ra. Ibi mo ngue eisi mbiamo tiquia tiquia sacua nda. Ñionga, i que hue ibi je ra. ⁸ Nyebe eriqui nguiã “mbia ruqui rua” i bei hue je. Namonyee. ⁹ Aque mose que Jeremías ñimbasa ique cote ra. ã ndei Jeremías ñimbasa ã: ũquĩ mbae isiquia treinta que eisi cote ra. ũquĩ ndei mbia ribishoronda ũquĩ. ¹⁰ ũquĩ mbae isiquia que emondo hue ñionga ribishorõ cote ra. Dios ñee nguia erĩ seje nyii nae, ũquĩ ndui sí, i que Jeremías embesa cose ra.

Pilato ñee Jesús je

¹¹ Mbia que Jesús curuchoi Pilato je cote ra. Pilato que ñee ee ra. —¿Judíos rerecua chõ nde re? i que ee ra. —Ae. Judíos rerecua chõ se re, i que Jesús ee ra. ¹² Sacerdote rerecua que ñee icuã ja Jesús je ra. Amei ererecua abe no. Jesús que ñee ãte echeẽ mose ra. ¹³ —¿Erechanuãte equia ñee mose nderĩ nde? i que Pilato ñee Jesús je ra. ¹⁴ Jesús que ñee ãte echeẽ mose ra. Nyebe Pilato nyuruira tuchi nguiã echeẽ eã mose.

Jesús jėjeiquia mbucha ira rese, i ererecua

¹⁵ Pilato que mbia tarõ ji mo mbusẽ mbei quia pascua mose ra. Co mii ngue embusẽ mbusẽ mbei quia pascua mose ra. Ae je mbia riqui ñee, “aque embusẽ mondo” i nae, aque chõ ngue embusẽ mbei quia ee ra. ¹⁶ Barrabás, i que etarõ ji mo je ra. Mbia chĩcua tuchi que ae ra. ¹⁷ Mbia ñumunua

ja mose que Pilato ñee ee ra. —¿Aba ra ambusẽ mondo jėje re? ¿Barrabás ra re? ¿Jesús ra re? i que Pilato ñee ee ra. ¹⁸ —Sacerdote rerecua riqui paama i chooñote Jesús je ã, i quiatu que Pilato ndua ndua uchiangui re ra. ¹⁹ Pilato que chĩ ngoi ndua ndua ngũenda tose ra. Eninisi que ucheẽ mondo ñee ee ra. —Ehui chõ Jesús si jě. Mbae icuã ngue esaã eãte resẽ. Atea que seque re isa ra jě. Seque re icuã tuchi que aa ra jě, i que Pilato ninisi ñee ngu je ra. ²⁰ Sacerdote rerecua que ñee mbia ja je ra. Amei ndese. —Sã Pilato Barrabás mbusẽ mondo. Sã Jesús quiatu iquia, i que ererecua ñee ja mbia je ra. Nyebe mbia “eno” i chee ee. ²¹ Pilato que ñee si mbia je ra. —¿Aba ra ambusẽ mondo jėje re? ¿Jesús ra re? ¿Barrabás ra re? i que Pilato ra. —Barrabás embusẽ mondo i que mbia ee ra. ²² —¿Mañi ae quia ra Jesucristo je re no? i que Pilato ra. —Embucha ira rese, i ja que mbia ñee ee ra. ²³ —¿Mbae icuã esaã nde? i que Pilato ee ra. —Embucha ira rese jě, ibe que mbia tasẽ tasẽ ee ra.

²⁴ —Mbia riqui “Jesús eiquia” i i tuchichĩ, i que Pilato ndua ndua ra. —I mo embu seje, i que mbia je cote ra. Nyoĩ que mbia résaa cote ra. —A aico nyoĩ a. Se ra Jesús aiquiayã. Eseteãte quiatu ngue re. Jě nguiatu jěingo erese, i rei que Pilato ñee mbia je ra. ²⁵ Mbia que ñee ja Pilato je ra. —¿Eiquia jě! Eicuãte que eriqui ra jě. Dios ra paama i eã eiquia mose. Dios paama i mose, sã ure je quiatu paama i. Ueririĩ je abe no, i jate que mbia Pilato je ra. ²⁶ Pilato que Barrabás mbusẽ mondo cote ra. Jesús cuasa quiatu que chiño nda. Pilato que Jesús iruã nua cote ra. —Jembucha iquia ira rese, i que ñee soldados je cote ra.

²⁷ Soldados que Jesús cuasa curuchoi ererecua chuchúaa ra. Huee que soldados ataque abe ngaẽ ja Jesús mama nda. ²⁸ Jesús irao que embui esi ra. Tiru ireĩ nguiatu ngue emingue nguiã ee cote. ²⁹ Nyu ritiméi uma ji que emii eãquĩ ndese corona nda. Ira ñetẽ mo abe que emondo éoo ra. Ngoi ja que u ngũã ndese Jesús nonde ra. Ñee icuã icuã ngue u erĩ nda. —Judíos rerecua tuchi chõ nde re, ichõĩño ngue soldados Jesús je ra. ³⁰ Ñinimbu nimbu

abe que erese ra. Ira abe que euru uru eãquĩ ndese no nda. ³¹ Jesús rimba que esaã saã ee no nda. Iquia iquia que ee no nda. Aquere que tiru ireĩ mbui esi cote ra. Eiraote que emingue ee cote ra. Curuchoi que embucha nonde ira rese cote ra.

Mbia Jesús mbucha ira rese

³² ¶ rei que echoi quia ra. Mbia mo ngue esobeishĩ nda. Simón, i equia ee. Cirene jenda que ae ra. —Cruz echa rã Jesús mbucha sacua pe, i que soldados ee ra. Nguerao que ee cote ra. ³³ Ngasẽ ngue pee cote ra. Gólgota, i que hue je ra. Eresa cuare, i chõ nguiã hue je. ³⁴ Huee que vino ñimocondo tuchi mo mondo Jesús je ra. Ubi rei que erese ra. Aquere que embei eã cote ra. ³⁵ Soldados que Jesús mbucha ira rese ra. Aquere que sita ñetẽ mbaba mbaba o je cote ra. —Aba ra Jesús irao querao ñi ja, i que nyue ra. Aque mose que embesa ji cheẽ ique cote ra.

Seirao que embuchao chao nyue ra.

Sita ñetẽ mbaba mbabare o je,

i que embesa ji ra. ³⁶ Aquere que soldados chi ngoi Jesús raarõ cote ra. ³⁷ Mbia que letrero mi Jesús aãquĩ nguiti ibate ra. JESUS REI JUDIOS RERECUA, i que embesa mi nda. Ñquĩ ni ño eriqui nguiã eiquia hue. ³⁸ Mbia nyeremo abe que embucha ira rese Jesús chabe ra. Jesús rereco chobei que emi ira rese ra. Mbae mbuquiachãsa tuchi que ñquĩ nda. ³⁹ Mbia que iquia iquia chõ nguia echeẽ naa naa ecuã nda. Ñee icuã icuã ee. ⁴⁰ —“Dios chuchua ra ambucoi. Tres días mose ra ambuchuruambe” ere que equia. Ndequirãcuã tuchi mose, equichi u hue si. Nde Dios rucucha mose, equichi u cruz si, i tuchi que mbia quia iquia iquia ee ecuã mose ra. ⁴¹ Sacerdote rerecua abe que iquia iquia chõ nguia ee ra. Embesasa abe no. Amei ererecua abe no. Ñquĩ ngue ñee icuã icuã ja quia erĩ nda.

⁴² —Mbia que embuquera quera rei nyii ra. Ae si quia quera aroneate nguiã aque. Judío rerecua mose ae, sã ae ae nguichi ira si. ¶ nda ureicu a cote, i ja que ererecua ñee icuã icuã e erĩ nda. ⁴³ —“Dios aicuate”, i que equia, sã Dios ae embuquichi eya mose erese. “Dios rucucha rei se” i que equia, i ja que ererecua ñee icuã icuã erĩ nda. ⁴⁴ Ae

mbuchai chi ira rese mbae mbuquiachãsa nae, ñquĩ abe que ñee icuã icuã nyee ee ra.

Jesús mano cote

⁴⁵ Tenda nandeite re mose que itondaru ru ra. Itondaru bei que mbia ja je tres horas ra. ⁴⁶ Tenda cheseco mose que Jesús ñeemombo cote ra. —Elí, Elí, ¿lam a sabac-tani? i que ñeemombo ra. —Dios sererecua, ¿mbaerã ereico hui sesi re? i chõ ngue ñee nguiã. ⁴⁷ —Elías je eriqui “quiatuchu” i reae, i rei que echeẽ andusa mo nda. ⁴⁸ Aque mose tuchi que emo esponja monde vina-gre ye ra. Ira ai rese que embia ji mondo rei Jesús chúruu cote ra. ⁴⁹ —Esecha rei. ¡Sã Elías ruãte quia erea! i que eataque ñee ee ra. ⁵⁰ Jesús que tasẽ mano mbei cote ra.

⁵¹ Aque mosechi tuchi que cortina nyisia Dios chuchua jenda ra. Ibate si que eru nyisia íbii ra. Ibi que nyere nyere cote ra. Sita abe que nyisia sia nyibite bite rĩ nda.

⁵² Mbia tãsa mo abe que nyeequia equia ra. Dios quiato raaque mo ngue quera quera ra. ⁵³ Jesús quera si mose que ñquĩ ndaaque usẽ nyoĩ cote ra. Nyoĩ que Jerusalén cote ra. Mbia tubiriã ngue mae u erese ra. ⁵⁴ Soldados rerecua que chĩ mae Jesús rese ra. Soldados abe no. Ñquĩ ngue siquichete Jesús mano mose ra. Ibi chere mose. Mae mose mbae ja rese. —Dios riirĩ ño eriqui re, i jate que soldados ñee erĩ cote ra.

⁵⁵⁻⁵⁶ Cuña ngue chi jate mae Jesús rese isho ra. María Magdalena abe que chĩ huee ra. María abe no. María rei Jacobo si. José abe si. Zebedeo riirĩ si abe que chĩ erese huee ra. Ñquĩ ngue siqui bei quia Jesús rui ra. Echiurã ngue emi mi mbei quia ee ra. Galiléaa eico mose bei.

Mbia Jesús raaque chati cote

⁵⁷ José, i que mbaecha mo je ra. Arimatea jenda rei ae. Jesús quiato que ae ra. Tenda ireĩ mose que esi ñee Pilato je ra. ⁵⁸ —Jesús raaque emee na seje, i que oso ñee Pilato je ra. Pilato que “eno” i ee ra. ⁵⁹ José que eraaque curuchoi cote ra. Ñuma ngue tirushĩ mo je ra. ⁶⁰ Jesús raaque que eiti suruchoi sita ribicoi ji imi ye ra. José chisaã ye. Nyati rei que sita cuasu mo je cote ra. Nyoĩ que

erecha cote ra. ⁶¹ María Magdalena ngue chi ngoi mae Jesús atisa rese ra. María rese.

Soldados Jesús raaque atiquia saarõ u

⁶² Isamami ngue sacerdote rerecua choi ñee Pilato je ra. Fariseos abe no. Sábado isamami ngue ra. ⁶³ Ũquĩ ngue nyoĩ ñee Pilato je Jesús rĩĩ nda. —Urendua nduachĩ nguiã ñeeñoño je rese. “Tres días mose ra aquera si”, i que equia mano nonde ra. ⁶⁴ Soldados emondo rã eatiquia raarõ. Sã echĩ bei tres días eraarõ huee. † nda echimbaaquiatu eraaque siroã suruchoi. “Quera si que ra” ¡chĩ nda ñee ñooño mbia je jẽ! Ũquĩ mose ra mbia mbiĩĩ irĩ tuchi cote, i que ñee Pilato je ra. ⁶⁵ Pilato que ñee ee ra. —Soldados jendao rã. Eraaque raarõ tuchi sacua, i que ee ra. ⁶⁶ Soldados que ecuruchoi Jesús atiquiaa cote ra. Eiquesa aronda que ematã tuchi cote ra. —Jësaarõ tuchi jẽ, i rei que soldados je cote ra.

28

Jesús raaque quera si

¹ Jesús raaque ati ji que chibe sábado mose ra. † nyaashĩ oso quia domingo mose, aque mose que cuña mo nyoĩ mae eatisa rese ra. María Magdaalena, i que emo je ra. María, i que enongue je ra. ² Aque mose tuchi que ibi nyere nyere ee ra. Angel ibatenda mo nguia tu quia eatisa mbuquiata reaẽ. Sita eatiquia que ecuruba ra. Ngoi que etose ra. ³ Enininya tuchi que chĩ ngoi ra. Ama pirirã pirirã i rã tuchi que ra. Eiraoshĩ tuchi que chĩ nda. ⁴ Soldados que titi titi i tuchi chõ mae ũquĩ ndese ra. Emundi tuchi que ra. ⁵ Angel que ñee cuña je ra. —Jësiquiche quichechĩ nguiã. Jëingo raque Jesús raaque requia ã. ⁶ Emoate aa resẽ. Eraaque que quera si no. Ucheẽ ndui si que quera resẽ. Jenyu rei mae eatisa rese ae. ⁷ Jëso asi rã echimbaaquiatu mbiirandu equera si rese. “Jenonde ra esi Galilea. Jemae nda erese huee”, jenyee embiirandu. Ũquĩ ae chõ ngue u nguiã jëje, i que ángel cuña je ra. ⁸ Cuña ngue siquichete echeẽ andu ra. Eyate abe que ra. Uchã ndei que echoi quia Jesús chimbaaquiatu mbiirandu ra. ⁹ Ñeenda cúa chõ ngue Jesús nyecua saludar i ee ra. Cuña ngue nyoĩ oo

erese ra. Jesús i que equiaama ama nda. ¹⁰ Jesús que ñee ee ra. —Jësiquichechĩ nguiã sesi. Jëso ñee seresenda je. “Jëso rã Galilea. Hue ra jemae Jesús rese”, jenyee oso ee, i que Jesús ñee cuña je ra.

Soldados ñee ñooño Jesús raaque rĩĩ

¹¹ Soldados eraaque raarõsa que nyoĩ sacerdotes rerecua mbiirandu Jesús quera rese ra. Ae rese mae nae, ũquĩ ngue esenei ja ee ra. ¹² Sacerdotes rerecua que nyoĩ ja ñee amei ererecua je cote ra. —¿Mañi nande ra equia mbia jiranuã sacua Jesús quera rese re? i que ererecua ndua ndua hue rĩ ja ra. Nyebe mbae isiquia mee nguiã soldados je, ñee ñooño sacua mbia je. ¹³ —Jënee ñooño mbia je jẽ. “Ureque mose Jesús resenda eraaque suruchoi rei sirõ”, jenyee chooño mbia je jẽ. ¹⁴ Pilato jirandu mose jendese, urecheẽ nda ee. Paama iã nda jëje chã, i que ererecua ñee ja soldados je ra. ¹⁵ Soldados que mbae isiquia isi cote ra. Ñee ñooño tuchi que mbia je cote ra. Nyebe judíos riqui nguiã ñee mbei ã cote. —Jesús chimbaaquiatu que eraaque sirõ cose ra, nyebe eriqui nguiã i bei ã cote.

Jesús uchimbaaquiatu mondo mbia mbiirandu

¹⁶ Jesús chimbaaquiatu once que nyoĩ ja Galilea ra. Ibi ibate mo ngue echoi Jesús cheẽ nguire ra. ¹⁷ Jesús que nyecu a ee huee ra. Jesús rese mae mose que ngoi nguiã ndese ñee ee ra. —Jesús eã ño co reae, i rei que emo emo ñee uchiangui re ra. ¹⁸ Aquere que Jesús si erichã ñee ee cote ra. —Sequirãcuã tuchi chõ se re. Se rei ibi jenda rerecua ja. Ibatenda abe rerecua ja. ¹⁹ Jëso mbia mbuquiata quiatu ja serĩ. Mbia mangue chooñoa jenda ja. Bautizar jenyee ee Paba rĩĩ. Serĩ abe. Espíritu Turã nii abe no. ²⁰ Jembaaquiatu quiatu tuchi secheẽ nii. Ae asenei senei nguia jëje nae, ũquĩ jësenei senei ja ee. Secheẽ mumbayã sacua. Aico bei ra se quia jendese. Mbae ua j a chee, i que Jesús ñee ee ra. Amén.

EL SANTO EVANGELIO SEGÚN SAN MARCOS

Juan el Bautista Dios cheẽ senei senei

¹ ã tasenei na jẽje. Dios cheẽ turã Jesucristo rĩ. Jesucristo rei Dios ririĩ. ² Sã Isaías Dios cheẽ mbesa cose no:

Secheẽ nderaosa amondo quia nderẽta aque.

Ae ra ñeenda mbuquiche nembraerã, i que Dios ra.

³ Emo ndiqui ñeemombo mombo turúquiaa hue.

“Sã emo ndiqui ñeenda mbuquiche no, eĩ jenyẽ si chõ nguia jẽ abe ico quiatu nandererecua raarõ arõ”, i equia turúquiaa hue,

i que Isaías embesa ra. ⁴ Juan el Bautista que tu ñquĩ ñee nguire cote ra. Dios cheẽ ngue esenei senei nguia turúquiaa cote ra. —Jendua si Dios rese. Jẽhui chõ jẽicua si. Dios jẽicua mbutiã sacua. Ñquĩ mose nda bautizar ae jẽje chã, i beite que Juan nguia ñee nda. ⁵ Jerusalén jenda que ngaẽ ngaẽ tuchi quia echeẽ andu ra. Judea jenda abe no. Mbia huicua nenei nenei mose Dios je, ñquĩ mose que Juan ndiqui bautizar i ee ra. Ama Jordán ye. ⁶ Quiicua mbuaera chõ ngue Juan irao ra. Camello. Mbae ire chõ ngue enumbicua no nda. Tucu mbuae chõ ngue eu eu quia ra. Irao quiaa rãnda abe. ⁷⁻⁸ Dios cheẽ ngue esenei senei nguia ra: —I achõ je chõ aico nguiã bautizar i mbia je co. Co chi emo ndu quia serui co. Dios ririĩ tuchi chõ ae re. Ae quia equirãcuã tuchi sesi re. Ae quia eturã tuchi sesi no nde. Ae quia tura bautizar i mbia je Espiritu Turã je. Mbia chiã mbitirõ sacua, i beite que Juan nguia ra.

Juan bautizar i Jesús je

⁹ Aque mose que Jesús ru sucha tubiriã Nazaret si ra. Galilea jenda rei Nazaret. Juan ngue bautizar i Jesús je ra. Ama Jordán ye. ¹⁰ Jesús que usẽ oso ama si cote ra. Ibei que nyeequia ee cote ra. Espiritu Turã ngue nguichi u erese cote ra. Nyurushi rã ngue eru nguichi erese ra. ¹¹ Ibei

jenda que ñee ee ra. —Seriirĩ ño nde re. Sechesequa chõ nde re. Seyate nderese, i que Dios ñee ee ra.

Jesús tambĩ cuã, i raque Satanás

¹² Espiritu Turã ngue Jesús querao turúquiaa cote ra. ¹³ Huee que Jesús riqui arete ra. Cuarenta días. Nyacua risha ite re. Mbia rĩchare ja ite re. Satanás que tu rei tã i ee cote ra. Angeles que ngaẽ ngaẽ nguia ereaquiatu ra.

Jesús mbia mbaaquiату quiatu ramo

¹⁴ Mbia rerecua que Juan tarõ cárcel cote ra. Aquere que Jesús si Galiléaa ra. Dios cheẽ turã ngue esenei senei nguia huee ra. ¹⁵ —Achite Dios ñi tu mbia rerecuarã a. Jendua si Dios rese. Jẽhui chõ jẽicua si. Dios cheẽ turã jẽicua. I nda Dios jemingo bei, i que Jesús quia ñee mbia je ra.

Jẽingo serui, i Jesús uchĩmbaaquiaturã je

¹⁶ Jesús que ngata oso quia ama nimia ndui ra. Galilea, i que aque ama ndisha je ra. Huee que mae Simón ndese ra. Enongue abe rese mae. Andrés, i equia ee. I que u sira mbua mbuasa mondo mondo ii ra. Sira resenda bei rei ñquĩ. ¹⁷ Jesús que ñee ee ra. —Serui bei chõ jẽingo jẽ. Taembaaquiату quiatu. Mbia teendu endu bei quia seje cote, i que ee ra. ¹⁸ Nyoĩ ja que erui ra. Sira mbuasa si que echoĩ hui ra. ¹⁹ Pe jiri que mae Jacobo rese ra. Enongue rese abe. Juan, i equia ee. Zebedeo ririĩ ja rei ñquĩ. Huee que echi ja canoa ye sira mbuasa mbitirõ tirõ nda. ²⁰ —Jẽingo serui, i que Jesús ñee ee ra. Echeẽ nduibe tuchi que echoĩ erui ra. Ngu que esecha choĩ ra. Eru que siquichõ canoa ye ngũimba rese ra.

Jesús aba checuayã icuã jea mbia mo si

²¹ Nyoĩ que sucha tubiriã Capernaum nda. Sábado mose que Jesús si judíos chumunua nuásaa ra. Mbia mbaaquiату quiatu sacua. ²² Mbia rerecua rã ño ngue eriqui mbia mbaaquiату quiatu ra. Embesasa rã eã. Nyebe mbia riqui nguiã nyuruiira tuchi echeẽ andu. ²³ Huee que amei mo ndiqui mbia chumunuásaa ra. Aba checuayã icuã nyireco rei ae. Ñee asite que Jesús je ra. ²⁴ —¿Mbaerã erechu urerea co re, Jesús? Quiatúae urerecha ae.

¿Urericharã ño erechu quia co re? Dios rucucha chõ nde re. Areicuate se, i rei que aba checuayã ñee asite ee ra. ²⁵ Jesús que ñee asi ee cote ra. —¡Equiriri chõ jê! Esê oso amei ñiangui si, i que ee ra. ²⁶ Jesús cheê mose que aba checuayã amei mburirite cote ra. Tasê ngue oso usê amei si cote ra. ²⁷ Mbia que nyuruira tuchi mae Jesús rese ra. Ñee ñee ja que nyue cote ra. —Jesús riquichĩ mbia mbaaquiato quiatu ucheê namonda je co. Equirãcuã ae ñee nguiã. Mbia rerecua rã ño eriqui nguiã ñee aba checuayã icuã je co. Sã aba checuayã echeê mumbayãte jê, i que mbia ra. ²⁸ Mbia que jirandu jei Jesús rese Galilea jenda ja cote ra.

Jesús Simón ninisi si mbucherõ

²⁹ Jesús que usê nyoĩ mbia chumunuasa si cote ra. Nyoĩ que Simón nyuchua ra. Andrés abe que siqui rei huee tuchia ra. Jesús que ique nyoĩ huee ra. Jacobo rese. Juan ndese abe no. ³⁰ I que Pedro chari rasi u nyaara ee ra. Eracu tuchi que ra. ³¹ Jesús que eo isi embuchuruã nda. Aque mosebe que eracu ti i esi cote ra. Mbae que echao chao quia mbia chiurã cote ra.

Jesús mbia rasi chumumbara mbucherõ

³² Itondaru ramo mose que mbia erasi rurucuaẽ cuaẽ tuchi Jesús je ra. Ae aba checuayã queroco quia nae, ùquĩ abe que ecurucuaẽ cuaẽ tuchi quia ee ra. ³³ Sucha tubiriã jenda ja que chi ñumunua eiquésaa ra. ³⁴ Mbia rasi chumumbara que embucherõ cherõ ja ra. Aba checuayã icuã tubiriã ngue ejea jea quia mbia si ra. Aba checuayã ngue Jesús icuate rei ra. Nyebe Jesús riqui nguiã echeê ndiquisã quisãte.

Jesús mbia Galilea jenda mbuchesea sea

³⁵ I nyaashĩ oso quia, aque mose que Jesús juã oso mbia tiãsaa ra. Ñee sacua Dios je itondaru bei mose. ³⁶ Simón ngue oso erui emuña nda. Nguesenda rese. ³⁷ Ngasê ngue ee ra. —Pe mbia chi nderequia jate pe, i que ee ra. ³⁸ Jesús que ñee ee ra. —Nyao sucha tubiriã mbuchesea sea achĩ jenda. Dios cheê nda asenei senei ee chã. Nyebe achu nguiã, i que ee ra. ³⁹ Galilea jenda que embuchesea sea ja cote ra. Dios cheê

nenei nenei judíos chumunua nuásaa. Aba checuayã abe jea jea mbia si.

Jesús mbia leproso mbucherõ

⁴⁰ Emo ndasi que ngasê Jesús je ra. Leproso, i que ùquĩ erasi je ra. Tu que ngoi ngũiã ndese ñee Jesús je ra. —Nde sembucherõse mose, sembucherõ se, i tuchi que ñee ee ra. ⁴¹ Jesús ia eã tuchi que erese ra. Ñomee ngue oco erese cote ra. —Eno. Tarembucherõ, i que ee ra. ⁴² Echeê nduibe tuchi que nyerõ cote ra. ⁴³⁻⁴⁴ Jesús que ñee ee ra. —Sã jê. Erecheẽchĩ nda emo je jê. Eso nderasiã ndeacuquia sacerdote je cote. Moisés cheê ndui si chõ mbae mo emondo Dios je. Eĩ nda mbia jirandu nderasiã ndese cote, i rei que Jesús ñee emondo ra. ⁴⁵ Mbia que embiirandu ja tuchi chõ oso ra. Nyebe Jesús nyecua aroneate nguiã sucha tubiriã mo. Siquiibi ibi chõ ngue eriqui cote ra. Icuenda ja que ngaẽ ngaẽ nguia erera.

2

Jesús emi sayã mo mbucherõ

¹ Emo mose jiri que Jesús nyebi Capernaum nda. Echuchua ereco mose que mbia jirandu erese ra. ² Mbia tubiriã ngue ñumunua ee ra. Mbia chayã tuchi que ra. Eĩ quesa abe itãyã tuchi que ra. Dios cheê ngue esenei senei tuchi quia ee ra. ³ Mbia cuatro que erasi mo curucuaẽ ee ra. Emi sayã. ⁴ Mbia tubiriã ngue tuchia mbi-itãyãte eriquisã nda. Nyebe erasi ruruchoĩ nguiã sui tei quite arõ. Tei que endoro cote ra. Erasi que embuquichi imbu quisa ye Jesús je cote ra. ⁵ —Erurucuaẽsa riqui seicuate ùquĩ, i que Jesús ñee uchiangui re ra. Nyebe ñee nguiã emi sayã je. —Echo, ndechisaã mbae icuãambutia nguia ndesi a, i que ee ra. ⁶ Embesasa mo abe que chi echeê andu ra. Mae icuã icuãte que equia Jesús res e ra. ⁷ —¿Mbaerã Jesús riqui ñee ùquĩ nde? Ñee icuã icuã ñochĩ equia Dios rĩ co. Dios ibatenda ae mbi a chiao icuã mbutiã tiã nguia esi resê, i rei que ñee icuã icuã Jesús rĩ nda. ⁸ Jesús que ùquĩ ndua ndua icuate quia ra. Nyebe ñee nguiã ee cote. —¿Mbaerã jẽingo ndua ndua icuã nde? ⁹ ¿Ma mbarangiatuã eã jiri jêje re? ¿Mbia icuã mbutiã esi ere? Mbia rasi

mbucherõ ere no ae. ¿Ma mbaranquiatsuã eã jiri jêje re? ¹⁰ Dios rucucha rei se. Mbia chiao icuã mbutiã aquiatsu chõ se re. Sequirãcuã tateacuquia jêje, i que Jesús ñee ee ra. Ñee ngue erasi je cote ra. ¹¹ —Ehuã na. Ndechuchua eso cote. Ndequisa abe erao, i que Jesús emi sayã je ra. ¹² Emi sayã ngue juã asi Jesús cheẽ nduibe cote ra. Ngua que esirõ asite serao cote ra. Mbia resa rae ja. — ã ndese que ureico mae eã tuchi emo mose ra, i tuchi que mbia u mae nyuruira erese ra. Mbia que ñee turã jate Dios quirãcuã ñi cote ra.

Serui bei eico, i Jesús Leví je

¹³ Jesús que oso si ama ndisha rimíaa nda. Mbia que ngaẽ ngaẽ jate erea ra. Jesús que embaaquiatsu quiatsu ra. ¹⁴ I que Jesús oso quia ra. Mae ngue Leví rese ra. Alfeo riirĩ ngue Leví ra. Ngoi que huĩ plata isi isi impuestorã nda. —Serui bei eico, i que Jesús ñee ee ra. Ae Leví juã oso nguiã erui.

¹⁵ Jesús que nyoĩ quiaru erese ra. Impuestos isi isiquia ata que chi quiaru erese huee ra. Echimbaaquiatsu abe rese. Mbia icuã mo abe que chi quiaru erese no nda. Ûquí tubiriãte que siqui erui ra. ¹⁶ Fariseos que ñee icuãte Jesús chimbaaquiatsu je ra. Embesasa abe que ñee icuãte ee ra. — ¿Mbaerã Jesús riqui quiaru mbia icuãte rese re? i que ñee nda. ¹⁷ Nyebe Jesús ñee nguiã ee. —Sã mbia rasiã ndiqui aba mbucherõsa requia eãte no. Sã erasi chõ ndiqui erequia no. “Jenyu seje” ae eã ngue u nguiã mbia turã je. Mbia icuã je chõ ngue achu nguiã “jenyu seje” i, i que Jesús ra.

Jesús chimbaaquiatsu hui ãte uchiu si

¹⁸ Juan ñimbaaquiatsu que hui uchiu si aque mose ra. Fariseos chimbaaquiatsu abe no. Nyebe mbia ngaẽ nguiã ñee Jesús je. —¿Mbaerã ndechimbaaquiatsu abe riqui hui ãte uchiu si re? i que ñee Jesús je ra. ¹⁹ Jesús que ñee ee ra. —Sã emo ndiqui ngũinisirã isi ramo no. Sã eresenda iate riqui quiaru erese no. Sã eriqui hui aroneate uchiu si aque mose no. ²⁰ Sã eru riqui mano emo mose no. Aque mose ramo nguiatsu ra equiatsu hui uchiu si cote. ²¹ Sã emo ndiqui tiru yasu mii aroneate tiru ima sorei rese no. Eyasu ra nyaacua quiata eima

si. Soro icoi tuchi chõ nda cote. ²² Sã emo mbaeri rasi ramo nderecoquiatsu eã eriru ima ye no. Mbae ire ima ye ererecoquiatsu aronea ño ñene. Eri rasi ra ñimatã ño mbae ire ndoro. Eri ra uchẽ ja. Mbae ire abe mbicuãte ra cote. Mbaeri yasu quia nda equerecoquiatsu nguiã mbae ire yasu ye. Soroã sacuã, i que Jesús ñee ee ra.

Jesús chimbaaquiatsu mbae a ishao shao sãbado mose

²³ Sãbado mose que Jesús si quia mbiaco ite ite rĩ emo mose ra. Echimbaaquiatsu que quiata a nyiqui nyiqui choi quia erui ra. ²⁴ Fariseos mo ngue ñee ee ra. —¿Mbaerã ndechimbaaquiatsu riqui mbae ishao shao sãbado mose re? Co mose chõ mbia riqui uquenea ucua resẽ, i que fariseos ñee Jesús je ra. ²⁵ Jesús que ñee ee ra. —¿Embesa ji rese jemae eã David rĩ nyii re? David riãcuãte que aque mose ra. Eresenda abe riãcuãte que eriqui aque mose no nda. ²⁶ David que ique Dios chuchua aque mose ra. Abitar que sacerdote rere cua aque mose ra. Mbichae Dios chuchua jenda que David u ra. Mee mee ngue nguesenda abe je ra. Eriãcuãte quiatsu ngue re. Sacerdote mbaerã ja chõ ndaque mbichae, i que Jesús fariseos je ra. ²⁷ —Sãbado que Dios chao mbia mbaerã nda. Sãbado mbaerã eã ño Dios mbia ao nguiã. ²⁸ Sãbado rerecua bei chõ se re, i que Jesús ñee fariseos je ra.

3

Jesús emo o tomei mo mbucherõ

¹ Jesús que oso mbia chumunuásaa cote ra. Huee que eo tomei mo ndiqui ee ra. ² Mbia que mae nguiatute quia Jesús rese ra. —Ma Jesús eo tomei mbucherõ. Sãbado mose raque co. Sã embucherõ. Nandechẽ icuã icuã nda ee chã, i que eu mae nguiatute Jesús rese ra. ³ Jesús que ñee eo tomei je cote ra. —Ehuã na u aa mbia ite re, i que ee ra. ⁴ Jesús que ñee mbia je ra. — ¿Mbae eturãte jêje co tenda sãbado mose re? ¿Coche nandeico mbae turã naa naa sãbado mose re? ¿Coche nandeico mbae icuã naa naa co mose re no? ¿Coche mbia mbucherõ co mose re no? ¿Coche mbia iquia co mose re no? i que Jesús ñee mbia ja je ra. Mbia que ñee ãte echeẽ mose ra. ⁵ Jesús que

paama i mae mbia rese ra. Eya eãte que eriqui mbia chiã ãtã ndese ra. Ñee ngue eo tomei je cote ra. —Ndeo emee secuti, i que ee ra. O que emee Jesús cheẽ mose ra. Aque mosechi que eo nyerõ cote ra. ⁶ Nyebe fariseos paama i nguiã Jesús je. Mbia mbucherõ mose sãbado mose. Ndua ndua ja que Jesús i quia nonde ra. —Jesús nandeiquia rei, i tuchi que equia Herodes resenda ja je ra.

Mbia tubiriã nyoĩ Jesús rui

⁷ Jesús que oso ama ndisha quitu ra. Uchimbaaquiato rese. Mbia tubiriã Galilea jenda que nyoĩ quia eruĩ ra. ⁸ Mbia que jirandu ja tuchi Jesús chisaã turã ndese ra. Nyebe eriqui nguiã ngaẽ ngaẽ erea. Judea jenda. Jerusalén jenda. Idumea jenda. Ama Jordán ndobeinda abe. Tiro rurubinda abe no. Sidón ndurubinda abe no. Ûquĩ ja que ngaẽ ngaẽ nguia erea ra. ⁹ Nyebe Jesús ñee nguiã uchimbaaquiato je. —Canoa mo jendu rã ino mbuquiche co rĩ, i que ee ra. Mbia quiato ngue emumbite nguiã. ¹⁰ Mbia que embucherõ cherõ tuchi quia nyii ra. Nyebe erasi ataque riqui nguiã “taoco erese” i raque. Nyebe eriqui nguiã ñimaña maña tuchi. “Nandeoco Jesús rese” i. ¹¹ Aba checuayã icuã mae mose Jesús rese que ngoi ngoi quia ngũã ndese ñee ee ra. —Dios riirĩ ndei nde, i que equia ñeemombo mombo ee ra. ¹² Jesús que ñee asite ee ra. —“Co rei Dios riirĩ co” jenyechĩ nda jẽ, i que ee ra.

Jesús mbia doce irabo uchimbaaquiaturã

¹³ Jesús que nyuĩ oso sita ibate mo ndese ra. “Jenyu” i que uchiirabobi je ra. Nyoĩ que erea ra. ¹⁴ Ûquĩ doce que eirabo nguesendacuã nda. Embuchao chao sacuã mondo Dios cheẽ nenei nenei. ¹⁵ Uquirãcuã ngue emondo ee ra. Aba checuayã jea jea sacuã mbia si. Mbia rasi chumumbara mbucherõ cherõ sacuã. ¹⁶ ã ndei mbia echiirabo ã:

Simón (Pedro, i abe que ee ra.)

¹⁷ Jacobo (Zebedeo riirĩ ndei Jacobo.)

Juan (Jacobo nongue rei Juan. Boanerges, i que ùquĩ ja je ra. “Ama sieu je riirĩ” i chõ nguiã ee.)

¹⁸ Andrés
Felipe

Bartolomé

Mateo

Tomás

Jacobo (Jacobo rei Alfeo riirĩ.)

Tadeo

Simón el Cananista

¹⁹ Judas Iscariote (Aque que Jesús mondo mbia icuã je ra.)

Ûquĩ ja que Jesús irabo ra.

Aba checuayã quirãcuã Jesús quereco co, i raque mbia

Nyoĩ que ique tuchúaa cote ra. Uchimbaaquiato rese. ²⁰ Mbia que ngaẽ ngaẽ tuchi quia erea no nda. Equiaru mose rocoĩ. Echimbaaquiato abe quiaru mose rocoĩ. ²¹ Jesús nongue jirandu mose que echoi erea ra. Equiachã eriqui rei nguiã ee. Nyebe eriqui rei nguiã “nanderao” i raque. ²² Embesasa ngaẽ nguia Jerusalén si nae, ùquĩ ngue ñee ñee mbia je ra. Mbia mbuqueta queta Jesús rĩ. —Satanás quirãcuã je chõ Jesús riqui nguiã aba checuayã icuã jea jea mbia si co, i rei que ñee icuã Jesús je ra. ²³ —Jenyu rã tacheẽ jẽje, i que Jesús ee ra. —¿Mañi nda Satanás aba checuayã icuã jea mbia si re? Erimba chõ nyeresẽ. ²⁴ Gobierno icuã icuã mose nyue, ua rae. ²⁵ Tuchuamo jenda icuã icuã mose nyue, ua ra eno. ²⁶ Satanás icuã icuã mose nyue, equirãcuã nda ua no. ²⁷ Satanás quirãcuã tuchite raque. Umbae rese ngueteãte raque. “Sembae chi turãte a”, i raque. Dios quiarei equirãcuã tuchi Satanás si. Dios Satanás mbae sirõ ja arõt e quia esi co. Dios Satanás quirãcuã mbutiã ja arõte quia co.

²⁸ Tacheẽ nyecua jẽje. Emo siqui icuã mose, Dios eicuã mbutiã arõte esi. Emo ñee icuã mose, Dios echeẽ icuã mbutiã arõte no. ²⁹ Emo ñee icuã mose Espiritu Turã ñi, ùquĩ icuã nguiatu ra Dios mbutiã eã mbei esi, i que Jesús ee ra. ³⁰ —Jesús chianguĩ re aba checuayã icuã ndiqui co, i quiato ngue mbia nguiã. Nyebe Jesús ñee nguiã ùquĩ.

Jesús nongue ngaẽ erea usi rese

³¹ Jesús nongue que ngaẽ ndei erea ra. Usi rese. Chichõ ja chõ ngue itaicuee ra. —“Quiatuchu” ere Jesús je, i que emo mondo ra. ³² Mbia que chi jate ngoi Jesús jii ra. Ûquĩ ngue ñee ee ra. —Hue ndesi riqui

nderequia itaicuee hue. Ndenongue rese, i que ee ra. ³³ —¿Aba je chõ aico “taĩ” i chã? ¿Aba je chõ aico “senongue” i no ña? i que Jesús mbia je ra. ³⁴ Jesús que mae ucheẽ andusa rese ra. —Ã je chõ aico nguiã “taĩ” i. Ñ je chõ aico nguiã “senongue” i no. ³⁵ Ae Dios cheẽ mumbayã nguia nae, ùquĩ je chõ aico nguiã “senongue” i. Ûquĩ je chõ aico nguiã “taĩ” i no, i que Jesús ñee ee ra.

4

Emo mbae eĩ mombiquia mbiquia

¹ Jesús que mbia mbaaquiato quiato si ama nimia ndese ra. Mbia que ñumunua tuchi u erese huee ra. Nyebe Jesús si nguiã ua canoa mo ye. Ngoi que huĩ huee mbia mbaaquiato quiato ra. Mbia que chi jate ama nimia ndese ra. ² Jesús que mbia mbaaquiato quiato tuchi quia ra. Ejemplos que esaã saã tuchi ee ra. ³ —Jenyisaquia rã serese. Sã emo si rei mbae eĩ mombiquia mbiquia no. ⁴ Sã emo ndiqui uqui uqui ñeenda rui no. Sã nguireĩ ndiqui ngaẽ eu no. ⁵ Sã emo emo ndiqui uqui sita arõ no. Sita aronda suri jei raque. Ibi ererate quia ñene. ⁶ Tenda ibate mose que eriqui ñimama mano nda. Erao eãte quia ñene. Nyebe mano jei nguiã. ⁷ Sã emo ndiqui uqui uqui nyu réndaa no. Sã nyu abe riqui suri erese no. Nyu ruri que echati asi cuaẽ eriquisã nda. Nyebe ia eã ño nguiã. ⁸ Sã emo ndiqui uqui uqui ibi turã no. Ûquĩ nguiatu que suri turã nda. I a turã ngue ra. Sã emo ia treinta no. Sã emo ia sesenta no. Sã emo ia cien no. ⁹ Jëisa mose, secheẽ jeñandu turã na, i que Jesús ra.

Jesús ucheẽ mbiasa uchimbaaquiato je mbae eĩ ñi

¹⁰ Mbia ataque nyoi mose que Jesús ji jenda ñee ee ra. Echimbaaquiato doce rese. —Ndecheẽ embiasa tuchi rã ure je mbae eĩ ñi, i que ñee Jesús je ra. ¹¹ Jesús que ñee ee ra. —Mbia rerecua tuchi quiarei Ibatenda. Ae chõ asenei senei nguiã jëje ã. Secheẽ ambiasa asa bei tuchi quia jëje co. Mbia ataque quia siqui sereã erese co. Mbia ataque je aico ejemplos achõ naa naa mbei co. ¹² Eanduchõ sacua eicua turã nonde rocoĩ. Sã eriqui uba eãte Dios icha rui no.

Dios eicua mbutiã eã sacua esi, i que Jesús ñee nda. ¹³ Jesús que ñee ee ra. —¿Secheẽ jëicuayãte mbae eĩ ñi ñee mose jëje re? ¿Mañi jenye quiato ra ejemplos ataque icua re no? ¹⁴ Ae mbae eĩ mombiquia mbiquia nae, Dios cheẽ nenei neneisa rã ño aque re. ¹⁵ Ae uqui uqui ñeenda rui nae, mbia Dios cheẽ andu chooñosa rã ño ùquĩ nde. Ae Dios cheẽ andu chooñote quia nae, ùquĩ ñiangui si chõ Satanás ndiqui nguiã Dios cheẽ ndirõ. ¹⁶ Ae uqui uqui sita arõ nae, mbia mo na ño ùquĩ no nde. Dios cheẽ andu mose, isi turã ndaque. Eyate raque erese nyii. ¹⁷ Mbia icua icua mose ee Dios cheẽ ñi, huĩ jei chõ nguiã esi. Mbae rao eã naanguia chõ ùquĩ nde. ¹⁸ Ae uqui uqui nyu réndaa nae, mbia mo na ño ùquĩ no nde. Dios cheẽ andu turã ndaque. Siqui bei eã ño nguiã erui. ¹⁹ Umbaerã achõ ndese chõ eriquichĩ nguiã ndua. “Mbaecha tuchite ra se”, i bei chõ nguiã ndua ndua. Nyebe huĩ chõ nguiã Dios cheẽ si. Nyebe Dios cheẽ ndiqui nguiã ia eã mbeite ee. ²⁰ Ae uqui uqui ibi túraã nae, mbia mo na ño ùquĩ no nde. Ûquĩ nguiatu Dios cheẽ ñandu turã nguiã. Nyebe eriqui nguiã siqui beite erese. I a ia bei raanguia cote. Emo emo ia treinta. Emo emo ia sesenta no. Emo emo ia cien no, i que Jesús ra.

Tata rendi mbia resae ja

²¹ Jesús que ñeembe ee ra. —Sã nandeico lamparina ati eã no. Sã nandeico emi eã mbaequi re no. Erendi checua chõ nda nandemi. Mbia resae ja sacua. ²² Mbae checuayã nda nyecua ja emo mose. Mbia chiangui renda checuayã nda nyecua emo mose no. ²³ Jëisa mose secheẽ jeñandu turã na. ²⁴ Secheẽ nda jeñandu chooñocheĩ jë. Jë secheẽ mumbayã mose, taembaaquiato i i tuchi. ²⁵ Emo umbae rerequia mose, Dios ra embaerã mo mondobe ee. Emo embae eã mose, Dios ra embae sirõ ja esi.

Dios rimba ñimbeta chõ nguiã mbae eĩ na

²⁶ Dios rimba ñimbeta chõ nguiã mbae eĩ na. Sã emo mbae eĩ tiquia tiquia no. ²⁷ Suri ra itõ mocoinde cote. Eruri cuasu tuchi ra cote. Echa embusuriã ndaque. ²⁸ Dios ae chõ embusuri nguiã. Eracói rane. I a chee.

Ea ñetẽ nane. Ea cuasute cote. Ea ireĩ cote.
²⁹ Ea ireĩ tuchi mose ra eishao shao cote.

Mbae eĩ na ño Dios rimba re

³⁰ Mbae rã ño Dios rimba chã. Ejemplo mo tasenei jẽje. ³¹ Mbae eĩ na ño Dios rimba re. Sã mbia mo mostaza eĩ tiquia no. Eñetẽ tuchi raque mbae eĩ mo si. ³² Suri oso quia cote. Ecuasu tuchi chee. Ira rã ño cote re. Nguireĩ nguichi quichi chee erãquiã ndese. Eĩ si chõ Dios rimba re. Ñquĩ mĩ ndaque nyii. Ñimbeta tuchi cote. Mbae eĩ na, i que Jesús ñee mbia mbaaquiato ra.

Jesús ejemplos senei senei tuchi mbia je

³³ Eĩ ño ngue Jesús quia mbia tubiriã mbaaquiato quiato ejemplos je ra. Mbia quenea tuchi chee que ra. ³⁴ Ejemplos achõ ngue esenei senei mbia mbaaquiato sacua nda. Uchimbaaquiato je quiato que embiasa turã turã nda.

Jesús quiririã icuã icuã mbutiba; ama ndebera abe

³⁵ Itondaru ramo mose que ñee uchimbaaquiato je ra. —Nyao ama ndisha robei, i que ee ra. ³⁶ Ae canoa ye Jesús ñi mbia mbaaquiato quiato nae, aque ye sí que echimbaaquiato Jesús rerao ra. Mbia tubiriã ndecha. Canoa mo abe que nyoĩ quia erese ra. ³⁷ Ama ndiite re mose que quiririã icuã icuã ndu ee ra. I rebera que ique ique tuchi quia canoa ye ra. Nyebe canoa ndiqui nguiã ñimi serĩ tuchi ee. ³⁸ Jesús que uque rei oso quia canoa ndiita quti ra. Uãquĩ ndua arõ ngue esi rei quia ra. Echimbaaquiato que emumba ra. —Urembaaquiatusa, echumumba. Nandemanochĩ nda re, i que Jesús je ra. ³⁹ Jesús que nyuruã ñee asite quiririã je ra. —Ti ere cote, ama, i que ama ndebera je no nda. Quiririã ngue tiba echeẽ mose cote ra. Ama ndebera abe que tiba ra. ⁴⁰ Ñee ngue uchimbaaquiato je cote ra. —¿Mbaerã jësiquichete riqui re? ¿Seicuayãte equia ã nde? i que Jesús ñee ee ra. ⁴¹ Siquiche bei que equia ra. Nyuruira tuchi que mae Jesús quirãcuã ndese ra. —Quiririã Jesús cheẽ mumbayã ñochĩ. Ama abe echeẽ mumbayã ñochĩ no, i que ñee nyue ra.

5

Jesús aba checuayã icuã jea

¹ Ngasẽ ngue ama ndobei cote ra. Gadara, i que hue ib je ra. ² Canoa si Jesús nguichi mose que hue jenda mo tu erea ra. Aba checuayã icuã ngue siqui echiangui re ra. Mbia raaque tãsa si chõ ngue eru ngasẽ Jesús je ra. ³ Mbia raaque tãsa bei que eriqui ra. Emo ngue echucua aroneate quia ra. Cadenas je abe que emo ndiqui ecua aroneate ra. ⁴ Nyucua mocoĩte rei nda cadenas je raẽ. Ei nda echucua rei raẽ. Eo abe. Ucuasa nda endoso ndoso bei quia ra. Emo nda embutiba aronea tuchi quia ra. ⁵ Ngata bei nda equia itondaru ra. Nyaashĩ mose abe. Tasẽ tasẽ mbei nda equia mbia raaque tãsa ra. Sita ibátee abe no. Sita je nda eriqui ñimbasi mbasite ra. ⁶ Isho que mae Jesús rese ra. Uchã asi que eu ngoi ngũiã ndese enonde ra. ⁷⁻⁸ Jesús que ñee ee ra. —Esẽ u aque chiã si, aba checuayã, i que Jesús ñee ee ra. Aba checuayã ngue tasẽ tuchi ñee Jesús je ra. —¿Mañi ere ra equia seje re, Jesús? Dios ririã ño nde re. ¿Sembasichĩ nda se jẽ! i tuchi que ee ra. ⁹ —¿Mañi ndeje re? i que Jesús ee ra. —Etubiriã, i chõ nguiã seje. Ure cuabẽte quia ñene, i que ñee Jesús je ra. ¹⁰ —Isho ra uremondochĩ, i tuchi que aba checuayã ñee Jesús je ra. ¹¹ Chiasu socioi tubiriã ngue chi quiaru huee ibi ibátee ra. ¹² Nyebe aba checuayã icuã ñee ja nguiã Jesús je. —Uremondo ja rã chiasu socioi chiangui re, i tuchi que equia Jesús je ra. ¹³ Eno, i que Jesús ee ra. Nyebe aba checuayã usẽ ja nguiã amei ñia si cote. Chiasu chiangui re que echoi ja cote ra. Dos mil rei chiasu. Chiasu que uchã ja choi nyiichere ama nimia mbucu rĩ nda. Ama ndisha ye que echoi ja mano nda.

¹⁴ Chiasu raarõsa mundite que ra. Uchã ngue echoi mbia mbiirandu randu ja ra. Sucha tubiriã jenda mbiirandu. Ishonda abe mbiirandu no. Mbia que ngaẽ ngaẽ nguia jirandu turã cote ra. ¹⁵ Ngasẽ ngue ecuaẽ Jesús je ra. Ae aba checuayã icuã nguereco uchiangui re nyii nae, aque abe que siqui huee ee ra. Huĩrao resebe que eñi ngoi ra. Earacuate que ee cote ra.

Nyebe mbia riqui nguiã siquichete. ¹⁶ Ae mae erese nae, ũquĩ ngue ñee ñee mbia je ra. Mbia mbiirandu chiasu socoi rese. Ae aba checuayã quereco quia nyii nae, aque rese abe no. ¹⁷ —Eso rã urerecha urerecua si, i jate que hue jenda ñee Jesús je ra. ¹⁸ Ae aba checuayã quereco quia nyii nae, aque que ñee Jesús je ra. Jesús ua mose canoa ye. —Nderese bei chõ taso se jê, i rei que ñee Jesús je ra. ¹⁹ Jesús que ñee ee ra. —Tei. Quiatu rei ndechuchúaa. Quiatu ñee nderesenda je. “Dios chõ sembucherõ nguiã. Eya eã tuchite que eriqui serese ra”, ere oso nderesenda mbiirandu, i que Jesús ee ra. ²⁰ Amei ngue oso sucha mbuchesea sea cote ra. Mbia Decápolis jenda mbiirandu randu ja. —Jesús chõ sembucherõ nguiã, i ja jate que equia mbia je ra. Mbia que nyuruirate quia mae erese ra.

Jesús Jairo riirĩ mbucherõ; ari mo abe mbucherõ

²¹ Jesús que tu si iasa sobei si canoa ye ra. Mbia tubiriã ngue ngaẽ ngaẽ nguia erera ra. Ama nimíaa eriquibe mose. ²² Judíos rerecua mo ngue tu erera ra. Jairo, i que ee ra. Judíos munua nuasa que ae ra. Jesús nonde que eru ngoi nguiã ndese ñee ee ra. ²³ —Qui seriri si quia mano qui. Nyao rã ndeo terechono earõ. Embucherõ sacua, i tuchi que equia Jesús je ra. ²⁴ Jesús que oso erese cote ra. Mbia tubiriã abe que nyoĩ quia ñimajaã tuchi erui ra. ²⁵ Ari rasi mo abe que oso quia erui ra. Eruqui nda uchẽ mbei quia ee ra. Doce años nyee. ²⁶ Ngasi nda esaã tuchi quia ra. Erasi rea reasa nda etea tea jate rei quia raẽ. Umbae nda emondo mondo ja chee ngasi rea reasa je ra. Nyerõ jiri jiriã tuchi que ra. Erasi i i tuchi chõ ngue ra. ²⁷ Jirandu chee que Jesús rese ra. Equite quiti que esi mbia joõ nda. Oco que oso eirao rese ra. ²⁸ —Eirao achõ ndese se oco mose, acherõ nda se, i nda ra. ²⁹ Aque mose tuchi que eruqui ti i ee cote ra. Ngasiã ngue eicua uchiangui re cote ra. ³⁰ —Sequirãcuã ngue mbia mo mbucherõ nda, i que Jesús uchiangui re ra. —¿Aba oco seirao rese re? i que mae uquite quiti ra. ³¹ Echimbaaquiatu que ñee ee ra. —Mbia tubiriãte nyeresẽ. Ñimajaãte nyeresẽ. ¿Mbaerã ereico “¿aba oco serese

re?” i re? i que ee ra. ³² Jesús que nyuruba ruba mae nda. —¿Aba oco serese re? i. ³³ Ari que jirandu tuchi ucherõ ndese ra. Eireĩte que titi titi i huĩ ee ra. Ngoi que nguiã ndese Jesús resa quiti ra. Mbae que esenei ja ee cote ra. ³⁴ Jesús que ñee ee ra. —Seicuate que se ra. Nyebe arembucherõ nguiã. Ndeya chõ eso cote. Nderasi ra tu si eã ndeje, i que Jesús ñee ee ra.

³⁵ Echeẽ mose chite que emo ngaẽ Jairo chuchua si ra. —Ndeririĩ ngue mano cote ra. ¿Mbaerã nda Jesús ererao ndechuchua cote re? i que ñee ee ra. ³⁶ Jesús que echeẽ ñandu ra. Ñee ngue Jairo je cote ra. —Ndeya eã techĩnda jê. Seicua chõ se jê, i que Jesús ee ra. ³⁷ Jesús que oso eraaque rea cot e ra. Uchimbaaquiatu tres que equerao ra. Pedro. Jacobo abe. Juan abe no. Jacobo nongue que Juan nda. ũquĩ mii ño ngue equerao erera ra. ³⁸ Ngasẽ ngue Jairo chuchua cote ra. Mbia que chi ja nyeseo ãquẽ ndaaque rese ee ra. Nyiibu tuchi que eu ra. ³⁹ Ique que oso ñee mbia je ra. —¿Mbaerã jẽingo nyiibute re? ¿Mbaerã jẽingo nyeseo re? Áquẽ manoãte resẽ. Uque chõ u co resẽ, i que Jesús ñee mbia je ra. ⁴⁰ Mbia que iquia iquia chõ ee ra. Jesús que mbia mondo ja chee itaicuee ra. Eru rese que esi ique eririĩ ndaaque rea ra. Esi abe rese. Nguesenda abe rese. ⁴¹ Eraaque o que eisi ñee ee ra. —Echuruã, Áquẽ, i que ee ra. ⁴² Echeẽ mose tuchi que ãquẽ juã ngata cote ra. Etiarõte que ra. Doce años que ra. Mbia que nyuruirate tuchi mae erese ra. ⁴³ —“Jesús que co raaque mbuquera ra”, jenyechĩnda emo je jê, i que Jesús mbia je ra. —Ndeririĩ embuquiaru cote, i que ee cote ra.

6

Mbia Nazaret jenda Jesús isiteã

¹ Hue si que esi nguécuaa ra. Echimbaaquiatu abe que nyoĩ erese ra. ² Sábado mose que mbia mbaaquiatu quiatu judíos chumunuásaa ra. Mbia que nyuruirate ja tuchi u echeẽ andu ra. Ñee ñee ngue u nyue ra. —¿Mangue eriqui ñimbaaquiatu tuchite re? ¿Mañi equia mbae icua ja tuchite re? Nandemae sayã naa naa tuchichĩ. ³ Ira mbitirõ tirõsa chõ ndaque. María riirĩ ño

ndaque. Jacobo nongue chõ ndaque. José abe no. Judas abe no. Simón abe no. ã echari enongue riqui ja raque nanderese ã, i que mbia ra. Nyebe mbia Jesús cheẽ andu sereã nea nguiã. ⁴ Jesús que ñee ee ra. —Dios cheẽ mbuchecuaa ishonda cheẽ nguia ra mbia isi turã mbei. Nguécua jenda cheẽ achõ nguia ra eisi turã eã. Ngõngue cheẽ achõ nguia ra eisi turã eã no, i que Jesús ñee nguécua jenda je ra. ⁵ Jesús que mbia mae sayã saã saã aroneate quia huee ra. O que echono mbia rasi mii mii arõ embucherõ nda. ⁶ Hue jenda mbia que chi Jesús icua eãte ra. Nyebe Jesús nyuruirã tuchi nguiã mae erese. Sucha tubiriã mbuchesea sea que equia mbia mbaaquiato quiatu ra.

Jesús uchimbaaquiato doce mondo ucheẽ nenei nenei sacua

⁷ “Jenyu” i que uchimbaaquiato doce je ra. Nyeremo nemo ngue embuchao chao mondo ra. Uquirãcuã ngue emee mee ee ra. Aba checuayã icuã jea jea sacua mbia chiangui si. ⁸⁻⁹ —Mbae mo nda jendaochi icua. Mbae riru mo abe ra jendaochi. Jenyurã mo abe ra jendaochi no. Mbae isiquia abe ra jendaochi. Jëiyao nongue mo nda jendaochi. Jëirao nongue mo abe ra jendaochi no. Jenyitochoquia mii ño jendao. ¹⁰ Jengasẽ mose sucha tubiriã mo, aque tuchia mii ño jëingo uque. Tuchia ra jembuchesea seate chi jëingo mose huee. Ae ra jengue nyii nae, hue tuchia bei chõ jëingo uque. ¹¹ Sucha tubiriã jenda mo jëisi sereã nea mose, jëhui chõ esi. Hue jenda jeñee andu sereã mose, jëso chõ hue si. Jëi tubi jembutomo tomo ee. Hue jenda huicua icua sacua. Tacheẽ nyecua jëje. Ae ra jeñee isi sereã nae, ñquĩ nda Dios mbasi tuchi. Uquiatoã nda embasi ja aque mose. Sodoma jenda ra Dios mbasi raque. Gomorra jenda abe no. Ae jeñee isi sereã nae, ñquĩ nguia ra embasi tuchi Sodoma jenda si. Gomorra jenda abe si, i que Jesús ñee uchimondobi je ra. ¹² Nyoĩ nyoĩ ja que equia Dios cheẽ nenei nenei mbia je ra. —Jendua si Dios rese, i ite que equia mbia ja je ra. ¹³ Aba checuayã icuã ngue ejae jea tuchi quia mbia chiangui si ra. Mbae eĩ

quiera que equiti quiti quia mbia rasi rese ra. Mbucherõ ja que ra.

Mbia Juan el Bautista iquia

¹⁴ Mbia que jirandu ja Jesús rese cote ra. Herodes abe que jirandu erese ra. Ererecua que ae ra. Juan el Bautista Jesús riqui reĩ Herodes je reaẽ. —Juan ndaaque que quera si ra. Nyebe eriqui nguiã mbae raã jate, i rei que Herodes ra. ¹⁵ Elías Jesús riqui reĩ emo je reaẽ. Dios cheẽ mbuchecuaa ñiinda Jesús riqui reĩ emo je re no aẽ. ¹⁶ Herodes que jirandu Jesús rese ra. Juan el Bautista eriqui reĩ nguiã ee. —Juan ño eriqui re. Ae ñquĩ achisia. Quera si chõchĩ ere, i rei que Herodes ra. ¹⁷⁻¹⁸ Herodes Juan mondo quiatu quia carcel nyii reaẽ. Nyucua nda cadena je ra. Paama i nda Juan je ra. —Nde ndenongue ninisi erereco aroneate jẽ! i quiatu que Juan ñee ee nyii ra. Herodes siqui mose nõngue ninisi rese. Herodías, i que enongue ninisi je ra. Felipe, i que enongue je ra. ¹⁹ Herodías que Juan ucuayãte quia ra. —Taiquia, i rei que equia ra. ²⁰ Herodes bite rei que Juan ñee andu ra. Icuayã jiri rei que ra. —Juan turãte que ra jẽ, i que equia Juan nii nda. Nyebe eriqui nguiã ireĩ ireĩte esi. Nyebe Herodías Juan iquia aroneate nguiã. ²¹ —Co mose chõ jẽ, i que Herodías Herodes mbae cumpleaños mose cote ra. —Jenyu quiaru serese, i que Herodes mbia rerecua ja je ra. Ererecua Galilea jenda ja je. ²² Aque mose que Herodías riirĩ nyuruqui ruqui mbia je ra. Nyucuaaque que ae ra. Herodes ia tuchi que mae nyucuaaque nyuruqui rese ra. Ñee ngue nyucuaaque je ra. —¿Mbae ra amee ndeje re? Echeẽ ño seje. ²³ “Sebite co” nde i mose, aque tamondo ndeje. Sembae ataque tamondo ja ndeje ndebi mose. Acheẽ ñooñoa ño nguiã ndeje a, i que Herodes ñee nyucuaaque je ra. ²⁴ Nyucuaaque que oso ñee usi je ra. —¿Mbae “embu seje” ae ra ee re? i que ñee usi je ra. —“Juan el Bautista ñquĩ ño embu seje”, ere chõ ee, i que esi ra. ²⁵ Nyebe que esi ñee Herodes je cote ra. —Juan el Bautista ñquĩ emee na seje plato ye, i que ñee ee ra. ²⁶ Herodes chosoi que oso serĩ tuchi echeẽ andu mose ra. —Acheẽchĩ se

quia ee. A seresenda chi ja quiaru serese a resē. Ā seandu ja chōchĩ. Nyebe ra secheē ambuchebi eā ee, i que Herodes uchiangui re ra. ²⁷ Soldado mo ngue emondo cote ra. —Quiatu Juan iquia. Eāquĩ eru seje, i que ñee soldado je ra. ²⁸ Cárcel que esi Juan āquĩ sia cote ra. Eāquĩ ngue equeru plato ye nyucuaaque je cote ra. Nyucuaaque que emee usi je cote ra. ²⁹ Juan ñimbaaquiātu jirandu mose que echoi eraaque rea cote ra. Ñono ngue sita ndoro ji ye ra.

Jesús mbichae tubiriã saã mbichae mii je

³⁰ Ae Jesús mondo quia uchimbaaquiātu, ũquĩ ngue ngaē si ee cote ra. Uchisaã ngue esenei senei cuaē ee ra. —Eĩ ure que mbia mbaaquiātu quiātu ra, i que ecuaē Jesús mbiirandu ra. ³¹ Mbia tubiriãte que ngaē ngaē nguia ñindecua ndecua erea ra. Equiaru mose rocoĩ abe. Nyebe ñee nguia uchimbaaquiātu je. —Nyao rã mbia eāsaa, jenguenea ucu mbirĩ, i que ra. ³² Ae ae que nyoĩ canoa ye mbia eāsaa ra. ³³ Mbia tubiriã tuchi ngue mae ñochĩ nguia echoi rese. Jesús icua chō ngue ra. Mbia que nyoĩ uchã ibi rĩ nda. Sucha jenda ja. Ũquĩ nane ngue nyoĩ ngasē Jesús raarō ama nimia nda. ³⁴ Jesús que usē canoa si cote ra. Mbia tubiriã ndese que mae nda. Eya eã tuchite que erese ra. Oveja raarō iriã na nguia que mbia chi ee ra. Mbia que embaaquiātu quiātu tuchi cote ra. ³⁵ Tenda oso mose que echimbaaquiātu ñee ndei ee ra. —Tenda osote resē. Mbia chuchua mo āte a resē. ³⁶ Mbia chiurã eã abete a resē. Mbia embui mondo uchiurã ndequia requia sacua sucha achi jenda rea rea, i que ñee Jesús je ra. ³⁷ —Jeño mbae jemondo ee echurã, i chō ngue Jesús ñee ee ra. —Tei. Mbae quia ra aba mondo ee. Mbia tubiriã tuchite quia ñene. Mbae isiquia tubiriã tuchi je quia nda aba mbae isi rei nguia ña. Mbia chayãte chō eno nde, i que ñee Jesús je ra. ³⁸ —¿Manya mbichae jendeco ũquĩ nde? Jẽso mae erese no, i que Jesús ee ra. Emo ngue oso mae erese eicua ra. —Cinco mbichae riqu i co. Sira nyeremo abe, i que echimbaaquiātu mo ñee ee ra. ³⁹ —Sã mbia ngoi ngoi ja quiata tose. Echesea sea, i que Jesús ra. ⁴⁰ Mbia que ngoi ngoi ja nyesea

sea cote ra. Cincuenta jaaja. Cien abe no. ⁴¹ Jesús que mbichae cinco sirō cote ra. Sira nyeremo abe no. Ibei rese que mae gracias i Dios je ra. Mbichae que esiquio quio cote ra. Mee mee ngue uchimbaaquiātu je ra. —Jemee mee mbia je, i que uchimbaaquiātu je ra. Sira nyeremo abe que esiquio quio mbia ja je ra. ⁴² Mbia ja que eu tuchi ra. Ñimbio chee que ra. ⁴³ Mbia chiu sique tubiriã tuchi que ra. Mbichae rire. Sira rire abe no. Doce iru que mbia mombisē esique sique je ra. ⁴⁴ Cinco mil hombres que mbia mbichaecua ra.

Jesús ngata i arō

⁴⁵ Aquere que Jesús uchimbaaquiātu mondo ja canoa ye ra. —Jẽ nane jẽso Bet-saida sobei. Mbia tambui turã na mondo uchuchúaa se nyii, i que ra. ⁴⁶ Jesús que mbia mbui turã mondo cote ra. Ae ae que oso sita ibátee cote ra. Ñee sacua Dios je. ⁴⁷ Huee que ae ae riqui itondaru chee ra. Canoa yenda que chi bei ama ndiite rĩ nda. ⁴⁸ Echimbaaquiātu que pare pare i canoa ibu ra. Quiririã ngue eichu ichute eruba quiti ra. Jesús que mae erese ishote ra. Nguira ñee mose que esi eriichã nda. I arō ngue esi quia ngata ra. Nyucuaño nda eña nde. ⁴⁹ Mbia aingue eriqui reĩ nguia echimbaaquiātu je. Ngata mose i arō. Nyebe tasē tasē nguia. ⁵⁰ Echimbaaquiātu chiã ngue cuãacuã i tuchi mae erese ra. —Jẽsiquichechĩ nguia. Jẽya chō ae. Se chō nyeresē, i que Jesús ñee ee ra. ⁵¹ Ua que canoa ye embirō cote ra. Quiririã ngue tiba cote ra. Echimbaaquiātu que nyuruirã tuchi u mae erese ra. ⁵² Jesús mbichae mbeta quia nae, ũquĩ ngue echimbaaquiātu icuayãte uchiangui re ra. —Dios riirĩ ño eriqui reaē, i āte que eicuayã nda. Eāquĩ ātãte chō ngue ra.

Jesús mbia Genesaret jenda mbucherō cherō

⁵³ Ngasē nyee que sobei cote ra. Genesaret, i que hue ibi je ra. ⁵⁴ Jesús usē mose canoa si que mbia eicua jei ra. ⁵⁵ Mbia que nyoĩ ja uchã tuchia mbuchesea sea ra. Erasi rurucuaē cuaē sacua Jesús je, erua resebe. ⁵⁶ Jesús cuatásaa que mbia riqui erasi rurucuaē cuaē ee ra. Sucha tubiriã jenda jaaja. Sucha mii mii jenda jaaja abe

no. Turuquia jenda abe no. Ûquĩ ja que erasi curucuaẽ cuaẽ nguia ñono Jesús jii ra. —Sã erasi oco oco ja rã ndeirao ai rese, i jaaja que ñee Jesús je ra. Ae oco erese nae, ùquĩ ngue nyerõ ja ra.

7

Mbia chiangui renda ae chõ emb#cuã nguia

¹ Aquere que fariseos mo ngaẽ ñee Jesús je ra. Embesasa mo abe, ae ngaẽ Jerusalén si. ² Jesús chimbaaquiatu mo ngue quiaru quiaru echoi quiiriã ee ra. —¿Mbaerã jẽingo quiaru jenyoi quiiriã nde? Nanderamei ñee ndui si eã ño jẽingochĩ nde, i que ñee asite ee ra. ³ Fariseos quiarei nyoĩ bei quiaru nonde. Judíos ja abe no. —Nandechoi eã mose ra nandechiã mondeite, i rei equia ã. Ngãmei ñee nguire eriqui ùquĩ naa naa mbei ã. ⁴ Echoi quiiriã mose eriqui quiaruã ã. Ngaẽ mose plaza si eriqui nyoĩ nyoĩ tuchi quiaru nonde ã. Ngãmei ñee nguire chõ eriqui nguia mbae raã ja ã. Sã eriqui uyuquia irei irei no. Ñio abe no. Irachaẽ abe no. Uquisa abe no. ⁵ Nyebe fariseos ñee nguia Jesús je. —¿Mbaerã ndechimbaaquiatu riqui eĩ eã nanderamei ñee nguire re? ¿Mbaerã eriqui quiaru uchoi quiiriã nde? i que fariseos ñee Jesús je ra. Embesasa abe no. ⁶ Jesús que ñee ee ra. —Isaías que embesa jeni cose ra. Eĩ ngue embesa ra:

Ã mbia riqui ñee turãte raque seje ã.

Uchiangui re quia eriquiãte nguia serese ã.

⁷ Ñee turãte raque equia seje ã. Amei ñee achõ ño esenei seneichĩ nguia mbia je.

Dios cheẽ mi nenei nenei ndocõ ee, i que Isaías embesa jeni nda. ⁸ Jenamei ñee achõ ño jesenei seneichĩ nguia mbia je ùquĩ. Dios cheẽ nenei nenei ndocõ ee.

⁹ Dios cheẽ jemumba mumba chõ chĩ nguia ã. Nanderamei ñee ndese chõ jẽingochĩ oote ã. ¹⁰ Moisés cheẽ ndui turã eã ño jẽingochĩ ã. Sã Moisés ñee mbia je no: “Jêturã ño nguia jendu je jẽ. Jësi je abe no. Emo ñee icuã mose ngu je, ùquĩ jëiquia chõ. Emo ñee icuã mose usi abe je, ùquĩ abe jëiquia no”, sã i Moisés no. ¹¹ Jẽ nguia

jẽingo nguia Moisés cheẽ abi abite ã. Sã jẽingo ñee no. “Ae nda amee nei jëje, ùquĩ ngue amondo ja Dios je ra”, i mose emo ñee ngu je, “coche ñene” jenyè chõchĩ nguia ee. Mbae mee eã mose ngu je. Usi abe je. Nyebe jẽingo nguia mbia mbaaquiatu icuã icuã ùquĩ. ¹² ¿Mbaerã jẽingo mbia riquisã quisãte mbae meese mose usi je re? Ngu je abe no. ¹³ Nanderamei ñee achõte jësenei seneichĩ nguia jendiirĩ je ã. Nyebe jẽingo nguia Dios cheẽ mbuquiachãte jendiirĩ si ã. Mbae icuã atate jësaã saã nguia ã, i que Jesús fariseos je ra. Embesasa abe je. ¹⁴ —Jenyu secheẽ andu, i que Jesús mbia ja je ra. —Secheẽ jëicua rã. ¹⁵ Mbia chiu emb#cuã eã nguia. Echiangui renda chõ emb#cuã nguia. Echiangui renda chõ usẽ nguia echuru rĩ echeẽ mose. Ûquĩ ño emb#cuã nguia. ¹⁶ Jëisa mose, secheẽ jeñandu turã na, i que Jesús ra. ¹⁷ Jesús que mbia secha oso ique tuchúaa ra. Echimbaaquiatu que ñee ee cote ra. —Erecheẽ ngue namo, “ùquĩ nda mbia mb#cuã” ere que, ùquĩ embuchecua rã ndecheẽ ure je, i que ñee Jesús je ra. ¹⁸ Jesús que ñee ee ra. —¿Jẽ abe jëicuayãte quia re? Ae mbia u quia nae, ùquĩ mbia mb#cuã eã nguia. ¹⁹ Iqueã nda oso echiangui re. Erie ye chõ eriqui nguia oso. Echique rui chõ eriqui nguia oso. Usẽ nyee, i que Jesús ñee uchimbaaquiatu je ra. —Mbia chiu turã ja, i chõ nguia. ²⁰ —Mbia chiangui renda chõ emb#cuã nguia usẽ mose echuru rĩ. ²¹ Aba chiangui renda quia aba mundua icuã icuãte nguia. Nyebe eriqui nguia siqui emo ninisi rese. Emo ndu rese abe no. Siqui siqui eruã ndese abe no. Mbia abe iquia iquia. ²² Mbae abe mbuquiachã quiachã no. “Aque raã nda sembaerã ña”, i emo mbae je no. Mbae icuã ñumumbara raã naa ja. Mbia abe mbiirĩ irĩ no. Mbae icuã osei osei bei. “Se quiatu ae”, i mbae je. Ñee icuã icuã no. Ucuasu abe raã naa no. Mbae icuã naa ja choõño. ²³ Mbia chiangui renda icuã ja chõ ùquĩ nde. Ûquĩ ño mbia mb#cuã icuã nguia ùquĩ ao ao mose, i que Jesús ra.

Ari mo Jesús icua

²⁴ Jesús que nyoĩ hue recha cote ra. Ngasẽ ngue Tiro jii cote ra. Sidón jii abe no. Ique

que oso tuchia mo nda. —Sã mbia jiranua serese, i rei que ra. Mbia qu e jirandu chõ erese ra. ²⁵ Ari mo abe que jirandu erese ra. Eriirĩ ngue aba checuayã nguereco uchiangui re ra. Ari que tu Jesús rea ra. Ngũĩã ndese que ngoi ejii ra. ²⁶ Sirofenisia jenda que ae ra. Judío eã tuchi que ae ra. Griego cheẽ ño ngue echeẽ nde. —Aba checuayã icuã ejea rã seriirĩ si, i tuchi que Jesús je ra. ²⁷ Jesús que ñee ee ra. —Judíos rese rane taico mbae raã naa. Ahuĩ aronea judíos si, mbae raã naa mbiamo je, i que Jesús ee ra. ²⁸ Ari que ñee ee ra. —Aicuate raque se, Sererecua. Mbiamo ndaque ure. Judíos eã ndaque ure. Ure je abe chõ mbae esaã ae. Seriirĩ embucherõ seje ae, i que ari ñee ee ra. ²⁹ Jesús que ñee ee ra. —Erecheẽ turãte. Quiatu rei. Nderiirĩ ngue nyerõ no, i que ee ra. ³⁰ Ari que oso uchuchúaa cote ra. I que eriirĩ u ngua ye ee cote ra. Aba checuayã icuã usẽ ño ngui a esi reaẽ.

Jesús eisayã mbucherõ

³¹ Jesús que nyebi Tiro rurubi si ra. Sidón ngue etasamo nda. Ama ndisha Galiléaa que esi ra. Decápolis rĩ ngue esi ra. ³² Eisayã mo ngue mbia curucuaẽ ee ra. Echeẽ aquiatuãte abe que ra. —Ndeo echono earõ embucherõ, i tuchi que mbia Jesús je ra. ³³ Jesús que eisayã nguerao pe jiri mbia recha ra. O que emingue mondo eisacua rereco chobei ra. O que embia ngũendi je ra. Mondo que echuru rĩ cote ra. ³⁴ Soboiba que ibate cote ra. Jiabute que ñee ee ra. —Esoro, eisacua, i que ee ra. ³⁵ Eisacua que soro cote ra. Echuru abe que nyerõ cote ra. Ñee ngue cote ra. ³⁶ —Emo nda jembiiiranduchi jẽ, i rei que Jesús ñee mbia je ra. Mbia que ñimbiirandu i i tuchi ra. ³⁷ Mbia que ñee ñee nyue Jesús rĩ nda. —Mbae raã turã turã ja tuchichĩ equi a co. Eisayã abe isa ndoro chee no. Echeẽ ngũĩã abe mbucheẽ nyee no, i ja tuchi que mbia quia nyuruira mae erese ra.

8

Jesús mbichae tubiriã saã mbichae mi je

¹ Mbia que ñumunua tuchi Jesús je aque mose ra. Ñee ngue uchimbaaquiato je ra. ² —Seya eãte aico ã mbia tubiriã ndese co.

A echi arete serese tres días a. Echiurã mo eãte mbae mo aa. ³ Eriãcuã amondo sereãte echuchúaa. Ngasẽ ãte chõ ndae. Ishote si ecuaẽ aa resẽ. Nandembuquiaru chõ aa, i que Jesús ra. ⁴ Echimbaaquiato que ñee ee ra. —Turuquia re chõ nandeico a resẽ. ¿Mañi nda aba ã mbuquiaru ja re? i que ñee Jesús je ra. ⁵ —¿Manya mbichae jendeco re? i que Jesús ee ra. —Siete, i que ee ra. ⁶ Jesús que mbia mbucoi ja íbii ra. Mbichae siete que eisi ja o je cote ra. Gracias i que Dios je cote ra. Mbichae qu e esiquio quio mee uchimbaaquiato je cote ra. ¿Uqui ngue embuchao chao mbia tubiriã je cote ra. ⁷ Sira ñetẽ mi abe que equereco ra. Gracias i que Jesús Dios je cote ra. —Sira abe jembuchao chao mbia je, i abe que ee ra. ⁸ Mbia que eu ja ñimbio chee ra. Echiu sique que emunua nua ja ra. Siete iru que emombisẽ nyee ra. ⁹ Mbichaecua rei mbia cuatro mil. Jesús que embuĩ turã mondo cote ra. ¹⁰ Canoa ye que Jesús ua uchimbaaquiato rese cote ra. Nyoi que Dalmanútaa ra.

Mbia mae sayã eteacuquia ure je, i fariseos

¹¹ —Tã nande rã Jesús je, i que fariseos cuaẽ ñee ñee ee ra. —Mbia mae sayã esaã na ure je. I nda “Dios chimbu” ure tuchi ndeje, i rei que ñee Jesús je ra. ¹² Jesús que iabu tuchi ñee nda. —¿Mbaerã mbia riqui “mbia mae sayã esaã ure je” i tuchi re? Tacheẽ nyecua jẽje. Mbia mae sayã mo nda ateacuquia eã tuchi jẽje, i que Jesús ñee ee ra. ¹³ Oso que mbia recha cote ra. Iasa que echoi sobei cote ra.

Fariseos mbia mbaaquiato icuã, i Jesús

¹⁴ Jesús chimbaaquiato que uchiurã curuchoi eã nda. Tesarei que esi ra. Mbichae mi tuchi que equeru huee ra. ¹⁵ Jesús que ñee ee ra. —Mbichae mbuchimatãsa rã ndei fariseos cheẽ. Herodes chimbaaquiato cheẽ abe no. ¿Uqui ñee ndese ra jẽingochĩ jẽ, i que Jesús ee ra. ¹⁶ —Mbichae quiato ngue nanderuã nguiã. Nyebe eriqui nguiã ñee nande je uqui, i rei que echimbaaquiato ñee nyue ra. ¹⁷ Jesús que echeẽ ñee icuate ra. Nyebe ñee nguiã ee. —¿Mbaerã jẽingo “mbichae nanderuãchĩ” i re? ¿Ae rĩ aico ñee jẽje nae, uqui jẽicuayã mbeite quia

re? ¿Jeñia ãtã mbeite eriqui re? ¹⁸ Jëisate raque. ¿Secheẽ jeñanua mbeite quia re? Jendesate raque. ¿Sechisaã jëicuayã mbeite quia re? ¹⁹ Se mbichae cinco mbeta mose mbia cinco mil je, ¿manya iru jemombisẽ mbichae sique sique je re? i que Jesús ee ra. Doce, i que ee ra. ²⁰ —Mbichae siete mbeta mose mbia cuatro mil je, ¿manya iru jemombisẽ esique sique je re no? i que Jesús ee ra. Siete, i que ee ra. ²¹ —¿Jëingo secheẽ icuayã i ite ã nde? i que Jesús ee ra.

Jesús eresayã mo mbucherõ

²² Nyoï que Betsaida cote ra. Mbia que amei ndesayã mo ngurucuaẽ Jesús je ra. Oco sacua ere se embucherõ. ²³ Jesús que eo isi serao pe jiri sucha si cote ra. Ngüendi que equiti eresa rese ra. O que echono earõ nda. —¿Eremaete mbae rese cote re? i que ee ra. ²⁴ Eresayã ngue mae cote ra. —Mbia rese amaete cote. Ecuata rese amaete. Ira raãte mbia seje, i que eresayã nda. ²⁵ Jesús que o chonombe eresa rese ra. Mae turã ngue cote ra. Nyerõ tuchi que cote ra. ²⁶ Jesús que embui mondo uchuchúaa ra. —Eresochĩ nda sucha ite rĩ jë, i que ee ra.

Cristo chõ nde resẽ, i Pedro Jesús je

²⁷ Jesús que nyoï Cesarea de Filípoo cote ra. Huee que ñee uchimbaaquiato je cote ra. —¿Aba aico reĩ mbia je re? i que ee ra. ²⁸ Echimbaaquiato que ñee ee ra. —Juan el Bautista ereico reĩ nguiã mbia je co. Elías ereico reĩ nguiã emo je no. Dios cheẽ nenei neneisa mo ereico reĩ nguiã emo je no, i que echimbaaquiato ñee Jesús je ra. ²⁹ —¿Aba aico reĩ jëje co re? i que Jesús ee ra. —Cristo chõ nde resẽ, i que Pedro ñee ee ra. ³⁰ —Jeñeechĩ nda mbia mo je ñquĩ jë, i que Jesús ee ra.

Mbia ra seiquia, i Jesús

³¹ Jesús que umano nonde senei senei uchimbaaquiato je ra. —Mbae rasi ra asaã tuchi. Judíos ramei icuã icuã tuchi ra seje. Sacerdotes rerecua abe no. Embesasa abe no. Seiquia rae. Tres días mose ra aquera si, i que ñee uchimbaaquiato je ra. ³² Jesús que ñee nyecua tuchi ee ra. Nyebe Pedro Jesús rerao nguiã suruicha. —¿Mbaerã erecheẽ ñquĩ nde? Mbia ra ndeiquiyã, i rei que Pedro ñee asite Jesús je ra. ³³ Jesús

que uba mae uchimbaaquiato rese ra. Ñee ngue Pedro je ra. —Ehũ chõ sesi, Satanás. Mbia ndua ndua rã ño ereico nguiã ndua. Dios ndua ndua rã eã, i que ñee Pedro je ra.

³⁴ Jesús que ñee uchimbaaquiato ja je cote ra. Mbia abe je. —Emo siquise mose serui, sã hui ja mbae ubi si. Sã cruz rui umbaerã se rã si. Sã eriqui serui bei cote. ³⁵ Emo ndua bei mose ngueco rese, ereco ra ua esi. Emo hui mose ngueco si seje, ñquĩ nda siqui bei. ³⁶ Emo ngueco mumba chooño mose, eya eã mbei rae. Mbaecha rete raque. ³⁷ Emo ngueco mumba chooño mose, mbae mo eãte ereco ribishorõ sacua. ³⁸ Emo ireĩ ireĩ mose sesi mbia icuã ndésaa, se abe ra aireĩ ireĩ esi. Emo ireĩ ireĩ mose secheẽ si, se abe ra aireĩ ireĩ esi, sechu mose mbia rerecuarã. Dios ra sembu si íbii uquirãcuã je aque mose. Ibatenda rese ra achu ángeles, i que Jesús ee ra.

9

¹ —Tacheẽ nyecua jëje. A jengu a nae, jemo nda jema sechu rese. Achu ra mbia rerecuarã tuchi cote. Jemo jemano eã mose ra achu mbia rerecuarã tuchi cote, i que Jesús ee ra.

Jesús ny#cuabo uchimbaaquiato résaa

² Tenda seis uare que Jesús uchimbaaquiato mo nderao sita ibátee ra. Pedro. Jacobo. Juan abe no. Ñquĩ ngue equerao ja mbia tiãsa ra. Jesús que ny#cuabo erésaa huee ra. Enininya tuchi que ee ra. ³ Eirao abe nininya tuchi que ra. Eiraoshĩ nininya tuchi que ee ra. ⁴ Mbia nyeremo ngue ngaẽ ibate si ra. Ñee ñee ngue ecuaẽ Jesús nininya rese ra. Moisés que ñquĩ nda. Elías rese. ⁵ Pedro que ñee Jesús je ra. —Sererecua, nandecu turãte a. Sucha ñetẽ uresaã saã na. Enongue nembraerã. Enongue Moisés mbaerã. Enongue Elías mbaerã no, i rei que Pedro ñee Jesús je ra. ⁶ Echimbaaquiato siquichete quiato ngue re. Nyebe Pedro riqui nguiã “mañi nda abare” ite. ⁷ Ibeishĩ ngue tu nguichi eite re cote ra. Moisés mbuchecuyã ee. Elías abe no. Echeẽ mo ngue echandu ibeishĩ qui re ra. —Co rei sebi tuchi seriirĩ co. Echeẽ jeñandu bei quia, i que Dios ñee ee ibeishĩ qui re ra. ⁸ Echimbaaquiato mae mose que Jesús mii

ndiqui ee cote ra. Moisés que nyecuayã asi ee ra. Elías abe.

⁹ Ecuaẽ mose nguichi sita ibate si que Jesús ñee ee ra. —Ae rese jemae namo nae, ùquĩ je jenyecuachõ jẽ. Sequera si mose quiatu teñee ñee mbia je cote. Semano nonde eã, i que Jesús ñee uchimbaaquiato je ra. ¹⁰ Nyebe ñee eã nguiã emo je. —¿Mbaerã eriqui “se quera si mose” i re? i que ndua ndua ñee nyue ra. ¹¹ Ñee ngue Jesús je cote ra. —¿Mbaerã embesasa ñee nde? “Elías rane nda tu Cristo si” i re, i que ñee Jesús je ra. ¹² Jesús que ñee ee ra. —Ae bei. Coche Elías rane tu nguiã mbae mbitirõ ja. ¿Mbae i chõ embesa ji quia Cristo rĩ ña? “Mbae rasi ra esaã tuchi”, i chõ nguiã. “Mbia ra eucuayã tuchi”, i chõ nguiã no. ¹³ Elías que tu no. Mbia icuã icuã tuchi que ee ra. Sã embesa ji ñee nyii no. Eĩ si tuchi que ra, i que Jesús ñee ee ra.

Jesús aba checuayã jea mbia riirĩ mo si

¹⁴ Ngasẽ ngue echoi echimbaaquiato ataque je cote ra. Mbia tubiriã tuchi que chi echimbaaquiato mama huee ra. I que embesasa u ñee icuã icuã echimbaaquiato je huee ra. ¹⁵ Jesús ngasẽ mose que mbia nyuruirã tuchi mae erese ra. Oo tuchi que erese ra. ¹⁶ —¿Mbae rĩ jẽingo ñee icuã icuãte jenyue re? i que Jesús ñee mbia je ra. ¹⁷ Emo ngue ñee Jesús je ra. —Sererecua, seriirĩ aru quia ndeje co. Nde embucherõ sacua. Aba checuayã icuã equereco uchiangui re co. Nyebe eriqui nguiã ñee eãte co. ¹⁸ Aba checuayã icuã ndiqui seriirĩ isi isi beite co. Mbucõi coi beite equia íbii co. Echuru abe mbichoite. Ureĩ abe quiti quitite. Nyebe equirãcuã neate riqui nguiã co. “Aba checuayã jẽjea seriirĩ si”, ae rei que ndechimbaaquiato je ra. Eaquiataũte chõ ngue ra, i que eru ñee Jesús je ra. ¹⁹ Jesús que ñee cote ra. —¿Mañi jenyue quia seicuayãte re? ¿Ñimbirãcuã mbeite ra aba quia jẽje re? i que Jesús ra. —Eriirĩ jendu rã seje, i que cote ra. ²⁰ Eriirĩ ngue ecurucuaẽ ee cote ra. Aba checuayã ngue eriirĩ mburirite Jesús rese mae mose ra. Mbucõi que íbii ra. Mbuchĩshao shao tuchi que ra. Echuru mbichoĩ tuchi que ra. ²¹ —¿Manosete aba

checuayã ndiqui ererequia re? i que Jesús eru je ra. —Eñetẽ mosebe bei, i que eru ra. ²² —Tátaa eriqui emondo mondo beite co. Ama ye abe. Erĩcharã. Nde ejea aquiato mose, ejea rã esi ure je, i que eru ñee Jesús je ra. ²³ Jesús que ñee ee ra. —¿Mbaerã ereico “ndeaquiato mose” i seje re? Ae seicua quia nae, ùquĩ je aico mbae raã aquiato jate co resẽ, i que Jesús ee ra. ²⁴ Eru que ñee ee ra. —Areicuate se resẽ. Semingo uquiabe jiri nderese ae, i que eru ucheẽ mumbebote ñee Jesús je ra. ²⁵ I que mbia cuaẽ nguiã ñumunua nua tuchi huee ra. Nyebe Jesús ñee asi nguiã aba checuayã icuã je. —Aba checuayã, mbia isa erembĩtaote quia hue. Erebuheẽ ngũiate abe equia hue. Esẽ oso esi. Ereique sichĩ nda oso echiangui re jẽ, i que Jesús ee ra. ²⁶ Aba checuayã ngue tasẽte eriirĩ mburiri cote ra. Usẽ oso cote. Eraaque rã ngue eriirĩ nyi cote ra. Mano nei nguiã mbia je. ²⁷ Jesús que emua eo rese ra. Juã turã ngue cote ra. ²⁸ Jesús que oso ique tuchúaa cote ra. Echimbaaquiato que ñee ee mbia tiámbaa cote ra. —¿Mbaerã aba checuayã useã oso urecheẽ mose ure re? i que ñee ee ra. ²⁹ Jesús que ñee ee ra. —Jeñee eã mose Dios je, ã jẽjea aroneate. Jẽhui eã mose jenyu si, ã jẽjea aroneate no, i que Jesús ee ra.

Mbia ra seiquia, i si Jesús

³⁰ Galilea rĩ ngue echoi hue si ra. —Sã mbia jiranua nanderese, nandeso mose hue rĩ, i que Jesús ñee uchimbaaquiato je ra. ³¹ Uchimbaaquiato ae que embaaquiato quiato oso quia ñeenda rui ra. —Emo nda semee mbia icuã je seiquia sacua. Seiquia ji ra aquera si tres días mose, i que equia embaaquiato quiato ñeenda rui ra. ³² Echimbaaquiato que echeẽ icuayãte quia ra. —Ndecheẽ embiasa asa tuchi rã ure je, i ãte que equia ee ra. Ireĩ ireite quiato que equia esi ra.

Ererecua tuchi ra se, i jaaja Jesús chimbaaquiato nyue

³³ Ngasẽ ngue Capernaum nda. Tuchúaa ique mose que ñee uchimbaaquiato je ra. —¿Mbae rĩ jenyu quia ñee icuã icuãte jenyue ñeenda rui re? i que ee ra. ³⁴ Quiriri ja chõ ngue u ñee ndocõi ee ra. —Ererecuarã

nda se cote, i jaaja chõ equia nyue ñeenda rui reaẽ. Nyebe eriqui ireĩ ireĩte Jesús si re. ³⁵ Jesús que ngoi cote ra. —Jenyu ja rã. Tacheẽ jẽ ja je, i que uchimbaaquiату doce je ra. —“Ererecuarã se” i mose emo, sã uataque rimbarã ño eriqui, i que Jesús ee ra. ³⁶ ãquẽ mo ngue emi eite re cote ra. Su i que ñee uchimbaaquiату je ra. ³⁷ — Ae siqui turã nguia mbi a riirĩ je serĩ nae, seje abe chõ eriqui nguia siqui turã. Ae eturã ndiqui seje nae, semondosa abe je chõ eturã ndiqui nguia, i que Jesús ee ra.

Emo icuã eã mose nande je, nanderesenda chõ ùquĩ nde

³⁸ Juan ngue ñee Jesús je ra. —Pe emo nyi aba checuayã ndirõ ndirõ mbia si nderĩ pe. Uremae ngue erese ra. Aque eriqui ãte nanderese aque. Nyebe uresiquisã nguia, i que Juan Jesús je ra. ³⁹ Jesús que ñee ee ra. —Tei. ¡Jẽsiquisã quisãchĩ nda jẽ! Emo mbia mae sayã naa mose serĩ, ñee icuã eã nda seje aquere. ⁴⁰ Emo icuã eã mose nande je, nanderesenda chõ ùquĩ nde. ⁴¹ Emo sechimbaaquiату isei mbiu turã mose serĩ, Dios abe ra mbae turã mondo aque je.

Mbae icuã nda nandesaã uquiachĩ emo je

⁴² Ae ra mbae icuã saã uquia seicuasa mo je nae, ùquĩ nda mbae rasi saã tuchi cote. Ùquĩ nda aba mombo chõ ama ndisha ye nyii re chã. Sita resebe ecua ji mondo. Fnda mbae icuã naa uquia eãte rei seicuasa je. ⁴³ Ndeo nemingo mose mbae icuã ndese, ndeo echisia mombo. Coche rei ra ereso ibate ndeo mĩ Nderequia, siqui bei sacuã huee. Oso rocoĩ tata cuásuu, ndeo nyeremo nderao. Tata mungue aronea tuchi chõ hue jenda re. ⁴⁴ Mbae rosei ra manoa mbei huee. Tata ra uqueã mbei huee no. ⁴⁵ Ndei nemingo mose mbae icuã ndese, ndei echisia mombo. Coche rei ra ereso ibate ndei mĩ nderequia, siqui bei sacuã huee. Nemombo rocoĩ tata cuásuu, ndei nyeremo nderao. Tata mungue aronea tuchi chõ hue jenda re. ⁴⁶ Mbae rosei ra manoa mbei huee. Tata ra uqueã mbei huee no. ⁴⁷ Nderesa nemingo mose mbae icuã ndese, nderesa echoo. Coche rei ra ereso Dios recua nderesa mĩ nderequia.

Nemombo rocoĩ tata cuásuu, nderesa nyeremo nderao. ⁴⁸ Mbae rosei ra manoa mbei huee. Tata ra uqueã mbei huee no. ⁴⁹ Tata ra mbia sei bei huee. ⁵⁰ Embiquesa rã ño jẽingo nguia mbia je ã. Sã embiquesa turãte no. Eise quiachamba mose, eicuã tuchi ra cote. Embiquesa rã tuchi chõ jẽingo mbia je. Jẽingo turã ño nguia jenyiese, i que Jesús ee ra.

10

Jesús ñee mbia ngüinisi mombo je rĩ

¹ Jesús que ngata si oso cote ra. Judéaa que esi ra. Ama Jordán ndobei que esi sobei cote ra. Mbia que ñumunua nua tuchi quia ee ra. Mbaaquiату quiату que equia ra. Sã eriqui mbia mbaaquiату quiату beite no. ² Fariseos mo abe que ngaẽ erea ra. —Tã nande Jesús je no. Ma ñee Dios cheẽ abi, i que ñee nyue ra. —¿Coche mbia ngüinisi jea ubiã mose re? i que ñee Jesús je cote ra. ³ —¿Mbae i Moisés embesa re? i que Jesús ee ra. ⁴ Fariseos que ñee ee ra. —“Jeninisi jea nonde, papel mbesa ji jemondo ee”, i que Moisés ra, i que ra. ⁵ Jesús que ñee ee ra. —Jeãquĩ ãtãte quiату ngue re. Nyebe Moisés ùquĩ mbesa nguia jẽje. ⁶ Ùquĩ i ãte que Dios quia mbia ao ramo mose nyii ra. Dios mbia ao mose, nyeremo ngue echao ra. Erãcuẽ ngue echao ra. Eninisirã abe que echao no nda. ⁷ Nyebe ra emo ndiqui ngüinisi rese bei. Ngu si isho. Usi si abe no. Ngüinisi mĩ ndese siqui bei sacuã. ⁸ Co mĩ na siqui sacuã nyiese cote. Nyeremo siqui rã eã ño cote re. Co mĩ siqui rã ño ùquĩ cote re. ⁹ Ae Dios mbucha nyiese nae, sã ùquĩ hui eã mbei nyesi, i que Jesús ñee fariseos je ra. ¹⁰ Ngasẽ mose tuchúaa que echimbaaquiату ñeembe ee ra. —Ndecheẽ embiasa turã na ure je, i que ee ra. ¹¹ Jesús que ñee ee ra. — Ae ngüinisi jea nae, emo ndese siqui sacuã nae, eicuã tuchi chõ ùquĩ nde. Adulterio i que ùquĩ je ra. ¹² Cuña mo ngu jea mose siqui sacuã emo ndese, eicuã tuchi chõ ùquĩ no nde, i que Jesús ee ra.

Jesús mbia riirĩ isi turã turã

¹³ Mbia que ngüirĩ ngurucuaẽ cuaẽ nguia Jesús je ra. Jesús oco oco sacuã erese. —¿Mbaerã jendiirĩ jendu quia co re?

i rei que echimbaaquiatu ñee mbia je ra. ¹⁴ Jesús que paama i ñee uchimbaaquiatu je ra. —Jeñeechĩ nguiã ee. Sã ae ae riqui nguiirĩ ndurucuaẽ cuaẽ seje. Eĩ ño Dios rimba nguiã. Ucuasu raã naa eã. Mbia riirĩ na. ¹⁵ Mbia riirĩ na ño jẽingo Dios isi turã. I mose ra Dios rimba tuchi jẽ cote, i que Jesús ra. ¹⁶ Mbia riirĩ ngue esui sui ra. O que echono ñono earõ nda. Ñee turã ngue Dios je erĩ nda.

Acuanĩndu mbaecha mo ñee Jesús je

¹⁷ Acuanĩndu mo ngue tu Jesús je ra. —Mbia mbaaquiatusa turãte nde. ¿Mbae turã mo nda asaã Dios je semingo bei sacuaã nde? i que ñee Jesús je ra. ¹⁸ Jesús que ñee ee ra. —¿Mbaerã ereico “eturã” i seje re? Dios mĩ ño eturã ndesẽ. ¹⁹ Dios cheẽ emumbayã. Echeẽ ereicuate quia co resẽ: “Emo ninishi rese ra ereicochĩ. Mbia ra ereiquiachĩ. Mbae ra erembuquiachãchĩ. Erecehẽ ñooñochĩ nda emo nĩ. Emo nda erembĩrĩ irĩchĩ. Ndeturã ño nderu je. Ndesi abe je”, i que Dios cheẽ nda, i que Jesús ñee ee ra. ²⁰ Acuanĩndu que ñee ndei ee ra. —Ūquĩ ngue amumbayã ja bei quia ra. Señetẽ mosenda bei, i rei que ñee Jesús je ra. ²¹ Jesús que nyesequa tuchi mae mose erese ra. —Á mĩ mo abe eresaã eãte. Nembae emondo mondo ja mbia mbaecha reã je. Nde ũquĩ naa mose, mbae tubiriã nda nembae ndeico mose ibate. Nembae mondo ja mose mbaecha reã je, serui eico cote, i que Jesús ee ra. ²² Acuanĩndu Jesús cheẽ andu mose que echiã ndoso tuchi cote ra. Eya eã tuchi que oso Jesús recha ra. Mbaecha tuchite quiatu ngue ae re.

²³ Jesús que mae mbia rese ra. —Mbaranguiatu ãte mbaecha je ngasẽ sacuaã ibate, siqui bei sacuaã huee, i que ñee uchimbaaquiatu je ra. ²⁴ Echimbaaquiatu que nyuruira tuchi eandu ra. Jesús que ñeembe ee ra. —Ae ndua ndua beite quia umbae tubiriã ndese, mbaranguiatu ãte ũquĩ je oso sacuaã ibate Dios rese. ²⁵ Sã ticuas mo ndiqui oso aroneate ique aguja sorei rĩ no. Eĩ si chõ mbaecha no nde. Oso aronea ibate Dios rese, i que Jesús ee ra. ²⁶ Echimbaaquiatu que nyuruira tuchibe u eandu no nda. —¿Aba quiatu ra oso Dios rea ibate re no? i que ñee nyue ra. ²⁷ Jesús

que mae erese ñee ee ra. —Ae mbia saã aroneate quia nae, Dios mĩ ño nda esaã, i que Jesús ee ra. ²⁸ Pedro que ñee Jesús je ra. —Ure que urembae uresecha ja ra. Siqui sacuaã nderui, i que Pedro ñee nda. ²⁹ Jesús que ñee ee ra. —Tacheẽ nyecua jẽje. Emo umbae secha ja mose siqui sacuaã serui, embae ra asibishorõ tuchi ee cote. Ae uchuchua secha. Ae ngõngue secha. Ae ngu secha. Ae usi secha. Ae nguiirĩ secha. Ae umbae ibi secha no. ³⁰ Ūquĩ mbae ja ra asibishorõ tuchi cien veces ereco mose ibii. Echuchua ata. Enongue ata. Esi ata. Eriirĩ ata. Ibi ata abe no. Ūquĩ ja ra asibishorõ tuchi ee. Mbia icuaã icuaã tuchi ra ee serĩ. Aquere ra siqui bei tuchi Dios rese ibate cote. ³¹ Ae ererecua saã saã nguia namo nae, ererecua eã tuchi ra ũquĩ m o cote. Ae ererecua eã namo nae, ũquĩ mo nda ererecua cote, i que Jesús ra.

Mbia ra seiquia, i si Jesús

³² Jerusalén ngue echoi quia ra. Jesús que oso quia enonde ra. Echimbaaquiatu que siquichete nyoĩ quia ra. Nyebe Jesús ererao nguiã mbia tiãsa ñee sacuaã ee. ³³ —Co nyao quia Jerusalén co. Huee ra mbia semee sacerdotes rerecua je. Embesasa abe je. “Jesús jẽiquia”, i ra serĩ. Semee nda judíos eã je cote. Seiquia sacuaã. ³⁴ Mbia ra secheẽ saã saã. Seiruã nua abe ra eno. Sembucha chee ra iquia ira rese. Tres nyaashĩ mose ra aquera si, i que Jesús ñee ee ra.

Ererecuarã se, i raque Jacobo, Juan ndese

³⁵ Jacobo que oso Jesús riichã ngõngue rese ra. Juan, i equia ee. Zebedeo riirĩ ndei ũquĩ. —Urechu ñee ndeje aa, Urembaaquiatusa. Ae rĩ nda urecheẽ ndeje nae, ũquĩ je “eno” ere rã ure je, i rei que ee ra. ³⁶ —¿Mbae ra aba saã jẽje re? i que Jesús ee ra. ³⁷ —Ndeico mose ererecua tuchi, sã ure abe ureico ererecuarã nderese. Sã urecoi ja u ndejii. Co mĩ chĩ ndequiato cuti. Enonge chĩ ndequiato cutiã no, i rei que ñee Jesús je ra. ³⁸ Jesús que ñee ee ra. —Ae rĩ jẽingo ñee seje nae, jẽirandu turã eãte ũquĩ ndese. Ae rasi ra asaã tuchi nae, ¿ũquĩ ndasi ra jesaã jẽ abe re? Bautizar i ra seje, ¿eĩ nda bautizar i jẽ abe je re? i que Jesús ee ra. ³⁹ “Ae” i

que ñee ee ra. Jesús que ñee ee cote ra. — Ae bei. Ae rasi ra asaã tuchi nae, ùquĩ ndasi ra jësaã tuchi rei jë abe. Bautizar i ra seje, eĩ si rei ra bautizar i jëje no. ⁴⁰ “Ererecuarã ure”, jenyere rei que seje, ùquĩ asaã aroneate se jëje. Paba ae quiatu ra ùquĩ saã. A e ebite, ùquĩ nda emi ererecuarã, i que Jesús ra. ⁴¹ Echimbaaquiato ataque que jirandu erese ra. Echimbaaquiato diez. Paama i que Jacobo je ra. Juan je abe. ⁴² Jesús que “jenyu” i ñee uchimbaaquiato ja je cote ra. —Mbia ataque rerecuarã riqui ucuasu raã naa tuchi ngũimba je ùquĩ. ⁴³ Ùquĩ nda jësaã eã jë. “Ererecuarã se”, i mose jemo, sã ùquĩ siquichõ uataque rimbarã. ⁴⁴ Jemo “se rane jë” i mose, sã ùquĩ ndiqui bei mbae turã naa naa uataque je no. ⁴⁵ “Sã mbia mbae turã naa naa seje”, ae eã ngue u ra. “Se quiatu mbae turã tasaã saã oso mbia je”, ae u nguiã. Co achu quia mano mbia tubiriã ndiquicharõ sacua co, i que Jesús ñee nda.

Jesús Bartimeo ndesayã mbucherõ

⁴⁶ Jesús que ngasẽ Jericoo ra. Uchimbaaquiato rese. Jesús ngata mose hue si, mbia tubiriãte que nyoĩ quia eruĩ ra. Eresayã mo ngue chĩ ñeenda jie huee ra. Ache ache i que huĩ nda. Bartimeo, i equia ee. Timeo ndiirĩ ngue ae ra. ⁴⁷ Jirandu mose Jesús rese que ñeemombo mombo ee ra. —¡Jesús! ¡David nducucha! ¡Ndeya eã ño serese jë! i que ee ra. ⁴⁸ —¡Equiriri chõ jë! i tuchi rei que mbia ñee ee ra. —¡Sererecuarã! ¡David nducucha! ¡Ndeya eã ño serese jë! i be que eresayã ñee Jesús je ra. ⁴⁹ Jesús que tiba ra. —Eresayã jendu rã, i que ra. Mbia que ñee eresayã je ra. —Ndeya chõ jë. Ehuã. Jesús riqui ñee ndeje a, i que ee ra. ⁵⁰ Juã asi que oso Jesús rese ra. Uchiati quia recha. ⁵¹ —¿Mañi ae ra ndeje re? i que Jesús ñee ee ra. —Serese embaturã na, Sererecuarã, i que ra. ⁵² Jesús que ñee ee ra. —Eso cote. Seicuate que se ra. Nyebe nderesa nyerõ nguiã cote, i que ee ra. Aque mose tuchi que eresayã ndesa turã ja cote ra. Jesús rui que esi quia cote ra.

11

Jesús ngasẽ Jerusalén

¹ Jesús que Jerusalén curubite nyoĩ quia ra. Betfagé, i que hue sucha je ra. Ibi ibate mo abe que chĩ huee ra. Monte de los Olivos, i que ee ra. Hue si que Jesús uchimbaaquiato nyeremo mo mondo ra. ² Ñee ngue ee ra. —Achi sucha chõ jëso rã. Jengasẽ namo mose ra burro riirĩ cuasa mo ñi jëje huee. Emo ngue nyui eãte eáto ra. Jenyura seru seje. ³ Emo ñee mose jëje, “¿mbaerã nda jenyura re?” i mose jëje, jeñee ee. “Nandererecuarã que ‘jendu’ i ra. Mondo jeibe ra jëje”, jenyere ee, i que Jesús ñee ùquĩ nyeremo mondo ra. ⁴ Nyoĩ que erea cote ra. Burro riirĩ ngue etea Jesús cheẽ nguire cote ra. Ecuasa que chĩ taicuee ei quesa jii ra. Nyura que cote ra. ⁵ Ae mbia chi huee nae, ùquĩ mo ngue ñee ee ra. —¿Mbae rese jëingo hue re? ¿Mbaerã jëingo era era re? i que ee ra. ⁶ Jesús cheẽ ndui si que ùquĩ ñee ee ra. “Eno” i que mbia ee cote ra. ⁷ Burro riirĩ ngue ecuruchoi Jesús je cote ra. Huirao que echono ñono earõ nda. Jesús que nyui eáto cote ra. ⁸ Jesús que ngata oso quia burro áto cote ra. Mbia tubiriã ngue huirao mbiitee tee nyoĩ quia ibi rĩ enonde ra. Emo ngue sindo mbiitee tee choi quia enonde no nda. Jesús oso sacua hue rĩ. ⁹ Mbia ia tuchi que tasẽ tasẽ nyoĩ quia enonde ra. Eruĩ abe no. — Co nandererecuarã ru quia ngasẽte co. Co Dios chimbu ru quia ngasẽte nande je co. ¹⁰ David nducucha ru quia co. Nandererecuarã turã sacua. Dios turã tuchi riqui nande je co, i tuchi que mbia quia ñee nda. ¹¹ Jesús que ngasẽ Jerusalén cote ra. I que que oso Dios chuchua cote ra. Mae ja mose mbae rese que esi Betania uchimbaaquiato rese cote ra. Tenda quiatu ngue osote nguiã ee.

Jesús ñee icuã higo i je

¹² I que Jesús choi quia Betania si isamami nda. Eriãcuãte que oso quia ra. ¹³ Isho que mae higo i mo ndese ra. Ero rerecuarã que ra. —Ea mo tau, i rei que oso erea ra. Ero achõte chõ ngue ee ra. Aque mose que eriqui ia eã nda. ¹⁴ Jesús que ñee higo i je cote ra. —Mbia ra ndea u eã mbei cote, i que ee ra. Echimbaaquiato abe que echeẽ ñandu ra.

Jesús mbia mbusẽ Dios chuchua si

15 Ngasẽ ngue Jerusalén cote ra. Jesús que oso Dios chuchúaa ra. Huee que mbia riqui mbae isi isi bei ra. Mbae mondo mondo abe mbae isiquia ribishorõ. Ûquĩ ja que Jesús mbusẽ mondo ra. Ae mbae isiquia sibishorõ shorõ nguia, ùquĩ mbae abe que embuchiichere chere ja mesa ra. Mbae ja resebe. Ae nyurushi cuasu mondo mondo mbia je mbae ribishorõ nae, ùquĩ nenda abe que embuchiichere chere ja ra. 16 Jesús que ñee ùquĩ je ra. —Dios chuchua ite rĩ jẽingochĩ nguiã mbae rerao rao. 17 “ ‘Mbia cheẽsa Dios je’, i ra mbia Dios chuchua je”, i rei que embesa ji huĩ nda. Jẽ nguia jẽicuã tuchite Dios chuchua je re. Mbae mbuquiachãsa chuchua jẽsaãte chĩ nguiã ee, i que Jesús ñee asite ùquĩ je ra. 18 Sacerdote rerecua que chi Jesús cheẽ andu ra. Embesasa abe no. —¿Mañi nda aba Jesús iquia re? i que eu ndua ndua ra. Mbia quiatu que oote Jesús cheẽ ndese ee ra. Nyebe eriqui nguiã Jesús ucuayãte. 19 Hue sucha qu e Jesús secha oso eresaitõ cote ra.

Higo i mano cote

20 I que Jesús nyoĩ quia isamami nda. Higo i cutite que echoi quia ra. Higo i ñimama ño nguia reaẽ. Erao abe mano ño nguia re no aẽ. 21 Pedro que ndua ñee Jesús je ra. ¡—Sã Sererecua! Higo i je que erecheẽ asi nae, mano ño equia cote reaẽ, i que ñee Jesús je ra. 22 Jesús que ñee ee ra. —Dios jẽicua tuchi. 23 Tacheẽ nyecua jẽje. Jemo ñee mose sita ibate mo je, “esiri rã oso ama ndisha ye” i mose sita ibate mo je, sã Dios icua tuchi rã nyii. “Dios ra secheẽ mumbayã” i tuchi mose uchiangui re, Dios ra echeẽ mumbayã. Sita ra siri ee. 24 “A emondo seje”, jenyee mose Dios je, mondo ra jẽje. “Dios ra emondo seje”, jenyee mose jeñiangui re, mondo ra jẽje. 25 Emo mbae icuã naa mose jẽje, ùquĩ ñee chĩ mose jendese, jẽtesarei chõ ùquĩ si. Jẽtesarei chõ esi ñee nonde Dios je. Ûquĩ mose ra jendu ibatenda abe jẽicuã mbutiã no. 26 Jẽtesareiã mose emo icuã si, Dios abe ra jẽicuã mbutiã eã mbei jẽsi, i que Jesús ee ra.

¿Aba nembu re? i mbia ñee Jesús je

27 Nyebibe que echoi Jerusalén nda. Dios chuchuaqui rĩ ngue Jesús riqui ngata ra. Sacerdote rerecua que nyoĩ ñee ee ra. Embesasa rese. Amei ndese. 28 —¿Mbaerã ereico mbia mbaaquiātu quiātu Dios chuchúaa re? ¿Aba “ùquĩ esaã saã” i quia ndeje re? i que ùquĩ ererecua ñee ja Jesús je ra. 29 Jesús que ñee ee ra. —Se rane tacheẽ jẽje. Se rane preguntar tae jẽje. Secheẽ jẽsibishorõ na nyii. Aquere quiātu ra jeñee asibishorõ cote. 30 ¿Aba ñee Juan je re? “Eso bautizar i mbia je” i ee re. ¿Dios eã ño ere? Jeñee seje, i que Jesús ee ra. 31 Ererecua que ndua ndua ja u cote ra. Ñee ñee ngue u nyue ra. —¿Mañi nande ra echeẽ ndibishorõ nde? “Dios que Juan mbu ra”, nande aroneate ee. Nyebe ra ñee nande je. “¿Mbaerã jẽingo eãte erui re no?” i quiarei ra nande je. 32 “Dios que embu eã nda”, nande aroneate ee no. Mbia ataque ra paama i tuchi nande je. Juan quiatote quia mbia re, i que ererecua ñee ñee nyue ra. 33 Ñee nyee que Jesús je cote ra. —Ureicuayãte. Aba chõ Juan mbu bautizar i sacua mbia je, i que ee ra. Nyebe Jesús ñee nguiã ee. —Se abe quiātu tacheẽ eã jẽje no. Ae “ã esaã” i seje nae, erĩ nda acheẽ eã jẽje no, i que Jesús ùquĩ ererecua je ra.

12

Uva raarõsa icuã icuã nguerecua je

1 Jesús que ejemplos saã saã mbia je ra. —Sã mbia ibicha mo ndiqui no. Sã eriqui uva i tiquia tiquia no. Sã etarõ no. Uva rique rirurã abe que echao ra. Sucha ibate mo abe que echao no nda. Uco raarõ turã ja sacua. Ibicha que “sembae uvas jẽsaarõ” i emo je cote ra. Al partido. Ae que oso isho itõte cote ra. 2 Uva quiche mose que ngũimba mo mondo rei umbaerã ndea ra. 3 Uva raarõsa que erimba mbucasẽ icuã ño nda. Iruã nua ño ngue ra. Eochi chõ ngue emondo mbuchebi ra. 4 Echa que ngũimba mo mondobe rei ereabe no nda. Aque abe que embucasẽ icuã no nda. Sita que emombo mombo erese no nda. Eãquĩ nduqui tuchi que ra. 5 Ngũimba mo ngue emondobe aquere no nda. Aque quiātu que eiquia tuchi cot e ra. Eĩ eĩ mbei que

eraarõsa quia echa rimba je ra. Emo emo ngue eiruã nua nda. Emo emo ngue eiquia no nda. ⁶ Aque mii tuchi que siquichõ echa rese cote ra. Eriirĩ tuchi chõ ngue aque re. Nyesecua tuchi que equia aque rese ra. Aque que emondo chee uva rea cote ra. “Ireĩ ireĩ jiri ra seriirĩ si”, i rei que ra. ⁷ Eriirĩ ngasẽ mose que uva raarõsa ñee nyue ra. — ¡Co eriirĩ ndu quia co cote jẽ! ¡Nandeiquia rei jẽ! ¶ nda uvas nandembaerã ae tuchi cote, i que ñee nyue ra. ⁸ Eraarõsa que eriirĩ isi icuã cote ra. Curuchoi que iquia pe jiri ra. Mano ngue cote ra. ⁹ ¿Mañi nda echa quia eraarõsa je cote re? Echa ra eraarõsa icuã iquia ja cote. Uva i ra emondo ja emo je eraarõ sacuã cote. ¹⁰ ¿Ã mbesa ji rese jemae ãte re?

Sã emo ndiqui tuchua ao sita je no.

Sita mo ngue equirirõ mombo ra.

Eicuãte eriqui reĩ nguiã ee.

Aquere ndua si erese.

“Earonda sacuã turambi chõ eriqui re”, i ndua si uchimombo rese.

Uchimombo que esirõ si cote ra.

¹¹ Dios chiao chõ ùquĩ nde.

Dios chiao turã tuchi riqui nande je ã, i ñi embesa ji re, i que Jesús ee ra.

¹² —Nanderĩ ño eriqui nguiã ñee, i que ùquĩ ererecua ra. —Nandeisi rei serao jẽ, i rei que nyue ra. Jesús isi aronea tuchi que mbia résaa ra. Eireite quiatu ngue mbia tubiriã si re.

¿Impuestos ra uremee ererecua je re? i mbia ñee Jesús je

¹³ Ùquĩ ererecua que fariseos mo mondochoi ñee Jesús je ra. Herodes chimbaaquiatu abe mondochoi erea. — Jesús nandembucheẽ icuã na. ¶ nda mbia paama i ee, i rei que ra. ¹⁴ Uturã ngue esaã ñooño Jesús je ra. —Jesús, co ereico mbia mbaaquiatu turãte co. Mbija jaje ndeturãte riqui co. Co ereico turãte mbia mbuchiabiã co. Mbija erembaaquiatu quiatu turãte quia Dios icha riĩ co. Nyebe urechu nguiã ñee ndeje a. ¿Coche mbia mbae isiquia mee mee Romanos nderecua je re? Impuestos. ¹⁵ ¿Uremee mee nda ee re? ¿Uremee eã nda ee re no? i que ñee Jesús je ra. Jesús que

ùquĩ icuã icuate ra. Nyebe ñee nguiã ee. — ¿Mbaerã jẽingo “ĩ nda Jesús ucheẽ nyabi”, i serĩ nde? Mbae isiquia jẽteacuquia imbu seje. Tamae erese, i que ee ra. ¹⁶ Mbija que eteacuquia ee ra. —¿Aba mbae nombre ñi mbae isiquia rese a re? ¿Aba ãquĩ aingue abe ñi a re? i que Jesús ee ra. Romanos nderecua, i que mbija ee ra. ¹⁷ Jesús que ñee ee cote ra. —Romano s nderecua mbaerã jemondo chõ ee. Dios mbaerã jemondo chõ ee no, i que Jesús ee ra. Mbija que nyuruira jate u Jesús cheẽ andu ra.

Mbija raaque ra quera si, i Jesús

¹⁸ —Mbija raaque ra quera eã mbei, i que mbiamo nguia ñee nda. Saduceos i que ùquĩ mbija je ra. Ùquĩ mo ngue nyoĩ ñee Jesús je ra. Tã i sacuã ee. ¹⁹ —Sererecua, ã ngue Moisés mbesa nande je ra: “Emo ndiiriã mano mose, sã enongue mano je ninisi rerequia erendaque re. Sã tiirĩ ngõngue raaque riĩ”, i que Moisés embesa nande je ra. ²⁰ Eriquii mo ngue siqui urerese ra. Seis que eribi ra. Eriquii que ngũinisiã quereco rei ra. Mano ño ngue tiirĩ ndocoĩ ngũinisi recha ra. ²¹ Enongue que nguiquii checha quereco rei cote ra. Ae abe que mano ño tiirĩ ndocoĩ no nda. Enongue que equereco no nda. ²² Ùquĩ seis que ngõngue checha quereco ja rei ra. Mano ja chõ ngue erecha tiirĩ ndocoĩ no nda. Eninisi eru checha que mano nyee chõ cote no nda. ²³ Siete rei que eru nyii ra. Mbija raaque quera si ja mose, ¿abate ra equereco cote re? i que saduceos ñee Jesús je ra. —Ma Jesús ñee icuã, i chõ ngue re.

²⁴ Jesús que ñee ee ra. —Jẽingo Dios cheẽ icuayãte ã. Jẽingo Dios cheẽ abi tuchi ã. Jẽingo Dios quirãcuã icuayãte ã. ²⁵ Ae raaque ra Dios mbuquera si nae, ùquĩ nda ngũinisi quereco eã mbei huee cote. Ùquĩ nda ngu quereco eã mbei huee cote no. Angeles rã mbei ra mbija riqui huee ibate cote. ²⁶ ¿Moisés chimbesa rese jemae ãte re? Mbija raaque quera si riĩ ño ngue embesa nguiã. Ira ruri sendi quia, aque mose que Dios Moisés mbiirandu ùquĩ ndese ra. “Abraham nderecua chõ aico nguiã se co. Isaac nderecua abe. Jacob nderecua abe no”, i que Dios Moisés je aque mose ra. ²⁷ ã

ngue mano ndei nyii ra. Eresco siqui bei chõ nguiã namo ã. Mbia raaque rerecua eã ño Dios re. Mbia reco rerecua chõ ae re. ¿Ûquĩ jêicua eãte quia ã nde? i que Jesús ñee mbia je ra.

Echeseccua tuchi quia Dios rese

²⁸ Embesasa mo ngue chĩ echeẽ andu ra. —Jesús ñee turã tuchi chĩ saduceos je, i que uchiangui re ra. Nyebe esi nguiã ñee ee. —Jesús, Dios cheẽ tubiriãte riqui ã ndesẽ. Mbia echeẽ mumbayã sacua. ¿Ma Dios cheẽ ndiita tuchi ma nde? i que embesasa ñee Jesús je ra. ²⁹ Jesús que ñee ee ra. —Ã ño Dios cheẽ ndiita ã nde: “Secheẽ jeñandu rã, Israelitas. Dios mi tuchi chõ nandererecua re. ³⁰ Echeseccua tuchi quia Dios rese. Ndechiã je. Neaĩ je. Nendua ndua abe je. Ndequirãcuã abe je”, i chõ Dios cheẽ ndiita nguiã. ³¹ ã abe rei ùquĩ nduinda ã no: “Sã ereico nyeseccua ndechiese no. Eĩ ere si chõ nyeseccua mbia rese”, i. Ûquĩ nyeremo ndei Dios cheẽ i tuchi ùquĩ, i que Jesús ee ra. ³² Embesasa que ñee Jesús je cote ra. —Ae bei, Sererecua. Dios mi tuchi chõ nandererecua re. Emo abe mo eãte. ³³ Nandecheseccua tuchi mose Dios rese, ùquĩ eturãte ee. Nandecheseccua tuchi mose nandechiã je. Nandendua ndua je. Nandeaĩ je. Nandequirãcuã je abe no. Nandecheseccua tuchi mose mbia rese, ùquĩ eturãte Dios je mbae mo si. Sacrificio mo si. Ofrenda mo si, i que embesasa ñee Jesús je ra. ³⁴ —Ñee aquiature equia seje co, i que Jesús uchiangui re ra. —Dio s rimbarã tuchi chee ra nde, i que ee cote ra.

¿Aba rucucha Cristo re?

³⁵ Jesús que mbia mbaaquiatur quiatur quia Dios chuchúaa ra. —¿Mbaerã embesasa riqui ñee nde? “David rucucha chõ Cristo re” i re. ³⁶ David abe que “sererecua” i Jesús je ra. Sã embesa ji ñee no: Dios que ñee Cristo sererecua je ra: “Ecoi sejii. Nde abe ra ererecua serese. Ae ndeucuayãte quia nae, ùquĩ je ra ndequirãcuã ateacuquia tuchi. Ndequirãcuã tuchi chee ra ùquĩ si”, i que Dios ñee sererecua je ra, i que Espiritu Turã David mbucheẽ nda. ³⁷ David sí chõ “sererecua” i nguiã Cristo je.

Cristo David rucucha mose, ¿mbaerã David “sererecua” i ee re? i que Jesús embesasa je ra. Mbia tubiriã ngue Jesús cheẽ chandu turã jate ra.

Jesús ñee asi embesasa je

³⁸ Jesús que uchimbaaquiatur mbaaquiatur quiatur ra. —Embesasa rã nda jẽingochĩ jẽ. Ûquĩ ucuasu saã saã mbeite quia ã. Huiirao turã equereco beite quia ã. “Sã mbia ererecua i nande je”, i beite equia ã. ³⁹ Mbia renda turã abe eirabo rabo beite quia mbia si ã. “Fiestacha jii quia taĩ jẽ”, i abe beite equia ã no. ⁴⁰ Ari eru cheecha mbae abe embutiã tiãte quia ã no. Ucheẽ oco abe esaã saã mbeite quia Dios je ã no. “I nda mbia mae nanderese”, i chõ nguiã. Ûquĩ nda Dios mbasi tuchi cote, i que Jesús mbia je ra.

Eru cheecha mbaecha reã mo mbae mee Dios je

⁴¹ Emo mose que Jesús ñi Dios chuchúaa ra. Ofrenda riru nonde que eñi ngoi ra. Mae ngue mi mbia mbae isiquia mondo mondo mose eriru ye rese ra. Mbaecha atate que mbae isiquia tubiriã mondo mondo quia eriru ye ra. ⁴² Eru cheecha mo ngue ngasẽ u cote ra. Nyeremoño tuchi que ae mbae isiquia mondo ra. Centavo mi mbuchecha tuchi que ra. ⁴³ Jesús que ñee uchimbaaquiatur je ra. —Jenyu. Tacheẽ nyecua jẽje. Eru cheecha mbaecha reã ngue mbae isiquia mondo tuchi mbia ataque si ra. ⁴⁴ Mbaecha quiatur que umbae rire ñetẽ mondo mondo ra. Eru cheecha quiatur que umbae mi mondo ja ra, i que Jesús ra.

13

Mbia ra Dios chuchua mbucoi ja, i Jesús

¹ Jesús que oso usẽ Dios chuchua si cote ra. Echimbaaquiatur mo ngue ñee ee ra. —Sã Dios chuchua turã tuchite jẽ. Eao ji turã tuchi sita je, i que echimbaaquiatur mo ñee ee ra. ² Jesús que ñee ee ra. —Ã ndese jẽingo mae ã nae, ùquĩ nda mbia mbucoi ja cote. Sita mo nda chi eã nyuchuarõ Dios chuchua cote. Mbia ra Dios chuchua mbucoi ja tuchi cote, i que Jesús ñee nda.

Mbae ua ja nonde chõ ã nde

³ Jesús que chí ngoi huee ibi ibate mo nda. Monte de los Olivos, i que hue je ra. Dios chuchua checuate que ee hue si ra. Echimbaaquiatu que ngasê ñee ee ra. Pedro. Jacobo. Juan. Andrés. Ũquĩ ja que ñee eísaa ra. ⁴ —¿Manosete ra ũquĩ nde? ¿Mañi ure ra equia jirandu mbae ua nonde re? i que ñee Jesús je ra. ⁵ Jesús que ñee ee ra. —Jêtesa jiri quia jê. Mbia mo nda jembĩĩrĩ irĩchĩ ñee jêje jê. ⁶ “Cristo chõ se re” i ra mbia ñee ata atate jêje. Ũquĩ nda jeñanduchĩ jê. Ũquĩ nda mbia mbĩĩrĩ irĩ jate. Ñee ñooño je chõ ũquĩ nde. ⁷ Mbia ra guerras saã saã tuchi. Mbia ra ñee ñee tuchi quia nyĩquia iquia je rĩ. Ũquĩ mose ra jêsiquichechĩ jê. Ũquĩ ja rane nda nyecua raque. Aque mose r a mbae ja ua eã ná. ⁸ Mbia ra guerras saã tuchi chee. Nyĩquia iquia tuchi rae. Mbia riãcuã tuchi ra aque mose no. Emo ñooñoa tuchi ra mbia rasi. Mangue chooñoa tuchi ra ibi nyere nyere. Jembasi ramo mose chõ nda ũquĩ nde. Aquere ra jembasi tuchi cote.

⁹ ¡sã jê! Mbia icuã icuãte ra jêje. Jembĩĩrĩ irĩ ndae. Jemee mee icuã nda mbia rerecua je. Jêiruã nua nda mbia chumunuásaa. Nguerecua je ra mbia jenderao rao tuchi. Ererecua abe je chee ra secheẽ jêseni senei. ¹⁰ Sequiato ra Dios cheẽ turã senei senei ná mbia ja je nyii. Mangue chooñoa jenda ja je. Aquere ra mbae ua ja cote. ¹¹ Jemee mose mbia rerecua je, pare pare jenyechĩ nda jê. “¿Manyae ra ũquĩ ñee ndibishorõ nde?” jenyechĩ nda pare pare i jê. Espiritu Turã ae chõ nda jembucheẽ turã nguiã mbia je aque mose. Jê ae ra jeñee eã. Espiritu Turã ae chõ nda jembucheẽ nguiã. ¹² Jenongue ra jemondo chee mbia icuã je. Jêiquia sacuã. Jendu abe ra jemondo chee mbia icuã je. Jendiirĩ abe ra jemondo chee mbia icuã je. Mbia icuã nda jemo iquia iquia chee. ¹³ Mbia mangue chooñoa jenda ra jêucuyã tuchi serĩ. Ae ra siqui bei serese, ũquĩ nda Dios mingo bei.

¹⁴ Daniel que embesa Mbae Mbutiãsa Icuã ñi nda. Mbae Mbutiãsa Icuã nda siqui nguecuáyaã. “Dios rendaque re taico se quiatu”, i ra equia huee. (Ae ra mae nguia sechimbesa rese nae, sã ũquĩ eicua.) Jemae mose Mbae Mbutiãsa Icuã ndese, jeña esi.

Ae siqui quia Judéaa, sã ũquĩ uchã jei choi ibi ibátee mo. ¹⁵ Ae ra siqui tuchia quite rese, sã ũquĩ iqueã nyoĩ uchuchua uquichi mose. Sã echoi chõ uchã hue si bei, umbae rirõ ndocoĩ. ¹⁶ Ae ra siqui úcoo, sã ũquĩ nyebiã ngaẽ huĩrao rea. Sã hue si bei chõ echoi uchã. ¹⁷ Aba mbia eã tuchi ra emo ãquẽ ndiru rerequia mose aque mose. Nguĩrĩ mbuquiambu je abe no. ¹⁸ “Nyĩiseĩ mose eã urechã” jenyee Dios je. ¹⁹ Mbia ra mbae rasi saã tuchi aque mose. Mbae rasi que mbia saã eã jiri nyii ra. Aque ramo mose ra mbae rasi raã tuchi cote. Mbae ua bei sacuã ño ũquĩ nde. ²⁰ Ae rasi ra mbia saã tuchi nae, ũquĩ nda Dios mbujua jiri uquiato rĩ. I nda emo ñimbirãcuã eã tuchi rei ũquĩ ndasi je. ²¹ “A Cristo riqui a jê” i mose emo jêje, “nyia” jenyechĩ nda ũquĩ ñee mose jê. “Hue Cristo riqui hue jê” i mose emo jêje, “nyia” jenyechĩ nda eno jê. ²² “Cristo chõ se re” ichõiño nda mbia ñee ata atate jêje. “Dios cheẽ mbuchecua chõ se re” ichõiño nda mbia ñee ata atate jêje no. Mbia mae sayã nda esaã saã tuchi mbia mbĩĩrĩ irĩ sacuã. Ũquĩ Dios quiato abe chee mbĩĩrĩ irĩ arõte. ²³ Ũquĩ nonde chõ aico nguiã jembĩirandu randu co.

Dios riirĩ nda tube ibate si

²⁴ Mbia ũquĩ ndasi raã ja mose ra tenda checuayã mbei cote. Nyasi abe no. ²⁵ Nyasitata ra ngoi ngoi. Ibei jenda abe ra quiata quiata chee cote no. ²⁶ Aque mose ra achu ibei rese. Senininya tuchi ra sechu mose. Sequirãcuã tuchi ra sechu mose no. ²⁷ Angeles serimba ra amondo mbia sechiisirõ munua nua sacuã. Ishonda ja. Mangue chooñoa jenda ja. Mbia sechiisirõ nda emunua nua ja seje cote.

²⁸ Sã higuera riqui no. Sã ira mo ndiqui no. Ero quira usê ja mose, “iraro itõ ndacu ra cote”, i chõ mbia nguiã aque mose. ²⁹ Eĩ sí ra mbae ua ja nonde. Ae rĩ aico ñee jêje nae, ũquĩ ndese jemae mose, “mbae ra ua ja cote” jenyee ra cote. ³⁰ Tacheẽ nyecua jêje. ã mbia riqui ngata ibi ã nae, ũquĩ emo emo nda manoa mbae ua ja nonde. ³¹ Ibei ra ua. Ibi abe ra ua no. Secheẽ nguia ra ua eã mbei.

³² Manosete chõ nda mbae ua ja. Aico eicuayãte co. Mbia mo abe eicuayãte quia ã no. Angeles abe eicuayãte quia ã no. Paba mii ño eicua nguiã co. ³³ Nyebe jëingo quiatu quia eraarõ arõ mbei. Jëtesa tesa bei quia. Ma nyaashĩ ño nda equeru. Jëicuayãte equia ã. ³⁴ Sã ererecua mo oso isho itõte no. Sã ñee ngũimba je oso nonde no. —Sembae jësaarõ ja. Æ ndese jëingo. Co rese eico nde. Qui rese eico nde no, i que ñee ngũimba mii mii je ra. — Etesa tesa bei quia, i que eiquesa raarõsa je ra. ³⁵ Manosete chõ nda tuchuacha ru. Jëicuayãte equia ã. Itondaru ramo mose eru arondete. Itondii mose eru arondete. Nguira cheë mose eru arondete no. Eresaitõ ndabe mose eru arondete no. Nyebe jëtesa tesa bei quiatu quia. ³⁶ Jengue mose ra eruchĩ jembuate jë. ³⁷ “Jëtesa tesa bei quia” ae chõ nguiã mbia ja je co. Jë mii je eã, i que Jesús ra.

14

Jesús nandehisi tarõ, i ja ererecua nyue

¹ Sacerdote rerecua que ñee ja nyue ra. Embesasa abe no. —¿Mañi nande ra equia Jesús isi nonde re? Eiquia sacua. ¿Mañi nande ra embiirĩ irĩ nde? i que equia ñee ñee nyue ra. Achite que fiesta de la pascua ñi tu ee cote ra. Dos días. ² —Fiesta mose eã nandehisi jë. Mbia ra paama ichi nande je jë, i que u ñee ñee nyue ra.

Cuñã mo aba mbusimbusa turã ichusë Jesús ãquĩ ndese

³ Jesús que siqui Simón Leproso chuchúaa ra. Betania, i que hue je ra. Cuñã mo ngue tu erea huee ra. Aba mbusimbusa mo ngue equeru ee ra. Sita ao ji ye que ereru ra. Embisë tuchi que equeru ra. Mbae isiquia mumbasa tuchi que ãquĩ nda. Eri ru churui que esiquio eichusë nonde Jesús ãquĩ ndese equiaru mose ra. ⁴ Mbia que chi ja mae erese ra. Paama i que cuñã je ra. —¿Mbaerã eichusë ñooño nde? ⁵ Mbae isiquia ribishorõ ño nda aba emondo re. Mbaecha reã je emee mee sacua, i que ñee icua icua cuñã je ra. ⁶ Jesús que ñee cote ra. —¿Mbaerã jëingo ñee ãquĩ nde? Sã cuñã ae riqui ae. Ae esaã seje nae, eturãte seje ãquĩ. ⁷ Mbaecha reã nguia ra chi arete íbii

a. Jë mbae raãse mose ee, mbae jësaã turã mbei ee ae. Se quia nda aico bei eã nguiã jendese aa. ⁸ Seati nonde chõ ngue cuñã aba mbusimbusa ichusë ja nguiã serese. ⁹ Tacheë nyecua jëje. Mbia Dios cheë turã nenei nenei mose mbia ja je, cuñã nyisaã abe ra esenei senei mangue chooñoa jenda ja je. Mbia ndua turã ja sacua echisaã abe rese, i que Jesús ñee mbia je ra.

Jesús tamee jëje, i Judas mbia icua je

¹⁰ Judas Iscariote, i rei que Jesús chimbuaquiato mo je ra. Aque que oso ñee sacerdote rerecua je ra. Jesús mee nonde ee. ¹¹ Sacerdote rerecua ia ja que ãquĩ andu ra. —Mbae isiquia uremee tuchi ndeje jë, i que ee ra. Nyebe Judas riqui nguiã ndua ndua. —Mbia eãsa quiato Jesús tamee ee, i.

Jesús quiaru uchimbuaquiato rese

¹² Fiesta que tu cote ra. Aque fiesta mose bei que mbia riqui oveja iquia iquia querabe ra. Mbichae mbuchimatã iriã ngue eu eu quia aque mose querabe no nda. —¿Mangue ra oveja urembuchi mangue ndechiurã nde? i que echimbuaquiato ñee Jesús je ra. ¹³ Ñee ngue uchimbuaquiato nyeremo je ra. — Jëso sucha cuasu. Huee ra jemaemo i rerao rese. I ra equerao quia irasa mo ye. Aque rui jëso. ¹⁴ Eique mose, aque tuchuacha je jeñee. “Jesús que urembu ñee sacua ndeje ra. ‘¿Ma cuarto ra urecu quiaru oveja u que re? Sechimbuaquiato rese’, i que Jesús ñee ndeje ra”, jenye tuchuacha je. ¹⁵ Tuchuacha ra cuarto cuasu mee jëje. Mbia quesã ibatenda ra emee jëje. Embuquiche ji. Huee chõ oveja jembuchi nandequiaru sacua, i que Jesús ñee ee ra. ¹⁶ Nyebe echimbuaquiato nyo i nguiã sucha cuasu. Jesús cheë ndui si tuchi que mbae chi ja ee huee ra. Huee que oveja mbuchi huee cote ra.

¹⁷ Itondaru ramo mose que Jesús ru uchimbua quiato ataque rese ra. ¹⁸ Quiaru mose que Jesús ñee ee cote ra. —Tacheë nyecua jëje. A jëingo quiaru serese a nae, jemo nda semondo mbia icua je, i que ñee uchimbuaquiato je ra. ¹⁹ Echimbuaquiato ia eã tuchi que echeë mose ra. —¿Se ra aremondo ee re? i ja jate que ñee Jesús je ra.

²⁰ Jesús que ñee ee ra. —Doce jëingo quiaru serese a nae, jemo ño ñene. Ae chĩ quiaru serese aque plato ye sí a nae, aque chõ ñene.

²¹ Dios cheẽ ndui sí tuchi ra amano ndaque. Ae ra semee mbia icuã je, aque ra mbae rasi saã tuchi quia. Aba mbia eã tuchi ra aque. “Taĩ sembuchecua jirichĩ nguia curi”, i chee ra aque, i que Jesús ra.

²² Quiaru que u ra. Jesús que mbichae sirõ nda. Gracias i que Dios je ra. Siquio que mbuchao chao ee cote ra. —Ã mbichae jëu. Serete chõ ã nde, i que Jesús ñee ee ra. ²³ Vino mbeisa que esirõ cote no nda. Gracias i que Dios je ra. Mondo que uchimbaaquiatu oo cote ra. Mbei mbei ja que cote ra. ²⁴ Jesús que ñee ee ra. —Seruqui chõ ã nde. Mbia icuã mbutiã sacua ño seruqui re. Dios cheẽ yasu rui si chõ seruqui riqui nguia mbia icuã mbutiã ã. ²⁵ Tacheẽ nyecua jëje. Vino mo nda ambei eã mbei cote. Paba mbia rerecua tuchi mose, aque mose ramo nguia nda ambei nguia cote, i que Jesús ñee nda.

Jesús aicuayãte resẽ, ichõiño nda Pedro serĩ, i Jesús

²⁶ Frasei rasei que cote ra. Nyoĩ que ibi ibate mo cote ra. Monte de los Olivos, i que hue ibi je ra. ²⁷ Jesús que ñee uchimbaaquiatu je huee ra. —Jëireĩte ra eriqui serĩ. Jeñimboseĩ mboseĩ nda oso serecha. Sã embesa ji riqui ñee no: “Mbia ra oveja raarõsa iquia. Ovejas ra ñimboseĩ nyoĩ cote”, sã embesa ji riqui i no. ²⁸ Seraaque quera sire ra aso se rane jendaarõ Galilea, i que Jesús ee ra. ²⁹ Pedro que ñee ee ra. —Seataque ra ireĩ ireĩte raque ndesi. Se quia ra aireĩ ireiã mbei ndesi, i rei que Pedro ñee ee ra. ³⁰ Jesús que ñee ee ra. —Tacheẽ nyecua ndeje. Nguira cheẽ nyeremo nonde ra erecheẽ ñooño tres veces serĩ namo, Pedro. “Jesús aicuayãte resẽ”, ere chooño ño nda serĩ, i que Jesús ñee ee ra. ³¹ Pedro que ñee ee ra. —Mbia ra sei quia arõte raque nderĩ, acheẽ ñooño eã nda se nderĩ, i rei que Pedro ra. Eĩ ja que ñee nda.

Jesús ñee ngu je

³² Jesús que oso Getsemaní cote ra. Uchi mbaaquiatu rese. —Jengoi rã u aa. Tacheẽ na oso Paba je pe jiri se, i que Jesús ee ra.

³³ Pe quiti jiri que Pedro rerao ra. Jacobo rese. Juan abe no. Eya eã ndasi tuchi que tu ee aque mose ra. ³⁴ Ñee ngue ũquĩ je ra. —Seya eã ndasi tuchi aico co. Seya eã ndasi ra sei quia chee. Jenguchõ na jë aa. Jëtesa tesa bei u aa, i que Jesús ñee ee ra. ³⁵ Jesús que oso pe quiti jiri cote ra. Nyibi que u ngoi ngũiã ndese ñee Dios je ra. —Mbae rasi asaã sereãte, i rei que ñee Dios je ra. ³⁶ —Paba, mbae eresaã ja arõte nde. Ũquĩ ndasi asaã sereãte raque quia co. Ae sebi riqui nae, ũquĩ ndese semingo eã. Ae ndebite riqui nae, ũquĩ ndese quiatu semingo, i que Jesús ñee Dios je ra. ³⁷ Nyebi que u uchimbaaquiatu je cote ra. I que eu uque ja ee cote ra. Ñee ngue Pedro je ra. —Simón, ¿ereque huĩ a re? Ereico areã ñochĩ tesa tesa s e ñee mose Dios je. ³⁸ Jëtesa tesa u. Jengue eã u ñee Dios je. Mbae icuã tã i eã sacua jëje. Jëingo serete raque serese. Mbae icuã nguiatu jembuti mbutite nguia, i que Jesús ee ra. ³⁹ Nyebi si que oso ñee Dios je ra. Hue rĩ si que ñee ee ra. ⁴⁰ Nyebi que u uchimbaaquiatu je cote ra. I sí que u uque ee no nda. Eresa quiatu ngue eshiu shiute nguia. —¿Mañi nda aba ñee nde? i ja tuchi que echimbaaquiatu ra. ⁴¹ Osobe que ñee Dios je pe jiri cote ra. Tres veces que aque cote ra. Uba rei que u ñee uchimbaaquiatu je ra. —Jengue tuchi cote. Jenguenea jëucua cote. Semondo ra mbia icuã je cote. Sei quia sacua. ⁴² Jëhuã cote. Nyao cote. Ae ra semee mbia icuã je, co eru quia semee sacua co cote, i que Jesús uchimbaaquiatu je ra.

Mbia icuã Jesús isi suruchoi

⁴³ Jesús cheẽ mosebe tuchi que Judas ru erea ra. Jesús chimbaaquiatu rei que ae ra. Aque rese que mbia cuaẽ tuchi quia ra. Tiquise abe que ecurucuaẽ nguia ra. Ira jua abe no. Sacerdote rerecua chõ ũquĩ mbucuaẽ nguia reaẽ. Embesasa abe. Amei abe. ⁴⁴ Judas ñee nyecuayã nguiatu quia ũquĩ je nyii reaẽ. —Ae ritii ra asiite nae, aque chõ ñene. Aque jëisi quiatu tuchi serao, i quia equia ee nyii reaẽ. ⁴⁵ Jesús

rīichā ngue esi saludar i ee cote ra. Jesús ritii que esiite ee cote ra. ⁴⁶ Mbia que Jesús isi cuaē ecua cote ra. ⁴⁷ Ūquī mose que Jesús rimba mo uchuuru sirō tiquise ra. Sacerdote rerecua rimba rese que tiquise uru ra. Eisa que echisia ra. ⁴⁸ Jesús que ñee mbia ja je cote ra. —¿Mbaerā jenyu quia tiquise rurucuaē serea co re? Ira jua abe no. Mbae mbuquiachāsa rea rocoī jenyuchī nguia serea co. ⁴⁹ Tenda que amumba mumba beite rei quia jendese Dios chuchua resē. Mbia que ambaaquiātu quiātu bei rei quia huee resē. ¿Mbaerā seisiā nyucua aque mose re? Embesa ji ique sacua ño jēicuā icuā ndiqui nguīā seje ā, i que Jesús ñee ee ra. ⁵⁰ Echimbaaquiātu que nyoi ja chee uchā Jesús recha ra. ⁵¹ Acuanīndu mīi mo ngue oso erui ra. Tiru mīi ngue equereco nyiati ra. Mbia que acuanīndu abe isi rei ra. ⁵² Huīrao que esecha oso uchā nda. Eīrao eā tuchi que oso uchā nda.

Jesús mbia curuchoi mbia rerecua je

⁵³ Mbia que Jesús curuchoi sacerdote rerecua je cote ra. Huee que sacerdote rerecua ja chí ñumunua nda. Embesasa abe. Amei ererecua ja abe no. ⁵⁴ Pedro que embuchurucha rucha oso quia erui ra. Ngasē nyee que sacerdote rerecua itaicuee ra. Hue que ngoi sacerdote rimba mo ndese ra. Nyee que huī huee ra. ⁵⁵ Sacerdote rerecua que chí ja huee ra. Amei mbia rerecua ja abe no. Mbia rerecua ja tuchi. —Jesús nandeiquia, i rei que ñee ñee nyue ra. —¿Mbae i ra aba mbia je Jesús rīicharā nde? i rei que u ñee ñee nyue ra. ⁵⁶ Emo emo ngue ñee icuā icuā ndei Jesús rīi nda. Ucheē ngue etasa tasa tuchi chō nda. ⁵⁷ Mbia mo abe que juā ñee ñooño erīi nda. ⁵⁸ —Jesús cheē ngue urechandu ra. Ñee icuāte que Dios chuchua rīi nda. “Dios chuchua tambocoi mbia chiao. Tres días mose ra Dios chucharā asaā no. Mbia chiao eā nda ūquī cote”, i que urechandu Jesús cheē nda, i que ūquī ñee ñooño Jesús rīi nda. ⁵⁹ Ucheē ngue etasa tasa bei chō nda. ⁶⁰ Sacerdote rerecua que juā ñee Jesús je ra. —¿Echeē nda eresibishorō eā mbei re? ¿Mbae i equia nderīi nde? i que ñee Jesús je ra. ⁶¹ Jesús que ñee eā mbei echeē mose ra. Sacerdote

rerecua que ñeembe ee ra. —¿Dios rucucha nde re? ¿Cristo nde re? i que ñee Jesús je ra. ⁶² Jesús que ñee ee ra. —Ae. Dios rucucha chō se re. Jemae nda serese s e coi mose Dios quirācuā jii. Sechu mose abe ibeishī ndese, i que Jesús ee ra. ⁶³⁻⁶⁴ Sacerdote rerecua que paama i tuchi Jesús cheē mose ra. Huīrao que endoro ndoro chee ra. Ñee ngue ererecua ataque je ra. —Jesús riqui Dios rucucha raā naa co. Jeñandu jate equia ā. Sā mbia mo nandembiirandube eā cote. Nandemae ndei ngue erese re. ¿I jēje re? ¿Mañi nande ra equia re? i que sacerdote rerecua ñee mbia rerecua ataque je ra. —Eicuā tuchi que ra jē. Sā mbia eiquia, i jate que ererecua ñee Jesús rīi nda. ⁶⁵ Mbia que ñinimbu nimbu Jesús ruba rese cote ra. Eresa que echati mbae mo je ra. Ucuā ucua tuchi que erese cote ra. —¿Aba ucua ucua nderese a re? Eicua no, i que equia eresa ati ji je ra. Soldados abe que ucua ucua tuchi eresa rese ra.

Jesús aicuayāte resē, ichōiño Pedro

⁶⁶ Pedro que chímbeyte ngoi itaicuee ra. Nyucuaaque mo ngue tu huee sacerdote rerecua rimba ra. ⁶⁷ Pedro que chí nyee tata jii ee huee ra. —Jesús resenda que nde abe ra, i que nyucuaaque ñee mae mose Pedro rese ra. ⁶⁸ —Tei. Ndecheē aicuayāte, ichōiño ngue Pedro ñee ee ra. Hue si que esi eiquesa quitii cote ra. Usē mose que nguira ñee cote ra. ⁶⁹ Nyucuaaque que maembe erese ra. —Co abe que Jesús resenda ra, i que mbia ataque je ra. ⁷⁰ —Tei. Aicuayāte se, ichōiño ngue Pedro ee no nda. Ae chí huee nae, ūquī mo ngue ñee ee cote ra. —Jesús resenda chō nde abe resē. Galilea jenda chō nde resē, i que ñee Pedro je ra. ⁷¹ Pedro que jurar i tuchi ñee ee ra. —Aicuayā tuchite se resē, i que ñee ñooño si no nda. ⁷² Aque mose tuchi que nguira ñee sí cote ra. Pedro que ndua Jesús cheē ndese cote ra. Sā Jesús ñee ee nyii no. —Nguira cheē nyeremo nonde ra erecheē ñooño tres veces serīi, sā Jesús i ee nyii no. Ūquī ndese que Pedro ndua cote ra. Nyebē nyeseo tuchi nguīā cote.

15

Mbia Jesús curuchoi Pilato je

¹ Nyaashĩ namo mose que sacerdote rerecua ñumunua ja ra. Amei ererecua abe no. Embesasa abe no. Mbia rerecua jate que ñumunua nda. Jesús que echucua suruchoi Pilato je ra. Pilato rei mbia rerecua hue jenda ja. ²—¿Judíos rerecua chõ nde re? i que Pilato ñee ee ra. —Ae. Judios rerecua chõ se re, i que Jesús ee ra. ³ Sacerdote rerecua que ñee ñooño tuchi Jesús rĩ nda. Ñee icuã tuchi que erĩ nda. ⁴—Sã ñee icuã icuãte nderĩ jẽ. ¿Echeẽ nda eresibishorõ eã nde? i que Pilato ñee Jesús je ra. ⁵ Jesús que ñee ãte echeẽ mose ra. Nyebe Pilato nyuruira tuchi nguiã echeẽ eã mose.

Jesús jẽiquia mbucha ira rese, i ererecua

⁶ Pilato que mbia tarõ ji mo mbusẽ mbei quia pascua mose ra. Co mĩi ngue embusẽ mbusẽ mbei quia pascua mose ra. Ae je mbia riqui ñee, “aque embusẽ mondo” i nae, aque chõ ngue embusẽ mbei quia ee ra. ⁷ Barrabás, i que etarõ ji mo je ra. Emo abe que chi huee erese ra. Mbia iquiasa que ñquĩ nda. ⁸ Mbia que ñee ngaẽ Pilato je ra. —Mbia mĩi tarõ ji que erembusẽ mbeite quia, einyere si emo mbusẽ namo, i ja que mbia ñee Pilato je ra. ⁹—¿Judío rerecua ra ambusẽ mondo jẽje Jesús re? i rei que Pilato ra. ¹⁰—Sacerdote rerecua riqui paama i chooñote Jesús je ã, i quiatu que Pilato ndua ndua uchiangui re ra. ¹¹—Sã Pilato Barrabás mbusẽ mondo Jesús renda que re, i tuchi que sacerdotes ñee ja mbia je ra. Nyebe que mbia “Barrabás embusẽ mondo” i chee Pilato je ra. ¹²—¿Mañi ae quia ra Jesucristo je re no? i que Pilato ñee ee ra. ¹³—Embucha ira rese, i ja que mbia ñee ee ra. ¹⁴—¿Mbae icuã esaã nde? i que Pilato ñee ee ra. —¿Embucha ira rese jẽ! i bei bei que mbia ra. ¹⁵—Mbia turã jiri nda seje chã, i chee que Pilato ra. Nyebe Barrabás mbusẽ mondo nguiã. Jesús quiatu que eiruã nua cote ra. —Jembucha iquia ira rese, i que mbia je cote ra.

¹⁶ Soldados que Jesús cuasa curuchoi ererecua chuchúaa ra. Huee que soldados ataque abe ngaẽ ja Jesús mama no nda.

¹⁷ Tiru ireĩ ngue emingue ee cote ra. —Ererecua chõ nde re, ichõiño iquia iquia ee. Nyu ritimeĩ uma ji que emĩi eãquĩ ndese corona nda. ¹⁸—Judío rerecua tuchi chõ nde re, ichõiño ngue iquia iquia ee ra. ¹⁹ Ira que euru uru eãquĩ ndese ra. Ñinimbu nimbu abe que erese no nda. Ngoi ngoi que ngũiã ndese erimba raã naa ee ra. ²⁰ I quia iquia tuchi que eu ee ra. Aquere que tiru ireĩ mbui esi cote ra. Eiraote que emingue ee cote ra. Curuchoi que embucha nonde ira rese cote ra.

Mbia Jesús mbucha ira rese

²¹ I rei que emo u quia uco si ra. Simón, i que ee ra. Cirene jenda mo ngue ae ra. Alejandro ru que ra. Rufo ru abe no. Aque que soldados isi ira mbuchicuandasa ji rerao sacua ee ra. Cruz, i equia ee. Nguerao que cote ra. ²² Ngasẽ ngue pee cote ra. Gólgota, i que hue je ra. Eresa cuare, i chõ nguiã hue je. ²³ Huee que vino mondo rei Jesús je ra. Mirra je emumbarai. Mbei eã ngue ra. ²⁴ Soldados que Jesús mbucha ira rese ra. Aquere que sita ñetẽ mbaba mbaba o je cote ra. —Aba ra Jesús irao querao ñi ja, i que nyue ra. ²⁵ Tenda chui ite ramo mose que embucha ira rese ra. ²⁶ Mbia que letrero mĩi Jesús ãquĩ nguiti ibate ra. JESUS REI JUDIO RERECUA i que embesa mĩi nda. Ñquĩ ñi ño eriqui nguiã eiquia hue. ²⁷ Mbia nyeremo abe que embucha ira rese Jesús chabe ra. Jesús rereco chobei que emĩi ira rese ra. Mbae mbuquiachãsa tuchi que ñquĩ nda. ²⁸ Embesa ji cheẽ nguire que Jesús iquia mbia icuã ndese cote ra. Sã embesa ji riqui ñee no: “Mbia icuã ndese ra eiquia, sã embesa ji i ñee nyii no. ²⁹ Mbia que iquia iquia quia Jesús cheẽ naa naa ecuã mose ra. Ñee icuã icuã ee. —“Dios chuchua ra ambucoi. Tres días mose ra ambuchuruambe” ere que equia. ³⁰ Equiche u nde ae hue si no, i tuchi que mbia quia iquia iquia ee ecuã mose ra. ³¹ Sacerdote rerecua abe que iquia iquia chõ nguia ee ra. Embesasa abe no. Ñquĩ ngue ñee icuã icuã ja quia erĩ nda. —Mbia que embuquera quera rei nyii ra. Ae sí quera aroneate nguiã aque. ³² Judío rerecua mose ae, sã ae ae nguichi ira si. Cristo mose ae, sã ae ae nguichi no.

f nda uremae erese. f nda ureicua cote, i ja que ererecua ñee icuã icuã erĩ nda.

Jesús mano mose cote

³³ Tenda nandeite re mose que itondaru tu ra. Itondaru bei que mbia ja je tres horas ra. ³⁴ Tenda cheseco mose que Jesús ñeemombo cote ra. —Eloi, Eloi, ¿lama sabactani? i que ñee mombo ra. —Dios sererecua, ¿mbaerã ereico hui sesi re? i chõ ngue ñee nguiã. ³⁵ —Elías je eriqui “quiatuchu” i reae, i rei que echeẽ andusa mo nda. ³⁶ Emo ngue esponja monde vinagre ye ra. Ira ai rese que embia ji mondo rei Jesús chúruu cote ra. —Esecha rei. Sã Elías ruãt e quia erea, i que emo ñee ee ra. ³⁷ Jesús que tasẽ mano mbei cote ra. ³⁸ Aque mosechi tuchi que cortina nyisia Dios chuchua jenda ra. Ibate si que eru nyisia íbii ra. ³⁹ Soldado rerecua que chĩ Jesús nonde mae erese ra. Emano ndese que eñi mae nda. —Dios riirĩ ño eriqui re, i que cote ra.

⁴⁰ Cuña ngue chi jate ma e Jesús rese isho ra. María Magdalena abe que chĩ huee ra. Salomé abe no. María abe no. María rei José si. Jacobo Ñetẽ si abe no. ⁴¹ Ũquí ngu e siqui bei quia Jesús rui ra. Echĩurã ngue emii mii mbei quia ee ra. Galiléaa eico mose bei. Cuña tubĩriãte abe que chi mae Jesús mbuchai rese huee ra. Ae nyoĩ Jesús rese Jerusalén, ũquí.

Mbia Jesús raaque chati cote

⁴² Tenda que oso cote ra. Sábado nonde. Aque mose bei que mbia riqui mbae mbuquiche ja sábado sacua nda. ⁴³ Aque eresaitõ mose que José si ñee Pilato je ra. Judío turã ngue ae ra. Arimatea jenda que ae ra. Judío rerecua que ae no nda. —Dios ra ererecua, i beite que equia eraarõ arõ nda. Aque que ireĩ ireĩ ãte oso ñee Pilato je ra. —Jesús raaque emee na seje, i que oso ñee ee ra. ⁴⁴ —¿Mano jei tuchi ere? i tuchi que Pilato uchiangui re ra. —Quiatuchu rã sembiirandu. ¿Jesús mano cote re? i que Pilato ñee soldado rerecua je ra. ⁴⁵ —Mano ngue cote ra, i que soldado rerecua ñee ee ra. Nyebe Pilato eraaque mondonguiã José je cote. ⁴⁶ José que Jesús raaque mbuquichi cote ra. Tirushĩ turã mo

ngue eisi ra. Eraaque que echuma aque je cote ra. Iti que echoĩ sita ribicoĩ ji imi ye ra. Nyati que sita cuasu mo je cote ra. ⁴⁷ María Magdalena ngu e mae mi eati rese ra. María rese. José si que ae ra.

16

Jesús raaque quera si

¹ Jesús raaque ati ji que chibe sábado mose ra. f nyaashĩ oso quia domingo mose, aque mose que cuña mo nyoĩ mae eatisa rese ra. María Magdalena. Salomé abe no. María abe no. Jacobo si rei ae. Ũquí ja que aba mbushĩmbusa isi rei eichusẽ chusẽ sacua Jesús raaque rese ra. ² Tenda nyui ramo mose que echoĩ eatísaa ra. ³ —¿Aba ra sita curuba nande je eatiquia re? i rei que echoĩ quia ñee ñee nyue ra. ⁴ f que sita rurubai u ee cote ra. Sita cuasute quiatu ngue re. ⁵ f que rei que echoĩ sita imi ye ra. Acuanĩndu mo ngue chĩ ngoi huee equiatocuti quiti ra. Huĩraoshĩ oco tuchi que ecunui huee ra. Cuña ngue siquiche tuchi ra. ⁶ Acuanĩndu que ñee ee ra. —¿Mbaerã jẽingo siquiche re? Jesús raaque jẽsequia raque quia ã. Emoate a resẽ. Eraaque que quera si no. Jemae eatisa rese ae. ⁷ Jẽso asi rã echĩmbaaquiato mbiirandu erese. Pedro abe jembiirandu. “Jenonde ra esi Galilea. Jemae nda erese huee. Sã ñee jẽje nyii no”, jenyẽ embiirandu, i que acuanĩndu ee ra. ⁸ Cuña ngue siquichete echeẽ andu ra. Uchã ngue echoĩ eatisa si ra. Ñee eã tuchi que mbia mo je ra. Esiquichete quiatu ngue re.

Jesús nyecua María Magdalena je

⁹ Jesús que quera si nyaashĩ namo mose domingo mose ra. María Magdalena nane je que nyecua ra. Aque si chõ eriqui siete aba checuayã icuã jea nyii reaẽ. ¹⁰ Ae que oso Jesús quiato mbiirandu ja cote ra. Ngasẽ mose ee que echĩ nyeseo jate eya eã ee ra. ¹¹ —Jesús que quera si ra. Amae ngue erese ra, i rei que embiirandu ra. Quera aroneate que ũquí je ra.

Jesús nyecua uquiato nyeremo je

¹² Aquere que nyecua uquiato nyeremo je ra. fshote que sucha tubĩriã si ra. Emo na tuchi que ee ra. ¹³ —Jesús que quera si

nyecua ure je ra, i rei que echoi uataque mbiirandu ra. Quera aroneate que ee no nda.

Jesús uchimbaaquiatu mondo mbia mbiirandu

¹⁴ Aquere que Jesús nyecua uchimbaaquiatu ja je no nda. Once je. Ñquĩ quiaru mose que nyecua ee ra. Ñee asi asi que ee ra. — ¿Mbaerã jeñia átãte riqui re? ¿Mbaerã “nyia” jenye eã jembiirandu mose sequera rese re? i que ñee ee ra. ¹⁵ —Jẽso secheẽ nenei nenei mbia ja je. Mbia mangue chooñoa jenda ja je. ¹⁶ Mbia mo nda seicua icua. Ñquĩ je bautizar jenye. Ñquĩ nda siqui bei cote. Ae ra seicuayã, ñquĩ nda mbae rasi saã mbei. ¹⁷ Seicuasa ra mbia mae sayã saã saã tuchi. Aba checuayã icuã nda ejea jea mbia si seriĩ. Mbia cheemo nda esaã. ¹⁸ Mbei ra eisi isi o je. Aba iquiasa mbei mose ra erasiã. O ra echono ñono erasi arõ embucherõ sacuã, i que Jesús uchimbaaquiatu mondo ra.

Jesús nyui oso ibate

¹⁹ Jesús ñee ja mose que Dios equerao ibate cote ra. Siqui bei sacuã Dios jii cote. ²⁰ Echimbaaquiatu que nyoi Dios cheẽ nenei nenei mbia ja je ra. Mangue chooñoa jenda ja je. Dios que siqui tuchi quia erese ra. Mbia mae sayã tuchi que esaã saã nguia ra. Mbia Dios cheẽ icua sacuã. Amén.

EL SANTO EVANGELIO SEGÚN SAN LUCAS

Lucas ucheẽ mbesa Teófilo je

¹ Jesucristo que mbae saã saã tuchi quia huico mose íbii ra. Mbia atate que echisaã mbesa mbesa rei ra. ² Mae ndei equia erese nyii. Dios cheẽ esenei senei mbei rei quia nyii. Jesucristo chisaã ndese que urembiirandu cote ra. ³ Se abe que airandu tuchi cote ra. Ae esaã saã nguia nyii nae, aque mosenda bei rese que airandu cote ra. Se abe ùquĩ tambesa ja ndeje, Teófilo. Tasenei turã ja embuchiabiã ndeje. ⁴ Ae rese ereirandu randu nae, ùquĩ ereicua tuchi sacua ño aico nguia embesa mbesa ndeje. Eĩ nda “ae bei” ere chõ nguia Jesucristo chisaã saã je.

“Juan el Bautista ra nyecua u mbia je”, i que ángel mo nda

⁵ Zacarías, i que emo je ra. Sacerdote que ae ra. Herodes que siqui Judea mbia rerecuarã aque mose ra. Abías resenda rei Zacarías. Aarón ndiirĩ nducucha rei Zacarías. Eninisi abe rei Aarón ndiirĩ nducucha no. Elisabet, i que eninisi je ra. ⁶ Zacarías turãte que eriqui Dios je ra. Ngüinisi rese. Ùquĩ ngue Dios cheẽ mumbayã mbei quia ra. Eicuãte, i aroneãte que mbia mo nguia eriĩ nda. ⁷ Eriiriã mbei que eriqui ra. Tiiriã je rei Elisabet. Ari chee. Zacarías abe que ameite chee ra.

⁸⁻⁹ Sacerdotes que nyuuru uru beite quia querabe mbae raã naa Dios chuchúaa ra. Nyebe que Zacarías abe riqui mbae raã naa Dios chuchúaa emo mose ra. Zacarías que oso ique tuchi Dios chuchua ra. Mbae mo ndei sacua embushimbu. ¹⁰ Zacarías que mbae shimbu sei cote ra. Mbia cuabẽ ngue chi ja taicuee ñee ñee Dios je ra. ¹¹ Angel ibatenda mo ngue tu nyecua Zacarías je cote ra. Chĩ ngue juã mbae shimbu reisa ji ee ra. ¹² Zacarías mae mose ángel rese, siquiche tuchi que ra. ¹³ Angel que ñee Zacarías je cote ra. —¿Mbaerã ereico siquiche re? Dios que ndecheẽ ñandu ra.

Elisabet nda tiirĩ ndeje cote. Juan, ere nderiirĩ je nyaacuquia mose. ¹⁴ Ndeyate ra cote. Nderiirĩ nyaacuquia mose ra mbia ia tuchi cote. ¹⁵ Nderiirĩ nda mbae turã saã saã tuchi quia Dios je. Mbaeri rasi mo nda embei eã tuchi. Espíritu Turã nda siqui tuchi erese. Esi rie ye ereco mose bei. ¹⁶ Nderiirĩ nda mbia Israel jenda mbuchebi ja Dios je. Dios ra ùquĩ nderecuarã. ¹⁷ Nderiirĩ nda mbae mbuquiche ja Cristo tu nonde. Sã Dios Elías mbuquirãcuã no, eĩ si ra Dios uquirãcuã mee nderiirĩ je. Nderiirĩ nda mbia mbuturã turã nyiese. Eru mbuturã turã nguiirĩ ndese. Eriirĩ mbuturã turã ngu rese no. Nderiirĩ nda aba cheẽ mumbasa mbaaquiato quiatu. Aba cheẽ mumbayã sacua cote. Nderiirĩ nda mbia mbuquiche ja Cristo tu nonde, i que ibatenda ñee Zacarías je ra. ¹⁸ Zacarías que ñee ángel je ra. —¿Mañi nda ùqui nde? ¿Ndecheẽ nda ique seje re? ¿Manyae ra eicua re? Ameite se. Seninisi abe arite, i que Zacarías ee ra. ¹⁹ Angel que ñee Zacarías je ra. —Se rei Gabriel. Dios rimba chõ aico co. Dios quia semondo rei nguia ñee turã sacua ndeje. ²⁰ “Nyia” ere eã ñochĩ secheẽ je. Nyebe ra ndeisyã. Ndecheẽ ngüiã nda eno. Nderiirĩ nda nyaacuquia chee. Nderiirĩ nyaacuquia mose ra erecheẽ nyecua cote. Secheẽ nda io ja ndeje cote, i que ángel Zacarías je ra. ²¹ Mbia que chi bei taicuee huee ra. Zacarías raarõ arõ. —¿Mbaerã Zacarías riqui itõ tuchite Dios chuchúaa re? i que mbia ñee jate ra. ²² Zacarías que usẽ nyee ra. Echeẽ ngüiã. O que emumbate mbate chõ nguia mbia je ra. —Zacarías mbae mo tea cuu Dios chuchua reae, i que mbia ñee ñee nyue ra. ²³ Zacarías que umbae tarea saã ja Dios chuchúaa ra. Tenda nongue mose. Emo ngue tu euru cote ra. Zacarías que oso uchuchua cote ra.

²⁴ Aquere qu Eya uchi que cote ra. Eninisi que useã mbei tuchia si cinco meses ra. ²⁵ —Dios seriirina meeñi seje cote. Mbia ra iquia iquia eã seje cote, i que Elisabet ra.

“Dios riirĩ nda nyecua u mbia je”, i que ángel mo nda

²⁶ Nyasi nongue mose que Dios ibatenda mondo mbia mo je ra. Gabriel, i que aque ángel je ra. Aque que emondo sucha

Nazaret ra. Galilea, i que aque ibi je ra. ²⁷—Eso rã ñee nyucuaaque María je, i que Dios ángel mondo ra. Emo ngue siquíã tuchi María rese ra. Eruã mbei. José ninisibi rei María. José siquíã ndaque erese. David riirĩ nducucha rei José. ²⁸ Angel que ique María ch María chuchua cote ra. —Acheẽ ngue u ndeje ra. Dios turã tuchi riqui ndeje co. Ndua bei nderese. Dios ia tuchite nderese acuanĩ mo si, i que ángel María je ra. ²⁹ María mae mose ibatenda rese que ñee uchiangui re ra. —¿Mbaerã eru quia serea co re? ¿Mbaerã eru quia ñee seje co re? i que María uchiangui re ra. ³⁰ Angel que ñeembe ee ra. —María, siquichechĩ nda sesi re. Dios turã tuchi riqui ndeje co. ³¹ Dios cheẽ turã ngue asenei u ndeje ra. Nanimbae ra nde cote. Nderiirina nda eretea cote. Jesús, ere nderiirĩ je. ³² Nderiirĩ quirãcuã tuchi rae. Dios quirãcuã ndiirĩ nda erereco. Mbia rerecua tuchi ra ae. Sã David riqui mbia rerecua nyii no, eĩ nda nderiirĩ mbia rerecua tuchi cote. ³³ Nderiirĩ nda judíos rerecua bei cote. Ua eã mbei rae, i que ángel ñee María je ra.

³⁴ María que ñee ángel je ra. —¿Mañi nda serío re? Seru eãte nyeresẽ, i que María ee ra. ³⁵ Angel que ñee María je ra. —Espíritu Turã ae ra Dios riirĩ mondo nderie ye. Espíritu Turã nda ndereaquiato bei quia. Dios quirãcuã nda siqui bei nderese. Nyebe ra Dios mbaerã tuchi nderiirĩ. Dios rucucha, i ra nderiirĩ je. ³⁶ Ndesi nongue ndiirĩ abe ra tiirĩ cote. Elisabet, i equia ee nae, aque abe ra tiirĩ. Arite raque. Erie cuasu cote. Tiirĩ mbae, i mbia quia ee nyii nae, aque ra tiirĩ cote. ³⁷ Dios quiarei mbae ao ja, i que ángel ñee María je ra. ³⁸ María que ñee ee ra. —Dios rimba chõ aico nguiã co. Sã ndecheẽ ique quia seje, i que María ra. Angel que oso erecha cote ra.

María oso Elisabet ndea

³⁹ María que oso Elisabet ndea cote ra. Ñeenda ishote que ee ra. Sita ibate bate rĩ ngue esi quia ra. Judea, i hue ibi je. ⁴⁰ María que ngasẽ Elisabet ndu chuchúaa ra. Zacarías, i equia eru je. Ique que ñee Elisabet je ra. ⁴¹ Elisabet María cheẽ andu

mose, erie yenda que umi nda. Espíritu Turã ngue ique tuchi Elisabet chiangui re cote ra. ⁴² Elisabet que ñee nyecua tuchi María je ra. —Nde rese chõ Dios ia tuchi acuanĩ mo si re. Dios ia tuchi nderie yenda rese abe no. ⁴³ ¿Mbaerã Cristo si ru serea se re? Mbia rerecua eã ño se resẽ. ⁴⁴ Se ndecheẽ andu mose que serie yenda ia tuchi umi nda. ⁴⁵ Dios cheẽ ngue ereisi turã nda. Nyebe Dios iate riqui nderese co. Nyebe ra Dios cheẽ ique tuchi ndeje cote, i que Elisabet ñee María je ra. ⁴⁶ María que ñee cote ra. Acheẽ turã mbei quia Dios rĩ co.

⁴⁷ Seya bei riqui Dios rese co.

Ae que serirõ mbae icuã si ra.

⁴⁸ Dios que nduate quia serese ra.

Seaquiatuã ndaque.

Nyebe ra mbia ia jate serese cote. ⁴⁹ Dios quirãcuã ngue mbae turã saã tuchi seje ra.

Ae mii ño eturã tuchi emo si re.

⁵⁰ Ae ndua turã nguia Dios rese nae, ñquĩ ndese chõ Dios ia eã tuchi riqui nguiã.

Eĩ mbei chõ Dios nguiã mbia je co.

⁵¹ Dios quirãcuã ngue mbae saã ja ra.

Ucuasu raã naasa chõ Dios mboseĩ nguiã.

⁵² Siqui mingue je chõ Dios mii mii nguiã mbia rerecuarã.

Ae ererecua uaquiato saã saã nguia nae, ñquĩ ño Dios sirõ nguiã.

Ererecua eã ño ñquĩ cote re.

⁵³ Dios que mbae mee mee nguia mbaecharã je ra.

Mbaecha quia emboochi nguiã.

⁵⁴ Dios que siqui tuchi judíos rese ra.

Tesareiã mbei esi.

Eyayã mbei erese no. ⁵⁵ Sã Dios ñee Abraham je no, ñquĩ ngue embuchebiã mbei ra.

Ae ucheẽ mondo judíos jaje nae, ñquĩ ngue embuchebiã mbei no nda,

i que María ñee turã Dios rĩ nda. ⁵⁶ María que siqui arete Elisabet rese ra. Tres meses. Aquere que eru nyebi uchuchúaa cote ra.

Juan el Bautista nyaacuquia

⁵⁷ Elisabet rasi rasite que cote ra. Nyaa cuquia que cote ra. ⁵⁸ Mbia que nyoĩ ja Elisabet ndea cote ra. Ejii jenda. Eresenda

ja. —Dios turã tuchi riqui ndeje co. Ñaquẽ mondo ndeje, i ja que ee ra. Eya ja tuchi que erese ra. ⁵⁹ Ocho días mose que circuncisión naa eriirĩ je ra. Zacarías, i nda mbia eriirĩ je chã nde. Eru rã si. ⁶⁰ Esi quia que ñee nda. —Tei. Juan nande chõ ee, i que esi ra. ⁶¹ Mbia que ñee esi je ra. —¿Mbaerã nda “Juan” ere nderiirĩ je re? Juan mo eã nderesenda mo aa resẽ, i rei que mbia esi je ra. ⁶² Mbia que o mbaaba aba Zacarías je ra. —¿Mañi nda nderiirĩ je re? i ee. ⁶³ Zacarías que ñomee mbia je ra. Nyebe mbia embesa sacua mee nguiã ee. — Juan, i chõ seriirĩ je, i que Zacarías embesa ra. Mbia que nyuruira ja u mae erese ra. ⁶⁴ Aque ruibe que Zacarías ñee aquiatu cote ra. Ñee turã tuchi que equia Dios rĩ cote ra. ⁶⁵ Zacarías cheẽ andure que mbia nyuruira jate ndua ndua hue jenda ra. Nyebe mbia ñimbiirandu ja nguiã sita ibate bate jenda. Judea, i que hue ibi je ra. ⁶⁶ Ae jirandu quia erese, ñquĩ ngue ndua tuchi quia erese ra. —Mañi nda Zacarías riirĩ nguia reae. Nandemae nguia erese no, i que mbia quia ndua ndua ra. Dios que siqui tuchi Zacarías ndiirĩ ndese ra.

Zacarías ia tuchi ñee Dios je

⁶⁷ Espíritu Turã ngue siqui tuchi Zacarías rese ra. Nyebe Zacarías Dios cheẽ nenei nguiã.

⁶⁸ Sã mbia ñee turã Dios rĩ judíos rerecua rĩ.

Uturã ngue eteacuquia nande je ra.

Nanderirõ ngue mbae icuã si ra.

⁶⁹ Nanderirõ sacua nandeicuã si que Dios mondo nande je ra.

David riirĩ nducucha que nanderirõ sacua nda.

⁷⁰ Sã Dios ñee cose no.

“Mbia rirõ sacua nda ambu íbii”, i cose no.

Ucheẽ nenei neneisa que embuchecua mbia je cote ra.

⁷¹ “Jëucuãyãsa si ra jendirõsa jendeaquiato bei”, i que Dios nande je ra.

⁷²⁻⁷³ Dios turãte que eriqui nandei ñiinda je ra.

Abraham je abe que eturãte riqui ra.

Ae Dios ñee Abraham je nyii nae, echeẽ ngue io cote ra.

⁷⁴ Dios que ñee Abraham je nanderĩ nyii ra.

“Taendeaquiato jëucuãyãsa si, jësiquicheã sacua ico mose serese”, i que Dios nanderĩ cose ra.

⁷⁵ Nyebe ra nandeico turã mbei Dios je.

Ae ra nandemingo bei icue umbaerã.

⁷⁶ Nde ra Ibatenda cheẽ esenei senei nguia mbia je, Ñaquẽ.

Dios riirĩ ndetã nda Dios cheẽ eresenei senei nguia mbia je, Ñaquẽ.

Mbia icoquiato sacua Dios riirĩ je. ⁷⁷ Eĩ mose ra Dios mbia rirõ eicuã si.

Eĩ mose ra Dios mbia icuã mbutiã esi.

⁷⁸ Dios turãte quia eriqui nguiã nande je.

Eriirĩ nda tu ibate si mbae mbuchecua nande je.

⁷⁹ Nandeaquiato mbaaquiato sacua ño eru nguiã aque.

Nandemingo sacua nyaashĩ naanguia chõ eru nguiã aque,

i que Zacarías ñee ñaquẽ je ra. ⁸⁰ Ñaquẽ ngue tiarõ i i oso quia cote ra. Dios rese que eriqui i i cote ra. Siqui bei que equia turúquiaa ra. Dios cheẽ ngue esenei senei nyee mbia je cote ra.

2

Jesús nyaacuquia

¹ Aque mose que ererecua ñee nda. Augusto, i que ee ra. —Censo nandesã na mbia ja je, i que ra. Mbia mbae nombre mbesa mbesa ja mose, “censo” i que ñquĩ je ra.

² Censo raã namo mose rei ñquĩ. Cirenio ngue Siria jenda rerecua aque mose ra.

³ —Jenyusua sua jëso ja pueblo. Nombre mbesa mbesa ja sacua jembae, i que ererecua mbia ja je ra.

⁴ Nyebe José choi nguiã Judea. Belén, i que sucha je ra. Belén ño David chusua re. José i chõ David re.

Nyebe José choi nguiã Belén. Umbae ibi recha. Nazaret recha. Galilea abe recha no. ⁵ José que nyoĩ Belén umbae nombre mĩ sacua nda. María rese. María que eninisibi ra. María riote que ra.

⁶ Siqui mose Belén ngue ñaquẽ ndasi rasite María je ra. ⁷ Aque ramo ngue María nguiirĩ mbua ra. Ñuma ngue tiru je ra. Ticuasú quiarusa ye que eno nda. Mbia chuchua quiato que eitãyãte ee ra.

Oveja raarõsa ngaẽ mae Jesús itãqueĩ ndese

⁸ Hue jii que oveja raarõsa mo nyi isa ra. Ovejas que esaarõ arõ nguia turuquia rĩ nda. ⁹ Angel ibatenda mo ngue tu embua tuchi ra. Dios nininya tuchi que tu overja raarõsa resae ra. Nyebe siquiche tuchi nguia esi. ¹⁰ Angel que ñee ee ra. —¿Mbaerã jësiquichete riqui re? Mbae turã nii ño achu nguia ñee jëje co. Ae ra asenei jëje, mbia mbia sacua tuchi chõ ũquĩ nde. ¹¹ Dios riiĩ ngue nyaacuquia namo Belén nda. Cristo, i equia ee. Mbia rirõsa mbae icua si chõ ae re. ¹² Aque echi ticuas quiarusa ye aque. Ema ji tiru je. Jemae nda erese huee. Jemae mose sechienei ndese, “Cristo chõ eriqui re”, jenyé ra cote, i que ángel ñee oveja raarõsa je ra. ¹³ Angeles tubiriãte que nyecua oveja raarõsa je cote ra. Angel ñiinda ndese. Ñee turã ja que Dios rĩ nda. ¹⁴ Sã mbia ñee turã ja Dios ibatenda rĩ.

Sã Dios uquiato mbia ja ibi jenda, i que ángeles ñee nyecha ee ra. ¹⁵ Angeles que nyoibe ibate cote ra. Oveja raarõsa que ñee ñee nyue cote ra. —Nyaso rã Belén. Ae Dios senei senei nguia nande je nae, nyaso rã mae erese. Ae nyaacuquia namo nae, nyaso rã mae erese, i que oveja raarõsa ñee nyue ra. ¹⁶ Nyoĩ asi tuchi que mae erese ra. Ngasẽ ngue María je ra. José abe je. Áquẽ abe je. I que áquẽ u ticuas quiarusa ye ee ra. ¹⁷ Oveja raarõsa que mbia mbiirandu ja erese ra. Ae ángel senei senei nguia ee María riiĩ nii, ũquĩ ngue oveja raarõsa senei senei tuchi mbia je cote ra. ¹⁸ Eandusa que nyuruira ja tuchi eandu ra. ¹⁹ María que ndua ndua tuchi quia ũquĩ ja rese uchiangui re ra. ²⁰ Oveja raarõsa ia tuchi que nyoĩ nyebi ovejas je ra. Ñee turã turã tuchi que echoi quia Dios rĩ nda. —Angel que ñee nande je, echeẽ ndui si tuchi chõchĩ mbae eĩ ja, i que ñee ñee nyue ra.

Jesús ruruchoi Dios chuchúaa

²¹ Ocho días mose que circuncisión naa áquẽ je cote ra. Jesús, i que áquẽ je cote ra. Angel cheẽ ndui si tuchi chõ “Jesús” ichĩ

áquẽ je. Ae ángel ñee María je erio nonde nae, echeẽ ndui si tuchi chõ “Jesús” ichĩ María riiĩ je. ²² Aquere que María ñimbitirõ Moisés cheẽ ndui si cote ra. Aquere que áquẽ nduruchoi Jerusalén cote ra. Áquẽ mee sacua Dios je. ²³ Embesa ji cheẽ ndui si que áquẽ mee Dios je ra. —Ae eriiĩ i erãcuẽ nae, ũquĩ jemondo tuchi Dios je, i quiatu ngue embesa ji rese re. ²⁴ Jerusalén José riqui mose que sacrificio mee Dios je ra. Embesa ji cheẽ ndui si. Sã embesa ji riqui ñee no: —Nyurusi nyeremo jemee Dios je. Ũquĩ eã mose, nyurusi ñetẽ jemee ee no ae, i que embesa ji cheẽ nda. ²⁵ Amei mo ngue siqui hue Jerusalén nda. Simeón, i que ee ra. Ae que eturã tuchi ra. Ñee mbei que equia Dios je ra. Ae que Dios riiĩ saarõ arõ tuchi quia ra. Judíos mbui sacua mbae icua si. Espiritu Turã abe que siqui Simeón ndese ra. ²⁶ Espiritu Turã nguia ñee ndei Simeón je nyii. —Eremae nda Dios riiĩ ndese. Ndemano nonde ra eretea. Dios ra embu ibii, i que Espiritu Turã ñee Simeón je nyii ra. ²⁷ Espiritu Turã ngue Simeón querao Dios chuchúaa ra. Embesa ji cheẽ ndui si que José áquẽ nduruchoi Dios chuchúaa aque mose si ra. María reses. ²⁸ Simeón ngue áquẽ sui ra. Eya tuchi que erese ra. —¡Co chõ jẽ! i que Simeón ñee turã Dios je ra.

²⁹ Dios, ndecheẽ ngue io seje cote ra.

Seyate aico co cote Sererao se cote.

³⁰ Nderiirĩ ndese que amae cote ra.

³¹ Ae erembu mbia rirõ sacua mbae icua si nae, aque rese aico mae co cote.

³² Mbia resae sacua tuchi chõ nderiirĩ ndiqui re.

Judíos eã abe ra etesae tuchi.

Judíos abe je ra eturã tuchi no,

i que Simeón ñee Dios je ra. ³³ Simeón ñee mose María riiĩ nii, José que nyuruira tuchi echeẽ andu ra. María rese. ³⁴ Simeón ngue ñee turã María je ra. —Nderiirĩ nda judíos tubiriã mingo turã. Ae siqui sereãte quia erese, ũquĩ nguia ra emingo icua. Mbia ra ñee icua icua nguia nderiirĩ turã je. Eicua je rocoĩ. ³⁵ Ae ndua turãte quia nderiirĩ nii nae, ũquĩ ndua ndua turã nda nyecua mbia je cote. Ae ndua ndua icua nguia, ũquĩ ndua ndua abe ra nyecua mbia

je cote no. Mbia icuã nda nemundite nderi-irĩ ndese, i que Simeón María je ra. ³⁶ Huee que arite mo ndiqui ra. Dios cheẽ nenei neneisa que ae ra. Ana, i equia ee. Fanuel, i que eru eiruã siasa je ra. Aser, i que ei ñiinda je ra. Ana yasu mose que ngurã ndea nyii ra. Siete años que eriqui ngu rese nyii ra. ³⁷ Eru eã ngue cote ra. Eru cheecha que siqui beite ra. Ochenta y cuatro años. Dios chuchúaa que eriqui beite ra. Ñee ñee mbei Dios je. Quiaru rocoi. Isa abe. ³⁸ Ana ngue mae ãquẽ Jesús rese Dios chuchua cote ra. —¡Co chõ jê! i tuchi que Dios je ra. Ñee turã tuchi que ãquẽ ñi mbia jaje cote ra. Ae Dios riirĩ saarõ arõ nguia nae, ãquẽ jaje que Ana ñee turã turã ãquẽ ñi nda.

José nyebi Jesús rerao Nazaret

³⁹ José que mbae saã ja embesa ji cheẽ nguire ra. Aquere que echoi nyebi Galiléaa ra. Nazaret, i equia echuchua je. ⁴⁰ María riirĩ ngue tiarõ cote ra. Ñimbaaquiatsu quiatu que equia cote ra. Ñimbirãcuã nacuãte que equia cote ra. Dios turã ngue siqui tuchi quia erese ra.

Jesús ñimbaaquiatsu quiatu Dios chuchúaa

⁴¹ Aque tenda bei que José riqui nyo choi Jerusalén nda. Fiesta de la pascua mose bei. María rese. ⁴² Jesús tiarõ namo mose, doce años mose que echoi si fiesta de la pascua mose no nda. Jerusalén. ⁴³ Fiesta ua mose que ecuaẽ ndei quia nyebi ra. Jesús que siquichõ Jerusalén nda. Jesús abe oso reĩ nguia usi je. Ngu abe je. ⁴⁴ Jerusalén ño eriquichõ neaẽ. Mbia ataque rese eru reĩ nguia esi je. Mbia que ngaẽ ngaẽ bei quia tenda mumba chee ra. —Ma Jesús ñi, i rei que nguesenda je ra. ⁴⁵ Tea eã mbei que ra. Erea eã mose que eru si chee nyebi Jerusalén nda. María rese. Erequia sacua huee cote. ⁴⁶ Tres días mose que erea huee cote ra. Dios chuchúaa que eriqui ee ra. Ñimbaaquiatsu quiatu. Mbia mbaaquiatusa cheẽ andu andu que Jesús riqui ngoi huee ra. —¿Mañi equia re? Tachandu tuchi rã, i i que equia ee ra. ⁴⁷ Jesús cheẽ aracua tuchi que eriqui mbia je ra. Nyebe mbia nyuruira nguia echeẽ aracua andu. ⁴⁸ Eru erea mose huee, ae abe que nyuruira ra.

Esi abe nyuruira no. Esi que ñee ee ra. —¿Mbaerã eresoã urerese re, Echo? Ureya eã tuchi que eriqui nderequia asi asi ra, i que María nguiirĩ je ra. ⁴⁹ Jesús que ñee ee ra. —¿Mbaerã serequia mámbii re? Paba chuchua chõ ngue aico resẽ, i que Jesús usi je ra. ⁵⁰ María que Jesús cheẽ icuayãte ra. José abe echeẽ icuayã no. ⁵¹ Jesús que oso uchuchua erese cote ra. Nazaret, i equia sucha je. Usi cheẽ ngue emumbayã mbei quia ra. Ngu cheẽ ngue emumbayã mbei quia no nda. Esi que ndua ndua bei quia ãquẽ Jesús chisaã ndese ra. ⁵² Jesús rete que siri siri oso quia cote ra. Ñimbaaracua racua que equia no nda. Dios iate que eriqui erese ra. Mbia abe iate que eriqui erese no nda.

3

Juan Dios cheẽ senei senei mbia je

¹⁻² Aquere que Dios ñee Juan je ra. Zacarías riirĩ je. Tiberio siqui bei mose mbia ja rerecuarã. Quince años ereco mose mbia rerecuarã. Poncio Pilato que Judea jenda rerecu a que mose ra. Herodes que Galilea jenda rerecu ra. Felipe que Herodes nongue ra. Felipe que Iturea jenda rerecu ra. Traconite jenda rerecu abe que Felipe no nda. Lisania que Abilinia jenda rerecu ra. Anás que sacerdote rerecu ra. Caifás abe que sacerdote rerecu ra. Ñquẽ ererecu si que mose que Dios ñee Juan je turuquia re ra. ³ Nyebe que Juan Dios cheẽ senei senei nguia mbia je ra. Ama Jordán ndurubinda jaje. Eĩ ño ngue Juan nguia ñee mbia je ra. —Jêhui chõ jêicuã si. Dios jêicuã mbutiã sacua. Ñquẽ mose nda bautizar ae jêje chã, i que Juan nguia ñee mbia ja je ra. ⁴ Isaías chimbesa io sacua ño ngue Juan Dios cheẽ nenei nenei nguia. Isaías chimbesa chõ ã nde: Emo nda ñeemombo mombo quia mbia je turúquiaa.

“Ñeenda nandererecu mbaerã jem- buquiche.

Jêingo quiatu nandererecu tu nonde.

⁵ Ñeenda jembaturã turã nandererecu mbaerã.

Ibi cuaacua jembato mbato.

Ibi ati ati jêsimiambo ambo.

Ñeenda chaa chaa jeñeengo.

Ibi rashĩ ndashĩ jěiti iti.

6 ‘Mbia mingo beisa’, i ja ra mbia ñee Dios je cote”, i ra emo nguia turúquiaa, i que Isaías embesa cose ra. 7 Mbia que nyoĩ nyoĩ ja quia Juan ndea ra. Juan bautizar i sacua ee. Juan ngue ñee ee ra. —Mbei rã ño jěingo nguia. Mbae icua nda jěi jěi mbia je, ¿ũquí si jenyu quia seje co re? 8 Jě mbae icua ndecha mose Dios je, mbae turã jěsaã saã mbei quia ee cote. “Abraham ndiirĩ nducucha chõ nande re. Nyebe ra Dios nandemingo bei” jjenyechĩ nda jě! Dios Abraham ndiirĩ nducucha chao arondete raque sita je. 9 Ira rã si chõ mbia re. Sã ira mo ia eã no. Sã ea eã maña ño no. Sã eréi chõ no. Eĩ serĩ serĩ ño Dios mbia je, mbia mbae turã naa eã mose, i que Juan ñee mbia je ra. 10 —¿Mbae rese ra ureico Dios je re? i que mbia Juan je ra. 11 Juan ngue ñee ee ra. —Ndeirao nyeremo mose, enongue emondo eirao eã je. Ndechĩurã mose, emo emondo mbaecha reã je, i que Juan mbia mbaaquiato quiato ra. 12 Impuestos isi isiquia mo abe que nyoĩ Juan je ra. Juan bautizar i sacua ee. —¿Mbae rese ra ureico ure re? i que ñee Juan je ra. 13 —¿Mbae ra jembatachĩ jě! ¿Cobrar jenyete turã ño jě! Jěicua quiato chõ, i que Juan ee ra. 14 Soldados mo abe que ñee Juan je ra. —¿Mbae rese ra ureico ure re no? i que soldados ñee Juan je ra. Juan ngue ñee ee ra. —¿Mbia mbae ra jěisi chooñochĩ jě! “Co que mbae icua saã nda” jjenyete chooñochĩ nda emo je jě! Jembae ae chõ jendeco, i que Juan ñee soldados je ra. 15 Mbia que mae quiato quiato quia Juan ndese ra. —Cristo chõ co reae, i raque mae quiato quiato erese. 16 Juan ngue ñee mbia jaje ra. —I achõ je chõ aico nguia bautizar i mbia je co. Co chi emo ndu quia serui co. Ae quia equirãcuã tuchi sesi re. Ae quia eturã tuchi sesi re. Ae quia ra bautizar i mbia je Espíritu Turã je. Mbia chiã mbitirõ sacua. Sã tata riqui mbae mbitirõ no. 17 Ae ra mbia umbae mũ icúe. Eturã achõ ño embae re. Ae embae eã nae, ũquí nda esei cote. Ũquí ndeisa ra ua eã mbei tata. Sã mbia quiata a chiqui chiqui no. Sã ea mũ icúe no. Sã echuruique mombo tátaa no, i que Juan ñee mbia je ra.

18 Eĩ ngue Juan nguia Dios cheẽ turã nenei nenei mbia je ra. Mbia mbaaquiato tuchi.

19 Ererecua Herodes je que Juan ñee nyee ra. Felipe ninisi rese siqui mose. —¿Mbaerã ereico ndenongue ninisi rese re? i que Juan ererecua je ra. —Mbae icua eresaã saã ja techĩ nguia re, i tuchi que Juan ee ra. 20 Ererecua que Juan ñee mumba bei chõ nda. Ererecua que Juan tarõ nyee cárcel nda.

Juan bautizar i Jesús je

21 Juan bautizar i mose mbia jaje, Jesús je abe que bautizar i ra. Jesús que ñee ñee nguia ngu je ra. Ibei que obo ee ra. 22 Espíritu Turã ngue nguichi Jesús rese ra. Nyurusi rã ño nguichi checua erese. Ibatenda que ñee ee ra. —Serĩrĩ ño nde re. Sechesequa chõ nde re. Seyate nderese, i que Ibatenda Jesús je ra.

Mbia ñiinda Jesús i

23 Jesús treinta años mose que mbia mbaaquiato quiato ramo nda. —José riirĩ, i ja que mbia Jesús je ra. Elí riirĩ nguia José re. 24 Elí rei Matat ndiirĩ. Matat ndei Leví riirĩ. Leví rei Melqui riirĩ. Melqui rei Jana ndiirĩ. Jana ndei José riirĩ. 25 José rei Matatías riirĩ. Matatías rei Amós ndiirĩ. Amós ndei Nahum ndiirĩ. Nahum ndei Esli riirĩ. Esli rei Nagai riirĩ. 26 Nagai rei Maat ndiirĩ. Maat ndei Matatías riirĩ. Matatías rei Semei ndiirĩ. Semei ndei José riirĩ. José rei Judá riirĩ. 27 Judá rei Joana ndiirĩ. Joana ndei Resa riirĩ. Resa rei Zorobabel riirĩ. Zorobabel rei Salatiel riirĩ. Salatiel rei Neri riirĩ. 28 Neri rei Melqui riirĩ. Melqui rei Adi riirĩ. Adi rei Cosam ndiirĩ. Cosam ndei Elmodam ndiirĩ. Elmodam ndei Er riirĩ. 29 Er rei Josué riirĩ. Josué rei Eliezer riirĩ. Eliezer rei Jorim ndiirĩ. Jorim ndei Matat riirĩ. 30 Matat rei Leví riirĩ. Leví rei Simeón ndiirĩ. Simeón ndei Judá riirĩ. Judá rei José riirĩ. José rei Jonán ndiirĩ. Jonán ndei Eliaquim ndiirĩ. 31 Eliaquim ndei Melea riirĩ. Melea rei Mainán ndiirĩ. Mainán ndei Matata riirĩ. Matata rei Natán ndiirĩ. 32 Natán ndei David riirĩ. David rei Isaí riirĩ. Isaí rei Obed riirĩ. Obed rei Booz riirĩ. Booz rei Salmón ndiirĩ. Salmón ndei Naasón ndiirĩ. 33 Naasón ndei Aminadab riirĩ. Aminadab rei Aram ndiirĩ. Aram ndei Esrom ndiirĩ. Esrom ndei Fares riirĩ. Fares rei Judá riirĩ. 34 Judá rei Jacob riirĩ. Jacob

rei Isaac riiĩ. Isaac rei Abraham ndiĩ. Abraham ndei Taré riiĩ. Taré rei Nacor riiĩ. ³⁵ Nacor rei Serug riiĩ. Serug rei Ragau riiĩ. Ragau rei Peleg riiĩ. Peleg rei Heber riiĩ. Heber rei Sala riiĩ. ³⁶ Sala rei Cainán ndiĩ. Cainán ndei Arfaxad riiĩ. Arfaxad rei Sem ndiĩ. Sem ndei Noé riiĩ. Noé rei Lamec ndiĩ. ³⁷ Lamec ndei Matusalén ndiĩ. Matusalén ndei Enoc ndiĩ. Enoc ndei Jared riiĩ. Jared rei Mahalaleel riiĩ. Mahalaleel rei Cainán ndiĩ. ³⁸ Cainán ndei Enós ndiĩ. Enós ndei Set riiĩ. Set rei Adán ndiĩ. Adán ndei Dios riiĩ.

4

Satanás tã i Jesús je

¹ Jesús que nyebi Ama Jordán si ra. Espíritu Turã ngue siqui tuchi quia erese ra. Turúquiaa que Espíritu Turã Jesús rerao ra. ² Huee que eriqui arete ra. Cuarenta días. Mbae mo ngue eu eã mbei aque mose ra. Eriãcuãte que cote ra. —Tã tae rã Jesús je. Ma Jesús mbae icuã naa, i rei que diablo Jesús rĩ nda. ³ —Nde Dios riiĩ mose, mbichae esaã co sita je no, i rei que diablo Jesús je ra. ⁴ Jesús que ñee ee ra. —Tei. Eĩ ngue embesa ji ñee nda: “Mbia chiu achõ nda mbia mingo eã. Dios cheẽ nguia ra mbia mingo nguĩã”, i que embesa ji ra, i que Jesús diablo je ra. ⁵ Aquere que diablo Jesús rerao ibi ibate mo nda. Ibate tuchi. Diablo que ibi teacuquia ja Jesús je ra. Ishonda abe reacuquia ja ee. Aque mose bei que ereacuquia ja ee ra. ⁶⁻⁷ Diablo que ñee Jesús je ra. —Sembae ja chõ ibi re. Se emondose mose emo je, amondo ra ee. Tamondo tuchi ndeje. Mbia ja rerecuarã nda aremĩ. Ndeico mose serese, tamondo ja ndeje. Serimbarã mose nde, tamondo ja ndeje no, i rei que diablo ñee Jesús je ra. ⁸ Jesús que ñee diablo je ra. —Quiatúae sesi ae, Satanás. ¿Mañi nda nderimba se re? “Dios ae rese chõ jẽingo”, i que embesa ji ñee ndesẽ, i que Jesús diablo je ra. ⁹ Aquere que diablo Jesús rerao Jerusalén nda. Querao que suruchui ibate Dios chuchua arõ nda. Ibate tuchi echuchua. —Nde Dios riiĩ mose, eo oso íbii. Dios ra ndereaquiato. Eremanoã nda oso ngoi. ¹⁰ Sã embesa ji riqui ñee no: Dios ra ángeles mondo ndereaquiato sacuã. ¹¹ Oje ra ndeisi. Nembuquichi mingue rae.

Sita ra cua iã ndei je, i que embesa ji ra, i rei que diablo Jesús je ra. ¹² Jesús que ñee diablo je ra. —Sã embesa ji ñee no: “ ‘Ma Dios sereaquiato. Tã tae ee no’, jenyechĩ nda Dios je”, i ñi Dios cheẽ nde, i que Jesús ñee diablo je ra. ¹³ Diablo Jesús mbiicua aronea mose, secha chee que oso ra. —Emo mose jiri ra tã aebe ndeje jẽ, i rei que uchiangui re ra.

Jesús mbia mbaaquiato quiato ramo

¹⁴ Jesús que oso nyebi Galiléaa cote ra. Espíritu Turã quirãcuã ngue siqui tuchi quia erese ra. Mbia hue jenda ja que jirandu ja tuchi quia erese ra. ¹⁵ Judíos chumunuásaa que Jesús riqui mbia mbaaquiato quiato ra. Mbia que ñee turã ja quia erĩ nda.

Nazaret jenda Jesús isiteã

¹⁶ Jesús que ngasẽ Nazaret cote ra. Hue rei etiarõsa hue. Sábado mose que esi judíos chumunuásaa ra. Sábado mose bei que eriqui oso oso huee ra. Juã ngue embesa ji renei nonde mbia je ra. ¹⁷ Mbia que Isaías chimbesa mondo Jesús oo ra. Isaías chimbesa que eequia cote ra. ã embesa ji que esaã saã mbia je ra: ¹⁸ Espíritu Turã ndiqui tuchi serese co. Dios que sererecúe ra. Echeẽ turã nenei nenei sacuã mbaecha reã je. Etarõi mbusẽ sacuã ño ngue Dios sererecúe ra. Eresayã ndesa ira sacuã ño ngue sererecúe no nda. Ae je ererecua icuãte riqui nae, ñquĩ mbusẽ sacuã ño ngue Dios sererecúe nguĩã no. ¹⁹ Mbia je ñee ñee sacuã ngue Dios sererecúe no nda. “Namo ño Dios turã ndiqui nguĩã”, i sacuã mbia je, i que Jesús embesa ji mbuchecua mbia je ra. ²⁰ Jesús que embesa ji mumbi cote ra. Mondo que emo oo cote ra. Ngoi que cote ra. Mbia que mae mbei quia erese ra. ²¹ Jesús que ñee mbia je ra. —Embesa ji que ambuchecua jẽje namo, aque io quia jẽje a cote, i que Jesús mbia je ra. ²² Mbia que ñee turã ja quia Jesús rĩ nda. —Jesús cheẽ turã tuchi quia eriqui re, i ja tuchi que mbia

nyuruira ra. —¿José riirĩ ño co re? i que mbia quia ee ra. ²³ Jesús que ñee mbia je ra. —“Mbia mae sayã ngue eresaã saã Capernaum nae, ùquĩ mo esaã aa ndechuchúaa no”, jenye arõte seje sechuchúaa. ²⁴ Tacheẽ nyecua rã jêje. Dios cheẽ mbuchecuaa ishonda cheẽ nguia ra mbia isi turã mbei quia. Nguécua jenda cheẽ nguia ra eisi turã eã. ²⁵ Tacheẽ nyecua rã jêje. Elías reco mose íbii, ama ngue nyaaquĩã mbei ra. Tres años ndobei. Mbia riãcuã ja que aque mose ra. Eru cheecha tubiriãte que chi rei hue Israel jenda ra. ²⁶ “Ũquĩ eru cheecha mo je mbae echao turã”, i ãte que Dios quia Elías je ra. “Sarepta jenda je quia mbae echao eru cheecha je”, i quiatu que Dios ee ra. Judío eã je quiatu que Dios Elías mondo ra. ²⁷ Eliseo reco mose íbii, leprosos tubiriãte que chi rei hue Israel jenda ra. Eliseo que hue jenda mo mbucheroã no nda. Ishonda mo nguiatu que embucherõ Siria jenda ra. Naamán, i que ee ra, i que Jesús ñee mbia je ra. ²⁸ Judíos chumunuasa que Jesús riqui ñee mbia je ra. Mbia Jesús cheẽ andu mose que paama i ee ra. ²⁹ Mbia paama i je que Jesús mombo sucha tubiriã si ra. Sita ibate que sucha tubiriãte ra. Sita rimia mbucu que mbia Jesús rerao rei ra. Hue si nda emombo nguĩã ña. ³⁰ Jesús que oso chee mbia tubiriã ite re si ra.

Jesús aba checuayã icuã jea ameĩ mo si

³¹ Jesús que oso Capernaum cote ra. Sucha tubiriã mo. Galilea jenda. Sábado mose que mbia mbaaquiato quiatu ra. ³² Ererecua rã ño ngue Jesús riqui mbia mbaaquiato quiatu ra. Nyebe mbia riqui nguĩã nyuruira tuchi echeẽ andu. ³³ Huee que ameĩ mo ndiqui mbia chumunuásaa ra. Aba checuayã icuã nyireco rei ae. Aque que ñee asite Jesús je ra. ³⁴ —¿Mbaerã erechu quia urerea co re, Jesús? Quiatúae urerecha ae. ¿Urericharã ño erechu quia co re? Dios rucucha chõ nde re. Areicuate se, i rei que aba checuayã icuã Jesús je ra. ³⁵ Jesús que ñee ee ra. —Equiriri chõ jẽ. Esẽ oso ameĩ ñiangui si, i que Jesús ee ra. Jesús cheẽ mose que aba checuayã ameĩ mombo íbii ra. Mbia tubiriãsaa. Usẽ ngue u ameĩ mbasiã cote ra. ³⁶ Mbia tuririã ngue nyuruira ja u erea ra. —Jesús quirãcuã ae

ñee nguĩã. Mbia rerecua rã ño eriqui nguĩã ñee aba checuayã icuã je. ¡Sã aba checuayã echeẽ mumbayã jê! i tuchi que mbia nyuruira erea ra. ³⁷ Mbia que ñimbiirandu randu ja Jesús rese ra. Erurubinda jenda abe jirandu ja erese.

Jesús Simón ninisi si mbucherõ

³⁸ Jesús que usẽ mbia chumunuasa si cote ra. Oso que ique Simón nyuchua cote ra. I que Simón nyari rasi u ee ra. Eracu tuchi que ee ra. —Embucherõ na, i tuchi que mbia Jesús je ra. ³⁹ Jesús que oso nyibi earõ nda. Ñee ngue eracu je ra. —Etiba, i que ee ra. Eracu que hui esi Jesús cheẽ nguire ra. Ari que juã cote ra. Mbae que echao chao mbia chiurã cote ra.

Jesús mbia rasi chumumbara mbucherõ

⁴⁰ Tenda ireĩ mose que mbia nguesenda rasi rurucuaẽ cuaẽ ja Jesús je ra. Erasi chumumbara tuchi que ra. Jesús que o chono ñono ja erasi arõ embucherõ cherõ ja ra. ⁴¹ Aba checuayã icuã ngue usẽ usẽ nguia mbia si Jesús cheẽ mose cote ra. —Nde rei Cristo Dios riirĩ, i que usẽ usẽ mbia si ra. —¡Jẽñee eã ño jê! i tuchi que Jesús quia aba checuayã icuã je ra. Ũquĩ ngue Cristo icua chõ nda.

Jesús mbia Galilea jenda mbuchesea sea

⁴² Nyaashĩ namo mose que Jesús si turuquia a. ra. —Se ae taico mbirĩ na, i rei que ra. Mbia que nyoĩ erui erea chee ra. —¡Eresochĩ nda urerecha jê! Ure rese bei chõ eico, i rei que mbia ñee Jesús je ra. ⁴³ Jesús que ñee ee ra. —Dios cheẽ tasenei senei pe quitinda je abe. Nyebe sembu nguĩã, i que Jesús ra. ⁴⁴ Jesús que mbia mbuchesea sea quia Galilea jenda ra. Dios cheẽ nenei nenei judíos chumunuásaa.

5

Jesús sira tubiriã mbua uquia mbia je

¹ Emo mose que Jesús riqui ama ndisha rimia ndese ra. Genesaret, i que ama ndisha aque je ra. Mbia cuabẽ ngue ngaẽ ee huee ra. Dios cheẽ anduse rete que ra. Nyebe mbia tubiriã Jesús mumbi i i tuchi nguĩã. ² Canoa nyeremo abe que chi hue erimia ndese ra. Eoreã ja que ra. Echa que chi sira mbuasa irei irei ra. ³ Jesús

que ua canoa nongue ye ra. Simón mbae que aque canoa nda. —Ama nimia ndecha jiri sererao mingo, i que Jesús Simón je ra. Canoa ye que Jesús ñi erimia ndesenda mbaaquiato quiatu ra. ⁴Mbia mbaaquiato jare que ñee Simón je ra. —Eriquiraaasã rĩ canoa jendao. Huee tarafa jemondo ii. Sira mbuasa jemondo ii, i que Jesús ee ra. ⁵Simón ngue ñee ee ra. —Nyaashĩ nyee que ureico rei embuasa rerequia isa ra. Emo ngue uresiroã mbei ra, Sererecua. Ma ndecheende tasaambe no, i que Simón Jesús je ra. ⁶Mbia que tarafa mondo ii cote ra. Sira tubiriã mbua nonde. Tarafa soro serĩ sira usi je. ⁷Nyueru eru que canoa nongue yenda je ra. —Sira usite ure je. Jenyu rã. Nandembua ja rã canoa ye, i que canoa nongue yenda je ñee nda. Canoa nyeremo puk i ja sira je. Aete ñiimi sira usi je. ⁸Sira tubiriãchĩ sira eande nyii. Nyebe Simón Pedro nyuruira tuchi nguiã mae Jesús chimondo rese. Ngoi que ngũĩã ndese ñee ee ra. —Seicuãte aico co, Sererecua. Serecha rei se ae, i rei que Simón Pedro ñee Jesús je ra. ⁹Echiã nguia cuaãcuã i tare nguiã. Eresenda abe chiã cuaãcuã i ja. Sira tubiriã ndea. Sira mbua eande nyii. ¹⁰Zebedeo riirĩ abe que chi ja Simón ndese huee ra. Jacobo, i que enongue je ra. Juan, i que enongue je no nda. Ũquĩ chiã abe que cuaãcuã i ra. Jesús que ñee Simón je ra. —¡Eresiquichechĩ nda jẽ! Sira rese ra ereicoã cote. Mbia ra ereru reru bei quia seje cote, i que Jesús ee ra. ¹¹Canoa yenda ngasẽ mose ama nimíaa, umbae que esecha ja nyoĩ bei nonde Jesús rese cote ra.

Jesús mbia leproso mbucherõ

¹²Jesús que siqui tuchia mo nda. Hee que emo ndasi riqui ee ra. Leproso. Jesús rese mae mose que ngoi ngũĩã ndese ee ra. Nyibi que ñee Jesús je ra. —Sererecua, nde sembucherõse mose, sembucherõ se, i que leproso ñee Jesús je ra. ¹³Jesús que oco erese ra. —Echerõ cote, i que ee ra. Echeẽ mosebe que nyerõ nda. ¹⁴Jesús que ñee ee ra. —¡Erecheẽchĩ nda mbia mo je jẽ! Eso nderasiã ndeacuquia sacerdote je cote. Moisés cheẽ ndui si mbae mo emondo Dios je. Eĩ nda mbia jirandu nderasiã ndese cote, i que Jesús ñee ee ra. ¹⁵Mbia que

ñimbiirandu i i tuchi quia Jesús rese ra. Ngaẽ ngaẽ ja que equia echeẽ andu ra. Umbucherõ cherõ sacua abe que eriqui ngaẽ ngaẽ erea ra. ¹⁶Jesús que oso oso quia mbia tiãmbaa ra. Ñee ñee Dios je.

Jesús emi sayã mo mbucherõ

¹⁷Emo mose que Jesús riqui mbia mbaaquiato quiatu ra. Huee que fariseos mo nyi echeẽ andu andu ra. Embesasa abe que chi ra. Galilea jenda chõ ũquĩ nde. Judea jenda abe no. Jerusalén jenda abe no. Huee que echi ja Jesús cheẽ andu ra. Dios quirãcuã ngue siqui tuchi Jesús rese ra. Erasi mbucherõ cherõ sacua. ¹⁸Mbia que erasi mo curucuaẽ quisa ye ra. Emi sayã ngue ae ra. —Nandemingue serao Jesús je, i rei que ra. ¹⁹Tuchia mbaranguiatuãte que ee ra. Mbia tubiriã ngue tuchia mbiitãyã ee ra. Nyebe erasi ruruchoi nguiã sui tuchia arõ. Tei que endoro ra. Erasi que embuquichi imbu quisa ye Jesús rimbe ra. Mbia ite rĩ. ²⁰—Ererucuaẽsa riqui seicua ũquĩ, i que Jesús ñee uchiangui re ra. Nyebe ñee nguiã emi sayã je. —Ndechisaã mbae icuã ambutiã nguiã ndesi co, i que Jesús ee ra. ²¹Fariseos que ñee ñee nyue ra. Embesasa rese. —Jesús ñee icuã ñochĩ nguiã Dios rĩ co. Dios ibatenda ae mbia chiao icuã mbutiã nguiã esi. Jesús aquiatuã ño ñene, i rei que eu ñee ñee nda. ²²Jesús que ũquĩ ndua icuã icuate ra. Nyebe ñee nguiã ee cote. —¿Mbaerã jẽingo ndua icuã nde? ²³¿Ma mbaranguiatuã eã jiri jẽje re? ¿Mbia icuã mbutiã ere? ¿Mbia rasi mbucherõ ere no? ¿Ma mbaranguiatuã eã jiri ũquĩ jẽje re? ²⁴Dios riirĩ ndei se. Mbia chiao icuã mbutiã aquiato chõ se re. Sequirãcuã tateacuquia jẽje, i que Jesús ñee ee ra. Ñee ngue erasi je cote ra. —Ehuã na. Ndechuchua eso cote. Ndequisa abe erao, i que Jesús emi sayã je ra. ²⁵Jesús cheẽ ndurucha reã ngue emi sayã juã nda. Mbia que mae ja tuchi u erese ra. Uquisa abe que equerao ra. Eya tuchi que oso uchuchúaa ra. Ñee ñee turã ngue equia Dios rĩ nda. ²⁶Mbia que nyuruira ja u mae emi sayã ngata rese ra. —Emi sayãte rei nyii. Ngata chõchĩ cote, i ja que mbia

u mae nguiatu erese ra. Mbia ñee turã ja Dios riñ cote.

Serui bei eico, i Jesús Leví je

²⁷ Leví, i que emo je ra. Ae que impuestos isi isi bei quia ererecua mbaerã nda. Jesús que ngasẽ ee emo mose ra. Huee que eñi ngoi plata isi isi ra. —Serui bei eico, i que Jesús ñee ee ra. ²⁸ Ae Leví juã oso nguiã Jesús rui. Mbae rechaja umbae. ²⁹ Leví que fiesta saã tuchi Jesús je ra. Embuquiaru turã sacua uchuchua. Impuestos isi isiquia ata que chi quiaru erese huee ra. Mbiamo abe que chi no nda. ³⁰ Fariseos que ñee icuãte Jesús chimbbaaquiato je ra. Embesasa rese ñee icuã ee. —¿Mbaerã jẽingo quiaru impuestos isi isiquia rese re? Mbia icuã ndese abe jẽingochi nguiã quiaru, i que ñee nda. ³¹ Jesús que ñee ee ra. —Sã mbia rasiã ndiqui aba mbucherõsa requia eãte no. Sã erasi chõ ndiqui erequia no. ³² “Jenyu seje”, aeã ngue u nguiã mbia turã je. Mbia icuã je chõ ngue achu nguiã “jenyu seje” i. “Jẽicuã si jẽhui”, ae chõ ngue u nguiã eicuã je, i que Jesús ee ra.

Jesús chimbbaaquiato hui ãte uchiu si

³³ Mbia que ñee Jesús je ra. —Juanñimbbaaquiato hui hui uchiu si. Ñee nonde Dios je. Fariseos chimbbaaquiato abe hui hui uchiu si no. ¿Mbaerã ndechimbbaaquiato riqui hui ãte uchiu si re? i que mbia Jesús je ra. ³⁴ Jesús que ñee ee ra. —Sã emo ngũinisirã isi ramo mose no. Sã eresenda iate riqui quiaru erese no. Sã hui aroneate uchiu si aque mose no. ³⁵ Sã eru riqui mano emo mose no. Aque mose quia ra equiato hui uchiu si cote, i que Jesús ñee ee ra. ³⁶ Jesús que ejemplo saã mbia je ra. —Sã emo ndiqui tiru yasu mii aroneate tiru ima sorei rese no. Uqui mose eicuãte cote. Eyasu ra quiata chõ esi. ³⁷ Sã emo eri rasi ramo nderecoquiato eã eriru ima ye no. Mbae ire ima ye erecoquiato aronea. Eri rasi ra ñimatã ño mbae ire ndoro. Eri ra uchẽ ja. Mbae ire abe mbiicuãte ra cote. ³⁸ Eri yasu quia nda equerecoquiato nguiã mbae ire yasu ye. Soroã sacua. ³⁹ Emo eri ima mbei mose, eyasu ra embei sereã cote. “Eima ño eturã nde”, i chõ nguiã cote.

Nyebe mbia riqui nguiã secheẽ yasu isi sereãte, i que Jesús ñee mbia je ra.

6

Jesús chimbbaaquiato mbae a ishao shao sãbado mose

¹ Sãbado mo mose que Jesús si quia mbiaco ite riñ nda. Uchimbbaaquiato rese. Echimbbaaquiato que quiata a ucua mii mii nyo i quia ecuã mose ra. Equiti quitire oo je que echoi quia eachãaña cote ra. ² Fariseos mo ngue ñee ee ra. —¿Mbaerã jẽingo mbae ishao shao sãbado mose re? Co mose chõ mbia uquenea ucua resẽ, i que fariseos ee ra. ³ Jesús que ñee ee ra. —¿Embesa ji rese jemae eã David riñ nde? David riãcuãe que aque mose ra. Eresenda abe riãcuã ngue aque mose ra. ⁴ David que ique Dios chuchúaa ra. Mbichae Dios chuchua jenda que eu ra. Mee mee ngue nguesenda je ra. Eriãcuãte quia ñene. Sacerdote achõ mbaerã ndaque mbichae. ⁵ Sãbado rerecua bei chõ se re, i que Jesús ñee fariseos je ra.

Jesús eo tomei mo mbucherõ

⁶ Sãbado nongue mose que Jesús si judíos chumunuasa ra. Mbia que embaaquiato quiato huee ra. Huee que eo tomei mo ndiqui ee ra. Equiato cutinda tomei ngue ra. ⁷ Fariseos que mae nguiatu quia Jesús rese ra. Embesasa abe que mae nguiatu quia erese ra. —Mañi nda Jesús quia eo tomei je reae. Co sãbado mose reae. Sã embucherõ jẽ. Nandechẽ icuã nda ee chã jẽ, i que eu mae nguiatu Jesús rese ra. ⁸ Uqui ndua icuã ngue Jesús icua ra. Ñee ngue eo tomei je cote ra. —Ehuã na u mbia ite riñ, i que Jesús ee ra. Eo tomei ngue juã uã cote ra. ⁹ Jesús que ñee mbia je ra. —¿Mbae eturãte jẽje co tenda mose re? Sãbado mose bei. ¿Coche mbae turã naa naa sãbado mose re? ¿Coche mbae icuã naa naa co mose re no? ¿Coche mbia mbucherõ co mose re no? ¿Coche mbia iquia co mose re no? i que Jesús ñee mbia ja je ra. ¹⁰ Jesús que mae mbia ja rese cote ra. —Echomee secuti, i que eo tomei je cote ra. Eo tomei ngue ñomee Jesús cheẽ mose ra. Aque mosechi que eo nyerõ cote ra. ¹¹ Nyebe fariseos paama i tuchi nguiã Jesús je. Sãbado mose mbia mbucherõ mose. —¿Mañi nande ra

Jesús je re? Nandeiquia chõ nda reae, i tuchi que eu ñee nyue ra.

Jesús mbia doce irabo uchimbaaquiatuã

¹² Jesús que oso mbia tiámbaa ra. Sita ibátee. Huee que eñi ñee mbei Dios je nyaashĩ nyee ra. ¹³ Nyaashĩ mose que uchimbaaquiatu munua ja cote ra. Ûquĩ doce mo ngue eirabo ra. —Sechimondo sacuaã jẽ. Jaemondo ra secheẽ nenei nenei sacuaã mbia je, i que ùquĩ doce je ra. ¹⁴ ã mbia que eirabo ra:

Simón (Pedro, i abe que ee ra.)

Andrés (Simón nongue rei ae.)

Jacobo

Juan

Felipe

Bartolomé

¹⁵ Mateo

Tomás

Jacobo (Alfeo riirĩ ndei ae.)

Simón el Cananista

¹⁶ Judas (Jacobo nongue rei ae.)

Judas Iscariote (Aque que Jesús mondo mbia icuaã je ra.)

Ûquĩ ja que Jesús irabo ra.

Jesús mbia tubiriã mbaaquiatu

¹⁷ Jesús que nguichi u sita si cote ra. Uchimbaaquiatu rese. Ibi túraã ngue ecuaẽ ngasẽ cote ra. Mbia tubiriãte abe que chi huee ra. Judea jenda. Jerusalén jenda abe no. Tiro jenda abe no. Sidón jenda abe no. Ama nimia jenda rei ùquĩ. Ûquĩ ngue ngaẽ nyisaquia Jesús cheẽ ndese ra. Jesús embucherõ abe sacuaã ngue ecuaẽ nda. ¹⁸ Ae rese aba checuayã icuaã ndiqui nae, ùquĩ abe que Jesús mbucherõ nda. ¹⁹ Jesús quirãcuã ngue mbia mbucherõ ja quia ra. Nyebe mbia riqui nguiã ocase ja Jesús rese.

Ae eyate riqui

²⁰ Jesús que mae uchimbaaquiatu rese ñee nonde ee ra. —Jeyate riqui ã. Jẽ mbaecha reã ndaque. Dios quiatu ra jenderecuarã tuchi cote. ²¹ Jẽyate riqui ã. Jeniãcuã ndaque. Jendio rete ra cote. Jẽyate riqui ã. Jenyeseo seo raque. Jẽiquia iquia ra emo mose cote. ²² Mbia jemo ucuãyã mose, jemo mombo mose, ñee icuaã mose jẽje serĩ, jẽyate jẽingo ùquĩ. ²³ Jeñimbia tuchi

chõ aque mose. Mbia icuaã mose jẽje. Dios quia ra mbae turã mondo jẽje ibate. Mbia icuande jẽje nyii. Eĩ si que mbia icuaã nguia Dios rimba ñiinda je no nda.

Ae aba mbia eãte quia

²⁴ Aba mbia eã tuchichĩ jẽ, Mbaecha. Mbae icuaã nda tu jẽje. Jẽyare nyii. ²⁵ Aba mbia eã tuchichĩ jẽ, quiaru tuchi je. Jeniãcuã tuchi ra cote. Aba mbia eã tuchichĩ jẽ, iquia iquia je. Jenyeseo ra cote. ²⁶ Aba mbia eã tuchichĩ jẽ mbia ñee turã mbei mose jeni. Eĩ si rei que equia ñee turã turã dios abareã nimba je cose ra.

Jẽingo turã ño nguia jẽucuãyãsa je

²⁷ Aico ñee jẽje a. Ae eicuãte riqui jẽje, ùquĩ ndese jenyeseo chõ. Jẽingo turã ño nguia jẽucuãyãsa je. ²⁸ Emo ñee icuaã mose jeje, jeñee turã ño ee. Jeñee turã ño Dios je erĩ. ²⁹ Emo ucua mose jenditii rese, “tasaã se abe”, jenyechĩ ndae. Jenditii ribisho abe jẽteacuquia ee. Emo jẽirao rirõ mose jẽsi, jẽirao nongue abe rese jengueteã eã ño ee. ³⁰ Emo ache ache i mose jẽje, jemondo chõ ee. Emo jembae reraochõ mose, “emondobe seje”, jenyechĩ nda ee. ³¹ Sã jẽyate riqui mbia siqui turã mose jẽje no. Eĩ jenyeseo si chõ nguia siqui turã mbia je no.

³² Ae eicuãte riqui jẽje nae, ùquĩ ndese jenyeseo chõ. Ae nyeseo quia jendese nae, ùquĩ mii ndese jenyeseo mose, eicuãte ùquĩ. Mbia ja rese quiatu jenyeseo. ³³ Jẽingo turã nguiatu quia mbia ja rese. Ae eturã ndiqui jẽje, ùquĩ mii ndese jẽingo turã mose, eicuãte ùquĩ. Jesús quia-toã abe chee siqui turã uquiato je. ³⁴ Emo prestar i mose jembae je, jemondo chõ ee. Ae mbae mondo aroneate eribishorõ nae, jemondo bei chõ ee. “Cobrar tae ee”, jenyechĩ ndae. Jesús quiatoã abe chee mbae mondo eribishorõsa je. “Mbae mo nda emondobe seje”, i. ³⁵ Eĩ jenyechĩ nda jẽ abe. “Mbae mo nda emondobe seje chã” jenyechĩ nda jẽ abe jẽ! Jemondochõ ño ee. Ae eicuãte riqui jẽje, ùquĩ ndese jenyeseo chõ. Ûquĩ mose ra Dios mbae mee tuchi jẽje. Dios rã tuchi ra jẽ cote. Dios ia eãte quia eriqui nguiã eicuã ndese. Dios turãte quia eicuã je re. Eicuã ñee turã eã ndaque ee.

³⁶ Jëyayã ño mbia rese. Sã Dios abe eya eãte nanderese no.

“Eïcuãte que co ra”, jenyechĩ nda emo niii

³⁷ “Co que eïcuãte ra”, jenyechĩ nda emo niii. “Jëïcuãte”, iã nda Dios jëje chã. ¡Condenar jenyechĩ nda emo je jê! Dios nda condenar iã jëje chã. Emo ïcuã mose jëje, jêtesarei chõ eïcuã si. Dios nda tesarei jëïcuã si no ña. ³⁸ Mbae jemee mee ño mbia je. Dios quia ra mbae mee tuchi jëje cote. Mee turã nda jëje. Eñetê nda emee eã jëje. Embisê ño nda emee jëje. Jê embisê mee mose emo je, Dios ra embisê mee jëje no, i que Jesús mbia mbaaquiato quiato ra. ³⁹ Jesús que ejemplo saã mbia je ra. —Sã eresayã ja nyiruchoi aronea no. Ngoi ja chõ nda echoi ibicua rie. ⁴⁰ Embaaquiatusa quiarei earacua tuchi uchimbaaquiato si. Embaaquiato ja ji mose, earacua tuchi cote. Umbaaquiatusa rã si cote. ⁴¹ ¿Mbaerã nda “eïcuã” jenye emo je re? Jê jëïcuã tuchi mose esi. “Mbae ñetê ndiqui nderésaa aque”, jenyechĩ nda emo je. Mbae cuasu siqui mose jendésaa jê quiato. ⁴² “Mbae turã ndese chõ jëingo”, jenyechĩ nda jëingo ïcuã mose jê. Jêturã nda jësaã ñooñoohĩ jê. “Mbae ñetê tasirõ nderesa si”, jenyechĩ nda mbae cuasu siqui mose jendésaa jê. Jê nane nguia jêturã ndiqui. Aquere quiato jeñee emo mingo turã cote.

Sã ira ae ia ae ae no

⁴³ Ira turã mose, ea abe turã ndae. Ira ïcuã mose, ea abe ïcuã ño nda eno. ⁴⁴ Sã ira ae ea ae ae no. Higo a rã eã nda nyu a no. Ea ae eno nde. Uva a rã eã nda isio rashĩ a no. Ea ae eno nde. ⁴⁵ Eĩ si chõ mbia no nde. Mbia turã nda ñee turã. Echiangui renda quia eturãte re. Nyebe eriqui nguiã ñee turã. Mbia ïcuã nda ñee ïcuã no. Echiangui renda quia eïcuãte riqui nguiã. Nyebe eriqui nguiã ñee ïcuã. Nandechuru achõ ñee eã nguiã. Nandechiangui renda quia ñee nguiã.

Tuchua nyeremo

⁴⁶ “Sererecua” jenye chõchĩ seje secheẽ mumba mumbare. ⁴⁷ Ae siqui serese secheẽ mumbayã nae, eturã tuchi chõ ñquĩ nde. ⁴⁸ Sã emo uchuchuarã ao no. Sã ibi ribicoi tuchi no. Sita je ngasê nyee.

Sita arõ tuchua ao cote. Nyebe echuchua ãtãte riqui nguiã. Ama ndicuasu mose, iãcuã irãtã ndaque echuchua ite rĩ. Tuchua mbuquiata aroneate iãcuã irãtãte raque. Sita arõ nguia ngue uchuchua ao nguiã. Eĩ si chõ secheẽ mumbasa reã nde. Tuchua ãtã aosa rã si. ⁴⁹ Sã emo uchuchuarã ao no. Aque quiarei ibi ribicoi tuchiã. Ibi arõchi chõ uchuchua ao nguiã. Iãcuã ngasê mose aque chuchua, mbucoi asi que mondo ra. Eĩ si chõ secheẽ mumbasa re. Ae uchuchua saã ibi arõchi nae, aque rã si chõ ñene, i que Jesús ra.

7

Jesús soldados rerecua rimba mbucherõ

¹ Jesús cheẽ ngue tiba mbia je cote ra. Oso que Capernaum cote ra. ² Soldados rerecua mo ngue siqui hue ra. Capitán ngue ae ra. Roma jenda que ae ra. Aque rimba rasi que chi hue erese ra. Ebite que erimba ra. Erimba rasi tuchi. Mano serite que equia ee ra. ³ Capitán ngue jirandu Jesús rese cote ra. Ñee ngue judíos ramei je ra. —“Echu serimba mbucherõ”, i que capitán ñee ndeje ra”, jenye oso Jesús je, i que capitán nda. ⁴ Judíos ramei ngue ngasê Jesús je ra. —Capitán nimba embucherõ na oso ee. Capitán turãte quiato ngue eriqui nguiã ure je. ⁵ Nandequiato turã tuchi que aque ra. Judíos quiato ja. Urechumunua nua sacua ngue ae chao tuchua ra, i que ameĩ ñee Jesús je ra. ⁶ Jesús que oso ameĩ ndese ra. Capitán nyuchua rurubi mose que capitán uquiato mo mondo Jesús robeishĩ nda. —Seïcuãte se, Jesús. Sechuchua ra ereiquechĩ. ⁷ Nyebe se asoã nguiã nderea. Ndecheẽ achõ je chõ nda serimba erembucherõ. ⁸ Se abe sererecua no nde. Se echeẽ amumba aroneate. Soldados rerecua se no nde. Secheẽ abe emumbayã nguiã no. Eso, i mose, secheẽ mumbayã no. Echu, i mose, secheẽ mumbayã no. Se ñee mose serimba je, secheẽ mumbayãte no. Ndequirãcuã na eãte raque se, i que capitán ucheẽ mondo Jesús je ra. ⁹ Echeẽ andu mose que Jesús nyururate ra. Uba que ñee nguesenda je ra. —Tacheẽ nyecua jëje. Capitán seïcua tuchite quia co. Israel jenda mo embuchecha aroneate quia co, i que

Jesús ra. ¹⁰ Capitán nyimondo que nyebi nyoí uchuchúaa cote ra. Erimba mbucherō ji que ee cote ra.

Jesús eru cheecha riirĩ ndaaque mbuquera

¹¹ Isamami ngue Jesús choi quia Naín cote ra. Echimbaaquiatu abe que nyoí quia erese ra. Mbia tubiriãte que nyoí quia erese ra. ¹² Sucha ata rurubi mose que ngasē mbia tubiriã je ra. I que eraaque ruruchoi quia etã sacuañ nda. Aque mií tuchi rei ngue cuña ndiirĩ mo nde. Eru cheecha riirĩ. Aque que mano ño ee ra. Hue jenda mbia que nyoí jate quia esi rese ra. Eraaque rui. ¹³ Jesús que mae esi nyeseo rese ra. Jesús ia eãte que erese ra. —¡Echeseo eã ño jẽ! i que ee ra. ¹⁴ Jesús que oco eraaque rese ra. Eruruchoisa que tiba ee cote ra. —Echuruã, Acuanĩndu, i que ñee eraaque je ra. ¹⁵ Eraaque que nyuruã ñee cote ra. Jesús que embuquera ji mondo esi je cote ra. ¹⁶ Mbia que nyuruira ja erea ra. Ñee turã ja Dios riĩ. —Dios chimondo chõ co re, i que mbia quia ñee Jesús riĩ nda. —Dios riqui tesareĩã nande si co, i que mbia quia nyue ra. ¹⁷ Jesús chumbucherō ndese que mbia riqui ñimbiirandu jate ra. Judea jenda jirandu ja erese. Erobeinda ja abe que jirandu erese ra.

Juan el Bautista mbia mondo ñee Jesús je

¹⁸ Juan abe que jirandu Jesús chiao rese ra. Erimba quiatu ngue embiirandu nguiã erese. ¹⁹ Nyebe Juan ñee nguiã ngũimba nyeremo je. —Nyeremo jẽso ñee Jesús je. “‘Cristo ra tu’, i bei equia nae, ¿ae chõ nde re?” jenyeye oso ee. “¿Cristo ra ure-saarō arō si quia re?” jenyeye oso Jesús je, i que Juan ngũimba mondochoi ra. ²⁰ Juan ñimondo que nyoí ngasē Jesús je ra. —Juan el Bautista que urembu ñee ndeje ra. ¿Cristo chõ nde re? ¿Cristo ra uresaarō arō si quia re no? ¿Ae chõ nde re? i que Juan nimba ñee Jesús je ra. ²¹ Juan nimba ngasēte mose que Jesús riqui mbia rasi mbucherō cherō nda. Erasi chumumbara. Erasi cuabē. Aba checuayã icuã abe que embusē mbusē nguiã mbia si ra. Eresayã abe que embu cherō nyerō nguiã ra. Juan nimba que mae ja quia ũquĩ mbucherō

ndese ra. ²² Jesús que ñee Juan nimba je ra. —Ae rese jemae nae, ũquĩ jẽsenei oso Juan je. Ae jeñandu nae, ũquĩabe no. “Jesús que eresayã mbucherō nyerō nguiã ra. Ecuatayã abe mbucuata cuata. Eire ndasi abe mbucherō nyerō. Eisayã abe mbucherō nyerō. Eraaque abe mbuquera. Ucheẽ turã esenei senei tuchi mbaecha reã je”, jenyeye oso Juan mbiirandu. ²³ Emo hui jei eã mose sesi, aque iate ra siqui cote, i que Jesús ucheẽ mondo Juan je ra.

²⁴ Juan ñimondo que nyoí nyebi ee cote ra. Jesús que ñee mbia ja je Juan niĩ cote ra. —¿Mbae rese mae jẽso turúquiaa re? ¿Quiririã idioi ichu ichu rese jẽso mae nde? ²⁵ ¿Mbae rese mae jẽso re? ¿Emo irao turã ndese jẽso mae nde? Tei. Eirao turã siquiã nguiã turuquia ñi. Ae siqui quia mbia rerecua chuchua nae, ũquĩ ño eirao turã ndiqui nguiã. ²⁶ Juan ndese mae ño ngue jẽso turúquiaa resē. Dios cheẽ nenei neneisa tuchi chõ ae emo si re. Ae chõ mbia mingoquiato quiato nguiã se ñee sacuañ ee aque. ²⁷ Sã embesa ji riqui ñee no:

Secheẽ nderaosa tamondo nderēta.

Ae ra mbia mingoquiato ndeje,

i que embesa ji ñee nda. Juan niĩ ño embesa ji ñee nguiã. ²⁸ Juan el Bautista quiarei i tuchi raque mbia ñiinda ja si. Dios cheẽ nenei neneisa ataque si. Ae ra siqui tuchi Dios rese erimbarã cote nae, ũquĩ nguiã ra i tuchi Juan si cote, i que Jesús ñee nda. ²⁹ Mbia que Jesús cheẽ ñandu turã ja ra. Impuestos isi isiquia abe chee que echeẽ ñandu turã nda. —Dios turã tuchi, i ja que mbia ra. Juan ngue bautizar i ja ee nyii ra. ³⁰ Fariseos achõ ño ngue Jesús cheẽ isi sereã nda. Embesasa rese. ũquĩ ngue siqui sereãte Dios cheẽ ndese ra. Nyebe Juan bautizar i eã nguiã ee.

³¹ Jesús que ñeembe ee ra. —Mbia namonda siqui turã eãte quia aba cheẽ nduiã. Mbia riirĩ na ño eriqui nguiã. ³² Sã mbia riirĩ ndiqui ñumbusarei sarei no. Sã eriqui ñee ñee nyue no. “Flauta que asaã saã ndei jẽje ra. ¿Mbaerã jenyuruqui sereã nea nde?” sã i chõ nyue no. “Mbae aba mbia eã ngue asaã ndei jẽje resē. ¿Mbaerã jẽyate erese re?” sã i chõ mbia riirĩ nyue no. ũquĩ na si chõ jẽingo nguiã aba cheẽ

mumba ã. ³³ Juan el Bautista que tu rei jêje ra. Jêisi turã eã ngue ra. “Co eriqui quiaru sereãte nanderese co. Co eriqui mbae mbei sereãte nanderese co”, jenyê chõchĩ ee. “Aba checuayã ndesenda”, jenyê chõ ngue ee ra. ³⁴ Se abe que achu rei jêje ra. Aquiaru rei quia jendese co. Mbae abe ambei rei quia jendese co. Se abe que jê seisi turãya nda. “Quiaru tuchi je”, jenyê chõchĩ seje. “Mbae mbeisa”, jenyê chõ ngue seje no nda. “Mbia icuã quiato chõ ñene”, jenyê que seje resẽ. ³⁵ Ae earacuate nae, Dios aracua abe ra eicua, i que Jesús mbia je ra.

Jesús quiaru fariseo chuchua

³⁶ —Nandequiaru sechuchua, i que fariseo mo ñee Jesús je ra. Jesús que oso erese ra. Ngoi que quiaru nonde ra. ³⁷ Cuña icuã mo ngue siqui hue jenda huee ra. Jirandu que Jesús rese ra. Oso que erea cote ra. Aba mbushimbusa que equerao erea ra. (Sita ao ji rei aba mbushimbusa riru.) ³⁸ Jesús quite quiti que eñi nyeseo ra. Nguesari je que Jesús i irei irei ra. Ua je que embiiru iru cote ra. Uchuru que embucha Jesús i rese eriite ra. Aba mbushimbusa que eicherẽ ei rese cote ra. ³⁹ Jesús mbuquiarusa que ñee nguia uchiangui re ra. —¿Mbaerã Jesús ñee asiã cuña icuã je re? Jesús Dios riirĩ mose, i nda ñee asi rei ee, i que fariseo uchiangui re ra. ⁴⁰ Jesús que ñee fariseo je ra. —Tacheẽ ndeje, Simón, i que ee ra. —Eno. Echeẽ seje no, Sererecua, i que fariseo ee ra. ⁴¹ Jesús que ñee ee ra. —Sã mbia nyeremo deber i ererecua mo je no. Sã enongue deber i ee quinientos no. Sã enongue deber i ee cincuenta no. ⁴² Ũquĩ ja que pagar i aronea ja. Nyebe ererecua ñee nguia ee. “Mbae jemondo eã ño seje”, sã i chõ ererecua ee no. ¿Aba eya tuchi nguerecua rese re? i que Jesús ñee Simón je ra. ⁴³ Simón ngue ñee ee ra. —Ae deber i tuchi ee nae, aque eya tuchi erese cote reae, i que Simón ee ra. —Ae bei, i que Jesús ñee ee ra. ⁴⁴ Jesús que mae cuña ndese ñee Simón je ra. —Ndechuchúaa sei que mose que sei ereirei eã nda. Co cuña nguiatu que sei irei nguesari je ra. Ua je que sei mbiiru ra. ⁴⁵ Nde quiatu que seritii

eresiite eã ndesẽ. Cuña nguiatu que sei siite nguia. ⁴⁶ Nde que aba mbushimbusa ereichereã sea rese resẽ. Cuña nguiatu ngue aba mbushimbusa icherẽ nguia sei rese. ⁴⁷ Tacheẽ nyecua ndeje, Simón. Cuña icuã tuchi raque. Eicuã ngue ambutiã ee namo nda. Nyebe eriqui nguia nyesequa tuchi serese a. Ae “seicuã eã jiri se”, i quia nae, ũquĩ nguia ra nyesequa eã jiri serese. Se eicuã ambutiã ndaque, i que Jesús Simón je ra. ⁴⁸ —Ndeicuã ngue ambutiã ndesi ra, i que Jesús ñee cuña je cote ra. ⁴⁹ Ae que chi quiaru erese nae, ũquĩ ngue ñee nyecuayã cuayã u nyue ra. —¿Mañi nda Jesús mbia icuã mbutiã esi re? i que eu ñee ñee nyue ra. ⁵⁰ Jesús que ñee cuña je ra. —Seicuasa chõ nde re. Nyebe arerirõ nguia ndeicuã si. Ereico bei ra cote. Ndeya eso cote, i que Jesús cuña je ra.

8

Cuña mo nyoĩ ngata Jesús rui mbae raã naa ee

¹ Jesús que sucha tubiriã mbuchesea sea quia ra. Dios cheẽ turã ngue esenei senei nguia mbia je ra. Echimbaaquiatu doce abe que ngata quia erese ra. ² Cuña echimbucherõ mo abe que ngata quia erese ra. Ae si aba checuayã icuã ndirõ nyii, ũquĩ mo abe que ngata quia erese ra. María Magdalena que ngata quia erese ra. Ae si aba checuayã siete rirõ nyii nae. ³ Juana abe que ngata quia erese ra. Chuza ninisi que aque ra. Herodes resenda rei Chuza. Susana abe que ngata quia erese ra. Cuña ata que ngata quia erese ra. Ũquĩ ngue umbae mee mee mbei quia Jesús je ra.

Emo mbae eĩ mombiquia mbiqui

⁴ Mbia que ngaẽ ngaẽ ja quia Jesús rea ra. Suchamo jenda abe. Mbia ñmunua ja mose que Jesús ejemplo raã ee ra. ⁵ —Sã emo si mbae eĩ mombiquia mbiquia no. Emombiquia mbiquia mose sã emo uqui uqui ñeenda rui no. Sã mbia riqui irõ irõ erese no. Sã nguireĩ abe eu chee no. ⁶ Sã emo uqui uqui sita arõ no. Sita aronda suri raque. Ibi irute quia ee re. Nyebe ñimama nguia mano. ⁷ Sã emo ndiqui uqui uqui nyu réndaa no. Sã nyu abe suri erese no.

Nyu ruri que echatu asi u eriquisã nda. ⁸ Sã emo uqui uqui ibi túraã no. Ûquĩ nguiatu que ia turã nda, i que Jesús mbia je ra. Aquere que ñee asite mbia je ra. —Jêisa mose jsecheẽ jeñandu turã na! i que Jesús mbia je ra.

⁹ —Eresenei ngue mbae eĩ nĩ, ùquĩ embi-asa turã na ure je, i que echimbaaquiату ñee ee ra. ¹⁰ Jesús que ñee ee ra. —Mbia rerecua tuchi quiarei Dios. Ae riqui nguiã ucheẽ mbiasa asa ja jêje co. Mbia ataque quia siqui sereã erese co. Mbia ataque je quia eriqui nguiã ucheẽ mbiasa eã jiri. Ejemplos achõ esenei senei nguiã ee co. Eanduchõ sacua. Eicua turã ndocoĩ.

Jesús ucheẽ mbiasa uchimbaaquiату je mbae eĩ nĩ

¹¹ Secheẽ tambiasa jêje cote. Dios cheẽ na si chõ mbae eĩ nde. ¹² Ae uqui uqui ñeenda rui nae, ùquĩ ndei mbia Dios cheẽ andu chooñosa rã ùquĩ. Ae Dios cheẽ andu chooño nae, ùquĩ ñiangui si chõ diablo riqui nguiã Dios cheẽ ndirõ. Nyebe eriqui nguiã Dios icuayã mbei. Nyebe Dios riqui nguiã emingo bei eã. ¹³ Ae uqui uqui sita arõ nae, mbia mo na ño ùquĩ no nde. Dios cheẽ andu mose, isi turã ndaque. Eyate raque erese. Mbae mo embiayã mose, hui jei chõ esi cote. Mbae rao eã naanguia chõ ùquĩ nde. ¹⁴ Ae uqui uqui nyu réndaa nae, mbia mo na ño ùquĩ no nde. Dios cheẽ andu turã ndaque. Siqui bei eã ño nguiã erese. Umbaerã achõ ndese chõ eriquichĩ nguiã ndua. Ñimbusarei sarei bei chõchĩ nguiã. Nyebe hui chõ nguiã Dios cheẽ si. Nyebe Dios cheẽ ndiqui nguiã ia eã mbei ee. ¹⁵ Ae uqui uqui ibi túraã nae, mbia mo na ño ùquĩ no nde. Echĩã quishĩ ño ùquĩ nde. Dios cheẽ andu mose, siqui bei erese. Ia ia bei raanguia cote.

Tata rendi mbia resae ja

¹⁶ Sã nandeico lamparina mendi no. Sã nandeico eati eã no. Sã nandeico emĩ eã mbaequi re no. Erendi checua chõ nda nandemĩ nguiã. Mbia resae ja sacua. ¹⁷ Mbae checuayã nda nyecua ja emo mose. Ñemĩnde ra nyecua ja. ¹⁸ Secheẽ jeñandu tuchi. Aba mo umbae rerequia mose, Dios

ra emo mondobe ee. Emo embae eã mose, Dios ra embae sirõ ja esi.

Jesús nongue ngaẽ erea usi rese

¹⁹ Jesusi que ngaẽ ndei ee ra. Jesús nongue ja rese. Mbia tubiriãte que esiquisãte esi ra. ²⁰ —Hue ndesi riqui nderequia taicuee hue. Ndenongue rese, i que mbia Jesús mbiirandu ra. ²¹ Jesús que ñee mbia je ra. —Ae Dios cheẽ andu turã nae, ae Dios cheẽ mumbayã nguia nae, ùquĩ je chõ aico nguiã “senongue” i. Ûquĩ je chõ aico nguiã “taĩ” i no, i que Jesús ñee nda.

Jesús quiririã icuã icuã mbutiba; ama ndebera abe

²² Emo mose que Jesús ua canoa ye ra. Uchimbaaquiату ja rese. —Nyao ama ndisha robei, i que Jesús ee ra. Nyoĩ que cote ra. ²³ Ama ndisha rasa mose que Jesús si quia uque ra. Ama ndiite re mose que quiririã icuã icuã ndu ee ra. I rebera que ique ique tuchi quia canoa ye ra. Nyebe canoa ñimĩ serĩ tuchi nguiã ee. ²⁴ Nyebe mbia Jesús mumba nguiã. —Urembaaquiatusa, echumumba. Nandemanochĩ nda re, i que ñee Jesús je ra. Jesús que nyuruã cote ra. Ñee quiririã je. Ama mbutiba. Quiririã ngue ti i ee cote ra. Ama abe que ti i no nda. ²⁵ —¿Mbaerã jẽingo siquichete re? ¿Seicuayãte equia re? i que Jesús uchimbaaquiату je ra. Siquiche bei que equia ra. Nyuruirã tuchi Jesús quirãcuã ndese mae. —Quiririã Jesús cheẽ mumbayã ñochĩ. Ama abe echeẽ mumbayã ñochĩ, i que ñee ñee nyue cote ra.

Jesús aba checuayã icuã jea Gadara jenda mo si

²⁶ Ngasẽ nyee que sobei ra. Gadara, i que hue ibi je ra. Galilea mbuchecha tuchi que huee ra. Ama ndisha rasa. ²⁷ Canoa si Jesús nguichi mose, hue jenda amei mo ngue tu ee ra. Aba checuayã icuã ngue siqui quia echiangui re ra. Cosete ngue eriqui rei nguiã echiangui re. Eirao eã mbei que eriqui ra. Tuchuaqui re que eriqui uqueã nda. Mbia raaque tãsa bei chõ eriqui nguiã. ²⁸ Tu que ngoi nguiã ndese Jesús resa quiti ra. Ñee asite que eu ee ra. —¿Mañi ere ra seje re, Jesús? Dios

ibatenda riirĩ ño nde re. ¡Sembasichĩ nda se jẽ! i que ñee tuchi Jesús je ra. ²⁹ — Esẽ esi, i chõ Jesús aba checuayã icuã je reaẽ. Aba checuayã ño aque ameĩ isi isi bei quia embiicuã icuã neaẽ. Mbia eo cuaacua raque quia cadenas je. Ei abe cuaacua raque no. Ucuasa ndoso ndosochõ mbei que equia ra. Aba checuayã ño equerao rao quia turuquia ñi neaẽ. ³⁰ —¿Mañi ndeje re? i que Jesús ñee ee ra. —Etubiriã, i que seje ra. Ure cuabẽte quia ure re, i que aba checuayã ñee Jesús je ra. ³¹ — Uremondochĩ nda tata cuasu, i que aba checuayã ñee tuchi Jesús je ra. ³² Chiasu socoi tubiriã ngue chi quiaru huee ra. Sita ibate rese. Nyebe aba checuayã ñee Jesús je. —Chiasu chiangui re ureso rã, i tuchi que equia ñee Jesús je ra. —Eno, i que Jesús ee ra. ³³ Aba checuayã icuã ngue usẽ ja ameĩ ñia si cote ra. Chiasu chiangui re que echoi ra. Chiasu que uchã ja choi nyiichere ama nimia mbucu rĩ nda. Ama ndisha ye que echoi ja mano nda.

³⁴ Chiasu raarõsa que chi mae erese ra. Emundite que ra. Nyoĩ que uchã mbia mbiirandu ja chiasu rese ra. Sucha tubiriã jenda mbiirandu. Mbia ataque abe mbiirandu no. ³⁵ Mbia que ngaẽ ja mae erese ra. Huee que Jesús riqui beite ra. Ae rese aba checuayã ndiqui nyii ameĩ nae, aque abe que chĩ ngoi Jesús i jii ra. Huiirao resebe cote. Earacuate que mbia je cote ra. Nyebe mbia nyuruira tuchi nguiã erea. ³⁶ — Jesús que ameĩ mbucherõ aba checuayã ndirõ esi ra, i que maesa erese ñee mbia ataque je ra. Maesa erese que esenei ja mbia je ra. ³⁷ Mbia hue jenda que siquiche ja Jesús si cote ra. —Eso rã urerecha urerecua si, i ja que hue jenda ñee Jesús je ra. Nyebe Jesús ua nguiã canoa ye. Oso que nyebi sobei cote ra. Gadara recha. ³⁸ Ae rese aba checuayã ndiqui nyii nae, aque que ñee Jesús je ra. —Nderese taso bei, Jesús, i rei que ee ra. Jesús que ñee ee ra. ³⁹ —Eso chõ ndechuchúaa. Mbae esenei ja nderesenda je. “Dios que sembucherõ nda”, ere oso mbae renei nenei ja nderesenda je, i que Jesús ee ra. Umbucherõsa renei nenei ngue oso mbia ja je cote ra. Jesús renei nenei ja sucha jenda ja je.

Jesús Jairo riiri mbucherõ; ari mo abe mbucherõ

⁴⁰ Jesús chebi si mose sobei si, mbia que chi eraarõ arõ nda. Ũquí nguiatu que eisi turãte ra. ⁴¹ Emo ngue tu ñee Jesús je ra. Jairo, i que ee ra. Judio munua nuasa que ae ra. Jesús i jii que ngoi ñee ee ra. —Nyao rã sechuchúaa. ⁴² Seririĩ nguasu jiri si quia mano serite seje qui. Seririĩ mi tuchi se, i tuchi que Jesús je ra. Jesús que oso erese ra. Mbia cuabẽ ngue nyoĩ ja eruĩ ra. Jesús mbiitãyãte que echoi quia ra. ⁴³ Ari mo abe que oso quia mbia ite rĩ nda. Eruqui nda uchẽ uñe mbei quia ee ra. Doce años nyee nda eruqui tibayã mbei ee ra. Aba mbucherõsa abe nda embucherõ aroneate quia ee ra. Ari umbae mondo mondo ja raque quia ee. ⁴⁴ Ari que tu Jesús quite quiti eriichã nda. Eirao ai rese que oco ra. Aque mose tuchi que eruqui tiba ee cote ra. ⁴⁵ —¿Aba oco serese re? i que Jesús mbi je cote ra. —Tei. Aba ãte, i ja rei que mbia ee ra. Pedro que ñee ee ra. —Mbia tubiriãte nyeresẽ. Mbia cuaẽ nguia ñimaña maña jate co resẽ. ¿Mbaerã ereico “¿aba oco serese re?” i re? i que echimbaaquiatu ñee ja ee ra. ⁴⁶ Jesús que ñee ee ra. —Tei. Emo ngue oco serese ra. Sequirãcuã ngue emo mbucherõ nda i que Jesús ra. ⁴⁷ — Jesús jiranduchĩ serese, i que ari uchiangui re cote ra. Nyebe ngoi nguiã nguiã ndese Jesús resa quiti. Titi titi i ete que ra. Ñee nyecua que ee ra. —Sembucherõ sacua ño aoco nguiã nderese. Aque mose tuchi chõ acherõchĩ, i que ari erenei ja Jesús je ra. Mbia que echandu ja u ra. ⁴⁸ Jesús que ñee ee cote ra. —Seicuaa chõ nde re. Nyebe arembucherõ nguiã. Ndeya tuchi eso cote, i que Jesús ee ra.

⁴⁹ Jesús cheẽ mosete que emo ndu Jairo chuchua si ra. —Ndeririĩ ngue mano cote ra. ¿Mbaerã nda Jesús ererao ndechuchua cote re? i que ñee Jairo je ra. ⁵⁰ Jesús que echandu ra. Ñee ngue Jairo je ra. —¡Ndeya eã techĩ nda jẽ! Seicua chõ se. Ndeririĩ nda quera si, i que eru je ra. ⁵¹ Ngasẽ ngue echuchúaa cote ra. Jesús que ique eraaque rea cote ra. Pedro rese. Jacobo abe rese. Juan abe rese. Eraaque ru abe rese no. Esi abe rese. Ũquí achõ ngue emingue ra.

⁵² Mbia que chi ja nyeseo ãquẽ ndese ra. — Jenyeseochĩ nguiã. Mano eã ño ñene. Uque chõ ñene, i que Jesús ñee mbia je ra. ⁵³ Mbia que iquia Jesús cheẽ mose ra. —Eraaquete nyeresẽ. ¿Mañi nda nyuruã nde? i que mbia ra. ⁵⁴ Jesús que eraaque o isi ra. — Echuruã na, Echo, i que ñee asite ee ra. ⁵⁵ Quera si que nyuruã cote ra. —Nderiirĩ embuquiaru cote, i que Jesús ee ra. ⁵⁶ Eru que nyuruãra tuchi mae erese ra. Esi abe nyuruãra tuchi. —¡Emo nda jembiranduchĩ jê! i que Jesús ee ra.

9

Jesús uchimbaaquiatu doce mondo ucheẽ nenei nenei sacuã

¹ —Jenyu, i que Jesús uchimbaaquiatu doce je ra. Uquirãcuã ngue emee mee ee ra. Aba checuayã icuã jea jea sacuã mbia si. Mbia rasi mbucherõ cherõ sacuã. ² —Jêso Dios cheẽ nenei nenei mbia je. Jêso mbia rasi abe mbucherõ cherõ. “Mbia rerecuarã tuchi ra Dios cote”, jenyẽ oso secheẽ nenei nenei mbia je. ³ Mbae mo nda jendaochĩ icua. Jenyitochoquia ra jendaochĩ. Mbae riru mo abe ra jendaochĩ no. Jenyurã mo nda jendaochĩ no. Mbae isiquia mo abe ra jendaochĩ no. Jêirao nongue abe ra jendaochĩ no. ⁴ Emo nyuchúaa jengue mose, hueechõ ño jêingo uque. Jemba jem-batechĩ nda uque tuchia raamba amba. Hue si chõ jêso sucha tubiriã mo secheẽ nenei nenei cote. ⁵ Sucha tubiriã mo jenda jêisi sereã mose, jêsecha chõ. Jêi tubi jem-butomo tomo ee. Hue jenda huicua icua sacuã, i que Jesús uchimbaaquiatu je ra. ⁶ Echimbaaquiatu que nyoĩ choĩ bei quia sucha tubiriã mbuchesea sea ra. Dios cheẽ turã nenei nenei mbia ja je. Mbia rasi mbucherõ cherõ no.

Mbia Juan el Bautista iquia

⁷ Herodes abe que jirandu Jesús chiaõ rese ra. Embusiquichete que ra. Emo ngue ñee ndei ee ra. —Ae ereiquia nae, Juan i equia ee nae, aque que quera si ra, i rei que emo ñee Herodes je ra. Juan Jesús riqui reĩ nguiã mbia je. ⁸ Elías Jesús riqui reĩ nguiã emo je no. —Dios cheẽ nenei neneisa ima quera si je chõ ñene, i rei que emo emo

Jesús rĩ no nda. ⁹ Herodes que ñee nda. —Juan ãquĩ ngue achisiamo tuchi. ¿Mañi nda quera si re? ¿Aba Jesús re? Ae rese aico jirandu tuchi te. Tamae erese no, i que ndua ndua uchiangui re ra.

Jesús mbichae mbeta tuchi mbia je

¹⁰ Jesús chimondo ucheẽ nenei neneisa que nyebi ngaẽ ee ra. —Ã ngue uresaã saã nda, i que mbae renei ja Jesús je ra. Mbia tiãmbaa que Jesús ãquĩ nderao ja rei ra. Betsaida rurubi jiri. ¹¹ Mbia ataque jirandu mose que nyoĩ erui ra. Jesús que eisi turã Dios cheẽ nenei nenei ee ra. Erasi abe mbucherõ cherõ ee. ¹² Tenda oso mose que echimbaaquiatu ñee ndei ee ra. —Mbia emondo rã sucha tubiriã nia. Sã echoĩ bei quiaru huee. Uque bei abe huee no. Mbae ãte nandecu a, i rei que echimbaaquiatu Jesús je ra. ¹³ —Jeño mbae jemondo ee echurã, i que Jesús ee ra. —Tei. Mbae quia ra aba mondo ee. Cinco chõ ngue mbichae ra. Sira abe nyeremoñote nyeresẽ, i que echimbaaquiatu Jesús je ra. ¹⁴ Mbia tubiriã tuchi que chi ra. Cinco mil ndobei. —Mbia jembucoi ja ño íbii. Eata jaaja jeñono mbucoi. Sã echĩ ngoi icúe cúe cincuenta jaaja, i que Jesús uchimbaaquiatu je ra. ¹⁵ Jesús cheẽ nguire que ngoi ja cote ra. ¹⁶ Jesús que mbichae sirõ cote ra. Sira abe rirõ. Mae ngue ibate ra. —Gracias, i que ñee Dios je ra. Mbichae que esiquio quio ra. Sira abe no. Mondo mondo ja que uchimbaaquiatu je cote ra. —Jembuchao chao mbia tubiriã je cote, i que Jesús ra. ¹⁷ Mbia que embuquiaru ja tuchi ra. Miãtã tuchi que ra. Mbia huisa tubiriã ngue cote ra. Sira rire. Mbichae rire abe no. Doce iru que mbia mombisẽ esique sique je ra.

Cristo chõ nde resẽ, i Pedro Jesús je

¹⁸ Emo mose que Jesús ae riqui ñee ñee Dios je ra. Echimbaaquiatu abe que chi huee ra. —¿Aba aico reĩ mbia je re? i que Jesús ee ra. ¹⁹ Echimbaaquiatu que ñee ee ra. —Juan el Bautista ereico reĩ nguiã emo je co. Elías ereico reĩ nguiã emo je no. Dios cheẽ nenei neneisa quera si je ereico reĩ nguiã emo je no, i que echimbaaquiatu ee ra. ²⁰ —¿Aba aico reĩ jêje co re? i que Jesús ee ra. —Cristo chõ nde resẽ. Dios riirĩ ño nde resẽ, i que Pedro Jesús je ra.

Mbia ra sei quia, i Jesús uchimbaaquiату je

²¹ —Ūquĩ nda jeñeechĩ emo je jē, i tuchi que Jesús ee ra. ²² Jesús que uchimbaaquiату mbaaquiату quiату ra. —Mbiarã ngue Dios sembu ra. Mbia ra sembasi mbasi tuchi. Amei nda hui ja sesi. Sacerdotes rerecua abe ra hui ja sesi. Embesasa abe ra hui ja sesi. Mbia ra sei quia chee. Tres tenda mose ra aquera si, i que Jesús mbia eiquia nonde ra.

²³ —Emo siquise mose serui, sã hui ja mbae ubi si. Sã cruz umbaerã ndui bei se rã si. Sã eriqui serui cote. ²⁴ Emo ndua bei mose ngueco rese, ereco ra ua esi. Emo hui mose ngueco si seje, ūquĩ nda siqui bei. ²⁵ Emo ngueco mumba choño mose, eya eã mbei rae. Mbaecha rete raque. ²⁶ Emo ireĩ ireĩ mose sesi, se abe chõ nda aireĩ ireĩ esi. Emo ireĩ ireĩ mose secheẽ si, se abe chõ nda aireĩ ireĩ esi, sechu mose mbia rerecuarã. Dios quirãcuã nda sembu. Angeles rese ra achu aque mose. ²⁷ Tacheẽ nyecua jēje. ã jēingo serese ã nae, jemo nda jemaie Dios quirãcuã ndese jemano nonde. Mbia rerecua tuchi ra Dios, jemo mano nonde, i que Jesús ee ra.

Jesús nyĩcabo uchimbaaquiату je

²⁸ Ocho tendare que Jesús choi sita ibátee ra. Ñee sacua Dios je huee. Pedro que oso erese ra. Jacobo abe. Juan abe. ²⁹ Jesús ñee mose Dios je que eruba ñimbiasu ra. Eirao abe que enininya ra. Eiraoshĩ nininya tuchi que ra. ³⁰ Mbia nyeremo ngue nyecua u ibate si ra. Jesús nininya mose que eriqui ñee ñee nyue erese ra. Moisés que enongue ra. Elías que enongue no nda. ³¹ Ūquĩ ja que enininya Jesús rese ra. —Mbia ra Jesús iquia mbucha ira rese Jerusalén, i que equia ñee nyue ra. ³² Pedro reesite raque. Eresenda abe reesi esite raque. Uqueã mbei quera. Jesús nininyate quiату ngue ee re. Moisés abe nininyate quiату ngue ee re. Elías abe nininya no. ³³ Ibatenda que nyoĩ quia Jesús recha cote ra. —¿Manyae ra ñee Jesús je re? i que Pedro ra. Nyebe ñee iru chõ nguiã ee. —Nandecu turãte aa, Sembaaquiatusa. Sucha ñetē uresaã saã na. Enongue nembraerã. Enongue Moisés mbaerã no. Enongue Elías mbaerã no, i rei

que Pedro ñee Jesús je ra. ³⁴ Pedro cheẽ mosete que ibeishĩ ndu eite ñi nda. Ibeishĩ ngue Moisés mbuchecuayã ee ra. Elías abe mbuchecuayã ee. Nyebe esiquiche nguiã. ³⁵ Echeẽ mo ngue echandu ibeishĩ qui re ra. —Co rei sebi tuchi seriirĩ co. Echeẽ jeñandu bei quia, i que Dios ee ibeishĩ qui re ra. ³⁶ Aquere que Jesús mii ndiqui uchimbaaquiату rese ra. Umaesa que esenei eã ja emo je ra. Ñee ãte que emo je ra.

Jesús aba checuayã jea mbia riiri mo si

³⁷ Isamamimbe que ecuaẽ nguichi sita ibate si ra. Mbia tubiriã ngue ngaẽ Jesús rea ra. ³⁸ Ūquĩ mo ngue ñee Jesús je ra. —Seriirĩ ndese emae, Urembaaquiatusa. Seriirĩ mĩte que se co ra. ³⁹ Aba checuayã icuã ndiqui eisi isi co. Embaasẽ asẽ mbei. Emburiri riri. Echuru mbichoĩ. Erete munumbi numbi. Aba checuayã hui sereã mbei seriirĩ si. ⁴⁰ “Aba checuayã embusẽ seriirĩ si”, ae rei ngue ndechimbaaquiату je re. Embusẽ aroneate esi, i que eru ñee Jesús je ra. ⁴¹ —¿Mañi jenye quia seicuayãte re? ¿Secheẽ jemumba tuchi chõ nguia re? ¿Ñimbirãcuã mbeite ra aba quia jēje re? i que Jesús ñee ee ra. —Nderiirĩ eru rã seje, i que eru je cote ra. ⁴² Jesús rurubite mose que aba checuayã eriirĩ mbucoĩ mondo ra. Mburiri tuchi que ra. Jesús que ñee asite aba checuayã icuã je ra. Eriirĩ ngue embucherõ nda. Embucherõ ji que emondo eru je cote ra. ⁴³ Dios quirãcuã ndese mae ngue mbia nyuruira tuchi ra.

Mbia ra sei quia, i si Jesús

Jesús chiao rese mae ngue mbia nyuruira tuchi ra. Mbia nyuruira mose que Jesús ñee uchimbaaquiату je cote ra. ⁴⁴ —Mbiarã ngue achu ra. Mbia ra semee mbia icuã je. Serĩcharã. Ūquĩ si ra jētesareichĩ, i rei que Jesús uchimbaaquiату je ra. ⁴⁵ Echimbaaquiату que Jesús cheẽ icuayãte ra. Echecuayãte que ee ra. —Ndecheẽ embiasa ure je, iã ngue ñee ee ra. Ireĩ ireĩ ño ngue ñee ee ra.

Ererecua tuchi ra se, i jaaja Jesús chimbaaquiату nyue

⁴⁶ —Se quia ra ererecuarã tuchi jēsi, i jaaja que echimbaaquiату ñee nyue ra. Ñee

icua icua nyee nyue. ⁴⁷ Jesús que ũqui ndua ndua icuate ra. Nyebe ãquẽ mo mbucoi m̃i nguiã ujii. ⁴⁸ Jesús que ñee ee ra. —Sã ãquẽ mo ndiqui siqui mingue no jẽ. Ae eturã ndiqui mbia riirĩ je serĩ nae, seje abe chõ eturã ndiqui nguiã. Ae eturã ndiqui seje nae, semondosa je abe chõ eturã ndiqui nguiã. Ae ererecua sereãte riqui jemo nae, ũqui nguia sebi re. ¿Mbaerã jẽingo “ererecuarã se” i nyue re? i que Jesús ee ra.

Emo icua eã mose nande je, nanderesenda chõ ũqui nde

⁴⁹ Juan ngue ñee Jesús je ra. —Pe emo nyi aba checuayã ndirõ ndirõ mbia si nderĩ pe. Uremae ngue erese ra. Aque eriqui ãte nanderese aque. Nyebe uresiquisã nguiã, i que Juan Jesús je ra. ⁵⁰ Jesús que ñee ee ra. —Tei. ¡Jẽsiquisã quisãchĩ nda jẽ! Emo icua eã mose nande je, nanderesenda chõ ũqui nde, i que Jesús ñee ee ra.

Jesús ñee asi Jacobo je; Juan abe je

⁵¹ —Namo jiri ra aso ibate cote, i que Jesús ndua ndua cote ra. —Taso Jerusalén, i tuchi que equia ra. ⁵² Jesús que mbia mo mondo unonde ra. ũqui ngue ngasẽ sucha tubiriã mo nda. Samaria jenda rei sucha. —Jesús ra uque aa jendese, i rei que hue jenda je ra. ⁵³ Hue jenda que Jesús isi turã sereãte ra. —Jerusalén Jesús si quia qui reae. Nyebe ureico nguiã eisi sereã aa, i que hue jenda ñee icua Jesús chimondo je ra. ⁵⁴ Jacobo jirandu mose que paama i hue jenda je ra. Juan abe que paama i hue jenda je ra. ũqui ngue ñee Jesús je ra. —Sã Elías tata mbu ibate si mbia icua je cose no. ¿Eĩ ure si ra tata mbu ã iquia sacua nde? i que echimbaaquiату ñee Jesús je ra. ⁵⁵ Jesús que uba ñee asite ee ra. —Jẽsecha chõ. Aba mingosa riirĩ ño jẽingo ã ndesẽ. ¿Jẽtesarei chõ nguia ũqui si re? ⁵⁶ Mbia iquia sacua ngue achua ndesẽ. Mbia mingo bei sacua ño ngue achu nguiã, i que Jesús ra. Sucha tubiriã mo ngue echoi cote ra.

Jesús rui taico, i raque emo

⁵⁷ Jesús ngata mose que mbia mo ñee ee ra. —Taico bei nderese. Ndeso mose manguiti, se abe ra aso bei quia nderese, i que ñee Jesús je ra. ⁵⁸ Jesús que ñee ee ra.

—¿Mbae rasi ra eresaã saã serese re? Eoita quia ecua jiri re. Nguireĩ nguia equisa jiri no nde. Se quia sequisayã mbei re, i que Jesús ee ra. ⁵⁹ —Serui eico bei, i que Jesús emo je ra. —Sã seru mano na. Aquere quia ra aico bei nderui, i rei que aque ñee Jesús je ra. ⁶⁰ Jesús que ñee ee ra. —Sã mbia ataque chõ nderu chati. Nde quia eso Dios cheẽ nenei nenei mbia je, i que Jesús ee ra. ⁶¹ Emo ngue ñee Jesús je ra. —Aico jee ra nderui. “Co acua quia co”, tae rã oso sechuchua jenda je, i que ñee Jesús je ra. ⁶² Jesús que ñee ee ra. —“Achu jirichĩ nguia Jesús rui”, i mose sequiato mo, aque ra ngaseã Dios je, i que ra.

10

Jesús mbia setenta mondo ucheẽ nenei nenei sacua

¹ Aquere que Jesús mbia setenta irabo no nda. —Serẽta chõ jẽso jẽso quia sucha mbuchesea sea, i que ee ra. Nyeremo nemo ngue embuchao chao quia mondo ra. ² —Secheẽ andusa reã ndei etubiriã. Secheẽ nenei neneisa rei co m̃i jiri. “Dios, ndecheẽ nenei neneisa mo emondo tuchi. Mbia mbiirandu randu sacua”, jenyẽ chõ nguia Dios je. Sã echa mbae a ishao shaosa mondo ea ireĩ mose no. ³ Jẽso cote. Sã nyacua icua ndiqui oveja je no. Eĩ si ra mbia icua icua jẽje. Nyacua rã si. ⁴ Jẽochi chõ jẽso. Mbae riru ra jendaochĩ. Mbae isiquia abe ra jendaochĩ no. Jẽiyao abe ra jendaochĩ. Jẽitõ itõchĩ nda ñeenda cúa ñee sacua mbia je. ⁵ Jẽique mose emo nyuchúaa, jeñee turã huee tuchia jenda je. “Dios nda jembia bei quia chã”, jenyẽ hue jenda je. ⁶ Hue jenda ia mose Dios rese, Dios ra siqui tuchi erese. Eya eã mose Dios rese, emo je quia jeñee. ⁷ Jemba jembatechĩ nda uque tuchia raamba amba. Jengue mocoĩ jiri quia huee. Ae hue jenda u u quia nae, jẽ abe jẽu quia erese. Jẽingo mose secheẽ nenei nenei mbia je, sã mbia mbae mondo mondo jẽje. ⁸ Sucha tubiriã jenda jẽisi turã mose, jẽquiuru quiuru erese. ⁹ Hue jenda ndasi jembucherõ nyerõ ee. Hue jenda je secheẽ jẽsenei senei. “Namo jiri ra jendecuarã Dios cote”, jenyẽ chõ hue jenda je. ¹⁰ Sucha tubiriã jenda mo

jěisi sereã nea mose, jeñee asi ee etaicúee. ¹¹ “Urei tubi urembutomo nguia jendique jie a. Jětesareiã sacuã urecheẽ si. Jenderecuase rete raque Dios. Jěisiã ñochĩ”, jenye chõ hue jenda mbiirandu. ¹² Se mbia icuã mbasi mbasi mose, hue jenda ra ambasi mbasi tuchi Sodoma jenda si.

Jesús ia eã mbia sucha tubiriã jenda rese

¹³ Seya eãte jendese, Corazín jenda. Seya eãte jendese, Betsaida jenda. Jendasi tuchi chõ ndae. Mbiamae sayã ngue asaã saã jěje nae, ũquĩ naa mose Sidón jenda je, eĩ nda hue jenda huicua ndecha rei. Eĩ nda Tiro jenda abe huicua ndecha rei. Eĩ nda eya eãte rei huicua ndese. ¹⁴ Jě nguia jěicuã jěsecha sereãte rei. Nyebe ra Dios jembasi mbasi tuchi ũquĩ si quiatu. Dios mbia icuã mbasi mbasi mose. ¹⁵ Jěcuasu jěsaã saã tuchi techĩ nguia re, Capernaum jenda. Nyebe ra Dios jemondo tuchi tata cuasu. ¹⁶ Secheẽ nenei neneisa chõ jě nde. Ae ra jeñee ñandu quia nae, secheẽ abe ra echandu. Ae ra jěucuãyãte quia nae, se abe ucuãyã ndae. Ae ra seucuãyãte quia nae, sembusa abe ucuãyã nda eno, i que Jesús ñee uchimondo setenta je ra.

Jesús chimondo mbia setenta nyebi ngaã ee

¹⁷ ũquĩ setenta nyebi si mose que eyate ra. —Aba checuayã icuã urecheẽ mumbayã ñochĩ nderĩ, Urererecu, i que ñee Jesús je ra. ¹⁸ Jesús que ñee ee ra. —Satanás que ngoi tuchi u ibei si ra. Sã amapiriã i asi no, eĩ si que eu ngoi ra. Amae tuchi que ecoi rese ra. ¹⁹ Sequirãcuã ngue amee tuchi jěje ra. Jendeaquiato sacuã. Jěirõ sacuã mbei tásie rese. Quiraẽ ndese. Seucuãyãsa riquisã sacuã. Sequirãcuã nda jendea quiatu mingo. ²⁰ ũquĩ ndesechĩ nda jěya. Serese quia jěya. Aba checuayã jeñee mumbayã mose jũquĩ ndesechĩ nda jěya no jě! Paba que nombre jembae mbesa mbesa miĩ ibate ra. ũquĩ ndese quia jěya, i que Jesús ee ra.

Jesús ia tuchi

²¹ Aque mosete que Espíritu Turã Jesús mbia tuchi ra. Ñee ngue ngu je ra. —Seyate aico nderese co, Paba. Ibi jenda rerecu

ja chõ nde re. Ibei jenda abe rerecuaja chõ nde no nde. Ndecheẽ ngue erembuchecuayã mbia aquiato tuchi je ra. Mbiamriĩ naanguia je chõ ngue erembuchecuanquiã. ũquĩ ño ngue eturã ndeje ra, Paba, i que Jesús ra. ²² —Seru que mbae mondo ja seje ra. Paba miĩ ño seicua tuchi nguia. Pabamriĩ miĩ ño se re. Se miĩ ño Paba aicua tuchi nguia no. Ae je ra Paba ateacuquiana, ũquĩ miĩ ño nda Paba icua tuchi nguia serese, i que Jesús ñee nda. ²³ Jesús que ubamae uchimbaaquiato rese ra. Eísaa que ñee nda. —Coche jemaenguiã ã sechiao rese. ²⁴ Mbiamrerecuã ñiinda mae ja bite raque ã sechiao rese. Dios cheẽ nenei neneisa abe mae ja bite raque ã ndese. Mae eã mbei que equia sechiao rese ra. Secheẽ andu bite raque. Secheẽ ngue echanuate ra, i que Jesús ra.

Samaria jenda mo turã erasi je

²⁵ —Ma Jesús ucheẽ nyabi, i que embesasa mo ñee oso Jesús rea ra. —¿Mbae rese ra aico siqui bei nonde re? i que ñee Jesús je ra. ²⁶ —¿Mañi ño Voisés chimbesa re? i que Jesús ee ra. ²⁷ Embesasa que ñee ee ra. —Eĩ ño ngue Moisés embesara: “Echesequa tuchi quia Dios rese. Ndechiã ja je chõ eico nyesequa erese. Neaĩ abe je. Ndequirãcuã abe je. Nendua ndua abe je. Sã erchesequa ndechiese no, eĩ ere si chõ nyesequa nde ji jenda rese”, i que embesaji ñee ndesẽ, i que embesasa ñee Jesús je ra. ²⁸ Jesús que ñee ke ra. —Erecheẽ turãte. Ndkico mose ũquĩ ndese, Paba ra nemingo bei, i que Jesús ee ra.

²⁹ Embesasa que uturã saã saã Jesús je ra. —¿Aba se ji jenda re? ¿Aba rese ra achesequa re? i que ñee Jesús je ra. ³⁰ Jesús que ñee ee ra. —Sã emo oso quia Jericó quitino. Jerusaén si. Sã mbia icuã nyarõ erese ñeenda cúa no. Ucuu tuchi que erese ra. Embae que embuquiachã ja ra. Eirao abe rirõ ja esi no. Ecura curái que esecha ino ñeenda cúa rĩnda. ³¹ Aque ñeenda au que sacerdote mo si ra. Maeño ngue ecura curái rese ra. Nyucuaño ngue oso ra. ³² Levita mo abe que oso rei hue rĩ no nda. Aque abe que maeño si erese no nda. Ñeenda ibi chõ esi nguia kcuano no.

³³ Aquere que Samaria jenda mo oso hue rĩ nda. Aque mae mose ecura curái rese, eya eã tuchi que aque quiatu ra. Aque quia echucuaño eã nguiã cote. ³⁴ Aque que tiba erese ra. Mbae quira que equiti quiti eiruã nua ji rese ra. Vĩno abe quiti erese. Esia ji que echucua chucua ee ra. Caballo umbae rese que erasi mbuchui cote ra. Tuchua mo ngue ererao ra. Huee que eriqui eraarõ isa ra. ³⁵ Isamami ngue ñee tuchuacha je ra. —Taso cote. Ecura curái embucherõ nguia aa. Co mbae isiquia nyeremo tamondo ndeje. Embucherõ sacua eisi co je. Co nyeremo chayã mose, mbae isiquia mo nda amondobe ndeje sechube mose, i que Samaria jenda ñee tuchuacha je ra. ³⁶ ¿Aba nyesequa ecura curái rese re? ¿Sacerdote ere? ¿Levita ere? ¿Samaria jenda ere? i que Jesús embesasa je ra. ³⁷ Embesasa que ñee ee ra. —Samaria jenda chõ ngue nyesequa erese resẽ, i que embesasa ñee Jesús je ra. Jesús que ñee ee ra. —Ae rã si chõ eico nyesequa, i que ee ra.

Jesús oso Marta rea; María abe rea

³⁸ Jesús que ngasẽ sucha tubiriã mo nda. Cuña mo ngue eisi turã uchuchúaa ra. Marta, i equia ee. ³⁹ María, i que Marta nongue je ra. Jesús i ji bei que María riqui ngoi ra. Jesús cheẽ ndese nyiisaquia bei. ⁴⁰ Marta que mbae chao chao ja tuchi quia ra. Erecoteã tuchi que eriqui ra. Oso que ñee Jesús je ra. —Mbae mo ndese senongue riquiã ño co resẽ. Echeẽ na ee. Siqui sacua mbae mo ndese seje, i rei que Marta Jesús je ra. ⁴¹ Jesús que ñee Marta je ra. —¿Mbaerã ereico siqui jate mbae rese re, Marta? ⁴² Aque mi ndese chõ eico ndenongue rã si ae, Marta. María riqui secheẽ andu andu a resẽ. Emo nda embui eã secheẽ si, i que Jesús Marta je ra.

11

Jesús mbia mbaaquiato quiatu ñee tura sacua Dios je

¹ Emo mose que Jesús chi ñee ngu je ra. Hui mose que echimbaaquiato ñee ee cote ra. —Urererequa, urembaaquiato rã ñee Dios je. Sã Juan uchimbaaquiato mbaaquiato no, i que Jesús chimbaaquiato

ñee ee ra. ² Jesús que ñee ee ra. —Eĩ jenye chõ nguia Dios je ñee mose:

Paba ibatenda, sã mbia ñee turã ja bei quia nderiĩ.

Mbia rerecuarã ja sacua echu jei íbii.

Sã mbia ibatenda siqui beite ndebi rese no.

Sã mbia ibi jenda abe riqui ndebi rese.

³ Ae ra ureu namo, ñquĩ embu rã urechiurã.

⁴ Ae uresaã icuã icuã ndeje nae, ñquĩ embutiã ná uresi.

Sã ureico tesarei mbia icuã icuã mose ure je no.

“Mbae icuã jësaã” ¡ichĩ nda emo ure je jẽ!

Urereaquiato mbae icuã si.

Eĩ jenye chõ ñee mose Dios je, i que Jesús embaaquiato ra. ⁵ Jesús que ñeembe ee ra.

—“Mbae embu seje”, jẽ i mose jëquiato je,

¿mee nda jëje re? Sã jëingo oso jëquiato rea

itondiite rete mose no. “Mbichae prestar

ere rã seje. ⁶ Sequiato mo ngue tu serea ra.

¿Mbae ra amee ee re?” jenye chõ ee. ⁷ Ae je

jëingo ñee nae, ¿mee eã nda jëje re? Sã ñee

jëje no. “Jëso rei. Seiquesa átãte. Co achu

seriirĩ ndese quisa ye co. Sehuã sereãte.

Mbae mo amondo aronea tuchite ndeje”, ¿i

ra jëje re? ⁸ Mondo eã aroneate jëje jeñee

mbei bei mose ee. Nyuruã sereãte raque

uquiato je. Ñee mbei mose ee, nyuruã nda

mbae mondo turã ee. ⁹ Eĩ si chõ Dios no

nde. Jeñee i i mose Dios je, mbae ra emondo

jëje no. Jẽ mbae mo ndequia i i mose, jëtea

rae. Jẽ eiquesa mbu i i mose, mbuquiata

ra jëje cote. ¹⁰ Ae ñee i ite quia Dios je

nae, mbae ra Dios mondo ee. Ae mbae mo

sequia i ite quia nae, tea rae. Ae eiquesa

mbu i ite quia nae, equia ra ee. ¹¹ Jendiirĩ

“mbichae embu seje” i mose, ¿sita ra eru

mee ee re? Jendiirĩ “sira embu seje” i

mose ¿mbei ra eru mondo ee re? ¹² Jendiirĩ

“nguira chia embu seje” i mose, ¿quiraẽ nda

eru mondo ee re? ¹³ Mbia icuã nyee mbae

turã mondo mondo quia nguiriĩ je ã. Jendu

Ibatenda quia ra mbae turã tuchi mee jëje.

Jendu ra Espíritu Turã mee jëje, jeñee mose

ee, i que Jesús ee ra.

Aba checuayã quirãcuã Jesús quereco co, i raque mbia

¹⁴ Emo mose que Jesús aba checuayã icuã mbusẽ emo ñia si ra. Aque aba checuayã nguia echeẽ mbaaquiatoãte nguiã. Jesús

embusê mose que ñee cote ra. Ñee mose que mbia nyuruira tuchi mae erese ra. ¹⁵ Emo emo ngue ñee nda. —Aba checuayã icuã nderecua tuchi chõ Satanás nde. Satanás quirãcuã je chõ Jesús riqui nguiã aba checuayã icuã mbusê mbusê mbia si co, i rei que emo emo nda. ¹⁶ —Ma Jesús aquiatute, i que mbia ñee nyue ra. —Jesús, mbia mae sayã mo esaã na ure je, i que mbia ñee Jesús je ra. ¹⁷ Jesús que ùquĩ ndua ndua icuate ra. Nyebe ñee nguiã ee. —Gobierno icuã icuã mose nyue, ua rae. Tuchuamo jenda icuã icuã mose nyue, ua ra eno. ¹⁸ Satanás icuã icuã mose nyue, Satanás quirãcuã nda ua no. Jeñee ñooño ño nguiã seje ã. “Satanás quirãcuã je chõ Jesús riqui nguiã aba checuayã mbusê mbusê mbia si”, jenyê chõchĩ nguiã seje ã. ¹⁹ ¿Aba jeñimbaaquiatu mbirãcuã jẽ nde? Aba checuayã icuã mbusê nonde re. ¿Satanás jeñimbaaquiatu mbirãcuã serese re? ²⁰ Dios quirãcuã je quiatu aico aba checuayã mbusê mbusê mbia si ã. “Dios quirãcuã ndese chõ ureico nguiã mae”, jenyê eã ñochĩ nguiã ã. ²¹ Satanás quirãcuã tuchite raque. Umbae raarõ tuchite raque. “Sembae chi turãte a”, i raque. ²² Dios quiarei equirãcuã tuchi Satanás si. Dios Satanás mbae sirõ ja arõte quia esi co. Dios Satanás mbae mbutiã ja arõte quia co. ²³ Ae siqui ãte quia serese nae, ùquĩ icuã ño eriqui nguiã seje. Ae mbae a ishao shao raanguia eãte quia seje nae, ùquĩ icuã ño eriqui nguiã seje.

Aba checuayã icuã nyebi u mbia chianguire

²⁴ Aba checuayã icuã usê mose emo ñia si, ngata bei chõ nguiã. “¿Mangue ra seque-nea aucua que re?” i chõ nguiã. Uquenea ucua sacua ngue etea eãte ra. “Tasobe rei nyebi. Ae si achu usê, aque chiã ye si taso”, i que aba checuayã nda. ²⁵ Aba checuayã nyebi si mose u, mbia chiã ndecoteã eãte que ee ra. Tuchua tii ji raãte que ee ra. ²⁶ Aba checuayã icuã ngue nguesenda siete queru cote ra. Ique ja que echoi aque chianguire cote ra. Ae chianguire aba checuayã icuã siete riqui nae, aque icuã i i tuchi que cote ra. Ñiinda si. Aba checuayã

mii ngue siqui eye nyii ra. Etubiriãte cote, i que Jesús ee ra.

Dios cheẽ andusa je quiatu mbae roonde

²⁷ Jesús cheẽ mose que cuña mo tasê tuchi ñee mombo ra. —Mbae roonde tuchiñi ndesi je nye. Ae nembuquiambu quia, i que cuña mo ñee mombo Jesús je ra. ²⁸ Jesús que ñee ee ra. —Dios cheẽ andusa je quiatu mbae roonde riqui nguiã. Dios cheẽ mumbasa reã je quiatu mbae roonde riqui nguiã, i que Jesús ra.

Mbia mae sayã esaã ure je, i bei mbia Jesús je

²⁹ Mbia que ngaẽ tuchi Jesús riichã nda. Jesús que ñee mbia je ra. —Co mosenda mbia icuãte riqui ã. “Mbia mae sayã esaã ure je”, i beite equia seje ã. Mbia mae sayã mii ño nda asaã ee. Jonás na si. ³⁰ Sã Jonás ndiqui raque sira rie ye tres días nae, sã mbia Nínive jenda echeẽ andu cote nae. Jonás na si ra asaã mbia je. Mbia co mosenda je mae sayã tasaã. ³¹ La reina de Seba quia eturã jiri mbia co mosenda si re. Dios ra co mosenda mbasi tuchi la reina de Seba si. Sã la reina de Seba tu ishõ tuchi si Salomón ñee andu no. Se quia acheẽ ndaque quia jẽje. Searacua tuchi raque se quiatu Salomón si. Secheẽ jemumbate chõchĩ NGUIA Ñ: Nyebe ra Dios jembase tuchi mbia icuã ndea rea mose. ³² Nínive jenda quia eturã jiri co mosenda si re. Dios ra co mosenda mbasi tuchi Nínive jenda si. Sã Nínive jenda huicua ndecha Jonás ñee mose ee no. Aico raque ñee jẽje, co mosenda je. Jẽ secheẽ jemumbate chõchĩ nguiã ã. Se quia raque ererecua tuchi Jonás si. Nyebe ra Dios jembase tuchi mbia icuã ndea rea mose.

Nanderesa quiarei mbae resae nanderete je

³³ Nande lámpara mendi mose, nandemii aroneate mbaequi re. Nandemii aroneate mbae mo ye. Nandemingo quia ibate erenda rese. Mbia resae ja sacua. ³⁴ Nanderesa quiarei mbae resae nanderete je. Nanderesa turã mose, nanderete abe ra oso turã. Naneeresa icuã mose, nanderete abe ra oso icuã icuã no. ³⁵ Tata rendi rã jẽingo bei. ³⁶ Tata rendi rã jẽingo bei mose, jemae turã nda mbae ja rese cote.

Sã tata rendi riqui nanderesae no, i que Jesús mbia mbaaquiату ra.

Jesús ñee asi fariseos je

³⁷ Jesús ñee jare que fariseo mo ñee ee cote ra. —Nyao rã sechuchúaa. Terequiaru serese, i que ñee Jesús je ra. Jesús que oso erese ra. Ngoi que quiaru cote ra.

³⁸ Fariseo que ñee uchiangui re ra. —Jesús choi quiiriã ño quiaruchĩ, i que uchiangui re ra. ³⁹ Jesús que ñee asi ee cote ra. —

Jëo achõ ño jëirei ireichĩ nguiã. Jeñiangui renda quia eicuãte re. Jeñiangui renda quia jëirei ãte nguiã. Abei chiãte chõ jëingochĩ jeñiangui re. ⁴⁰ Nandeo achõ eã ño ngue Dios saã nguiã. Nandechiangui renda abe chõ ngue Dios saã ndesë.

⁴¹ Abei chiãte chõ jëingochĩ jeñiangui re ã. Jeñiangui renda turã mose, eĩ nda jëturã ja rei. ⁴² Aba mbia eã tuchichĩ jë, Fariseos.

Mbae a jemondo mondo tuchi raque Dios je. Jenyesequa eãte quia erese jeñiangui re re. Jëingo turã eãte quia mbia rese no nde. Ûquĩ jësaã jiri ae. Mbae a abe jemondo Dios je. ⁴³ Aba mbia eã tuchichĩ jë, Fariseos. “iSerendarã turã nguiatu se jë!” jenyete chĩ nguiã mbia ñumunua mose.

“Sã mbia sererequa i nande je”, jenyete chĩ nguiã no. ⁴⁴ Aba mbia eã tuchichĩ jë, Fariseos. Embesasa abe no. Jenguasu jësaã saã techĩ nguiã mbia je. Mbia raaque tãsa rã ño jeñiangui renda re. Jeñiangui renda soõ ño nguiã. Erondeite. Sã eraaque tãsa yenda soõ no. Mbia jirandu eã ndaque jeñiangui renda soõ ndese, i que Jesús ñee fariseos je ra. Embesasa je abe no.

⁴⁵ Embesasa mo ngue ñee Jesús je cote ra. —¿Mbaerã ereico ñee ure abe je re? i que ra. ⁴⁶ Jesús que ñee ùquĩ abe je ra. —Aba mbia eã tuchichĩ jë abe. Jeñee tuchite quia mbia je ã. Dios cheë jembeta mbeta tuchichĩ nguia mbia je ã. Mbia echeë mumbayã aroneate chee quia ã. Jë si chõ jeñee jemumba mumba nguiã ã. ⁴⁷⁻⁴⁸ Cose ndare rã si jëingo nguiã ã. Jenamei na si. Sã ñi jenamei icuã icuã ndiqui Dios cheë mbuchecuasa je cose no. Eĩ jenyete si chõ nguiã ã no. ⁴⁹ Dios quiarei earacua tuchi. Ae que ñee jëje ra. “Secheë mbuchecuasa emo emo nda amondo mbia je. Mbia icuã

icuãte ra secheë mbuchecuasa je. Secheë mbuchecuasa mo iquia chee, i que Dios ñee nda. ⁵⁰⁻⁵¹ Ae Dios quiato iquia iquia quia cose nae, ùquĩ ñi nda Dios jembasi cote. Sã mbia Abel iquia cose no. Sã mbia Zacarías abe iquia altar jii no. Sã mbia Dios quiato iquia iquia bei cose no. Ûquĩ ja rĩ nda Dios jembasi cote. ⁵² Aba mbia eã tuchichĩ jë. “Ure mii ño Dios cheë ureicua nguiã ã”, jenyete choõno ño nguiã ã. Dios cheë jëisi turã eãte quia ã. Mbia siquise mose Dios rese, jëingo emingo eãte erese ã no. Jë abe chee jëingo eãte erese ã no, i que Jesús ñee embesasa je ra.

⁵³⁻⁵⁴ Jesús ñee jare que fariseos paama i tuchi ee ra. Embesasa abe paama i nguiã ee no. Ûquĩ ngue ñee ñee tuchi Jesús je ra. —Sã Jesús ucheë tasa tasa nande je no. Ûquĩ mose nandeisi serao policiaa, i tuchi que ra. Nyebe eriqui nguiã Jesús rea chemi ñemi.

12

Jëturã nda jësaã ñooñochĩ je

¹ Mbia tubiriã ngue ngaë ngaë nguia Jesús rea cote ra. Cuaacua i tuchi que equia nyuera. Mbia tubiriã tuchi. Jesús que ñee uchimbaaquiату je cote ra. —iFariseos rã nda jëingochĩ jë! Uturã naa ñooño mbei.

² Ae mbia saã nyecuayã cuayã nguia nae, ùquĩ nda nyecua ja cote. Ûquĩ nda mbia icua ja cote. ³ Ae jeñee nguia itondaru jëingo mose, ùquĩ nda nyecua ja mbia je cote. Jeñee equia nyiisa isa nae, ùquĩ abe ra nyecua ja mbia je no.

Dios riqui jendeaquiату bei co

⁴ Tacheë nyecua jëje, Sequiato. Ae “taiquia” i quia jeni nae, iquĩ si ra jësiquichechĩ jë! ⁵ Ae aba mombo serite quia tata cuasu nae, aque si quiatu jësiquiche. iAque si quiatu jësiquiche tuchi jë! ⁶ Nguireĩ ndei aba queteamba eã jiri. Mbae isiquia mumba eã jiri raque. Dios quia nguireĩ icua jate nguiã. Dios ra tesareia nguireĩ mo si. ⁷ Dios riqui jë mii mii icua ja co.

Dios riqui ngueteã jiri jendese nguireĩ si co. Nyebe jësiquicheã mbae mo si.

Jesús quiato chõ se re, jenyete checua chõ nguia mbia je

8 “Jesucristo quiato chõ se re”, ae i quia mbia je nae, ùquĩ nñi nda acheẽ turã se abe. “Sequiato chõ ã nde”, ae ra se. Angeles ra ambiirandu ja ùquĩ ndese. 9 “Jesucristo quiato chõ se re”, ae iã nguia mbia je nae, ùquĩ nñi nda acheẽ turã eã. “Sequiato eã ño ùquĩ nde”, ae ra se. Angeles nda ambiirandu ja sequiatio eã ndese. 10 Emo ñee icuã mose serĩ, Dios ra echeẽ icuã mbutiã arõte. Emo ñee icuã mose Espiritu Turã nñi, ùquĩ icuã nguia ra Dios mbutiã eã mbei. 11 Mbia icuã icuã nda jẽje serĩ. Jenderao mose mbia rerecua je, ijẽquicoi coi chĩ nda jẽ! “¿Mañi nande ra ñee ee re?” ijenyechĩ nda jẽ! 12 Huee quia ra Espiritu Turã ñee nguiã jẽje jembucheẽ sacua, i que Jesús ñee uchimbaaquiatu je ra.

Mbaecha aracuayã

13 Emo ngue ñee Jesús je ra. —Sererecua, senongue icuã icuãte seje. Echeẽ na senongueje. Ae ureru secha ure je nae, senongue embuchecha turã eãte seje, i que mbia mo ñee Jesús je ra. 14 Jesús que ñee ee ra. —¿Mbaerã nda re? “Mbia mbae embuchecha turã turã ee”, iã ngue Dios seje ra, i que Jesús ee ra. 15 —iEmo mbae rese ra jemaie maechĩ eosei sacua jẽ! “Sembae tubiriã mose ra seyate cote”, ijenyechĩ nda jẽ! i que Jesús ee ra. 16 Jesús que ñee ee ra. —Sã mbaecha mo ndiqui no. Ibicha. Sã embae ia tuchi te no. 17 “¿Mañi ae ra se re? ¿Mangue ra aba ererecoquiatu re?” i tuchi que mbaecha uchiangui re ra. 18 “Sembae ruacuã tambucuasú tuchi. Quiata a ruacuã. I nda sembae ique ja tuchi huee. Ae arecoquiatu quia ã nae, ùquĩ nda tenda ata jiri tea seje chã. 19 Aquiei quiei eã mbei ra se quia cote. Aquiaru quiaru chõ nda se quia cote. Mbae ra ambei mbei chõ nguia cote. Achimbia mbia chõ nda se quia cote”, i raque mbaecha ñee uchiangui re. 20 Dios que ñee ee ra. “Ndearacuayãte ereico co. Co isa chõ nda eremano. Ae ererecoquiatute quia nae, aba je chio nda ùquĩ cote”, i que Dios ñee mbaecha je ra. 21 Ae mbae munua nua mbei quia nae, ererecoquiatu sacua nae, earacuayã tuchi chõ ùquĩ nde. Dios quiato eã ño ùquĩ nde, i que Jesús mbia mbaaquiatu quiatu ra.

Dios uquiato reaquiato bei

22 Jesús que ñee uchimbaaquiatu je ra. — “¿Mbae ra nandeu re?” ijenyechĩ nda quicoi coi jẽ! “¿Ma tiru ra nandemingue re?” ijenyechĩ nda quicoi coi jẽ! 23 Mbia chiu ae ra mbia mingo eã. Mbia irao abe ra mbia mingo eã no. 24 Sã nguireĩ no. Mbae tiquiayã ndaque. Mbae ishao eã ndaque no. Mbae ruacuã eãte raque embae. Dios quiarei embuquiaru quiaru. Jẽ nguia rei Dios queteamba tuchi nguireĩ si. Nguireĩ ja si. Jẽ abe Dios ae jembuquiaru nguiã jẽ no. 25 Mbia ae ra tiarõ eã. “Se ra atiarombe”, i raque ndua ndua uchiangui re. Dios ae mbia mbutiarõ arõ nguiã. 26 Jẽ mbae ñetẽ naa aquiata mose, ¿mbaerã jẽingo “mbae cuasu tasaã” i re? Dios quia ra mbae saã ja jẽje. 27 Sã mbae uti turãte riqui no. Mbae ao eã ndaque. Ñinyu mburirã eã ndaque. Mbae uti quiarei eturã jiri Salomón si. Salomón turãte raque. 28 Sã Dios quiata mbuturã no. Quiata mano jeite raque. ¿Mañi nda Dios jembuiraõ eã jẽ nde no? ¿Mbaerã jẽingo Dios icuayãte re? 29 “¿Mbae ra nandeu re?” ijenyechĩ nda pare pare i jẽ! “¿Mbae ra nandembei re?” jenyechĩ nda quicoi coi no jẽ. 30 Eĩ ño Dios quiatoã nguiã. Jẽ nguia jendu tesareia mbeite nguiã jẽsi. 31 Jẽ nguia jẽingo tuchi Dios rese jenderecuarã. Ùquĩ mose ra Dios mbae mee mee mbei jẽje. Jenyiurã. Jeñimbeirã abe no.

Jembae jemondo ja Dios je

32 Jẽsiquichechĩ nda mbae mo si, Seriri. Jendu ra umbae mondo ja jẽje. Dios iate ra umbae mondo mose jẽje. 33 Jembae jemondochõ ño mbaecha reã je. I nda jembae tubiriã jẽingo mose ibate cote. Mbae riru ra soro soroã mbei jembae ibate cote. Mbae ra ua eã mbei huee. Mbia ra mbae mbuquiachãya huee. Chicuaquiarei eãte ra huee no. 34 Jẽ jembae mondo mondo mose ibate, jendua ra ibatenda rese cote. Jẽ jembae monoã mose emo je, ibatenda rese ra jendua eãte.

Jẽingoquiatu bei chõ nguia

35 ijẽingoquiatu bei quia jẽ! Itondaru abe jẽingoquiatu quia. 36 Sã ererecua mo no. Oso ngũinisirã nderequia no. Huee erimba

mo ndiqui echuchua raarõ huee. Aque ererecua ru quia eiquesa mbuu mbuu aque cote. Erimba eequia asi ee cote. ³⁷ Erimba uqueã mose nguerecua tu mose, ererecua ia tuchi ra erese. Ererecua ra embuquiuru turã. Ae sí chõ echara chara nguiã ngũimba je hue no. ³⁸ Ererecua ra tu arõte itondáruu. Itondiite mose abe no. Erimba uqueã mose nguerecua tu mose, ererecua ia tuchi ra erese. ³⁹ Sã emo ñee ndeje no. “Co mose ra mbae mbuquiachãsa ru nembae rirõ”, i ndeje no. Ûquĩ mose ra erequeã. Nembae ra eresaarõ mbei esi. ⁴⁰ Eĩ jentye jẽ abe iicoquiutu. Eĩ ae ra u ibate si. “Tu eãte rei rae”, i mose quia ra achu, i que Jesús ra.

Erimba echeẽ mumbayã mose, eya tuchi rae

⁴¹ Pedro que ñee Jesús je ra. —¿Aba je ereico ñee ùquĩ nde? ¿Ure mii je ere? ¿Mbia ja je ere? i que Pedro ee ra. ⁴² Jesús que ñee ee ra. —Dios rimba aba cheẽ mumbayã nii aico ñee co. Dios rimba aracua riiãico ñee co. Sã ererecua ñee ngũimba turã je no. “¡Sembae esaarõ ja jê!” i ee. “Serimba ataque embuquiuru quiaru ja quia no”, i ee. ⁴³ Erimba echeẽ mumbayã mose, ererecua ia tuchi ra tu mose. Erimba abe ra eya no. ⁴⁴ Ererecua ra ngũimba mii mbei cote, umbae raarõ sacua. ⁴⁵ Sã erimba ndua ndua uchiangui re no. “Sererecua ra tu jei ãte”, i ndua ndua. Hue ñee icuã icuã uataque je huee cote. Iruã nua cote. Quiaru chooño cote. Mbae mbei chooño abe cote. Quiacua quiacua cote. ⁴⁶ Sã ererecua ru quia ngũimba mbuatate aque cote no. Ñee ee. “Mbae ra eresaarõ mbei seje cote”, i ngũimba je cote. Ngũimba iruã nua tuchi cote. Ae aba cheẽ mumbate quia, ùquĩ ndese ra mbae rasi raã naa cote. ⁴⁷ Ae nguerecua cheẽ icuate quia nae, ùquĩ nda ererecua mbasi mbasi bei ucheẽ mumba mose. ⁴⁸ Ae nguerecua cheẽ icua eãte quia nae, ùquĩ nguia ra ererecua mbasi mbasiã jiri ucheẽ mumba mose. Ae Dios cheẽ icua tuchi quia nae, ùquĩ je ra Dios “mbae esaã tuchi seje”, i. Ae je Dios mbae mondo tuchi nae, ùquĩ je ra Dios “mbae esaã tuchi seje”, i.

Achu chõ ngue mbia mbuchao chao nyesi resẽ, i Jesús

⁴⁹ Ibate si que achu íbii ra. Mbia mae sacua sequirãcuã ndese. Mbia sequirãcuã icua eã ñochĩ namo nyee. ⁵⁰ Mbia ra sembasi tuchi cote. Pare pare aete se quia ndua erese co. ⁵¹ ¿Achu reĩ mbia mbuturã turã sacua serimba je jẽje re? Tei. Achu chõ ngue mbia mbuchao chao nyesi resẽ. ⁵² Mbia chuchua jenda ra ñimbuchao chao nyesi. Nyeremo nda siqui serese serimbarã. Eataque ra ñimbuchao esi. ⁵³ Emo nda eicuãte ngu je serĩ. Emo nda eicuãte nguiirĩ je serĩ no. Emo nda eicuãte usi je serĩ no. Acuanĩ abe ra eicuãte uchari je no. Ari mo abe ra eicuãte nguiirĩ ninisi je no. Eĩ si ra mbia icuã icuã uchue serĩ no, i que Jesús ra.

Ae ibatenda ra tu icuãte mbia je nae, aque jẽicua eãte chõchi

⁵⁴ Jesús que ñeembe mbia je ra. —“Ama nda nyaaqui”, jentye bei quia pã i mose ã. Ibei jẽicuate raque quia ã. ⁵⁵ “Tenda rasite ra cote”, jentye bei quia quiririã ichu ichu mose ã no. ⁵⁶ Ibei jẽicuate raque quia ã. Tenda abe jẽicuate raque quia ã no. Ama abe no. Dios rucucha ra tu mbia je, ¿mbaerã jẽingo ùquĩ icuayãte quiatu re? ¿Mbaerã jẽingo jëaracua raã naa nde?

Ae eicuãte riqui jẽje nae, “nandeico turã ño nguia”, jentye chõ nguia ee

⁵⁷ ¿Mbaerã jẽingo mae sereãte mbae turã ndese re? ⁵⁸ Emo ñee icuã mose jenyi mbia rerecua je, jëturã ño ee. Jeñee turã ño ee. Jẽ ae chõ jeñimbuturã nguia erese. I nda jenderao icuã eã. Jenderao mose ra jëtarõ mbei cárcel. ⁵⁹ Huee ra jẽingo bei. Jembae mondo ja tuchi chee ee, i que Jesús ra.

13

Jëhui chõ jẽicua si

¹ Aque mose que mbia Jesús mbiirandu Pilato riĩ nda. Pilato nda mbia Galilea jenda mo iquia iquia ra. Mbia ticuasu iquia iquia mose Dios mbaerã. ² Jesús que ñee mbia je ra. —Ae Pilato iquia iquia quia nae, ¿ùquĩ icuãte riqui reĩ mbia ataque si re? Tei. Jẽicua ja chõ jẽingo nguiã ã no. ³ Jëhui eã mose jẽicua si, jemanõ ja chõ nda jẽ abe. Ùquĩ na si. ⁴ Sã torre de Siloé ngoi mbia ati

no. Dieciocho iquia. ¿Ūquĩ eicuãte riqui reĩ mbia ataque si re? Tei. ⁵ Eĩ ja chõ ñene. Jẽhui eã mose jẽicuã si, jemano ja chõ nda jẽ abe. Ūquĩ na si, i que Jesús ra.

Ira ia ea mbei

⁶ Jesús que ñee mbia je ra. —Sã amei mo ira tiquia rei no. Ia eã mbei chõ ee no. “Ma taso erea no. Ia cote reae”, i rei que amei nda. Ei oreãte que ee ra. ⁷ Nyebe amei ñee nguĩã ngũimba je cote. “Ira a rea ngue aso rei nguĩã. Ia eã mbei chõchĩ seje tres años. ¡Echisia chõ oso jẽ! Ibi riquisã ñooño uã aque”, i que amei ngũimba je ra. ⁸ Sã erimba ñee amei je no. “Co tenda mose nandechisia eã na. Equi tambuturã. Mbae ruusi tachono ñono erao rese. ⁹ Ma ia eãte co tenda. Ia eã mose, nandechisia chõ cote”, i que erimba amei je ra, i que Jesús mbia mbaaquiату ra.

Jesús ari rasi mbucherõ

¹⁰ Sábado mose que Jesús chi mbia mbaaquiату quiату ra. Judíos chumunuásaa. ¹¹ Cuña ndasi mo ngue siqui hue ra. Nyiituquia bei dieciocho años nyee. Aba checuayã icuã nguia embasi nguĩã. Ari que nguete isoã mbei quia ra. ¹² Jesús que mae ari rasi rese ra. —Echu rã aa, i que ee ra. —Cuña, nderasi ãte cote, i que Jesús ee ra. ¹³ Jesús que o chono eresẽ ra. Aque mose tuchi que ari nguete iso turã cote ra. Ari que ñee turã turã Dios je cote ra. ¹⁴ Ererecua judíos munuasa que paama i tuchi Jesús je ra. Ari mbucherõ mose sábado. —Sábado eã mose chõ nandeico mbae rese ae. Sábado eã mose chõ nandeico erasi mbucherõ ae. Sábado mose chõ Dios mbae resẽ. Erasi mbucherõ aroneate co mose resẽ, i rei que ererecua mbia je ra. ¹⁵ Jesús que ñee ee ra. —¿Mbaerã ereico ndeturã naa ñooño nde? ¿Sábado mose jẽingo ticuasu mbui eã mbei embiu sacuã nde? ¹⁶ ¿Mañi nande ra cuña ndasi mbucheroã co sábado mose re? Judía sí chõ nyeresẽ. Jẽ na si. Satanás que embasi cosete ra. Dieciocho años chee. ¿Mañi ae ra erasi mbui eã esi sábado mose re? i que Jesús ñee nda. ¹⁷ Mbia ataque iate que Jesús cheẽ mose ra. Jesús chiaõ rese abe eyate no. Ae Jesús ucuayãte quia, ũquĩ ngue eireĩ tuchi Jesús cheẽ mose ra.

Mbae eĩ na ño Dios rimba re

¹⁸⁻¹⁹ Jesús que ñeembe mbia je cote ra. —¿Mbae rã ño Dios rimba chã? Mbae eĩ na ño Dios rimba re. Sã mbia mostaza eĩ tiquia no. Ieĩ ñetẽte raque etiquia ramo mose. Suri oso quia cote. Ecuasu tuchi chee cote. Nguireĩ uquisa saã nyee erãquiã ndese. Eĩ si chõ Dios rimba re. Ūquĩ miĩ ndaque nyii. Ñimbeta tuchi cote. Mbae eĩ na.

Levadura rã ño Dios rimba re

²⁰⁻²¹ ¿Mbae rã ño Dios rimba chã? Levadura rã ño Dios rimba re. Sã mbia levadura ñetẽ mondo mbichae ao ramo mose no. Levadura oso quia mbichae mbuchimatã ja no. Eĩ si chõ Dios rimba re, i que Jesús ra.

Eiquesa chumumbi

²² Jesús que oso quia Jerusalén nda. Tiba tiba que oso quia mbia chuchua mbuchesea sea ra. Mbia mbaaquiату quiату. ²³ Emo ngue ñee Jesús je ra. —Sererecua, ¿mbia miĩ miĩ ño nda siqui ibate nderese re? i que emo ñee Jesús je ra. ²⁴ Jesús que ñee ee ra. —¿Eiquesa chumumbi rĩ ño jẽso ique jẽ! “Hue rĩ nda aso se abe ique”, i ja jate raque rae. Tei. Ique ja eã nguia nda re. ²⁵ Emo mose ra eiquesa amatã mbei cote. Emo nda iqueã mbei cote. Eiquesa ra jembuu mbuu raque cote. “Sererecua, eiquesa embuquiata rã ure je”, jenye raque ra seje cote. Acheẽ nda jẽje. “¿Mangue jenda jẽ nde? Jaẽicuayãte se”, ae ra jẽje cote. Eiquesa ra ambuquiatayã mbei jẽje cote. ²⁶ Jeñee tuchi raque ra seje cote. “Urequiaru que equia nderese. Nde que urembaaquiату quia. ¿Mañi ere ra urerecha re?” jenye raque ra seje cote. ²⁷ Acheẽ nda jẽje cote. “Jaẽicuayãte se. Jẽso serecha. Mbae icuã ngue jẽsaã saãte quia resẽ”, ae ra se hue cote. ²⁸ Hue ra jenyeseo seo seje huee cote. Jeñee nda seje. “Abraham ño siquichĩ nderese hue. isaac abe no. Jacob abe no. Dios cheẽ mbuchecuaa ja abe no. Ure chõ urecuchĩ taicuee a”, jenye ra nyeseo seo seje huee. ²⁹ Mangue jenda chooñoa nda ngaẽ ngaẽ Dios riichã aque mose. Quiaru quiaru ra equia Dios rese. ³⁰ Ae eaquiature riqui raque namo nae, ũquĩ mo nda eñetẽ na pee cote. Ae eaquiатуãte riqui raque

namo nae, ũquĩ mo nguia ra siqui ecuasurã tuchi pee cote, i que Jesús ñee nda.

Jesús ia eã tuchi Jerusalén jenda rese

³¹ Aque nyaashĩ mose que fariseos ngaẽ ñee Jesús je ra. —¡Eso a si jẽ! Herodes ndeiquia serĩte quia co, i que Jesús mbi-irandu ra. ³² Jesús que ñee ee ra. —Eoita rã ño Herodes re. Jẽso ñee ee. “Jesús que ñee ndeje ra. “Taico mbĩrimbe rã aba checuayã icuã jea jea mbia si. Taico mbĩrimbe rã mbia rasi mbucherõ cherõ. Namó. Isamami abe. Isamami nongue ra ahui erecha cote’, i que Jesús ndeje ra”, jenyé oso Herodes je. ³³ Taicobe jiri namó. Isamami. Isamami nongue abe no. Jerusalén nguia nda sei quia nguia. Sã Dios cheẽ mbuchecuaa mano ja Jerusalén no. ³⁴ Tacheẽ na jẽje, Jerusalén jenda. Seya eãte aicochĩ jendese co. Hue jẽingo mbia i quia i quia beite hue. Dios cheẽ mbuchecuaa i quia i quia. Dios chimondo abe i quia i quia no. Sã nguira riqui nguire reaquiato mundo ujeoqui re no. “Eĩ tae jendeaquiato”, ae beite rei nguia jẽje co. Secheẽ jẽisi sereã mbei chõchĩ nguia ã. ³⁵ ¡Aico jendecha a cote jẽ! Jemae mae eã nda serese cote. “¡Co chi Dios rucucha ru quia co cote jẽ!” jenyé mose, hue ramo nguia ra jemae serese cote.

14

Jesús mbia rete ruru mbucherõ

¹ Jesús que oso rei quiaru fariseo rerecua mo nyuchúaa ra. Sábado mose. Fariseos mo ngue chi erea chemi ñemi nda. ² Huee que emo ndasi riqui Jesús je ra. Erete ruru ja que ra. ³ Jesús que ñee fariseos je ra. Embesasa je abe. —¿Eicuãte se erasi mbucherõ mose sábado mose re? I ere. Jeñee seje, i rei que Jesús ee ra. ⁴ Jesús cheẽ mose que mbia mo ñee eãte ee ra. Jesús que erasi mbucherõ mondo cote ra. ⁵ Jesús que ñee fariseos je ra. —Sã jenimba ticuasú riqui jaã no, ngoi oso ibicua rie. ¿Sábado mose ra jẽsiquiã nde? i que Jesús ee ra. ⁶ Fariseos que ñee sereãte echeẽ mose ra.

Jẽcuasu ra jẽsaã saãchĩ, i Jesús mbia je

⁷ Mbiam que erenda turã isirõ sirõ nguia ra. Ngoi sacua ererecua ji. Ucuasu raã naa

sacua. Nyebe Jesús ñee nguia ee. ⁸ —Jẽingo mose fiesta, jerenda turã mo nda jẽsirõchĩ jẽ! Mbiam chi cuate mo nda tu arõ ndeje cote. ⁹ Fiestacha ra ñee arõte ndeje. “Ehuã na nde. Erenda turã tamondo sequiato je”, i arõte ra ndeje. Ndeireĩte ra huee cote. Pe quiti jiri ra nembucoi cote. ¹⁰ Jẽingo mose fiesta, pe quiti jiri chõ jengoi. Erenda turã isirõ nocoĩ. I nda fiesta ñee ndeje. “Quiatuchu a jiri, Sequiato. Erenda turã tose”, i sacua ndeje. I nda mbiam mae ja nderese. ¹¹ Ae ererecua saã saã nguia nae, ũquĩ nda siqui eñetẽ na cote. Ae siqui minguete quia nae, ũquĩ nda siqui ererecuarã cote, i que Jesús mbiam je ra.

¹² Fiestacha abe je que ñee cote ra. —Nde fiesta raã mose, “jenyu quiaru serese”, jerechĩ nda mbaecha jiri je jẽ! Erechĩ nda ndenongue je. Erechĩ nda ndequiato tuchi je. Ũquĩ mose ra embuchebi ndeje. Dios quia ra embuchebiã ndeje cote. ¹³ Nde fiesta raã mose, “jenyu quiaru serese”, ere chõ mbaecha reã je. Ere chõ mbiam rasi rasi je. Mbiam cuatayã je. Mbiam resayã je. ¹⁴ Nde fiesta raã naa mose ũquĩ je, ũquĩ nda embuchebiã ndeje. Dios quia ra embuchebi ndeje, Dios quiato quera si mose. Ũquĩ mose ra ndeya tuchi, i que Jesús fiesta je ra.

Ererecua quiaru mbaecha reã ndese

¹⁵ Ũquĩ andu mose que emo ñee Jesús je ra. —Ababi tuchi siqui Dios rese ae ererecua tuchi mose, i que emo ñee Jesús je ra. ¹⁶ Jesús que ñee ee ra. —Sã emo fiesta raã no. “Jenyu quiaru serese”, i sacua mbiam tubiriã je. Mbiam chiurã ngue esaã tuchi ra. ¹⁷ Echiurã quiche ja mose que ngũimba mo mondo cote ra. “Ae je acheẽ, sã ecuaẽ quiaru cote”, i que ngũimba je ra. ¹⁸ “Ateẽ. Aso eã nda se. Serecoteãte chõchĩ”, i ja ja que ra. “Ibi mo ngue aisi ramote ra. Taso rã erea”, i que emo ucheẽ mondo fiesta je ra. ¹⁹ “Ticuasú mo ngue aisi ramote ra. Cinco yuntas. Taso rã erea”, i que emo ucheẽ mondo no nda. ²⁰ “Seninisirã mo areco ramote co. Nyebe ra asoã quiaru nderese huee”, i que emo ee no nda. ²¹ Erimba que tu nyebi ñee nguerecua je ra. “Erecoteã ja jate que ra. Quiaru

eã nda nderese”, i que erimba embiirandu ja ra. Ererecua que paama i ra. Ngaẽ eã mose erea. Ae ñeembe nguiã ngũimba je. “Eso ñee ùquĩ je quiatu no. Mbaecha reã je. Mbia rasi rasi je. Mbia cuatayã je. Mbia resayã je. Ûquĩ ja je echeẽ. Sã ecuaẽ quiaru serese”, i que ererecua ra. ²² Emo mose jiri que erimba ru ñee nyebi ee ra. “Acheẽ ñee ja que ee ra. Co ecuaẽ ndaque nguiã co. Mbia miite que ra”, i que erimba ñee fiestacha je ra. ²³ Ererecua que ñeembe ee ra. “Esobe ñee ñee emo je no. Eru ja sechuchua. Quiaru sacua serese. † nda sechuchua mbiitãya jiri. ²⁴ Ae je acheẽ nyii, ùquĩ nda quiaruã tuchi serese cote”, i que ererecua ñee asi ra, i que Jesús ñee nda.

Jesús rui aba siqui jei aronea

²⁵ Mbia tubiriã ngue siqui quia Jesús rui ra. Jesús que uba ñee ee ra. ²⁶ — Ae nyesecua tuchi quia ngu rese sesi, ùquĩ nda serimba eã. Ae nyesecua tuchi quia usi rese sesi, ùquĩ nda serimba eã no. Ak nyesecua tuchi quia ngũinisi rese sesi, ùquĩ nda serimba eã no. Ae nyesecua tuchi quia nguiĩ ndese sesi, ùquĩ nda serimba eã no. Ae nyesecua tuchi quia ngõngue ndese sesi, ùquĩ nda serimba eã no. Ae nyesecua tuchi quia ngueco rese sesi, ùquĩ nda serimba eã no. Ûquĩ ja ra serimba eã. ²⁷ Ae mano sereãte serĩ, ùquĩ nda serimba eã no. Ae siqui sereãte quia serui, ùquĩ nda serimba eã no. ²⁸ Sã emo ñee no. “Sechuchua tasaã na”, i. “¿Manya mbae isiquia ra amumba sechuchua raã sacua nde?” i nyii eao nonde. ²⁹ Sã uchuchua raã naa ndaque no. Huaẽ tiquia tiquia raque. Hui bei chõ esi cote. Hue mbia iquia iquia ee cote. ³⁰ “Co uchuchua saã saã ndei cose. Saã ja eã mbei chõchĩ nae”, i ra mbia iquia iquia ee. ³¹ Sã soldados rerecua icua icua emo je no. Guerra raã serĩ ee. Guerra raã nonde ra ndua ndua. “Ae quiatu que soldados tubiriãte embae sesi ra”, i uchiangui re cote. ³² Nyebe guerra raã eã nguiã ee. Nyebe ucheẽ turã mondo nguiã ee. Isho mose. “¡Nandeico turã ño nyiese jê!” i ee. ³³ ¡Eĩ jenye si chõ nguia jê! Jendua rã nguia nyii. Jê jembae recha ja eã mose, serimbarã eã nda jê.

Embiquesa ise quiachamba mose

³⁴ Embiquesa turãte raque. Embiquesa ise quiachamba mose, eicua tuchi cote. ³⁵ Ñio ye echã aronea cote. Eicuãte cote. Emombo bei chõ cote. Ae eisate riqui, secheẽ jeñandu, i que Jesús ra.

15

Oveja quiachã je

¹ Mbia icua ngue Jesús siichã nguia ra. Ae impuestos isi isi quia, ùquĩ abe que Jesús siichã nguia ra. Echeẽ andu sacua. ² Nyebe fariseos ñee icua icua nguiã Jesús rĩ. Embesasa abe ñee icua icua nguiã erĩ no. — ¿Mbaerã Jesús riqui mbia icua isi turã turã nde? ¿Mbaerã eriqui quiaru erese re? i que equia ñee Jesús mbutereã tuchi ra. ³ Nyebe Jesús ñee nguiã ee. Embaquiatu sacua.

⁴ — Sã emo nimba quiachã oveja no. Cien ndei erimba. Co mi ngue quiachã ee ra. Aque esi quia quiachã je requia aque. Eataque recha. Noventa y nueve recha. ⁵ Quiachã je rea mose, sui cote. Equiaama cote. Eya tuchi erese cote. ⁶ Tu uchuchua cote. “Quiatuchu rã”, i uquiato je cote. Nguesenda je abe no. “Quiachã je que atea cote ra. ¡Sã jê! Jêya tuchi serese cote”, i que uquiato je ra. ⁷ Tacheẽ nyecua jêje. Quiachã je mo nyebi mose, Dios iate riqui co. Mbia icua tu mose ee, Dios iate riqui erese co. Ae uturã saã saã nguia nae, ae huicua secha sereãte quia nae, ùquĩ ndese quia Dios ia eãte re.

Mbae isiquia quiachã je

⁸ Sã cuña mo mbae isiquia diez quereco no. Sã aque mi quiachã ndaque ee no. Lamparina ngue emendi eresae sacua nda. Sã uchuchua tii no. Mbae isiquia rea chee. ⁹ Ereare que ñee uquiato ja je ra. “Quiachã je que atea cote ra. ¡Sã jê! Jêya tuchi serese cote, i que uquiato je ra. ¹⁰ Aico ñee nyecua jêje a. Mbia mo hui mose huicua si, ángeles ibatenda ia tuchi erese, i que Jesús ra.

Ae ngu secha

¹¹ Jesús que ñeembe ee ra. — Sã amei mo eriĩ nyeremo no. ¹² Eriĩ ndiqui que ñee ngu je ra. “Paba, mbae isiquia ataque embu rã se sembaerã. Ndemanon de”, i que ñee ngu je ra. Ae eru mbae isiquia

mbuchecha nguiã ee. Mondo eo cote. ¹³ Isamami nongue que eriirĩ nduinda umbae rerecoquiato ra. Ae oso nguiã isho cote. Ngu recha. Huee que mbae isiquia umbae mumba chooño ja ra. Mbae icuã ndibishorõ. ¹⁴ Hue jenda mbia chiũ que uate cote ra. Amei ndiirĩ abe riãcuã nyee que ra. Umbae mumba chooño jare. ¹⁵ “Taquiei quiei rã oso ererecua mo je”, i chee. “Teasu socoi esaarõ na serimba”, i chee ererecua mo ee. ¹⁶ “Teasu chiũ au chõ mbichĩ ira a. Seriãcuã tuchichĩ”, i chee amei ndiirĩ. Emo ngue embuquiaruã mbei ra. ¹⁷ “Paba rimba chichĩ quiaru turâte sechuchua huee, seriãcuã mose aa. ¹⁸ Tasobe rei Paba rea. Tacheẽ ndei oso ee. ‘Seicuã tuchite que ndeje curi ra, Paba. Paba ibatenda je abe no. ¹⁹ Seriirĩ ere eã seje cote. Nderimbarã taico cote’, tae rã oso Paba je”, i que ndua ndua uchiangui re cote ra. ²⁰ Ngu rea que esi cote ra. Isho ereco mose que eru mae erese ra. Amei ia eã tuchi que eriqui erese ra. Amei ngue oso uchã nguiirĩ ndese oo ra. Equiaama. Eritii riite no. ²¹ Ngu je que eriirĩ ñee ndei cote ra. “Seicuã tuchite que ndeje curi ra, Paba. Paba ibatenda je abe no. Seriirĩ ere eã seje cote”, i rei que ngu je ra. ²² Eru que ñee ngũimba je cote ra. “Eirao turã mo emondo seriirĩ je. Eiyaorã abe mo emingue ee. Anillo mo abe emingue eo rese. ²³ Ticuasú quira mo jẽquishĩ echo je. Nandequiaru tuchi erese. Fiesta nandesaã ee. ²⁴ Seriirĩ ngue mano naanguia oso curi resẽ. A eru quera si raanguia seje a. Quiachã tuchi que oso serecha ra. A erube seje a cote”, i que amei ngũimba je ñee nda. Eya tuchi cote. Nyebe fiesta raã nguiã nguiirĩ je.

²⁵ Amei ndiirĩ nongue que siqui úcoo ra. Ngasẽ ndaque u quia uchuchúaa cote. Tõotõ i que echandu ra. Mbia cheĩ cururi abe andu. ²⁶ Ñee ngue erimba mo je ra. “¿Mbaerã eriqui toõtõ i re? ¿Mbaerã mbia riqui nyuruqui re?” i que amei ndiirĩ ndiquii ra. ²⁷ Erimba que ñee ee ra. “Ndenongue que tu ngasẽ nderu je ra. Nyebe ticuasú iquia nguiã ee”, i que erimba ñee ee ra. ²⁸ Ae enongue paama i nguiã ngu je. Ique sereã nea ngu chuchúaa. Ae eru tu nguiã usẽ ñee ee taicuee. “Eique rã mae ndenongue rese”, i rei que eru ee ra.

²⁹ Eriirĩ ngue ñee ngu je ra. “Cosete que aico rei quiei quiei ndeje. Ndecheẽ ngue amumba mumba eãte quia emo mose. Mbae mo ngue ereiquia eã mbeite seje. Sembae fiesta raã sacua sequiato rese. ³⁰ Ae tu ramo nderiirĩ, ¿mbaerã ticuasú mo ereiquia ee re? Umbae que emumba chooño oso curi resẽ. Siqui siqui cuña icuã ndese. ¿Mbaerã ereico fiesta raã ee re?” i que eriirĩ ngu je ra. ³¹ Eru que ñee echeẽ mose ra. “A ereico beite serese a resẽ, Echo. Sembae ja chõ nembraerã ndesẽ. ³² Ndenongue quiato que quiachã nandesĩ resẽ. Mano naanguia oso nandesĩ. A eru si quera raanguia nande je a. Nyebe fiesta nandesaã ee. Nandeya tuchi rã erese”, i que eru nguiirĩ nongue je ra, i que Jesús mbia je ra.

16

Ererecua rimba mo iquito

¹ Jesús que ñee uchimbaaquiatu je ra. —Sã ererecua mo mbaechate riqui no. Erimba mo ngue embae saarõ ja quia ra. “Nderimba que nembrae mbuquiachã quiachã nguia ra”, i que mbia mo ererecua mbiirandu cote ra. ² Ererecua que ñee ee ra. “¿Mbaerã mbia riqui ñee nderĩ seje re? ¿Cuentas esaã saã mbia mbae ja jẽ! Sembae raarõsa eã nda nde cote”, i que ererecua ngũimba je ra. ³ Erimba que ndua ndua uchiangui re cote ra. “¿Mañi ae ra sequia sererecua se mombo mose re? Sequirãcuã neate quiei quiei sacua ndesẽ. Seireite ache ache i mbia je. ⁴ Ñũquĩ ño nda asaã ee nda. ¿nda mbia seisi turã uchuchúaa sembae eã mose”, i que erimba uchiangui re ra. ⁵ Ae deber i quia ererecua je, ñũquĩ je que erimba ñee nda. Co mii mii je. “¿Manya deber ere sererecua je re?” i que erimba emo je ra. ⁶ “Cien latas de aceite que deber ae ee ra”, i que erimba je ra. Erimba que ñee ee ra. “Nembrae cuenta nandemombo chõ. Emo nandesaã asi. Cien eã nda cote. Cincuenta achõ ño nda cote”, i que erimba ee ra. ⁷ Ae deber i quia ererecua je, ñũquĩ mo je que erimba ñee no nda. “¿Manya deber ere sererecua je re?” i ee. “Cien bolsas de trigo que deber ae ee ra”, i que erimba je ra. Erimba que ñee ee ra. “Nembrae

cuenta nandemombo chõ. Emo nandesaa asi. Cien eã nda cote. Ochenta achõ ño nda cote”, i que erimba ñee ee ra. ⁸ Ererecua que jirandu erese cote ra. “Serimba aracua chõ eriquichĩ nde no”, i que ererecua ra. Mbia ibi jenda aracua tuchi chõchĩ Dios quiato si. ⁹ Acheẽ tuchi quia jẽje co. iMbae isiquia jemondo mondo quia ibatenda je jẽ! Eĩ nda jẽquiato jiri. Eĩ nda Dios jẽisi quiatu turã ibate jembae ua mose. Huee ra jẽingo bei cote.

¹⁰ Ae mbae ñetẽ saarõ turãte quia, mbae tubiriã abe ra esaarõ turã nguia. Ae mbae ñetẽ saarõ turã eãte quia, mbae tubiriã abe ra esaarõ turãya nguia no. ¹¹ Jẽ jembae mondo turã eã mose Dios je, Dios ra mbae turã mondo eã jẽje ibate. ¹² Jẽ Dios mbae raarõ turã eã mose, ¿aba quia ra mbae mondo jẽje jembraerã tuchi cote re? ¹³ Co mi erimba siqui aronea ererecua nyeremo ndese. Ererecua nyeremo mose, huee ra erimba nguerecua nongue ucuãya. Ererecua nongue ra ebite. Ae ndua beite quia mbae isiquia rese nae, ùquĩ siqui aroneate Dios rese. Ae siqui beite quia Dios rese nae, ùquĩ ndei ndua eã jiri mbae isiquia rese, i que Jesús ra.

¹⁴ Fariseos que chi Jesús cheẽ andu ja ra. Mbae isiquia quiato tuchi que ùquĩ nda. Nyebe ñee icuã nguĩ Jesús cheẽ mose. ¹⁵ Nyebe Jesús ñee asite nguĩ ùquĩ je. — Jẽ nguiarei jeturã jembuchecua tuchi mbia resaa. Dios quiarei jeñiangui renda icua tuchi quia co. Ae eturã abareãte riqui mbia je nae, ùquĩ Dios ucuãyaate quia co.

Dios cheẽ nda io ja

¹⁶ Moisés chimbesa que mbia mbaaquiato quiatu nyii ra. Dios cheẽ mbuchecuasa chimbesa abe que mbia mbaaquiato quiatu nyii ra. Juan tu nonde. Juan ngue Dios cheẽ turã senei senei cote ra. “Mbia rerecuarã tuchi ra Dios cote”, i bei que Juan nguia ee cote ra. Nyebe mbia riqui nguĩ ñee. “Dios rimba ra se”, i tuchi mbia quia ã cote. ¹⁷ Ibei ua arõte quia co. Ibi abe ua arõte quia co no. Embesa ji Dios cheẽ nguia ra uayã mbei. Io ja rae.

Eicuãte ngũinisi mombo mose

¹⁸ Mbia ngũinisi mombo mose, ngũinisiã mo nderequia mose, eicuã tuchi ùquĩ. Adulterio, i que ùquĩ je ra. Ae eru mombo, emo aque rerequia mose, eicuãte ùquĩ abe no.

Mbaecha mo oso tata cuasu

¹⁹ Sã mbaecha tuchi mo ndiqui no. Huirao turã mingue mingue bei. Huirao nininya mingue mingue bei. Fiesta que esaã saã mbei quia ra. Umbae mbae isiquia mumba choõno mbae rese. ²⁰ Sã mbaecha reã mo abe riqui no. Lázaro, i que ee ra. Erete reechu echu que ra. Huee que Lázaro riqui chĩ mbei ngoi ra. Mbaecha chuchua taronda jii. ²¹ Lázaro riãcuã ngue ñee mbei quia ra. “Mbaecha chiu rire nda au rã ña”, i tuchi que equia uchiangui re ra. Ñooño ngue ngaẽ ngaẽ nguia erete reechu rere rere ra. ²² Lázaro mbaecha reã ngue mano cote ra. Angeles que equerao mbae turãsa Abraham ndea ra. Mbaecha abe que mano nda. Mbia que echati ra. ²³ Mbaecha que oso tata cuasu cote ra. Isho que mae Abraham ndese ra. Lázaro abe. ²⁴ Sã ñeemombo mombo Abraham je no. “Paba Abraham, ndeya eã jiri serese ae. Serasite aico tata réndii a. Lázaro embu rã. Sã o mbia rã i je sechuru mbia sacuã”, i rei que mbaecha ñeemombo Abraham je ra. ²⁵ Abraham ngue ñee ee cote ra. “Mbae tubiriãte que nembae nyii resẽ. Lázaro quiatu que mbae rasi saã tuchi quia nyii ra. A eriqui turãte a cote, nde nderasi rasi mose cote. ²⁶ A jenda mo oso aroneate erasa ndeje hue. Hue jenda abe tu aroneate erasa ure je aa no”, i que Abraham mbaecha je ra. ²⁷ Mbaecha que ñeemombobe Abraham je ra. “Lázaro chõ emondo Paba chuchúaa no, Abraham. ²⁸ Hue senongue cinco chi hue. Sã Lázaro si ñee ee. Embiirandu. I nda ecuaẽ eã mbae rasi raã a”, i rei que mbaecha ñee Abraham je ra. ²⁹ Abraham ngue ñee ee ra. “Ndenongue Moisés chimbesa rerequia hue. Dios cheẽ mbuchecuasa cheẽ abe rerequia hue no. Sã ùquĩ mumbayã”, i que Abraham ee ra. ³⁰ Mbaecha que ñeembe Abraham je ra. “Embesa ji rerequia raque. Mano je oso mose ñee ee, aque cheẽ nguia ra emumbayã cote. Huicuaã nda esecha cote”, i rei que mbaecha ñee Abraham je ra.

³¹ Abraham ngue ñee ee ra. “Ndenongue Moisés chimbasa mumba mumba mose, mano je cheẽ abe ra emumba no. Eraaque mo quera si je ñee mose ee, aque cheẽ abe ra emumba no”, i que Abraham ñee mbaecha je ra, i que Jesús ra.

17

Mbae icuã nda nandesaã uquiachĩ emo je

¹ Jesús que ñee uchimbaaquiatu je ra. — Mbae icuã nguiarei siqui bei tuchi mbia mbicua nonde. Ae ñee nguia mbia je nae, “mbae icuã esaã” i nae, eicuã tuchi chõ ñquĩ nde. Ae “mbae icuã esaã” i nae, ñquĩ nda mbae rasi saã tuchi cote. ² Ae ra mbae icuã saã uquia seicuaasa mo je nae, ñquĩ nda mbae rasi saã tuchi cote. Ñquĩ nda aba mombo chõ ama ndisa ye nyii re chã. Sita resebe ecua ji mondo. † nda mbae icuã naa uquia eãte rei seicuaasa je. ³ ¡Jẽingo chooñoa ño nguia jẽ! Nderesenda icuã mose ndeje, echeẽ ño ee. “Nandeico turã ño”, ere ee. Hui mose huiacuã si, eicuã si etesarei chõ nde. ⁴ Sã nderesenda mbae icuã naa naa siete veces ndeje no. Sã ñee ndaque siete veces ndeje no. “Mbae icuã nda asaã eã ndeje cote”, sã i raque ndeje no. Eicuã si etesarei chõ, eicuã mbei bei raque, i que Jesús ñee ee ra.

Jẽ Dios icua jiri mose, eĩ nda mbae mo jeñee mumba eãte rei

⁵ Jesús chimbaaquiatu que ñee ee ra. — Dios eicua tuchi rã ure je, i que ñee Jesús je ra. ⁶ Jesús que ñee ee ra. —Jẽ Dios icua jiri mose, i nda mbae mo jeñee mumbayãte rei. † nda jeñee ndei ira je. “Nde ae echisiqui. Nde ae si echitiquia ama ndisha ite re”, i ira je. † nda ira jeñee mumbayãte rei, jẽ Dios icua jiri mose.

Dios rimbachõ ño nande re, jenyẽ chõ nguia

⁷ Sã emo nimba mo ndiqui bei turuquia rĩ ticuasuu raarõ arõ no. Ecuasẽ mose tuchúaa, ¿mañi nda ererecua ñee jei ee re? “Equiaru rã”, i jei ee re. ⁸ Tei. I jei eã nda ee. “Sechurã esaã naa seje. Sequiaru eteaquiatu rã nyii. Aquere quia terequiaru nde”, i chõ nda ererecua ee. ⁹ Ererecua ra gracias i eã ngũimba je. Erimbachõ ño ñene.

¹⁰ Eĩ si chõ jẽ no nde. Dios rimbachõ ño jẽ no nde. Ae rĩ Dios riqui ñee jẽje, ñquĩ naa ja mose, ¡jẽingo mingue chõ nguia ee jẽ! “Ae rĩ Dios ñee nande je nae, ñquĩ mii ño ngue nandesaã nda. Erimbachõ ño nande re”, jenyẽ chõ nguia ico mingue, i que Jesús ra.

Jesús mbia leproso ata mbucherõ

¹¹ Jesús que ngata si Jerusalén icha rui ra. Galilea rĩ ngue écoi quia ra. Samaria rĩ abe que écoi quia ra. ¹² Jesús que ngasẽ sucha tubiriã moo nda. Hue que mbia rasi mo chi ee ra. Diez que ra. Eire rasi ja que ra. Lepra, i que ñquĩ mbia rasi je ra. Erasi que chi icúe isho jiri Jesús si ra. ¹³ Ñquĩ mbia rasi que ñeemombo mombo Jesús je ra. —¡Jesús! ¡Mbia mbaaquiatusa! Urembucherõ na ae, i que ñeemombo mombo ee ra. ¹⁴ Jesús que mae erese cote ra. Ñee ngue ee ra. —Eno. Jẽso jendete reacuquia sacerdotes je, i que Jesús ee ra. Ecuata mose chõ ngue nyerõ ja ra. ¹⁵ Ucherõ ndese mae mose que co mii ndu nyebi ñee Jesús je ra. Eya tuchi que ñeemombo mombo Dios rĩ nda. ¹⁶ Ngoi que ngũia ndese Jesús resa quiti ra. Nyibi que u ñee ee ra. Gracias i tuchi que Jesús je cote ra. Samaria jenda que ae ra. Judío eã ngue ra. ¹⁷ Jesús que ñee nda. —Eatate que ambucherõ. ¿Ma eataque ma nde? ¿Ma nueve ma nde? Nyebiã ñochĩ ecuaẽ gracias i seje. ¹⁸ Co mii tuchi chõ tuchĩ nyebi gracias i Dios je co. Judío eã ndaque, i que Jesús ra. ¹⁹ Jesús que ñee erasi je cote ra. —Ehuã. Eso cote. Nde que seicua ra. Nyebe arembucherõ nguia, i que Jesús ee ra.

Mbia chiangui re quiatu Dios riqui nguia mbia rerecuarã

²⁰ —¿Manosete ra Dios ru íbii mbia rerecuarã tuchi re? i que fariseos ñee Jesús je ra. Jesús que ñee ee ra. —Mbia ra mae eã erese. ²¹ “¡Aa chõ Dios riqui mbia rerecuarã jẽ!” iã ndae. “¡Pee chõ Dios riqui mbia rerecuarã jẽ!” iã nda eno. Mbia chiangui re quiatu Dios riqui nguia mbia rerecuarã, i que Jesús ra.

²² Jesús que ñee uchimbaaquiatu je cote ra. —Namo jiri ra jẽ seosei osei setiã mose cote. “Jesús nda siqui mbirĩ na nanderese chã”, jenyẽ rei nda re. ²³ “Hue Cristo riqui hue”, ichõiño nda mbia jẽje serĩ. “Pe eriqui

pe”, ichõĩño nda jẽje no. “Nyia” jenyechĩ nda ee jẽ. Ñeeñoõño ndae. ²⁴ Sechecuayã nguia ra achuã. Mbia ra mae ja quiatu senininya rese seru mose. Sã mbia riqui mae jate ama pirirã i rese no. Eĩ ae quia ra u mbia mumae ja. ²⁵ Sechube nonde ra mbia icuã tuchi seje. Mbae rasi ra asaã tuchi rã. Ae siqui namo ã mbia, ùquĩ nda seririrõ tuchi rã. ²⁶ Sã Noé mosenda mbia siqui sereã tuchi Dios rese no. Eĩ si ra mbia siqui sereã Dios rese sechu nonde no. ²⁷ Sã Noé mosenda mbia quiaru choõño no. Ndua rocoĩ Dios rese. Sã ngũinisirã nderequia choõño no. Sã mbae raã ñooño ndua rocoĩ Dios rese no. Sã Noé ique chee arca ye no. Sã ama ndicuasú tu cote no. Sã mbia mano ja no. ²⁸ Sã Lot mosenda abe mbia no. Sã quiaru choõño no. Sã mbae isi isi choõño no. Sã mbae eĩ tiquia choõño no. Sã uchucharã naa ñooño no. Sã mbae raã ñooño no. Ndua rocoĩ Dios rese no. ²⁹ Sã Lot usẽ nyee hue si cote no. Sã Dios tata mbu ibate si cote no. Sã Sodoma jenda oquei ja aque mose no. ³⁰ Eĩ si ra mbia mbae raã ñooño. Seru mose chee. Ndua rocoĩ serese. ³¹ Emo siqui mose taicuee se tu mose, ique eã nda uchuchua umbae rerecoquiatu. Ae siqui úcoo, nyebiã nda u uchuchua no. ³² ¡Lot ninisi rã nda jẽingochĩ jẽ! ³³ Ae ngueteãte quia nguenco rese nae, ereco ra quiachã esi. Ae ngueteã eãte quia nguenco rese nae, aque reco quia ra quiachãya esi. ³⁴ Sechu mose, aque isa ra nyeremo chi uque quisa ye. Co mĩ nda arao. Enongue ra siquichõ. ³⁵ Cuña nyeremo nda chi mbua tocho no. Co mĩ nda arao. Enongue ra siquichõ no. ³⁶ Mbia nyeremo nda chi úcoo no. Co mĩ nda arao. Enongue ra siquichõ no, i que Jesús ra. ³⁷ —¿Mangue ra ùquĩ mangue re, Jesús? i que echimbaaquiatu ra. Jesús que ñeembe ee ra. —Ae rĩ mbae raaque riqui chi nae, huee ra urubu choi ja tuchi, i que Jesús ra.

18

Eru cheecha ñee chĩbe ibe ererecua mo je

¹ Jesús que ñee uchimbaaquiatu je ra. — Sã mbia riqui ñee mbei Dios je. Sã tesareã mbei ñee Dios je. ²⁻³ Sã eru cheecha mo ndiqui no. Oso chĩbe ibe ñee ererecua

je no. “Ae sembae quereco nae, sã aque sembae meembe seje”, i chĩbe ibe ererecua je. Dios quiatoã ndaque ererecua. Mbia quiato biãte raque aque ererecua. ⁴⁻⁵ Ererecua que eru cheecha cheẽ ñanduchõ nyii ra. Eru cheecha que ñee i i tuchi ee ra. Ererecua que ndua chee uchiangui re ra. “Ari riqui ñee chĩbe ibe tuchi chĩ seje co. Echeẽ tamumbayã na”, i chee que ererecua ra, i que Jesús ñee uchimbaaquiatu je ra. ⁶ Ñeembe que ee ra. —Sã ererecua ari cheẽ mumbayã nyee no. Ererecua icuãte raque. ⁷ Eĩ nda Dios uquiato cheẽ mumbayã no. Dios quiato riqui ñee ñee mbei Dios je co. Arõ mose. Isa abe. Dios riqui uquiato ucuãyãsa riisu isu raque co. ⁸ Dios ra uquiato cheẽ mumbayã nyee cote. Se tube mose ibi manya sequiato ra chi bei ñee Dios je reae, i que Jesús ra.

Mbia nyeremo ñee Dios je

⁹ Ucuasu raã naasa mo ngue chi Jesús je ra. Mbia ataque ririrõte que equia ra. Mbia ataque isi teã teã mbei. Nyebe Jesús ñee nguiã ùquĩ je. ¹⁰ —Sã mbia nyeremo nyo ique Dios chuchua no. Ñee Dios je no. Co mĩ ngue fariseo ra. Enongue que impuestos isi isi quia ererecua mbaerã nda. Mbia mbĩrĩ irĩsa que ae ra. ¹¹ Fariseo que ñee ndei Dios je ra. “Dios, seturãte se. Mbia icuã na eã ño se re. Co mbia mbĩrĩ irĩsa rã eã ño se re. Mbae mbuquiachãsa eã ño se no nde. Acheẽ ñooño eã ño se re. Emo ninisi rese aicoãte se. Mbia ambĩrĩ irĩ ãte quia co. ¹² Aquiaruã mocoĩte quia ndua bei nderese co. Diezmos amee mee mbeite quia ndeje co”, i rei que fariseo ñee Dios je ra. ¹³ Aba mbĩrĩ irĩsa que chĩ isho ra. Uãquĩ ngue embucheseco ibi quti ra. Uchiã ngue eisi ñee Dios je ra. “Ndeyayã ño serese, Dios. Mbae icuã asaã saã mbei chõchĩ nguia co. Seyayã tuchi chĩ seicuã ndese”, i que ñee Dios je ra. ¹⁴ Tacheẽ nyecua rã jẽje. Dios que aba mbĩrĩ irĩsa cheẽ isi turã nda. Ico mingüete quiatu nguiã ñee ñee Dios je. Fariseo quiatu ngue uturã saã saã mbeite nguiã ñee Dios je. Nyebe Dios echeẽ ñanuate nguiã. Ae ucuasu saã saã nguia nae, ùquĩ nda Dios isiãte. Ae ico tochei quia Dios je, ùquĩ nguiatu ra Dios isi, i que Jesús ra.

Jesús mbia riirĩ isi turã turã

¹⁵ Mbia que nguiirĩ ngurucuaẽ cuaẽ nguia Jesús je ra. Jesús oco oco sacuaẽ erese. —¿Mbaerã jendiirĩ jendu quia co re? i rei que Jesús chĩmbaaquiatsu ñee mbia je ra. ¹⁶ Jesús quiatu que ñee nda. —Tei. Jẽsecha. Sã nguiirĩ ndurucuaẽ seje. Eĩ ño Dios rimba re. Mbia riirĩ na. Ucuasu raã naa eã. ¹⁷ Mbia riirĩ na ño jẽingo Dios isi turã. Eĩ jenyẽ mose, Dios rimba tuchi ra jẽ cote, i que Jesús ra.

Acuanĩndu mbaecha mo ñee Jesús je

¹⁸ Ererecua mo ngue ñee Jesús je ra. —Mbia mbaaquiatusa turãte nde. ¿Mañi ae ra se siqui bei nonde ibate re? i que ererecua ñee Jesús je ra. ¹⁹ Jesús que ñee ee ra. —¿Mbaerã ereico eturã i seje re? Dios mii ño eturã ndesẽ. ²⁰ Dios cheẽ ereicuate resẽ: “Emo ninisi rese ra ereicochĩ. Mbia mo nda ereiquiachĩ no. Mbae ra erembuquiachãchĩ. Erecheẽ ñoñochoĩ nda emo nii. Ndeturã ño nderu je. Ndeturã ño ndesi abe je”, i que Dios cheẽ nda, i que Jesús ñee ererecua je ra. ²¹ Ererecua que ñee ndei Jesús je ra. —Ũquĩ ngue amumbayã ja bei quia ra. Señetẽ mosenda bei, i rei que ererecua ra. ²² Jesús eandu mose que ñee ee ra. —Mbae mii mo abe eresaã eãte. Ña abe esaã. Nembae emondo mondo ja mbia mbaecha reã je. Nde ũquĩ naa mose, mbae tubiriã nda nde, ndeico mose ibate. Nembae mondo ja mose mbaecha reã je, serueico cote, i que Jesús ee ra. ²³ Ererecua Jesús cheẽ andu mose que echosoi oso serite cote ra. Mbaecha tuchite quiatu ngue ae re. ²⁴ Jesús que mae mbaecha ia eã ndese ra. Ñee ngue mbia je cote ra. —Mbaranguiatu ãte mbaecha je ngasẽ sacuaẽ ibate Dios rese. ²⁵ Sã ticuasú mo ndiqui oso aroneate aguja sorei rĩ no nae. Eĩ si chõ mbaecha no nde. Oso aronea ibate Dios rese, i que Jesús ra. ²⁶ —¿Aba quia ra oso Dios rea re no? i que mbia Jesús je cote ra. ²⁷ Jesús que ñee ee ra. —Ae mbia saã aroneãte quia nae, Dios mii ño nda esaã, i que Jesús ee ra. ²⁸ Pedro que ñee Jesús je ra. —Ure que urembae uresecha ja ra. Siqui sacuaẽ nderui, i que Pedro ee ra. ²⁹ Jesús que ñee ee ra. —Emo umbae recha ja mose Dios rĩĩ, Dios ra esibishorõ tuchi ee. Ae uchuchua secha. Ae

ngu secha. Ae usi secha. Ae ngõngue secha. Ae ngũinisi secha. Ae nguiirĩ secha. ³⁰ Ũquĩ mbae ja ra Dios sibishorõ tuchi. Ibii mbia reco bei mose. Aquere ra Dios emingo bei ibate cote, i que Jesús ra.

Mbia ra seiquia, i si Jesús

³¹ Jesús que ñee icúee uchĩmbaaquiatsu doce je ra. —Co nandesó quia Jerusalén co. Ae Dios cheẽ mbuchecuasã mbesa mbesa quia serĩĩ nyii nae, ũquĩ nda io ja cote. ³² Mbia ra semee judíos eã je cote. Mbia ra secheẽ naa naa. Ñee icuã tuchi ra seje. Ninimbu nimbu ra serese. ³³ Seiruã nua ndae. Seiquia ra cote. Tres nyaashĩ mose ra aquera si, i que ñee ee ra. ³⁴ Echĩmbaaquiatsu que echeẽ icuayãte ra. —¿Mbae rĩĩ eriqui ñee nande je re? i que nyue ra.

Jesús eresayã mo mbucherõ Jericoo

³⁵ Jesús Jericó rurubi mose que eresayã mo ndiqui ee ra. Ñeenda jie que eñi ache ache i mbia je ra. ³⁶ Eresayã ngue mbia tubiriã quicoi chandu ra. —¿Mbae ere? i que eresayã emo je ra. ³⁷ —Co Jesús coi quia co. Nazaret jenda coi quia co, i que emo eresayã je ra. ³⁸ Eresayã ngue ñee mombo ra. —¡Jesús! ¡David rucucha! ¡Ndeya eã ño serese jẽ! i que eresayã ñee Jesús je ra. ³⁹ Ae rane nyoĩ quia, ũquĩ ngue ñee ndei eresayã je ra. —¡Equiriri chõ jẽ! i rei que ee ra. —Jesús, ¡ndeya eã ño serese jẽ! i bei bei que Jesús je ra. ⁴⁰ Jesús que tiba cote ra. —Eresayã jendu rã, i que mbia je ra. Eresayã ngue oso Jesús rĩichã cote ra. ⁴¹ —¿Mañi ae ra ndeje re? i que Jesús ñee ee ra. —Seresa embaturã na, Sererecua, i que eresayã nda. ⁴² Jesús que ñee ee ra. —Nderesa que cote ra. Seicuate quiatu ngue se re. Nyebe arembucherõ nguiã, i que Jesús ee ra. ⁴³ Aque mose tuchi que eresayã ndesa turã cote ra. Mae turã ngue cote ra. Jesús rui que esi quia cote ra. Ñee turã turã tuchi que equia Dios rĩĩ cote ra. Ae mae erese nae, ũquĩ abe que ñee turã ja quia Dios je cote ra.

19*Taico nderese, i Zaqueo Jesús je*

1 Jesús que ngasẽ Jericoo cote ra. Sucha tubiriã ite rĩ ngue esi quia ra. 2 Mbia mbaecha mo ngue siqui ee huee ra. Zaqueo, i que ee ra. Aba mbiirĩ irĩsa que ae ra. Impuestos isi isiquia rerecua que ae ra. 3 — Jesús rese tamae. Jesús taicua rã, i rei que Zaqueo ra. Mbia tubiriã ngue Jesús chatite esi ra. Zaqueo jua tuchi que ra. Nyebe mae aroneate nguiã Jesús rese. 4 Zaqueo que oso uchã Jesús nonde ra. Nyui que oso ira mo ñi nda. Jesús ucua rese mae sacua. 5 Jesús que ngasẽ Zaqueoqui re cote ra. Soboiba que mae erese ra. —Equichi, Zaqueo. Taso ndechuchua nderese, i que Jesús ee ra. 6 Zaqueo que nguichi asi u cote ra. Eyate que Jesús rerao uchuchúaa ra. 7 Mbia que ñee ñee tuchi Jesús rĩ cote ra. —¿Mbaerã Jesús si quia mbia icuã nyuchúaa aque re? i tuchi que mbia ñee nda. 8 Zaqueo que juã ñee Jesús je ra. —Sererecua, tacheẽ ndeje. Sembae tachisia nyibite rĩ mondo sacua mbia mbaecha reã je. Ae asirõ ñooño mbia si nae, ñquĩ tambuchebibe ee. Eata tambuchebibe ee, cuatro veces, i que Zaqueo Jesús je ra. 9 Jesús que ñee ee cote ra. —Arerirõ ngue mbae icuã si namo nda. Judiate quiatu nde re. 10 Quiachã je requia chõ achu nguiã ibate si co. Quiachã je mingo bei sacua abe chõ achu nguiã ibate si co no, i que Jesús ra.

Mbae isiquia jembaata, i ererecua ngũimba je

11 Mbia que Jesús cheẽ ñandu turã nguia ra. Jerusalén ndurubite que echoi quia ra. —Mbia rerecuarã ja ra Jesús cote reae, i rei que mbia quia ndua ndua ra. Nyebe Jesús ñee nguiã ee. 12 —Sã mbia mo ndiqui oso ibimo isho tuchi no. “Mbia rerecuarã eico nde cote”, i nonde mbia pe jenda ee. Aquere ra eru mbia rerecuarã cote. 13 Sã ñee ja ngũimba je oso nonde no. Diez rei erimba. Mbae isiquia atate que embuchao chao ngũimba je ra. “Ã mbae isiquia jembaata ata oso quia. Sechu mose chee”, i que ngũimba je ra. 14 Sã hue jenda mbia aque ucuãyãte no. Comisión ngue emondo ra. “Aque urebiãte urererecuarã”, i rei que comisión mondo ra. 15 Gobierno ngue emi mbei chõ ererecuarã nda. Nyebe uba

bei u nguiã uchuchua cote. Ngũimba je que ñee cote ra. Ñquĩ diez. Ae je eriqui mbae isiquia mondo nae, ñquĩ. “¿Sechimee mbae isiquia jembaata ata rei re?” i jaaja que ngũimba je ra. 16 Erimba mo ngue ñee ee ra. “Ae. Aque mi ngue ereme ndei seje nyii, ambaatate que se cote ra. Diez que cote ra”, i que nguerecua je ra. 17 Ererecua que ñee ee ra. “Coche ñene. Serimba turãte nde. Mbae ñetẽ ngue eresaã turãte quia secheẽ nguire ra. Nyebe mbae cuasu tamondo ndeje cote. Diez pueblos rerecuarã nda nde cote”, i que ererecua ngũimba ñiinda je ra. 18 Erimba nongue que tu ñee ee cote ra. “Aque mi ngue ereme ndei seje nyii, ambaatate que se cote ra. Cinco que cote ra”, i que nguerecua je cote ra. 19 Ererecua que ñee ae abe je no nda. “Eno. Cinco pueblos rerecuarã nda nde cote”, i que aque ngũimba je ra. 20 Erimba nongue que tu ñee ee cote ra. “Co nembae mbae isiquia co. Tiru ye que areco bei ra. 21 Sesiquichete quiatu ngue ndesi re. Erequeteãte quiatu nguiã mbae rese. Ndechitiquia eã abe ereishao shaote quia co. Nyebe nembae mbae isiquia areco quiatuchõ ño nguiã ndeje”, i que aque nguerecua je ra. 22 Ererecua que paama i tuchi ñee ee ra. “Serimba icuã tuchichĩ nde re. Nde si chõ erecheẽ nguiã sembiirandu. ‘Nembae que ambaata eãte ra’, ere chõchĩ. ‘Areco quiatuchõ ño nguiã’, ere chõchĩ. Se ngueteã mose mbae rese ndeje ¿mbaerã secheẽ eremumba re? 23 ¿Mbaerã sembae mbae isiquia eremondo eã banco re? ¶ nda ñimbaata jiri rei seje”, i que ererecua ñee asi aque ngũimba je ra. 24 Ae chi huee, ñquĩ je que ererecua ñee nda. “Ae sembae quereco chooño nguia nae, jẽsirõ na esi. Ae diez quereco quia nae, aque je jemondo”, i que ererecua ra. 25 Mbia que ñee ererecua je ra. “¿Mbaerã nda re? Eatate ae resẽ. Diez que ae resẽ. ¿Mbaerã nda emo abe eremondo ee re?” i que mbia ñee ererecua je ra. 26 Ererecua que ñee ee ra. “Ae embaete nae, mbae tamondobe ee. Ae mbae quereco ãte quia nae, embae tasirõ ja esi. 27 Seucuãyãsa jendu ja rã. Ae ñee nguia seriĩ. ‘Aque urebiãte urererecuarã’, ae i quia seriĩ. Ñquĩ jendu ja. Ñquĩ jẽiquia

ja sésaa”, i que ererecua ra, i que Jesús ñee mbia mbaaquiату ra.

Jesús ngasē Jerusalén

²⁸ Jesús cheē jare que ngata si Jerusalén icha rui ra. ²⁹ Jerusalén ndurubite que echoi ngasē nda. Betfagé, i que hue sucha je ra. Betania, i que hue sucha erurubinda je no nda. Ibi ibate abe que chí huee ra. Monte de los Olivos, i que ee ra. Hue si que uchimbaaquiату nyeremo mondo cote ra. ³⁰ —Aichi súchaa chō jēso rā. Burro riirī cuasa ra chí jēje hue. Ae ato emo nyui āte. Jenyura seru seje. ³¹ “¿Mbaerā nda jenyura re?” i mose emo jēje, jeñee ee. “Nandererecua que jendu i ra”, jenyee ee, i que Jesús ũquĩ nyeremo mondo ra. ³² Nyoĩ que súchaa ra. Ae rĩ Jesús ñee ee nae, ũquĩ ngue nyecua ja ee cote ra. ³³ Burro riirī ngue etea ra. Era mose que echa ñee ee ra. —¿Mbaerā jēingo era era re? i que ee ra. ³⁴ Jesús chimbaaquiату que ñee ee ra. —Nandererecua que jendu i ra, i que echa je ra. ³⁵ Burro riirī ngue ecuruchoi Jesús je cote ra. Echimbaaquiату que huĩrao chono ñono burro arō nda. Mbía que Jesús mbuchui burro ato cote ra. ³⁶ Jesús ngata mose burro ato, mbía que huĩrao mbiitee ee ibi rĩ nda. Jesús nonde. Jesús oso sacuañ hue rĩ. ³⁷ Jesús quiato tubiriã tuchi que nyoĩ quia erese ra. Monte de los Olivos icha re ngasē mose, Jesús quiato que tasē tasē tuchi ra. Eya tuchi que ra. Ñee mombo mombo turā ngue Dios je cote ra. —Jesús riqui mbía mae sayā naa naa tuchi mbía je co, i que ñee mombo mombo turā Dios je ra. ³⁸ Mbía ia tuchi que tasē tasē nda. —Co nandererecua ru quia ngasēte co. Co Dios chimbu ru quia ngasēte nande je co. Dios turā tuchite nande je, i que mbía ia tuchi ra. ³⁹ Fariseos mo abe que chi huee ra. ũquĩ ngue ñee ndei Jesús je ra. —Ndechimbaaquiату embaasē asē eã jiri ae, i rei que Jesús je ra. ⁴⁰ Jesús que ñee ee ra. —Sequiato ñeemombo mombo eã mose seriĩ, eĩ ndei ra sita ñeemombo mombo seriĩ cote, i que ñee nda.

⁴¹ Jesús que ngasē seriĩte oso quia Jerusalén cote ra. Sucha checuate que esi quia ee cote ra. Jesús ia eã tuchi que

Jerusalén ndese ra. Nyeseo que erese cote ra. ⁴² Jesús que ñee sucha tubiriã je cote ra. Jerusalén je. —Seyayā tuchi aico nderese co, Jerusalén. Mbía mbiasa ereicuayā mbei chōchĩ nguia co. Echecuayā mbei chō eriquichĩ ndeje co. ⁴³ Mbae rasi ra eresañ tuchi cote. Ndeucuayāsa ra nderiquisā tuchi cote. Nemama nda ecuaē. ⁴⁴ Sucha ra embucoi ja ndeyenda. Sita ra embucoi ja tuchi mbía chuchua si. Mbía ra mano ja ndeyenda cote. Dios quiату ngue ereisiã mbeite nguiã. Dios sembu mose nderea, aque mose abe que seisiãte no nda, i que Jesús ñee Jerusalén je ra.

Jesús mbía mbaesē Dios chuchua si

⁴⁵ Jesús que oso Dios chuchúaa ra. Huee que mbía riqui mbae isi isi querabe ra. Mbae mondo mondo abe mbae isiquia ribishorō. Jesús que ũquĩ mombo ja Dios chuchua si ra. ⁴⁶ Jesús que ñee mbía je ra. —“Mbía cheēsa Dios je”, i ra mbía Dios chuchua je”, i que embesa ji ra. Jē nguia jēicuã tuchite Dios chuchua je re. Mbae mbuquiachāsa chucharā ño jēsaãte chí nguiã Dios chuchua je, i que Jesús ũquĩ je ra. ⁴⁷ Jesús que mbía mbaaquiату quiату bei quia Dios chuchúaa ra. Ererecua cuabēte que mae icuã icuã nguia erese ra. Sacerdote rerecua. Embesasa abe no. Mbía rerecua ja. ũquĩ ererecua ja que ñee ñee nguia nyue ra. —¿Mañi nande ra equia Jesús iquia sacuañ nde? i que ererecua quia ñee ñee nyue ra. ⁴⁸ Ererecua que Jesús iquia aroneate ra. Mbía tubiriãte quiату que Jesús chandu quia ra.

20

¿Aba nembu re? i mbía ñee Jesús je

¹ Emo mose que Jesús riqui mbía mbaaquiату quiату Dios chuchúaa ra. Ererecua que ngaē ja ñee ee ra. Sacerdote rerecua. Embesasa abe no. Amei abe no. ² ũquĩ ngue ñee ja Jesús je ra. —¿Mbaerā ereico mbía mbaaquiату quiату re? ¿Aba “mbía embaaquiату quiату” i ndeje re? i que ererecua ja Jesús je ra. ³ Jesús que ñee ee ra. —Se rane tacheē jēje. Se rane preguntar tae jēje. ⁴ ¿Aba ñee Juan je re? “Eso bautizar i mbía je” i ee re. ¿Dios eã ño ere no? Jeñee seje, i que Jesús ee ra.

⁵ Ererecua que ndua ndua ja u ra. Ñee ñee ngue u nyue ra. —¿Mañi nande ra echeë ndobeishĩ nde? “Dios que Juan mbu ra”, nande aroneate. Eĩ nda ñee nande je. “¿Mbaerã jëingoãte erui re no?” i quiarei ra nande je. ⁶ “Dios eã ngue embu ra”, nande aroneate no. Mbia ataque ra paama i tuchi nande je. Nandei ei ra sita je. Juan quiato tuchi que mbia, i que ererecua ñee ñee nyue ra. ⁷ Ererecua que ñee nyee Jesús je ra. —Ureicuayãte. Aba chõ Juan mbu. Bautizar i sacua, i que ererecua ñee ja ee ra. ⁸ Jesús abe que ñee ee cote ra. —Se abe ra acheë eã jêje no. Aba chõ “ã esaã” i seje. Acheë eã nda jêje no, i que ererecua je ra.

Uva raarõsa icuã icuã nguerecua je

⁹ Jesús que mbia mbaaquiatu quiatu cote ra. —Sã mbia mo ndiqui no. Sã ibicha mo ndiqui no. Sã ibicha riqui uva i tiquia tiquia no. Sã ibicha riqui “sembae uvas jësaarõ”, i emo je no. Sã eriqui oso itõte no. ¹⁰ Uva quiche mose que echa ngũimba mo mondo rei umbaerã ndea ra. Ae uva saarõ nguia nae, ùquĩ ngue eisi icuã tuchi ra. Ucuu ucua que erese ra. Eochi que emondo mbuchebi ra. ¹¹ Echa que ngũimba mo mondo rei ereabe no nda. Aque abe que eraarõsa isi icuã no nda. Ucuu ucua que aque abe rese no nda. Eochi que emondo mbuchebi ra. ¹² Echa que emo abe mondo rei ra. Aque abe que eiruã nua mondo mbuchebi no nda. ¹³ Echa ia eãte que ra. “¿Mañi ae ra se re? Seririĩ quiatu tamondo erea cote. Ùquĩ nda ireĩ ireĩ jiri esi cote reae”, i rei que echa ra. ¹⁴ Uva raarõsa mae mose erese que ñee nyue ra. “¿Co eririĩ ndu quia co cote jê! ¿Nandei quia rei jê! ¿nda uvas nandembaerã ae cote”, i que ñee nyue ra. ¹⁵ Eraarõsa que eririĩ querao pe jiri eiquia ra. Eriiriĩ ngue mano cote ra. ¿Mañi nda echa quia eraarõsa je cote re? ¹⁶ Echa ra oso eraarõsa iquia ja cote. Ibi ra emondo emo je cote. Eraarõ sacua, i que Jesús mbia je ra. —¿Ùquĩ nda iquechĩ jê! i que mbia ra. ¹⁷ Jesús que mae erese ñee ee cote ra. —¿Ã embesa ji rese jemae ãte re? Sã emo ndiqui tuchia ao sita je no. Sã sita mo ndirirõ mombo no. Eicuãte eriqui reĩ nguia ee. Aquere Dios emundua si erese.

“Earonda sacua turambi chõ eriqui re”, i ndua si uchimombo rese. Sã uchimombo rirõ si cote no, i que embesa ji ra. ¹⁸ Ae ra nyoĩ ngoĩ aque sita arõ nae, ùquĩ nda huẽ. Aque sita ngoĩ mose emo arõ, ùquĩ nda mano, i que Jesús ra. —Aque sita rã ndei se, i chõ ngue re.

¿Impuestos ra uremee ererecua je re? i mbia ñee Jesús je

¹⁹ —Nanderĩ ño Jesús riqui nguia ñee a. Nandei rei serao jê, i rei que sacerdotes rerecua ñee nyue ra. Embesasa abe no. Ùquĩ ngue paama i ja Jesús je ra. Jesús isi aronea tuchite que mbia résaa ra. Eireite quiatu ngue mbia tubiriã si re. ²⁰ Ererecua que mbia icuã mondo mondo quia Jesús cheë andu andu ra. —¿Jeturã jësaã saã oso Jesús je jê! ¿Echeë ndese jenyiisaquia quiatu ure je jê! Mbae mo nii ñee icuã mose, ¿nandei rei jê! Ererecua tuchi je nandemondo cote, i ja que ererecua ñee nda. ²¹ Ae chi uturã naa naate Jesús je nae, ùquĩ ngue ñee ee ra. —Jesús, co ereico mbia mbaaquiatu quiatu turãte co. Mbia jaje ndeturãte riqui co. Mbia erembaaquiatu quiatu turãte quia Dios icha rĩ co. ²² Nyebe ureico nguia ñee ndeje a. ¿Coche mbia mbae isiquia mee mee mose Romano nderecua je re? ¿Uremee nda ee re? ¿Uremee eã nda ee re no? i que ñee Jesús je ra. ²³ Jesús que ùquĩ icuã icuate ra. Nyebe ñee nguia ee. —¿Mbaerã jëingo “ĩ nda Jesús ucheë nyabi”, i seje re? ²⁴ Mbae isiquia mo jëteacuquia imbu seje. ¿Aba mbae nombre ñi mbae isiquia rese a re? ¿Aba ãquĩ aingue abe ñi a re? i que Jesús ee ra. —Romano nderecua, i que ñee Jesús je ra. ²⁵ Jesús que ñee ee cote ra. —Romano nderecua mbaerã jemee ño ee. Dios mbaerã jemee ño ee, i que Jesús ee ra. ²⁶ Jesús que ucheë nyabi aroneate ee ra. Ùquĩ ngue nyuruira jate u Jesús cheë andu ra. Nyebe eriqui ñee eã ee cote.

Mbia raaque ra quera si, i Jesús

²⁷ —Mbia raaque ra quera eã mbei, i que mbiamo nguia ñee nda. Saduceos i que ùquĩ je ra. Ùquĩ mo ngue nyoĩ ñee Jesús je ra. ²⁸ —Ã ngue Moisés mbesa nande je ra: “Emo eririã mano mose, ngũinisi recha mose, sã enongue mano je ninisi rerequia.

Sã tiirĩ ngõngue raaque riĩ”, i que Moisés embesa nande je ra. ²⁹ Sã eriqui mo ndiqui no. Eribi que seis ra. Eriqui que ngūinisirã quereco rei ra. Mano ño ngue tiirĩ ndocoĩ ngūinisi recha ra. ³⁰ Enongue que nguiqui cheecha quereco rei cote ra. Ae abe que mano ño tiirĩ ndocoĩ no nda. ³¹ Enongue abe que equereco rei cote no nda. Ae abe que mano ño tiirĩ ndocoĩ no nda. Ũquĩ seis ja que ngõngue cheecha quereco ja rei ra. Mano ja tuchi chõ ngue tiirĩ ndocoĩ no nda. ³² Eninisi eru cheecha abe que mano ño nyee cote ra. ³³ Siete que eru nyii resẽ. Mbia raaque quera si mose, ¿abate ra equereco cote re? i que saduceos ñee Jesús je ra. —Ma Jesús ñee icuã no, i chõ ngue re.

³⁴ Jesús que ñee ee ra. —Aa chõ mbia riqui nguiã ngūinisi rerequia querabe. Siqui mose íbii. ³⁵ Ae raaque ra Dios mbuquera si nae, ae ra Dios mingo bei nyiese nae, ũquĩ nda ngūinisi quereco eã mbei huee cote. Ũquĩ nda ngu quereco eã mbei huee cote no. ³⁶ Huee quiatu ra mbia manoã mbei. Angeles rã mbei ra mbia riqui huee cote. Dios riirĩ tuchi ra eriqui huee mose cote. Embuquerái quiatu ra cote. ³⁷ Moisés abe que mbia mbiirandu ra. “Mbia raaque quera quera bei quia co”, i que Moisés ra. “Se rei Dios. Abraham nderecua chõ aico nguiã co. Isaac nderecua abe. Jacob nderecua abe no’, i que Dios ra”, i que Moisés embesa ra. Ira ruri rendi mose que Dios Moisés mbiirandu ũquĩ ndese ra. ³⁸ Ũquĩ mano ndaque nyii. Ũquĩ ndeco siqui bei chõ nguiã ũquĩ. Mbia raaque rerecua eã ño Dios re. Mbia reco rerecua chõ ñene. Mbia reco ja chõ siqui nguiã Dios je ã, i que Jesús ee ra. ³⁹ —Ndecheẽ turãte, i que embesasa mo ñee Jesús je ra. ⁴⁰ Ae “Jesús nandembicua” i rei quia, ũquĩ ngue ñee eã Jesús je cote ra.

¿Aba rucucha Cristo re?

⁴¹ Jesús que ñee mbia je ra. —Se abe tacheẽ jẽje cote. ¿Mbaerã mbia riqui ñee nde? “David rucucha chõ Cristo re” i re. ⁴² David si que “sererecua” i Cristo je ra. Sã David chimbesa Salmos no: Dios que ñee Cristo sererecua je ra. “Ecoi seji.

Nde abe ra ererecua serese.

⁴³ Ae ndeucuãyãte quia nae, ũquĩ je ra ndequirãcuã ateacuquia tuchi.

Ndequirãcuã tuchi chee ra ũquĩ si”, i que Dios sererecua je ra,

i que David embesa ra. ⁴⁴ David si chõ “sererecua” i nguiã Cristo je. ¿Mañi nda David rucucha Cristo re? Jeñee ño seje, i que Jesús ũquĩ je ra.

Jesús ñee asi embesasa je

⁴⁵ Mbia ja résaa que Jesús ñee uchimbaaquiatu je cote ra. ⁴⁶ —¿Embesasa rã ño nda jẽingochĩ je! Ũquĩ ucuasu saã saã mbeite quia ã. Huĩrao turã equereco beite quia ã. “Sã mbia ererecua i nande je”, i beite equia ã. Mbia renda turã abe eirabo rabo beite quia mbia si ã. “Fiestacha jii quia taĩ jẽ”, i abe bei equia ã no. ⁴⁷ Ari eru cheecha mbae abe embutiã tiã nguia ã no. Ucheẽ oco abe esaã saã mbeite quia Dios je ã no. “I nda mbia mae nanderese”, i chõ nguiã. Ũquĩ nda Dios mbasi tuchi cote, i que Jesús uchimbaaquiatu je ra.

21

Eru cheecha mbaecha reã mo mbae mo mee Dios je

¹ Jesús que nyoĩ nyoĩ quia Dios chuchúaa ra. Hue que mbia mbaecha riqui ofrenda mondo mondo ofrenda riru ye ra. ² Eru cheecha abe que siqui ra. Ae que centavos nyeremoño mondo ofrendarã nda. Mbaecha reãte quiatu ngue ae re. ³ Jesús que ñee nda. —Tacheẽ tuchi jẽje. Eru cheecha mbaecha reã ngue mbae mondo tuchi mbia ataque si ra. ⁴ Mbaecha quiatu que umbae rire ñetẽ mondo mondo ra. Eru cheecha quiatu nbbbbknnnknnnnnnn gue umbae mĩi mondo ja nguiã, i que Jesús ra.

Mbia ra Dios chuchua mbucoĩ ja, i Jesús

⁵ Mbia que ñee ñee Dios chuchua turã ñii nda. Tuchua mbarõ ji sita turã ñii. Mbae aba queteamba riĩ abe no, Dios chuchua jenda. Jesús que ñee mbia je cote ra. ⁶ —Ae rese jẽingo mae nae, ũquĩ nda mbi-amo mbutiã ja cote. Sita mo nda chi eã nyuchuarõ cote. Mbia ra tuchia mbucoĩ ja tuchi. Dios chuchua ra chí eã juã cote, i que Jesús ra.

Mbae ua ja nonde

⁷ —¿Manose ra ũquĩ nde? ¿Mañi ure ra equia irandu mbae ua nonde re? i que Jesús chimbaaquiato ee ra. ⁸ Jesús que ñee ee ra. —Jētesa jiri quia jē. Mbia ra jembirĩ irĩchĩ jē. “Cristo chō se re”, i ra mbia ñee ata atate jēje. “Co rei é co cote”, i ra mbia ñee ata atate jēje no. Ũquĩ nda jeñanduchĩ. Ñeeñoño je chō ũquĩ nde. ⁹ Mbia ra ñee ñee tuchi nyiquia iquia je riĩ. Guerra riĩ abe no. Ũquĩ mose ra jēsiquichechĩ jē. Ũquĩ ja rane nda nyecua raque. Aque mose ra mbae ja ua eã ná, i que Jesús mbia mbaaquiato ra.

¹⁰ —Mbia ra guerra saã tuchi chee. Nyiquia iquia tuchi rae. ¹¹ Ibi ra nyere nyere tuchi. Mbia mo abe riãcuã tuchi ra aque mose. Emo ñooñoa tuchi ra mbia rasi. Mbia mae sayã nda nyecua tuchi ibei rĩ cote. ¹² Ũquĩ nonde ra mbia icuã icuã tuchi jē je seriĩ. Nguerecua je ra mbia jenderao rao tuchi. Ererecua abe icuã icuã tuchi ra jēje. Jētarō tarō tuchi ra seriĩ. ¹³ Ũquĩ mose nda secheē jēsenei senei tuchi mbia je chã. ¹⁴ ¿Manyae ra ũquĩ ñee ndibishorō nde? jenyechĩ nda ñee ũquĩ nonde jē. ¹⁵ Se chō nda jaembucheē turã nguiã aque mose. Nyebe ra jēucuyãsa jeñee ndibishorō aroneate aque mose. ¹⁶ Jendu ra jemondo chee mbia icuã je. Jenongue abe ra jemondo chee mbia icuã je no. Jendesenda abe ra jemondo chee mbia icuã je no. Jēquiato abe no. Ũquĩ nda jemo iquia chee no. ¹⁷ Mbia ra jēucuyã tuchi seriĩ. ¹⁸ Jēsiquichechĩ nda esi. Jaendeaquiato tuchi ra aque mose. ¹⁹ Jeñimbirãcuã mose ra Dios jemingo turã mbei.

Jerusalén tiã tuchi rae, i Jesús

²⁰ Soldados Jerusalén mama mose, aque mose ra Jerusalén mbutiã cote. ²¹ Sã Judea jenda choi uchã ibi ibate riichã aque mose. Sã Jerusalén jenda abe choi uchã hue si. Ae chi isho isho Jerusalén si nae, sã ũquĩ nyebibe eã Jerusalén ndichã aque mose. ²² Aque mose ra mbia mbae icuã ja irara tuchi huicuã ñii. Embesa ji cheē nda ique ja aque mose. ²³ Aba mbia eã tuchi ra emo aquē ndiru rerequia mose aque mose. Nguiĩ mbuquiambu je abe no. Mbia ra

mbae rasi saã tuchi aque mose. Mbae icuã nda irara tuchi huicuã ñii. ²⁴ Aque mose ra mbia guerra raã tuchi. Mbia ra nyiquia iquia aque mose. Jerusalén jenda ra sasē tuchi aque mose. Mbia ra ecuruchoi choi tuchi tarō isho. Judíos eã nda chi tuchi Jerusalén aque mose. Dios ra emondochoi chee hue si cote.

Dios riirĩ nda tube ibate si

²⁵ Mbia mae sayã ndese ra mbia mae tuchi ibei rĩ cote. Tenda rese. Nyasi rese abe no. Nyasi tata rese abe no. Ama ndisha ra sieu tuchi quia aque mose cote. Mbia ra titi titi i tuchi aque mose. Quiachã tuchi rae. ²⁶ Mbia chiã nda cuaacuã i tuchi aque mose. “Mbae rasi ra nandesaã tuchichĩ nde”, i tuchi ra titi titi i. Ibei jenda abe chee ra quiata quiata cote. ²⁷ Aque mose tuchi ra achube ibii cote. Ibeishĩ ndese ra achu. Senininya tuchi ra achu. Sequirãcuã tuchi ra achu. ²⁸ Ũquĩ ndese jemaē mose, jēo jēo tuchi aque mose jē. Dios ra jendirō jei mbae icuã si aque mose cote, i que Jesús ra. ²⁹ Jesús que ñeembe ee ra. —Sã higuera riqui no. Sã ira mo ndiqui no. ³⁰ Ero quira usē ja mose, “iraro itō ndacu ra cote”, i chō mbia nguiã aque mose cote. ³¹ Eĩ si chō nda mbia mae mbae ja rese cote. Ũquĩ ndese mae mose, “achite Jesús ñi tu a cote”, jenye rae. “Mbia rerecua tuchi ra Dios cote”, jenye ra aque mose. ³² Ae siqui quia mbia aque mose nae, ũquĩ nda manoã mbae ua ja mose chee. ³³ Ibei ra ua. Ibi abe ra ua. Secheē nguiã ra uayã mbei.

³⁴⁻³⁵ Mbia ndua eã mose serese ra achu cote. Ibi jenda ja ra ambua tuchi u. Jē nguiã seraarō arō mbei quia. Mbae icuã ndese siqui rocoĩ. Quiacua siqui rocoĩ. Mbae rese ndua ata ata rocoĩ. Ũquĩ icuã ndese jēingo mose, jaembuate ra u. ³⁶ Jētesa bei quiato quia serese. Jeñee mbei quiato quia Dios je. ã mbae icuã jeĩ eã sacuã jēje. Jēingo turã sacuã serese sechu mose, i que Jesús ra.

³⁷ Nyaashĩ mose que Jesús riqui mbia mbaaquiato quiato Dios chuchua ra. Isa que eriqui oso oso bei Monte de los Olivos ra. ³⁸ Isamamimbe que mbia riqui ngae ja bei echeē andu ra. Dios chuchúaa.

22

Jesús nandeisi tarō, i ja mbia rerecua ñee nyue

¹ Achite que fiesta de la pascua cote ra. Mbichae mbuchimatã iriã ngue mbia u u quia aque fiesta mose querabe ra. ² Sacerdotes rerecua que ñee ja nyue ra. Embesasa abe no. —Jesús nandeiquia. ¿Mañi nande ra equia eiquia nonde re? i que equia ñee ñee nyue ra. Eireite que eriqui mbia tubiriã si ra. ³ Judas Iscariote, i que Jesús chimbaaquiato mo je ra. Satanás que ique aque chiangui re cote ra. ⁴ Nyebe aque si nguiã ñee sacerdotes rerecua je. Dios chuchua raarōsa je abe no. —Jesús tamondo jêje. ¿Mañi nande ra equia ee re? i que Judas ñee ee ra. ⁵ Ũquĩ iate que Judas ñee mose ee ra. —Mbae isiquia ra uremee ndeje, i que Judas je cote ra. ⁶ Judas que eno i mbia ñee mose ee ra. —Jesús tamondo rã jêje mbia tiãsa, i que ñee nda.

Jesús quiaru uchimbaaquiato rese

⁷ Fiesta que tu cote ra. Aque fiesta mose bei que mbia riqui oveja iquia iquia querabe ra. Mbichae mbuchimatã iriã ngue eu eu quia no nda. ⁸ Jesús que ñee Pedro je ra. Juan abe je. —Jêso oveja mbuchi nande je, i que Jesús ee ra. ⁹ Ũquĩ ngue ñee echeẽ mose ra. —¿Mangue ra aba embuchi mangue re? i que Jesús cheẽ mose ra. ¹⁰ Jesús que ñee ee ra. —Jengasẽ mose sucha cuasu, emo i rerao rese ra jema. I ra equerao quia irasa mo ye. Aque rui jêso bei quia ique chee echuchua. ¹¹ Tuchuacha je jeñee. “Jesús que urembu ñee ndeje ra. ‘¿Ma cuarto ra urecu quiaru oveja u que re? Sechimbaaquiato rese’, i que Jesús ñee ndeje ra”, jenye tuchuacha je. ¹² Tuchuacha ra cuarto cuasu mee jêje. Mbia quesa ibatenda ra emee jêje. Embuquiche ji. Huee chõ oveja jembuchi nandequiaru sacua, i que Jesús ñee ee ra. ¹³ Pedro que nyo i cote ra. Juan abe. Jesús cheẽ ndui si tuchi que mbae eĩ ja cote ra. Huee que oveja mbuchi cote ra.

¹⁴ Mbae quiche ja mose que Jesús ngoi uchimbaaquiato rese quiaru sacua cote ra. ¹⁵ Jesús que ñee ee ra. —Co oveja que ause tuchi quia jendese semana nonde ra. Co

mose pascua mose. ¹⁶ Pascua mo nda au eã mbei jendese cote. Dios mbia rerecua tuchi mose chee, i que Jesús ee ra. ¹⁷ Jesús que vino mbeisa isi cote ra. Gracias i que Dios je ra. Ñee ngue uchimbaaquiato je cote ra. —Co jêisi. Jembei jaaja jê. ¹⁸ Vino mo nda ambei eã mbei cote. Dios mbia rerecua tuchi mose chee, i que Jesús ra. ¹⁹ Jesús que mbichae isi cote ra. Gracias i que Dios je ra. Siquio que mbuchao chao ee cote ra. Ñee ngue ee cote ra. —Ã ndei serete rã ã. Serete ra mano jêje cote. Jendua serete riquio ji rese ã mbichae u mose, i que Jesús ñee ee ra. ²⁰ Eĩ si que Jesús vino mbeisa isi no nda. Quiaru jare. —Ã ndei seruqui rã ã. Mbia icua mbutiã sacua tuchi chõ seruqui re. Dios cheẽ yasu rui si chõ seruqui riqui nguiã mbia icua mbutiã co. ²¹ Ae ra semee mbia icua je nae, aque abe riqui quiaru serese a. ²² Co acua raque quia mano nonde co. Dios cheẽ ndui si co. Ae semee nguia mbia icua je a nae, aque ra mbae rasi saã tuchi. Aba mbia eã tuchi rae, i que Jesús ee ra. ²³ Echimbaaquiato que mae jaaja nyiese ra. —Aba tuchi ra emee mbia icua je reae, i ja jate que nyue ra.

Jesús chimbaaquiato mbia rerecua saã saã tuchi nyue

²⁴ Aquere que Jesús chimbaaquiato ñee icua icua tuchi nyue ra. —Se quia ererecua tuchi ndesi re, i jaaja que nyue ra. ²⁵ Jesús que ñee ee ra. —Mbia ataque rerecua riqui ucuasu raã naa tuchi ngũimba je ũquĩ. ²⁶ Eĩ jenyechĩ nda jê jê. “Ererecuarã se”, jenyechĩ nda jê. Ae eaquiato jiri jemo nae, sã ũquĩ ndiqui uñetẽ naa naa ño. Sã ũquĩ ndiqui tochei chõ nguia. Ae ererecua jemo nae, sã ũquĩ ndiqui ererecua rimba rã tuchi chõ. ²⁷ Ererecua ngoi chõ nguiã. Erimba mbae mee mee ño nguiã ee. Eĩ eã ño se re. Se quia mbae amee mee nguiã jêje co.

²⁸ Jê nguiato ngue jêingo beite nguiã serese. Se mbae icua irara tuchi mose. ²⁹ Nyebe ra jaemii tuchi mbia rerecuarã. Sã seru semii tuchi mbia rerecuarã no. ³⁰ Jêingo tuchi ra serese, se ererecua tuchi mose. Jêquiaru ra serese. Mbae mo abe ra jembei serese no. Israel ndiirĩ nderecua ja ra jê. Judíos rerecua ja ra jê, i que Jesús ee ra.

Jesús aicuyâte resẽ, i ra Pedro serĩ, i Jesús

³¹ Jesús que ñee Pedro je cote ra. —Simón, Satanás que ñee jeni nda. “Ndechimbaaquiату emee na seje. Tã tae rã ee. Ma siqui beite Dios rese”, i rei ngue Satanás jeni nde. ³² Acheẽ tuchite que Dios je nderĩ nda. Nde Dios icua tuchi sacua. Nde ubabe mose serese, nderesenda abe je echeẽ emingo sacua serese, i que Jesús Pedro je ra. ³³ Pedro que ñee ee ra. —Sererecua chõ nde re. Aico bei ra se quia nderese. Mbia nda sematã ndei nguiã. Mbia nda sei quia rei nguiã nderese, i que Pedro ra. ³⁴ Jesús que ñee ee ra. —Tacheẽ nyecua ndeje, Pedro. Nguira cheẽ nonde ra erecheẽ ñooño tres veces serĩ namo, Pedro. “Jesús aicuyâte resẽ”, ere chooño ño nda serĩ, i que Jesús Pedro je ra.

Embesa ji chee nda ique ja serĩ cote, i Jesús

³⁵ Jesús que ñee uchimbaaquiату je ra. —Jaemondo que mbia mbaaquiату quiату sacua nyii, jẽochi que jaemondo. Mbae isiquia mo ngue jendao eã tuchi icua. Mbae rirurã mo abe que jendao eãte. Jẽiyao eã abe no. ¿Aque mose mbae eãte jẽje re? i que Jesús ee ra. —Tei. Urembae tubiriãte que ra, i que echimbaaquiату ñee Jesús je ra. ³⁶ Jesús que ñee ee ra. —Ae jemo embae rirurã mo nae, jendao cote ae. Ae mbae isiquia mo nae, jendao cote ae. Ae echuuru eãte tiquise mo nae, sã emo isi huĩrao ribishorõ ae. ³⁷ Sã embesa ji riqui ñee serĩ no. “Mbia icua ndese ra Dios riĩ mingo chee”, i. Uqui nda ique cote. Embesa ji cheẽ nda ique ja tuchi serĩ cote, i que Jesús ñee nda. ³⁸ —Co tiquise nyeremo ñi co resẽ, i que echimbaaquiату echeẽ mose ra. —Coche ñene, i que Jesús ee ra.

Jesús ñee ngu je

³⁹ Jesús que oso usẽ taicuee cote ra. Oso que Monte de los Olivos cote ra. Eĩ mbei que ae quia oso oso huee ra. Echimbaaquiату que nyoĩ erese ra. ⁴⁰ Ngasẽ mose que ñee uchimbaaquiату je ra. —Jeñee tuchi Dios je. Satanás tã i eã sacua jẽje, i que Jesús ñee ee ra. ⁴¹ Jesús que oso pe qiti jiri esi ra. Ngoi que ngũã

ndese ñee Dios je ra. ⁴² —Paba, ndebi mose sereaciatu se, mbae rasi raã eã sacua. Ae sebite nae, uqui esaã eã seje. Ae ndebite nae, uqui nguiату esaã, i que Jesús Dios je ra. ⁴³ Aque mose que ángel mo tu ibate si ee ra. Embirãcuã sacua. ⁴⁴ Jesús ia eã tuchite que ra. —Mbae rasi ra asaã tuchi chĩ nde, i tuchi que ndua ndua ra. Ñee tuchi que Dios je ra. Eiriei ruqui que tiqui tiqui tuchi quia íbii ra. ⁴⁵ Jesús ñee jare Dios je que juã cote ra. Uchimbaaquiату rea que esi ra. I que u uque ee ra. Eya eãte quiату ngue re. ⁴⁶ Ñee ngue ee ra. —¿Mbaerã jẽingo uque a re? Jenyuruã eae. Jeñee na Dios je. Satanás tã i eã sacua jẽje, i que Jesús ee ra.

Mbia Jesús nyucua serao

⁴⁷ Jesús cheẽ ua eã mose que mbia ngaẽ jate ee ra. Judas que tu quia mbia nonde ra. Jesús chimbaaquiату raque que ae ra. Ae que Jesús si chã u eritii riite sacua nda. ⁴⁸ Jesús que ñee Judas je ra. —¿Ereico seritii riite mbia icua je sereacuquia sacua a re? i que Jesús ee ra. ⁴⁹ Jesús resenda que mae u erese ra. Ñee ngue Jesús je ra. —Urererecua, ¿tiquise ra ureuru uru mbia rese re? i que ñee Jesús je ra. ⁵⁰ Jesús resenda mo ngue tiquise uru sacerdote rerecua rimba rese ra. Eisa sia. Eisa equiatocuti quitinda. ⁵¹ —Jẽhui esi ae. Coche ñene, i que Jesús ee ra. Oco que eisa rese embucherõ nda. ⁵² Jesús rerao sacua ño mbia ngaẽ nguia reaẽ. Sacerdotes rerecua. Policía abe no. Judíos rerecua abe no. Nyebe Jesús ñee nguiã ee. —¿Mbaerã jenyu quia tiquise reru serea co re? Ira jua abe no. Mbae mbuquiachãsa isi rã ño jenyuchĩ nguia serea co. ⁵³ Tenda que amumba mumba beite rei quia jendese resẽ. Mbia mbaaquiату quiату Dios chuchúaa resẽ. ¿Mbaerã jẽingo seisiã secua aque mose re? Isa chõ jenyuchĩ serea co, mbia mae eã sacua jendese. Itondaru rãnda chõ jẽ nde, i que Jesús ee ra.

Jesús aicuyâte resẽ, ichõño Pedro

⁵⁴ Mbia que Jesús isi nyucua cote ra. Sacerdotes rerecua chuchua que eruruchoi cote ra. Pedro que oso quia ishote erui ra. ⁵⁵ Itaiee que mbia tata mbucha ra. Huee que echi ngoi tata jii ra. Pedro abe

que ngoi embirõ nda. ⁵⁶ Nyucuaaque mo ngue chĩ mae nguiatu tuchi Pedro rese ra. Tata rendi que etesaete ee ra. —Aque abe que Jesús resenda, i que mae Pedro rese ra. ⁵⁷ Pedro que ñee ee ra. —Tei. Jesús aicuayãte resẽ, ichõĩño ngue Pedro nyucuaaque je ra. ⁵⁸ Emo jiri mose que mbia mo mae Pedro rese ra. —Nde abe que Jesús resenda ra, i que Pedro je ra. —Tei. Eresenda eã ño se resẽ, ichõĩño ngue Pedro ee ra. ⁵⁹ Emo mose jiri que emo ñee ee no nda. —Jesús resenda chõ nde resẽ. Galilea jenda chõ nde abe resẽ, i tuchi que Pedro je ra. ⁶⁰ Pedro que ñee ee ra. —Tei. Ndecheẽ aicuayãte resẽ, ichõĩño ngue Pedro ee ra. Pedro cheẽ mose tuchi que nguira ñee cote ra. ⁶¹ Jesús que uba mae Pedro rese nguira cheẽ mose cote ra. Pedro que ndua Jesús cheẽ ndese cote ra. —Nguira cheẽ nonde ra echeẽ ñoño tres veces serĩ, sã Jesús i Pedro je nyii no. ⁶² Pedro ndua mose ãquĩ ndese que esi nyeseo pe jiri ra.

Mbia iquia chooño Jesús je

⁶³ Ae Jesús isi mĩ nae, ãquĩ ngue iquia iquia tuchi u Jesús je ra. Ucuu ucuu tuchi que u erese ra. ⁶⁴ Jesús resa abe que echati ra. Eruba rese que ucuu ucuu tuchi ra. —¿Aba ucuu ucuu quia nderuba rese a re? i abe que equia Jesús resa ati ji je ra. ⁶⁵ ãquĩ mĩ eã ngue eriqui ñee ee ra. Mbae ja rĩ ngue embuqueta ra.

Mbia Jesús ruruchoi ererecua chumunua mose

⁶⁶ I que nyaashĩ u quia ra. Aque mose que ererecua ñumunua ja ra. Judíos rerecua. Sacerdotes rerecua abe no. Embesasa abe no. ãquĩ ñumunua mose que Jesús ruruchoi ee cote ra. Ererecua que ñee ja Jesús je cote ra. ⁶⁷ —¿Cristo nde re? Echeẽ tuchi ure je no, i que ererecua ñee Jesús je ra. —“Cristo chõ se re”, ae raque ra jẽje, “nyia”, jenyẽ ãte ra secheẽ mose. ⁶⁸ Se abe preguntar i mose jẽje mbae mo nĩ, jeñee ãte chõ nda secheẽ ndibishorõ. Jẽhui eã abe ra sesi no. ⁶⁹ Namu jiri ra acoi Dios quiatocuti cote. Hue bei ra aĩ cote. Dios quirãcuã na si ra aico mbia rerecua cote, i que Jesús ñee ererecua chumunua mose ra. ⁷⁰ Ñee ja que Jesús je cote ra. —¿Dios rucucha chõ nde re?

i ja que ñee Jesús je ra. —Ae. Dios rucucha rei se, i que Jesús ee ra. ⁷¹ Ererecua que ñee ja nyue ra. —¿Mbaerã nda mbia Jesús icuã nenei i te nande je re? Jesús cheẽ icuã ngue nandechandu rei nande abe resẽ. Sã mbia eiquia, i que ererecua ñee ja nyue ra.

23

Mbia Jesús ruruchoi Pilato je

¹ Judíos rerecua que juã ja cote ra. Jesús que ecuruchoi Pilato je cote ra. ² ãquĩ ngue ñee icuãte Pilato je Jesús rĩ nda. —Jesús que mbia mbaaquiato icuã icuãte quia ra jẽ. “Impuestos ra jemee meecheẽ mbia rerecua je”, i chõ ngue equia mbia je ra jẽ. “Se chõ Cristo re. Mbia rerecuarã nda se”, i que equia ra, i que judíos rerecua ñee icuã Jesús rĩ nda. ³ —¿Judíos rerecua nde re? i que Pilato ñee Jesús je ra. —Ae. Judíos rerecua chõ se re, i que Jesús ee ra. ⁴ Pilato que ñee mbia je cote ra. Sacerdotes rerecua je abe no. —“Mbae icuã mo ngue Jesús saã nda”, ae aroneate erĩ, i que Pilato ra. ⁵ Judíos que ñee asite ee ra. —Jesús riqui mbia mbaaquiato icuã icuã tuchi co. Mbia mbesa chooño. Judíos mbaaquiato icuã icuã ja. Galilea jenda rane. A jenda abe chee cote, i que ñee asite Pilato je ra.

Mbia Jesús ruruchoi Herodes je

⁶ Galilea jenda, i mose que Pilato ñee ee ra. —¿Galilea jenda chõ Jesús re? i que mbia je ra. ⁷ —Ae. Galilea jenda chõ Jesús re, i que mbia Pilato je ra. Nyebe Pilato Jesús mondo nguia Herodes je. Galilea jenda rerecua quiatu ngue Herodes re. Herodes que siqui Jerusalén aque mose ra. ⁸ Herodes que maese beite quia Jesús rese ra. Jesús rese que eriqui jirandu beite ra. —Jesús nda mbia mae sayã mo saã na serésaa chã, i beite que equia ra. Nyebe eya tuchi nguia mae mose Jesús rese cote. ⁹ Herodes que ñee atate rei Jesús je ra. Jesús que ñeeã mbeite echeẽ ndibishorõ nda. ¹⁰ Sacerdotes rerecua abe que chi ra. Embesasa abe no. ãquĩ ngue ñee icuã icuãte quia Jesús rĩ nda. ¹¹ Herodes que iquia iquia chõ nguia Jesús rĩ nda. Erimba soldados abe no. Jesús ririrõ tuchi que equia ra. Tiru nininya tuchi que emingue

Jesús je ra. Ererecua raã naa tuchi Jesús je. Aquere que Herodes embuchebi mondo Pilato je cote ra. ¹² Aque mose ramo ngue Herodes quiato Pilato cote ra. Eicuã icuã mbeite que eriqui nyue nyii ra.

Jesús jêiquia mbucha ira rese, i ererecua

¹³ Pilato que mbia rerecua munua ja ra. Sacerdote rerecua. Judíos rerecua abe no. Mbia ja abe no. ¹⁴ Ñee ngue mbia je cote ra. —Jê ngue Jesús jendu rei seje ra. “Mbia mbiriã irisa chõ Jesús re”, jenze rei que seje ra. Acheẽ ocote rei que ee jêsaã ra. Ae jeñee ndei seje nae, ãquã icuã mo eãte seje Jesús rã. ¹⁵ Herodes je abe mbae icuã mo eãte Jesús rã. Herodes que Jesús mbube chõ nande je ra. ¿Mbaerã nda nandeiquia re? Mbae icuã mo ngue esaã eãte resẽ. ¹⁶ Tairuã nua ño. Aquere tambui mondo, i rei que Pilato ñee mbia je ra. ¹⁷ Pascua mose bei que Pilato riqui mbia matã ji mii mbui bei ra.

¹⁸ Mbia que tasẽ tasẽte ñeemombo mombo Pilato je ra. —Jesús eiquia. Barrabás quia embui ure je, i tuchi que mbia quia Pilato je ra. ¹⁹ Barrabás tarõ ji que chã nda. Mbia iquiasa tuchi que ae ra. Romanos nderecua je abe que eicuã icuã tuchi riqui ra. ²⁰ —Jesús quia tambui, i rei que Pilato ñeembe mbia je ra. ²¹ —Jesús embucha ira rese, i tuchi que mbia quia tasẽ i ra. ²² Pilato que ñee si ee ra. Tres veces cote. —¿Mbaerã nda Jesús aiquia re? ¿Mbae icuã esaã nde? Mbae icuã esaã eãte umano sacua. Tairuã nua ño. Aquere tambui mondo, i rei que Pilato ra. ²³ Mbia que ñee mombo mombo tuchite ee ra. —¡Eiquia jê! ¡Ira rese embucha jê! i tuchi que mbia quia tasẽ tasẽ ee ra. Sacerdotes rerecua abe que tasẽ i ite ra. Eno i chee que Pilato cote ra. ²⁴ Pilato que mbia cheẽ mumbayã nyee ra. ²⁵ Pilato que Barrabás mbui mondo cote ra. Mbia iquiasate raque ae. Ñee icuã icuãate raque ererecua je. Pilato que Jesús mee mbia je cote ra. Eiquia sacua.

Mbia Jesús mbucheseco ira rese

²⁶ Soldados que Jesús curuchoi eiquia sacua cote ra. I rei que emo u quia uco si ra. Simón, i que ee ra. Cirene jenda mo ngue ae ra. Aque que soldados isi ra. Ira

mbuchicuandasa ji rerao sacua Jesús rui. Cruz, i equia ee. ²⁷ Mbia tubiriã ngue nyoï quia eruï ra. Cuña abe tubiriã. ãquã ngue nyoï quia tasẽ tasẽ tuchi nyeseo erese ra. ²⁸ Jesús que uba mae ñee ee ra. —Cuña, jenyeseochi nguiã serese. Jenyese quia jenyeseo. Jendiiri abe rese quia jenyeseo, Jerusalén jenda. ²⁹ Mbae icuã nda tuutu tuchi jêje cote. Ae eriiri nderecua nae, ãquã nda mbae rasi saã tuchi aque mose cote. Aque mose quiatu bichi mbia riiri eã ja mbite re. Mbae icuã tuchite quia nda aque mose cote re. ³⁰ “Amano ño mbichi se”, i tuchi ra mbia aque mose cote. “Sita ibate tu chõ mbichi seati”, i tuchi ra mbia aque mose cote. ³¹ Se chee mbia riquichi sembasi mbasi a. Seicuã eã ndaque se. Mbia quiatu ra mbae rasi saã tuchi huicuã ni cote, i que Jesús ñee nda.

³² Soldados que mbia icuã nyeremo curuchoi Jesús rese eiquia sacua nda. ³³ Ngasẽ ngue ibi ibate mo cote ra. Eresa cuare, i que hue je ra. Huee que Jesús mbucha ira rese cote ra. ãquã mbia icuã abe que embucha ira rese ra. Enongue que emii Jesús quiatocuti ra. Equiatocutiã ngue enongue mii no nda. ³⁴ Mbia Jesús mbucha mose ira rese que Jesús ñee Dios je ra. —Paba, ã icuã embutiã esi. Ñimbaaquiatuãte equia seiquia ã, i que Jesús Dios je ra. Soldados que sita ñetẽ mbaaba aba o je ra. —Aba ra ja. Aba mbaerã nda Jesús irao reae, i que nyue ra. ³⁵ Mbia que chi ja tuchi mae erese ra. Ererecua abe chee que chi iquiasa Jesús je ra. —Ma ndequirãcuãte. Mbia que erembucherõ cherõ tuchi quia. ¿Mbaerã ereico eã ãte ndechue nde abe re? Dios riiri nde reaẽ, i que ererecua u iquiasa Jesús je ra. ³⁶ Soldados abe que iquiasa chõ nguia ee ra. Vinagre chiquino ngue emee ndei ee echimbei sacua nda. ³⁷ —¿Mbaerã ereico nguichi ãte ira si nde ae re? Judíos rerecua rei nde reaẽ, i que soldados iquiasa Jesús je ra. ³⁸ Mbia que embesa ji mii Jesús ãquã quiti ibate ra. JUDIOS RERECUA CHÕ CO RE, i que embesa ji huã nda. Griego cheẽ. Latín ñee abe no. Hebreo cheẽ abe no.

³⁹ Ae mbia icuã mbucheseco ji chi Jesús

rese nae, ùquĩ mo ngue ñee icuã Jesús je ra. —¿Mbaerã ereico nguichiã nde ae re? ¿Mbaerã ereico urembuquichiãte ure abe re? Dios riiĩ nde reaẽ, i que ùquĩ mo ñeemombo Jesús je ra. ⁴⁰ Enongue que ñee ee ra. —¿Mbaerã ereico ñee ùquĩ Jesús je re? ¿Ndesiquiche ãte eriqui Dios si re? Ereico mano Jesús rã si a resẽ. ⁴¹ Nandeico mano nandeicuã ñii a resẽ. Jesús quiatu que mbae icuã saã eãte rei resẽ, i que enongue ñee ee ra. ⁴² Aque sí que ñee Jesús je cote ra. —Jesús, endua serese nde ererecuarã mose, i que ñee Jesús je ra. ⁴³ Jesús que ñee ee ra. —Tacheẽ nyecua ndeje. Ereico ra serese namo Dios rese seico mose, i que Jesús ee ra.

Jesús mano cote

⁴⁴ Tenda chí mose nandeite re que itondaru ru cote ra. Ibi ja que itondaru ra. Itondaru beite que ra. Tenda nyesecco chee. Tres horas que ra. ⁴⁵ Tenda cuute que aque mose ra. Tiru mbucheseco ji Dios chuchua jenda que nyisia turã nda. ⁴⁶ Jesús que ñee mombo ngu je ra. —Paba, aso quia nderea aque, i que ra. Mano ngue cote ra. ⁴⁷ Soldado rerecua que mae tuchi huĩ erese ra. Ae que ñee turã Dios riĩ cote ra. —Mbae icuã naasa eã tuchi chõ Jesús riqui re, i que maende erese ra. ⁴⁸ Mbia tubiriã chí quia mae ja erese nae, ùquĩ ia eã tuchi que nyoĩ quia uchiã isi cote ra. ⁴⁹ Mbia Jesús chíicua ja que chí isho mae erese ra. Ae cuña nyoĩ beite quia erese Galilea si nae, ùquĩ abe que chí isho mae erese ra.

Mbia Jesús raaque chati cote

⁵⁰ I que mbia turã mo nguia huee ra. José, i que ee ra. Judío mo ngue ae ra. Arimatea jenda que ae ra. Judíos rerecua mo ngue ae ra. ⁵¹ José ia eãte que ererecua ataque rese Jesús iquia mose ra. Ae que Dios quiatote ra. —Dios ra ererecua, i beite que equia eraarõ arõ nda. ⁵² —Jesús raaque emee na seje, i que José oso ñee Pilato je ra. ⁵³ José que Jesús raaque mbuquichi cote ra. Tiru je que ema nda. Sita ribicoĩ ji imi ye que emondo ra. Mbia raaque mo ngue emondo eãte huee nyii ra. ⁵⁴ Viernes que aque mose ra. Mbia que icoquiato ja quia sábado nonde ra. ⁵⁵ Ae cuña nyoĩ beite quia Jesús

rese Galilea si nae, ùquĩ ngue nyoĩ sita imi ndese mae nda. Jesús raaque iti ji rese que mae tuchi ra. ⁵⁶ Nyebi que echoĩ uchuchua ra. Aba mbushimbusa que esaã nyoĩ ra. Sábado mose que ùquĩ uquenea ucuã cote ra. Dios cheẽ si.

24

Jesús raaque quera si

¹ Isamamimbe tuchi que cuña nyoĩ domingo mose sita imi ndese mae nda. Aba mbushimbusa que ecuruchoĩ rei eichusẽ chusẽ sacuã Jesús raaque rese ra. Cuña mo abe que nyoĩ quia erese ra. ² I que sita eraaque atiquia ruruba ji u ee ra. ³ Cuña ngue ique rei nyoĩ sita imi ye ra. Jesús raaque oreãte que ee ra. ⁴ Tiri i tuchi que ra. —¿Mañi nda aba re? i tuchi que ra. Aque mose que mbia nyeremo chí juã ee ra. Eirao nininya tuchi que chí ee ra. ⁵ Cuña ngue titi titi i tuchi u ra. Nyebe echĩ nguã nyibi beite. Angeles que ñee ee ra. —¿Mbaerã jẽingo Jesús raaque requia requia a re? Quera si que resẽ. ⁶ Emoate a resẽ. Quera si que resẽ. Sã ñee jẽje siqui mose Galilea no. ⁷ “Mbia icuã nda seisi iquia. Sembucha ra ira rese. Tres días mose ra aquera si”, i que jẽje nyii resẽ, i que ángeles ñee cuña je ra. ⁸ Ùquĩ ndese que cuña ndua cote ra. ⁹ Cuña ngue nyebi cuaẽ mbia mbiirandu ja cote ra. Jesús chímbaaquiato once abe mbiirandu. ¹⁰ María Magdalena i que mbia mbiirandusa je ra. Juana i que emo je ra. María i que enongue je ra. Jacobo si que María ra. Cuña mo abe abe que ra. ¹¹ Nyia iã ñochĩ Jesús chímbaaquiato cuña ñee mose ee. Cuña ñee ñooño nei nguia ee. ¹² Pedro que oso uchã sita imi ndese mae nda. Nyurucua que mae erese ra. Jesús umanda achõ ngue chí ee ra. Pedro que nyebi oso quia ndua ndua Jesús oreã ndese ra.

Jesús ngata querare uquiato rese

¹³ I que Jesús quiato nyeremo nyoĩ quia aque mose ra. Emaús quti que echoĩ quia ra. Dos leguas que Jerusalén si ra. ¹⁴ Ùquĩ ngue nyoĩ quia ñee ñee nyue ra. Jesús mano ñii. Jesús raaque oreã ñii abe no. ¹⁵ Ùquĩ ñee ñee ndichã ngue Jesús si ra. Erese que

Jesús si quia ngata cote ra. ¹⁶ Ũquí ngue mae ndei Jesús rese ra. Icuca eãte chõ ngue ra. Mbiamo nda eriqui reĩ ee raẽ. ¹⁷ Jesús que ñee nyee ee ra. —¿Mbae riĩ jẽingo ñee nyue ã nde? ¿Mbaerã jẽya eãte riqui re? i que Jesús ñee ee ra. ¹⁸ Ũquí mo ngue ñee Jesús je cote ra. Cleofas, i equia ee. —¿Ereiranuate erese re? ¿Nde miĩ ño ereiranua erese ndeico mose Jerusalén nde? i que Cleofas ñee ee ra. ¹⁹ —¿Mbae rese? i que Jesús ee ra. Ũquí ngue ñeembe ee ra. —Jesús rese. Nazaret jenda rese. Dios cheẽ nenei neneisa tuchi rei que ae ra. Equirãcuã tuchi rei que ae ra. Mbia que mae ja tuchi rei equirãcuã ndese ra. ²⁰ Mbia rerecua que Jesús iquia cote ra. Sacerdotes rerecua abe chõ ngue Jesús iquia nguiã. Nyebe soldados eiquia nguiã mbucha ira rese cote. ²¹ Israel jenda rerecua reĩ nda ure je. Tres días chee namo cote emano mosenda bei. ²² Ureresenda cuña mo ngue ñee uremundi tuchi ra. Ũquí ngue nyoĩ rei eatísaa nyaashĩ namo mose ra. ²³ Jesús raaque oreãte nda ee ra. Nyebe ecuaẽ nguiã urembiirandu cote. Angeles mo nda chi ee eatísaa ra. “Jesús que quera si ra”, i nda ángeles ñee ee ra. ²⁴ Aquere que ureresenda mo abe nyoĩ eatísaa ra. Cuña ñee ndui si que Jesús raaque oreãte ee ra. Jesús rese quiatu que mae eã nda, i que Cleofas ñee Jesús sí je ra. Jesús eã nda eriqui reĩ ee raẽ. ²⁵ Jesús que ñee ee cote ra. —¿Mbaerã jẽaquiataũte riqui re? ¿Mbaerã jẽingo Dios cheẽ icuayãte re? ¿Mbaerã jẽingo Dios cheẽ nenei neneisa chimbasa icuayãte re? ²⁶ Sã embesa ji ñee no. “Cristo ra mbae rasi saã ja oso nonde ibate”, i que embesa ji no, i que Jesús ee ra. ²⁷ Jesús que Dios cheẽ mbuchecua ja ee cote ra. Ngasi riĩ. Umano niĩ abe no. Uquera riĩ abe no. Moisés chimbasa que embuchecua ee ra. Aquere que Dios cheẽ nenei neneisa chimbasa abe mbuchecua ja ee ra.

²⁸ Ngasẽ ngue ũquí nyuchúaa cote ra. Jesús que ngata i abareã oso ra. ²⁹ Jesús ngata i abareã mose que ũquí eriquisã nda. —Eitõ urerese aa ae. Tenda osote resẽ. Itondarute ra ndeje resẽ, i que ñee ee ra. Nyebe Jesús ique nguiã echuchúaa erese. ³⁰ Ngoi ja que quiaru nonde cote ra. Jesús

abe que ngoi erese ra. Mbichae que esirõ o je cote ra. Gracias i que Dios ibatenda je mbichae riĩ nda. Mbichae que esiquio mondo ee cote ra. ³¹ Ũquí mose tuchi que Dios mbia mumae turã tuchi Jesús icua sacua cote ra. Jesús icua ramo sacua cote. Jesús que quiachã asi esi cote ra. ³² Ũquí ngue ñee ñee nyue cote ra. —Jesús chõ eriqui reaẽ. Nyebe nandeya tuchite riqui nguiã Dios cheẽ mbuchecua checua mose nande je ñeenda cúa, i que equia ñee ñee nyue ra. ³³ Nyebe echoi jei nguiã nyebi si Jerusalén. Huee que Jesús chimbasaquiata chĩ ñumunua ee ra. Eresenda mo abe rese. ³⁴ Ũquí ñumunua je que ñee ee ra. —Jesús que quera si ra. Ae bei. Simón ngue mae erese ra, i que ñumunua je ee ra. ³⁵ Aquere que ũquí nyeremo ñee mbia chumunua je cote ra. —Jesús rese que uremae ñeenda cúa ra. Urembaaquiata quiatu que umano niĩ nda. Uquera riĩ abe no. Mbichae riquio mose ure je, aque mose ramo ngue Jesús ureicua ra, i que mbia mbiirandu ja ra.

Jesús nyecua uchimbasaquiata je

³⁶ Ũquí ñee ua eã mose que Jesús nyecua ee ra. Mbia ite re. —Jẽya chõ serese, i que ñee ee ra. ³⁷ Mbia que titi titi i tuchi u mae erese ra. Aba checuayã nda Jesús riqui reĩ ee raẽ. ³⁸ Jesús que ñee ee ra. —¿Mbaerã jẽsiquichete riqui re? ¿Mbaerã “Jesús chõ eriqui re” jenyee eã seje re? ³⁹ ¡Sã jẽ! Jemae seo rese. Jemae sei abe rese ae. Jẽoco serese ae. ¡Sã se si chõ jẽ! Aba checuayã nguia eroo eã nde. Equiangue eã abe no. Se rã eã, i que Jesús ee ra. ⁴⁰ O que eteacuquia ee cote ra. Hui abe que eteacuquia ee ra. ⁴¹ —Jesús chõ eriqui re, i eã ngue ra. Ndua ndua chõ erese. Eyate raque erese. Jesús que ñeembe ee ra. —¿Mbae mo ndei eu sacua aa re? i que ee ra. ⁴² Sira resi ji que emee ee ra. Irao abe que emee ee eretã ndesebe ra. ⁴³ Jesús que eisi eu bei ũquí ndésaa cote ra.

⁴⁴ Jesús que ñee ee cote ra. —Sã acheẽ jẽje seico mose jendese nyii no. “Ae Moisés mbesa serĩ nae, ũquí nda ique ja serĩ cote. Dios cheẽ nenei neneisa chimbasa abe ra ique ja cote. Salmos ndesenda cheẽ abe ra ique ja serĩ cote”, ae que se quia jẽje nyii. Ũquí ngue ique ja semana mose cote

ra. Sequera mose abe no, i que Jesús ñee ee ra. ⁴⁵ Dios cheẽ ngue embuchecua checua ee cote ra. ⁴⁶ Jesús que ñeembe ee ra. — Sã embesa ji riqui ñee no: “Cristo ra mbae rasi saã tuchi mano nonde. Tres días mose ra quera si. ⁴⁷ Mbia ra echeẽ senei senei tuchi cote. Jerusalén jenda je rane nda erenei nenei. Mbia ja je ra erenei nenei cote. ‘Jẽicuã si jẽhui rã. Cristo jẽicuã mbutiã sacua’, i tuchi ra mbia ja je Cristo rĩ cote”, i que embesa ji quia nae. ⁴⁸ Ñquĩ i que quia ã cote. Jemae nguia erese ã cote. ⁴⁹ Ae je Paba ñee jẽje nae, “Espíritu Turã tamondo jẽje”, i equia jẽje nae, aque tamee jẽje cote. A jenguchõ na Jerusalén. Paba ibatenda uquirãcuã mee nyee jẽje, i que Jesús ñee uchimbaaquiato je ra.

Jesús nyui oso ibate

⁵⁰ Jesús que equerao ja pe jiri Jerusalén si cote ra. Betania i que hue sucha je ra. Jesús que o mumbate ñee uchimbaaquiato je cote ra. — Sã Dios jendeaquiato turã, i ee. ⁵¹ Aque mose tuchi que Jesús si nyui ibate erecha cote ra. ⁵² Ñquĩ ngue ñee turãte Jesús rĩ nda. Eya tuchi que nyebi nyoĩ Jerusalén nda. ⁵³ Dios chuchua que eriqui bei nyoĩ ñee turã Dios rĩ nda. Amén.

EL SANTO EVANGELIO SEGÚN SAN JUAN

Jesucristo rane ngue siqui nyii ra

¹ Dios cheẽ nane tuchi que nyii ra. Mbae ja si. Dios cheẽ ndei Jesús. Ae que siqui bei Dios rese ra. Dios si rei Jesús. ² Ae chõ ngue siqui bei Dios rese nyii ra. ³ Dios que mbae chao eã ae ae ra. Jesús rese ae mbae ao ja nguiã. ⁴ Jesús chõ mbia mingo nguiã ã. Nandemingosa chõ nanderesae nguiã ã. ⁵ Nandemingosa chõ mbae tesae tuchi nguiã itondaru. Itondaru quia ra emungue aroneãte. ⁶ Dios que emo mbu cote ra. Juan, i que ee ra. ⁷ Juan ngue tu aba resaesa renei nenei mbia je ra. Mbia mbiirandu randu ja. I nda mbia aba resaesa icua ja, Juan ñee nguire. ⁸ Aba resaesa eã ño Juan nde. Emo ni ño Juan ndiqui nguiã ñee. —Ae chõ nanderesae nguiã co, i que Juan nda. ⁹ Aba resaesa que tu ibi cote ra. Aba resaesa choõnoã tuchi que ra. Ae chõ aba resae ja nguiã ã. ¹⁰ Aba resaesa que siqui íbii cote ra. Mbia que eicua eãte chõ nda. Mbae aosa ja raque ae. ¹¹ Aba resaesa que tu rei nguesenda mbirõ nda. Eresenda que eisiteã ñochĩ nguiã. ¹² Mbia mi mi ño ngue eisi turã turã nguiã. Mbia mi mi ño ngue eicua icua nguiã. Uquĩ je quia Dios riqui nguiã “seriirĩ” i. ¹³ Mbia riirĩ na eã ño Dios riirĩ ndiqui nguiã nyaacuquia cuquia ã. Aque nyaacuquia rã eã ño Dios riirĩ ndiqui nguiã nyaacuquia cuquia ã cote. Sã emo ndiqui ngüinisi rese embiirĩ nae, uquĩ na eã ño Dios riirĩ ndiqui nguiã nyaacuquia cuquia ã. Dios ae chõ “seriirĩ” i nguiã ee Dios icua mose. ¹⁴ Jesús rei Dios cheẽ. Jesús que tu mbiarã cote ra. Mbia tuchi que ae cote ra. Siqui que equia urerese cote ra. Echisaã turã ndese que ureico mae cote ra. Eaturã tuchi chõ ae re. Ngu rã si chõ ae re. Ichõiñosa reã tuchi chõ ae re. ¹⁵ Juan ngue Jesús senei senei nguia mbia je ra. —Co rĩ ngue acheẽ jẽje resẽ. “Ae ra tu serui, aque quiarei ererecua tuchi sesi. Ae rane nguia siqui rei seã mose nyii”, ae

rei que jẽje resẽ. Ae siqui co cote, i que Juan mbia je ra. ¹⁶ Jesús turã tuchi que ra. Nyebe eriqui nguiã mbae turã mee mee mbei nande je. ¹⁷ Dios cheẽ mumbayã sacua ngue Moisés ñee ndei nguiã nande je. Jesús quiatu ngue tu nguiã cote. Dios turã nenei nenei nande je. Jesús quiatu ngue Dios cheẽ ñooñoa senei senei nguiã nande je no. ¹⁸ Emo maeãte Dios rese. Eriirĩ ae que nandembiirandu randu quia Dios rese ra. Eriirĩ nguiarei ngu rã si.

Juan el Bautista ñee turã Jesús rĩ

¹⁹ Judíos Jerusalén jenda que mbia mondochoi ñee Juan je ra. Sacerdotes mondo era. Levitas mo ndese. —¿Aba nde re? i sacua Juan je. ²⁰ Juan ngue ñee nyecua tuchi ee ra. —Christo eã ño se re, i que ee ra. ²¹ —¿Abate nde re? ¿Elías chõ nde re? i que judíos chimondo ñeembe Juan je ra. —Tei. Elías eã ño se re, i que Juan ee ra. —Dios cheẽ mbuchecua ra tu, i equia nae, ¿ae chõ nde re? i que mbia ñee Juan je ra. —Tei, i que Juan ee ra. ²² Judíos chimondo que ñeembe Juan je ra. —Ndecheẽ embuchecua ure je. ¿Abate nde re? I nda ndecheẽ uresenei uquĩ je, ae urembu. ¿Mañi ure ra nderĩ nde? i que Juan je ra. ²³ Juan ngue ñee ee ra. —Tacheẽ jẽje cote. Aba chõ se chã. Mbia amingo quiatu quiatu quia co. Ae ñee mombo mombote quia mbia je turuquia ite re nae, ae chõ se re. —“Ñeenda jembuquiche nandererecua mbaerã”, ae i quia, aque chõ se re, i que Juan nda. (Isaías chimbesa rui si chõ Juan ñee nguiã.) ²⁴ Ae ñee ñee nguia Juan je nae, uquĩ ndei fariseos chimondo uquĩ. ²⁵ Fariseos chimondo que ñee ee ra. —¿Mbaerã ereico bautizar i re? Cristo eã ño nde resẽ. Elías eã ño nde resẽ. Dios cheẽ mbuchecua eã ño nde resẽ, i que Juan je ra. ²⁶ Juan ngue ñee ee ra. —I je chõ aico nguiã bautizar i. Emo nguia siqui raque quia jẽite re. Aque quia jẽicuayãte nguiã co. ²⁷ Enonde aico co. Aque ra tu serui. Ae quia ererecua tuchi sesi re. Erã si eã ño se re, i que Juan fariseos chimondo je ra.

Jesús rei oveja rã

²⁸ Betábara, i que hue sucha je ra. Huee quia fariseos chimondo ñee nguiã Juan je.

Ama Jordán ndobei. Ae Juan ndiqui bautizar i, huee. ²⁹ Isamami nongue que Juan mae Jesús rese ra. Jesús que tu quia Juan ndichã nda. —Co mbia icuã ndiquicharõ sacua ndu quia co. Oveja ririã na eriqui Dios je. Ae ra nandeuã mbutiã nandesu. ³⁰ Erĩ ngue aico ñee jêje. “Ae ra tu serui, aque quiarei ererecua tuchi sesi. Ae rane nguia siqui rei seã mose nyii”, ae que se quia jêje. Co chi eru quia co cote. ³¹ Se sí que aicuayãte nyii ra. I je que bautizar ae quia mbia je cote ra. I nda Israel jenda Cristo icua, i que Juan nda. ³² Juan ngue ñee mbei quia ra. —Espíritu Turã ndese que amae nda. Nguichi que u Jesús arõ nda. Nyurusu rã ngue eru nguichi earõ nda. Ibate si. ³³ “¿Aba ra Cristo re?” ae beite que se quia ra. Dios que ñee seje ra. “i je eico bautizar i mbia je jê! Ae arõ nda Espíritu Turã ndu nguichi bei nae, ae quiatu bautizar i sacua mbia je Espíritu Turã je”, i que Dios seje ra. ³⁴ Atea que se cote ra. Ae rei Dios ririã. Aicuate se cote, i que Juan nda.

Jesús mbia irabo uchimbaaquiaturã

³⁵ Isamami nongue que Juan ndiqui hue sí no nda. Nguesenda nyeremo ndese que eriqui ra. ³⁶ I que Jesús ucua quia ra. —Qui mbia icuã ndiquicharõ sacua coi quia qui. Oveja ririã na eriqui Dios je, i que Juan Jesús ririã nda. ³⁷ Juan ndesenda nyeremo ngue Juan ñee ñandu ra. Nyoĩ que Jesús rui cote ra. ³⁸ Jesús que mae nguique quitu ra. —¿Mbae jêsequia quia re? i que mae erese ra. Uqui ngue ñee Jesús je ra. —Mbia mbaaquiatusa, ¿ma ndechuchua ma nde? i que ee ra. ³⁹ —Jenyu mae erese, i que Jesús ee ra. Nyoĩ que mae echuchua rese ra. Tenda nyeseccote mose que echoi erese ra. Tenda oso cheete que echi erese cote ra. ⁴⁰ Uqui nyeremo ngue Juan ñee ñandu ra. Siqui que Jesús rui cote ra. Andrés, i que uqui mo je ra. Simón Pedro nongue que ae ra. ⁴¹ Andrés que oso asite ngõngue requia ra. Simón ndequia. —Dios chimondo que uretea ra. Cristo que uretea ra, i que Andrés ngõngue je ra. ⁴² Andrés que ngõngue querao Jesús rea cote ra. Jesús que mae erese ra. Ñee ngue ee ra. —Simón ño nde

re. Jonás ndiriã ño nde re. Cefas, i ra ndeje cote. Cefas, i chõ Pedro re, i que Jesús ee ra.

Jesús Felipe irabo; Natanael abe

⁴³ Isamami nongue que Jesús ñee nda. —Taso Galilea, i que ra. Ngasẽ ngue Felipe je ra. —Serui eico, i que ee ra. ⁴⁴ Betsaida jenda que Felipe ra. Hue jenda si chõ Andrés re. Pedro rese. ⁴⁵ Felipe que oso Natanael ndequia cote ra. —Ae ririã Moisés riqui embesa mbesa cose, aque que uretea ra. Ae ririã Dios cheẽ mbuchecua riqui embesa mbesa cose, aque que uretea cote ra. Jesús chõ eriqui re. Nazaret jenda chõ eriqui re. José ririã ño eriqui re, i que Felipe Natanael je ra. ⁴⁶ Natanael que ñee Felipe je ra. —¿Mbae turã mo nda tu Nazaret jenda re? i que ra. —Echu erea ae, i que Felipe ee ra. ⁴⁷ Natanael que tu Jesús ririã nda. Jesús que mae erese ra. —Co israelita turã tuchi mo ndu quia co. Aba mbiriã irisa reã tuchi mo ndu quia co, i que Jesús Natanael niã nda. ⁴⁸ —¿Mañi ere quia seicuate re? i que Natanael Jesús je ra. —Amae ngue nderese ra. Felipe ‘quiatchu’ i nonde ndeje. Iraqui re que amae nderese ra. Higo iqui re, i que Jesús ee ra. ⁴⁹ Natanael que ñeembe ee ra. —Mbia mbaaquiatusa, Dios ndiriã ño nde riqui re. Israel jenda rerecua tuchi chõ nde riqui re, i que Natanael Jesús je ra. ⁵⁰ Jesús que ñee ee ra. —¿Seicuate se re? “Iraqui re que amae nderese ra”, ae que ndeje, ¿aque bei bei seicua quia co re? Mbae turã tuchi rese ra erema cote, aque si, i que Jesús Natanael je ra. ⁵¹ Jesús que ñee si ee ra. —Tacheẽ nyecua jêje. Ibei ra obo jêje. Angeles nda nguichi quichi quia seje. Nyoĩ nyoĩ si ra equia ibate. Angeles ibatenda. Dios rimba. Jema nda erese, i que Jesús ee ra.

2

Emo ngüinisirã nguereco

¹ Tres días mose que emo ngüinisirã isi ra. Galilea. Caná, i que hue sucha tubiriã je ra. Mbia que ñumunua nua fiesta raã ngüinisirã isi mose ra. Jesús si abe que siqui huee ra. ² Jesús abe que siqui huee no nda. Uchimbaaquiatu rese. ³ Mbia que uva rique mbei u huee ra. Ua jei que mbia je

ra. Jesús si que ñee nda. —Uva rique que ua jeite ra, i que ñee Jesús je ra. ⁴ Jesús que ñee ee ra. —¿Mbaerã ereico ñee seje ũquĩ nde, Taĩ? Achecua jei eã nda mbia je, i que Jesús usi je ra. ⁵ Esi que ñee mbia rimba je ra. —¡Jesús cheẽ ndui si chõ jẽingo jẽ! i que ee ra. ⁶ Cántaro atate que chi ra. Seis que cántaro ra. Sita ao ji. Ũquĩ jie que judíos riqui nyoĩ nyoĩ querabe ra. Ũquĩ cántaro jie que cien litros jaaja ra. ⁷ Jesús que ñee mbia rimba je ra. —Cántaro jemombisẽ mbisẽ ja i je, i que Jesús ee ra. Nyebe emombisẽ ja nguiã. ⁸ Jesús que ñeembe ee ra. —Embisengue jenyarabe jiri mondo fiesta raã naasa je, i que ee ra. Erimba que echara serao ee cote ra. ⁹ Uva rique rã si chõ ngue i fiesta raã naasa je cote ra. Fiesta raã naasa que ubi erese ra. Eiranuã ngue ubi erese ra. Erimba achõ ño ngue jirandu ja nguiã. Ae ngũinisirã isi quia nae, aque je que fiesta raã naasa ñee nda. ¹⁰ —Mbia ja quiarei uva rique turã nane mee mee nguia mbia je querabe. Etura mbei ja mose, ereã jiri mbei ruquia ruquia mbia je cote. Nde quia eturã tuchi ererecoquiato nguiã. Hui bei sacua cote, i que ra. Jesús chisaã nĩ ño eriqui nguiã ñee. ¹¹ Ũquĩ nane ngue Jesús saã mbia mae sayã nyii ra. Uva rique rã si tuchi que i raã nda. Ũquĩ ngue esaã Galiléaa eriqui mose ra. Caná, i que hue sucha tubiriã je ra. Hue rane ngue Jesús uquirãcuã ndeacuquia mbia je ra. Echimbaaquiato que Jesús icua tuchi cote ra. ¹² Huesi que Jesús choi Capernaum nda. Usi rese. Ngõngue rese. Uchimbaaquiato abe rese. Hue que echi itõ mocoite ra.

Jesús oso Dios chuchúaa

¹³ Fiesta rurubite mose que Jesús si Jerusalén nda. Pascua, i que judíos aque fiesta je ra. ¹⁴ Jesús que oso Dios chuchúaa ra. Huee que mbia chi ticuasú mee mee nyue mbae isiquia ribishorõ nda. Ovejas abe no. Nyurusí cuasu abe no. Emo ngue chi ngoi ra. Mbae isiquia que esibishorõ shorõ u ra. ¹⁵ Mbia iruã nuãsa que Jesús saã nda. Esã nderecua. Aque je que Jesús mbia mbusẽ ja mondochoi Dios chuchua si ra. Ticuasú abe. Ovejas abe. Ae mbae isiquia sibishorõ shorõ nguia, ũquĩ mbae abe que

embuchiichere chere ja mesa ra. Mbae isiquia mombo mombo íbii. ¹⁶ Ae nyurusí cuasu mee mee nguia mbia je nae, ũquĩ je que Jesús ñee asite ra. —Ã nyurusí cuasu jendao Dios chuchua si. Mbae isi isisa jẽsaã saã ñochĩ u Paba chuchúaa a, i que Jesús ñee ee ra. ¹⁷ Jesús chimbaaquiato que ndua ndua quia embesa ji rese ra. —Sebi tuchi ndechuchua, i que embesa ji huĩ nda. Ũquĩ ndese que echimbaaquiato ndua ndua ra. Jesús mbia icuã mbusẽ mondochoi mose Dios chuchua si. ¹⁸ Judíos que ñee Jesús je ra. —¿Ma mbia mae sayã nda eresaã ure je re? Ure ndeicua sacua. “Ererecua chõ eriqui re”, ure nda ndeje chã, i que judíos ñee Jesús je ra. ¹⁹ Jesús que ñee ee ra. —Jẽ Dios chuchua mbutiã mose, asiquicharõ nda se. Tres días mose ra asiquicharõ, i que Jesús ra. ²⁰ Judíos que ñeembe Jesús je ra. —Tenda atate que nanderu riqui itõte Dios chuchua ao ao resẽ. Cuarenta y seis años. ¿Mañi ere ra tres días eao ja nde re? i que judíos Jesús je ra. ²¹ Nguete rĩ ngue Jesús riqui ñee nda. Mbia chumunuasa rĩ eã ño ngue ñee nguiã. ²² Jesús quera si mose ramo ngue echimbaaquiato ndua aque echeẽ ndese cote ra. Embesa ji rese ndua. —¡ nguia equia re, i que echimbaaquiato ndua ndua cote ra. Jesús quera si mose.

Jesús mbia chiã icuate

²³ Mbia tubiriã ngue Jesús icuate aque mose ra. Fiesta de la pascua mose. Siqui mose Jerusalén. Mbia mae sayã naa naa mose que mbia eicuate cote ra. ²⁴ Jesús que mbia ndua ndua icuate quia ra. Nyebe ñee tuchi eã nguiã mbia je. ²⁵ —Ei ño mbia nguiã ã, i aronea mbia mo Jesús mbiirandu. Jesús quiato que mbia chiã icuate quia ra.

3

Nicodemo oso ñee Jesús je

¹ Mbia mo ngue siqui ra. Nicodemo, i que ee ra. Fariseo que ae ra. Judíos rerecua que ae ra. ² Itondaru mo ngue esi Jesús rea ra. —Mbia mbaaquiatusa chõ nde re. Dios chimbu chõ nde re. Ureicuate que ra. Mbia mae sayã nda mbia mo saã eã, Dios siquiã mose erese, i que Nicodemo

Jesús je ra. ³ Jesús que ñee ee ra. —Tacheẽ nyecua ndeje. Ae nyaacuquia si eã, ùquĩ nda siquĩã Dios rese, i que Jesús ee ra. ⁴ Nicodemo que ñee Jesús je ra. —¿Mañi nda mbia cuasu nyaacuquia si re? ¿Usi riequi rĩ nda esi si re? ¿Nyaacuquia si nonde re? i que Nicodemo Jesús je ra. ⁵ Jesús que ñee ee ra. —Tacheẽ nyecua ndeje. Ae nyaacuquia i achõ je nae, ùquĩ nda siquĩã Dios rese. Ae nyaacuquia Espiritu Turã abe je nae, ùquĩ nguia ra siqui Dios rese cote. ⁶ Mbia nyaacuquia mose, mbia sí chõ eririĩ nde. Emo nyaacuquia mose Dios riirina, Dios rã si chõ eno nde. ⁷ “Nducua”, erechĩ nda secheẽ mose jẽ. “¡Jenyaacuquia si ja chõ jẽ!” se i mose. ⁸ ¿Mbaranguiti si quiririã ndiqui ichu re? ¿Mbaranguiti ra esi re? Ereicuayãte. Quiririã erechandu raque. Eremae ãte erese. Eĩ si chõ Dios riiriĩ nde. Ae nyaacuquia Dios je nae, i que Jesús ee ra. ⁹ —¿Mañi ùquĩ nde? i que Nicodemo Jesús je ra. ¹⁰ Jesús que ñee ee ra. —¿Secheẽ ereicuayãte quia re? Mbia mbaaquiatusa raque nde. Judíos mbaaquiatusa raque nde. ¹¹ Tacheẽ nyecua ndeje. Ae ureicua, ùquĩ ño uresenei senei ndei nguiã jẽje. Ae rese uremae, ùquĩ ño uresenei senei ndei nguiã jẽje. “Ichõiño nguiã”, jenyẽ chõchĩ nguiã urecheẽ mose. ¹² “Ichõiño nguiã”, jenyẽ chõchĩ nguiã secheẽ mose. Ibi jenda renei nenei mose jẽje. Secheẽ nda jemumba tuchi cote, ibatenda nenei nenei mose jẽje. ¹³ Emo nguichiãte ibei si. Se mii ño ngue achu nguiã nguichi ibei si. Mbiarã ño ngue achu nguiã. Asobe ra ibei. Ibei jenda chõ se re. ¹⁴ Sã Moisés mbei raanguia mbuchecua mbia je turuquia re cose no. Eĩ si ra mbia sembuchã ira rese. ¹⁵ fnda seicua quiachã eã mbei sesi. fnda seicua siqui bei ibate serese.

Dios nyecua ja mbia rese

¹⁶ Dios que nyecua tuchite mbia ja rese ra. Nyebe nguiirĩ mii mbu nguiã mbia je. Eriiriĩ icua sa ra manoa. Siqui bei rae. ¹⁷ Mbia mbasi sacua eã ngue Dios nguiirĩ mbu íbii ra. Mbia rirõ sacua mbae icua si quia ñi ngue Dios nguiirĩ mbu nguiã. ¹⁸ “Eso tata cuasu”, i eã nda Dios nguiirĩ icua je. “Eso tata cuasu”, i Dios quia

nguiirĩ icua reã je ã. Jesús icua eãte quia ñene. ¹⁹ “Eso tata cuasu”, i Dios quia nguiirĩ icua reã je. Ebite quia ñi itondaru nyaashĩ si re. Nyaashĩ tu mose íbii, isiteã ngue ra. Mbae icua ndese quia eriqui beite nguiã. ²⁰ Ae siqui beite quia mbae icua ndese, ùquĩ nguia siquichete nguiã nyaashĩ si. Nyaashĩ ndichã sereãte quia ñene. “f nda mbia mae eã nandechisaã ndese mbae icua ndese”, i ñene. ²¹ Ae mbae turã saã mbeite quia nae, ùquĩ nguiatu nyaashĩ sichã sete nguiã. f nda echisaã saã nyecua mbia je. f nda mbia ñee, “Dios quirãcua nguia siquite nguiã erese”, i ra mbia ñee, i que Jesús ra.

Juan el Bautista ñee turã Jesús rii

²² Jesús que nyoĩ Judéaa cote ra. Uchimbaaquiatu rese. Huee que eriqui mocoĩte ùquĩ ndese ra. Huee que eriqui bautizar i mbia je ra. ²³ Juan abe que bautiza r i quia mbia je ra. Enón, i que sucha tubiriã je ra. Salim ndurubi que ra. Hue quiatu ngue i tubiriãte re. Mbia que ngaẽ ngaẽ nguia erea ra. Juan ngue bautizar i quia ee ra. ²⁴ Mbia Juan tarõ nonde mii ngue eriqui bautizar i huee nyii ra.

²⁵ Judío mo ngue ñee icua icua Juan ñimbaaquiatu je ra. Bautizar i rii. —¿Aba quia ra bautizar i mbia mbitirõ sacua nde? i que ñee icua icua nyue ra. ²⁶ Nyebe Juan ñimbaaquiatu nyoĩ nguiã ñee Juan je. — Ae rese ereico Ama Jordán ndobei, ae abe riqui bautizar i mbia je huee. Ae eresenei senei turã nguia ure je, aque. Mbia riqui tuchite erui ã, i que Juan ñimbaaquiatu ñee ee ra. ²⁷ Juan ngue ñee ee ra. —Coche ñene. Dios ibatenda quiarei. Emo siqui aroneate mbia rerecuarã, Dios emingo sereã mose. ²⁸ Cristo tu nonde que Dios sembu resẽ. Mbae mbuquiche ja sacua Cristo tu nonde. “Cristo eã ño se resẽ”, ae checua rei que jẽje resẽ. ²⁹ Jesús rui ra mbia siqui ja. Sã emo ngüinisirã nguereco no nae. Sã eninisi riqui ngu rese no. Sã eru quiato abe eya erese no. Eru quiato rã ño seya riqui Jesús rese co, mbia siqui mose erui. ³⁰ Jesús quia ererecua tuchi riqui nguiã sesi co. Ererecua eã ño aico nguiã se co, i que Juan nda.

Jesús rei ibatenda

³¹ Jesús rei ibatenda. Nyebe eaquiato riqui nguiã mbia si co. Ibi jenda chõ nande re. Ibi jenda rese achõ ño nandeaquiato nande re. Ae quiarei ibatenda. ³² Ibatenda umaesa senei senei nguia mbia je co. Ae ehandu ibate nae, ùquĩ abe esenei senei nguia mbia je co. Mbia mii jiri riqui echeẽ andu andu ã. ³³ Ûquĩ mii mii ño Jesús cheẽ isi turã nguiã ã. Ûquĩ mii “Dios ichõiñosa reã”, i tuchi nguiã ã. ³⁴ Dios quiatu que Jesús mbu ra. Nyebe Jesús riqui Dios cheẽ nenei nenei co. Dios que Espíritu Turã mondo tuchite Jesús je ra. ³⁵ Jesús rese Paba riqui nyesequa tuchite co. Erucucha quia ae re. Nyebe Paba uquirãcuã mee tuchi nguiã ee. I nda Jesús riqui mbae rerecuarã ja. ³⁶ Ae Dios rucucha icua nae, ùquĩ nda siqui bei Dios rese. Ae Dios rucucha icuayã nae, ùquĩ nda siquiã tuchi erese. Nyoĩ eã mbei ra ibate. Dios ra ùquĩ mondo tata cuásuu.

4

Jesús ñee acuanĩ mo je

¹⁻² Mbia que siqui tuchite Jesús rui cote ra. Bautizar i sacua mbia je. Jesús sí que bautizar i eã nda. Echimbaaquiato quia ngue bautizar i nguiã ee. —Fariseos riqui ndeucaũyãte ã. Mbia siqui tuchi mose nderui, i que mbia mo Jesús mbiirandu ra. ³ Jesús jirandu mose que esi Judea recha cote ra. —Tasobe Galilea, i que ra. ⁴ Samaria ni ngue esi ra. ⁵ Ngasẽ ngue Samaria ra. Sucha tubiriã mo ngue ngasẽ nda. Sicar, i que hue je ra. Jacob chimee ibi ndurubite que huee ra. Ae emee nguiirĩ José je. ⁶ Jacob chibicoi ibi que chĩ huee ra. Noria. Jesús que ngoi huĩ uquenea ucua huee ra. Noria ji. Tenda nandeite re mose. Ñeenda ishote que ee ra.

⁷⁻⁸ Jesús ae que tiba huee ra. Echimbaaquiato que nyoĩ sucha tubiriã nda. Mbae mo isi uchirã. Acuanĩ mo ngue tu ngasẽ i rea huee ra. Samaria jenda que ae ra. —I embu rã. Tayu, i que Jesús ñee ee ra. ⁹ Judíos que ñee eã mbei quia mbia Samaria jenda je querabe ra. Isho bei que eriqui nyesi ra. Nyebe acuanĩ ñee nguiã Jesús je. —Judote nde resẽ. ¿Mbaerã ereico ñee seje re?

¿Mbaerã ereico “i embu” i seje re? Samaria jenda chõ se resẽ, i que acuanĩ Jesús cheẽ ndibishorõ nda. ¹⁰ Jesús que ñee ee cote ra. —Dios chimee ereicuayãte quia co. Co ereico seicuayãte co. Eĩ nda “i raanguia embu seje” ere rei seje. Seicua mose. Eĩ nda i mbia mingo beisa amee ndeje, i que Jesús acuanĩ je ra. ¹¹ Acuanĩ ngue ñee si Jesús je ra. —Noria cuate nyeresẽ. I arasa ereru eãte quia a resẽ. Ma je quia ra i raanguia erechara seje. ¹² Nanderu ñiinda abe nda íu íu quia a yenda ye resẽ. Jacob. Nguiirĩ ndese. Erimba abe nda íu íu quia a yenda ye resẽ. ¿Ndeaquiato ae si nde re? i que acuanĩ Jesús je ra. ¹³ Jesús que ñee acuanĩ je ra. —Mbia íu mose a yenda jie, eisei jei chõ nda eno. ¹⁴ Ae i raanguia mbei quia nae, ùquĩ nda eisei chiã mbei cote. I raanguia sechimee nguia ra siqui bei echiangui re. Uchi uchi bei ra equia echiangui re. Emingo bei sacua, i que Jesús acuanĩ je ra. ¹⁵ Acuanĩ ngue ñeembe Jesús je ra. —I raanguia embu nembae seje no. Eĩ nda seisei chiã mbei. Eĩ nda achu achu eã a jenda ara, i que acuanĩ ee ra.

¹⁶ —Eso nderu rea. Eru seje a, i que Jesús ee ra. ¹⁷ —Seru eãte nyeresẽ, i que acuanĩ nda. Jesús que ñee ee ra. —Ae beite. Nderu eãte que ereico namo co ra. ¹⁸ Nderurã ngue eretea mocoite rei resẽ. Cinco. Ae erereco co nae, nderu tuchi eã ño aque re. Erecheẽ ñooño ãte rei nguiã seje a, i que Jesús acuanĩ je ra. ¹⁹ Jesús cheẽ mose que acuanĩ ñeembe ee no nda. —Mbae mbuchecuada nde reae. Dios re- senda nde reae. ²⁰ Ureramei nda ngaẽ ngaẽ nguia a ibi ato ra. Ñee ñee sacua Dios je. “Jerusalén quiato mbia cheẽsa Dios je re” jenyẽ chõchĩ nguiã judíos, i que acuanĩ Jesús je ra. ²¹ Jesús que ñee acuanĩ je ra. —Tacheẽ nyecua ndeje. Mangue chooño ãte ra mbia ñee Dios je cote. Namu jiri. Jerusalén mii eã. A ibi ato mii eã no. ²² Jeñee mbeite raque equia Dios je ã. Dios icuare rocoĩ. Ure quia ureico nguiã Dios icuate ã. Judíos chõ ure re. Judío rei mbia rirõsa mbae icua si. ²³ Namu jiri ra Dios quiatote ñee turã turã Dios rii uchiangui re. Mangue chooñoa cote. Dios quiatote ra ñee turã bei quia Dios rii cote. Echeẽ nguire. ²⁴ Dios rei espíritu.

Mae aronea erese. Nandechiangui re chõ nandeco Dios andu ã. Nandechiangui re nandechẽ turã turã Dios riĩ. Dios cheẽ nguire, i que Jesús ra. ²⁵ Acuanĩ ngue ñee Jesús je ra. —Mesías ra tu ibate si. “Cristo”, i equia ee nae, aque ra tu íbii cote. Tu mose ra mbae mbuchecua ja mbia je. Ñquĩ aicuate quia co, i que acuanĩ nda. ²⁶ —Cristo chõ se re. Ae je ereico ñee, i que Jesús acuanĩ je ra.

²⁷ Aque mose que Jesús chimbaaquiatu ngaẽ ngasẽ cote ra. —Jesús riquichĩ ñee acuanĩ je a re, i que eu nyururrate mae erese ra. —¿Mbae jenyẽ quia ñee nde? i eã ngue emo nda. Ireĩ ireĩte quiatu ngue ñee Jesús je re. ²⁸ —Se rei Cristo, i mose que acuanĩ ía tuchi ra. Ñio ngue esecha oso ra. Mbia mbiirandu randu sucha tubiriã jenda. ²⁹ —A emo ndiqui a. Semumbusẽ ja que ra. Cristo chõ ae reae. Nyao rã mae erese, i que acuanĩ mbia je ra. ³⁰ Nyebe mbia nyoĩ ja nguiã ícuua. Jirandu mae Jesús rese. Acuanĩ ñee nguire.

³¹ —Mbae mo eu, i chiibe ibe que echimbaaquiatu Jesús je ra. Acuanĩ oso mose sucha tubiriã. ³² —Tei. Sechiu jẽicuayãte jẽ, i que Jesús ee ra. ³³ —Emo mbae mo queru echurã ndeae, i que echimbaaquiatu ñee ñee nyue ra. ³⁴ Jesús que ñee ee ra. —Ae riĩ Paba ñee seje nae, ñquĩ tasaã mbei quia ee. Paba cheẽ mumbayã mose, ñquĩ ño sechiu riqui nguiã. ³⁵ “Pete mbae ishao shao ñi pe”, jenyẽ chõchĩ nguiã ã. Mbiaco yenda ea ireĩ ishao iriã na ño mbia riqui nguiã ã. Sã mbia riqui nyoĩ mbae a ishao shao no. Eĩ jenyẽ si chõ nguia nyoĩ mbia reru reru seje. Serese siqui sacua. ³⁶⁻³⁸ Sã emo ndiqui mbae a ishao shao no. Sã mbae acha riqui mbae mondo mondo ee eishao shao ribishorõ no. Sã emo ndiqui mbae eĩ tiquia tiquia no. Sã emo ndiqui eishao shao equiche mose no. Eĩ si chõ secheẽ no nde. Sã emo ndiqui secheẽ nenei nenei nyii no. Aquere emo mbia reru reru seje no. Ae secheẽ nenei nenei quia nyii nae, ae mbia queru queru quia seje cote nae, ñquĩ ia jate nyiese cote. Ae emo ndiqui secheẽ nenei nenei nyii, huee jaemondo quia aque. Mbia reru reru sacua seje. Se mbia mingõ bei sacua.

Emo nane serenei nenei nguiã ee nyii. Jẽ jẽingo ereru reru seje ã cote. Jẽya jate riqui jenyiese ã cote. Ae secheẽ nenei nenei quia nyii, ñquĩ ndese jẽya jate, i que Jesús ra.

³⁹ —Jesús que semumbusẽ ja ra, i que acuanĩ ñee sucha tubiriã jenda je ra. Nyebe mbia tubiriã siqui nguiã Jesús ruĩ hue jenda cote. ⁴⁰ Samaria jenda que nyoĩ Jesús rea cote ra. —Eico are jiri ure rese, i que mbia Jesús je ra. Nyebe Jesús itõ nguiã nyeremo huee. ⁴¹ Jesús sí que mbia mbaaquiatu quiatu cote ra. Nyebe mbia tubiriã siqui tuchi nguiã eruĩ cote. ⁴² Mbia que ñee acuanĩ je cote ra. —Nde chõ ngue urembiirandu rei nyii ra. Uremae ngue erese cote ra. Echeẽ ngue urechandu cote ra. Nyebe ureico nguiã eicua tuchi ã cote. Ereceẽ ñooñoa ngue ra. Cristo tuchi chõ ae re. Mbia rirõsa mbae icua si chõ ae re, i que mbia ñee acuanĩ je ra.

Jesús ererecua mo ndiirĩ mbucherõ

⁴³ Huee que Jesús itõ nyeremo nda. Samáriaa. Hue si que esi si nyuruã Galilea quti ra. ⁴⁴ —Mbia ra Dios cheẽ nenei neneisa quereco turã eã hue jenda sí mose, i que Jesús nyii ra. Nyebe esi nguiã Galiléaa. ⁴⁵ Jesús que ngasẽ Galiléaa cote ra. Mbia hue jenda que embucuasẽ turã nda. Mae nguiatu equia erese Jerusalén neaẽ. Pascua mose. Mbia mae sayã nguiatu ngue Jesús saã saã nguiã ee nyii. Nyebe eyate nguiã Jesús cuasẽ mose cote.

⁴⁶ Jesús que oso si Caná de Galilea no nda. Ae eriqui i mbuchiicabo uva rique rã mbia je nyii nae, huee que esi si ra. Hue rurubi que ererecua mo ndiirĩ ndasi riqui ra. Capernaum, i que hue je ra. ⁴⁷ —Jesús ru Judea si a cote, i que mbia ererecua mbiirandu ra. Nyebe ererecua si nguiã Jesús rea cote. —Seriirĩ chí mano serĩte qui. Nyao terembucherõ seje, i que ererecua ñee ee ra. ⁴⁸ —Mbia mae sayã naa eã mose ra jẽ seicuayã ñochĩ nde, i que Jesús ee ra. ⁴⁹ —Nyao jei rã. Seriirĩ nda mano nyee re, i que ererecua Jesús je ra. ⁵⁰ —Esobe nyebi ndechuchúaa. Nderiirĩ ngue nyerõ nda, i que Jesús ee ra. —Jesús ñee ñooño aroneate, i que ererecua oso nyebi ra. ⁵¹ Echuchua rurubi que erimba ngaẽ

erobeishĩ ñee nda. —Nderiirĩ ngue nyerõte ra, i que ñee embiirandu ra. ⁵²—¿Ma tenda seriirĩ ngasi ucua re? i que ererecua ra. —Tenda nyiichere ramo mose que nderiirĩ ngacu ucua curi ra, i que mbia ñee ee ra. ⁵³—Hue tenda tuchi que Jesús ñee seje curi ra. “Nderiirĩ ngue nyerõ nda”, i seje curi, i que ererecua ra. Nyebe eriqui nguiã Jesús icua tuchi cote. Echuchua jenda abe que Jesús icua ja cote ra. ⁵⁴Judea si que Jesús ru Galiléaa ra. Mbia mae sayã nyeremo ngue Jesús saã Galilea jenda je ra. I que esaã uva riquera nyii ra. Ererecua riirĩ ngue embucherõ namo no nda.

5

Jesús Amei mbucherõ

¹Aquere que judíos mbae fiesta ra. Jesús que oso Jerusalén fiesta mose ra. ²Oveja iquesa que chĩ huee ra. Mbia icua abe que chĩ huee ra. Cinco tei que chĩ hue eicua mama nda. Betesda, i que judíos hue mbia icua je ra. ³Mbia rasi que chi jate nyaara huee ra. Taiqui re. Eresayã. Ecuatayã. Echaacua. Mbia rasi chumumbara que chi huee ra. I rebera raarõ arõ. ⁴Angel mo nda nguichi quichi quia ra. I mumbera sacua mbia rasi je. —Ae rane nda ua ama ndebera mose nae, aque rane nda nyerõ, i que mbia ra. ⁵Amei ndasi ima mo ngue chi bei aque rĩ nda. Treinta y ocho años que amei ndasi ra. ⁶Aque que chi nyaara Jesús je ra. —Aa chõ erasi riqui bei a cose re, i que Jesús uchiangui re ra. —¿Erecherõ sete ere? i que ee ra. ⁷Amei ndasi que ñee ee ra. —Aba quia ra sembua i ye, i rebera mose. Mbia rane ngue secuã secuã nguia ra. I rebera mose, i que erasi Jesús je ra. ⁸Jesús que ñee ee ra. —Ëhuã. Ndequisa erao. Eso, i que Jesús ee ra. ⁹Echeẽ mose que nyerõ nda. Uquisa que esirõ serao ra. Erasiã ngue oso cote ra. Sábado mose que Jesús embucherõ nda. ¹⁰Nyebe judíos paama i nguiã embucherõ mose sábado mose. —Co mose que mbia uquenea ucua ra. ¿Mbaerã nda ndequisa ererao re? i que judíos Jesús chimbucherõ je ra. ¹¹—Ae sembucherõ, aque que ñee seje ra: “Ndequisa erao. Eso”, i que sembucherõsa seje ra, i que judíos cheẽ mose ra. ¹²Judíos que ñee ee ra. —¿Aba

aque re? ¿Aba “ndequisa erao”, i ndeje re? i que ra. ¹³—Aicua eãte se. Aba chõ sembucherõ. Mbia tubiriãte quiatu ngue re, i que erasi judíos je ra. Jesús oso rei. ¹⁴Emo mose que Jesús ngasembe uchimbucherõ je ra. Dios chuchúaa. Ñee ngue ee ra. —¿Sã jẽ! Arembucherõ ngue se resẽ. ¡Mbae icua nda eresaã sichĩ jẽ! Mbae mo nda jeĩ tuchi ndeje cote, i que Jesús ee ra. ¹⁵Amei ngue oso judíos mbiirandu cote ra. —Jesús chõ sembucherõ nguia reaẽ, i que judíos je ra. ¹⁶Nyebe judíos paama i nguiã Jesús je. Nandeiquia, i. Sábado mose quia Jesús riqui nguiã mbia mbucherõ cherõ judíos je. Judíos uquenea ucua mose. Nyebe judíos paama i nguiã ee. ¹⁷Jesús que ñee judíos je cote ra. —Paba recoteã mbeite riqui co. Namu abe. Se abe Paba rã si serecoteã teã mbeite riqui co, i que Jesús ee ra. ¹⁸Nyebe judíos riqui nguiã paama i tuchi Jesús je. Iquia serĩ serĩte que cote ra. Jesús que judíos cheẽ mumba mumba ra. Mbia rasi mbucherõ cherõ sábado mose. —Dios rã si aico co. Paba rei Dios, i que Jesús ra. Nyebe judíos paama i tuchi nguiã ee.

Jesús rei Dios rucucha

¹⁹Jesús que ñeembe judíos je ra. —Dios rucucha rei se. Dios rucucha ae ra mbae saã eã. Se ae ra mbae asaã eã. Paba chisaã ndese maende ae aico nguiã mbae raã naa se abe co. Ae Paba saã saã nguia, ùquĩ asaã saã ja quia se abe co. ²⁰Dios rucucha rei se. Paba riqui nyesecua tuchi serese co. Paba riqui uchiao reacuquia tuchi seje co. Uchiao ra eteacuquia tuchi seje cote. Mbia mae sayã tuchi. Jenyuruira tuchi ra mae erese cote. ²¹Paba mbia raaque mbuquera quera. Se abe ra mbia raaque ambuquera quera. Ae amingo bei sete, ùquĩ abe ra amingo bei. ²²Paba ra mbia mo mondo eã tata cuásuu. “Nde chõ mbia equirirõ ndirõ mondo tata cuásuu”, i que Paba seje ra. ²³ƒ nda mbia ñee turã serĩ. Sã mbia riqui ñee turã Paba rĩ no. Ae ñee turã eã nguia serĩ, ùquĩ ñee turã eãte Paba abe rĩ no. Dios rucucha rei se. Dios chimee ndei se. ²⁴Tacheẽ nyecua jẽje. Secheẽ andusa ra siqui bei. Paba icuasa ra siqui bei. Nyoĩ eã mbei ra tata cuásuu. Paba ra emingo bei cote.

²⁵ Tacheẽ nyecua jẽje. Namu jiri ra mbia raaque secheẽ andu. Secheẽ mumbasa reã nda siqui bei. ²⁶ Paba quiarei mbia mingo beisa. Se abe rei mbia mingo beisa Paba rui si. ²⁷ Se abe ra mbia amondo tata cuásuu. “Nde chõ mbia equirirõ ndirõ mondo tata cuásuu”, i que Paba seje ra. Se chĩ eru-cucha. ²⁸ ¡Jenyuruirã techĩ nda secheẽ mose jẽ! Mbia raaque ra secheẽ ñandu ja chee. ²⁹ Júã ja ra ngua si. Ae siqui turã, ùquĩ nda Dios mingo bei cote. Ae siqui icuã icuã nguia, ùquĩ nda nyoĩ tata cuásuu.

Serĩ ño embesa ji ñee, i Jesús

³⁰ Se ae ra mbae asaã eã. Paba cheẽ ndui si chõ aico nguiã mbia mondo tata cuásuu. Paba cheẽ ndui si chõ aico nguiã mbia mingo bei no. Paba cheẽ nda achabiã. Paba cheẽ nguire chõ aico nguiã mbae raã naa co. Se ae eã ño ñene. ³¹ Se ae eã ño acheenei enei nguiã mbia je co. fnda “ichõĩño” jenyere rei seje. ³² Aque emo ndiqui serenei nenei mbia je aque. Aque eriqui ñee ñooño eã serĩ aque. ³³ Jemo ngue jemondo Juan je. Jẽirandu sacuã serese. Juan ngue ñee ñooño eãte jẽje ra. ³⁴ Ae mbia ñee ñee serĩ, ùquĩ ñee ndeseã aico nguiã se. “Dios riirĩ eã ño co re”, i mose mbia serĩ, Dios riirĩ mbei chõ se re. Jẽicuã mbutiã sacuã ño aico rei nguiã ñee jẽje. ³⁵ Tata rendi rã ndei Juan. Mbae resae ja raque. Huee que jengu mbirĩ ndei erese ra. Jẽhui jei chõchĩ esi. ³⁶ Juan ñee ngue mbia mbiirandu rei serese ra. Sechisaã nguia mbia mbiirandu tuchi serese Juan ñee si. Dios cheẽ nguire ae aico nguiã mbae ao ao co. Sechisaã ndese mae jee mbia jirandu nguiã serese cote. “Dios chimondo quiarei Jesús”, i mbia cote. ³⁷ Paba abe riqui serenei nenei mbia je co. Paba cheẽ jeñanuate raque. Jemae sayãte raque Paba no. ³⁸ Jẽ nguia seicuayãte nguiã co. Paba chimondo chõ se re. Nyebe Paba cheẽ chĩ eãte jendese. ³⁹ Embesa ji rese jẽingo mae tuchite raque. “Embesa ji ra nandemingo beite”, jenyechĩ nguiã. Serese jembirandu sacuã ño embesa ji re. Se quiatu mbia mingsosa tuchi re. ⁴⁰ Jẽ nguia jẽingo sereãte nguiã serese. fnda se jaemingo beite rei. ⁴¹ Jẽingo eã mose Dios rese, sebiãte jeñee turã turã mose serĩ.

⁴² Co aico jẽicuate co resẽ. Jenyesequa eãte quia Dios rese co resẽ. ⁴³ Paba que sembu resẽ. Jẽo eã ñochĩ serese. Paba chimondo eã tu mose, aque rese quia ra jẽo tuchite cote. ⁴⁴ Mbia resa rae jẽingochĩ nguiã jẽturã naa naa. Dios je quiarei jẽturã eãte. ¿Mañi jenyere quiatu ra equia seicua re? ⁴⁵ Se quia ra jẽicuã ambuchecua eã Paba je. Moisés chimbesa quia jẽicuã mbuchecua nguiã. “Moisés chimbesa rei mbia mingo beisa”, jenyechĩ nguiã. ⁴⁶ Moisés chimbesa jẽicua eãte quia ã. Nyebe jẽingo nguiã seicua eãte ã. Serĩ ngue Moisés embesa ra. ⁴⁷ “Nyia” jenyere eã mose Moisés chimbesa je, “nyia” jenyere eã nda secheẽ mose abe no, i que Jesús judíos je ra.

6

Jesús mbichae mbeta tuchi

¹ Aquere que Jesús choi ama ndisa rasa ra. Galilea, i que ama ndisa je ra. Tiberias, i abe que ee ra. Hue robei que echoi ra. ² Mbia que nyoĩ tuchite Jesús rui ra. Mbia mae sayã ngue Jesús saã saã nguia ra. Echisaã ndese que mbia mae mae nda. Mbia rasi mbucherõ cherõ mose. ³ Sita ibate rĩ ngue Jesús choi ra. Huee que echi ngoi uchimbaaquiato rese ra. ⁴ Fiesta de pascua rurubi que ra. ⁵ Mbia tubiriã ngue ngaẽ nguia Jesús rui ra. Jesús que mae erese ra. Ñee ngue Felipe je ra. —Mbia tubiriã tuchi. ¿Mangue ra echirã nandesi mangue re? i que Jesús ee ra. ⁶ Jesús eicuate raque. —Mañi nda Felipe quia secheẽ mose reae, i que Jesús ra. ⁷ Felipe que ñee ee ra. —Doscientos plata mbia chayãte mbia chirã isi sacuã. Echayã tuchite, i que Felipe ra. ⁸ Andrés abe que chi ra. Jesús chimbaaquiato. Simón Pedro nongue. Ae que ñee nda. ⁹ —A ãquẽ mo ndiqui a. Cinco mbichae rerequia a. Sira nyeremo abe rerequia a. Echayãte quiato nda re. Mbia tubiriãte quia ñene, i que Andrés Jesús je ra. ¹⁰ —“Jengoi ja”, jenyere mbia je, i que Jesús ra. Quiata turã ngue huee ra. Quiata tose que mbia ngoi ja ra. Mbia cuabẽ. Cinco mil que mbia ra. ¹¹ Jesús que mbichae isi cote ra. Ianye, i que ngu je cote ra. Mbichae rĩ. Mbichae que embuchao chao cote ra. Uchimbaaquiato je que emondo

mondo ra. Echimbaaquiatu que emondo mundo mbia je cote ra. Ae chi ngoi. Sira abe que embuchao chao mbia je ra. Mbiam que eu ja ra. Mbiam que echosei chiã chiã nyee ra. ¹² Mbiam rio ja mose que Jesús ñee uchimbaaquiatu je cote ra. —¡Mbiam chiu sique jemunua nua jê! ¡Jendecoquiatu ja jê! ¡ que ra. ¹³ Echiu sique que emunua ja ra. Doce irairu que puk i ja ra. Mbichae sique sique. Cinco chõ ndei que mbichae nyii aẽ. ¹⁴ Mbiam que mae tuchi Jesús rese ra. Mbichae mbeta rese ra. Ũquĩ ndese que mbiam riqui mae eã tuchi nyii ra. —Dios cheẽ nenei neneisa chõ co riqui re. Ae uresaarõ arõ nguia, ae chõ eriqui re, ¡ que mbiam Jesús rĩ nda.

¹⁵ Jesús que mbiam icua ra. —Mbiam ra seisichĩ suruchoi ererecuarã nde, ¡ que ra. Nyebe esi si nguia mbiam recha. Sita ibate rĩ nguie esi erecha ra.

Jesús ngata i arõ

¹⁶ Itondaru ndaru que Jesús chimbaaquiatu choi ama ndísaa ra. ¹⁷ Nyui nyui que canoa ye cote ra. Aque echoichĩ nguia iasa Capernaum aque. Jesús que nyebi eã mbeite u ee ra. Itondaru chee. Nyoĩ chee que erecha ra. ¹⁸ Quiririã nguie tu icuã icuã ee ra. Ama ndiite re mbiam reco mose. I rebera que tu asi asi tuchi ra. ¹⁹ Mbiam que nyoĩ choi bei canoa ye ra. Una legua. Jesús que canoa curubite cote ra. I arõ nguie esi quia ngata ra. Canoa yenda que mae erese ra. Echiã nguie cuaãcuã i tuchi ra. ²⁰ —Se chõ nyeresẽ. ¿Mbaerã jẽingo siquiche sesi re? ¡ que Jesús ee ra. ²¹ Canoa yenda que oote erese cote ra. Mbua que canoa ye ra. Ngasẽ asi que ecuaẽ íbii cote ra.

Mbiam cuabẽ Jesús requia

²² Mbiam cuabẽ nguie chi sobei ra. Isamami nguie Jesús tiãte ee ra. Nyebe ñee nguia nyue. —Canoa mi ño nguie chi resẽ. Canoa ye eã ño Jesús si iasa resẽ. Echimbaaquiatu achõ ño nguie nyoĩ iasa canoa ye resẽ. ¿Manguie Jesús riqui manguie re? ¡ que mbiam cuabẽ u ñee Jesús requia ra. ²³ Aque mose que canoa mo ngaẽ ngasẽ ee ra. Tiberias si que canoa cuaẽ nda. Mbiam mbichae usa rurubi que ecuaẽ tiba ra. ²⁴ Jesús tiã mbei que mbiam je huee ra. Mbichae úsaa ra.

Echimbaaquiatu abe tiã nguie mbiam je ra. Nyebe mbiam choi nguia erequia canoa ye. Ngasẽ nguie coquimo cote ra. Capernaum, ¡ que huee sucha je ra.

Mbichae rã ndei Jesús

²⁵ Mbiam cuabẽ nguie ngaẽ ama ndasa coquimo ngote ra. Ngasẽ nguie Jesús je cote ra. —Mbiam mbaaquiatusa, ¿manose erechu ngasẽ aa re? ¡ que mbiam cuabẽ Jesús je ra. ²⁶ Jesús que ñee ee ra. —Tacheẽ nyecua jẽje. Se jembuquiarure chõ jẽingo nguia serese. Se jembiore chõ jẽingo nguia serese. Sechisaã icuare rocoĩ. Jemae sayã nguie asaã saã ndei quia resẽ. ²⁷ Jenyiurã ndese jẽingochĩ nguia ndua tuchite. Ũquĩ nda ua jeite. Ae ua eã mbeite quia, ũquĩ ndese quiatu jendua. Mbiam mingo beisa rese quiatu jendua. Se rei mbiam mingo beisa. Se rei Dios rucucha. Paba que uquirãcuã mondo seje ra, ¡ que Jesús ee ra. ²⁸ Mbiam que ñeembe Jesús je ra. —Mañi ure ra equia re? ¿Mbae rese ra aba riqui Dios mbiam re? ¡ que mbiam Jesús je ra. ²⁹ Jesús que ñeembe ee ra. —Dios que sembu ra. Seicua quia se. Seicua mose ra Dios ia tuchi jendese cote, ¡ que Jesús mbiam je ra. ³⁰ —¿Mbae mo nda eresaã na ure je re, uremae sayã nde? ¡ nda uremae nderese. Eĩ ure ra ndeicua cote. ³¹ Cose nda nanderamei ndiqui maná u u turuquia rĩ nda. Sã embesa ji no: “Dios que mbichae mbu ibei si mbiam je ra”, sã embesa ji riqui ¡ no, ¡ que mbiam Jesús je ra. ³² Jesús que ñee ee ra. —Tacheẽ nyecua jẽje. Moisés eã ño nguie mbichae mondo nguia mbiam je ibei si. Paba chõ nguie emondo nguia ibei si mbiam je. Aque mbichae ra mbiam mingo bei eã. Paba ra mbiam mingo beisa mondo mbiam je cote. ³³ Dios riqui mbichae mbuae mondo mondo mbiam je co. Ae Dios mondo mondo nguia mbiam je co nae, aque que tu ibei si ra. Aque rei mbiam mingo beisa, ¡ que Jesús ra. ³⁴ Mbiam que ñee Jesús je ra. —Aquembichae mbichae emondo mondo bei quia ure je, Urererecua, ¡ que mbiam Jesús je ra.

³⁵ Jesús que ñee ee cote ra. —Mbichae rã ño se re. Mbiam mingo beisa chõ se re. Serese siqui mose ra jeniãcuã eã mbei. Serese siqui mose ra jẽisei eã mbei. Jẽya bei ra. ³⁶ Jemae ndei que equia serese resẽ.

Seicua yã mbei chõchĩ nguiã ã. Acheẽ ndei que jẽje nyii resẽ. ³⁷ Ae Paba mee seje mbia nae, ùquĩ nda siqui bei serese. Ûquĩ nda aisi teã eã mbei. ³⁸ Paba que sembu ibei si resẽ. Secheẽ nguire eã ño aico nguiã mbae raã naa. Paba cheẽ nguire ae chõ aico nguiã mbae raã naa co. ³⁹ “Ae amondo ndeje nae, ùquĩ mo nda quiachãchĩ”, i que Paba seje ra. Ambuquera ja ra se, se tube mose íbii. ⁴⁰ Se rei Dios rucucha. Paba que sembu ra. Ae seicuate nae, ùquĩ nda siqui bei. “Ûquĩ nda amingo bei”, i que Paba ra. Ûquĩ ndaambuquera ja, se tube mose íbii, i que Jesús ra.

⁴¹ Judíos que paama i Jesús je ra. —Se rei mbichae rã. Ibei si que achu ra, i mose que judíos ñee icuã icuã Jesús je ra. ⁴² —Jesús chõ co re. José riirĩ ño co re. Eru rese que nandemae ndesẽ. Esi abe rese que nandemae ndesẽ. ¿Mbaerã eriquiñee nande je re? “Ibei si que achu ra”, i nande je re, i que mbia ñee ñee nyue ra. ⁴³ Jesús que ñee ee cote ra. —¿Mbaerã jẽingo ñee icuã icuã serĩ nde? ⁴⁴ Mbia ae ra siqui eã serese. Paba emingo mose serese, aque mose ra eriqui tuchi serese cote. Ûquĩ ndaambuquera si mingo sechube mose íbii. ⁴⁵ “Dios ra mbia mbaaquiato ja”, sã embesa ji riqui i no. Nyebe ra Paba cheẽ andusa siqui bei serese. Nyebe ra Paba cheẽ mumbasa reã siqui bei serese. ⁴⁶ Emo ngue mae eãte Paba rese ra. Se mii ño ngue amae erese ra. Esi chõ ngue achu resẽ. ⁴⁷ Tacheẽ nyecua jẽje. Ae seicuate quia nae, ùquĩ nda siqui bei. ⁴⁸ Se rei mbichae rã. Mbia mingo beisa rei se. ⁴⁹ Nanderamei ngue maná u u turã ndei quia turuquia re ra. Emo mose que mano mano ja ra. ⁵⁰ Mbichae mbuae chõ asenei senei nguiã jẽje co. Mbia mingo beisa rei mbichae mbuae. Aque que tu ibei si ra. Ae mbichae mbuae u nae, ùquĩ nda siqui bei. Ûquĩ nda ua eã mbei. ⁵¹ Se rei mbichae. Ibei si que achu ra. Mbia mingo beisa rei se. Ae seu nae, ùquĩ nda siqui bei. Mbichae ra amee mbia mingo bei sacuã. Aque mbichae rei serete sí. Seroo sí, i que Jesús judíos je ra.

⁵² Judíos que ñee icuã icuã nyue cote ra. —¿Mañi nda nguete mee nandechiurã nde?

i que nyue ra. ⁵³ Jesús que ñee ee cote ra. —Tacheẽ nyecua jẽje. Mbiarã ngue achu ra. Serete jẽu eã mose, jẽingo bei eã ndae. Seruqui jembei eã mose, jẽingo bei eã ndae. ⁵⁴ Ae serete u quia nae, ùquĩ nda siqui bei. Ae seruqui mbei quia nae, ùquĩ nda siqui bei. Ûquĩ ndaambuquera si mingo, sechube mose íbii. ⁵⁵ Serete rei mbia chiurã. Seruqui rei mbia chimbei rã. ⁵⁶ Ae serete u quia nae, ae seruqui mbei quia nae, ùquĩ nda siqui bei sechiangui re. Se abe ra aico bei echiangui re. ⁵⁷ Paba riqui bei co. Paba riqui semingo se abe co. Eĩ nda serete usa abe siqui bei. Amingo bei ra se. ⁵⁸ Mbichae mbuae chõ asenei senei nguiã jẽje co. Ae tu ibei si. Maná na eã ño aque mbichae re. Maná ngue nanderamei u u rei ra. Maná ngue mbia mingo bei eã nda. Emo mose que mano ja chõ nda. Ae sechimee u quia nae, ùquĩ nguia ra siqui bei, i que Jesús judíos je ra. ⁵⁹ Eĩ ngue Jesús quia judíos mbaaquiato quiato ra. Capernaum. Judíos chumunuásaa.

Mbia tubiriã hui Jesús si

⁶⁰ Jesús cheẽ andusa que ñee tuchi nyue ra. —Mbaranguiatũ tuchi chõ Jesús cheẽ ndiqui re. Echeẽ nandemumba eã aroneate quiato quia re, i que nyue ra. ⁶¹ —Mbia riqui ñee icuã icuã tuchichĩ secheẽ nii, i que Jesús uchiangui re ra. Nyebe ucheẽ mbuchecua ee cote. —¿Mbaranguiatũte secheẽ jẽje re? ⁶² ¿Mañi jenye ra mae mose serese re? Seso si mose ibate re. ⁶³ Nandete nandemingo eã nguiã. Nande aĩ ño nandemingo nguiã. Secheẽ nguia ra mbia mingo bei ibátee. ⁶⁴ Seicua ja eãte quiato nguiã ã. Jemo seicua eãte quia ã, i que Jesús ee ra. Mbae ao ramo mosenda bei que Jesús mbia icua uchiangui re ra. —Ã nda seicua. ã nda seicua eã. Co ra semondo mbia icuã je, i que Jesús mbia icua uchiangui re nyii ra. ⁶⁵ —Acheẽ ngue jẽje nyii, ùquĩ sí aico ñee jẽje a. Mbia ae ra siqui eã serese. Paba emingo mose serese, aque mose ra eriqui tuchi serese cote, i que Jesús ra.

⁶⁶ Aque mosebe bei que mbia tubiriã hui Jesús si cote ra. Ae siqui erese nyii nae, ùquĩ mo ngue hui ja esi cote ra. Ngatayã ngue equia erui cote ra. ⁶⁷ Jesús que ñee

uchimbaaquiatu je cote ra. Doce je. —¿Jẽ abe ra jẽhui sesi re? i que uchimbaaquiatu je ra. ⁶⁸ Simón Pedro que ñee ee ra. — Tei, Urererecua. Aba rui quia ra ureico cote. Ndecheẽ ño mbia mingo beisa resẽ. ⁶⁹ Ureico ndeicua ã cote. Cristo rei nde. Dios rucucha rei nde, i que Pedro ra. ⁷⁰ Jesús que ñee ee cote ra. —Jẽ doce que jaẽirabo rei ra. Sechimbaaquiatu sacua. Jemo ngue diablo rã nda, i que ra. ⁷¹ Judas Iscariote rĩ ngue eriqui ñee nda. Diablo, i. Simón ndiirĩ ndei Judas. Ae quia Jesús mee nguiã mbia icua je. Jesús chimbaaquiatu mo ndaque.

7

Jesús nongue siquiã Jesús rese

¹—Jesús nandei quia, i rei que judíos quia ñee ñee nyue ra. Nyebe Jesús si eã nguiã Judea cote. Galilea bei que eriqui ngata ra. ² Fiesta rurubi mose que cote ra. Tuchua ñetẽ ngue judíos saã saã mbei quia aque fiesta mose ra. Curubite que cote ra. ³ Jesús nongue que ñee ja ee ra. —Eso rã Judea. ¶ nda ndechimbaaquiatu mae ja ndechisaã ndese Judea jenda. ⁴ iMbae esaã nyecua chõ mbia resa rae jẽ! ¶ nda mbia ndeicua ja. Co ereico mbia mae sayã naa naa co. Mbia resa rae quiatu esaã saã, i que enongue ee ra. ⁵ Jesús nongue abe que Jesús icuayãte ra. Nyia, i eã Jesús cheẽ je. ⁶ Jesús que ñee ee cote ra. —Emo mose quia ra aso nyecua mbia je cote. Jẽ jẽso jẽ ae ae, jẽsose mose. ⁷ Dios cheẽ mumbasa riqui jẽucuyã eãte raque jẽ. Se quia eriqui nguiã seucuyãte ã. “Jenyisaã saã nguia eicuãte riqui nguiã”, ae quiatu nguiã ee co. Nyebe eriqui nguiã seucuyãte ã. ⁸ Jẽ ño jẽso fiesta rea. Se ra asoã. Emo mose quia nda achecua nguiã mbia je cote, i que Jesús ngõngue je ra. ⁹ Jesús que siqui are jiri Galilea cote ra.

Jesús mbia mbaaquiatu quiatu fiesta mose

¹⁰ Jesús nongue que nyo i fiesta rea cote ra. Aquere que Jesús abe si mingue cote ra. Ngasẽ nyecuyã ño ngue oso ra. —Mbia ra jiranduchĩ serese re, i que uchiangui re ra. ¹¹ Judíos rerecua que Jesús sequia sequia ja u ra. —¿Ma Jesús riqui ma nde? i ja que fiesta mose ra. ¹² Mbia que ñee

ata atate Jesús rĩ nda. —Jesús turãte que, i que emo emo nda. —Jesús turã eã ngue ra. Mbia mbiirĩ irĩte que equia no nda, i que emo emo no nda. ¹³ Mbia que siquichete judíos rerecua si ra. Nyebe mbia ucheẽ mbuchecua eã nguiã Jesús rĩ.

¹⁴ Fiesta ite mose que Jesús si Dios chuchua mbia mbaaquiatu quiatu cote ra. ¹⁵ Judíos que nyuruira tuchi Jesús cheẽ andu ra. —Eaquiatute quia eriqui re. ¿Mangue eriqui ñimbaaquiatu mangue nyii re? i que mbia ra. ¹⁶ Jesús que ñee ee ra. —Secheẽ ae eã asenei senei nguiã jẽje co. Paba cheẽ ño asenei senei nguiã jẽje. Ae sembu. ¹⁷ Emo siquise mose Dios cheẽ ndui, aque ra Dios cheẽ icua tuchi. Aque ra ñee. “Ucheẽ ño eã Jesús senei senei nguiã mbia je co. Dios cheẽ ño esenei senei nguiã mbia je co”, i ra aque ñee serĩ. ¹⁸ “iSã mbia ñee turã mbe i serĩ jẽ!” i ra emo ucheẽ achõ nenei nenei. “iSã mbia ñee turã mbei Dios rĩ nguiatu jẽ!” ae chõ nguiã Dios cheẽ nenei nenei se co. Acheẽ ñooño eã ño nguiã co. Mbia ambuĩ irĩ eã ño nguiã co. ¹⁹ Moisés que Dios cheẽ mbesa rei nande je ra. Nande emumbayã sacua. Jẽ nguia rei Dios cheẽ mumba. ¿Mbaerã jẽingo seiquia serĩte re? i que Jesús ee ra. ²⁰ Mbia que ñee ee cote ra. —Emo ndiqui ndeiquia serĩ eãte co. Aba checuayã icua ae nembuicua ndeae, i que mbia Jesús je ra. ²¹ Jesús que ñee ee cote ra. —Mbia rasi mo ngue ambucherõ sábado mose. Aque mĩ ño ngue asaã ndei nguiã. Aque mĩ je chõ jẽingochĩ nguiã nyuruirate mae serese. ²² Moisés que circuncisión teacuquia jẽje ra. Nanderamei nane ngue circuncisión saã nguiirĩ je ra. Nyebe jẽingo nguiã sábado mose abe circuncisión naa naa jendiirĩ je. ²³ Moisés cheẽ nguire chõ jẽingo nguiã circuncisión naa naa jendiirĩ je ã. Sábado mose abe. ¿Mbaerã jẽingo paama i seje mbia mbucherõ mose sábado mose re? ²⁴ “Aque eicuãte”, jenyje jei chõchĩ nguiã. Jẽirandu turã na erese nyii, i que Jesús ee ra.

Ibatenda chõ se re, i Jesús

²⁵ Jerusalén jenda que ñee ñee Jesús rĩ cote ra. —A Jesús riqui ñee mbia je a.

¿Nandererecua ra Jesús iquia eã si chõ nde?
 26 A eñi nyecua ñee mbia ite re a. Nandererecua ñee eã tuchi chõchĩ ee. Teachõ tuchi chõchĩ. ¿Cristo eriqui rei nandererecua je re? 27 Cristo eã ño Jesús re. Galilea jenda chõ ae re. Cristo tu mose quiatu ra nandeiranuate. Ma si chõ nda eru, i que Jerusalén jenda ñee nda. 28 Jesús que echeẽ ñandu ja ra. Dios chuchúaa eriqui mose mbia mbaaquiату quiatu. Nyebe Jesús echeẽ ndibishorõ nguiã cote. —¿Ma si achu co re? ¿Jẽ seicuate re? Se ae achu eã nguiã co. Sembu ji ae aico nguiã co. Ichõiñosa reã ae ngue sembu nguiã. Ae rese jemaie ãte nae, ae chõ sembu nguiã. 29 Se ae que amae erese ra. Esi que achu ra. Ae chõ sembu nguiã co, i que Jesús ee ra. 30 Mbía que paama i Jesús cheẽ mose ra. —Jesús nandehi etarõ sacua, i rei que mbia ñee nyue ra. Ae mbia eisiã ño nguiã. —Aque mose ra eremano, i ãte quiarei Dios ee. 31 Mbía tubiriã ngue Jesús icua icua ramo nguia cote ra. Nguerecuarã. —Cristo tuchi rei co. Co eriqui mbia mae sayã naa naa tuchi co. Emo aquiату mo nda tuãte rei. Co mui tuchi chõ ndei Dios chimbu co, i que mbia tubiriã nguia ñee ñee Jesús rĩ nda.

Fariseos paama i Jesús je

32 Fariseos que nyiisaquia mbia cheẽ ndese ra. Mbía ñee turã turã mose Jesús rĩ. Nyebe fariseos paama i nguiã Jesús je. Policía jenda mo ngue emondo rei Jesús isi sacua nda. Sacerdote rerecua abe que policía jenda mondo rei Jesús isi sacua nda. 33 Jesús que ñee nda. —Aico mbirĩ ño nguiã jendese a cote. Aquere ra aso si Paba rea. Ae sembu. 34 Jẽ nda serequia cote. Serea eãte ra se cote. Ae ra aso nae, huee jengasẽ aroneate, i que Jesús ee ra. 35 Judíos que ñee nyue ra. —Manguiti ra esi reae. Manguiti ra nandecuasẽ aroneate ee reae. Judíos siqui quia griegos rese nae, ùquĩ ndea ra esi reae. Griegos mbaaquiату sacua ndeae. 36 “Serequia ra se cote. Serea eãte ra se. Ae ra aso nae, huee jengasẽ aroneate”, i chõchĩ nguiã nande je. ¿Mbaerã eriqui ñee nande je ùquĩ nde? i que judíos u ñee nyue ra.

Jesús icuasa rei i riõ na

37 Fiesta ua nonde que mbia ñumunua tuchi cote ra. Fiesta mumba bei. Aque mose que Jesús ñi juã ñee mbia ite re ra. —“Emo isei mose, sã eru serea. Ambiu ra se. 38 Ae ra seicua nae, i riõ na nda ùquĩ. Iãcuã turã na nda ùquĩ”, sã embesa ji riqui i no, i que Jesús ucheẽ mbirãtãte mbia je ra. 39 —Ae ra seicua nae, ùquĩ je ra Espiritu Turã amondo, i ñene. Espiritu Turã mbu nonde chõ eriqui nguiã ñee. Jesús oso eã mose ibate chõ eriqui nguiã ñee.

Mbía ñee atate Jesús rĩ

40 Mbía tubiriã ngue chi Jesús cheẽ andu ra. ùquĩ mo ngue ñee nyue ra. —Co rei Dios cheẽ nenei neneisa co. Ae uresaarõ arõ nguia co, i que u ñee Jesús rĩ nda. 41 Emo emo ngue ñee nda. —Co rei Cristo tuchi co, i que ra. Emo emo ngue echeẽ sibi shorõ no nda. —Tei. ¿Mañi nda Galilea jenda Cristo re? Hue jenda eã ño nda Cristo ndesẽ. 42 “David riirĩ nda Cristo. Belén jenda ra Cristo, David rã si”, sã embesa ji riqui i no, i que mbia ñee ñee nyue ra. 43 Hue rĩ ja mbia ñee eãchĩ Jesús rĩ. Mbía que ñee ata ata Jesús rĩ nda. 44 —Jesús nandehi serao tarõ, i rei que emo emo ñee nda. Isiã si que ra.

Fariseos Jesús icuayã

45 Policía jenda ochi que nyo i nyebi fariseos je cote ra. Sacerdotes rerecua je abe nyebi. —¿Mbaerã Jesús jendu eã ure je re? i que ererecua policía jenda je ra. 46 Policía jenda que ñee ee ra. —Aque Jesús riqui mbia mbaaquiату turã tuchi aque. Ae rã si emo mbia mbaaquiату turã aronea, i que policía jenda ñee mbia rerecua je ra. 47 Fariseos que ñee policía jenda je cote ra. —¿Jẽ abe chee chõ Jesús jembirĩ irĩ nguia re? 48 Nandererecua mo ngue “coche rei” iã tuchi Jesús je resẽ. Fariseos mo abe que “coche rei” iã tuchi Jesús je resẽ. 49 ã mbia ataque riqui Dios cheẽ icua eãte ã. Quiachã ja ra Dios si, siqui mose Jesús rese, i rei que fariseos ra. 50 Nicodemo abe rei fariseo. Ae tu Jesús je isa nae, aque que ñee fariseos je ra. Uataque je ra. 51 —Emo nandembasi mbasi chooño aroneate. Echeẽ nandechandu rane nguiату. Nandeirandu ja rã nguiату erese. Embasi nonde. Eĩ

ngue Moisés embesa mii nande je ra, i que Nicodemo uataque je ra. ⁵² Fariseos que ñee ee cote ra. —¿Nde abe chõ Galilea jenda Jesús rese re? Embesa ji rese emae mae. Dios cheẽ nenei neneisa mo eãte que Galilea jenda resẽ, i rei que fariseos ñee asi Nicodemo je ra. ⁵³ Mbia que nyo: ja uchuchua cote ra.

8

Cuña mo siqui emo ndu rese

¹ Jesús que oso Monte de los Olivos ra. ² Isamami ngue Jesús si nyebi si Dios chuchúaa ra. Eresaitõ ndabe. Mbia que esichã tuchi ra. Jesús que ngoi ra. Mbia mbaaquiato quiatu. ³ Fariseos que cuña mo curucuaẽ Jesús je ra. Embesasa rese que cuña ndurucuaẽ ee ra. Cuña nda siqui emo ndu rese mbia je ra. Mbia ite re que fariseos cuña mii nda. ⁴ Ae cuña curucuaẽ nae, ñquĩ ngue ñee Jesús je ra. —Urembaaquiatusa, mbia que mae cuña ndese ra. Emo ndu rese siqui mose. ⁵ Moisés que ñee nande je ra. “Á jëiquia sita je”, i que Moisés quia ã mbia rii nda. ¿Mañi ere ra ã nii ñee nde re? i que cuña ndurucuaẽsa ñee Jesús je ra. ⁶ —Jesús nandembii rii. I nda ñee icuã. I nda mbia nandembii cuã Jesús je cote, ichõ equia nyii reaẽ. Nyebe cuña ndurucuaẽchĩ ee reaẽ. Jesús que nyatiquio chõ nda. Ibi que embesa mbesa o je ra. ⁷ —¿Mañi ere ra nde cuña je re? i bei que mbia quia Jesús je ra. Jesús que juã ñee mbia je cote ra. —Jemo turã mbeite mose, sã aque rane cuña chei sita je, i que Jesús ee ra. ⁸ Nyatiquio si que ibi mbesa ra. ⁹ Jesús cheẽ andu mose que mbia rerecua ireĩ ireĩ ja chõ nda. —Nandeicuã jate que, i ja chõ ngue ñee uchiangui re ra. Nyebe echoi nguiã usẽ ja. Amei nane ja que ra. Eataque quia usẽ nguiã eru: cote. Ererecua que usẽ ja ra. Jesús ae que siquichõ nda. Cuña ndesechõ. ¹⁰ Jesús que juã mbia rerecua ruibe cote ra. Cuña je que ñee cote ra. —¿Ma nderurucuaẽsa ma nde? “Nandecherã sita je”, ¿iãte emo nguia nderii co re? i que Jesús ñee cuña je ra. ¹¹ —Tei. Emo ñeeãte, Sererecua, i que cuña Jesús je ra. Jesús que ñee ee cote ra. —Se abe ra acheẽ eã ndeje.

Eso rei. ¡Mbae icuã nda eresaã sichĩ jê! i que Jesús cuña je ra.

Tata rendi rã ndei Jesús

¹² Jesús que ñee si mbia je ra. —Mbia ja mbaaquiatusa chõ se re. Tata rendi rã ño aico nguiã mbia je co. Ae siqui serui nae, ñquĩ nda siquiã itondáruu. Ñquĩ amingo bei quia querabe co, i que Jesús mbia mbaaquiato ra. ¹³ Fariseos que ñee Jesús je cote ra. —Ndechue chõ ereico nguiã ñee mbia je. Nyebe mbia “coche rei” i aronea ndechẽ je, i que fariseos ñee Jesús je ra. ¹⁴ Jesús que ñee echeẽ ndibishorõ nda. —Sechue acheẽ ndaque mbia je. “¡Ae bei jê!” i chõ mbite raque aba secheẽ mose. Ae si achu nae, huee jëicuayãte. Ae ra aso nae, hue abe ra jëicuayãte no. Se ae aicua nguiã co. ¹⁵ Jeñee icuã jei chõchĩ nguiã aba rii. Mbae mumbusẽ ja mose rocoi. Eĩ ae eã ño nguiã se. ¹⁶ “Co eicuãte”, ae eã nguiã se ae co. Paba rese chõ aico nguiã mbia mumbusẽ ja co. Nyebe aico nguiã ñee Paba cheẽ ndui si co. ¹⁷ “Mbia nyeremo ñee mose hue rii si, ‘ae beite’ jenyẽ chõ”, i que Moisés jêje ra. ¹⁸ Sã ure nyeremo ure no. Paba rese. Ae sembu. Sã ureico ñee serii Paba rese no. Ure nyeremo, i que Jesús fariseos je ra. ¹⁹ —¿Ma nderu riqui ma nde? i que fariseos Jesús je ra. Jesús que ñee ee ra. —Paba jëicuayãte quia ã. Se abe seicuayãte quia ã. Jẽ seicua mose, Paba abe ra jëicua, i que Jesús ra. ²⁰ Eĩ ngue Jesús quia mbia mbaaquiato quiatu Dios chuchúaa ra. Ofrenda no nosa jii que eriqui mbia mbaaquiato quiatu ra. Emo ngue Jesús isi ãte etarõ sacua nda. —Aque mose ra eremano, i ãte quiarei Dios ee.

Aso si ra ibate Paba rea, i Jesús

²¹ Jesús que ñee si fariseos je ra. —Aso si ra Paba rea cote. Serequia requia rei nda se re. Jëicuã mbei ra jemano nyee. Ae ra aso nae, huee jengasẽ aroneate, i que Jesús ee ra. ²² Judíos que ñee ñee nyue ra. —¿Mbaerã nda nandecuasẽ aroneate ee re? Nyiiquia ra rea, i rei que ñee nyue ra. ²³ Jesús que ñee ee ra. —Ibi jenda chõ jê nde. Ibatenda chõ se re. Ibi jenda eã ño se re. ²⁴ Nyebe aico nguiã ñee jêje nyii. “Jëicuã mbei ra jemano nyee”, ae que jêje

nyii. Seiçuayã mbei mose ra jemano nyee jêicuã mosebe, i que Jesús ee ra. ²⁵ —¿Aba tuchi nde re? i que mbia Jesús je ra. Jesús que ñee ee ra. —Cose ndare bei chõ aico nguiã serenei nenei jêje co. ²⁶ Mbae ra asenei tuchi jêje reae. Secheẽ nda jêicuã mbuchecua tuchi jêje. Ae sembu nae, aque quiarei ñee ñooño aronea. Echeẽ ngue achandu ra. Ae cheẽ ño asenei senei mbei nguiã mbia je co, i que Jesús mbia je ra. ²⁷ Mbia rerecua que Jesús cheẽ icuayã mbei ra. —Dios rĩ ño eriqui nguiã ñee, iã mbei que mbia ra. ²⁸ Jesús que ñeembe ee ra. —Mbiarã ngue achu ra. Jẽ nda sembucha ira rese cote. Aque mose ra mbae jêicua jiri serĩ cote. “Dios cheẽ nguire chõ eriqui mbia mbaaquiato quiatu re”, jenyera serĩ cote. “Dios rucucha chõ eriqui re”, jenyera serĩ cote. ²⁹ Ae sembu nae, aque riqui bei serese co. Echeẽ nguire aico bei embia co. Nyebe eriqui nguiã serechayã mbei co, i que Jesús ra. ³⁰ Jesús cheẽ mose que mbia Jesús icua icua cote ra.

Jẽingo bei mose serui, sechimbaaquiato tuchi chõ jẽ nde

³¹ Ae Jesús icua quia judíos nae, ùquĩ je que Jesús ñee nda. —Secheẽ si jẽhui eã mose, sechimbaaquiaturã tuchi ra jẽ. ³² Jẽ nda ichõiñosa reã jêicua tuchi cote. Mbia icuã nderecua rimba eã nda jẽ cote, i que Jesús ee ra. ³³ Mbia que ñee Jesús je ra. —Abraham nducucha rei ure. Mbia mo nimba eã mbei que ureico resẽ. ¿Mbaerã ereico ñee ure je re? “Mbia si taembui mingo cote”, i ure je re, i que mbia Jesús je ra.

³⁴ Jesús que ñee ee cote ra. —Ae mbae icuã saã saã nguia nae, ùquĩ ndiqui bei eicuã nimbarã ã. ³⁵ Erimba ra siqui bei eã nguerrecua rese. Nguiirĩ tuchi quiatu ra equereco bei nyiese. ³⁶ Se jembui mose mbae icuã si, eicuã nimbarã eã nda jẽingo cote. ³⁷ Abraham nducucha raque jẽ. Ûquĩ aicuate raque. Æ jẽingo secheẽ isi turã eãte ã. Secheẽ jêucuayã nguia ã. Nyebe jẽingo nguiã seiquia serĩte ã. ³⁸ Ae Paba teacuquia seje nae, ùqui ño asenei senei nguiã jêje co. Ae jendu teacuquia jêje nae, ùquĩ ndese chõ jẽingo nguiã jẽ ã no, i que Jesús ee ra.

³⁹ —Abraham ño ureru resẽ. Urei resẽ, i que mbia Jesús je ra. Jesús que ñee ee cote ra. —Abraham nducucha turã mose jẽ, eĩ nguia nda jẽingo turã nguiã ña. Abraham ndui si. ⁴⁰ Dios que sembaaquiato ra. Dios quiarei ñee ñooño eã. Echeẽ ño asenei senei nguiã jêje co. Ûquĩ je chõ jẽingo nguiã seiquia serĩte ã. I ãte que Abraham quia seje ra. ⁴¹ Jendu rã si chõ jẽingo nguiã ã, i que Jesús ee ra. Mbia que ñee Jesús je cote ra. —Ureru ata ata eãte nyeresẽ. Dios mĩ ño ureru re, i que ñee Jesús je ra. ⁴² Jesús que ñeembe ee ra. —Dios jendu tuchi mose, eĩ nguia nda jẽingo nguiã nyesequa serese chã. Ae quiarei sembu. Se ae eã achu nguiã. ⁴³ Æ jẽingo secheẽ andu sereãte ã. Nyebe jẽingo nguiã secheẽ icua aroneate ã. ⁴⁴ Aba checuayã nderecua rei jendu. Erese bei chõ jẽingo nguiã ã. Echeẽ jemumbayã mbei chõ nguiã ã. Mbia iquia iquiasa bei que ae ra. Cose ndare mosenda bei. Ñee ñooñosa reã quiato aronea tuchi quiarei ae. Ñee ñooño mbeite equia co. Ucheẽ achõ ño esenei senei nguiã mbia mbiirĩ irĩ querabe co. Ñee ñooñosa rerecua chõ aque re. ⁴⁵ Se quia acheẽ ñooño ãte rei nguiã jêje. Secheẽ jêucuayãte chõchĩ nguiã. ⁴⁶ Mbae icuã ngue asaã eãte ra. Ûquĩ jêicuate raque. Acheẽ ñooño ãte sequia co resẽ. ¿Mbaerã jẽingo secheẽ andu sereã neate ã nde? ⁴⁷ Dios quiato quia Dios cheẽ ñandu turã nguiã. Dios quiato eã ño jẽ nde. Nyebe jẽingo nguiã Dios cheẽ andu sereãte ã, i que Jesús mbia je ra.

Jesús rane siqui Abraham si nyii

⁴⁸ Judíos que ñee si Jesús je ra. “Samaria jenda chõ nde reae. Aba checuayã nyireco chõ nde reae”, ure que nderĩ nda. ¿Ae tuchi nde re? i que judíos ñee Jesús je ra. ⁴⁹ Jesús que ñee ee ra. —Aba checuayã nyireco eã ño se resẽ. Co aico ñee turã tuchi Paba rĩ co resẽ. Jẽ nguia jeñee icuã mbeite nguiã serĩ. ⁵⁰ “iã mbia ñee turã serĩ jẽ!” ae eã ño nguiã se co. Paba quia siqui nguiã ñee turã turãte serĩ co. Ae quia ra mbia icuã mbasi. ⁵¹ Tacheẽ nyecua jêje. Ae secheẽ mumbayã nguia nae, ùquĩ nda amingo bei. Ûquĩ nda manoã mbei, i que Jesús ra. ⁵² Judíos que ñee Jesús je ra. —Aba checuayã nyireco

tuchi chõ ereico nguiã co. ¿Mbaerã ereico ñee nde? “Mbia ra manoã, secheẽ mumbayã mose”, i re. Abraham ngue mano. Nandei. Dios cheẽ nenei neneisa que mano ja resẽ. ⁵³ ¿Nde ndeaquiatsu tuchi Abraham si re? Ae chee que mano. Dios cheẽ nenei neneisa chee que mano. ¿Abate nde re? “Mbia ra manoã”, ere chõte equia co, i que judíos Jesús je ra. ⁵⁴ Jesús que ñee ee cote ra. Se ae secheẽ turã mose seriĩ, mbia ra seanduchõ. Paba quia ñee turã mbei nguiã seriĩ co. Ae je jẽingo ñee. “Dios urererecua” i raque eriĩ. ⁵⁵ ã jẽingo Dios icuayãte ã. Se quia aicuate nguiã co. “Dios aicuayã”, se i mose, eĩ nda acheẽ ñooñote rei jẽ na si. Dios aicua tuchite. Echeẽ ndui chõ aico bei nguiã co. ⁵⁶ Abraham ngue seraarõ arõ mbei quia ra. “Tu rae”, i bei que equia ñimbia seriĩ nda. Secuasẽ mose que eyate mae serese cote ra, i que Jesús mbia je ra. ⁵⁷ Mbia que ñee Jesús je ra. —Cosete que Abraham mano ndesẽ. ¿Mañi ere mae erese re? Cincuenta años eãte nde resẽ, i que ra. ⁵⁸ Jesús que ñee ee ra. —Tacheẽ nyecua jẽje. Cose ndare bei chõ aico nguiã co. Abraham tiã mosenda bei, i que Jesús ra. ⁵⁹ —¿Sita je Jesús nandechei jẽ! i rei que mbia sita isi isi ra. Jesús que ñimi ñimi oso ra. Usẽ Dios chuchua si.

9

Jesús emo ndesayã mbucherõ

¹ Ñeenda rui que Jesús mae emo ndesayã ndese ra. Echaacuquia mosenda bei que eresayã nyobei ra. ² Jesús chimbaaquiatsu que ñee ee ra. —Urembaaquiatusa, ¿abate mbae icuã saã nyii re? Co resayã nonde re. Eru ereae. Esi ere no ae. Ae si ere no ae. ¿Abate ere? i que Jesús je ra. ³ Jesús que ñee ee ra. —Tei. Emo ngue mbae icuã saã eãte rei ra. Mbia ra mae ja Dios quirãcuã ndese chã. Embucherõ mose. Nyebe eresayã nyaacuquia nguiã. ⁴ Arõ ño nandeico nguiã mbae raã naa. Itondaru mose, mbae rese nandeico aroneãte cote. Nyebe aico bei nguiã mbae rese Paba je co. Semano mose quia aico aroneãte nguiã mbae rese íbii cote. ⁵ Seico mose íbii, aico mbia resaete co, i que Jesús ra. ⁶ Jesús que ñinimbu íbii cote ra. Tuchu que esaã ngũendi je ra. Nguiti

que eresayã ndesa rese cote ra. ⁷ —Eso nderuba irei cote. Ama Siloé eso eirei, i que Jesús eresayã je ra. (“Echimondo”, i chõ nguiã Siloé je.) Eresayã ngue oso nguesa irei huee ra. Obei que eru quia mae turã cote ra. ⁸ Hue jenda que nyuruira jate mae erese ra. Ae mae nguia erese nyii nae, ũquĩ ngue nyuruira tuchi mae erese cote ra. Eresa cherõ mose. —¿Co resayã ño ache ache i quia nyii re? ¿Ae chõ ere? i que mbia ñee ñee nyue ra. ⁹ —Ae eã ño ñene, i que emo nda. —Ae chõ ñene, i que emo emo no nda. Eresayã ngue ñee cote ra. —Se chõ nyeresẽ, i que ñee mbia je ra. ¹⁰ —¿Mañi nderesayã mae nde? i que mbia ee ra. ¹¹ Eresayã ngue ñee nda. —Ae eriqui “Jesús” i nae, aque que tuchu saã nda. Nguiti que seresa rese ra. “Eso nderuba irei Ama Siloé”, i que seje cote ra. Aso que se ra. Seruba irei ji que amae cote ra, i que eresayã mbia je ra. ¹² —¿Ma nderesa mbucherõsa riqui ma nde? i que mbia eresayã je ra. —Qui chõ esi, i que ee ra.

Fariseos ñee eresayã je

¹³ Mbia que eresayã curuchoi fariseos je cote ra. ¹⁴ Ae mose Jesús eresayã mbucherõ nae, sábado mose que ra. Tuchu que esaã, aque mose que ra. ¹⁵ —¿Mañi ere nderesa ira re? i que fariseos ee ra. —Tuchu que equiti seresa rese ra. Ae seresa airei nguiã. Co aico mae co cote, i que eresayã nda. ¹⁶ Fariseos mo ngue ñee nyue ra. —Ae eresa mbucherõ sábado mose nae, Dios cheẽ nenei neneisa eã ño aque re, i rei que nyue ra. Emo emo ngue ñee no nda. —Eĩ nguia nda eicuã mose mbia mae sayã naa naa eã nguiã nande je chã, i que fariseos mo ñee nyue ra. Hue rĩ ja eã ngue fariseos ñee Jesús rĩ nda. ¹⁷ Fariseos que ñee si eresayã je ra. —Ae nembucherõ nae, ¿mañi ee re? ¿Mañi ere quia nde eriĩ co re? i que ra. Eresayã ngue ñee nda. —Dios chimondo que ae ra, i que eresayã nda.

¹⁸ Judíos que echeẽ ñandu sereã nda. Eresa turã mbei mo eriqui reĩ nguiã ee. Nyebe “jenyu” i nguiã eresayã ndu je. Esi je abe no. —Nandeirandu rã erese, i que ra. ¹⁹ —¿Co nderiirĩ co re? ¿Eresayã nyobei nyii re? ¿Eresayã nyaacuquia nyii re? ¿Mbae emumae nguia co cote re? i que ñee eru je

ra. Esi je abe. ²⁰ Eru que ñee ee ra. —Co rei seriirĩ co. Eresayã ngue nyaacuquia rei ra. ²¹ Mañi ño equia mae co cote. Aba chõ embucherõ. Ureicuayãte. Jeñee nguia ee. Etiarõte nyeresẽ. Ae ra ñee jẽje, i que eru ñee judio rerecua je ra. Esi abe. ²² Judíos rerecua quia ñee nguia nyue nyii reaẽ. —Emo ñee turã mose Jesús riĩ, ùquĩ nandemombo bei mbia chumunuasa si. “Dios chimbu rei Jesús”, i mose, nandemombo bei mbia chumunuasa si, i quia ererecua quia ñee nyue nyii reaẽ. Nyebe eresayandu siquichete nguia ñee turã Jesús riĩ. Esi abe no. ²³ Nyebe eru riqui nguia ñee ererecua je. —Jeñee nguia seriirĩ je. Etiarõte nyeresẽ, i ee. Esiquichete quia ñene.

²⁴ —Quiatuchu, i si que judíos rerecua eresayã je no nda. —Echeẽ turã Dios miĩ je. ¡Jesús abe je ra erecheẽ turãchĩ jẽ! Eicuãte ae resẽ, i rei que judíos rerecua eresayã je ra. ²⁵ Eresayã ngue ñee ee ra. —Aicuayãte se. Eicuãte ereae. Eaturãte ere no ae. Aicuayãte se. Seresayã ngue nyii ra. Co aico mae co cote. Ùquĩ miĩ ño aicua nguia co, i que eresayã judíos rerecua je ra. ²⁶ —¿Mañi equia ndeje re? ¿Mañi nderesayã ira re? i si que eresayã je no nda. ²⁷ Eresayã ngue ñeembe ererecua je ra. —Acheẽ ndei que jẽje resẽ. Secheẽ ngue jemumb resẽ. ¿Mbaerã jẽingo “echeembe” i seje ã nde? ¿Jẽ abe jẽingose rete sembucherõsa rui re? i que eresayã judíos rerecua je ra. ²⁸ Ererecua que ñee icuãte ee cote ra. —Ae rui chõ ereicochĩ nguia nde co. Moisés rui chõ ureico nguia ure ã. ²⁹ Moisés je quiatu que Dios ñee nyii resẽ. Ùquĩ ño ureicua nguia ã. Ae nembucherõ nae, ma si quiatu ñi ae ru. Ae quia ureicuayãte nguia, i que judíos rerecua ra. ³⁰ Eresayã ngue ñee ee ra. —Seresa que embucherõ ndesẽ. “Dios chimbu”, jenye eã ñochĩ equia ã. Seresa mbucherõsa raque ae. ³¹ Dios ra mbia icuã ñee ñanuã. Ae Dios cheẽ mumbayã nguia nae, ùquĩ ñee nguia ra Dios ñandu. ³² Seresayã ngue achaacuquia rei nyii ra. Ae que sembucherõ nda. Emo abe ra ùquĩ saã eã. ³³ Dios chimbu eã mose, eĩ nguia nda mbae raã eãte nguia ña, i que eresayã judíos rerecua je ra. ³⁴ Judíos rerecua que ñee eresayã je ra. —Ndechaacuquia

mosenda bei chõ ndeicuã ndiqui nguia co. ¿Mbaerã ereico urembaaquiato sete re? i que judíos rerecua eresayã je ra. Nyebe que judíos rerecua eresayã mombo bei judíos chumunuasa si cote ra.

Ureaquiature ure, i chõchĩ fariseos

³⁵ Jesús que jirandu erese ra. Emombo mose. Nyebe esi nguia ñee eresayã je. —¿Dios rucucha ereicuate quia co re? i que ee ra. ³⁶ —¿Aba chõ Dios rucucha re? Aicua sete quia co, i que eresayã nda. ³⁷ —Ae chõ se resẽ. Ae je chõ ereã ñee a resẽ. Eremae ndei serese resẽ, i que Jesús ee ra. ³⁸ Eresayã ngue ngoi ngüiã ndese Jesús ji cote ra. —Areicua tuchi se cote, i que Jesús je ra. ³⁹ Jesús que ñee ee ra. —Achu que íbii ra. Mbia icuã mbuchecua mbia je ra. Achu que eresayã ndesa mumae mae nda. Ae eresa nae, ùquĩ mumae eã sacua abe que achu ra, i que ra. ⁴⁰ Fariseos mo abe que chi hue ra. Jesús cheẽ andu que ñee Jesús je ra. —¿Uresayã ureico ure abe ã nde? i que fariseos ee ra. ⁴¹ Jesús que ñee ee ra. —Jendesayã mose, eĩ nda jẽicuã ambuchecuayã ndei. “Seaquiature”, jenyechĩ equia ã. Nyebe aico nguia jẽicuã mbuchecua jẽje co, i que Jesús judíos rerecua je ra.

10

Ovejas ucha cheẽ icuate

¹ Jesús que ñee nda. —Tacheẽ nyecua jẽje. Ae iqueã nguia oveja chiquesa rĩ nae, mbae mbuquiachãsa chõ ùquĩ nde. Echiquesa eã ñi ique ique mose. ² Ae ique ique quia oveja chiquesa rĩ nae, aque quia oveja raarõsa aque re. ³ Ae echiquesa saarõ nguia nae, aque ra echiquesa equia oveja raarõsa je cote. Eique sacua. Oveja raarõsa cheẽ nda oveja icua ja. Ñee miĩ miĩ nda umbae oveja je. Oveja icua ja. Ae ra oveja nyoĩ usẽ erui. ⁴ Eraarõsa embusẽ ja mose etaronda si, ae rane nda ngata oso quia erẽta. Oveja ra nyoĩ ja quia erui. Echeẽ nguia eicuate nguia. ⁵ Emo ndui ra echoĩ eã. Uchã ño nda emo si. Echeẽ nguia eicuayãte nguia, i que Jesús ñee nda. ⁶ Jesús que eĩ ndei ñee fariseos je ra. Ejemplo je. Oveja renei

nenei ee. Jesús cheẽ andusa que echeẽ icuayãte ra.

Jesús rei oveja raarõsa

⁷ Jesús que ñee si ee ra. —Tacheẽ nyecua jêje. Oveja chiquesa rã ño se re. ⁸ Ae ngaẽ senonde nyii nae, mbae mbuquiachãsa ja chõ ùquĩ nde. Nyebe ovejas eche sũchã eã nguiã. ⁹ Oveja chiquesa chõ se re. Ae seicua quia nae, ùquĩ nda ateaquiату bei mingo. Sã oveja mo ndiqui oso quiaru quiaru no. Sã eriqui cuaẽ nyebi chebi bei utaronda no. Eĩ si ra seicua quia siqui bei serese. ¹⁰ Mbae mbuquiachãsa quia ra tu mbae rirõ sacua. Mbae mbutiã sacua. Mbae iquia sacua. Se quia ni achu nguiã mbia mingo bei sacua. Mbiambia tuchi nonde que achu ra. ¹¹ Oveja raarõsa rei se. Ovejas ateaquiату bei quia co. Amano nda emingo bei sacua. ¹² Ae ovejacha eã nae, aque ra ovejas saarõ ndaque, saarõ turã eã ndae. Uchã ño nda nyacua tu mose ovejas je. Nyacua ra ovejas isi embuquiachamba u quia. ¹³ “Echa eã ndei se re”, i ra eraarõsa uchã erecha. Esiquiche mose. Oveja raarõ turã eã. ¹⁴⁻¹⁵ Se quiarei oveja raarõsa turã. Sã Paba riqui seicuate co no. Sã aico Paba icuate se abe co no. Eĩ ae chõ nguiã oveja icua sembae co no. Sembae abe seicua quia ã. Sembae ovejas mingo bei sacua nda amano. ¹⁶ Ovejas mo abe que sembae no nda. A jenda eã ño ùquĩ nde. Ùquĩ abe ra aru a. Ùquĩ nda secheẽ mumbayã no. Sembae oveja ra chi ja serese cote. Se mii ño nda asaarõ ja cote. ¹⁷ Sesi quiche eã semana ndese. Sembae ovejas mingo sacua. Nyebe Paba iate riqui nguiã serese co. Semanonde ra aquera si. ¹⁸ Semano sereã mose, eĩ nda mbia seiquia aroneate rei. Se ae chõ amanosete nguiã mbia je. Se ae chõ nda aquera si no. Paba quia uquirãcuã meete nguiã seje, i que Jesús mbiambia je ra.

¹⁹ Judíos que ñee ata atate nyue ra. Jesús cheẽ mose. Hue rĩ si ñee ja eã. ²⁰ —Aba checuayã siquite Jesús rese co resẽ. ¿Mbaerã jẽingo echeẽ andu re? i que emo emo uataque je ra. ²¹ Emo emo ngue ñee no nda. —Ae rese aba checuayã ndiqui nae, ùquĩ nda ñee turã eã ndesẽ. Aba checuayã

nda mbiambia resayã mbucherõ eã ndesẽ, i que emo emo no nda.

Judíos Jesús osei chiã

²² Mbiambia que ñumunua nua nguia Jerusalén cote ra. Dios chuchua ao mosenda ndese ndua ndua. Nyiiseite que aque mose ra. ²³ Jesús que oso Dios chuchúaa ra. Portal de Salomón ngue eriqui ngata ra. ²⁴ Judíos que ngaẽ Jesús mama nda. Ñee ngue ee ra. —Ureico ndeicuayãte ã. ¿Manosete ra erecheẽ tuchi ure je re? Nde rĩ. Echimbu checua jiri ure je. Nde Cristo mose, ndecheẽ embuchecua ure je, i que judíos ñee Jesús je ra. ²⁵ Jesús que ñee ee ra. —Acheẽ ndei que jêje resẽ. Secheẽ jẽñanuã ño nguiã ã. Paba quirãcuã je chõ aico nguiã mbiambia mae sayã naa naa co. ã ndese mae nda seicua nguiã ña. ²⁶ Acheẽ ndei que jêje nyii resẽ. Serimba eã ño jẽ nde. Nyebe jẽingo nguiã secheẽ anuã. ²⁷ Serimba secheẽ icua ja quia ã. Serimba aicua ja quia ã. Serui ja serimba riqui ã. ²⁸ Serimba amingo bei quia co. Serimba ra quiachã eã mbei. Emo eisi aronea tuchi sesi. ²⁹ Paba que emee serimbarã nda. Emo eisi aroneate Paba o si. Ae quiarei equirãcuã tuchi. ³⁰ Aque mii ño ureico nguiã ã. Paba rese. Eĩ si tuchi ureico nguiã ã, i que Jesús ee ra.

³¹ Nyebe judíos paama i nguiã ee. Sita que esirõ sirõ nda. —Jesús nandechei, i rei que ra. ³² Jesús que ñee ee ra. —Paba que sembuquirãcuã tuchi ra. Nyebe jemaesayã asaã saã tuchi nguiã jêje. ¿Ùquĩ mo nii jẽingo “nandechei” i seje re? i que Jesús judíos je ra. ³³ Judíos que ñee Jesús je ra. —Ndechiao turã mo je eã ño ureico nguiã “nandechei” i ndeje. Erecheẽ icuãte que Dios rĩ ndesẽ. Dios eresaã saãte quia ure je co resẽ. Mbiambia si chõ ndaque nde, i que judíos Jesús je ra. ³⁴ Jesús que ñee ee ra. —Sã embesa ji riqui i no: “Jẽ ndei dioses, i que Dios ra”, sã embesa ji riqui i no. ³⁵ Embesa ji ñeeñoño aronea. “Dioses rei jẽ”, i que Dios ucheẽ nenei neneisa je ra. ³⁶ Dios que seirabo ra. Sembu que íbii cote ra. ¿Mbaerã jẽingo paama i secheẽ mose re? “Dios riirĩ ño se re”, i mose re. “Ndeicuãte chõchĩ Dios je”, jenyẽ chõchĩ nguiã seje. ³⁷ Se mbae

raã naa eã mose Paba rã si, ùquĩ mose quia secheẽ jeñanua. ³⁸ Paba rã si mose, “coche ñene” jēnye chõ sechisaã je. Secheẽ jeñandu sereã ndaque. Paba riqui serese co. Se abe aico Paba rese co. Ùquĩ nda jēicua cote, “coche ñene” i mose sechisaã je, i que Jesús ee ra. ³⁹ —Jesús nanderao etarõ sacua, i rei que mbia ra. Jesús que oso chee hue si ra.

⁴⁰ Jesús que oso Ama Jordán ndobei ra. Ae Juan ndiqui bautizar i nyii nae, huee que esi ra. Huee que Jesús riqui arete cote ra. ⁴¹ Mbia que nyoĩ nyoĩ tuchite erea huee ra. Ñee ñee ngue nyue ra. —Juan ngue nandemae sayã mo saã eãte rei nande je. Nandembiirandu turã tuchichĩ Jesús rĩ. Ichõĩño eã ño equia ñee nande je reaẽ, i que mbia ñee nyue ra. ⁴² Mbia tubiriã ngue Jesús icuua huee ra.

11

Lázaro mano

¹ Emo ndasi que chi ra. Lázaro, i que ee ra. María, i que enongue je ra. Marta, i que enongue je no nda. Echari ja que ùquĩ nda. Betania jenda ja que ùquĩ nda. ² María rei aba mbushimbusa ichusẽsa Jesús i rese. Ua je que esi esi ra. Enongue quia erasi re. Lázaro, i que ee ra. ³ Nyebe echari mbia mo mondo nguiã Jesús mbiirandu sacua. —Ndequiato rasi que chi aque rĩ nda, i que echoĩ Jesús mbiirandu ra. ⁴ Jirandu mose que Jesús ñee cote ra. —Mano sacua eã ño erasi chi nguiã aque. Dios quirãcuã ndese mbia mae sacua ño erasi chi nguiã aque. Se abe sequirãcuã ndese mae sacua ño erasi chi nguiã aque, i que Jesús ra. ⁵ Jesús que nyesecua tuchi Marta rese ra. María rese. Lázaro rese abe no. ⁶ Lázaro rasi rese jirandu mose que esi jei eã erea ra. Siquichõ ngue ra. Itõ nyeremo ngue huee ra. ⁷ —Nyaobe Judea cote, i que uchimbaaquiato je cote ra. ⁸ Echimbaaquiato que ñee ee ra. —Namote que judíos ndeiguia serĩte sita je. ¿Mbaerã nda ereso si huee re? i que Jesús je ra. ⁹⁻¹⁰ Jesús que ñee ee ra. —Dios quiato que sembu ra. Mbae raã naa sacua ee. Echeẽ ngue asaã ja eãte ra. Nyebe emo seiquia aroneate namo. Se echeẽ naa ja mose quia ra mbia seiquia arõte cote, i que ñee

uchimbaaquiato je ra. ¹¹ Aquere que ñee si uchimbaaquiato je ra. —Nandequiato que uque cote ra. Lázaro. Taso emumba cote, i que ra. ¹² —Uque mose u, ae ae ra ñumumba rei, i que echimbaaquiato ee ra. ¹³ —Lázaro que mano nda, i eã ngue Jesús ucheẽ mbuchecua tuchi ee ra. Lázaro mano tuchi raque. Lázaro uquechõ nei nguiã echimbaaquiato je. ¹⁴ Jesús que ucheẽ mbuchecua ramo ee cote ra. —Lázaro que mano nda. ¹⁵ Coche aico eã nguiã huee. Jē nda seicua tuchi cote. Nyao erea cote, i que Jesús uchimbaaquiato je ra. ¹⁶ Tomás que ñee echimbaaquiato ataque je ra. —Nyao erese nande abe no. Sã mbia nandeiquia nande abe rõ, i que Tomás ra. “Eata”, i que mbia quia Tomás je ra. Eata rei ae.

Jesús mbia raaque mbuquerasa

¹⁷ Ngasẽ ngue Betania cote ra. Mbia hue jenda que ñee Jesús je cote ra. —Co Lázaro ati ji chi itõ mocoĩte co resẽ. Cuatro días tuchite nyeresẽ, i que mbia ñee Jesús je ra. ¹⁸ Aichite que Betania Jerusalén si ra. Tres kilómetros que ra. ¹⁹ Nyebe judíos rane ngaẽ jate nguiã ngasẽ Jerusalén si. María mbia jiri sacua. Marta abe no. Enongue raaque ati ji mose. ²⁰ Marta jirandu mose Jesús rese que esi erobeishĩ nda. Oo que erese ra. María quiato que siquichõ tuchúaa ra. ²¹ Marta que ñee Jesús je ra. —Sererecua, ndeico mose a, eĩ nda senongue manoãte rei. ²² Dios ra ndecheẽ ñandu. “Mbae mo embu seje”, i mose, i que Marta Jesús je ra. ²³ —Ndenongue ra quera si, i que Jesús ee ra. ²⁴ Marta que ñee ee cote ra. —Ae bei. Mbia raaque quera ja mose, aque mose ra senongue abe quera si. Mbae ua ja mose ra quera si. Aicuate raque se quia co, i que Marta ra. ²⁵ Jesús que ñee ee ra. —Mbia raaque mbuquerasa rei se. Mbia mingosa rei se. Ae seicua quia nae, ùquĩ nda mano ndaque, quera si rae. ²⁶ Ae seicua quia nae, ùquĩ nda uayã mbei. ¿Ùquĩ ereicua quia co re? i que Jesús ee ra. ²⁷ Marta que ñee ee ra. —Ae. Cristo chõ nde re. Dios rucucha chõ nde re. “Dios rucucha ra tu íbii”, i que mbia quia nyii nae, ae chõ nde re, i que Marta Jesús je ra.

Jesús nyeseo

²⁸ Aquere que Marta si María mbiirandu ra. —Nandembaaquiatusa que tu ra. Hue que eriqui nderequia ra, i que Marta ñee ngõngue ísaa ra. ²⁹ Echeẽ nduibe tuchi que María si juã asi Jesús rea ra. ³⁰ Jesús ngasẽ mose rocoĩ mbia chuchua ite re. Marta erobeishisa bei que Jesús riqui ra. ³¹ Mariaso rese que judíos chi mae ja ra. —Ngõngue atisa chõ María si nguiã nyeseo qui, i rei ngue judíos choi nguiã erui. ³² María que ngasẽ Jesús je ra. Ngoi que ngũĩã ndese ejii ra. Ñee ngue ee ra. —Ndeico mose a senongue ndasi mose, eĩ nda manoãte rei, i que María Jesús je ra. ³³ María que nyeseo ra. Judíos que chi erese, ùquĩ abe que nyeseo no nda. Nyebe que Jesús abe ia eãte ra. Echiã ngue ngoi eã tuchi ra. ³⁴ —¿Mangue jenyati mangue re? i que Jesús mbia je ra. —Nyao erea ae, i que mbia ee ra. ³⁵ Jesús que nyeseo ra. ³⁶ Judíos que ñee nyue ra. —¡Sã jẽ! Nyesecua tuchi Lázaro rese. Eya eãte riqui erese co, i que mbia ra. ³⁷ Emo emo ngue ñee nda. —Jesús que eresayã ndesa mbucherõ. Eĩ nda Lázaro rasi mbucherõ nde chaẽ. Eĩ nda manoãte, i que mbia ra.

Jesús Lázaro mbuquera si

³⁸ Jesús ia eãte que ngasẽ Lázaro atiguia ra. Sita imi ye. Sita chõ ngue eatiquia no nda. ³⁹ —¡Sita eatiquia jẽjea jẽ! i que Jesús mbia je ra. Marta que ñee Jesús cheẽ mose ra. —¡Enete ra nande je jẽ! Curite que mano ndesẽ. Cuatro días tuchi que ra, i que Jesús je ra. ⁴⁰ Jesús que ñee ee ra. —“Seicua tuchi mose ra eremae Dios quirãcuã ndese”, ae rei que ndeje nyii, i que Jesús ra. ⁴¹ Sita eatiquia que mbia jea cote ra. Jesús que mae ibate quitu ra. Ñee Dios je. —Paba, secheẽ ngue erechandu. “¡aanye”, ae bei quia ndeje co. ⁴² Nde quiarei seandú bei. Mbia resa rae aico ñee ndeje a. “Dios chimondo chõ eriqui re”, i nda ã serĩ ña, i que Jesús ñee Dios je ra. ⁴³ Jesús que ñeemombo Lázaro raaque je cote ra. —Lázaro, ¡echu usẽ! i que ra. ⁴⁴ Eraaque que usẽ u juã cote ra. Eo cuasa resebe que usẽ nda. Ei abe ecua ji tiru je. Eruba abe ecua ji tiru je. —Jenyura mondo, i que Jesús mbia je ra.

Jesús nandequia, i judíos

⁴⁵ Judíos que nyoĩ María rese, ùquĩ ngue mae ja Jesús rese ra. Lázaro mbuquera mose. Ùquĩ tubiriã ngue Jesús icua cote ra. ⁴⁶ —Jesús que Lázaro raaque mbuchuruã nda, i que emo nyoĩ fariseos mbiirandu ra. ⁴⁷ Fariseos que ñumunua ja cote ra. Sacerdotes rerecua ja rese. Mbia rerecua ja. Ñee tuchi Jesús rĩĩ. —¿Mañi nande ra equia ee re? Mbia mae sayã naa naa tuchichĩ equia aque. ⁴⁸ Nande ereachõ mose ra mbia siqui ja techĩ erui re. ¡Roma jenda ra nandembae isichĩ ibi jẽ! ¡Dios chuchua ra embucoichĩ ngaẽ jẽ! i que ererecua ñee nyue ra. ⁴⁹ Caifás que sacerdote rerecua tuchi aque mose ra. Ae que ñee uataque je ra. —Mbae jẽicuayã tuchichĩ nguia ã. ⁵⁰ Jendua eã ñochĩ equia ã. Aque mii ño nda mano nguiã nande ja je chã. Eĩ nda judíos ua tuchi eã, i que Caifás uataque je ra. ⁵¹ Caifás ae que ñee eã nda. Dios ae quiatu ngue embucheẽ nguiã ùquĩ. Sacerdote rerecua tuchite quiatu ngue ae re. Nyebe Dios embucheẽ nguiã. —Jesús ra mano judíos mingó ja sacua. ⁵² A jenda achõ je eã nda Jesús mano. Dios riri mangue chooñoa jenda je abe chõ nda Jesús mano nguiã. Dios riri munua ja sacua, i que Caifás ñee nda. ⁵³ Aque mose bei que judíos rerecua ñee ñee nyue ra. —¡Jesús nandequia rei jẽ! i que equia ñee ñee nyue ra. ⁵⁴ Jesús que nyecua eã judíos je cote ra. Judea si que esi cote ra. Turuquia rurubi que esi ra. Efraín, i que sucha tubiriã je ra. Huee que eriqui arete uchimbuaquiatusa rese cote ra. ⁵⁵ Fiesta de la pascua que ecurubite ra. Nyebe judíos nyoĩ choi ja nguiã Jerusalén. Suchamo jenda emo emo ngue nyoĩ jate ra. Pascua nonde que echoi huũcuã mbitirõ sacua nda. ⁵⁶ Mbia que Jesús sequia quia ra. —¿Tu ra fiesta re? ¿Tu eã nda re? ¿Tu aroneate jẽje re? i que mbia ñee ñee nyue Jesús rĩĩ nda. I que mbia u ñee Dios chuchúaa ra. ⁵⁷ Mbia rerecua que ñee mbia je nyii ra. —Emo jirandu mose Jesús rese, sã urembiirandu jei. Eĩ nda ureisi. Eĩ nda uretarõ mii, i que sacerdote rerecua ñee nyii ra. Fariseos abe no.

12

María aba mbushimbusa ichusē Jesús i rese

¹ —Seis días mose ra pascua cote, i que mbia ra. Aque mose que Jesús si Betania nda. Huee que Lázaro riqui ra. Ae Jesús mbuquera erua si. ² Mbia que ñio mii Jesús chiurã nda. Marta que echaurã mondo mondo ee ra. Mbia je abe. Lázaro abe que chí quiaru erese ra. ³ María que aba mbushimbusa queru Jesús je cote ra. Medio litro. Nardo, i que ũquĩ je ra. Mbae isiquia mumba tuchi que ũquĩ nda. María que eichusē Jesús i rese ra. Ua je que esi esi ra. Tuchua mbushimbu ja que ra. ⁴ Judas Iscariote abe que siqui ra. Simón ndiirĩ ngue aque ra. Jesús chimbaaquiato mo ndei que aque ra. Ae quiato que Jesús mee mbia icuã je emo mose cote ra. Ae que ñee nda. ⁵ —¿Mbaerã eichusē ñooño nde? ¿Mbae isiquia ribishorõ ño nda aba emondo re? Tres cientos ribishorõ. Mbaecha reã je emee sacuã, ũquĩ mbae isiquia, i que Judas ra. ⁶ Judas ndua eã ndaque mbaecha reã ndese. Mbae mbuquiachãsa tuchi que ae ra. Mbae isiquia riru que equereco quia Jesús je ra. Eyenda que esirõ sirõ nguia mbuchemi chemi nda. ⁷ Jesús que ñee Judas je ra. —¡Erecheẽchĩ nda María je jê! ¡Sã ae ae riqui jê! Seati nonde chõ aba mbushimbusa icherẽ nguia serese. ⁸ Mbaecha reã nguia nda chi are jiri nguia a. Se quia nda aico bei eã nguia jêje a, i que Jesús ra.

Lázaro nandequia, i rei judíos rerecua

⁹ Judíos que jirandu jate Jesús rese ra. Eriqui mose Betania. Nyoĩ jate que erea ra. Lázaro abe rea. Ae Jesús mbuquera erua si. ¹⁰ Nyebe judíos rerecua ñimbiirandu nguia. —¡Lázaro abe nandequia rei jê! i que ererecua ñee nyue ra. ¹¹ Judíos que siqui tuchite Jesús rese cote ra. Nguerecua que esecha jate cote ra. Lázaro que embuquera erua si nyii. ũquĩ mbei bei que nyii ra. Jesús oso Jerusalén

¹² Mbia tubiriã ngue nyoĩ Jerusalén nda. Pascua raã naã sacuã huee. Jesús abe que oso ra. Mbia que jirandu erese ra. Ecuasẽ nonde. ¹³ Mbia yate que Jesús cuasẽ mose

ra. Sindo que ecuruchoi erobeishĩ nda. Mbia que tasẽ tasẽ tuchi ra. —Etura tuchi ruchĩ nguia co. Dios rucucha ruchĩ nguia co. Israel rerecua ruchĩ nguia co cote, i que mbia tasẽ tasẽ tuchi ee ra. ¹⁴ Jesús que ngasẽ burro riirĩ mo je ra. Nyui que eato ra. Embesa ji rui si. ¹⁵ ¡ que embesa ji quia nyii ra:

¡jẽireĩ ireĩchĩ nda, Sion jenda!

Co jenderecua ru quia co.

Co eru quia burro átoo co,

i que embesa ji quia nyii ra. ¹⁶ Jesús chimbaaquiato que ã icuayãte nyii ra. Embesa ji. Jesús quera si mose que ã icua cote ra. —Embesa ji rui si chõ eriqui rei reaẽ, i que echimbaaquiato eicua ramo cote ra. ¹⁷ Jesús que Lázaro mbuquera, ũquĩ ndese maesa que mbia mbiirandu randu tuchi quia ra. ¹⁸ Nyebe mbia nyoĩ ja tuchi nguia Jesús robeishĩ. Jirandure Lázaro raaque mbuquera rese. ¹⁹ Fariseos que ñee ñee si nyue no nda. —Jesús rui ja tuchichĩ mbia. ¿Mañi nda aba mbia je re? i que ñee nyue ra.

Griegos mo Jesús requia

²⁰ Griegos mo abe que nyoĩ Jerusalén nda. Pascua raã naa Dios je. ²¹ ũquĩ ngue nyoĩ ñee Felipe je ra. Felipe que Betsaida jenda ra. Galilea jenda. —Uremaese rete Jesús rese, i que griegos Felipe je ra. ²² Felipe que oso Andrés mbiirandu ra. ũquĩ ja que nyoĩ Jesús mbiirandu cote ra. ²³ Jesús que ñee ee ra. —Mbiarã ngue achu ibate si ra. Semano nonde arubite cote. Sequera si nonde arubite cote. ²⁴ Tacheẽ nyecua jêje. Ibasĩ eĩ tiquia eã mose ra ia eã mbei. Chi chooño mbei rae. Etiquia mose ra suri cote. I a tuchi ra cote. Eĩ ae ra se. Ibasĩ eĩ na si. Amano nda se. Mbia ra setiquia. ²⁵ Ae nduate quia nyiese nae, ũquĩ nda nyoĩ eãte ibate. Ae ndua eãte quia nyiese nae, ũquĩ nguia ra nyoĩ ibate. Siqui bei sacuã huee. ²⁶ Ae secheẽ mumba sereãte quia nae, sã ũquĩ ndiqui bei serui. Ae ra aico nae, huee ra ũquĩ abe riqui. Ae secheẽ mumba sereãte quia nae, ũquĩ ñi nda Paba ñee turã.

Amano nda se, i Jesús mbia je

²⁷ Seya eãte aico co. ¿Mañi ae ra ñee Paba je re? “Semingobe rei se ae. Sembasiã ndei se ae”, ae aroneate Paba je. ã sacua ño ngue achu resẽ. Sembasi sacua ño ngue achu resẽ. ²⁸ Paba, ndequirãcuã eteacuquia mbia je, i que Jesús ra. Ñquĩ mose que echeẽ mo ndu ee ibate si ra. — Sequirãcuã ngue ateacuquia mbia je ra. Ateacuquia si ra mbia je, i que ibatenda ñee ee ra. ²⁹ Mbia que ibatenda cheẽ ñandu ja rei ra. Ae chi Jesús rese, ñquĩ. —Ama ndieu ereae, i que mbia ra. —Tei. Angel mo ño ngue ñee nguiã Jesús je, i que emo no nda. ³⁰ Jesús que ñee mbia je cote ra. —Seje eã ño ngue ibatenda ñee ndesẽ. Jẽ eandu sacua ño ngue ñee ndesẽ. ³¹ Paba ra seicuaa reã mbasi ja cote. Mbia icua nderecua ra Paba mombo ibi jenda cote. ³² Sembucha mose mii ibate, mbia ra siqui tuchi serese cote. Sucha mo jenda ja abete ra siqui serese cote, i que Jesús ra. ³³ —Mbia ra seiquia mii sembucha ira rese, i ñene. ³⁴ Mbia que ñee Jesús je cote ra. —“Cristo ra siqui bei”, i que Dios cheẽ embesa ji urembiirandu. ¿Mbaerã erecheẽ nde? “Mbia ra sembucha ira rese”, i re. ¿Aba quia Cristo re? ¿Aba quia tu mbiarã nde? i que mbia ñee Jesús je ra. ³⁵ Jesús que ñee ee ra. —Taico mbirimbe jendese jembaaquiatu quiatu. Jendesaebe mbirĩ. Tata rendi rãte aico co. Tata rendi siqui mose jendese, ijengata turã ño nguiã jẽ! Seicuaa reã ño siqui nguiã itondaru. Ñquĩ quiachã ño nguiã ñquĩ. ³⁶ Tata rendi raãte aico co. Seico beebe mose jendese, seicua tuchi rã. Eĩ nda jẽingo turã jendesae ji, i que Jesús mbia je ra. Aquere que esi ñemi mbia si cote ra.

Judíos Jesús icua eã mbei

³⁷ Jesús que mbia mae sayã saã saã tuchite rei mbia je ra. Mbia que Jesús icuayã mbei chõ nda. ³⁸ Ae Isaías mbesa mii nyii nae, ñquĩ na si chõ ngue mbia Jesús icuayã cote ra. Eĩ ngue Isaías embesa mii nda: Sererecua, ae uresenei senei nguiã mbia je nae, ñquĩ mbia icua sereãte quia ã. Ndequirãcuã mbia tea sereãte quia ã, i que Isaías embesa ra. ³⁹ Mbia que Jesús icua aroneate ra. Isaías chimbessa rã si chõ ngue ra. Eĩ ngue Isaías embesa mii no nda:

⁴⁰ Dios que mbia chiã matã nda. Nyebe eriqui mbae icuayãte ã. Nyebe eriqui nguiã uba eãte serese. Se embitorõ sacua, i que Isaías chimbessa huĩ nda. ⁴¹ Isaías que Cristo quirãcuã tea nyii ra. Nyebe ã mbesa mii nguiã Jesús rii a. ⁴² Judíos tubiriãte que Jesús icua ra. Judíos rerecua emo emo abe que Jesús icua rei ra. Siqui checuayã ño ngue Jesús rui ra. Esiquichete quiatu ngue fariseos si re. —¡Fariseos ra nandemombochĩ mbia chumunuasa si jẽ! i que ra. ⁴³ — Dios cheẽ nandemumbayã jẽ, iã ñochĩ ngue re. —¡Mbia cheẽ nguiatu nandemumbayã jẽ! i chõchĩ ngue re.

Secheẽ nguiã ra seucuayãsa mbasi, i Jesús

⁴⁴ Jesús que ñee irãtã mbia je ra. — Ae seicua quia nae, se mii icua eã. Paba abe icua. Ae sembu ibate si. ⁴⁵ Ae mae nguiã serese co nae, Paba abe rese mae. ⁴⁶ Mbia resae sacua ño achu nguiã co. Eĩ nda seicuaa siquiã itondáruu. ⁴⁷ Jẽingo secheẽ andu ã. Jemo secheẽ mumba mose, se ra ambasiã. Secheẽ ae ra embasi. Mbia mingo bei sacua ño achu nguiã co. Mbia mbasi sacua eã ño achu nguiã. ⁴⁸ Secheẽ nguiã ra seucuayãsa mbasi, mbae ua mose. Ibi ua mose. Secheẽ ae ra secheẽ mumbasa mondo tata cuasu. Secheẽ andu choõno nguiatu ngue re. ⁴⁹ Se ae eã ño acheẽ nguiã mbia je. Paba quia ñee nguiã seje. “Eĩ ere mbia mbaaquiatu quiatu”, i que Paba sembu ra. ⁵⁰ Paba cheẽ ndei mbia mingo beisa. Echeẽ mumbayã mose. Nyebe aico nguiã Paba cheẽ nenei nenei co. Secheẽ ae eã ño ñene.

13

Jesús mbia i irei irei

¹ —Namo jiri ra Paba sererao ibate ibi si cote, i que Jesús uchiangui re ra. Nyese-cua tuchi que equia uchimbbaaquiatu rese ra. Mano nyee. ² Jesús que quiaru u uchimbbaaquiatu rese isa ra. Pascua nonde. —Jesús emondo mbia icua je, i que diablo Judas Iscariote je nyii ra. Simón ndiirĩ ndei aque. ³ Jesús que mbae icua jate ra. — Dios si chõ achu nguiã co. Asobe ra erea. Paba que uquirãcuã mee tuchi seje ra, i que Jesús uchiangui re ra. ⁴ Quiaru jare

que Jesús juã huïrao mbui ra. Ngũmbi que echucua toalla je ra. ⁵ I que eichusẽ mbae mo ye ra. Uchimbaaquiato i que eirei irei ra. Mbïru ïru que toalla je ra. ⁶ Pedro i nda eirei nguiã cote chã. —Sererecua chõ nde resẽ. ¿Mañi ere ra sei irei re? i que Simón Pedro ñee Jesús je ra. ⁷ Jesús que ñee ee ra. —Ã ereïcuayãte. Ae asaã saã nguia ã. Ereïcua rei ra cote, i que Jesús ñee Pedro je ra. ⁸ —Sei ra ereirei eã mbei, i rei que Pedro Jesús je ra. —Ndeirei eã mose, serese eã nda nde cote, i que Jesús Pedro je ra. ⁹ —Sei achõ eã eirei rõ. Seo abe eirei no. Seãquĩ abe no, i chee que Pedro ee cote ra. ¹⁰ Jesús que ñee ee ra. —Ae echasu quite, equishĩte ùquĩ ndesẽ. Jẽi mĩ ño tairei. Jẽquishĩ ja eãte raque. Aque mĩte raque echiã nondei, i que Jesús uchimbaaquiato je ra. ¹¹ Jesús que jirandu Judas rese ra. Nyebe eriqui nguia ñee. —Aque mĩte raque echiã nondei, i.

¹² Ei irei jare que huïrao mingue cote ra. Ngoi si que ra. Ae ñee nguia nguesenda je. —Jẽi que airei, ¿ùquĩ jẽicuate rei quia re? ¹³ Nyebe jẽingo nguia ñee seje. “Sererecua, Sembaaquiatusa”, i seje. Coche jeñee nguia seje. Ererecua rei se. ¹⁴ Jẽi que airei irei. Ererecua raque se. Nyebe jẽ abe jemo i jẽirei irei ae. ¹⁵ Nyebe que ateacuquia jẽje resẽ. Serui sichõ jẽingo emo i irei irei ae. ¹⁶ Tacheẽ nyecua jẽje. Se rei jenderecua. Se chõ aemondo mondo nguia mbia mbaaquiato sacua. Jengasu ra jesaã saãchĩ sesi jẽ. ¹⁷ Jẽ secheẽ icua mose, secheẽ mumbayã mose, jẽya tuchi ra jẽingo. ¹⁸ Jẽ ja je eã aico nguia ñee a. Jaẽirabo que se resẽ. Jaẽicuate que se resẽ. “Ae quiaru serese nae, aque icuãte ra seje cote”, sã embesa ji i no. Embesa ji rui si ra jemo icuã seje cote. Quiarure serese. ¹⁹ ¡A aico ñee jei jẽje a jẽ! Eïcuã nonde seje. Eïcuã mose seje, jẽ nda seïcua cote. “Dios nducucha” jenyẽ tuchi ra seje cote. ²⁰ Tacheẽ nyecua jẽje. Ae secheẽ nenei neneisa isi quia nae, ùquĩ nda seisi se abe. Ae seisi quia nae, Paba abe isi rae, i que Jesús uchimbaaquiato je ra.

Jemo nda semondo mbia icuã je, i Jesús

²¹ Jesús ia eã tuchi que cote ra. —Tacheẽ nyecua jẽje. Jemo nda semondo mbia icuã

je cote, i que ñee nyecua uchimbaaquiato je ra. ²² Echimbaaquiato que mae mae ja chõ nyiese ra. —¿Aba ra re? ¿Aba ra re? i jaaja nyue. ²³ Jesús chesecua tuchi que chĩ ngoi ejii ra. ²⁴ Aque je que Simón Pedro o mee mee nda. —“¿Aba ra re?” ere ee, i que Pedro ra. ²⁵ Jesús chesecua que ñimbucha i i ñee Jesús je ra. —¿Aba ra re? i ee. ²⁶ Jesús que ñee ee ra. —Mbichae monde ji ra amee jemo je. Ae je ra amee, aque ra semee mbia icuã je, i que Jesús ra. Mbichae que emonde mondo Judas Iscariote je cote ra. ²⁷ Judas mbichae u mose que Satanás ndu embiïcuã tuchi cote ra. Jesús que ñee ee ra. —Ae ra eresaã nae, ¡ùquĩ esaã jeichõ jẽ! i que Jesús Judas je ra. ²⁸ —¿Mbae rĩ Jesús riqui ñee Judas je re? i que eataque ra. Mbia iranua ja que ra. ²⁹ Judas que mbae isiquia quereco ja quia ra. —Mbae mo eisi rã nandechiurã, i reĩ Jesús quia Judas je uchimbaaquiato je. —Mbae mo emondo rã mbaecha reã je, i reĩ Jesús quia Judas je uchimbaaquiato mo je. Echeẽ ngue eïcuayã ja ra. ³⁰ Mbichae ure que Judas si usẽ cote ra. Itondaruqui rĩ.

Jesús ucheẽ yasu renei mbia je

³¹ Judas usẽ mose que Jesús ñee nda. —Mbiarã ngue achu ra. Sequirãcuã ndese ra mbia mae cote. Dios quirãcuã abe areco co. Dios quirãcuã abe rese ra mbia mae cote. ³² Aico Dios quirãcuã ndeacuquia mbia je a cote. Dios abe ra sequirãcuã teacuquia mbia je cote. Sequirãcuã nda eteacuquia jei mbia je cote. ³³ Seresenda, aico mbiã rĩ ño nguia jendese a cote. Serequia rei ra se cote. Acheẽ ngue judíos je, ùquĩ sí aico ñee jẽje a. Ae ra aso nae, huee jengasẽ aroneãte. ³⁴ Aico secheẽ yasu nenei jẽje a. Secheẽ mumbayã sacua. ¡Jenyesequa ja jenyiese jẽ! Sã ñi aico nyesequa tuchi jendese no. ¡Eĩ jenyẽ nyesequa tuchi jenyiese jẽ! ³⁵ Jenyesequa tuchi mose jenyiese, mbia ra ñee ja tuchi jenĩ. “Eĩ nguia Jesús chimbaaquiato quia re”, i ra mbia jẽje, i que Jesús uchimbaaquiato je ra.

Pedro ra ñee ñooño serĩ, i Jesús

³⁶ —¿Manguiti ra ereso re? i que Simón Pedro ñee Jesús je ra. —Ae ra aso nae, huee ereso aroneate namo. Emo mose jiri

ra ereso serui cote, i que Jesús Pedro je ra. ³⁷ Pedro que ñeembe ee ra. —¿Mbaerã nda asoã nderese namo nde? Seso sete nderese. Semano sete nderese, i que Pedro Jesús je ra. ³⁸ Jesús que ñee ee ra. —“Semano sete nderese”, erechĩ nguiã seje. Co isa ra erecheẽ ñooño serĩ tres veces. “Jesús aicuayãte resẽ”, ere chooño nda serĩ nguira cheẽ nonde, i que Jesús Pedro je ra.

14

Jesús rei ñeenda Dios icha

¹ Jesús que ñee uchimbaaquiatu je ra. — Jëya eã eriquichĩ nguiã. Dios jëicua chõ ae. Se abe jëicua chõ ae. ² Ae Paba riqui, huee tuchia tubiriãte. Ûquĩ eande rae, eĩ nda acheẽ eãte rei jëje. Aso ra tucharã naã jëje. ³ Jenyucharã naa jare ra achube jendea cote, jenderao bei serese cote. Jë nda jëingo bei serese pee cote, ae ra aico. ⁴ Ae ra aso, huee jëicuate resẽ. Ñeenda abe jëicuate resẽ, i que Jesús ee ra. ⁵ Tomás que ñee ee ra. —Ureicuayãte nyeresẽ. ¿Mangue ra ereso mangue re? Ñeenda ra ureicua eãte chi nde, i que Tomás Jesús je ra. ⁶ Jesús que ñee ee ra. —Ñeenda rei se. Ñee ñooñoã je rei se. Mbia míngo beisa rei se. Ae ra seicuayãte, ùquĩ nda ngaseã mbei Paba je. ⁷ Jë seicua mose, Paba abe jëicuate quia ã. Jë Paba jëicuate quia cote resẽ. Jemaengue erese namo ndesẽ, i que Jesús ee ra.

⁸ Felipe que ñee ee cote ra. —Nderu eteacuquia rã ure je. Ûquĩ miñ ño ureico nguiã ñee ndeje, i que Felipe ra. ⁹ Jesús que ñee Felipe je ra. —Aico tuchite que jendese, Felipe. ¿Mbaerã ereico seicuayãte re? Ae mae nguia serese, Paba abe rese maete. ¿Mbaerã ereico ñee seje re? “Nderu eteacuquia ure je”, i seje. ¹⁰ Co aico Paba rese co resẽ. Paba abe riqui serese co. ¿Ûquĩ ereicuayãte re? Ae aico ñee jëje nae, secheẽ ae eã ño ùquĩ nde. Paba riqui serese co. Ae abe riqui mbae raã naa serese co. ¹¹ Secheẽ jëicua rã. Co aico Paba rese co. Paba abe riqui serese co. “Nyia”, jenye eã mose secheẽ je, sechisaã je chõ “nyia” jenye.

¹² Tacheẽ nyecua jëje. Ae seicua quia nae, ùquĩ nda sechisaã saã saã se rã si cote. Ûquĩ

nda mbae saã saã tuchi sesi. Co quia aso nguiã Paba rea se co. ¹³ “Mbae emondo ure je” i mose seje, amondo ra jëje. Jë seicua mose. Eĩ ae ra Paba quirãcuã ndeacuquia mbia je. ¹⁴ “Mbae emondo ure je”, i mose seje, amondo ra jëje. Jë seicua mose.

Espíritu Turã tamondo jëje, i Jesús

¹⁵ Jenyesequa mose serese, secheẽ jembabayã ae. ¹⁶ Tacheẽ Paba je. “Espíritu Turã emondo sechimbaaquiatu je”, ae ra Paba je. Espiritu Turã nda siqui bei jendese cote. Jëquiato tuchi ra ae cote. ¹⁷ Espiritu Turã nda ñee ñooñoã jëje, jembaaquiatu quiatu. Ae ra siqui eã tuchi Dios quiatoã ndese. Espiritu Turã icuayãte quia ñe ne. Jë nguia jëicuate nguiã. Co Espiritu turã ndiqui jendese co. Siqui bei ra jendese.

¹⁸ Aso raque quia co. Esi cheecha rã nda jëingoã. Achube ra jembirõ. ¹⁹ Aichite aĩ oso a cote. Dios icuasa reã nda mae eã serese cote. Jë nguia nda jemaenguiã serese. Aquera si ra siqui bei nonde. Jë abe ra jëingo bei serĩ cote. ²⁰ Espiritu Turã tu mose ra jëicuate cote. “Jesús riqui ngu rese co. ã ureico Jesús rese ã. Jesús riqui urerese co”, jenye ra serĩ cote. ²¹ Ae secheẽ icua quia nae, ae secheẽ mumbayãte quia nae, ùquĩ nguia nyesequate nguiã serese. Paba nyesequate ùquĩ ndese. Se abe achesequate ùquĩ ndese. Tachecua ñimbucha ùquĩ ndese, i que Jesús uchimbaaquiatu je ra. ²² Judas, i que echimbaaquiatu mo je ra. Judas Iscariote eã ño aque re. Judas mo ño aque re. Judas que ñee Jesús je ra. —¿Mbaerã nda erehecua ure je re? Mbia ja je nyecua rocoĩ, i que Judas ra. ²³ Jesús que ñee ee ra. —Ae nyesequate quia serese, ùquĩ secheẽ mumbayãte quia ã. Paba abe ra nyesequate ùquĩ ndese. Paba ra siqui ùquĩ ndese. Se abe ra aico ùquĩ ndese. ²⁴ Ae nyesequa eãte quia serese, ùquĩ secheẽ mumba mumbate quia ã. Secheẽ ae eã asenei senei nguiã jëje co. Paba cheẽ ño asenei senei nguiã jëje. Ae chõ sembu nguiã.

²⁵ Seso nonde aico co renei nenei jëje a. Sereco mosebe jendese. ²⁶ Paba ra Espiritu Turã mondo jëje secheẽ ndui si. Jëquiato tuchi ra Espiritu Turã cote. Ae ra

jembaaquiatu tuchi mbae ja rĩ cote. Ae ra jemundua tuchi secheẽ ndese cote. ²⁷ Co aso quia co. Jẽyayã eã taemingo a. Seicuaa reã na si eã taemingo. Uquĩ nguia eya eãte riqui nguĩã. Sã seyate se no. Eĩ tae jembia mingo a. ¡Jẽya bei chõ jẽ! ¡Jẽsiquicheã ño jẽ! ²⁸ Aso ra Paba rea cote. Aquere ra achube jembirõ. Uquĩ ndese que jẽirandu resẽ. Jenyesequa mose serese, eĩ ndei ra jẽyate secheẽ ndese. “Taso Paba rea”, i mose. Ae quiarei i tuchi sesi. ²⁹ Seso nonde aico ñee tuchi jẽje a cote. “Ñee ñooñoã tuchi quia equia re”, jenyete tuchi ra seso mose cote. Huee ra jẽ seicua tuchi cote. ³⁰ A nda aicobe ñee ñee jẽje chã. Diablo quia tu nguĩã co. Mbia icuã nderecua ru quia co. Ae quiarei equirãcuã neã jiri sesi. ³¹ Paba cheẽ ndui si taico. Mbia seiquia arondete raque. “Nyesequa tuchi quia equia ngu rese re”, i ra mbia seje cote. Paba cheẽ mumbayã mose. Jẽhuã. Nyao, i que Jesús uchimbaaquiatu je ra.

15

Jesús rei ira i rã

¹ Jesús que ñeembe uchimbaaquiatu je ra. —Se rei ira i rã. ² Paba rei ira raarõsa rã. Ira rãquiã ndibisho ia eã mose, nyisia rae. Erãquiã ia mose, saarõ turã ndae. Mbeerera rera rae. Embitirõ sacuã. Ia tuchi sacuã cote. ³ Jẽ ngue secheẽ jẽisi turã ndesẽ. Nyebe Paba jembitirõ secheẽ je resẽ. ⁴ Jẽingo bei ñimbucha serese. Sã aico ñimbucha jendese no. Ira rãquiã ae ra ia eã. Siquiã mose ñimbucha hui rese. Eĩ jenyete ra jẽ. Mbae turã nda jẽsaã eã jẽ ae. Siquiã mose ñimbucha serese. ⁵ Se rei ira i rã. Erãquiã na ndei jẽ. Jẽingo mose ñimbucha serese, seico mose ñimbucha jendese, jeturã tuchi ra jẽingo cote. Jẽ ae ra mbae turã jẽsaã eã, siquiã mose ñimbucha serese. ⁶ Ae siquiã ñimbucha serese nae, uquĩ nda siqui ira rãquiã sia ji rã. Eiru mose ra mbia emunua nua. Eréi sacuã. ⁷ Jẽingo bei mose serese, jeñee nda amumbayã. “Mbae embu ure je”, i mose, amondo ra jẽje. Jẽtesareia mose secheẽ si. ⁸ Jẽingo turã mbei mose, mbia ra ñee turã turã mbei Paba rĩ. Jẽingo turã mbei mose, “Jesús chimbaaquiatu tuchi quia eriqui re”, i ra

mbia jeni. ⁹ Sã Paba riqui nyesequa serese nae, eĩ ae si equia nyesequa jendese co. Jẽingo bei ñimbucha serese. Eĩ nda achesequa bei jendese. ¹⁰ Paba cheẽ amumbayãte quia co. Nyebe Paba riqui nguĩã nyesequate serese co. Jẽ secheẽ mumbayã mose, achesequa bei tuchi ra jendese. ¹¹ Aico ñee jembaaquiatu co. Jembia sacuã. Sã seyate se no, se rã si ra jẽya.

¹² ã ndei secheẽ ã: ¡Jenyesequa tuchi quia jenyiese jẽ! Sã aico nyesequa tuchi jendese no. ¹³ “Se tamano sequiato ribishorõ”, i mose emo, aque quiarei nyesequa tuchite uquiato rese. ¹⁴ Sequiato rei jẽ, secheẽ mumbayã mose. ¹⁵ “Serimba” aeã nda jẽje cote. Ererecua quiatu “sequiato” i ãte nguĩã ngũimba je. Ñee ja eãte ngũimba je. Sã eriqui ñee ja uquiato je no. Se quia ñi Paba cheẽ asenei senei jate nguĩã jẽje. Nyebe “sequiato” tae jẽje cote. “Serimba” i rocoĩ. ¹⁶ Jẽ ngue seirabo eã ndesẽ. Se quiatu ngue jaẽirabo nguĩã. ¡Mbae turã ño jẽsaã saã mbei quia seje jẽ! ¡Jenyisaã nda uachĩ jẽ! Jẽ ngue seicuate. Nyebe jẽ “mbae mo embu ure je”, i mose Paba je, mondo ra jẽje. ¹⁷ ã ndei secheẽ jẽje ã: ¡Jenyesequa tuchi quia jenyiese jẽ!

Mbia ataque Jesús rimba ucuayã

¹⁸ Dios icuasa reã nda jẽucuayãte cote. ¡Jẽicua quiatu jẽ! “Eĩ ngue equia Jesús ucuayã nyii resẽ”, jenyete ra cote. ¹⁹ Jaẽirabo que se ra. Nyebe jẽingo nguĩã Dios icuasa reã na eã. Nyebe eriqui nguĩã jẽucuayãte ã. Jẽ uquĩ na mose, eĩ nda eriqui turãte rei jendese. ²⁰ Acheẽ ngue jẽje nyii, ¡uquĩ ndese jendua jẽ! ¡Jengasu ra jẽsaã saãchĩ sesi jẽ! Mbia icuã mose seje, jẽje abe ra eicuã. Mbia secheẽ mumbayã mose, jẽ abe cheẽ mumbayã ndae. ²¹ Serĩ nda Dios icuasa reã jeĩ jeĩ jẽje. Dios icuayãte quiatu nguĩã ã. Nyebe ra eicuã icuãte jẽje. ²² Achu que mbia mbaaquiatu quiatu ra. Nyebe ra Dios eicuã tea chooñoã cote. Eĩ nda Dios eicuã tea chooño ndei. Se embaaquiatu eã mose. “Ureicuã ureicuayãte quia ã”, i aronea ño emo cote re. ²³ Ae seucuayãte quia, Paba abe ucuayãte equia ã. ²⁴ Mbia mae sayã ngue ateacuquia tuchi rei ee ra. Sechisaã nda mbia mo saã eã. Eĩ nda Dios

mbia icuã tea chooño ndei. Sechisaã ndese mae eã mose. Sechisaã ndese mae ndaque, seucuayã ño nguiã ã. Paba abe ucuayã ño nguiã ã. ²⁵ Mbia riqui seucuayãte ã. Sã embesa ji riqui ñee no: “Mbia seucuayãte. Se mbae icuã asaã eãte raque”, sã embesa ji riqui i no. Ûquĩ iquechĩ cote. ²⁶ Seso mose Paba rea, Espíritu Turã tamondo jêje. Jêquiatorã. Ae ra tu Paba si jêje. Ae ra ñee ñooñoã jêje. Ae ra jembaaquiatu quiatu turã serĩ. ²⁷ Nyii mosenda bei chõ jêingo nguiã serese. Nyebe ra jê abe mbia jembaaquiatu quiatu turã serĩ, i que Jesús ra.

16

¹ Jesús que ñee i i uchimbaaquiatu je ra. —A aico ñee jêje a. Eĩ nda jêhui eã sesi, mbia icuã icuã mose jêje. ² Mbia ra jendiquisã quisã, jêso jêso mose mbia chumunuasa. “Ã ureico rei nguiã mbae turã naa naa Dios je ã”, i ra mbia jêiquia iquia mose. ³ Seicuayãte quia ñe ne. Paba abe icuayãte quiatu nguiã ã. Nyebe ra eriqui mbae raã icuã icuã jêje. ⁴ Eĩ ae chõ nguiã ñee jêje co. Eĩ nda jendua secheẽ ndese, mbia icuã icuã mose jêje. “Jesús cheẽ iquechĩ cote”, jenye ra cote.

Espíritu Turã nda jembaaquiatu quiatu, i Jesús

Acheẽ jei eã ngue jêje ùquĩ cose resẽ. Aicote quiatu ngue jendese re. ⁵ Co quia asote nguiã Paba rea co cote. Ae sembu. “¿Manguete ra ereso mangue re?” i eã ñochĩ jemo seje. ⁶ Se “taso” i mose jêje, jêya eãte chõ jêingochĩ nguiã ã. ⁷ Tacheẽ nyecua jêje. Coche aso nguiã jendecha co. Espíritu Turã nda ambu jêje. Jêquiatorã. Ae ra siqui jendese. Eĩ nda Espíritu Turã tuãte rei. Seso eã mose jêsi. ⁸ Espíritu Turã tu mose ra ñee ñee mbia je. “Mbia icuã ja chõ ñe ne. Jêingo turã Dios resa rae. Dios ra Jesús icuasa reã mbasi ja”, i ra Espíritu Turã ñee mbia mbaaquiatu quiatu. ⁹ “Jê nguia Jesús jêicuayãte nguiã ã. Nyebe jêicuã ndiqui nguiã”, i ra Espíritu Turã ñee mbia mbiirandu. ¹⁰ Aso ra Paba rea cote. Mbia ra mae eãte serese cote. Nyebe ra Espíritu Turã mbia mundua mbae turã ndese cote. ¹¹ “Dios ra diablo mondo tata cuasu. Nyebe

ra mbia icuã abe mondo tata cuasu”, i ra Espíritu Turã ñee mbia mbiirandu.

¹² “Taembaaquiatu jiri”, ae rei se. Jêicuayã jeite chõ ndae. ¹³ Espíritu Turã tu mose, ae ra jembaaquiatu quiatu turã mbae ja rese. Ñee ñooñoa tuchi rae. Ucheẽ ae ra esenei seneiã. Paba cheẽ ño esenei senei nguiã. Mbae tu nonde ra Espíritu Turã jembiiirandu erese. ¹⁴ Espíritu Turã nda jembaaquiatu quiatu secheẽ ñii. Ûquĩ mose ra mbia ñee turã turã serĩ cote. ¹⁵ Ae Paba senei senei nguia, ùquĩ asenei senei nguia se abe co. Nyebe ra Espíritu Turã jembaaquiatu quiatu secheẽ ñii.

Jêya eande nyii ra jêya tuchi cote, i Jesús

¹⁶ Namó jiri ra jemaẽ eã serese cote. Aquere ra jemaembe serese cote. Aso ra Paba rea, i que Jesús uchimbaaquiatu je ra. ¹⁷ Echimbaaquiatu que ñee ñee nyue ra. —¿Mbae i Jesús quia re? “Namó jiri ra jemaẽ eã serese cote. Aquere ra jemaembe serese cote. Aso ra Paba rea”, i chõchĩ. ¿Mbae ùquĩ nde? ¹⁸ ¿Mbaerã eriqui “namó jiri” i re? ¿Mbae rĩ eriqui ñee nde? Nandeiranuã tuchichĩ, i que echimbaaquiatu ñee nyue ra. ¹⁹ Jesús que jirandu erese ra. —“Ndecheẽ embiasa jiri ure je” ¿jenye sete seje re? “Namó jiri ra jemaẽ eã serese cote. Aquere ra jemaembe serese cote”, ae que jêje, ¿aque jêicuayãte re? ²⁰ Tacheẽ nyecua jêje. Namó jiri ra jenyeseo. Jêya eãte rae. Sequiatoã nda eya tuchi. Aquere ra jêya tuchi cote no. Jêya eande nyii. ²¹ “Serasichĩ nda cote re”, i ra esi ndua ndua ãquẽ nyaacuquia serĩ mose. Eyayã tuchi ae. ãquẽ nyaacuquia mose cote, eya tuchi ra cote. Ndua eã tuchi ra ngasi rese cote. Eya tuchi chõ nda nguiirĩ ndese cote. ²² ãquẽ ndasi rá ño jê nde. Jêya eãte namó. Setube mose jendea, jêya tuchi ra cote. Emo nda jembia eã eã cote. ²³ “Ndecheẽ embiasa jiri ure je”, jenyẽ eã nda seje cote. Tacheẽ nyecua jêje. Jê seicuate. Nyebe jê “mbae mo embu ure je”, i mose Paba je, mondo ra jêje. ²⁴ “Mbae mo embu ure je. Jesús icuasa je”, jenyẽ eã mbeite equia Paba je ã. Jenye ee. Jenye mose ee, mondo ra jêje. Jêya tuchi ra cote.

Jesús quirãcua tuchi ibi jenda si re

²⁵ Acheẽ tuchi rei que jẽje ra. Secheẽ ngue ambiasa tuchiã jiri jẽje ra. Emo mose jiri quia ra secheẽ ambiasa tuchi jẽje cote. Paba rĩĩ. ²⁶ Aque mose ra jeñee Paba je. “Mbae embu rã ure je”, jenyẽ ra Paba je serĩĩ. Aque mose ra acheẽ eã ee jenĩĩ cote. Jẽ ae chõ nda jeñee ee cote. ²⁷ Paba sí nyese-cua tuchite quia jendese co. Jenyesequate quiatu nguiã serese ã. “Dios que Jesús mondo nande je resẽ”, jenyẽ quiatu nguiã seje ã. Nyebe Paba riqui nguiã nyesequa tuchi jendese. ²⁸ Paba si que achu íbii resẽ. Asobe ra ibi recha cote. Paba rea ra asobe íbátee cote, i que Jesús ñee uchĩmbaaquiatu je ra.

²⁹ Echĩmbaaquiatu que ñee ee ra. — Ereicochĩ ñee nyecuate ure je a cote. Ndecheẽ erembiasa tuchichĩ nguia ure je a cote. ³⁰ Mbae ereicua ja tuchi quiatu quia nde reaẽ. Mbia ndua ndua ereicuate quia equia co reaẽ. Ñee nonde ndeje. Nyebe ureico nguiã ndeicuate ã. “Paba si chõ erechu nguiã co”, ure equia ndeje ã, i que echĩmbaaquiatu ee ra. ³¹ Jesús que ñee ee cote ra. —Jẽ ngue seicuate rei nguiã. ³² Seandu rã se. Namõ jiri ra jeñĩmbuchao chao oso sesi. Jẽso ja ra serecha namõ. Se ae eã nda aico. Paba riqui nguiã serese co. ³³ Jẽ seicua mose, mbae ra jembia eã eã. Nyebe aico nguiã jembiirandu randu beite co. Mbia icuã icuã mbeite ra eriqui jẽje a íbii. ¡Jeñĩmbirãcuã jiri quia jẽ! Se quia sequirãcuã tuchi ibi jenda si re, i que Jesús ñee uchĩmbaaquiatu je ra.

17

Sechĩmbaaquiatu eteaquiatu, i Jesús Dios je

¹ Jesús ñee jare uchĩmbaaquiatu je que soboiba mae ibate ñee Dios je ra. — Paba, ndecheẽ ndiquichĩ io a cote. Seturã eteacuquia mbia je cote. Eĩ nda se abe ndeturã ateacuquia mbia je. ² Nde chõ ngue semĩ mbia rerecuarã, Paba. Mbia mingo bei sacua. Mbia que eremeẽ seje, ùquĩ mingo bei sacua. Se rei nderucucha. ³ Paba, nde mĩ ndei Dios tuchi ereico co. Se rei Jesucristo ndechĩmbu ibate si. Ae ndeicuate quia nae, se abe icua equia

nae, ùquĩ nda siqui bei. ⁴ Ndeturã ngue ateacuquia mbia je ra. “Ã esaã íbii”, ere que seje, ùquĩ ngue asaã ja cote ra. ⁵ Paba, seturã eteacuquiabe mbia je. Cose ndare rã. Mbae eã mosenda rã. Asobe ra siqui nderese. MSã ndeturã ereteacuquia mbia je nae, seturã abe eteacuquia mbia je.

⁶ Mbia que eremeẽ seje, ùquĩ ngue ambiirandu tuchi nderese ra. Nembae rei que nyii ra. Eremeẽ ngue seje cote ra. Ndecheẽ ngue emumbayã nda. ⁷ Nde chõ ngue sembaaquiatu quiatu nguiã, Paba. Ndecheẽ ae chõ ã nde. Secheẽ eã ño ñe ne. Ùquĩ ngue sechĩmbaaquiatu icuate ra. ⁸ Eresenei senei ngue seje, ùquĩ ngue asenei senei ja ee ra. Nandechẽ ngue eisi ja turãte ra. “Paba si que Jesús ru ra. Paba que embu ra”, i equia nderĩ ã. ⁹ Sechĩmbaaquiatu eteaquiatu, Paba. Seicuaa reã je eã ño aico nguiã “eteaquiatu” i ndeje. Ae eremeẽ seje nae, ùquĩ je chõ aico nguiã “eteaquiatu” i ndeje. Nderimbate quia ñe ne. ¹⁰ Ae nderimba nae, serimba chõ se abe re. Ae serimba nae, nderimba chõ ùquĩ no nde. Serimba riqui ñee turã mbei serĩĩ ã. ¹¹ Asobe ra ndeje, Paba. A ra aicoã íbii cote. Serimba quia ra chichõ íbii. Eteaquiatu, Paba. Ae eremeẽ seje, ùquĩ eteaquiatu ndequirãcuã je. Mbae mĩ ndese ja chõ emundua ndua mingo. Sã nande nandendua ndua mbae mĩ ndese no nae. ¹² Ae eremeẽ seje, ùquĩ ngue eteaquiatu quiatu quia ndequirãcuã je ra. Seico mose íbii. Emo ngue quiachã eãte sesi ra. Aque mĩ nda quiachã. Embesa ji cheẽ ndui si ra aque mĩ quiachã. Huicua je. Emo ngue quiachãyã cote ra. ¹³ Aso ra nderea cote. Seico beebẽ mose íbii, aico ñee ñee ndeje serimba rĩĩ a. ¹⁴ Ndecheẽ ngue asenei senei ee ra. Ibi jenda eã ño se re. Serimba abe rei ibi jenda eã. Nyebe ibi jenda riqui nguiã serimba ucuayã. ¹⁵ “Serimba erao ibi si”, ae eã ño nguiã ndeje co, Paba. “Eteaquiatu diablo si”, ae chõ nguiã ndeje co. ¹⁶ Se rã si rei serimba. Ibi jenda eã ndiqui ã. ¹⁷ Serimba emingo tuchi icúe nembraã. Ndecheẽ je emingo icúe. Nde quia erecheẽ ñooño eãte nguiã. ¹⁸ Sã nde sembu mbia je no, eĩ ae

si chõ nguiã serimba mondo mondo mbia mbaaquiato quiato co. ¹⁹ Aico ñimondo tuchi ndeje co, Paba. Mano sacua serimba je. I nda serimba abe ñimondo tuchi ndeje.

²⁰ Ñ nñi achõ eã aico ñee ndeje. “Eteaquiatu” i ndeje. Ñ nda secheẽ senei senei emo je abe cote. Ñquĩ abe ra seicua cote. Serimbarã. Ae ra seicua icua nae, ñquĩ abe eteaquiato. ²¹ Mbae mñi ndese ja chõ ñquĩ emundua ndua mingo. Mbae mñi naanguia tuchi emingo nanderese, Paba. Sã ereico serese no nae. Sã aico nderese no nae. Eĩ nyere si ñquĩ mingo mbae mñi na. Eĩ nda mbia seicuasa reã ñee serñi. “Dios chimbu quia eriqui re”, i nda mbia ñee serñi ña. Seicuasa siqui mose mbae mñi ndese. ²² Ndeturã ngue ereme seje, eĩ ae que seturã mondo seicuasa je ra. Eĩ nda eriqui mbae mñi na. Sã nandeco mbae mñi na nande no, Paba. ²³ Nyebe aico nguiã seicuasa rese co. Nde ereico serese co no. Nyebe seicuasa riqui mbae mñi na co. Eĩ nda seicuasa reã ñee nderñi. “Dios quia Jesús mbu quia reaẽ. Dios quia nyesequa quia Jesús icuasa rese re. Jesús rese rã si nyesequa”, i nda mbia ñee nderñi ña. ²⁴ Paba, serimbarã ngue ereme seje. Ae ra aso, sã echoi serea siqui bei huee serese cote. Ndecheẽ turã andu sacua serñi huee. Erecheẽ turã mbeite serñi. Ibi eã mosenda bei chõ ereico nguiã nyesequa serese co. ²⁵ Ndeturã tuchi, Paba. Seicuasa reã ndeicuayãte quia ã. Se quia areicuate nguiã co. Serimba abe que ndeicuate quia ã no nda. “Dios chimbu”, i seje nderñi. ²⁶ Arerenei nenei tuchi que serimba je ra. Tarerenei nenei tuchi be ee. Eĩ nda nyesequa tuchi nyese. Sã ereico nyesequa tuchi serese no nae. Taico bei serimba rese cote, i que Jesús Dios je ra.

18

Mbia icuã ngaẽ Jesús ruruchoi

¹ Jesús ñeende ngu je que echoi ama ñetẽ ndobei ra. Cedrón, i que aque ama je ra. Aque robei que esi uchimbaaquiato rese ra. Iraqui turã mo ngue echoi ra. ² Jesús que oso oso beite quia huee ra. Iraqui re. Uchimbaaquiato rese. Nyebe Judas riqui nguiã hue icuate. —Jesús

tateacuquia checuayã mbia je, i que Judas ra. ³ Nyebe Judas mbia ruruchoi nguiã huee Jesús isi sacua. Soldados que ecuruchoi ra. Policía jenda abe que ecuruchoi no nda. Sacerdotes rerequa chimondo rei policía. Fariseos chimondo abe no. Ñquĩ ja que nyoĩ ngasẽ Jesús je ra. Tiquise que ecuruchoi quia ra. Lámparas abe no. Mbae rendi abe no. ⁴ Jesús que mbae icuate ra. —Mbia ra jeĩ jeĩ seje, i que eicuate ra. —¿Aba rea jenyu quia co re? i que oso ñee ee ra. ⁵ —Jesús rea urechu quia co. Nazaret jenda, i que mbia ñee nda. —Se chõ Jesús resẽ, i que ee ra. Judas abe que siqui mbia rese huee ra. Ae que siqui Jesús mee mbia icuã je huee ra. ⁶ —Se chõ Jesús resẽ, i mose que mbia siri siri choi uquite quti ra. Ngoi ngoi chee que echoi ra. ⁷ —¿Aba rea jenyu quia co re? ibe que Jesús ñee ee ra. —Jesús rea urechu quia co, i que ra. ⁸ Jesús que ñeembe ee ra. —“Se chõ nyeresẽ”, ae que jẽje. Serequia mose, sererao se ae. Sã sere-senda chichõ, i que Jesús ee ra. ⁹ —Ae Paba mee seje serimbarã, ñquĩ mo quiachãyãte sesi, i que Jesús nyii ra. Nyebe ñee nguiã mbia je cote. —Sã seresenda chichõ, i mbia je cote. ¹⁰ Simón Pedro que uchuuru siqui tiquise ra. Sacerdote rerequa rimba rese que tiquise rereque requia ra. Eisa que echisia equiatocuti quitinda ra. Malco, i que aque je ra. Ae isa Pedro chisia. ¹¹ Jesús que ñee Pedro je ra. —Ndechuuru emingue chõ eriru ye. Paba cheẽ tamumbayã na. Tachecuachõ na mbia je. Sã mbia icuã sembasi tuchi cote, i que Jesús Pedro je ra.

¹² Soldados que Jesús isi cote ra. Soldados rerequa rese. Policía rese. Ñquĩ ja que Jesús isi ra. Nyucua que suruchoi ra. ¹³ Anás chuchua rane ngue eruruchoi ra. Anás ndiirĩ ngue Caifás ninisi ra. Caifás que sacerdote rerequa aque mose ra. ¹⁴ Caifás sí quia que ñee nyii ra. —Aque mñi ño nda mano nguiã nande ja je chã, i que judíos je nyii ra.

Jesús aicuayãte, ichõño Pedro

¹⁵ Mbia Jesús ruruchoi mose que Simón Pedro nyoĩ erui ra. Jesús chimbaaquiato nongue rese. Co mñi ndese. Enongue que sacerdote rerequa icua ra. Nyebe

ique oso nguiã Jesús rui. Sacerdote rerecua itaicuee. ¹⁶ Mbia que Pedro siquisã mii etaronda robei ra. Sacerdote chücua que tu nyebi ñee echiquesa raarõsa je cote ra. —Sã Pedro ique rã serese, i que ra. Nyebe emingue nguiã cote. ¹⁷ Echiquesa raarõsa que ñee Pedro je ra. —¿Jesús resenda nde re? i que nyucuaaque Pedro je ra. Echiquesa raarõsa. —Tei, ichõiño ngue Pedro ee ra. ¹⁸ Nyiiseite mose que ra. Nyebe policia jenda tata mbucha nguiã. Sacerdote rimba rese. Uqui ja que chi nyee ra. Pedro que chi nyee erese ra.

Sacerdote rerecua ñee Jesús je

¹⁹ Sacerdote rerecua que ñee Jesús je ra. —¿Aba ndechimbaaquiatu re? ¿Mbaerã ereico mbia mbaaquiatu quiatu re? i que ererecua ra. ²⁰ Jesús que ñee ee ra. —Se que acheẽ ja mbia resa rae ra. Mbia chumunua nuásaa ja que aico mbia mbaaquiatu quiatu ra. Dios chuchúaa abe no. Acheẽ nyecuayã cuayã eã ngue se quia mbia ísaa ra. ²¹ ¿Mbaerã ereico ñee seje re? Secheẽ andusa je quia echeẽ. Sã uqui ñee. Mbaerã acheẽ ee re. Uqui ngue secheẽ ñandu ja quia ra, i que Jesús ererecua je ra. ²² Jesús cheẽ mose que policia jenda mo ucu eritii rese ra. —¿Mbaerã ereico ñee sacerdote rerecua je uqui nde? i que policia mo ñee ucu Jesús rese ra. ²³ Jesús que ñee ee ra. —Secheẽ icuã mose quia echeẽ seje. Mbaerã icuã ñee aico ñee nde. Secheẽ turã mose chõ erecuachã nguiã serese, i que Jesús ee ra. ²⁴ Anás que Jesús mondo Caifás je cote ra. Ecuasa que ecuruchoi Caifás je ra. Caifás que sacerdote rerecua ra.

Jesús aicuayãte, i si Pedro

²⁵ Pedro que nyee beite u tata ra. Mbia mo ngue ñee ee ra. —¿Jesús resenda nde re? i ee. —Tei, ichõiño ngue Pedro ee ra. ²⁶ Ae isa Pedro chisia nae, aque resenda que siqui huee ra. Sacerdote rerecua rimba chõ ae re. Ae que ñee Pedro je ra. —Nde rese amae iraqi re Jesús rese reae, i que Pedro je ra. ²⁷ —Tei, ichõiño ngue Pedro ee no nda. Aque mose tuchi que nguira ñee cote ra.

Pilato ñee Jesús je

²⁸ Policia jenda que Jesús curuchoi Caifás chuchua si cote ra. Ererecua tuchi chuchúaa que ereruchoi cote ra. Pretorio, i que hue tuchia je ra. I que nyaashã u quia cote ra. Judíos que iqueã ererecua chuchua ra. Mbaerãete que abae chuchua ee ra. Pascua raã nonde. —Eĩ nda oveja roo nandeuãte rei pascua mose, ique mose abae chuchua, i que ra. ²⁹ Nyebe Pilato si nguiã usẽ ñee ee. —¿Mbaerã jẽingo ñee Jesús je re? ¿Mbaerã icuã esaã nde? i que Pilato ra. ³⁰ Mbia que ñee ee ra. —Jesús que mbaerã icuã saã saãte ra. Eĩ nda uremondoãte rei ndeje. Mbaerã icuã naa naa eã mose, i que mbia Pilato je ra. ³¹ Pilato que ñee mbia je ra. —Jẽ ae Jesús jenda ae. Jẽ ae jẽingo erese ae. Jẽ ae Jesús jembasi mbasi ae. Jenamei ñimbasa mumba mose, i que Pilato ee ra. Judíos que ñee Pilato je ra. —Ure rei judíos. Ure mbia mo ureiquia aroneate. Nde chõ echb ã. “Jẽiquia” ere chõ soldados je, i que mbia ñee Pilato je ra. ³² Jesús cheẽ iquechã cote. —Mbia ra sei quia sembucha ira rese, i rei nyii. Echeẽ iquechã cote.

³³ Pilato que ique si oso uchuchúaa ra. Ae “quiatchu” i nguiã Jesús je. —¿Judíos rerecua tuchi nde re? i que Pilato Jesús je ra. ³⁴ Jesús que ñee ee ra. —¿Nde ae erecheẽ nguia seje a re? Emo ñee ndeje nyii reae, i que Jesús ee ra. ³⁵ Pilato que ñee ee ra. —Judío eã ño se resẽ. Judíos sí chõ ngue nemondo seje resẽ. Sacerdote rerecua abe no. ¿Mbaerã icuã eresaã nde? i que Pilato ra. ³⁶ Jesús que ñee ee ra. —Ererecua raque se. Ererecua eã ño se a íbii re. Eĩ nda serimba nyarõ tuchi rei serese, judíos ndiquisã quisã tuchi sesi. Ibi jenda rerecua eã ño se re, i que Jesús Pilato je ra. ³⁷ —¿Ererecua rei nde re? i si que Pilato ñee Jesús je ra. Jesús que ñee ee ra. —Ae. Achu que íbii ra. Sechusua rei íbii. Achu que mbia mbiirandu randu Dios cheẽ ñee nda. Ichõiñosa reã ñee ñee. Ichõiñosa reã ndesenda ra seandu ja, i que Jesús Pilato je ra. ³⁸ —¿Mbaerã ichõiñosa reã nde? i que Pilato ee ra.

Jesús jembucha iquia ira rese, i ererecua

Aquere que Pilato usẽ si oso ñee judíos je ra. —Mbaerã icuã Jesús saã eãt e reae.

39 Pascua mose bei que aico etarõ ji mbusẽ mondo bei jêje ra. ¿Aba ra ambusẽ mondo jêje namo nde? ¿Judíos rerecua ra ambusẽ mondo jêje re? i que Pilato ñee mbia je Jesús rĩĩ nda. 40 Mbia que ñee mombo mombo ja Pilato je ra. —Tei. Aque eã. Barrabás quia embusẽ imbu ure je, i ja que mbia ñee nda. Mbae mbuquiachãsa tuchi rei Barrabás.

19

1 —Jesús jẽiruã nua, i que Pilato ra. Mbia que Jesús iruã nua cote ra. 2 Nyu ritiméi uma ji que soldados mĩ Jesús ãquĩ ndese ra. Tiru ireĩ ngue emingue ee ra. 3 —Judíos rerecua tuchi chõ nde re, ichõĩño ngue soldados ucua ucua Jesús rese ra. 4 Pilato que usẽ si oso ñee mbia je ra. —Secheẽ jeñandu rã. Acheẽ ndei que Jesús je ra. Mbae icuã esaã eãte reae. Nyebe anosembe nguiã jêje co, i que Pilato ra. 5 Jesús que econosẽ mbia je ra. Nyu ritiméi uma ji que equerao quia uãquĩ ndese ra. Tiru ireĩ ngue equerao quia nguete rese ra. —A Jesús a resẽ, i que Pilato Jesús ndeacuquia mbia je ra. 6 Sacerdote rerecua que chi ja huee ra. Policía jenda mo abe que chi huee ra. Ũquĩ ja que ñee mombo mombo Pilato je ra. —¡Embucha ira rese! ¡Embucha ira rese! i ja que ñee mombo mombo ee ra. Pilato que ñee ee ra. —Jẽ ño jembucha ira rese ae. Mbae icuã esaã eã arõte seje, i que Pilato mbia je ra. 7 Judíos que ñee Pilato je cote ra. —“Dios rucucha rei se”, ichĩ Jesús nguiã. Nyebe eiquia. Sã embesa ji riqui i no: “Ae Dios riirĩ saã saã nguia, aque jẽiquia”, i que embesa ji ra, i que judíos ñee Pilato je ra. 8 —Dios rucucha, i mose que Pilato siquiche tuchi cote ra. 9 Pilato que ique si oso ñee Jesús je ra. —¿Ma jenda rei nde re? i que Pilato Jesús je ra. Jesús que ñee eã tuchi echeẽ mose ra. 10 Pilato que ñee si ee ra. —¿Mbaerã ereico ñee ãte secheẽ mose re? Arembuchã arõte ira rese. Arembui abe arõte se. Se chi mbia rerecua, i que Pilato ñee Jesús je ra. 11 Jesús que ñee Pilato je ra. —Dios nemĩ eã mose mbia rerecuarã, eĩ nda ereoco ãte rei serese. Ae semondo ndeje, ae quiarei eicuã tuchi ndesi, i que Jesús ee ra.

12 Aque mose bei que Pilato ndua ndua Jesús rese ra. —Jesús tambui mondo, i

raque ndua ndua. Judíos quiatu que ñee ee ra. —Nya. ¡Erembuichĩ nda jẽ! Nde embui mose, César quiato eã nda nde cote. “Ererecua rei se”, i quia ñi Jesús re. Nyebe eicuãte riqui nguiã César je, i que judíos tasẽ tasẽ Pilato je ra. 13-14 Judíos cheẽ andu mose que Pilato ngoi ngũenda tose ra. Huee que eriqui ñee mbeite mbia je ra. Gábata, i que erenda je ra. “Sita mbiitee ji”, i ñi Gábata re. —Jesús jendu rã seje, i que Pilato policía jenda je cote ra. Pascua nonde. Mbia ico quiatu mose pascua nonde. Tenda nandeite re mose. —A jenderecua ñi a resẽ, i que Pilato mbia je ra. 15 Mbia que tasẽ tasẽ ee ra. —¡Eiquia rei! ¡Embucha ira rese! i que mbia Pilato je ra. —¿Se ra jenderecua aiquia re? i que Pilato mbia je ra. —Urererecua mo eãte nyeresẽ. César mĩ ño nyeresẽ, i que sacerdote rerecua Pilato je ra. 16 Aque mose que Pilato Jesús mondo mbia je cote ra. —Jẽiquia. Jembucha ira rese, i que mbia je ra. Hue si que mbia Jesús ruruchoi cote ra.

Mbia Jesús mbucha ira rese cote

17 Jesús que usẽ oso cruz resebe cote ra. Mbia que ecuruchoi ibi ibátee ra. “Eresa cuare” i que hue ibi ibate je ra. “Gólgota” i que judío cheẽ hue je ra. 18 Huee que soldados Jesús mbucha ira rese ra. mbia nyeremo abe que embucha ira rese ra. Co mĩ Jesús ribisho quiti. Enongue eribisho quiti no. Jesús que emĩ eite re ra. 19 Pilato que letrero mbesa ra. JESUS DE NAZARET REI JUDIOS RERECUA, i que embesa ra. Embesa ji que emĩ ibate Jesús ãquĩ nguiti ra. 20 Judíos tubiriã ngue chi mae embesa ji rese ra. Sucha tubiriã jiite quiatu ngue Jesús mbucha nguiã ira rese. Embesa ji que chĩ mbia cheẽ mbuae jaaja ra. Judío cheẽ. Griego cheẽ. Latín ñee. 21 Sacerdotes rerecua que ñee ja Pilato je ra. —“Judíos rerecua” erechĩ nguiã embesa. “Judios rerecua raã ñooño” ere chõ embesa mĩ ae, i rei que judíos rerecua Pilato je ra. 22 —Ae ambesa, sã ũquĩ ñi ño, i que Pilato judíos rerecua je ra.

23 Cuatro soldados que chi huee ra. Ũquĩ ngue Jesús mbucha ira rese ra. Ũquĩ ngue Jesús irao isirõ sirõ ja ra. Jesús irao mĩ ngue

chichõ cote ra. Tejido turã tuchi que aque tiru ra. Eiasa eã tuchi que ra. Eao ji chõ eresebe que ra. ²⁴ Soldados que ñee nyue ra. —Aque ra nandechisia eã. Sita ñetẽ nandesurubaba baba rã nandechue. Aba ra ja. Aba ra eirao querao ja, i que nyue ra. Sita ñetẽ ngue esurubaba baba uchue cote ra. Embesa ji cheẽ iquechĩ cote. Jesús irao soldados mbuchao chao mose. “Seirao que embuchao chao nyue ra. Sita ñetẽ ngue esurubaba baba uchue ra”, i que embesa ji huĩ nyii ra. Embesa ji iquechĩ cote.

²⁵ Jesús mbuchasa ira rese que cuña mo chi ra. Jesús si que ra. Esi nongue abe que ra. María Magdalena abe que ra. Cleofas ninisi abe que ra. María, i que aque je ra. Ñquĩ ngue chi ja Jesús ji ra. ²⁶ Juan abe que chi Jesús si ji ra. Jesús mae mose usi rese que ñee ee ra. —Taĩ, aque quia nderiirina cote, i usi je. Juan ñi eriqui ñee. Jesubi tuchi quia ñi Juan nde. ²⁷ —Aque ndesirã cote, i que Juan je cote ra. Juan ngue Jesús si querao bei uchuchua cote ra.

Jesús mano cote

²⁸ —Achimbirãcuã tuchi que mbae ja je Dios cheẽ nguire ra, i que Jesús uchiangui re cote ra. —Seisei, i cote. ²⁹ Vinagre mo ngue chĩ mbae mo ye huee ra. Mbia que esponja monde vinagre ye ra. Mondo que Jesús chúruu ra. ³⁰ Jesús que vinagre mocõ esponja resenda cote ra. —Dios cheẽ ngue asaã ja cote ra, i que Jesús ra. Uãquĩ ngue embucheseco cote ra. Mano ngue cote ra.

Soldado Jesús cúa chiõ tiquise je

³¹ Judíos que ñee nyue ra. —Ae embucha ji chi ira rese nae, sã ñquĩ chiã ira rese pascua mose huee, i que mbia ra. Pascua nonde que embucha ira rese ra. Mbia icoquiato mose pascua nonde. Mbia chumunuasa tuchi quiarei pascua. Sábado mose rei pascua. Nyebe mbia ñee nguiã Pilato je. —Sã soldados ira resenda timasiquio ja jẽ. Eĩ nda mano jei. Eĩ nda soldados ecuruchi sábado nonde, i que judíos Pilato je ra. ³² Soldados que nyoĩ ira resenda tima ndiquio ra. Ae chi Jesús rereco chobei. ³³ Ngasẽ mose Jesús je, eraaquete que ee ra. Nyebe etima ndiquio eã nguiã. ³⁴ Soldado mo ngue Jesús cúa chiõ tiquise je

ra. Eruqui que uchẽ nda. Eri abe que uchẽ nda. ³⁵ Nyebe aico nguiã ã mbesa mbesa a. Amae jee ngue erese re. Acheẽ ñooñoã se quia a. Eĩ nda jẽ abe “ae bei jẽ” jenye Jesús rĩ. ³⁶ Embesa ji cheẽ ngue ique cote ra. Jesús tima ndiquio eã mose. —Etima nda mbia siquio eã, i que embesa ji nyii ra. ³⁷ —Ae embucha uquia ira rese nae, ñquĩ nda mae si erese, i abe que embesa ji huĩ nyii no nda.

Jesús ruruchoi eraaque atisa

³⁸ José de Arimatea, i que emo je ra. Jesús rimba checuayã ngue ae ra. —Sã judíos jiranuã serese, i que equia uchiangui re ra. Ae que “Jesús rete embu seje” i Pilato je ra. Pilato que “eno” i ee ra. José que Jesús rete curuchi ira si cote ra. Ae equerao nguiã. ³⁹ Nicodemo abe que tu erea ra. Ae tu ñee Jesús je isa nyii nae, aque. Aque que tu aba mbushimbusa tubiriã tuchi reru ra. Eraaque mbaerã ndei aba mbushimbusa. Ira shimbu turã mbucú ji. Mbae a mbucú ji abe no. ⁴⁰ Ñquĩ ja que Jesús rete querao cote ra. José. Nicodemo ndese. Aba mbushimbusa resebe que eraaque uma tiru je ra. Eĩ mbei que judíos quia mbia raaque je ra. Eati nonde. ⁴¹ Jesús iquiasa rurubi que sita imi mo ñi nda. Eao ramo ji. Mbia raaque mondosa eã nyii. ⁴² Huee que Jesús raaque nduruchoi nyati ra. —Cochite quia sábado ru nguiã nande je co, i que eati aichi chõ nda.

20

Jesús quera si

¹ Domingo mose que María Magdalena nyoĩ mae Jesús tãsa rese ra. Nyaasĩ nonde. Jesús atiquia nduruba ji que chi sita ra. ² Nyebe echoi nguiã uchã ñee Simón Pedro mbiirandu. Jesús chimbaaquiato nongue abe mbiirandu. Ae Jesús quiato tuchi nae, aque. —Aba chõ nandererecua raaque sirõ suruchoi. Mangue eno mangue reae, i que María Magdalena nda. ³ Nyebe Pedro si nguiã ea tiquia rea. Uquiato rese. ⁴ Nyoĩ ja que uchã nda. Enongue rane ngue Pedro chucua oso ngasẽ nda. ⁵ Nyibi que mae Jesús atiquia rese ra. I que Jesús umanda achõ u tiru ra. Ique tuchiã ngue oso sita imi

ni nda. ⁶ Aquere que Simón Pedro ngasẽ cote ra. Ae quiatu que ique oso sita imi ni nda. Ae abe que mae Jesús umanda achõ ndese cote ra. ⁷ Eãquĩ umanda rese abe que mae nda. Tiru ataque rese ja eã ngue eãquĩ umanda chi ra. Eacua ji que chi icúe ra. ⁸ Ae rane ngasẽ nguia nyii nae, aque abe que ique tuchi oso sita imi ni cote ra. Mae tuchi que Jesús oreã ndese cote ra. —Jesús quera chõ nguia re, i que eicua cote ra. ⁹ Ũquĩ ngue embesa ji icuayãte ra. “Jesús ra quera si”, i que eicuayãte ra. ¹⁰ Nyebi si que echoi uchuchúaa ra.

Jesús nyecua María Magdalena je

¹¹ María que chiño nyeseo eatiquia jii ra. Echeseo que nyibi mae Jesús rua rese ra. ¹² Angeles mo ngue chi huee nyeremo ee ra. Eiraoshĩ ja que chi ee ra. Enongue que chĩ ngoi Jesús ãquĩ ndúa quti ra. Enongue ecuii rúa quti no. ¹³ Angeles que ñee María je ra. —¿Mbaerã ereico nyeseo re? i que María je ra. —Aba chõ sererecua raaque querao. Nyebe aico nguia nyeseo. Mangué chõ eriqui ererequia mangué, i que María ra. ¹⁴ Ucheẽ nduibe que mae ndei uquite quti ra. I que Jesús uã ee ra. Icuá eãte que ra. ¹⁵ —¿Mbaerã ereico nyeseo re? ¿Aba eresequia quia re? i que Jesús María je ra. Ira a raarõsa Jesús riqui reĩ nguia María je. Nyebe María ñee nguia ee. —¿Nde Jesús raaque ererao re? ¿Mangué erechono mangué re? Taso erea ae. Tarao ae, i que María ra. ¹⁶ Jesús que “María” i María cheẽ mose ra. María que uba tuchi Jesús icua cote ra. Judíos cheẽ ño ngue María ñee Jesús je ra. —Raboni, i que ra. —Sembaaquiatusa, i ñee ñee Jesús icua re. ¹⁷ Jesús que ñee María je ra. ¡Seisi jeichĩ nda re! ¡Aso ãte Paba rea resẽ! Eso rã ñee senongue je. “Jesús que ñee jẽje ra. ‘Aso ra ibate Paba rea. Dios rea. Ae abe chõ jendu re. Huee ra aso’, i que Jesús ñee jẽje ra”, ere rã senongue je, i que Jesús ñee María je ra.

Jesús nyecua uchimbaaquiatu je

¹⁸ María Magdalena que oso Jesús chimbaaquiatu mbiirandu ra. —Amaechĩ Jesús rese, i que ee ra. Jesús cheẽ ngue esenei ja ee ra. ¹⁹ Aque mose que domingo ra. Aque isa que Jesús chimbaaquiatu chi

ñumunua nda. Etaronda matã ji que chĩ nda. Siquichete quia judíos si re. Jesús que oso ique uchimbaaquiatu mbuate ra. Eite re que esi ñee ee ra. —¡Jẽya eãte jirichĩ nda jẽ! i que Jesús ñee ee ra. ²⁰ Aquere que Jesús o iõsa reacuquia ee ra. Ucúa iõsa abe no. Echimbaaquiatu ía tuchi que mae Jesús rese ra. ²¹ Jesús que ñee si ee ra. —¡Jẽya eãte jirichĩ nda jẽ! Sã ñi Paba sembu no, eĩ tae si jemondo secheẽ nenei nenei sacua mbia je, i que Jesús uchimbaaquiatu je ra. ²² Jesús que uchimbaaquiatu ichu ñee nda. —Espíritu Turã ndu jẽje a cote, i que eichu ra. ²³ —“Dios chõ jẽicuã mbutiã nguia jẽsi co”, jenyé mose emo je, Dios ra ũquĩ icuã mbutiã esi cote. “Dios chõ jẽicuã mbutiã eã nguia jẽsi co”, jenyé mose emo je, Dios ra ũquĩ icuã mbutiã eã esi, i que Jesús ra.

Tomás mae Jesús quera si rese

²⁴ Tomás oreãte que Jesús nyecua mose uchimbaaquiatu je ra. Jesús chimbaaquiatu raque Tomás. Eata, i que Tomás je ra. ²⁵ —Jesús rese que uremae nda, i que eataque embiirandu ra. Tomás que ñee nda. —Jesús eã ndei e. Se mae eã mose eo iõsa rese, se ocoã mose eo iõsa rese, se ocoã mose ecúa iõsa rese, “nyia” aeã nda se, i que Tomás ñee nda. ²⁶ Jesús chimbaaquiatu que ñumunua si domingo nongue mose ra. Tomás abe que siqui uataque rese huee cote ra. Etaronda matã ji que chĩ nda. Jesús que ique oso ra. Eite re que esi ñee ee ra. —¡Jẽya eãte jirichĩ nda jẽ! i que ee ra. ²⁷ Ñee ngue Tomás je cote ra. —¡Sã seo jẽ! Seo iõsa rese eoco. Secúa iõsa rese abe eoco ae. “Jesús quera si eãte” jere sichĩ nda jẽ! “Jesús que quera si ra”, ere chõ cote, i que Jesús ñee Tomás je ra. ²⁸ —Sererecua. Nde rei sembae Dios, i que Tomás Jesús icua cote ra. ²⁹ Jesús que ñee Tomás je ra. —Nde mae mose serese, aque mose chõ seicuachĩ. Mae eã mose serese chõ ngue emo ndiqui seicua ra. Ũquĩ nguiarei eya tuchi ndesi, i que Jesús ee ra.

Je Jesús icua sacua ño co ambesa nguia jẽje

³⁰ Jesús que mbia mae sayã saã saã tuchi uchimbaaquiatu je ra. Ũquĩ ambesa ja eã

nguia a. ³¹ ã nguia ambesa ja quia a. Jẽ Jesús icua sacuaã. —Jesús rei Cristo. Jesús rei Dios rucucha, jenyẽ nda chã. Ûquiã icua mose ra jẽingo beĩ.

21

Jesús nyecua siete uchimbaaquiatu je

¹ Aquere que Jesús nyecua si uchimbaaquiatu je ra. Ama nimia ndese que eñi nda. Tiberias, i que aque ama ndisa je ra. Eĩ ngue Jesús uã nyecua ee ra. ² Echimbaaquiatu que chi nyiese ra. Simón Pedro. Tomás ndese. Ae je eriqui “Eata” i. Natanael ndese. Caná de Galilea jenda rei Natanael. Zebedeo riirĩ abe que chi ra. Echimbaaquiatu nongue abe que chi nyeremo no nda. ³ —Taso rã sira rea, i que Simón Pedro ra. —Ure abe ra ureso nderese, i que eataque ee ra. Nyoĩ ja rei que sira rea ra. Nyui ja que echoĩ canoa ye ra. Sira que embua mbua eãte aque isa ra.

⁴ Jesús que chí erimia ndese echimbaaquiatu je ra. Jesús eã eriqui reĩ nguiaã ee. ⁵ —¿Sira mo jembua re, ãquẽ? i que Jesús ñee mombo ee ra. —Tei, i que echimbaaquiatu ee ra. Jesús icua rocoĩ. ⁶ —Sira mbua mbuasa jenduba canoa quiato cuti. Sira ra jembua cote, i que Jesús ee ra. Jesús cheẽ ngue emumbayã nda. Sira que ua jate embua mbuasa ye cote ra. —Nandenosẽ ama si. Nandechuchã canoa ye, i rei que ra. Eusite que ee ra. ⁷ Ae Jesús quiatote, aque que ñee nda. —Jesús chõ eriqui re, i que uataque je ra. Pedro eandu mose que huĩrao mingue asi oso ii ra. Jesús rea. Sira mbua mbua nonde quia huĩrao mbui nguiaã nyii. ⁸ Isho tuchiã ngue ama nimia nda. Cien metros chõ ngue ra. Pedro ataque que canoa queroa ama nimia ndichã nda. Sira mbua mbuasa que ecuruchoi quia mbutiriri sira resebe ra.

⁹ Nguichi que canoa si ibi rĩ cote ra. I que tata u ee ra. Sira miĩ ngue chi tata rĩ ee ra. Mbichae abe que chi ra. ¹⁰ —Sira mo jendu rã. Ae jembua ramo, i que Jesús uchimbaaquiatu je ra. ¹¹ Simón Pedro que nyui oso canoa ye ra. Sira mbua mbuasa que embutiriri serao sonosẽ ama nimia ndese cote ra. Embisẽ sira resebe. Sira mbua mbuasa que soroãte enonosẽ mose

ra. Sira cuasu achõte raque. Sira 153 raque. ¹² —Jenyu quiaru cote, i que Jesús ee ra. —¿Aba nde re? i ãte que emo ñee ireĩ nguiaã ee ra. Mbua que Jesús icua jate ra. ¹³ Jesús que oso tátaa cote ra. Mbichae que esirõ nda. Mbuchao chao que uchimbaaquiatu je ra. Sira abe que embuchao chao ee ra. ¹⁴ Jesús que mano nyii ra. Quera si que ra. Nyecua nyecua que uchimbaaquiatu je cote ra. Co rei tercera vez co.

Jesús ñee Pedro je

¹⁵ Quiaru jare que Jesús ñee Simón Pedro je ra. Jonas ndiirĩ ndei Simón Pedro. — Simón, ¿erechesequa tuchi quia serese ã si re? i que Jesús Pedro je ra. —Ae. Achesequa tuchite sequia nderese co resẽ. Seicuate se resẽ, i que Pedro ñee ee ra. —Oveja raarõsa rã eico no. Seicuasa embaaquiatu quiatu quia secheẽ je no, i que Jesús Pedro je ra. ¹⁶ —Simón, ¿erechesequate quia serese re? i si que Jesús ñee Pedro je ra. Pedro que ñee ee ra. —Ae. Achesequa tuchite sequia nderese co resẽ. Seicuate se resẽ, i si que Pedro ñee ee ra. —Oveja raarõsa rã eico no. Seicuasa esaarõ turã nguia no, i que Jesús Pedro je ra. ¹⁷ —Simón, ¿erechesequate quia serese re? i si que Jesús ñee Pedro je ra. Co que tercera vez cote ra. Jesús ñee tres veces mose que Pedro ía eã tuchi ra. Pedro que ñee ee cote ra. —Mbae ereicua jate quia co, Sererecua. Achesequa tuchite sequia nderese co resẽ, i que Pedro ñee Jesús je ra. —Oveja raarõsa rã eico no. Seicuasa esaarõ turã nguia no. ¹⁸ Tacheẽ nyecua ndeje, Pedro. Ndeyasu mose que ereico ndeĩrao mingue oso ngata chooño ndesose quiti ra. Nde amei mose ra ndechiba ereira cote. Mbua ra ndecua cote. Ndeso sere ãsa quiti ra mbua nderuruchoi cote, i que Jesús Pedro je cote ra. ¹⁹ —Eĩ nda mbua Pedro iquia, i chõ Jesús re. —Eĩ nda Pedro Dios quirãcuã ndeacuquia mbua je, i chõ Jesús re. —Eico serui, i que Jesús Pedro je cote ra.

Ae uchimbaaquiatu rese Jesús nyesequa tuchi

²⁰ Pedro que uba mae serese cote ra. Se rei Juan. Jesús nyesequa tuchi rei se. Se chõ ngue acoi huĩ quiaru Jesús jii aque isa resẽ. Se chõ ngue “¿Aba ra nemeẽ mbua icuaã je re?” ae Jesús je resẽ. ²¹ Pedro que

mae serese cote ra. Ñee ngue Jesús je cote ra. —¿Mañi ìte ra mbia quia Juan je re? ì que Pedro Jesús je ra. ²² Jesús que ñee ee ra. —¿Mbaete ere? Serui chõ eicochõ nde. “Sechube mose chee ra Juan manoã”, se ì mose, manoã ndae. Eico chõ serui nde, ì que Jesús Pedro je ra. ²³ —Juan nda manoã mbeichĩ nde, ì que Jesús ìcuasa Juan ñi cote ra. Jesús cheẽ abi chõchĩ. —Juan nda manoã, ìre rocoĩ Jesús nyii. —Se cheẽ mose ra manoã, ì chõ ndei ngue Jesús re. —Juan nda manoã, ì ãte que Jesús ra.

Juan ñimbesa hui bei

²⁴ Jesús chimbaaquiatu chõ se re. Se chõ ã ambesa ja nguiã. Amae jate que se quia Jesús chisaã ndese ra. Acheẽ ñooño eãte se quia ã mbesa mbesa co. ²⁵ Jesús chisaã saã tubiriãte quia ñene. Ambesa ja aroneãte quia a. Jesús chisaã saã mbesa ja mose, eĩ ndei ra papel mbesa ji mbia recua mbiitayã jate. Amén.

LOS HECHOS DE LOS APOSTOLES

Espíritu Turã nda tu, i Jesús

¹⁻² Ambesa que ndeje nyii, Teófilo. Arembiirandu ja que Jesús chiaio rese. Eresco mose íbii. Jesús que mbia mbaaquiātu quiātu ereco mose íbii ra. Dios que equerao bei jiri ibate cote ra. Ñquĩ ngue asenei senei ndeje nyii ra. Oso nonde ibate que ucheẽ nenei nenei sacua irabo ra. Uchiirabo que embaaquiātu quiātu ra. Siqui que Espíritu Turã ndese mbia mbaaquiātu quiātu ra. Eaquiātu que esecha oso ibate cote ra. ³ Manonde que eru si nyecua ñquĩ je ra. Oso nonde ibate. Ngucco que eteacuquia cuquia si ee ra. Cuarenta días que eriqui nyecua nyecua bei uchi mbaaquiātu je ra. Dios rese que eriqui embiirandu randu ra. Dios rei ererecua tuchi. Ae rĩ eriqui embiirandu randu. ⁴ Jesús oso nonde ibate que eriqui ñee ñee uchimbaaquiātu je ra. —¡Jẽsochĩ nda sucha tubiriã si jẽ! ¡Jẽsochĩ nda Jerusalén si jẽ! ¡Paba cheẽ nguire jengu Espíritu Turã ndaarõ aa jẽ! “Espíritu Turã tamondo jẽje”, i que Paba jẽje ra. Aque rĩ ngue acheẽ jẽje nyii resẽ, i que Jesús ee ra. ⁵ —I je que Juan bautizar i mbia je ra. Namõ jiri ra Espíritu Turã ndu. Ae ra ique jeñiangui re. Eĩ nda Espíritu Turã bautizar i jẽje. I je eã cote. Espíritu Turã nda ique chõ jeñiangui re cote, i que Jesús uchimbaaquiātu je ra.

Jesús oso ibate

⁶ Emo mose que Jesús chimbaaquiātu ñee ee ra. Jesús oso nonde ibate. —¿Manose ra urererecua ishonda erembutiã ure si re? Israel jenda rei ure. ¿Namõ nda ure mo erembi urererecuarã nde? i que mbia Jesús je ra. ⁷ Jesús que ñee ee ra. —Manose chõ ndae. Paba mĩ eicua. Mbia eicuayã. Jẽ nguia jẽicuayãte nguia no. Manosete chõ ndae. ⁸ ¡Co rese chõ jendua jẽ! Espíritu Turã nda tu jẽje cote. Ae ra jembuquirãcuã. Ae ra jembucheẽ ñee seriĩ. Jẽ nda jẽingo serenei nenei tuchi cote. Serenei nenei Jerusalén jenda je. Judea jenda je abe no. Samaria jenda je abe no. Mbia mangu

chooñoa jenda ja je abe no. Ñquĩ ja je jẽingo serenei nenei, i que Jesús ra. ⁹ Ñeende que Jesús si ibate cote ra. Uchimbaaquiātu resa rae que esi erecha ra. Ibeishĩ ngue embuchecuayã cote ra. ¹⁰ Echimbaaquiātu que soboiba bei u mae ibei rese ra. Ibei rese mae mose que mbia nyeremo ngaẽ erea ra. Ibate si. Huee que echi ra. Eiraoshĩ tuchi que ngaẽ ejii ra. ¹¹ Ibatenda que ñee ee ra. —Galilea jenda, ¿mbaerã jengu beite mae ibei rese a re? Jesús oso quia ibate nae, ae si ra tube no. Jemaẽ ngue u eso rese nae, eĩ si ra u íbii no, i que ibatenda ee ra.

Dios que Matías irabo ra

¹² Jesús chimbaaquiātu que nyoĩ nyebi hue recha ra. Monte de los Olivos recha. Nyoĩ que sucha tubiriã Jerusalén cote ra. Aichi jiri. Monte de los Olivos rei Jerusalén ndurubi. ¹³ Ngasẽ ngue Jerusalén nda. Nyoĩ que uchuchúaa cote ra. Á ja que ra. Pedro. Juan. Jacobo. Andrés. Felipe. Tomás. Bartolomé. Mateo. Alfeo riiĩ. Jacobo, i ee. Simón el Cananista. Judas. Jacobo riiĩ ndei Judas. ¹⁴ Ñquĩ ja que ñumunua mbei bei quia ñee ñee Dios je ra. Ari abe no. Acuanĩ abe no. María abe no. Jesús si rei María. Jesús nongue abe no. Ñquĩ ja que ñumunua mbei bei quia ñee ñee Dios je ra.

¹⁵ Emo jiri mose que Jesús icuasa ñumunua ja ra. Ciento veinte que ra. Pedro que uã ñee ee ra. ¹⁶ —Seandu rã se, Seresenda. ¡Sã embesa ji ñee ñooño eã ño jẽ! Cose que Espíritu Turã ñee Judas rĩ nda. David que embesa Espíritu Turã ñee nguire ra. Judas rĩ. Judas rei Jesús reacuquiasa mbia icuã je. Jesús rerao nonde iquia. ¹⁷ Jesús que Judas irabo rei nyii ra. Nanderesendacuã. Nyebe rei Judas nanderesenda nyii. ¹⁸ Judas que mbae isiquia isi icuã nda. Mbae isiquia je que ibi mo isi ra. Hue ereco mose que mano nda. Ibate si eru ngoĩ mano. Uãquĩ nguiti que eru ngoĩ ra. Erie que oo ra. Echĩque mburiri. ¹⁹ Jerusalén jenda que jirandu ja erese ra. Acéldama, i que hue ibi je cote ra. Mbia ruqui rua, i chõ nguia hue je. Ecoisa ibi je. ²⁰ ¡Ñĩ embesa ji Salmos nde: Sã echuchua oreã mbei.

Sã mbia mo ndiquiã mbei equi re.
 Sã eriquicharomba riqui Dios cheẽ nenei
 nenei cote,
 i que embesa ji Judas riĩ nda. ²¹ Emo
 nandeirabo Judas riquicharõ. Mbia chi
 bei quia nanderese nae. Jesús nandem-
 baaquiato quiatu bei mose. ²² Juan mbia
 mbiirandu randu mosenda bei. Dios Jesús
 querao chee quia ibate. Ae siqui beite
 quia nanderese nae, ùquĩ mo nandeirabo
 nanderesendacuã. Jesús quera rese mbia
 mbiirandu randu sacuã, Judas riquicharõ,
 i que Pedro ñee ee ra. ²³ Mbia nyeremo
 ngue etea cote ra. José Justo, i emo je.
 Barsabás, i abe ee no. Matías, i enongue je.
²⁴ Jesús chimbaaquiato que ñee Dios je cote
 ra. —Urererecua, aba chiã ereicuate quia
 co. ã nyeremo ndiquiã. ¿Aba ndechiirabo
 re? ¿Aba ereirabo urembirõ sacuã nde?
²⁵ ¿Aba eretea ndechimbaaquiaturã nde?
 ¿Aba eretea Judas riquicharõ nde? Ae hui
 quia ndecheẽ si. Ae oso quiachã ndesi
 cote. ¿Aba eretea eriquicharõ nde? i que
 Dios je ra. ²⁶ Sita que embaba mbaba o ye
 cote ra. —¿Aba Dios chiirabo re? i ñene.
 Eĩ ngue Matías irabo ra. Dios que Matías
 mingo Jesús chimbaaquiato rese cote ra.
 Mbia once mbirõ. Docerã. Doce que Jesús
 chimbaaquiato cote ra.

2

Espíritu Turã tu Jesús icuasa je

¹ Fiesta de Pentecostés mose que Jesús
 icuasa chi ja ñumunua nda. Hue mii ngue
 echi ja ñumunua nda. ² Ibei rieu que em-
 buate ra. Ama ndieu raanguia. Tuchua
 mbieu tuchi Jesús icuasa je. ³ Tata rendi
 raanguia que tu nguichi eãquĩ ndes e ra.
 Jesús icuasa aqũ ja rese. ⁴ Espíritu Turã
 ngue ique tuchi hue jenda chiangui re
 ra. Ique ja que Jesús icuasa chiangui
 re ra. Mbia que echeẽ ata mo saã saã
 cote ra. Echeẽ uchianuã ngue esaã saã
 nda. Espíritu Turã nguia rei embucheẽ
 echeemo. Mbia cheẽ mbuae jaaja que cote
 ra.

⁵ Aque mose que judíos tubiriã nyi
 Jerusalén nda. Ishonda tubiriã nyi huee.
 Mangue chooñoa jenda ja chõ chi nguia
 huee. Ûquĩ ndei Dios cheẽ mumbasa reã

judíos ataque rã si. ⁶ Ibei rieu andu mose
 que ùquĩ ngaẽ uchã nda. Nyuruirã tuchi
 eandu. Jesús resenda mbia cheẽ mbuae
 saã saã ja chõchĩ nguia u. Espíritu Turã ño
 ngue embucheẽ nguia. Mbiamo ñee icuasa
 reã ndaque. Mbia que ucheẽ ñandu ñandu
 ja u ra. Jesús icuasa ñee mose. Nyebe que
 mbia chi nguia nyuruirã eandu. ⁷ Mbia
 nyuruirã ja eandu. —¿Mañi equia mbiamo
 ñee icua ja re? Galilea jenda achõ ño
 ndaque ã, i tuchi que mbia u nyuruirã
 eandu ra. ⁸⁻¹¹ —¿Mañi equia nande ja cheẽ
 naa naa ã nde? Nandechẽ Jesús icuasa saã
 jaaja chõchĩ nguia ã. Partia jenda cheẽ esaã
 saã ñochĩ nguia ã. Media jenda cheẽ abe
 no. Elam jenda cheẽ abe no. Mesopotami
 a jenda cheẽ abe no. Judea jenda cheẽ abe
 no. Capadocia jenda cheẽ abe no. Ponto
 jenda cheẽ abe no. Asia jenda cheẽ abe no.
 Frigia jenda cheẽ abe no. Panfilia jenda
 cheẽ abe no. Egipto jenda cheẽ abe no.
 Libia jenda cheẽ abe no. (Cirene ndobei.)
 Roma jenda cheẽ abe no. (Roma jenda
 mo ndei judíos. Roma jenda ataque rei
 judíos eã.) Creta jenda cheẽ abe no. Arabia
 jenda cheẽ abe no. Jesús icuasa ùquĩ ñee
 saã saã ja chõchĩ nguia ã. Nandechẽ esaã
 saã ja chõchĩ nguia ã. Jesús icuasa riquichĩ
 nandechẽ naa naa tuchi Dios chiao turã
 nenei nenei ã, i ja que mbia ucheẽ andu
 jaaja mose. ¹² I jate que mbia u nyuruirã
 eandu ra. Ndua ndua tuchi que u eandu ra.
 —Mañi equia ñee ã nde, i nyue. Jesús icuasa
 mbia cheẽ mbuae naa naa mose. ¹³ Emo
 emo ngue ñee icuã icuã Jesús icuasa je ra.
 —Quiacua chõ eriqui nguia ã, i raque Jesús
 icuasa riĩ.

Pedro ñee mbia je

¹⁴ Pedro que uã ñee mbia je cote ra.
 Nguesenda once rese que echi uã ñee mbia
 je ra. Tasẽ jiri ñee ee. —¡Seandu ja u jê!
 Tacheẽ jêje, Jerusalén jenda. Judea jenda
 abe no. ¹⁵ ¿Quiacua rei Jesús icuasa riqui
 jêje re? Quiacua eã ño ñene. Tenda que
 nyui ramote resẽ. Mbia quiacuasa eã ño
 huee tenda resẽ. ¹⁶ ã nii ngue Joel embesa
 mbesa cose ra. Dios cheẽ mbuchecuasa
 que embesa ã nii nda. Eĩ ngue embesa ra:
¹⁷ “Mbae ua jiri mos e ra Espíritu Turã
 amondo mbia ja je”, i que Dios ra.

“Jendiirĩ nda secheẽ mbuchecua mbia je. Acuanĩndu ra serea rea tuchi cuu. Amei abe ra serea rea cuu no.

¹⁸ Aque mose ra Espĩritu Turã amondo serimba ja je.

Serimba ra secheẽ mbuchecua checua mbia je.

¹⁹ Mbia mae sayã nda asaã saã ibi rĩ no.

Eruqui rese ra mbia mae no.

Tata rese ra mbia mae no.

Tatashĩ ndese ra mbia mae no.

²⁰ Mbia rerecua tu nonde ra tenda ñimoo. Eruqui rã nda nyasi mbia rerecua tu nonde”, i que Dios ra.

²¹ “Ndeya eã ño serese, Sererecua”, i mose emo ñee Dios je, aque ra Dios sirõ eĩcuã si,

i que Joel embesa ra. ²² Israel jenda, jseandu rã! Nazaret jenda rĩĩ aico ñee ñee jẽje a. Jesús rĩĩ. Dios que Jesús mbuquirãcuã tuchi ra. Nyebe que Jesús mbia mae sayã saã saã nda. Ûquĩ ndese que jemaẽ nda. ²³ “Mbia icuã nda seriirĩ iquia”, i que Dios Jesús mano nonde ra. Jẽ nguia Jesús jẽiquia tuchi nguia cote. Jẽ nguia jemee nguia mbia icuã je. Eiquia nonde. Dios rane ngue jirandu Jesús rese ra. “Mbia icuã nda Jesús iquia”, i que Dios quia nyii ra. ²⁴ Dios que Jesús mbuquera si ra. Jesús mano mbei aroneãte.

²⁵ David que Jesús cheẽ senei cose ra. ã ngue ñee nda:

Sererecua riqui sembuĩ eã mbei co. Eriqui bei serese co.

Mbae riqui sembusiquiche aroneãte co.

²⁶ Nyebe seya tuchite riqui co. Nyebe aico ñee turãte Dios rĩĩ co. Semano mose abe ra Dios hui eã mbei sesi.

²⁷ Seaingue ra eresechayã semano mose, Sererecua.

Serete abe ra erembuquera si mingo.

Ndechesequate aico co.

²⁸ Semingosa tuchi rei nde.

Sereco mose nderese ra seya tuchi,

i que David Jesús cheẽ nenei cose ra.

²⁹ Tacheẽ nyecua jẽje, Seresenda. Nanderu David que mano cose resẽ. Mbia que ehati resẽ. Eatisa nandeicua ja quia co resẽ. ³⁰ David rei Dios cheẽ mbuchecua. Dios que ñee ee ra. “Nderiirĩ mo nda Cristo. Ae ra mbia rerecuarã tuchi. Nderiquicharõ nda mbia rerecuabi tuchi”, i que Dios David je cose ra. “Dios

ñee ñooñoa tuchi chõ nguia”, i que David ra. ³¹ David que Dios cheẽ icuate quia ra. Nyebe que ñee Jesús rĩĩ nda. “Seaingue ra eresechayã semano mose. Serete ra erembuquera si mingo”, nyebe David i nguia Jesús rĩĩ. ³² Dios que Jesús mbuquera si ra. Ûquĩ ureicua ja quia ã. Nyebe ureico nguia jembirandu randu ùquĩ ndese ã. ³³ Dios que Jesús querao ibate nyiese ra. Dios jii eriqui pee cote. Dios que Espĩritu Turã mee Jesús je cote ra. Ucheẽ nguire que emee ee ra. Jesús riqui Espĩritu Turã mondo ure je co. ã Espĩritu Turã nyisaã jeñandu ñandu quia ã. Espĩritu Turã ndiqui ã mbucheẽ mbia mo ñee ã. ³⁴⁻³⁵ David osoã ibate aque mose. Jesús rĩĩ ngue David embesa ra. ã ngue embesa ra:

Dios que ñee sererecua je ra. “Ecoi seji. Nde abe ra ererecua serese. Ae ndeucuayãte quia nae, ùquĩ je ra ndequirãcuã ateacuquia tuchi.

Ndequirãcuã tuchi ra ùquĩ si”, i que Dios sererecua je ra,

i que David embesa mbesa ra. ³⁶ Jesús jembucha quia ira rese nae, ae si Dios mingo mbia rerecuarã co. Ae nandesaarõ arõ nguia, ae si rei Jesús. Jesús rese tẽirandu ja, Israel jenda, i que Pedro ñee ocote ra.

³⁷ Mbia ia eã tuchite que Pedro cheẽ andu ra. Ñee ngue Pedro je ra. Pedro resenda je abe. —¿Mañi ure ra equia re? i que Pedro je ra. Jesús chimbaaquiato ja je. ³⁸ Pedro que echeẽ sibishorõ nda. —jẽicua si jẽhui rã jẽ! Sã bautizar ure jẽje Jesucristo rĩĩ. Dios jẽicua mbutiã sacua. Aquere ra Dios Espĩritu Turã mondo jẽje. ³⁹ “Espĩritu Turã nda amondo jẽje. Jendiirĩ je abe ra amondo. Ishonda je abe ra amondo. Sechiirabo ja je ra Espĩritu Turã amondo”, i que Dios ñee nande je ra, i que Pedro Dios cheẽ nenei nda. ⁴⁰ Eĩ ngue Pedro ñee ocote mbia je ra. Ñee turã ngue ee ra. —Mbia icuã achõte eriqui ibi jenda ã. Quiachã ja equia Dios si ã. Ûquĩ si jẽhui chõ. Jẽ abe jẽquiachã sacua Dios si, i que Pedro mbia mbaaquiato ra. ⁴¹ —jAe beite jẽ! i que mbia tubiriã Pedro cheẽ andu ra. Ûquĩ j e que bautizar i ra. Aque mose que mbia tres mil Jesús isi ra. ⁴² Ûquĩ

Dios que ñee sererecua je ra. “Ecoi seji. Nde abe ra ererecua serese. Ae ndeucuayãte quia nae, ùquĩ je ra ndequirãcuã ateacuquia tuchi.

Ndequirãcuã tuchi ra ùquĩ si”, i que Dios sererecua je ra,

i que David embesa mbesa ra. ³⁶ Jesús jembucha quia ira rese nae, ae si Dios mingo mbia rerecuarã co. Ae nandesaarõ arõ nguia, ae si rei Jesús. Jesús rese tẽirandu ja, Israel jenda, i que Pedro ñee ocote ra.

³⁷ Mbia ia eã tuchite que Pedro cheẽ andu ra. Ñee ngue Pedro je ra. Pedro resenda je abe. —¿Mañi ure ra equia re? i que Pedro je ra. Jesús chimbaaquiato ja je. ³⁸ Pedro que echeẽ sibishorõ nda. —jẽicua si jẽhui rã jẽ! Sã bautizar ure jẽje Jesucristo rĩĩ. Dios jẽicua mbutiã sacua. Aquere ra Dios Espĩritu Turã mondo jẽje. ³⁹ “Espĩritu Turã nda amondo jẽje. Jendiirĩ je abe ra amondo. Ishonda je abe ra amondo. Sechiirabo ja je ra Espĩritu Turã amondo”, i que Dios ñee nande je ra, i que Pedro Dios cheẽ nenei nda. ⁴⁰ Eĩ ngue Pedro ñee ocote mbia je ra. Ñee turã ngue ee ra. —Mbia icuã achõte eriqui ibi jenda ã. Quiachã ja equia Dios si ã. Ûquĩ si jẽhui chõ. Jẽ abe jẽquiachã sacua Dios si, i que Pedro mbia mbaaquiato ra. ⁴¹ —jAe beite jẽ! i que mbia tubiriã Pedro cheẽ andu ra. Ûquĩ j e que bautizar i ra. Aque mose que mbia tres mil Jesús isi ra. ⁴² Ûquĩ

Ndequirãcuã tuchi ra ùquĩ si”, i que Dios sererecua je ra,

i que David embesa mbesa ra. ³⁶ Jesús jembucha quia ira rese nae, ae si Dios mingo mbia rerecuarã co. Ae nandesaarõ arõ nguia, ae si rei Jesús. Jesús rese tẽirandu ja, Israel jenda, i que Pedro ñee ocote ra.

³⁷ Mbia ia eã tuchite que Pedro cheẽ andu ra. Ñee ngue Pedro je ra. Pedro resenda je abe. —¿Mañi ure ra equia re? i que Pedro je ra. Jesús chimbaaquiato ja je. ³⁸ Pedro que echeẽ sibishorõ nda. —jẽicua si jẽhui rã jẽ! Sã bautizar ure jẽje Jesucristo rĩĩ. Dios jẽicua mbutiã sacua. Aquere ra Dios Espĩritu Turã mondo jẽje. ³⁹ “Espĩritu Turã nda amondo jẽje. Jendiirĩ je abe ra amondo. Ishonda je abe ra amondo. Sechiirabo ja je ra Espĩritu Turã amondo”, i que Dios ñee nande je ra, i que Pedro Dios cheẽ nenei nda. ⁴⁰ Eĩ ngue Pedro ñee ocote mbia je ra. Ñee turã ngue ee ra. —Mbia icuã achõte eriqui ibi jenda ã. Quiachã ja equia Dios si ã. Ûquĩ si jẽhui chõ. Jẽ abe jẽquiachã sacua Dios si, i que Pedro mbia mbaaquiato ra. ⁴¹ —jAe beite jẽ! i que mbia tubiriã Pedro cheẽ andu ra. Ûquĩ j e que bautizar i ra. Aque mose que mbia tres mil Jesús isi ra. ⁴² Ûquĩ

Ndequirãcuã tuchi ra ùquĩ si”, i que Dios sererecua je ra,

i que David embesa mbesa ra. ³⁶ Jesús jembucha quia ira rese nae, ae si Dios mingo mbia rerecuarã co. Ae nandesaarõ arõ nguia, ae si rei Jesús. Jesús rese tẽirandu ja, Israel jenda, i que Pedro ñee ocote ra.

³⁷ Mbia ia eã tuchite que Pedro cheẽ andu ra. Ñee ngue Pedro je ra. Pedro resenda je abe. —¿Mañi ure ra equia re? i que Pedro je ra. Jesús chimbaaquiato ja je. ³⁸ Pedro que echeẽ sibishorõ nda. —jẽicua si jẽhui rã jẽ! Sã bautizar ure jẽje Jesucristo rĩĩ. Dios jẽicua mbutiã sacua. Aquere ra Dios Espĩritu Turã mondo jẽje. ³⁹ “Espĩritu Turã nda amondo jẽje. Jendiirĩ je abe ra amondo. Ishonda je abe ra amondo. Sechiirabo ja je ra Espĩritu Turã amondo”, i que Dios ñee nande je ra, i que Pedro Dios cheẽ nenei nda. ⁴⁰ Eĩ ngue Pedro ñee ocote mbia je ra. Ñee turã ngue ee ra. —Mbia icuã achõte eriqui ibi jenda ã. Quiachã ja equia Dios si ã. Ûquĩ si jẽhui chõ. Jẽ abe jẽquiachã sacua Dios si, i que Pedro mbia mbaaquiato ra. ⁴¹ —jAe beite jẽ! i que mbia tubiriã Pedro cheẽ andu ra. Ûquĩ j e que bautizar i ra. Aque mose que mbia tres mil Jesús isi ra. ⁴² Ûquĩ

Ndequirãcuã tuchi ra ùquĩ si”, i que Dios sererecua je ra,

i que David embesa mbesa ra. ³⁶ Jesús jembucha quia ira rese nae, ae si Dios mingo mbia rerecuarã co. Ae nandesaarõ arõ nguia, ae si rei Jesús. Jesús rese tẽirandu ja, Israel jenda, i que Pedro ñee ocote ra.

³⁷ Mbia ia eã tuchite que Pedro cheẽ andu ra. Ñee ngue Pedro je ra. Pedro resenda je abe. —¿Mañi ure ra equia re? i que Pedro je ra. Jesús chimbaaquiato ja je. ³⁸ Pedro que echeẽ sibishorõ nda. —jẽicua si jẽhui rã jẽ! Sã bautizar ure jẽje Jesucristo rĩĩ. Dios jẽicua mbutiã sacua. Aquere ra Dios Espĩritu Turã mondo jẽje. ³⁹ “Espĩritu Turã nda amondo jẽje. Jendiirĩ je abe ra amondo. Ishonda je abe ra amondo. Sechiirabo ja je ra Espĩritu Turã amondo”, i que Dios ñee nande je ra, i que Pedro Dios cheẽ nenei nda. ⁴⁰ Eĩ ngue Pedro ñee ocote mbia je ra. Ñee turã ngue ee ra. —Mbia icuã achõte eriqui ibi jenda ã. Quiachã ja equia Dios si ã. Ûquĩ si jẽhui chõ. Jẽ abe jẽquiachã sacua Dios si, i que Pedro mbia mbaaquiato ra. ⁴¹ —jAe beite jẽ! i que mbia tubiriã Pedro cheẽ andu ra. Ûquĩ j e que bautizar i ra. Aque mose que mbia tres mil Jesús isi ra. ⁴² Ûquĩ

Ndequirãcuã tuchi ra ùquĩ si”, i que Dios sererecua je ra,

i que David embesa mbesa ra. ³⁶ Jesús jembucha quia ira rese nae, ae si Dios mingo mbia rerecuarã co. Ae nandesaarõ arõ nguia, ae si rei Jesús. Jesús rese tẽirandu ja, Israel jenda, i que Pedro ñee ocote ra.

³⁷ Mbia ia eã tuchite que Pedro cheẽ andu ra. Ñee ngue Pedro je ra. Pedro resenda je abe. —¿Mañi ure ra equia re? i que Pedro je ra. Jesús chimbaaquiato ja je. ³⁸ Pedro que echeẽ sibishorõ nda. —jẽicua si jẽhui rã jẽ! Sã bautizar ure jẽje Jesucristo rĩĩ. Dios jẽicua mbutiã sacua. Aquere ra Dios Espĩritu Turã mondo jẽje. ³⁹ “Espĩritu Turã nda amondo jẽje. Jendiirĩ je abe ra amondo. Ishonda je abe ra amondo. Sechiirabo ja je ra Espĩritu Turã amondo”, i que Dios ñee nande je ra, i que Pedro Dios cheẽ nenei nda. ⁴⁰ Eĩ ngue Pedro ñee ocote mbia je ra. Ñee turã ngue ee ra. —Mbia icuã achõte eriqui ibi jenda ã. Quiachã ja equia Dios si ã. Ûquĩ si jẽhui chõ. Jẽ abe jẽquiachã sacua Dios si, i que Pedro mbia mbaaquiato ra. ⁴¹ —jAe beite jẽ! i que mbia tubiriã Pedro cheẽ andu ra. Ûquĩ j e que bautizar i ra. Aque mose que mbia tres mil Jesús isi ra. ⁴² Ûquĩ

abe que ñumunua nua nguia Jesús quiato ataque rese ra. Jesús chimbaaquiato ñee ñee mose mbia je. Ñumunua nua ñee Dios je. Eturã mbei que eriqui nyue ra. Mbichae que eu eu quia ndua ndua Jesús rese ra.

Jesús icuasa siqui turã nyue

⁴³ Mbia que siquiche ja Dios si ra. Jesús chimbaaquiato que Dios mbuquirãcuã nda. Nyebe mbia mae sayã naa naa tuchi nguiã. ⁴⁴ Jesús icuasa que ñumunua nua mbei quia ra. Abei tuchi que eriqui nyue ra. ⁴⁵ Umbae je que eriqui vender i tuchi ra. Mbae isiquia que emee mee nguia mbaecha reã je cote ra. ⁴⁶ Ñumunua nua mbei que equia Dios chuchúaa ra. Quiaru quiaru que equia nyiese uchuchúaa ra. Dios rĩ ñgue eriqui ñee turã turã nyue ra. Eya tuchi que eriqui Dios rese ra. ⁴⁷ Dios rĩ ñgue eriqui ñee turã turã nda. Mbia ataque que ñee turã turã nguia Jesús icuasa rĩ nda. Jesús icuasa que Dios mbeta mbeta bei quia ra.

3

Ecuatayã mbucherõ

¹ Emo mose que Pedro nyo i quia Dios chuchúaa ra. Juan ndese. Tenda nyeseco mose. Hue tenda bei que mbia riqui ñee ñee Dios je ra. ² Huee que amei mo ngatayã ndiqui bei huee ra. Echaacuquia mosenda bei eiquieĩ icuã. Mbia que ecuruchoi choi bei quia huee ra. Dios chuchúaa. Eiquesa turã, i que hue eiquesa je ra. Huee que eriqui ecuatayã mii mii mbei eiquesa jii ra. Ache ache i sacua mbia ique mose Dios chuchúaa. ³ Dios chuchúaa nda Pedro ique nguiã Juan ndese chã. Ecuatayã ñgue mae erese ache ache i ee ra. ⁴ Pedro que nguesa mbui reã mae erese ra. Juan abe. —¡Ure rese emae jè! i ecuatayã je. ⁵ Eandu mose que mae erese ra. —Mbae mo nda emee seje reae, i mae nguiatu erese. ⁶ Pedro que ñee ee ra. —Mbae isiquia eã ndaque sembae. Mbae mo nda asaã ndeje. Jesucristo quirãcuã nembucherõ na mbucuata. Ehuã na ngata. Nazaret jenda quirãcuã nembucherõ na, i que Pedro ee ra. ⁷ Pedro que eo isi ra. Mua ñgue eo rese ra. Aque mosebe que ei nyerõ nda. Eiquieĩ abe

nyerõ eo isi ruibe. ⁸ Ecuatayã ñgue juã asi cote ra. Ngata cuata que ra. Ique Dios chuchúaa ùqui ndese. Eya tuchi que ra. Oo oo tuchi que ra. Iaanye, i tuchi que equia Dios je ra. ⁹ Mbia que mae ja u ecuatayã ngata rese ra. Ñee turã mose Dios je que mbia nyiisaquia u echeẽ ndese ra. ¹⁰ Mbia que nyuruira u mae erese ra. Mbia que eicua ja ra. —Ecuatayã ño aque re. Ache ache i beite que equia Dios chuchúaa, ae chõ co re, i que mbia nyuruira tuchi mae erese ra.

Pedro ñee oco judíos je

¹¹ Embucherõ ji que Pedro chiba isi quia ra. Juan chiba abe no. Mbia que ngaẽ ucha mae erese ra. Nyuruira era. Portal de Salomón, i eiquesa je. Huee que echi ra. ¹² Pedro que mae mbia chumunua ndese ra. Ñee ñgue ee ra. —¿Mbaerã jèingo nyuruirate mae erese re, Israel jenda? ¿Mbaerã jèingo nyurui rate mae urerese re? Ure ae eã ño Ecuatayã urembucherõ nguiã. Urequirãcuã eã Ecuatayã mbucuata nguiã. Dios quiarei uquiracuã mee ee embucherõ. Urecuata turã embucherõ eã nguiã. ¹³ Dios rei nanderu rerecua bei. Abraham. Isaac. Jacob. Ùqui nderecua bei Dios. Dios ñee turã mbei nguiirĩ nii. Jesús rĩ. Ae que jemee icuã mbia je eiquia sacua nda. “Jesús tambui”, i mose Pilato, ùqui mose que jèisi quiatu quiatu chõchĩ nguiã. ¹⁴ “Embui”, jenyee eã ñochĩ ñgue Jesús turã nii nde. “Embui”, jenyee chõchĩ ñgue mbia iquiasa rĩ nde. ¹⁵ Eĩ jenyee chõchĩ ñgue mbia mingosa iquia nguiã. Dios que embuquera si ra. Equera si rese que uremae nda. Ñ ureico mbia mbiirandu randu equera rese ã. ¹⁶ Ñ jengu mae Ecuatayã ndese ã. Jè Ecuatayã jèicuate resẽ. Jendesa rae que Dios embucherõ nda. Ure Jesús ureicuate quia ã. Nyebe Ecuatayã mbuquirãcuã nguiã. ¹⁷ Jèaquiata ño Jesús jèiquia nguiã, Sere-senda. Jenderecua aquiata ño Jesús iquia nguiã no. ¹⁸ Dios quia que ucheẽ mbuchecuada mbucheẽ cose ra. Cristo rĩ embucheẽ. “Mbia icuã icuã nda Cristo je. Cristo mbasi mbasi rae”, i que embuchecuada cose ra. Ùqui ñee nguire quia Cristo mbasi mbasi nguiã cote. ¹⁹ jèicua

si jēhui chō jē! Jemba rã Dios icha cuti. Dios jēicuã mbutiã sacua. Eĩ jenye mose ra Dios jembiate cote. ²⁰ Dios ra Jesucristo mbuquichi imbu cote. Ae que emi jenderecua rã cos e ra. ²¹ Namō ño nda Jesús riquichō ibate. Dios mbae mbitirō ja mose ra eru cote. Eĩ ngue Dios cheē mbuchecua ñiinda ñee nda. ²² Nyebe Moisés ñee nguiã nanderu cose ndare je. “Dios ra nanderesenda mo isi. Dios cheē mbuchecua sacua. ¡Ae cheē nda jemumba jirichĩ jē! ²³ Echeē mumbasa ra Dios mbuquiachã nyesi”, i que Moisés ñee nda. ²⁴ Dios cheē mbuchecua ja que mbia mbiirandu randu mbae riñ nda. Ae riqui nyecua namo ã cote. Samuel nane ngue mbia mbiirandu randu ã ñi nda. Samuel nduinda ja abe que embiirandu randu ã ñi no nda. ²⁵ Jēje chō Dios cheē mbuchecua ñee ñee nguiã. “Seturãte ra jendiirĩ ja je”, i que Dios ñee nanderu ñiinda je ra. Jēje abe Dios ñee. Ucheē nda embuchebi eã. Dios que ñee Abraham je cose ra. “Nderiirĩ mo nda mbia mbia ja tuchi quia. Ibi jenda ra embia ja tuchi”, i que Dios Abraham je ra. ²⁶ Dios que nguiirĩ mondo íbii cote ra. Jē nane je que embu ra. Jembuturã sacua. Jēhui sacua jēicuã si, i que Pedro judíos je ra.

4

Ererecua paama i ja Pedro je, Juan abe je

¹ Sacerdotes que ngaē cote ra. Pedro ñee mbei mose mbia je. Juan abe ñee mose ee. Dios chuchua raarōsa abe que tu erese huee ra. Saduceos mo abe que ngaē erese huee ra. ² Ūquĩ paama i ja Pedro je. Juan abe je. Mbiambaaquiato quiato mose chō ngue paama i ra. —Jesús que quera si manonde ra. Eĩ nda mbia abe quera si, i que Pedro ee nyii ra. Nyebe ūquĩ ndiqui nguiã paama i ee. ³ Nyebe eisi suruchoi nguiã policiaa. Eresaitō ño emingue nguiã tarō. —Isamami nguia nda nandechandu nguiã, i que ererecua nyue ra. ⁴ Mbiamtubiriã Dios cheē ñandu erenei nenei mose. Eatate que Jesús icua ra. Jesús icuasa rei cinco mil hombres.

⁵ Isamami ngue mbiamtubiriã ñumunua nda. Judíos rerecua que ngaē ñumunua huee ra. Amei abe que ngaē ñumunua erese

ra. Embesasa abe que ngaē ñumunua erese no nda. Ūquĩ ja que ñumunua Jerusalén nda. ⁶ Anás abe que chí erese ra. Ae rei sacerdote rerecua. Caifás abe que chí erese ra. Juan abe no. Alejandro abe no. Sacerdotes nducucha ja que chí ñimbaacua ra. ⁷ Pedro que emi mbia ite re ra. Juan ndese. Mbiam ñee ee cote. —¿Aba jembirãcuã nde? ¿Aba jembirãcuã nguia ecuatayã mbucuata nonde re? i que ee ra. ⁸ Espíritu Turã ngue Pedro mbucheē cote ra. —Tacheē jēje, mbia rerecua. Tacheē jē abe je, Amei. ⁹ “Ecuatayã ndese urembiirandu rã”, jenye chō nguiã ure je ã. “¿Aba jembirãcuã ecuatayã mbucherō nonde re?” jenye chō nguiã ure je ã. ¹⁰ Tacheē nyecua jēje. Sã mbia ureandu ja. Sã Israel jenda ureandu ja. A ecuatayã embucherō ji riqui jendesa rae a. Jesucristo quirãcuã nguiarei embucherō. Aque sí quirãcuã ño ñene. Ae jēiquia. Ae jembucha ira rese. Ae Dios mbuquera si. Aque quirãcuã ño ñene. Nazaret jenda quirãcuã. ¹¹ Ihuaē nandechirirō na ño Jesús re. Sañi nandeico mae mae ihuae nandechirirō ndese no. “Aque chō ndei que eturã nda”, sañi nandeico erirō i no. Eĩ nyee ra mbia Jesús ndichã i no. Mbiam ra eisi tuchi nguerecuarã cote. Jesús momboi isi. Eisire rocoĩ nyii. ¹² Aba mo eã ndei nanderirōsa nandeicuã si. Jesús ae nanderirō nguiã nandeicuã si. Dios aba mo abe mbueã nguiã mbiamrirō sacua huicuã si. Jesús ae ñene, i que Pedro ra.

¹³ Mbiam rerecua nyuruira Pedro cheē andu. —¿Mbaerã eriqui siquicheãte ñee nde? Papel ndesenda eã ndaque. Mbiam ataque rã ño ndaque, i que ererecua nyue ra. Pedro riñ. Juan ñi. —Jesús resenda quia eriqui reaē. Nyebe eriqui siquicheãte ñee nde, i nyue cote. ¹⁴ Hue que embucherō ji riqui huee ra. Nyebe mbiam rerecua ñee icuã aroneate eriñ. ¹⁵ Ererecua ñee ja cote. —Sã Pedro choi usē taicuee. Juan abe no. Nandechē nandechue nande ae, i que ererecua nyue ra. ¹⁶ —¿Mañi nande ra Pedro je re? ¿Mañi nande ra Juan abe je re no? Pedro chimbucherō ndese mbiamriquijirandurandujate ã. Jerusalén jenda riquijirandu

randu jate ã no. “Mbucheroã ngue ra”, nande aroneate. ¹⁷ Nandembusiquiche rã no. Ñee ñee siã nda equia Jesús rĩĩ ña. Mbia nda jiranua nguia mámbi chã. Jesús rese chã. “¡Jesús cheẽ nda jësenei senei sichĩ jê!” nande rã ee, i que ererecua nyue ra. ¹⁸ —Jenyu, i Pedro je cote. Juan abe je. — ¡Mbia ra jembaaquiatuchi Jesús rĩĩ jê! ¡Jesús ra jësenei seneichi mbia mo je jê! i rei que ee ra. ¹⁹ Pedro que echeẽ sibishorõ nda. Juan ndese. —¿Aba cheẽ nguia ra aba mumbayã nguia re? ¿Jeñee nguiatu ra aba mumbayã nguia re? Dios cheẽ aba mumba aroneate. ¿Jêje re? ²⁰ ¿Mañi nda aba umaesa reneiã nde? ¿Mañi nda aba uchiandu abe reneiã ne no? i que Pedro ee ra. Juan abe. ²¹ Ererecua ñee icuã Pedro je. Juan abe je. —Nandembusiquiche nandechesi, i raque. Hui chõ ngue esi cote ra. Embasiã mondo cote. Ererecua ireite mbia tubiriã si. Nyebe eiruã nuã eã nguia. Pedro ecuatayã mbucherõ mose mbia ñee turã turã ño nguia Dios rĩĩ neaẽ. Nyebe ererecua ireite riqui nguia esi. ²² Ae Dios mbucherõ nae, aque amei. Cuarenta años que ae ra.

Urembusiquicheã, i equiato Dios je

²³ Mbia rerecua hui ja Pedro si. Juan abe si. Nyoĩ nguesenda mbiirandu ja mbia rerecua cheẽ ndese. Amei ñee ndese. Sacerdotes cheẽ ndese. Nguesenda mbiirandu ja. ²⁴ Eresenda eandu mose que ñee ja Dios je ra. Ñee nyecha ee. —Dios, urererecua tuchi nde. Nde rei mbae aosa. Ibei aosa. Ibi aosa. Ama abe aosa no. ²⁵ Sã David erembucheẽ nderimba cose no. Sã eĩ erembucheẽ no:

¿Mbaerã ño mbia pare pare i ja re?

¿Mbaerã mbia riqui ndua ndua chõõnote mbae mo ndese re?

²⁶ Ibi jenda rerecua ja rei eicuã Dios je.

Mbia rerecua ja ñumunua icuã Dios je.

Ñumunua icuã ja eriiri abe je no. Cristo je, sã David i cose no. ²⁷ Eĩ si tuchi mbia rerecua quia ñumunua icuã Jesús je co. Nderiiri turã je co. Herodes. Poncio Pilato. Judíos. Judíos eã abe no. Ũquĩ ja que siqui icuã icuã nguia Jesús je ra. Ndechiirabo raque Jesús. ²⁸ Eĩ ere que ñee cose, eĩ si eicuã nguia ã namo. ²⁹ Echiisaquia echeẽ icuã ndese,

Urererecua. Nandembusiquiche, i tuchi equia ure rĩĩ ã. Urembusiquicheã na, Urererecua. Urembusiquicheã ndecheẽ nenei nenei sacua. ³⁰ Ndequirãcuã embu ure je. Mbia rasi mbucherõ cherõ sacua. Mbia mae sayã naa naa sacua. Jesús rĩĩ. Nderiiri turã ñi, i que Pedro resenda ñee nyecha Dios je ra. ³¹ Ñeende Dios je que ibi nyere ee ra. Ñumunuásaa que ibi nyere mbia je ra. Espiritu Turã ngue ique tuchi echiangui re ra. Esiquicheãte que mbia mbiirandu randu Dios cheẽ ndese cote ra.

Jesús quiato abeichiã eã

³² Hue rĩ ja Jesús icuasa ndua ndua checha. Eicuasa tubiriã. Ndua ndua ja. —Sembae ae chõ co re, i eã emo umbae je. —Nandembaerã ja chõ ã nde, i umbae ja je nyue. ³³ Jesús chi mbaaquiatu que mbia mbiirandu randu tuchi Jesús quera resera. Jesús que uquirãcuã mee mee nguia uchimbaaquiatu je ra. Dios que siqui tuchi erese ra. ³⁴⁻³⁵ Mbae tiã eã ngue eriqui Jesús icuasa mo je ra. Tuchuacha que vender i jaaja uchuchua je ra. Ibicha abe que vender i jaaja umbae ibi je no nda. Mbae isiquia que emee mee Jesús chimbaaquiato je cote ra. Jesús chimbaaquiato que emee mee mbaecha reã ja je cote ra. Nyebe mbae tiã eãte riqui nguia emo je. Jesús quiato mo je. ³⁶ Sã José no. Bernabé, i Jesús chimbaaquiato José je. Mbia mbiasa, i chõ nguia Bernabé i. Ae rei Chipre jenda. Levita mo ngue ae ra. ³⁷ Ae rei ibicha. Ibi umbae je que vender i ra. Mbae isiquia que emee Jesús chimbaaquiato je cote ra.

5

Ananías ñee ñooño

¹ Ananías, i que emo je ra. Safira, i que eninisi je ra. Ũquĩ ngue vender i ibi mo je ra. ² —Mbae isiquia ataque nandembuchimi nandembaerã, i nyue. Eataque que emee Jesús chimbaaquiato je cote ra. Eninisi abe que eicua ja ra. ³ Pedro que ñee Ananías je ra. —¿Mbaerã Satanás ndiqui ique ndechiangui re re? ¿Mbaerã erecheẽ ñooño Espiritu Turã je re? ¿Mbaerã ño mbae isiquia ataque erembuchimi nde? ¿Mbaerã ño ibi ribishoronda erembuchimi

nde? ⁴ ¿Mbaerã ño ere? Ibi rei nembae vender i nonde. Mbae isiquia abe rei nembae. Mbia je rocoĩ erecheẽ ñooñocheĩ nde. Dios je chõ erecheẽ ñooño nguiã, i que Pedro ra. ⁵ Ananías eandu mose que esi ngoi mano nda. Eandusa que siquiche ja ra. ⁶ Acuanĩndu mo ngue ngaẽ eraaque uma nda. Nguruchoi que nyati ra.

⁷ Emo mose jiri que mano je ninisi ru ra. Tres horas. Jiranuãte que ngu rese ra. ⁸ Pedro que ñee ee ra. —¿Manya rei ibi ribishoronda re? ¿Nderu ibi ribishoronda queru ja rei re? i que Pedro ee ra. —Ae. Ũquĩ ja chõ nyeresẽ, ichõiño ngue eninisi Pedro je ra. ⁹ Pedro ñee ee cote. —¿Mbaerã ere? ¿Mbaerã jendua nduachĩ ũquĩ ndese re? Jeñee ñooñocheĩ nguiã Espiritu Turã je. Ae nderu curuchoi nyati nae, ũquĩ nyi nderaarõ arõ a. Eiquesa ji a. A ecuaẽ ndererao sacua a, i que Pedro ee ra. ¹⁰ Pedro cheẽ mose tuchi que esi ngoi mano nda. Ngu rã si. Pedro resa rae mano. Acuanĩndu que ique ja eraaque rea ra. Nguruchoi que nyati ra. Eru atiquia jii que eruruchoi nyati ra. ¹¹ Jesús icuasa que siquiche jate ra. Eandusa abe que siquiche jate no nda.

Mbia mae sayã

¹² Jesús chimbaaquiato que Dios quirãcuã teacuquia cuquia mbia je ra. Mbia mae sayã ngue esaã saã nguia mbia je ra. Milagros, i que ũquĩ je ra. Jesús icuasa que ñumunua nua ja quia eiquesaa ra. Portal de Salomón, i que eiquesa je ra. ¹³ Jesús icuasa riĩ ngue mbia ñee turã ja quia ra. Mbia ataque que siquichete ra. Nyebe ñumunua eã nguiã erese. ¹⁴ Jesús icuasa tubiriãt e que cote ra. Hombres tubiriã. Mujeres abe tubiriã no. ¹⁵ Erasi abe que mbia curuchoi choi quia ñeenda jie ra. Huee que eriqui eno eno ngua ye ra. —Sã Pedro aĩ ño ubi ubi erasi rese, i que mbia ñee Pedro ucua mose ra. ¹⁶ Jerusalén ndurubinda abe que ngaẽ ngaẽ nguia ra. Erasi rurucuaẽ cuaẽ Jerusalén. Aba checuayã nyireco abe que ecurucuaẽ cuaẽ nguia ra. Dios que embucherõ cherõ ja quia ra.

Jesús quiato tarõ policíaa

¹⁷ Sacerdote rerecua que paama i ra. Saduceos mo abe que chi erese ra. Ũquĩ abe que paama i no nda. ¹⁸ Nyebe que Jesús chimbaaquiato isi icuã nda. Tarõ ngue policíaa ra. ¹⁹ Isa que ibatenda mo nguichi ee ra. Angel. Etaronda que embuquiata ra. Jesús chimbaaquiato que equerao itaicuee ra. Ñee nonde ee. ²⁰ —Dios chuchúaa jẽso. Mbia je mbiirandu randu tuchi Dios cheẽ ndese. Dios cheẽ ndei aba mingosa. Aque rese mbia jembiiirandu randu, i que ibatenda Pedro je ra. Juan abe je. ²¹ Jesús chimbaaquiato eandu mose que echoi Dios chuchúaa ra. Mbia mbaaquiato quiato que echoi ra. Isamamimbe cote. Isamamimbe echoi mbia mbaaquiato. Sacerdote rerecua que “jenyu” i mbia rerecua ja je ra. Sacerdote resenda abe. Amei je abe ñee. Ñumunua ja u nyiese. Ñee ngue policíaa raarõsa je cote ra. —Jẽso policíaa. Jesús chimbaaquiato jendu rã ure je, i rei que ee ra. ²² Ecuasẽ mose policíaa que Jesús chimbaaquiato oreã ño ee ra. Ae nyebi chõ ecuaẽ nguiã sacerdote rerecua mbiirandu. Ñee ee. ²³ —Puerta atã ngue chĩ ndei nguiã ure je. Soldados ngue chi rei nguiã itaicuee. Eraarõ ndaque. Ureequia rei ngue re. Eoreã ngue ra. Jesús chimbaaquiato oreãte que ure je ra, i que ra. ²⁴ Sacerdote rerecua que nyuruirã eandu ra. Dios chuchua raarõsa abe nyuruirã eandu. —¿Mañi mañite equia re? i que u ñee ñee nyue ra. ²⁵ Emo ngue tu ñee ee cote ra. —Huee que jenyitarõ nyi Dios chuchúaa ra. Mbia mbaaquiato quiato, i que embiiirandu ra. ²⁶ Eandu mose que Dios chuchua raarõsa nyoĩ erea ra. Nguesenda rese echoi erea. Curucuaẽ ja nguerecua je. Curucuaẽ turã. —Mbia tubiriã nda sita mombo mombochĩ nande je, i ñene. Nyebe eicuã eã ee.

²⁷ Jesús chimbaaquiato que ecurucuaẽ mbia rerecua je ra. Sacerdote rerecua que ñee ee cote ra. ²⁸ —“iMbia ra jembiiirandu randuchĩ Jesús rese jẽ!” ure rei que jẽje. Urecheẽ jemumba chõchĩ. Jerusalén jenda ja jembiiirandu randu chõchĩ nguiã. “Jesús iquiasa chõ ũquĩ nde”, jenyechĩ nda ure riĩ jẽ! i que sacerdote rerecua Jesús chimbaaquiato je ra. ²⁹ Pedro que echeẽ

sibishorõ nda. Nguenda rese echeẽ ndibishorõ. —Dios cheẽ nguia aba mumba aroneate nguia. Mbia cheẽ nguia nda aba mumba jiri nguia ña. ³⁰ Jẽ nguia Jesús jem-bucha nguia ira rese. Eiquia sacua. Dios que embuquera si ra. Nanderu rerecua que embuquera si ra. ³¹ Dios que nguiĩ mingo mbia rerecuarã tuchi cote ra. Ujii bei que emingo ra. Mbia rerecuarã. Mbia rirõ sacua eicua si. Israel jenda mbui sacua huicua si. Dios eicua mbutia sacua esi. ³² Uqui ndese que uremae ja ra. Nyebe ureico nguia mbia mbiirandu randu ã. Espiritu Turã abe mae ja erese. Nyebe a e abe riqui nguia mbia mbiirandu randu co. Dios quia Espiritu Turã mee mee nguia ucheẽ mumbasa reã je, i que Pedro ra.

³³ Ererecua que paama i ja Pedro cheẽ mose ra. Nyebe eriqui nguia eiquia ja serite. ³⁴ Fariseo mo abe que chi erese ra. Gamaliel, i que ee ra. Ae abe que ererecua ra. Mbia chucua jat e que ae ra. Mbia mbaaquiato quiatusa que ae ra. Dios cheẽ nenei neneisa que ae ra. Ae que juã ñee nda. —Jesús chimbaaquiato jemondo mbiirã conosẽ itaicuee, i que ra. ³⁵ Ñee ngue ererecua uataque je cote ra. —Tacheẽ jẽje, Israel jenda. ¡Jendua tuchi jẽ! ¡Jẽocochi nda Jesús chimbaaquiato rese jẽ! ³⁶ ¿Teudas si jêtesarei re? ¿Jendua eãte quia erese re? Teudas quiato ucuasu saã saã nguia resẽ. Erimbarã tubiriãte chee. Cuatro cientos chee erimba. Mbia Teudas iquia chee. Teudas mano nyee. Erimba que saseĩ saseĩ ja chee. Erimba que ua ja ra. ³⁷ Aquere que Judas abe riqui ra. Galilea jenda. Censo mose. Mbia que siqui jate erui no nda. Erimbarã. Ae abe que mano cote ra. Erimba abe que saseĩ saseĩ nda. Erimba que ua ja no nda. ³⁸ Nyebe ã jêteachõ. Jesús chimbaaquiato jêteachõ. Sã ae ae quia ua, Dios siquiã mose erese. ³⁹ Dios quirãcuã siqui mose erese ra nandesiquisã aronea. ¿Mañi nande ra eriquisã nde? ¡Jesús rimba nandeteachõ ño jẽ! Dios quirãcuã nguia siqui rei erese. Dios je ra nandeicua abareãte, i que Gamaliel ra.

⁴⁰ Gamaliel cheẽ ndui si chõ ngue ererecua siqui ja nguia cote. —Jenyu, i nguia Jesús chimbaaquiato je cote. Iruã nua cote. —¡Mbia je ra Jesús cheẽ jêsenei senei sichi

core jẽ! i rei que ee ra. Ererecua que hui esi cote ra. ⁴¹ Jesús chimbaaquiato que nyoĩ mbia rerecua recha cote ra. Eyate que nyoĩ ra. —Jesús rii ño ureiruã nua nguia, i que ra. Eya tuchi chõ ngue ra. ⁴² Mbia que embaaquiato quiato bei ra. Jesucristo rii mbia mbiirandu randu bei. Mbia chuchua que embuchesea sea quia mbia mbiirandu randu Jesús rii nda. Dios chuchúaa abe mbia mbiirandu randu.

6

Mbia siete irabo mbia mbuquiaru sacua

¹ Jesús quiato tubiriãte que cote ra. Ae griego cheẽ saã nguia, uqui ngue paama i ra. Ae judío cheẽ saã nguia, uqui je que paama i ra. Jesús quiato ja raque. —Uresenda eru cheecha ja ngue jem-buquiaru icua icua ñochi nguia, i que griegos judíos je ra. ² Nyebe Jesús quiato rerecua mbia munua nguia. Jesús quiato munua ja. Ñee sacua ee. —Ã ureico Dios cheẽ nenei nenei mbei mbia je ã. Urehui aronea tuchi quiarei Dios cheẽ si. Mbia urembuquiaru quiaru aroneate. Dios cheẽ nenei nenei ndocoĩ. ³ Nyebe Jesús quiato siete chõ jẽirabo. Mbia mbuquiaru sacua. Mbia chucua siete chõ jẽirabo. Hombres aracua chõ jẽirabo. Espiritu Turã ndesenda tuchi chõ jẽirabo. Sã uqui ño mbia mbuquiaru quiaru quia. ⁴ Ure quiato ra urecheẽ mbei quia Dios je. Ure quiato ra Dios cheẽ uresenei senei mbei quia mbia je, i que Jesús quiato rerecua ra. ⁵ —Coche ñene, i jat e que Jesús quiato ra. Nyebe que siete irabo ra. Esteban irabo. Ae rei Jesús quiato tuchi. Ae rei Espiritu Turã ndesenda tuchi. Felipe. Prócoro. Nicanor. Timón. Parmenas. Nocolás. Uqui ja que eirabo ra. Nicolás ndei Antioquia jenda. Judío eã ngue ae ra. ⁶ Curuchoi ja que Jesús quiato rerecua je ra. Jesús quiato rerecua que o chono ñono ja uqui aquĩ arõ nda. Uqui siete aquĩ arõ. Ñee ngue Dios je cote ra. ⁷ Mbia tubiriã ngue Dios cheẽ isi isi quia ra. Jesús quiato tubiriã tuchi que mbia Jerusalén jenda cote ra. Sacerdote tubiriãte abe que Jesús quiato cote ra.

Mbia icua tuchi Esteban je

⁸ Dios que siqui tuchi Esteban ndese ra. Dios quirãcuã ngue siqui tuchi erese ra. Nyebe eriqui nguiã mbia mae sayã naa naa tuchi mbia je. ⁹ Mbia emo emo ngue paama i Esteban je cote ra. Esclavos Libertados, i que mbia chumunuasa mo je ra. Hue jenda que paama i ee ra. Cirene jenda abe no. Alejandría jenda abe no. Cilicia jenda abe no. Asia jenda abe no. Ñquĩ jate que paama i Esteban je ra. ¹⁰ Ñquĩ ngue Esteban ñee sobeishĩ aroneate quia ra. Espiritu Turã nguia Esteban mbaaracuate nguia. Espiritu Turã nguia Esteban mbuch eẽ aquiatute nguia. Nyebe ñquĩ ndiqui Esteban ñee ndibishorõ aroneate. ¹¹ Paama isa que mbae isiquia mee mbia mo je ra. Ñee ñooño nonde Esteban ñii. —Esteban ngue ñee icuãte Moisés rĩ nda. Esteban ngue ñee icuãte Dios rĩ no nda, ichõiño nonde Esteban ñii. ¹² Ñee ñooño je que mbia mbicuãte Esteban je ra. Amei abe mbicuãte Esteban je no. Embesasa abe mbicuãte Esteban je no. Nyebe mbia Esteban isi suruchoi nguia ererecua je. ¹³ Ñee ñooño je que ñee icuã si Esteban ñii huee no nda. —¡Esteban ngue ñee icuã icuãte quia Dios chuchua rĩ nda jẽ! ¡Dios cheẽ ñii abe que Esteban ndiqui ñee icuã icuãte ra jẽ! ichõiño Esteban ñii. ¹⁴ —¡Esteban ñee ngue urechandu ra jẽ! “Jesús ra Dios chuchua mbucoi. Moisés cheẽ nda Jesús mbutiã”, i que Esteban nda jẽ! i que ñee ñooño ererecua je ra. ¹⁵ Mbia que mae ja u Esteban ndese cote ra. Ererecua abe que mae ja u erese ra. Ibatenda nduba rã tuchi quiarei Esteban. Eruba nininya tuchi quiarei ñquĩ mose.

7

Esteban ñee mbia je

¹ Sacerdote rerecua que ñee Esteban je cote ra. —¿Mbia ñee ñooño nguia nderiĩ nde? i Esteban je. ² Esteban ngue ñee oco ee cote ra. —Tacheẽ jẽje, Seresenda. Tacheẽ jẽje, Amei. Dios Turã ngue nyecua u nanderu Abraham je ra. Abraham siqui mose Mesopotamia. Oso nonde Harán. ³ Dios que ñee Abraham je ra. “Ibi mo nguia eso. Nderecua esecha. Nderesenda abe esecha

ja. Ibi mo tateacuquia ndeje. Huee eso rã. Huee quia tereico”, i que Dios ee ra. ⁴ Abraham ngue oso nguecua recha ja ra. Ibi Caldea recha ja. Oso ibi mo. Harán, i que hue ibi je ra. Emo mose que eru mano ee ra. Aquere que Dios Abraham ndurucuaẽ aa ra. A nandeico a. Aa que erurucuaẽ nda. ⁵ Dios que ibi mo mee eã Abraham je ra. Ibi boque ñetẽ mo mee eã tuchi ee. “Ibi tamondo nderiirĩ mbaerã. Ndetiã mose ra amee nderiirĩ je”, i que Dios ee ra. Abraham nguiirĩ ndea eã mose qu e Dios ñee ee ra. ⁶ “Nderiirĩ nda siqui ja rei mbiamo ndese. Ndetiãmbaa. Mbiamo ndécuaa ra eriqui bei. Mbia icuã tuchi ra eriqui nderiirĩ je. Mbia rimbarã nda nderiirĩ. Cuatro cientos años nda eriqui mbia rimbarã”, i que Dios Abraham je ra. ⁷ “Nderiirĩ mbuquieĩ quieisa ra ambasi mbasi. Ñquĩ mos e ra nderiirĩ cuaẽ usẽ aa. Aa ra ñee ñee turã seje aa cote”, i que Dios ra. ⁸ Dios que ñee Abraham je ra. Abraham ngue Dios cheẽ ñanduchõ eã nda. Nyebe Dios circuncisión ndeacuquia Abraham je cote. Erãcoĩ ire ai o ji je chõ eriqui nguia circuncisión, i ñquĩ je. Dios cheẽ si embutesareiã sacua ndei circuncisión. Nyebe Abraham circuncisión saã nguiirĩ je. Eitãquieĩ mose. Ocho días mose. Isaac, i que eriirĩ je ra. Isaac cuasu mose que ae abenguiirĩ tea ra. Jacob, i que eriirĩ je ra. Isaac abe que circuncisión saã nguiirĩ je no nda. Embutesareiã sacua Dios cheẽ si. Jacob abe que nguiirĩ tea ecuas mose ra. Ae abe que circuncisión saã nguiirĩ je no nda. Doce eriirĩ. Ñquĩ ndei nandei cose.

⁹ José, i que Jacob riirĩ mo je ra. José nongue que paama i ja José je ra. Nyebe José mee nguia mbia rimbarã cote. Mbia que José isi suruchoi Egíptoo ra. Huee ab e que Dios riqui tuchi José rese ra. ¹⁰ Mbia icuã mose José je, huee que Dios riqui eraarõ tuchi ra. José ia eã eãte que eriqui ra. Dios embaaracua tuchi. Nyebe mbia rerecua turãte riqui nguia ee. Faraón, i Egipto jenda rerecua je. Ererecuabi tuchi que José riqui ra. Nyebe emingo nguia ererecuarã. Egipto jenda rerecuarã. Nyebe emingo nguia uchuchua jenda rerecuarã. ¹¹ Emo mose jiri que mbae tiã mbia je ra.

Mbia chiurã tiã ngue Egíptoo ra. Canaán abe mbia chiurã tiã. Nandei riãcuã ja que eriqui cose ra. ¹² Quiata a mbuae que Egíptoo ra. Jacob jirandu mose que nguiirĩ mondochoi erea ra. “Nandechiurã mo jëisi rã oso”, i que emondochoi Egíptoo ra. Aque ramo tuchi que eririĩ nyoĩ Egíptoo ra. Jacob ndiirĩ ndei nandei ja. ¹³ Aquere que echoi si uchiurã ndea ra. Aque mose chõ ngue José nyecua nguiã ngõngue je cote ra. Nyeb e Faraón José nongue icua nguiã cote. ¹⁴ José que ngõngue mondochoi ngu rea cote ra. Jacob, i que eru je ra. “Nanderu jendu rã. Jeninisi abe jendu rã. Jendiirĩ abe jendu rã”, i que José ee ra. Curucuaẽ ja que ra. Setenta y cinco que mbia ra. ¹⁵ Eĩ ngue Jacob oso siri Egíptoo ra. Huee que eriqui bei ra. Mano nyee. Nandei ja abe que chi bei huee ra. Mano nyee. ¹⁶ Emo mose que mbia Jacob quiangue ruruchoi Siquem nda. Ibicua rie que eno huee ra. Ae Abraham isi ibi nyii, huee que equiangue no nda. Huee que nandei quiangue no nda. Ae ibi Abraham isi quia Hanor ndiirĩ si nae, huee que equiangue no nda.

¹⁷ “Cuatro cientos años nda nderiirĩ nyi bei Egíptoo. Aquere Ibi Canaán tamee ee”, i quia Dios Abraham je nyii reaẽ. Cuatro cientos años ua jiri mose que nandei tubiriãte cote ra. ¹⁸⁻¹⁹ Aque mose que emo Egipto jenda rerecua rã cote ra. Ae que jiranuã José rese ra. Nyebe ngue eriqui nguiã nandei mbiirĩ irĩ. Eicuã tuchi que eriqui nandei je ra. “Jendiirĩ itãquieĩ jësecha chõ. Sã ae ae mano ja”, i que ererecua nandei je ra. ²⁰ Aque mose que Moisés nyaacuquia ra. Diosbi tuchi que Moisés ra. Nyaacuquia ramo mose. Tres nyasi que esi embutiarõ nyecuayã nda. Mbia rerecua si. Eru abe siqui embutiarõ nyecuayã. Eitãquieĩ mose. ²¹ Nguereco checuayã aroneate chee que ra. Nyebe ererecua riirĩ ngasẽ nguiã ee. Isi turã ngue ra. Mbutiarõ ngue nguiirina nda. Nyucuaaque que ererecua riirĩ nda. Ae que Moisés itãquieĩ mbutiarõ cote ra. ²² Nyebe Moisés mbaaquiatu tuchi nguiã Egipto jenda rã si. Earacua tuchi que ecuasu mose cote ra. I tuchi que ra.

²³ Moisés que ndua tuchi uataque rese

cote ra. “Taso rã israelitas rea”, i que cuarenta años mose cote ra. ²⁴ Oso que cote ra. Egipto jenda mo icuã icuã mose israelita mo je que Moisés si ngasẽ nda. Moisés que esiquisã nda. Iquia que ra. Egipto jenda iquia que ra. ²⁵ Moisés que ñee uchiangui re ra. “Sere senda ra seisi turã. Seicuate rae. ‘Dios chimbu chõ tu nguiã co. Urerirõ sacua a si’, i ra seresenda serĩ”, i rei ngue Moisés uchiangui re re. Eresenda que eisiã ñochĩ nguiã. ²⁶ Isamami nongue que israelitas mo icuã icuã nyue ra. “Tacheẽ turã ee. I nda eturã si nyue”, i rei que Moisés ra. “¿Mbaerã jëicuã icuã ndiqui jenyue re? Nande ja chõ nyeresẽ”, i que Moisés ee cote ra. ²⁷ Ae rane eicuã icuã ndiqui nyue nae, aque que ñee icuã Moisés je ra. Moisés maña mondo. “¿Aba nemingo ererecuarã nde? Urereachõ ño ae”, i que ñee icuã Moisés je ra. ²⁸ “Ae ereiquia curi, ¿aque rã si ra seiquia re?” i que ñee icuã Moisés je ra. ²⁹ Ñ andu mose que Moisés si uchã nda. Ibimo. Madián, i que ibimo je ra. Huee que eriqui arete ra. Nguiirĩ nyeremo ngue etea huee ra.

³⁰ Huee que eriqui arete ra. Cuarenta años. Emo mose que esi turuquia rĩ nda. Ibi ibate jii que eriqui ra. Sinaí, i que hue je ra. Huee que ira ruri riqui sendi ee ra. Tata rendi mbirõ ngue ibatenda mo nyecua ee ra. Angel que nyecua Moisés je ra. Ira ruri rendi ite re que nyecua ee ra. ³¹ Moisés que nyuruira tuchi erea ra. Erurubi que mae tuchi erese cote ra. Dios que ñee ee cote ra. ³² “Dios chõ se re. Ndei rerecua chõ se re. Abraham nderecua. Isaac abe rerecua no. Jacob abe rerecua no. Uquĩ nderecua ja chõ se re”, i que Dios ra. Moisés que titi titi i ra. Siquichete que mae ndocoi erese ra. ³³ Dios que ñeembe ee ra. “Ndeiyao esirõ na. Seturã ño se re. Sésaa ndeiyao esirõ. ³⁴ Serimba rese aico mae mae mbeite Egíptoo co. Mbia icuã tuchite ee. Mbia embasi mbasi beite. Amae mae mbeite que erese ra. Echeseo seo rese que aico mae mbei ra. A achu erirõ sacua a. Tasirõ eicuã si cote. Eso Egíptoo. Taremondo Egipto cote”, i que Dios Moisés je cote ra.

³⁵ Dios que Moisés mingo mbia rerecuarã cote ra. Mbia rirõ sacua Egipto si.

Mbae icuã si. Mbia que Moisés isi sereã nea nyii ra. “¿Aba nemingo urererecuarã nde?” i que mbia Moisé je nyii ra. Ñquĩ sí je que Dios Moisés mondo si ra. Ererecuarã. Dios que tata rendi ite renda mbucheẽ Moisés je ra. ³⁶ Moisés que mbia mae sayã saã saã nguia nandei je ra. Mbia mae sayã tubiriãte que esaã saã nguia ra. Moisés que mbia curuchoi Egipto si cote ra. Curuchoi que Ama Irei ndasa ra. Moisés que mbia quereco bei turuquia rui ra. Cuarenta años. Mbia mae sayã tubi riãte que esaã saã nguia ra. ³⁷ Amei mose que Moisés ñee mbia je ra. “Dios ra jemo irabo ucheẽ mbuchecua sacuaã jêje. Seraanguia si ra eirabo. ¡Aque cheẽ nda jemumbachĩ jê!” i que Moisés israelitas je ra. ³⁸ Moisés bei chõ ngue ererecua ra. Moisés bei chõ ngue nandei quereco quia turuquia rĩ ndesẽ. Ae je chõ ngue ángel ñee ndesẽ. Mbia chumunua mose Ibi Ibate Sinaí. Ibatenda mo ngue ñee ñee u Moisés je ra. Moisés que ñee ñee nandei je cote ra. Ibatenda cheẽ mbuchecua ee. Mbia mingosa cheẽ nenei nenei mbia je. Nandei je. ³⁹ Nandei que Moisés cheẽ ñandu sereãte quia ra. Echeẽ mumba mumba. “Nyaso rei nyebi Egipto ae”, i que equia ra. ⁴⁰ Nandei que ñee ñee Aarón je ra. Moisés cutiã ngue ñee ñee ee ra. “Mbae raanguia mo esaã jiri ure je ae. Imagen. Urererecuarã. Ae je nda ureico ñee ñee jiri chã. Ae nda urererao Egíptoo chã. Moisés tiãte ure je cote. Ae urereru Egipto si. Maranguiti chõ esi urerecha”, i que mbia Aarón je ra. ⁴¹ Nyebe que Aarón ticuasú raanguia raã ee ra. Imagen. Nandei que mbae iquia iquia ticuasú raanguia je ra. Eroo que emi ticuasú raanguia jii ra. Mendi que ee cote ra. Mbia ia tuchi que uchiao rese cote ra. ⁴² Ñquĩ icuã tuchi que Dios je ra. Nyebe Dios hui nguia nandei si cote. Nandererecua, i chõchĩ mbia tenda je cote. Nyasi je abe no. Nyasi tata je abe no. Ñquĩ je chõ mbia riquichĩ ñee ñee. Ñquĩ mose que Dios ucheẽ mbu cote ra. Dios cheẽ mbuchecua que Dios cheẽ senei senei mbia je ra. Co rei embesa ji co:

Israelitas, ¿aba je jẽingo mbae roo mendi mendi cose re?

Jẽingo mose turuquia cuarenta años mose.

¿Seje chõ jẽingo mbae roo mendi mendi cose re?

⁴³ Tei. Seje eã ñene.

Jenyiao je chõ jẽingo mbae roo mendi resẽ.

Tuchua ñetẽ jendaso raso bei chõchĩ.

Mbae aingue raanguia resebe. Moloc, i ee.

Aque je chõ jẽingochĩ nguia ñee ñee.

Seje ñee ñee ndocoĩ.

Nyasi tata je abe jẽingochĩ nguia ñee ñee.

Nyasi tata rei Refán mbae.

Mbae raanguia jenyiao je abete que jẽingo ñee ñee nda.

Nyebe ra jaemondo jembae ibi si.

Babilonia ndobei ra jaemondo.

Mbia rimbarã nda jaemondo,

i que Dios nandei je cose ra. ⁴⁴ Nandei

que chi arete turúquiaa ra. Aque mos e que

nandei riqui tuchua rurucuata bei cose

ra. Mbae ire que tucharã cose ra. Aque

tuchuaqui re que mbia riqui ndua ndua

Dios rese ra. Dios que tuchua nyao uquia

Moisés je ra. “¡Eĩ ere chõ eao jê!” i que

Dios Moisés je ra. Dios cheẽ ndui si tuchi

que Moisés eao ra. ⁴⁵ Moisés manonde

que Josué nandei rerecua cote ra. Ae que

nandei curuchoi turuquia si cote ra. Ngasẽ

nonde ibi mo je. Dios chimee, hue ibi je

que ngasẽ cote ra. Nandei que guerra saã

saã hue jenda je ra. Dios que mbia mombo

ja hue jenda ra. Aque mose que nandei

riqui tuchua ruruchoi bei ra. Tuchua, i

chõ nguia mbae ire ao ji je. Aque tuchua

que equereco bei quia ra. David abe mbia

rerecua mose. ⁴⁶ Dios que siqui tuchi David

rese ra. David que ñee ee ra. “Tuchua

cuasú tasaã ndeje”, i rei ngue David Dios

je re. Jacob nderecua rei Dios. ⁴⁷ David

ndiirĩ nguia tu que tuchua saã Dios je ra.

Salomón, i que eriirĩ je ra. ⁴⁸ Mbia rã eã

ndei Dios. Dios siquiã tuchi chõ nguia

tuchuaqui re. Mbia chiaoqui re. Dios cheẽ

mbuchecua que Dios cheẽ saã nda:

⁴⁹ Se quia ererecua tuchi re.

Ibatenda rerecua abe rei se.

Ibi jenda rerecua abe rei se no.

¿Mañi nda mbia sechucharã ao re?

Equi re ra aicoã ndesẽ.

⁵⁰ Se quiatu que mbae achao ja resẽ,

i que Dios nandei je ra. ⁵¹ Jeñia icuã ñochĩ.

Jẽisayã ñochĩ. Espiritu Turã jẽisiteã teã ñochĩ.

Jendu rã si chõ Espíritu Turã jëisiteã teã ñochĩ. ⁵²Jendu icuã bei que eriqui Dios cheẽ mbuchecuasa ja je ra. Jendu que Dios cheẽ mbuchecuasa iquia iquia bei quia ra. Ibatenda Turã nda tu, ae i quia cose nae, ùquĩ abe que jendu iquia iquia quia cose resẽ. Ibatenda Turã tu mose que jemee ñochĩ nguiã mbia icuã je ra. Eiquia nonde que jemee ñochĩ nguiã mbia icuã je. ⁵³Dios que ángeles mbu rei jêje ra. Ucheẽ nderu raque jêje. Jẽ echeẽ mumbayã sacuã. Echeẽ ngue jemumba mumba bei chõchĩ nguiã, i que Esteban ñee oco tuchi ee ra.

Mbia Esteban iquia sita je

⁵⁴Eandusa que paama i tuchi Esteban je ra. Esteban i quia serĩ. ⁵⁵Espíritu Turã ngue siqui tuchi Esteban ndese ra. Esteban ngue mae tuchi ibei rese mbia paama i mose ee ra. Dios Turã ndese que mae ibate ra. Jesús rese abe que mae nda. Jesús que chĩ juã Dios ji ee ra. ⁵⁶Esteban ngue ñee nda. —Jemae jẽ. Ibei nyiequia rese aĩ mae a. Huee mbia rucucha ñi juã Dios ji huee. Huee Jesús ñi juã Dios ji huee, i que Esteban nda. ⁵⁷Mbia que tasẽ tasẽ tuchi paama i ra. Huisacua que emitao ja Esteban ñee si ra. —Nandecua recua erese, i que o oe Esteban ndese ra. ⁵⁸Mbia que Esteban curuchoi sucha tubiriã si ra. Huee que sita mombo mombo erese ra. Sita mombo mombosa que huĩrao mbui mbui acuanindu mo je ra. —Esaarõ, i que ee ra. Saulo, i que eieirao raarõsa je ra. ⁵⁹Mbia que sita mombo mombo Esteban ndese ra. Sita mombo mombo mose que Esteban ñee Ibatenda je ra. —Aque aso quia ndeje aque, Sererecua Jesús. Seisi cote, i que Esteban Ibatenda je ra. ⁶⁰Ngoi que nguiã ndese cote ra. Tasẽ tasẽte que ñee mombo mombo ra. —Sererecua, ã icuã ndaque seje. ¡Erembasi mbasichĩ nda huĩcuã ñi jê! i que Esteban Jesús je ra. Esteban ngue mano cote ra.

8

Saulo icuã Jesús quiato je

¹—Coche rei mano, i que Saulo Esteban mano mose ra. Aque mose tuchi que mbia icuã icuã tuchi Jesús quiato je cote ra. Jerusalén jenda. Jesús quiato

que nyoĩ ja ñimbuchao Judea rĩ nda. Samaria rĩ abe que echoĩ ñimbuchao ra. Jesús chimbaaquiato achõ ngue chichõ Jerusalén nda. ²Mbia turã mo ngue Esteban nyati ra. Nyeseo tuchi que eati mose ra. ³Saulo icuã tuchi que eriqui Jesús quiato je ra. —Jesús quiato tambutiã, i tuchi que Saulo quia ra. Nyebe eriqui nguiã mbia chuchua mbuchesea seate. Jesús quiato rea rea ererao sacuã tarõ policíaa. Saulo icuã tuchi que eriqui Jesús quiato je ra.

Samaria jenda Dios cheẽ ñandu

⁴Ae uchã nyoĩ quia Jerusalén si nae, ùquĩ ngue nyoĩ mbia mbiirandu randu tuchi quia Jesús rĩ nda. Mbia recua ja que eriqui nyoĩ nyoĩ mbia mbiirandu randu Jesús rĩ nda. ⁵Felipe que oso Samáriaa ra. Sucha tubiriã mo. Huee que eriqui mbia mbiirandu randu Jesús rĩ no nda. ⁶Dios que Felipe mbuquirãcuã nda. Mbia mae sayã ngue esaã saã nda. Mbia tubiriã ngue nyiisaquia tuchi quia echeẽ ndese ra. ⁷Aba checuayã icuã ngue Felipe jea jea tuchi mbia si ra. Aba checuayã icuã ngue tasẽ tasẽ nguia hui mose mbia si ra. Felipe que mbia cuatayã mbucuata ja quia ra. Mbia umi sayã abe que embucherõ cherõ nguia ra. ⁸Nyebe hue jenda ia tuchi sucha tubiriã jenda.

⁹Huee sucha tubiriã ngue Simón ndiqui ra. Brujo que ae nyii ra. Ae que mbia mbĩrĩ irĩ tuchi quia nyii ra. Mbia Samaria jenda chĩcua tuchi que ae ra. ¹⁰Mbia que nyiisaquia tuchi quia Simón ñee ndese cose ra. Mbia riirĩ abe que nyiisaquia quia echeẽ ndese ra. —Dios embuquirãcuã tuchi quia co, i rei que mbia Simón ñi nda. ¹¹Simón ngue mbia mbĩrĩ irĩ tuchi quia brujería je ra. Nyebe que mbia riqui nyiisaquia tuchi eres e nyii ra. ¹²Huee que Felipe Jesús renei nenei tuchi cote ra. —Dios ra mbia rerecuarã tuchi, i que Felipe quia hue jenda je ra. Ùquĩ mose que mbia Jesús icua icua tuchi ra. Bautizar i que mbia atate je ra. ¹³Simón Brujo abe que Jesús icua cote ra. Bautizar i que ee ra. Felipe rui bei que eriqui cote ra. Felipe que mbia mae sayã

saã saã nguia ra. Simón ngue nyuruira tuchi quia mae erese ra.

¹⁴—Samaria jenda riqui Dios cheẽ isi isi tuchi ã, i que mbia Jerusalén jenda mbi-irandu randu ra. Nyebe que Jerusalén jenda Pedro mondochoi Samáriaa ra. Juan abe mondo. ¹⁵Ngasẽ mose que ñee Dios je ra. —Espíritu Turã emondo rã Jesús quiato a jenda je, i que Dios je ra. ¹⁶Espíritu Turã iqueã mose hue jenda chiangui re que Pedro choi erea ra. Jesús rimbarã ño ngue mbia bautizar i nguã ee nyii. Espiritu Turã iqueã ño nguia echiangui re nyii reaẽ. ¹⁷Pedro que o chono Jesús quiato ãquĩ arõ nda. Juan ab e o chono earõ. Espiritu Turã ngue tu Jesús quiato je cote ra. ¹⁸Simón ngue mae erese ra. O chono mose earõ. Espiritu Turã tu mose ee. Nyebe que mbae isiquia reacuquia Pedro je ra. Juan abe je. ¹⁹Ñee ngue ee ra. —Sembaaquiatu se abe. Ndequirãcuã embu seje. Sã se abe seo tachono ñono mbia arõ. Sã se abe Espiritu Turã quirãcuã tamee mee mbia je. Mbae isiquia tamee jêje jêquirãcuã ndibishorõ, i rei que Simón nda. ²⁰Pedro que ñee asi ee ra. —Sã mbae isiquia nembae quiachã ja. Nde abe equiachã tuchi. ¡Dios ra uquirãcuã mee eã mbae isiquia ribishorõ jê! ²¹Ndeturã eã ñochĩ ndechiangui re. Nyebe ra Dios uquirãcuã mee eã ndeje. ²²¡Ndeicuã si ehui rã jê! Echeẽ ñee Dios je. Sã Dios nendua icuã mbutiã ndesi. ²³¡sã ndeicuã tuchi riqui ndechiangui re jê! Ndeicuã aicuate quia co, i que Pedro ee ra. ²⁴Simón ngue ñee Pedro je cote ra. —Echeẽ turã Dios je serĩ. Sã Dios seicuã mbutiã. ¡ nda aquiachãyã esi, i que Simón nda.

²⁵Pedro que Dios cheẽ senei senei nguia ra. Juan abe esenei senei no. Aquere que echoi nyebi Jerusalén nda. Ñeend a cua jenda que embuchesea sea sucha tubiriã nda. Samaria jenda mbuchesea sea Jesús renei nenei mbia je.

Carro yenda Dios cheẽ ñandu

²⁶Angel mo ngue tu Felipe je ra. Ibate si que eru nguichi ñee ee ra. —Eso chõ turúquiaa. Eso chõ ñeenda icoĩ Jerusalén icha. Gaza icha abe, i que ibatenda Felipe je ra. ²⁷Felipe que oso Dios cheẽ nguire ra.

Echia o ji mo ngue esobeishĩ ñeenda cúaa ra. Etiopía jenda rei echia o ji. Ae rei ererecua resenda. Candace, i que ererecua je ra. Reina. Mbae isiquia Candace mbae que esaarõ arõ tuchi quia ee ra. Echia o ji oso quiatu quia Jerusalén nyii reaẽ. Oso quia equia Jerusalén ñee ñee sacuã Dios je nyii reaẽ. ²⁸Uba que u quia uchuchua quti cote ra. Carro ye que eru quia cote ra. Isaías chimbesea rese que eru quia mae mae carro ye ra. Dios cheẽ. ²⁹Espiritu Turã ngue ñee Felipe je ra. —Eso rã carro jii, i que ee ra. ³⁰Felipe que oso ra. Oso que Etiopía jenda andu ra. Isaías chimbesea rese que esi quia maemae nda. Nyebe Felipe ñee ee. —¿Isaías chimbesea checuate eriqui ndeje re? i que Felipe ee ra. ³¹—Tei. ¿Mañi ae ra eicua re? Aba mo eicuayãte seje resẽ. Echui rã. Etoi seji. Sembaaquiatu rã se, i que carro yenda ee ra. ³²¿Isaías chimbesea rese que eriqui mae mae nda. ¿Ñeide eã: Nanderiquicharõsa rei oveja rã. Mbia que oveja querao eiquiãsaa ra. Mbia que ovejara nyisia sia ra. Oveja ñee ñeeã ee.

Eĩ ngue nanderiquicharõsa ñee ñeeã huiiquia mose ra.

³³Nanderiquicharõsa turãte raque.

Mbia icuã tuchi ee. Mbia eiquiachõ.

Emosenda icuã tuchite ee.

Emosenda eiquia chee.

Nanderiquicharõsa siquã ibi rĩ cote,

i qu e Isaías embesa ra. Embesa ji rese que

Etiopía jenda riqui mae mae nda. ³⁴Etiopía

jenda que ñee Felipe je ra. —Embesea ji

embuchecua seje. ¿Aba rĩ Isaías riqui em-

besea mbesea re? ¿Mbiamo nĩ eriqui embesea

re? ¿Ngũĩ eriqui embesea re no? i que

Felipe je ra. ³⁵Felipe que embuchecua ee

ra. Mbaaquiatu tuchi que Jesús rĩ cote ra.

³⁶Carro que ngasẽ ama moo cote ra. —¡Co

ama ñi co! ¿Aa ra bautizar ere seje re? i

que Etiopía jenda Felipe je ra. ³⁷—¿Jesús

ereicua quia cote re? Jesús icua tuchi mose

ra bautizar ae ndeje cote, i que Felipe ee ra.

Etiopía jenda ñee ee cote. —Jesús aicuate

quia co cote. Jesucristo rei Dios ndiirĩ.

Aicua sequia co cote, i que ra. ³⁸Carro que

embutiba cote ra. Nguichi que esi ra. Ama

ndie que echoi ra. Felipe que bautizar i ee

cote ra. ³⁹ Usẽ ngue ama si cote ra. Espíritu Turã ngue Felipe querao hue si cote ra. Etiopía jenda que mae eã mbei Felipe rese cote ra. Etiopía jenda ia tuchi que oso ra. ⁴⁰ Felipe que ngasẽ Azótoo ra. Sucha tubiriã ngue embuchesea sea ra. Mbia mbiirandu randu tuchi Jesús cheẽ ndese. Ngasẽ nyee que Cesarea ra.

9

Saulo uba ramo Dios icha rui

¹ Saulo icuã mbei que eriqui Jesús quiato je ra. Taiquia ja, i rei que equia ra. Nyebe que esi ñee sacerdote rerecua je ra. ² —Papel embesa rã sechiraorã. Tarao Damáscoo. Judíos chumunua mose ereacuquia sacua ee. Jesús quiat o hue jenda taru taru Jerusalén. Ecuasa taru taru quia etarõ sacua policíaa. Mujeres abe taru. Hombres abe taru taru no, i rei que Saulo ñee icuã Jesús quiato ríi nda. ³ Damasco rurubi mose que tata mo tu tuchi ee ra. Tata mo ngue tu tuchi ee ibate si ra. Tata que Saulo tesae tuchi ra. ⁴ Saulo que ngoi oso íbii ra. Echeẽ mo ngue echandu ra. —¿Mbaerã ndeicuãte riqui seje re? i que ibatenda ñee ee ra. ⁵ Saulo que ñee ee ra. —¿Aba nde re? i ee. Ibatenda que ñee ee ra. —Jesús rei se. Seje quia ndeicuãte riquichí nguiã. Ndeicuã mose seje, nde sí chõ ereico ñimbasi co. Sã ticuas riqui nambacua mbuti no. Sã eriqui hui mbaba ira racua echí no. Ñquĩ na tuchi quiarei nde, i que Jesús ee ra. ⁶ Saulo que titi titi i eandu ra. —¿Mañi ae ra sequia se re, Sererecua? i que Saulo Jesús je ra. —Ehuã. Eso sucha tubiriã. Huee ra sequiato mo secheẽ nenei ndeje, i que Jesús Saulo je ra. ⁷ Saulo resend a que siquiche tuchi ra. Echeẽ andu mose. Mbia mo ndese que maeã nda. Nyebe siquichete echeẽ andu. ⁸ Saulo que juã ndei nguesa ira ra. Emae sayã tuchi. Eresayã ngue ra. Nyebe que mbia eo isi suruchoi sucha tubiriã nda. Sucha tubiriã Damáscoo. ⁹ Tres días que eresayã tuchi riqui ra. Aque mose que eresayã mbae mo uãte ra. Aque mose que yu eã no nda.

¹⁰ Huee sucha tubiriã ngue Jesús quiato mo ndiqui ra. Ananías, i que ee ra. Aque

nda Dios tea cuu ra. —Ananías, i nda Dios eque re ra. —¿Mbae? i nda Ananías e e ra. ¹¹ —Eso rã Ñeenda Chaa Chaareã. Huee que Judas chuchua ñi nda. Huee eso Saulo rea. Saulo rei Tarso jenda. Hue eriqui ñee ñee seje hue. ¹² Saulo que nderea cuu ra. Ereso que ndeo no erese cuu ra. Eresa que erembucherõ cuu ra. Ñquĩ sí esaã oso ee, i nda Dios Ananías je ra. ¹³ Ananías que teã ndei ra. —Mbia Saulo icuã icua tuchi quia co, Dios. Eicuã tuchi Jesús quiato Jerusalén jenda je. Mbia sembiirandu ja quia co, Dios. ¹⁴ A eru Jesús quiato isi ererao sacua a. Ñquĩ je chõ sacerdote rerecua embu nguiã a. Uretarõ ja sacua, i que Ananías Dios je ra. Esiquichete que Saulo si ra. ¹⁵ Dios que ñee ee ra. —Eso chõ erea. Ae quia airabo mingo serimbarã co. Ae ra Israel jenda mbiirandu randu secheẽ ndese. Ae ra mbia mangue choñoa jenda abe mbiirandu randu secheẽ ndese no. Ae ra mbiamo nderecua abe mbiirandu randu secheẽ ndese no. ¹⁶ Saulo secheẽ nenei nenei mose ra mbia embasi mbasi tuchi. Mbia icuã icuã tuchi ra ee serí mambi. Ñquĩ ndese Saulo tambiiirandu, i que Dios ra. ¹⁷ Ananías que oso cote ra. Dios cheẽ nguire. Ique que Judas chuchúaa ra. O que echono Saulo rese ra. —Seresenda ereico co cote, Saulo. Jesús que nyecua ndeje ñeenda cúaa, ae sí sembu quia ndeje co. Jesús sembu ndeje co. Espíritu Turã ique sacua ndechiangui re. Nemaie sacua abe sembu co no, i que Ananías Saulo je ra. ¹⁸ Aque mose tuchi que sira quishí naanguia tu ngoi eresa si ra. Saulo que mae turã cote ra. Jesús quiato que bautizar i Saulo je cote ra. ¹⁹ Saulo que quiaru ñimbuquirãcuã cote ra. Itõ mocoí jiri que Jesús quiato rese huee ra. Damasco jenda rese itõ mocoí.

Saulo Dios cheẽ nenei namo

²⁰ Saulo que oso oso quia Jesús renei nenei judíos chumunuásaa ra. —Jesús rei Dios riri, i tuchi que equia mbia je ra. ²¹ Mbia que nyuruira tuchi quia echeẽ andu ra. —Co chõ Jesús quiato iquia iquia quia cose nye. Jerusalén jenda. Co chõ tu a Jesús quiato rerao sacua nye. Co chõ Jesús quiato queraose rete quia sacerdote

rerecua je nye. Ae Jesús quiato riqui quia namo co cote, i que mbia nyuruira Saulo rea ra. ²² Saulo quirãcuã tuchi que eriqui cote ra. Ererecua rã ño eriqui nguiã mbia mbaaquiato quiato Jesús rĩĩ. —Jesús rei Cristo. Ae jësaarõ arõ nguia, aque rei Jesús, i tuchi que Saulo quia judíos je ra. Judíos Damasco jenda que Saulo cheẽ sibishorõ aronea nda.

Saulo uchã judíos si

²³ Emo mose jiri que judío rerecua ñee nyue ra. —¡Saulo nandeiquia jê! i rei que ñee nyue ra. ²⁴ Mbia mo ngue Saulo mbiirandu ra. —Nandeiquia, i nda mbia nderĩĩ nda. Hue echĩ nyiquitirõ nderese eiquésaa hue. Isa abe echĩ nyiquitirõ nderese hue, i que embiirandu ra. ²⁵ Itondaru mose que Jesús quiato mo Saulo mbuchemi nda. Nyuchã ngue iru ye ra. Iru resebe que embuquichi mondo etaronda robei ra. Muralla robei.

Saulo siquibe Jerusalén Jesús quiato ramo mose

²⁶ Saulo que oso Jerusalén cote ra. —Taico Jesús quiato rese, i rei que ngasẽ nda. Jesús quiato que siquiche ja esi ra. —Saulo Jesús quiato saã saã ño nguiã nande je co, i rei que mbia ra. Nyebe siquiche rei nguiã esi. ²⁷ Bernabé mĩĩ ngue Saulo isi turã nda. Ae que Saulo querao Jesús quiato rerecua je ra. Embiirandu tuchi Saulo rese. —Saulo que oso rei Damáscoo ra. Nandererecua Jesús que nyecua ee ñeenda cúaa ra. Jesús que ñee ee ra. Saulo que siqui Jesús rui cote ra. Saulo que siquicheã nguia Jesús renei nenei Damasco jenda je cote ra, i que Bernabé uataque je ra. ²⁸ Aquere que Jesús quiato Saulo isi turã cote ra. Saulo que siqui are jiri Jerusalén cote ra. Hue jenda Jesús quiato rese que eriqui tuchi ra. ²⁹ Saulo siquicheã ngue eriqui Jesús renei nenei mbia je ra. Ae griego cheẽ saã saã nguia nae, ũquĩ je abe que erenei nenei nda. Ñee asi asi que Saulo je Jesús rĩĩ nda. Saulo abe que ñee tuchi ee Jesús rĩĩ nda. Nyebe mbia riqui nguiã “nandeiquia” i Saulo rĩĩ. ³⁰ Jesús quiato que jirandu erese ra. Nyebe Saulo ruruchoi nguiã Cesarea. Mondo que echuchúaa sí cote ra. Tarso, i que Saulo chuchua je ra. ³¹ Aquere que mbia icuã icuã eã Jesús quiato je cote

ra. Judea jenda je. Galilea jenda abe je. Samaria jenda abe je no. Jesús quiato hue jenda que ñimbuquirãcuã nacua ja ra. Siqui i i tuchi Jesús rese. Espíritu Turã ngue embeta mbeta ra. Etubiriã nyee. Jesús quiato que Dios cheẽ mumba mumbayã nguia ra.

Jesús quirãcuã Eneas mbucherõ

³² Pedro que mbia mbuchesea sea tuchi quia ra. Oso que Jesús quiato Lida jenda rea no nda. ³³ Hue que umi sayã mo ndiqui ra. Ae ngatayã mbei quia ocho años. Nyaara bei chõ ngue equia ra. Eneas, i que umi sayã je ra. ³⁴ Pedro que ñee ee ra. —¡Jesús riqui nembucherõ a jê! Ehuã na. Nderua abe enua, ique Pedro umi sayã je ra. Ũquĩ mose que nyerõ nda. ³⁵ Mbia que mae ja u umi sayã ngata rese ra. Nyebe que mbia Jesús icua ja cote ra. Lida jenda Jesús icua ja. Sarón jenda abe que icua ja n o nda. Ngãmeĩ ñee si que hui Jesús isi cote ra.

Dios quirãcuã Dorcas mbuquera si

³⁶ Dorcas, i que ari mo je ra. Jope jenda que ra. Dorcas, i que griego cheẽ quicuã je ra. Jesús quiato que ae ra. Ae que eturã mbei riqui mbia je ra. Ae que mbae mee mee mbei quia mbaecha reã je ra. ³⁷ Dorcas rasi que eiquia cote ra. Mbia que eraaque mbuchasu ra. Mĩĩ ngue equesa nongue ibatenda ye ra. Segundo piso. ³⁸ Pedro que siqui aichi ra. Lida, i que sucha tubiriã je ra. Nyebe que Jesús quiato mbia nyeremo mondochoi Pedro reru sacua nda. ³⁹ Pedro que oso erese ra. Ngasẽ mose que mbia eruruchoi equesa ibatenda ra. Dorcas raaque rese mae. Hue eru chiecha tubirĩ a nyi nyeseo eraaque res e hue. Dorcas chimee tubiriã ngue eteacuquia cuquia u nyue hue ra. Mbia irao tubiriã ngue Dorcas chiao ra. ⁴⁰ Pedro que mbia mbusẽ ja mondo taicuee ra. Ngũiã ndese que ñee Dios je cote ra. Aquere que ñee eraaque je cote ra. —Ehuã na, Dorcas, i que ee je ra. Eraaque que nguesa ira mae Pedro rese ra. Nyuruã ngue ngoi cote ra. ⁴¹ Pedro que emua eo rese ra. Jenyu, i que Jesús quiato je cote ra. Eru chiecha ja je abe no. Ngãẽ ngue mae equera rese cote ra. ⁴² Mbia Jope jenda que jirandu tuchi

erese ra. Nyebe que mbia tubiriã Jesús icua cote ra. ⁴³ Pedro que itõ mocoĩ hue ra. Sucha tubiriã. Simón curtidor chuchúaa que eriqui uque ra.

10

Pedro oso Cornelio rea

¹ Soldados rerecua mo ngue siqui sucha tubiriã Cesaréaa ra. Italia jenda rei ùquĩ soldados. Cien ngue soldados ra. Cornelio, i que soldados rerecua je ra. ² Ae que ñee ñee mbei quia Dios je ra. Ae que eturã ndiqui Dios je ra. Mbae isiquia que emee mee tuchi quia mbaecha reã je ra. Echuchua jenda abe que eturã ndiqui Dios je ra. ³ Tenda nyesecco ramo mose que Cornelio ibatenda mo ndea cuu ra. Angel. Echecua tuchi que ee cuu ra. Ique que echuchúaa ee cuu ra. —Cornelio, i que ñee ee cuu ra. ⁴ Cornelio que mae quiatu tuchi erese ra. —¿Mbae ere, Sererecua? i que siquiche ñee ee ra. Ibatenda que ñee ee cote ra. —Co ereico ñee ñee mbeite Dios je co. Co ereico mbae mo mee mee mbeite mbaecha reã je co. Nyebe Dios ia tuchi riqui nguiã nderese co. ⁵ Huee que Simón Pedro mo ndiqui Jópee ra. Nderimba mo emondochoi erea. Ereru sacua ñee ndeje. ⁶ Huee eriqui Simón Curtidor chuchúaa huee. Am a ndisha rimia eriqui hue. Sã nderimba ecurucuaẽ hue si. Ñee ñee sacua ndeje, i que ibatenda Cornelio je cuu ra. ⁷ Dios chimondo ibatenda que oso Cornelio recha cote ra. Cornelio que ñumumba cote ra. Jenyu, i que ngũimba nyeremo je ra. Aque miĩ soldado je abe no. Ae rei Cornelio raarõsa. Ae que ndua ndua bei quia Dios rese ra. ⁸ Ûquĩ je que Cornelio uquereicuã nenei nenei ja ra. —Jẽso Pedro reru Jope si, i que ee cote ra.

⁹⁻¹⁰ Isamami ngue Cornelio rimba ngasẽ Jope rurubi cote ra. Aque mose que Pedro chi tuchia arõ nda. Huee rei equesa no. Huee que Pedro chi ñee ñee Dios je ra. Tenda ibate mose que Pedro riãcuã nda. Echurã ngue uchi áte ra. Nyebe que uque u ra. Uchurã naa mose. Equereicuã ngue cote ra. ¹¹ Ibei que nyiequia ee cuu ra. Tiru icoi que tu ibei si ra. Tiru chimangũiana isi ji que tu nguichi ee cuu ra. Echimangũiana

isi ji ja. ¹² Mbae tubiriã ngue tu nguichi tiru icoi ye ee cuu ra. Mbae chumumbara tuchi. Quiaa riinda ja. Mbei abe no. Nguireĩ abe no. Mbae ibi riinda ja tuchi que chi tiru ye cuu ra. ¹³ Pedro que echeẽ mo ñandu cote ra. —Ehuã na, Pedro. Emo eiquia ndechurã, i que ra. ¹⁴ —Tei, Sererecua. Urechũ eã ño ã ndesẽ. ã mo ngue ureu eã mbei quia ra. Mbaeia tuchi ure je judíos ja je, i que Pedro ee ra. ¹⁵ Dios que ñeembe ee ra. —¿Sechimee ndechurã nda ereisiteãchĩ jẽ! i que ra. ¹⁶ Eĩ si que tiru icoi ru tres veces ra. Mbae chumumba ra ja resebe. Tiru que oso bei ibate cote ra.

¹⁷ Pedro que ñumumba cote ra. Ndua ndua tuchi que uquereicuã ndese ra. Aque mosete que Cornelio rimba ngasẽ nda. —¿Ma Simón chuchua ma nde? i que ngasẽ nda. ¹⁸ —¿Simón Pedro riqui a re? i que ra. ¹⁹ Pedro qu e ndua ndua beite quia uquereicuã ndese ra. Nyebe Espiritu Turã ñee nguiã ee. —Mbia tres ngaẽ nguia nderequia co. ²⁰ Equichi. Eso rã erese. ¿Esiquicheã oso erese jẽ! Se chõ ngue ambu nderea resẽ, i que Dios Pedro je ra. ²¹ Pedro que nguichi u ee cote ra. Cornelio rimba je. —Serequia chõ jenyu nguiã co. ¿Mbaerã jẽingo serequia re? i que Pedro ra. ²² —Cornelio quia urembu nguiã nderea co. Ae rei soldados rerecua turã. Judío chũcua tuchi que ae ra. Eturãte eriqui Dios je co. Angel que oso ñee Cornelio je ra. “Mbia emondo rã Pedro reru sacua. Pedro cheẽ echandu rã”, i que ángel Cornelio je ra, i que Cornelio rimba Pedro je ra. ²³ —Jenyu rã ique. Jengue a, i que Pedro ee ra. Isamami ngue Pedro oso erese cote ra. Jesús quiato Jope jenda abe que nyoĩ erese ra. ²⁴ Isamami ngue ngasẽ Cesarea cote ra. Cornelio que esaarõ arõ nguia huee ra. Nguesenda rese que eriqui eraarõ arõ nda. Nguiriĩ abe rese que eriqui eraarõ arõ nda. —Jenyu Pedro raarõ serese. Echeẽ andu sacua, i nda nguesenda je nyii ra. ²⁵ Pedro que ngasẽ oso Cornelio chuchúaa ra. Cornelio que oo erese ra. Aquere que ngoi ngũia ndese ñee ñee ee ra. Ibatenda Pedro riqui reĩ nguiã Cornelio je. ²⁶ Pedro que ñee ee ra. —Ehuã na. Dios eã ño se re. Nderã si chõ se re. Mbia chõ se re, i que Pedro ra.

27 Ñee ñee ngue equia nyue cote ra. Nyoi que ique mbia tubiriãsa cote ra. 28 Pedro que ñee ãquĩ je ra. —Se rei judío. Judío siqui aronea ndaque mbiamo ndese. Judío ique aronea mbiamo nyuchúaa. Õquĩ jêicua raque quia ã. Dios que ñee seje cuu ra. Dios que sembaaquiatu cuu ra. “Mbiamo abe que eturãte riqui ra. Mbiamo ndese abe eico jiri”, i que Dios seje ra. 29 Nyebe achu jei nguiã ndecheẽ mose co. ¿Mbaerã “echu” ere seje re? i que Pedro Cornelio je ra.

30 Cornelio que ñee ee cote ra. —Hue tenda bei aico ñee ñee Dios je co. Tenda nyeseco mose aico bei ñee ñee Dios je co. Se cheẽ mose que ibatenda mo ndu seje ra. Angel. Tu que seje hace cuatro días ra. Tirushĩ tuchi que ecunua nda. 31 Ibatenda que ñee seje ra. “Cornelio, Dios ndecheẽ ñandu bei quia co. Dios mae mbei quia nderese co. Mbae mee ndese mbaecha reã je eriqui mae co. Dios riqui ndeicuate co. 32 Mbia mo emondo rã Jópee. Hue Simón Pedro ndiqui hue. Hue eriqui Simón Curtidor chuchúaa hue. Ama ndisha rimiã ndese eriqui hue. Sã nderimba mo erurucuaã aa”, i que ángel seje ra. 33 Nyebe serimba amondo jei nderea. Coche erechu nguiã seje aa. Ndecheẽ andu sacuaã ño urecu nguiã aa. Dios cheẽ esenei na ure je cote. Ae Dios mondo ndeje, erenei sacuaã ure je, i que Cornelio Pedro je ra.

34 Pedro que ñee ee cote ra. —Judíos achõ je eã ño Dios turã ndiqui reaẽ. Mbiamo abe chõ ebi riqui reaẽ. 35 Mbiamo abe ireĩ ireĩ chĩ nguiã Dios si re. Ibimo jenda re. Õquĩ siqui turã ño nguiã Dios je reaẽ. Nyebe Dios abe eturã ndiqui ãquĩ je reaẽ. Judíos achõ eã ndaque. 36 Dios que ucheẽ turã mondo judíos je ra. Dios cheẽ turã ngue tu Jesucristo rĩĩ nda. Ae rei aba mbiãsa. Jesucristo rei mbia rerecua tuchi. 37 Judío recua ja que Dios cheẽ turã ndiqui ã ndesẽ. Juan Bautista reco mose que Dios cheẽ ngasẽ judíos ja je ra. Juan Bautista que Dios cheẽ senei senei Galilea ra. Aque mose rane ngue Dios cheẽ ngasẽ judíos ja je cote ra. Õquĩ jêicua tuchi quia ã ndesẽ. 38 Jesús siqui turã jêicua quia resẽ. Jesús Nazaret jenda siqui turã mbei. Dios que Jesús mbuquirãcuã Espíritu Turã

je ra. Dios que siqui tuchi erese ra. Nyebe eriqui nguiã mbae turã naa naa. Nyebe eriqui nguiã aba checuayã icuã jea jea mbia si. Õquĩ jêicua quia ã ndesẽ. 39 Jesús chimbaaquiatu chõ ureico nguiã ã. Jesús chisaã ndese que ureico mae mae huee ra. Judea rui ja. Jerusalén abe que ureico mae mae echisaã ndese ra. Huee Jesús reco mose que mbia eiquia cote ra. Huee que mbia embucha ira rese ra. Eiquia sacuaã. 40-41 Dios que Jesús mbuquera si cote ra. Tres días mose. Dios que Jesús mbuchecua ure je cote ra. Mbia ja je embuchecuayã. Ure je achõ ngue embuchecua ra. Uchi-irabo achõ je. Jesús renei nenei sacuaã ngue Dios ureirabo ra. Urequiaru que Jesús rese ra. Jesús quera ico. Mbae mo abe que urembei erese ra. 42 Jesús que uremondo mbia mbiirandu randu sacuaã ngũĩĩ nda. “Secheẽ turã jêsenei senei nguia mbia je. ‘Dios que Jesús mĩĩ nda. Mbia mano je icuã ndea sacuaã. Manoã je abe icuã ndea sacuaã. Jesús r a eicuã tea ja’, jenye quia mbia mbiirandu randu”, i que Jesús ure je ra. 43 Dios cheẽ mbuchecuasa ja que embesa mbesa Jesús rĩĩ cose ra: “Dios turã nda eriqui Jesús icuasa je. Dios ra Jesús icuasa icuã mbutiã tiã esi”, i que Dios cheẽ mbuchecuasa ra, i que Pedro Cornelio je ra.

Espíritu Turã ique judíos eã chiangui re

44 Pedro cheẽ mose que Espíritu Turã ndu ique eandusa chiangui re ra. Eandusa chiangui re ja ique. 45 Pedro resenda judíos que nyuruira tuchi ra. —Judíos eã je abe chõ Dios riqui Espíritu Turã mondo mondo re, i que judíos Jesús quiato u nyuruira ra. 46 Judíos eã ngue mbiamo ñee saã saã nda. Espíritu Turã ique mose echiangui re. Ñee turã ja Dios rĩĩ. Nyebe judíos ñee. —Ã ñiangui re abe Espíritu Turã iquechĩ. Judíos eã ndaque, i que eandu ra. Pedro que ñee nguesenda je cote ra. 47 —Espíritu Turã ngue ique echiangui re cote ra. Nyebe bautizar tae ee i je cote. Emo nda seriquisãyã, i que Pedro ra. 48 Nyebe que Pedro bautizar i ee ra. Jesucristo rimbarã ngue bautizar i ee ra. Aquereque ñee ja Pedro je ra. —Eitõ mocoĩ jiri quia ure rese aa, i que ee ra.

11

Pedro Jerusalén jenda mbiirandu ja

¹ Jesús chimbaaquiatu que jirandu erese ra. Judíos eã ndese. Jesús quiato Judea jenda abe que jirandu erese ra. —Judíos eã abe riqui Dios cheẽ isi isi ã, i que mbia ee ra. ² Pedro que oso Jerusalén cote ra. Huee que judíos ñee asi asi ee cote ra. ³ —Mbiamo je ereso chõchĩ. Judíos eã je ereso chõchĩ. Judíos eã ndese ereiaru chõchĩ, i que ñee asi Pedro je ra. ⁴ Pedro que embiirandu tuchi cote ra. ⁵ —Emo mose que aico Jope ra. Huee que aico ñee ñee Dios je ra. Mbae mo ngue atea cuu ra. Tiru icoi mo ngue tu ibate si cuu ra. Echimangũiana isi ji que tu nguichi seje cuu ra. Echimangũiana isi ji ja. ⁶ Mbae chumumbara tuchi que tu aque tiru ye cuu ra. Quiaa rĩnda ja. Mbei abe no. Nguireĩ abe no. Mbae ibi rĩnda ja tuchi que chi tiru ye cuu ra. ⁷ Echeẽ mo ngue tu seje cote ra. “Ehuã na, Pedro. Emo eiquia ndechiurã”, i que seje cuu ra. ⁸ “Tei, Sererecua. Urechĩu eã ño ã ndesẽ. ã mo ngue ureu eã mbei quia ra. Mbaeia tuchi ure je judíos ja je”, ae rei que ee ra. ⁹ Dios que ñeembe seje ra. “¡Sechimee ndechiurã nda ereisi teãchĩ jẽ!” i que seje ra. ¹⁰ Eĩ si que tiru icoi ru tres veces ra. Oso bei que ibate serecha cote ra. ¹¹ Aque mosete que Cornelio rimba ngasẽ seje ra. Seruruchoi sacua ngue ecuaẽ Cesarea si ra. Tres que ngaẽ seruruchoi sacua nda. ¹² “Eso rã erese. ¡Esiquicheã oso erese jẽ!” i que Espiritu Turã seje ra. ã nanderesenda seis que nyoĩ serese ra. Urecuasẽ ngue emondosa chuchua ra. Cornelio chuchua. ¹³ Cornelio que uquereicuã senei ure je ra. “Angel mo ngue tu ñee seje ra. ‘Mbia emondo Jópee Simón Pedro rea. ¹⁴ Ae ra ñee ñee nguia jẽje. Ndechuchua jenda je abe ra eriqui ñee ñee. Dios jendirõ sacua jẽicuã si’, i que ángel seje ra”, i que Cornelio seje ra. ¹⁵ Se ñee namo mose ee que Espiritu Turã nguichi ee ra. Ique que echiangui re ra. Ique que nandechiangui re nyii nae, eĩ si que ique Cornelio chiangui re cote ra. Cornelio chuchua jenda chiangui re abe. ¹⁶ Jesús cheẽ ndese que andua ndua cote ra. ã ndei echeẽ ã: “I je que Juan bautizar i rei mbia je

ra. Espiritu Turã je bautizar tae jẽje cote”, i que Jesús cose ra. Aque rese que andua ndua cote ra. ¹⁷ Nande judíos achõ je eã ño Dios riqui nguia Espiritu Turã mondo. Judí eã je abe chõ eriqui nguia Espiritu Turã mondo. Jesús icua mose. ¿Mañi ae ra Dios riquisã se re? i que Pedro ñee oco judíos je ra. ¹⁸ Mbia que Pedro cheẽ sobeishiãte ra. Ñee turã turã ngue Dios je cote ra. —Dios judío eã abe mbui mbui quiatu quia huicuã si reaẽ. Judío eã abe chee ra siqui bei Dios rese nye, i que judíos ra.

Antioquía jenda Jesús quiato

¹⁹ Mbia icua tuchi que eriqui Jesús quiato je cote ra. Esteban iquia mosebe bei que mbia icua ndiqui Jesús quiato je ra. Nyebe Jesús quiato choi nguia uchã Jerusalén si. Emo nyoĩ Feníciaa. Emo nyoĩ Chipre no. Emo nyoĩ Antioquía no. Huee ja que echi Jesús cheẽ turã nenei nenei nda. Judíos achõ je que echi erenei nenei nda. Judío eã je erenei nenei eã. ²⁰ Chipre jenda rei emo. Cirene jenda rei emo no. Ñquĩ nguia que nyoĩ Antioquíaa ra. Ñquĩ nguiatu que Jesús cheẽ senei senei judío eã je ra. ²¹ Dios quirãcuã ngue siqui tuchi embiirandusa rese ra. Nyebe que hue jenda tubiriã Jesús icua ra. ²² Jesús quiato Jerusalén jenda que jirandu erese ra. Antioquía jenda rese. Nyebe Bernabé mondo Antioquíaa. ²³ Bernabé que ngasẽ ñee Jesús quiato je ra. —Dios turã tuchi riqui nguia jẽje co. Aque rese seyate riqui co. ¡Jẽingo tuchi nandererecua rese jẽ! ¡Jẽhuichĩ nda esi jẽ! i tuchi que Bernabé quia mbia je ra. ²⁴ Bernabé turãt e que eriqui ra. Espiritu Turã ngue siqui tuchi erese ra. Ae que Dios icua tuchi quia ra. Nyebe mbia tubiriã ndiqui nguia Jesús isi isi. ²⁵ Aquere que Bernabé si Tarso ra. Oso que Saulo requia huee ra. Tea que ra. Nguerao que Antioquíaa ra. ²⁶ Huee que echi bei Jesús quiato mbaaquiatu quiatu ra. Un año que echi huee ra. Mbia tubiriã mbaaquiatu quiatu bei. Hue jenda je rane ngue “Cristianos” i Cristo quiato je ra.

²⁷ Aque mose que Dios cheẽ mbuchecuaa mo ngaẽ Antioquíaa ra. Ngaẽ ngue Jerusalén si ra. ²⁸ Emo ngue juã ñee mbia je ra. Agabo, i que ee ra. Espiritu Turã

ngue Agabo mbucheẽ ñee nda. —Mbia chiurã eã nda namo jiri. Mbia riãcuã ja ra cote, i que Agabo ra. Echeẽ nguire tuchi que mbae ua cote ra. Mbia riãcuã tuchi que cote ra. Claudio mbia rerecua mose. ²⁹ Nyebe Jesús quiato Antioquía jenda ñee ñee nyue. —Mbae mo nandemondo rã Jesús quiato Judea jenda je. Nandembae mbae mo nandemondo ee, i que nyue ra. ³⁰ Eĩ ngue umbae mondo mondo Judea jenda je ra. Mee mee ja que Saulo je ra. Bernabé abe je. Ñquĩ ngue ecuruchoi cote ra. Ae emee nguiã Jesús quiato rerecua je. Judea jenda.

12

Mbia Jacobo iquia; mbia Pedro tarõ

¹ Aque mose que ererecua icuã tuchi riqui Jesús quiato je ra. Herodes, i que ererecua je ra. ² Ae que Jacobo ãquĩ ndoso ti quise je ra. Jacobo rei Juan nongue. ³ Judíos ia tuchi que Jacobo ãquĩ ndoso mose ra. —Judíos tambiabe no, i que ererecua ra. Nyebe Pedro abe isi nguiã. Fiesta de Pascua mose que Pedro isi nguiã. ⁴ Tarõ ngue mii mbia icuã tarõsaa ra. Diez y seis soldados que chi eraarõ mbei ra. —Pedro tamee je mbia je. Eiquia sacua. Fiesta ua mose r a amee ee, i rei que ererecua uchiangui re ra. ⁵ Nyebe que soldados Pedro tarõ jiraarõ tuchi u ra. Pedro resenda que ñee ñee tuchi Dios je ra. Jesús quiato mo. Ñee ñee tuchi que equia Pedro rii ee ra.

Dios Pedro sirõ nyecuayã etaronda si

⁶ Isamami nda ererecua Pedro mee nguiã mbia je chã nde. Eiquia sacua. —Isamami nda amee mbia je, i rei que Herodes ra. Aque isa que Pedro uque u soldados joõ ñi nda. Ecuã ji que uque u ra. Cadena nyeremo je que ecua ino nda. Soldados nyeremo ngue uqueã u eraarõ nda. ⁷ Ibatenda mo ngue tu Pedro je isa ra. Angel. Nyaashĩ na tuchi que tuchia ra. Mbae resae ja. Ibatenda que oco Pedro rese ra. Emumba. —¡Ehuã asi jẽ! i que Pedro je ra. Ehuã mose que cadenas nyera eo si ra. ⁸ —Ndeirao emingue ja rã. Ndeiyao abe emingue, i que ibatenda ee ra. Ae que Pedro emingue echeẽ mose

ra. —Ndeirao aronda abe emingue. Nyao serese cote, i que Pedro je ra. ⁹ Pedro que oso erese ra. Etaronda si que Pedro rerao cote ra. —Seque re chõ aico rei co, i rei que Pedro ra. Equereicuã eriqui reĩ nguiã ee. ¹⁰ Eraarõsa cuaãcuã ngue echoi quia ra. Eraarõsa jiranua tuchi erese. Ngasẽ nyee que etaronda icoi ra. Fierro que etaronda ra. Etaronda a e que nyeequia ee ra. Usẽ ngue ra. Pe jiri que echoi nyiese ra. Ibatenda que oso Pedro recha cote ra. ¹¹ —Cu u eã ño eriqui re. Echecua chõ eriqui re, i que Pedro eicua cote ra. —Dios chõ ibatenda mo mbu serirõ sacua nde. Serirõ ño equia Herodes si re. Judíos ra sei quiyã cote, i que Pedro uchiangui re ra.

¹² Pedro que ndua ndua huĩ nda. Ae esi nguiã María chuchúaa. María rei Juan Marcos si. Mbia tubiriãte que chi ñumunua huee ra. Ñee ñee ngue u Dios je ra. ¹³ Pedro que ngasẽ eiquesa mbuu mbuu ra. Nyucuaaque mo ngue oso rei ee ra. Rode, i que ee ra. ¹⁴ Pedro cheẽ ngue eicua ra. Eya tuchi que nyebi asi oso mbia mbiirandu ra. Eiquesa equia rocoĩ Pedro je. —Hue Pedro ñi taicuee hue, i que embiirandu ra. ¹⁵ —Tei. Echeẽ ñooñoa na, i chõ ngue mbia Rode je ra. —Ae beite. Acheẽ ñooñoa ño jẽje re, i tuchi Rode. —Pedro eã ño ñene. Eãingue chõ ñee ndei ndeje, i ja rei que mbia nyucuaaque je ra. ¹⁶ Eiquesa que Pedro mbuu mbuu bei huĩ mbia je ra. Emo ngue oso cheete rei equia ee ra. Pedro que ique cote ra. Ñumunua je que nyuruira tuchi mae erese ra. ¹⁷ Pedro que mbia mbuquiriri o je ra. Mbae que esenei ja ee cote ra. —Eĩ ngue Dios serirõ setarõsa si ra, i que erenei nenei ja ee ra. —Jacobo jembiirandu ja rã serese. Jesús quiato ja jembiirandu, i que Pedro ra. Pedro que oso mbia recha cote ra.

¹⁸ Isamamimbe que soldados pare pare i tuchi ra. Pedro oreã ndese mae. —¿Mañi Pedro usẽ nde? i que u ñee ñee nyue ra. ¹⁹ Herodes que ñee nda. Ererecua. —Pedro jendu rã seje, i rei que soldados je ra. Pedro oreã ngue ee ra. —Sembiirandu ja rã se. ¿Mañi Pedro si usẽ nde? i que ererecua soldados je ra. Soldados que eicuayãte ee ra. Nyebe que ererecua soldados iquia nguiã. Pedro raarõsa iquia ja. Aquere que

Herodes si siri Cesaréaa ra. Judea si siri.

Herodes mano

²⁰ Herodes que mbia chiurã mondo mondo Tiro jenda je nyii ra. Sidón jenda je abe no. Paama i que ee cote ra. Nyebe echiurã mondo monoa ee cote. Nyebe que ũquĩ nyoĩ ja Herodes chuchúaa ra. —¡Nandeturã mbei chõ ee jẽ! ¶ nda nandechiurã mondobe nande je, i que nyue ra. Herodes resenda mo ngue ñee turã ee ra. Blasto, i que aque je ra. —Echeẽ turã turã Herodes je ure riĩ. ¶ nda eturambe ure je, i que mbia Blasto je ra. ²¹ Emo mose jiri que Herodes huiirao turã mingue ra. Ngoĩ que ngũenda icoĩ tose ra. Jenyu seje, i que Tiro jenda je cote ra. Sidón jenda je abe no. Herodes que ñee ocote ũquĩ je cote ra. ²² Mbia abe que ñeete ee cote ra. —Dios chõ nde resẽ. Dios cheẽ na si nde. Mbia cheẽ na eã, i que mbia Herodes mbucuasú i i ra. ²³ —Dios eã ño se re, i eã mbei que Herodes mbia je ra. Ñee turã eã ngue equia Dios riĩ nda. Nyebe Dios embasi nguiã. Nyebe Dios ángel mo mbu nguiã Herodes mbasi tuchi. Erosei que erie u ra. Eiquia nonde. Mano ngue cote ra. ²⁴ Jesús quiato que Jesús cheẽ senei senei tuchi quia ra. Mbia tubiriã ngue echandu chandu quia ra. Mbia tubiriã ngue Jesús icua icua quia cote ra. ²⁵ Bernabé que nyoĩ Jerusalén nda. Saulo rese. Mbae isiquia ruruchoi sacua. Mbae isiquia que emee mee Jesús quiato hue jenda je cot e ra. Nyoĩ que Antioquíaa cote ra. Juan Marcos abe que ecuruchoi nyiese ra.

13

Espíritu Turã Bernabé mondo Dios cheẽ nenei nenei sacua, Pablo rese

¹ Jesús quiato que ñumunua nua nguia Antioquíaa jenda ra. Mbia mbaaquiato quiatusa abe que chi erese ra. Dios cheẽ mbuchecuasaa mo abe que chi erese ra. Bernabé, i que emo je ra. Simón nondeĩ abe que ra. Lucio de Cirene abe que ra. Manaén abe que ra. Ae rei que Herodes resenda eñetẽ mose ra. Herodes ererecua nonde. Saulo abe que ra. ũquĩ ja que mbia mbaaquiato quiatusa ra. ² Emo mose que ũquĩ nyĩ ñumunua nda. Ñee ñee ngue u Dios

je ra. Uchiu si que hui ra. Ndua ndua sacua Dios rese. Aque mose que Espiritu Turã ñee ee ra. —Bernabé jemee na seje. Saulo abe jemee na seje no. ũquĩ ngue airabo ra. Airabo que secheẽ nenei nenei sacua nda, i que Espiritu Turã ñee ñumunua je je ra. ³ Mbia que ñee turã mbei Dios je ra. Quiaruã mbei que u ra. O que echono ñono Bernabé aiquĩ ndese cote ra. Saulo aiquĩ ndese abe no. Mondo que Dios cheẽ nenei nenei sacua cote ra.

Pablo Dios cheẽ senei senei Chípree, Bernabé rese

⁴ Aquere que Espiritu Turã Bernabé curuchoi Selúciaa ra. Saulo rese. —Ama ndui nyao Chipre, i que ua canoa cuasu ye ra. ⁵ Ngasẽ ngue sucha tubiriã Salamina nda. Salamina ndei Chipre jenda mo. Judíos chumunuasaa que echoĩ Dios cheẽ nenei nenei nda. Juan Marcos abe que siqui erese Dios cheẽ nenei nenei nda. ⁶ Tuchua que embuchesea sea tuchi ra. Ngasẽ nyee Pafos. Huee que brujo mo ndiqui ee ra. Barjesús, i que brujo je ra. Judío mo ndei aque brujo. —Dios cheẽ mbuchecuasaa rei se, ichõĩño mbei que equia mbia je ra. ⁷ Brujo que siqui ererecua rese ra. Sergio Paulo, i que ererecua je ra. Ererecua aquiato tuchi que ra. —Jenyu, Dios cheẽ tachandu rã, i que ererecua Bernabé je ra. Saulo je abe no. ⁸ Brujo que Bernabé cheẽ siquisã nda. Pablo cheẽ abe riquisã. —¶ nda sererecua Jesús icuayã, i tuchi brujo ũquĩ ñee ndiquisã. Elimas, i abe que brujo je ra. ⁹ Espiritu Turã ngue siqui tuchi quia Pablo rese ra. Pablo, i abe que equia Saulo je ra. Pablo que ma e quiato brujo rese ra. ¹⁰ Ñee ngue ee ra. —Mbia mbiirĩ irĩsa tuchi quiareĩ nde. Diablo resenda tuchi quiareĩ nde. Mbae turã ndesenda reã tuchi quiareĩ nde. ¿Mbaerã ereico mbia riquisã quisã Dios icha si re? ¿Manose ra erehui ũquĩ si re? i que Pablo ñee icua ee ra. ¹¹ — Dios ra nembasi tuchi cote. Nderesayra cote. Tenda rese ra ereico mae eã are jiri, i que Pablo brujo je ra. Echeẽ mosebe que eresa uque tuchi ra. Mae eã mbae rese cote. —Jenyiba taisi. ¡Sembucuatã turã na nguia jẽ! i tuchi eresayã nguia mbia je cote. ¹² Ererecua que echandu ja ra. Nyebe ngue

Jesús icua nguiã cote. Nyuruira tuchi que huĩ Jesús cheẽ andu ra.

Pablo que siqui Antioquíaa ra; Bernabé rese

¹³ Pablo que nyoĩ Pafos recha cote ra. Nguesenda rese que echoĩ ama nduĩ ra. Ngasẽ ngue Perge de Panfíliaa ra. Huee si que Juan Marcos si nyebi Jerusalén nda. Pablo recha. Bernabé abe recha. ¹⁴ Emo mose que echoĩ Perge si ra. Ngasẽ ngue sucha tubiriã Antioquíaa ra. Pisidia, i que hue ibi je ra. Sábado mose que ique judíos chumunuásaa ra. Huee que echĩ ngoi ra. ¹⁵ Judíos que leer i Dios cheẽ je ra. Moisés chimbesa je. Dios cheẽ mbuchecuada chimbesa je abe no. Aquere que judíos ñee Pablo je ra. Bernabé je abe no. —¿Mbia ra jembaaquiato quiato jẽ nde? i que ee ra. ¹⁶ Pablo que juã cote ra. O je que mbia mbuquiriri ra. Ñee ngue ee cote ra. —Seandu rã se, Israelitas. Seandu rã se, Dios quiato. ¹⁷ Dios que Israelitas rerecua ra. Dios que nanderamei cose ndare irabo ra. Siqui tuchi que equia nanderamei ndese ra. Nanderamei chi mose Egipto. Dios que nanderamei mbeta mbeta ra. Dios quirãcuã ngue nanderamei sirõ nyee Egipto si ra. ¹⁸ Dios que nyecuachõ tuchi quia nanderamei je ra. Cuarenta años que eriqui nyecuachõ tuchi ra. Nanderamei chi mose turuquia. ¹⁹ Sucha tubiriã jenda que mano ja mbiamo nda. Dios que eiquia ja ra. Siete rei sucha tubiriã. Canaán jenda. Dios que ũquĩ iquia ja nanderamei si ra. ũquĩ mbae ibi que Dios mee nanderamei je cote ra. ²⁰ Dios que jueces mĩ mĩ nanderamei nderecuarã cote ra. Jueces que emĩ mĩ nguia cuatro cientos cincuenta años nda. Aquere que Dios Samuel mĩ nanderamei nderecuarã nda. ²¹ Aquere que nanderamei ñee Dios je ra. “Rey mo nguia emĩ urererecuarã”, i que Dios je ra. Nyebe que Dios Saúl mĩ ererecuarã nda. Rey. Ae rei Cis ririĩ. Cis rei Benjaminito. Saúl que siqui arete nanderamei nderecuarã nda. Cuarenta años que eriqui ererecuarã nda. ²² Cuarenta años ua mose que Dios Saúl mombo cote ra. Dios que David mĩ nanderamei nderecuarã cote ra. Saúl rendaque re. David rei Isaĩ ririĩ. Dios que ñee

David je ra. “David sebi tuchi. Ae quia ra secheẽ mumba mumbayã”, i que Dios cose ra. ²³ David sí que Jesús ramei nda. Dios que Jesús mbu Israel jenda rirõ sacuã huĩcuã si ra. Ucheẽ nguire que Jesús mbu ra. Dios que ucheẽ mbuchebiã nda. ²⁴ Jesús tu nonde que Juan Bautista riqui ñee ñee nanderamei je ra. Israel jenda je. “Jẽicuã si jẽhui. Jemba Dios icha rui. fnda bautizar ae jẽje”, i tuchi que Juan nguia mbia je ra. ²⁵ Umano nonde que Juan ñee mbia je ra. “Ae jẽsaarõ nguia nae, ae eã ño se re. Ae ra tu serui. Ae rei ererecua tuchi sesi. Se oco aronea eiyao rese”, i que Juan ñee Jesús rĩ nda.

²⁶ Seresenda, Abraham ndiirĩ ndei jẽ. Jemo ndiqui Dios icua ã. Nande je quia Dios ucheẽ mondo nguiã. Nanderirõ sacuã nandeicuã si. Dios que Jesús mondo nande je ra. ²⁷ Jerusalén jenda que Jesús icuayãte ra. Ererecua ja que chi Jesús icuayãte ra. Dios cheẽ mbesa ji abe que eicuayãte ra. Eraã naa mbei raque sábado mose, eicuayã mbei. Dios cheẽ mbuchecuada cheẽ nguire que Jesús iquia ra. ²⁸ “Jesús eiquia rã”, i tuchi que mbia quia Pilato je ra. Jesús icuã eã ndaque. ²⁹ Nyebe que Jesús mano ndei ra. Embesa ji cheẽ nguire que Jesús mano nda. Jesús raaque que embuquichi ira si cote ra. Ñono ngue sita ribicoi ji ye ra. ³⁰ Jesús que quera si manonde cote ra. Dios que embuquera si ra. ³¹ Galilea jenda que siqui bei quia Jesús rese Jerusalén nae, ũquĩ ngue mae mae equera si rese cote ra. Mae mae mbei equia Jesús quera si rese cote. ũquĩ ñee mbei quia Jesús rĩ ã cote. ³² A ureico Dios cheẽ turã nenei nenei jẽje a. Dios ñee ñee nguia nanderamei je nyii nae, ũquĩ uresenei senei nguia jẽje a. ³³ Nande je que Dios Jesús mbuquera si ra. Ucheẽ nguire que embuquera si ra. Dios ñee ñee nguia nanderamei je nyii nae, eĩ si que Jesús mbuquera ra. “Nde rei serucucha. Namo ngue arembuchecua mbia je ra”, i que Dios Jesús rĩ cose ra. Eĩ ngue Salmo dos nda. ³⁴ Dios que Jesús mbuquera si ra. Jesús roo ra soõ eã mbei cote. Nyebe que Dios ñee nyii ra. “Seturãte ra jẽje. Seturã David je nyii nae, eĩ si ra seturãte jẽje”, i que Dios ra. “Jesús tambuquera si jẽje”, i ñene.

³⁵ Co abe rei embesa ji. ã ndei e ã: “Se rei Ibatenda rucucha turã. Ibatenda ra seroo sechayã. Seroo ra emoo eã. Sembuquera si rae”, i que embesa ji ra. ³⁶ David que siqui turã mbei quia uchabenda ja je ra. Dios cheẽ nguire que eriqui turã ee ra. Aquere que mano nda. Mbia que echati ngãmei jii rĩ nda. Aquere que David roo soõ cote ra.

³⁷ Jesús roo quiatu que soõ eã nda. Dios que embuquera si resẽ. Nyebe ae roo soõ eã nguiã. ³⁸ Seresenda, Jesús mii ndiqui nandeicua mbutiã sacua co. A ureico ãquĩ nenei nenei jẽje a. Jẽirandu sacua erese.

³⁹ Dios que ucheẽ senei senei nguia Moisés je nyii nae, aque cheẽ nguia r a aba icua mbutiã eã. Jesús mii ndiqui nandeicua mbutiã sacua co. Nande Jesús icua mose.

⁴⁰ “Mbae icua nda tuchi jẽje”, i que Dios cheẽ mbuchecuada ra. Jẽtesa bei u jẽ. Sã Dios cheẽ mbuchecuada io eã jẽje. Eĩ ngue Dios cheẽ mbuchecuada ra:

⁴¹ Co jẽ, mbae turã ucuayãsa.

Je nyuruira rae. Jemano ndae.

Mbia mae sayã nda asaã ndaque jẽje.

Jẽicua sereãte ra equia.

Mbia embuchecua raque jẽje. Nyebe ra jemano,

i que Dios cose ra, i que Pablo ra.

⁴² Pablo que usẽ nyoĩ echumunuasa si cote ra. —Jenyube rã sãbado nongue. ãquĩ jẽsenei seneimbe rã u ure je, i que mbia ee ra. ⁴³ Mbia que usẽ ja echumunuasa si cote ra. Judíos tubiriã ngue nyoĩ Pablo rui ra. Bernabé rui abe no. Judíos resenda tubiriã abe no. Pablo que ñee tuchi mbia je ra. Bernabé rese. —Dios rese jẽingo tuchi jẽ, i tuchi que equia ee ra.

⁴⁴ Sãbado nongue mose que sucha tubiriã jenda ñumunua ja ra. Ñumunua nua ja Dios cheẽ andu. ⁴⁵ Judíos mo ngue chi mae mae mbia chumunua ndese ra. —Pablo cheẽ ño echanduchi nguiã. Nandechẽ andu rocoĩ, i que judíos ngueteã mbia rese Pablo si ra. Nyebe judíos ñee icua icua nguiã Pablo je.

⁴⁶ Pablo que siquicheã tuchi ñee judíos je ra. Bernabé rese. —Jẽ nane je ureico rei Dios cheẽ nenei nenei ã. Dios cheẽ nguire ureico rei nguiã erenei nenei jẽ nane je ã. Ibate jẽingo bei sereã ñochĩ. Nyebe jẽingo nguiã Dios cheẽ isiteã teã ã. Nyebe ureso

nguiã erenei nenei judíos eã je co. ⁴⁷ ã ngue Dios ñee ure je cose ra: “Aremingo que secheẽ nenei nenei sacua mbia ja je ra. Judíos eã ja je. Mbia ibi jenda ja je. Secheẽ isiquia ra siqui bei”, i que Dios ure je ra, i que Pablo ra.

⁴⁸ Judíos eã ia tuchi que Pablo cheẽ ndese ra. Ñee turã turã ngue Dios cheẽ nii nda. Dios que mbia irabo ata ra. Emingo bei sacua ibate. ãquĩ ngue Jesús icua ja cote ra. ⁴⁹ Hue jenda ja que embucha mbucha quia Dios cheẽ nenei nenei nda. ⁵⁰ Judíos que mbia mbuqueta queta tuchi Pablo je ra. Bernabé je abe. Ari mbia chucua mbuqueta tuchi que ra. Amei mbia chucua abe mbuqueta que ra. Nyebe mbia paama i ja Pablo je. Bernabé je abe. Nyebe Pablo mombo nguiã hue si. Bernabé abe mombo no. ⁵¹ Nyoĩ nonde que hui tubi mbutomo tomo mbia je ra. —Jẽicua tẽicua, i ñee hue jenda je re. Aquere que echoi Iconio nda. ⁵² Jesús quiato ia tuchi que chi ra. Espiritu Turã ngue siqui tuchi quia erese ra.

14

Pablo que siqui Iconio nda, Bernabé rese

¹ Pablo que ngasẽ Iconio nda. Bernabé rese. Judíos chumunuasa que echoi ra. Dios cheẽ ngue esenei senei huee ra. Nyebe que judíos tubiriã Jesús icua ra. Judíos eã abe que eicua no nda. ² Judíos ataque que Jesús cheẽ isiteã teã no nda. ãquĩ ngue judíos eã mbiã icua Pablo je ra. Bernabé je abe no. Ñee icua icua tuchi erĩ. ³ Pablo que chi arete huee ra. Bernabé abe no. Siquicheã tuchi que equia Dios cheẽ nenei nenei nda. Ebia tuchi Dios rese. Dios que embuquirãcuã nda. Nyebe que eriqui mbia mae sayã naa naa nda. —Ichõĩño eã ño equia re, i chee mbia Pablo cheẽ je. Bernabé cheẽ je abe no. ⁴ Mbia cuabẽ ndua turã ja eã. Emo emo ngue siqui Jesús resenda rui ra. Emo emo ngue siqui judíos rui no nda. ⁵ Nyebe judíos icua icua Pablo je. Pablo resenda je abe no. Judíos eã abe eicua icua ee no. Mbia rerecua abe que eicua icua ee ra. —¡Pablo nandeiquia jẽ! ¡Bernabé abe nandeiquia jẽ! ¡Sita nande mombo mombo erese jẽ! i rei que mbia ra. ⁶ Pablo que jirandu erese ra. Bernabé

abe. Nyebe echoi uchã sucha tubiriã mo. Licaonia jenda. Listra, i sucha tubiriã mo je. Derbe, i emo je. Hue rurubi que echoi ra. ⁷ Hue jenda je que Dios cheẽ nenei nenei nda.

Mbia sita mombo mombo Pablo rese

⁸ Ngasẽ ngue Listra ra. Huee que emo ngatayã ñi ee ra. Eitãquieĩ mosenda bei ei icuã. Nyebe ngatayã mbei. ⁹ Aque que Pablo cheẽ ñandu ra. —Sembucherõ arõ, i ndua uchiangui re. Pablo que eicua ra. Nyeb e mae nguiatu erese. ¹⁰ Ñee nyecua que ee ra. —Ehuã ndei rese, i que Pablo ee ra. Ecuatayã ngue juã asi ngata cote ra. ¹¹ Mbia tubiriã ngue chi mae Pablo chimbucherõ ndese ra. Nyebe ucheẽ naa naa u nyue. Pablo riĩ ñee ñee. —Dios ngaẽ nguichi nande je mbia rã sí a, i rei que nyuruira ra. Tasẽ tasẽ. Licaonia, i hue jenda cheẽ je. ¹² Mercurio reĩ nda Pablo mbia je. Mercurio, i mbia umbae dios mo je. Pablo que ñee mbeite quia ra. Nyebe “Mercurio” i mbia ee. Jupiter reĩ nda Bernabé mbia je. Jupiter, i mbia umbae dios mo je no. ¹³ Hue jenda que ñumunua nua nguia ñee ñee Jupiter je ra. Ae ñee ñee nguia Jupiter je, aque que ticuasú quimbae queru Pablo je ra. Ira uti resebe ereru ee. —Ticuasú nandeiquia iquia rã Pablo je. Nandesei sei ee, i ja que mbia ra. —Pablo rei Dios rã si. Bernabé rese. Nyebe ticuasú nandeiquia iquia rã ee. Dios raanguia je, i rei que mbia ra. ¹⁴ Pablo que echandu ra. Bernabé rese. Nyebe huĩrao ndoro ndoro paama i ee. —Ureya eã jendese, i ñe ne. Ique que echoi mbia ite ite riĩ nda. Ñee asi asi mbia je. ¹⁵ —¿Mbaerã nda re, mbia? ¿Mbaerã nda ticuasú jẽiquia ure je re? Mbia chõ ure re. Jẽ na si chõ ure resẽ. Dios eã ño ure resẽ. Nyebe urechu nguia Dios cheẽ turã nenei nenei jẽje ã. Æ mbae icuã jẽsecha ja chõ. Dios quiarei ereco. ¡Ae rui jẽingo! Ae que ibei chao ra. Ae que ibi chao no nda. Ae que ama nyao no nda. Ae que mbae chao ja ra. Mbae aosa rui jẽingo. ¹⁶ Dios que mbia teachõ cose ra. Mbia tesarei mose esi. ¹⁷ Dios que eturã saã saã mbei quia mbia je ra. Mbi a eicua sacua. Dios chõ ama mbuchaaqui bei nguia nande je. Ae quia mbae a mee mbei nguia nandechiurã.

Dios chõ nandembia mbia bei nguia co, i que Pablo mbia je ra. ¹⁸ Eĩ ngue Pablo embiirandu Dios rese ra. Nyebe que mbia ticuasú iquia eã nyee ee ra.

¹⁹ Emo jiri mose que judíos ngaẽ huee ra. Antioquia si. Iconio si abe no. Ñquĩ ngue mbia mbiicua icuã Pablo je ra. Nyebe que mbia sita mombo mombo tuchi Pablo rese ra. Pablo manote rei nguia ee. Mbia que ecuruchoi mbutiriri pe jiri sucha tubiriã si. ²⁰ Hue que Jesús icuasa chi Pablo matãte hue ra. Pablo que juã quera cote ra. Osobe que nyebi sucha tubiriã nda. Isamami ngue esi Derbe ra. Bernabé rese. ²¹ Dios cheẽ turã ngue esenei senei nguia huee ra. Derbe jenda je. Mbia tubiriã ngue Jesús icua hue jenda cote ra. Aquere que nyebi Lístraa ra. Iconio abe. Antioquia abe. Huee sucha tubiriã ngue echoi nyebi ra. ²² Pablo que Jesús icuasa mbaaquiату quiatu hue jenda ra. Bernabé rese. —Jesús rese jẽingo tuchi jẽ! Mbia ra nandembasi mbasi tuchi. Aquere ra Dios nandererercuarã tuchi cote, i que Pablo mbia je ra. Bernabé rese. ²³ Amei mo ngue eirabo rabo miĩ ino huee ra. Jesús icuasa rerecuarã no hue. Ñumunua je rerecuarã jaaja. Aquere que huĩ uchiu si ra. Quiaruã. Ñee ñee ngue equia Dios je ra. Ñee ñee ee ererecua namonda riĩ. —Æ jẽingo Dios icuate ã. Sã Dios jendaarõ arõ, i que Pablo ererecuarã je ra. Bernabé rese.

Pablo ngãembe Antioquia, Bernabé rese

²⁴ Nyoĩ que erecha cote ra. Pisidia, i equia ibi je, hue riĩ ngue echoi ra. Ngasẽ ngue Panfilia no nda. ²⁵ Jesús cheẽ turã ngue esenei senei sucha tubiriã Perge jenda je ra. Aquere que echoi Atalia no nda. ²⁶ Hue si que echoi ama ndui ra. Nguique riita quitu que ecuaẽ tiba Antioquia cote ra. Mbia hue jenda rane nguiatu que Pablo mondo Bernabé rese Dios cheẽ nenei nenei sacua nyii ra. —Chã Dios turã jendeaquiату jẽso mose, i que ee nyii ra. Huee que tiba obeĩ cote ra. ²⁷ Ngasẽ mose Antioquia, Jesús icuasa que emunua nua cote ra. Mbae ja que esenei tuchi ee ra. —Dios que urereaquiату tuchi quia ra. Dios que urembucheẽ ñee nguia judíos eã je ra.

Dios que Jesús icua tuchi ee ra. Nyebe etubiriã ndiqui nguiã Jesús icua cote, ure echeẽ nenei nenei mose, i que Pablo ra. Bernabé rese. ²⁸ Chi arete que Antioquíaa ra. Jesús icuasa ja rese echi huee.

15

Jesús quiato rerecua ñumunua ja

¹ Judea jenda mo ngue ngaẽ Antioquíaa ra. Ngaẽ ngue Jesús icuasa mbaaquiatu quiatu icuã nda. —Circuncisión jësaã saã ja. Moisés cheẽ nguire jësaã saã, i rei que Jesús icuasa je ra. Eracoĩ ire o ji je chõ eriqui nguiã circuncisión, i ùquĩ je. —Eĩ jenye eã mose ra jësoã ibate, i rei que ra. ² —Tei, eĩ eã ñene, i tuchi que Pablo ee ra. Bernabé rese. —Ae beite. Pablo ñee ñooño nguiã, i tuchi Judea jenda. Nyebe ñee tuchi nguiã nyue circuncisión ñi. Nyebe Jesús icuasa mondochoi Jerusalén. Jirandu sacua circuncisión ndese. Pablo mondochoi. Bernabé abe no. Mbia mo abe no. Ùquĩ mondochoi ja. —Jëso Jerusalén. Jeñee Jesús quiato rerecua je. “¿Circuncisión nda uresaã saã nde?” jenye oso ee. Sã Jesús quiato rerecua ñee jëje. Jenyu ñee ure je cote, i que ñee uchimondo je ra. ³ Jesús icuasa que embucuata turã cote ra. Mondochoi Jerusalén. Fenicia rui que echoi ra. Samaria rui abe no. Judíos eã je rese que hue jenda mbiirandu randu ra. —Judíos eã abe que Jesús isi isi quia cote ra. Judíos eã ngue hui hui quia hui cuã si cote ra, i que hue jenda mbiirandu randu ra. Jesús icuasa ia tuchi que eandu ra. ⁴ Pablo que ngasẽ Jerusalén cote ra. Bernabé rese. Nguesenda rese no. Hue jenda Jesús icuasa que eisi turã nda. Jesús quiato rerecua abe que eisi turã no nda. Pablo que Dios turã senei senei ee ra. —Dios quirãcuã ngue siqui quia ure rese ra. Ure echeẽ naa naa mose, i que embiirandu ra. ⁵ Fariseos Jesús icuasa mo ngue juã ñee cote ra. —Judíos eã Jesús icua mose, circuncisión jësaã saã ee. Jeñee na ee. “Moisés cheẽ ndui jëingo bei”, jenye chõ ee, i rei que Fariseos ee ra.

⁶ Nyebe Jesús quiato rerecua ñumunua ja aque rii. ⁷ Ñee ñee tuchi nyue circuncisión ñi. Aquere que Pedro juã ñee nda. —Tacheẽ se, Seresenda. Dios que seirabo

cose ra. Ucheẽ turã nenei nenei sacua judíos eã je. Ùquĩ Jesús icua sacua ngue seirabo cose ra. Ùquĩ jëicuate quia ã. ⁸ Dios quia aba chiã icua jate nguiã co. Judíos eã je abe Dios Espiritu Turã mondo mondo cote. Nande achõ je eã emondo. Ùquĩ abe je emondo mondo Jesús icua mose no. “Judíos eã abe sequiato”, i ñe Dios re. ⁹ Judíos eã Jesús icua mose, Dios ùquĩ ñia mbiasu cote. Nande rã si. Nyebe Dios riqui nguiã judíos eã je abe siqui turã. Nande rã si. ¹⁰ ¿Mbaerã jëingo Dios cheẽ abi abi chõ nde? Dios cheẽ jembeta mbeta chõchĩ nguia re. Judíos eã je chõ jëingochĩ embeta re. Embeta ji chĩ nda eãtã tuchi aba je cot e re. Ùquĩ nanderu cose ndare saã aroneate. ¹¹ Dios turã nguia nandemingo bei nguiã ã. Dios turã nguia nandemingo bei nguiã ibate. Nande Jesucristo icua mose. Dios turã nguia judíos eã abe mingo bei nguiã ã no. Nande rã si no, i que Pedro ra.

¹² Pablo que mbae senei ja mbia je cote ra. Bernabé rese. Mbia tubiriã ngue quiriri cote ra. Nyiisaquia que Pablo cheẽ ndese ra. Bernabé cheẽ ndese abe. —Dios que urererao judíos eã je ra. Urembirãcuã tuchi que equia ee ra. Nyebe mbia mae sayã uresaã saã tuchi ee, i que Pablo ra. Bernabé rese. ¹³ Pablo cheẽ huire que Jacobo ñee cote ra. —Seandu rã se, Seresenda. ¹⁴ Pedro que ñee jëje namo nda. Dios turãte que judíos eã je ra. Dios que ùquĩ mo irabo rabo nguesendarã nda. Pedro que jembiiirandu erese namo nda. ¹⁵ Eĩ ngue Dios cheẽ mbuchecuasa embesa cosete ra. Nyebe eriqui nguiã eĩ eĩ ã cote. ¹⁶ ã ndei embesa ji ã: Se rei Dios. David reco mose que serimba siqui tuchi serese ra.

Aquere hui ja sesi cote.

Achube ra echiã mbitirõ si cote.

Siqui si ra serese cote.

¹⁷ Judíos eã abe ra siqui serese cote.

Mbia sembaerã nda siqui ja serese cote,

i que Dios ra. ¹⁸ Eĩ ngue Dios ñee mbia

mbiiirandu cose ra, i que Jacobo ra. ¹⁹ —

Judíos eã mo ngue Dios icua icua quia cote

ra. ¡Nandecheẽ nandembetayã jiri ee jê!

²⁰ ¡Nandecheẽ mi ño nandembesa mondo

ee jê! Nandecheẽ mumbayã sacua. “Mbia

soo mondo mondo mose dios raanguia je, ¡aque soo ra jêuchĩ jê!” nande rã ee. “¡Jeninisi rese siqui rocoĩ nda jêingochĩ emo ndese jê! ¡Jendu rese siqui rocoĩ nda jêingochĩ emo nde e jê!” nande chõ ee. “¡Eruqui resebe ra soo jêuchĩ jê! ¡Mbae ruqui ra jêuchĩ jê!” nande chõ ee. Ûquĩ mii nandembesa rã mondo ee. Nandechẽ mumbayã sacuã.

²¹ Ûquĩ mii nande rã ee. Ûquĩ ño mbia ñandu ñandu mbei quia cose ndare bei. Mbia Moisés chimbese saã saã sucha tubiriã ja je. Sábado mose bei. Judíos chumunua nua mose, i que Jacobo ra.

²² —Coche ñene, i ja Jesús quiato rerecua Jacobo cheẽ je. Jesús icuasa ja abe. Nyebe mbia nyeremo mondo Pablo rese. Bernabé rese abe. Silas, i que ee ra. Judas, i que enongue je ra. Barsabás, i abe que equia Judas je ra. Ûquĩ ndei Jesús quiato rerecua mo. Ûquĩ ngue emondo Antioquíaa ra. —Urecheẽ jêsenei senei Jesús icuasa hue jenda je, i que Jerusalén jenda ra. ²³ Jesús icuasa que ucheẽ mbesa mondo ee ra. A rei embesai a: —Ure rei Jesús quiato rerecua. Ure rei Jesús icuasa. A ureico embesa mbesa jêje a, Jesús icuasa. Judíos eã je. Antioquíaa jenda je. Siria jenda je. Cilicia jenda je. Saludos. ²⁴ Ureresenda mo ngue nyoichĩ jembaaquiato icuã icuã nda. Ûquĩ ñee jemingo asi asite rei. “Circuncisión jêsaã saã”, i chõchĩ equia jêje reaẽ. “Moises cheẽ ndui jêingo bei”, i chõchĩ equia jêje re. Ûquĩ uremondo eã ñee jêje. Ae ae chõ nyoĩ nguiã ñee ñooño jêje. ²⁵ Nyebe ureico nguiã ñumunua a. Emo ngue ureirabo emondo sacuã jendea ra. Nyeremo uremondo quia aque. Pablo rese. Bernabé abe rese. Ure-quiato tuchi que ùquĩ nda. ²⁶ Ûquĩ ireĩ ireĩ eã tuchi nyoĩ Jesucristo cheẽ nenei nenei. Mbia eiquia arondete raque. Siquicheã tuchi. ²⁷ Aque Judas uremondo quia jendea aque. Silas rese. Ûquĩ nda jembairandu ja. Ûquĩ nda urecheẽ senei senei jêje. ²⁸ Espíritu Turã ngue urembaaquiato ra. Nyebe ra urecheẽ tuchiã jêje. Echeẽ mumbayã sacuã. Ñ mii ño uremondo quia jêje aque. ²⁹ “Mbia soo mondo mundo mose dios raanguia je, ¡aque soo ra jêuchĩ

jê! ¡Eruqui resebe ra soo jêuchĩ jê! ¡Mbae ruqui ra jêuchĩ jê! ¡Jeninisi rese siqui rocoĩ nda jêingochĩ emo ndese jê! ¡Jendu rese siqui rocoĩ nda jêingochĩ emo ndese jê!” Coche ùquĩ jemumbayã nguiã. Aque mii ño urecheẽ urembesa mondo aque, i que embesa ra. Eĩngue Jerusalén jenda embesa ee ra.

³⁰ Uchimondo que emondochoi turã nda. Ngasẽ ngue Antioquíaa cote ra. Jesús icuasa hue jenda que emunua ja ra. Embesa ji que emee ee ra. ³¹ Echumunua mos e que leer i ee cote ra. Eya tuchi que erese ra. Eya tuchi Jerusalén jenda chimbese isi mose. ³² Dios cheẽ mbuchecua rei Judas. Silas rese. Nyebe que ùquĩ Dios cheẽ nenei nenei tuchi Jesús icuasa je ra. Jesús icuasa mbaaquiato quiato tuchi. ³³ Chi are jiri que huee ra. Jesús icuasa que embuchebi turã mondochoi cote ra. Nyoĩ que nyebi Jerusalén nda. ³⁴ Silas que siquichõ nda. ³⁵ Pablo abe que siquichõ Antioquíaa ra. Bernabé rese. Mbia que embaaquiato quiato quia ra. Dios cheẽ turã ngue esenei senei nguia ra. Jesús icuasa tubiriã ngue esenei senei erese ra.

Pablo nyao Bernabé si

³⁶ Aquere que Pablo ñee Bernabé je ra. —Nyao nanderique rui Jesús icuasa mbuchesea sea mae ja erese. Dios cheẽ ngue nandesenei senei, hue jenda mbuchesea sea nyao. Mañi Jesús icuasa u mambi reae. Nyao erea, i que Pablo ra. ³⁷ —Eno. Juan Marcos abe nanderao, i rei que Bernabé ra. ³⁸ —Tei. Ae que nanderecha Panfíliaa nyii resẽ. Hui jei que nande si resẽ, nande Dios cheẽ nenei nenei mose. ¿Mañi nande ra ererao si re? i que Pablo ra. ³⁹ Ñee asi asi chee que nyue ra. Marcos rii. Nyebe que nyao nyesi ra. Bernabé que Marcos querao ra. Ama ndui que echoi Chípree ra. ⁴⁰ Pablo que ñee Silas je ra. —Nyao serese, i que ee ra. Jesús icuasa que ñee ee ra. —Chã Dios turã jendeaquiato bei jêso mose, i ja que ee ra. Pablo que nyoĩ cote ra. Silas rese. ⁴¹ Siria rĩ ngue echoi ra. Cilicia rĩ abe no. Hue jenda Jesús icuasa mbaaquiato quiato que echoi ra.

16

Pablo resenda bei que Timoteo cote ra

¹ Pablo que nyoï Dérbee ra. Lístraa abe echoï. Huee que Jesús icuasa mo ndiqui ee ra. Timoteo, ï que ee ra. Esi rei judía. Esi rei Dios icuasa. Judío eã ngue eru ra. ² Jesús icuasa hue jenda que Timoteo icua ja ra. Timoteo turâte, ï ja que Jesús quiato quia ee ra. ³ —Timoteo tarao serese, ï que Pablo ra. Judíos tubiriã ngue chi aque ibi rui ra. —Judío eã ndei Timoteo ru, ï ja judíos. Nyebe Pablo circuncisión naa Timoteo je. Nguerao nguesendarã cote. ⁴ Nyoï que sucha tubiriã mbuchesea sea cote ra. Jesús quiato rerecua cheë ngue esenei senei ja quia mbia je ra. Jerusalén jenda cheë. — ¡Üquĩ ñee nda jemumba mumbachĩ jẽ! ï que Pablo nyoï quia ra. ⁵ Pablo que Jesús oseï uquia Jesús quiato je ra. Jesús icuasa tubiriã nia ngue esi quia cote ra.

Echu urembaaquiato quiatu, ï que Macedonia jenda Pablo je cuu ra

⁶ —Nyao Dios cheë nenei nenei Asia, ï rei ngue re. Espíritu Turã ngue nya ï ee ra. Nyebe echoï nguiã Frígiaa. Galáciaa abe. ⁷ Ngasë ngue Mísiaa ra. Nyao Bitinia, ï rei ngue re. Espíritu Turã ngue nya ï ee ra. ⁸ Misia que echucuaño nyoï ra. Ngasë nyee Troas. ⁹ Huee que Pablo Macedonia jenda mo ndea isa ra. Tea que cuu ra. Chĩ nda juã ñee ñee Pablo je cuu ra. —¡Echu aa Macedóniaa jẽ! Echu urembaaquiato quiatu, ï nda Pablo je cuu ra. ¹⁰ Nyebe ureso nguiã ereare. Se abe que aso erese ra. Se rei Lucas. —Dios urererao quia Macedonia co. Ucheë nenei nenei sacua, ure que urechue cote ra. Nyebe urecuata nguiã cote.

Pablo tarõ ji que chi Filipos ra

¹¹ Ama ndui que ureso Troas si ra. Erimbe que ureso iasa ra. Urecuasë nyee que oso Samotracia ra. Isamami ngue ureso Neápolis cote ra. ¹² Hue si que ureso ibi rĩ nda. Urecuasë nyee oso sucha tubiriã tuchi je. Filipos, ï hue sucha tubiriã je. Romanos mbae rei sucha tubiriã. Macedonia, ï que ibi ja je ra. Huee que urecu arete ra. ¹³ Sábado mose que ureso ama nimíaa nda. Sucha tubiriã ndecha. Huee

que judíos riqui ñumunua nua mbei ñee ñee Dios je ra. Ari que ngaë ngaë nguia huee ra. Acuaní mo ndese. Urecoi que Dios cheë nenei nenei ee ra. ¹⁴ Lidia, ï que urecheë andusa mo je ra. Ae rei tiru rubi vender isa. Ae rei Tiatira jenda. Ae rei Dios icuasa. Dios que Pablo cheë mbuchecua ee ra. Pablo cheë ngue eisi ra. ¹⁵ Nyebe que bautizar ï ee ra. Echuchua jenda je abe que bautizar ï ra. —Se Jesús resenda tuchi mose jẽje, jenyu uque sechuchúaa, ï que Lidia ure je ra. Ñee tuchi ure je. Nyebe urererao nguiã uchuchua.

¹⁶ Emo mose que ureso quia mbia ndua nduásaa Dios rese ra. Nyucuaaque mo ngue uresobeishĩ nda. Aba checuayã icuã ngue siqui tuchi quia erese ra. Aba checuayã icuã ngue mbae icua icua quia ee ra. Nyebe mbia mbae isiquia mee mee tuchi quia nyucuaaque rerecua je. Nyucuaaque cha je. ¹⁷ Nyucuaaque que tu Pablo rui ra. Tu ure ja rui. Ñee ngue urerĩ nda. —Ñ ndei Dios rimba ã. Ibatenda rimba. A echĩ aba icuã mbutiãsa nenei nenei jẽje a. A echĩ Jesús renei nenei jẽje a, ï bei que nyucuaaque quia urerĩ nda. ¹⁸ ï bei que nyucuaaque quia urerĩ nda. Pablo que echeë nyosei chiã nyee ra. Uba que ñee aba checuayã icuã je cote ra. —Jesús rĩ aico ñee ndeje a. Esë nyucuaaque si, ï que Pablo aba checuayã icuã je ra. Echeë mosebe que usë esi ra.

¹⁹ Nyucuaaque rerecua que paama ï Pablo je ra. —Mbia ra mbae isiquia mondo monoa techĩ nande je cote re, ï nyue. Nyebe que Pablo isi ra. Silas rese. Curuchoï que plaza ra. ²⁰ Mondo que mbia rerecua je ra. —Ñ ndei judíos ã. Mbia mbĩcuã icuãte equia ñee ñee ã. ²¹ “Ure rã jẽingo”, ichĩ nguiã nande je. Romanos ndaque nande. Üquĩ nandesaã aronea tuchi quiarei, ï que mbia nguerecua je ra. ²² Nyebe que mbia paama ï Pablo je ra. Silas abe je. Ererecua que eirao mbui asi ra. —Ira je jẽiruã nua, ï que ererecua ra. ²³ Mbia que eiruã nua tuchi ra. Tarõ ngue cote ra. —Jësaarõ tuchi, ï que ererecua eraarõsa je ra. ²⁴ Echeende que etarõ tuchi cote ra. Ei abe que emumbi ño ira je ra.

²⁵ Pablo que ñee ñee nguia Dios je itondi-ite mose ra. Silas rese. Irasei rasei abe no. Etarōi que ehandu ja quia ra. ²⁶ Aque mose que ibi titi titi i ra. Etarōsa abe que quiata quiata ja ra. Eiquesa abe que quiata ja ra. Eicuaa que nyera ja cadenas nda. Etarō ji si que nyera ja ra. ²⁷ Eraarōsa que ñumumba ra. Eiquesa eequia ji rese que mae nda. Etarō ji uchã nei nguiã ee. Nyebe ñee nguiã. —Tachiquia, i que tiquise rirō nda. ²⁸ Pablo que tasē ee ra. —¿Mbaerã nda erechiquia re? ¡A urecu chōte a resē! i que Pablo ee ra. ²⁹ —Tata eru, i que eraarōsa mbia mo je ra. Ique que Pablo rea cote ra. Titi titi i tuchi que ra. Ngoi que ngũĩã ndese Pablo je ra. Silas abe je. ³⁰ Eraarōsa que ecuruchoi taicuee cote ra. Ñee ee. —Sã Dios serirō seicua si. ¿Mañi ae ra se re? Siqui bei sacua Dios rese re, i que eraarōsa ra. ³¹ Pablo que ñee ee cote ra. Silas rese. — Jesucristo eicua. Ũquĩ mose ra Dios nderirō ndeicua si. Ũquĩ mose ra Dios ndechuchua jenda abe rirō huicua si, i que Pablo ee ra. ³² Jesús cheẽ ngue esenei senei ee ra. Echuchua jenda je abe que erenei nenei nda. ³³ Pablo iruã nua ji que eraarōsa irei irei ra. Silas iruã nua ji abe. Itondii mose raque. Bautizar i que eraarōsa je cote ra. Echuchua jenda ja je abe que bautizar i ra. ³⁴ Eraarōsa que Pablo querao mbuquiaru uchuchúaa ra. Silas abe no. Ey a tuchi que ra. Echuchua jenda abe ia tuchi. — Nandeico Dios icua co cote, i ñene. Nyebe eya tuchi Dios rese.

³⁵ Isamamimbe que ererecua ñee policia je ra. —Jëso Pablo mbusē cote. Silas abe jembusē, i que ee ra. ³⁶ Eraarōsa que ñee Pablo je ra. —A policia cuaē a. Jembusē sacua. Hui que jësi ra. Jëso turã cote, i rei que eraarōsa Pablo je ra. ³⁷ —Nya, i que Pablo ee ra. —¿Mbaerã ererecua ureiruã ñooño nde? Mbiasa. Mbae icua naa mose rocoi. Romanos ndaque ur e abe. Uretarō ñooño ngue ra. “Nandembusē checuayã”, i raque ure je co cote. Tei. Sã ũquĩ ngaē urembusē nyecua, i que Pablo ee ra. ³⁸ Pablo cheẽ ngue policia senei nguerecua je ra. “Romanos”, i mose que ererecua chiã cuaãcua i ja ra. ³⁹ Ererecua que nyoĩ Pablo rea cote ra. Silas abe rea. —Ureicua ñochĩ

jëje. Ureicua eã nda cote. Jëso a si cote, i que ererecua embusē turã mondo cote ra. ⁴⁰ Pablo que usē etarōsa si cote ra. Silas rese. Nyoĩ que Lidia chuchua ra. Hue que echi mbirĩ Jesús icuasa mundua ndua ra. Nyoĩ que hue si cote ra. Sucha tubiriã si.

17

Pablo que siqui Tesalónicaa ra

¹ Pablo que nyoĩ Antípola rĩ nda. Apolonia ñi abe echoi. Silas rese. Hue si que echoi ngasē Tesalónicaa ra. Huee que judíos chumu nuasa mo huee ra. Sina goga, i equia tuchua je. ² Pablo que oso hue sábado mose ra. Querabe que eriqui oso oso bei judíos chumunuásaa ra. Tres sábado que Pablo mbia mbaaquiato quiato huee ra. ³ Dios cheẽ ngue esenei senei ee ra. —“Mbia ra Cristo mbasi tuchi. Manonde ra quera si”, i que Dios cheẽ nda. Eĩ ngue mbia Jesús je cote ra. Jesús ae rĩi aico ñee ñee jëje, ae rei Cristo. Ae jësaarō arō mbeite quia, aque rei Jesús, i que Pablo embaaquiato quiato ra. ⁴ Emo emo ngue Jesús isi cote ra. Siqui que Pablo rui ra. Silas rui abe. Griegos tubiriã ngue siqui erui no nda. Dios icuasa rei ũquĩ. Griego ninisi tubiriã abe que siqui Pablo rui ra. Mbia chucua tuchi rei ũquĩ. ⁵ Judíos que ngueteãte quia mbia rese Pablo je ra. Mbia siqui mose Pablo rui. Ae Dios cheẽ andu sereãte quia, ũquĩ ngue ngueteãte quia mbia rese ra. Nyebe ngata chooño je munua nguiã. Ũquĩ ngue sucha tubiriã jenda mbupaama i tuchi ra. Mbia tubiriã ngue mbaba chee Jasón chuchua je cote ra. —¿Ma Pablo ma nde? ¿Ma Silas ma nde? Uremee nda mbia icua je, i rei que judíos ra. ⁶ Pablo oreã ngue ee ra. Silas abe oreã ngue ee ra. Nyebe que Jasón nduruchoi mbutiriri nguerecua je ra. Jasón ndesenda rese. Ñee nguerecua je. —Pablo ngaē ñochĩ mbia mbicua icua ja aa. Pe jenda mbicua icua jare. ⁷ Jasón eisi turã ñochĩ nguia uchuchúaa a. Ũquĩ icua ja que eriqui nandererecua je. César cheẽ emumba mumba bei chōchĩ nguiã ã. “Jesús quia ererecua tuchi César si re”, i chōchĩ Pablo, i que mbia paama i Pablo je ra. ⁸ Mbia ataque eandu mose que paama i ra. Ererecua abe que

paama i ra. ⁹ Ererecua que mbae isiquia isi Jasón si ra. Jasón ndesenda si abe. — Uremeembe ra jêje Pablo choi mose, i que ererecua ee ra. Ererecua que hui ja esi cote ra.

Pablo que siqui Beréaa ra

¹⁰ Jesús icuasa que Pablo mondochoi jei Berea ra. Silas rese. Aque isa mose bei. Ngasê ngue Berea ra. Nyoï que judíos chumunuasa cote ra. ¹¹ Judíos Berea jenda que earacua ra. Tesalónica jenda si. Berea jenda quiatu que Dios cheẽ ñanduse rete ra. Berea jenda que embesa ji tea jei jei ra. — Ma Pablo ñee Dios cheẽ ndui si, i que nyue ra. ¹² Nyebe que mbia tubiriã Jesús icua ra. Griegos tubiriã abe que Jesús icua ra. Griegos ninisi abe. Mbia chiicua rei griego s ninisi. ¹³ Pablo que Dios cheẽ senei senei Berea jenda je ra. Judíos Tesalónica jenda que jirandu ra. Jirandure que echoi Beréaa mbia mbiicua icua Pablo je ra. ¹⁴ Jesús icuasa que Pablo mondo ama ndisha quti ra. Silas que siquichõ Beréaa ra. Timoteo rese. ¹⁵ Ae Pablo curuchoi, ùqui ngue tiba esi ra. Atenas, i que sucha tubiriã je ra. — A ureico nyebi a, i que Pablo je ra. Echebi mose que Pablo ñee ee ra. —Silas jembu jei seje. Timoteo rese, i que Pablo ee ra.

Pablo que siqui Atenas nda

¹⁶ Pablo que siqui Silas raarõ arõ Atenas nda. Timoteo abe raarõ arõ. Dios abareã tubiriã ngue huee ra. Ùqui ndese quiatu que mbia riqui oo tuchi ra. Pablo que mae icua ùqui ndese ra. Pablo que paama ite mbia rese mae nda. Mbia Dios abareã nderequia requia mose. ¹⁷ Nyebe Pablo oso oso bei nguiã judíos chumunuasa. Ñee ñee tuchi hue jenda je. Judíos eã je abe ñee ñee tuchi hue jenda mbia je. Dios icuasa je. Plázaa abe que Pablo riqui ñee ñee tuchi mbia je ra. ¹⁸ Epicúreos resenda mo ngue ngaẽ ñee tuchi Pablo je ra. Estoicos resenda mo abe que ngaẽ ñee Pablo je ra. —¿Mbae ichõte Pablo quia nande je re? Echeẽse rete eriqui reae, i que emo emo nda. —Dios mo nñi eriqui ñee ñee nande je reae, i que emo emo nda. Pablo ñee ñee mose Jesús rñi. Pablo Jesús quera renei nenei mose. ¹⁹ Mbia que Pablo curuchoi ibi ato mo cote ra. Huee que ererecua riqui ñumunua nua

mbei ra. Ñee ngue Pablo je cote ra. —¿Mbae rñi ereico ñee ure je re? Embuchecua ure je. ²⁰ Ñee ngue urechanuate quia ra. Ndecheẽ embuchecua ure je. ¿Mbae ere quia re? i que mbia Pablo j e ra. ²¹ Atenas jenda mingo uquia reã mbae mo ndese. Ae siqui Atenas jenda rese, ùqui abe mingo uquia reã mbae mo ndese. Echeemo andu andu bei. Echeemo ndese bei.

²² Nyebe que Pablo juã mbia ite re ra. Ibi ato. Ñe e ngue mbia je cote ra. — Tacheẽ jêje, Atenas jenda. Dios ata rete rese jêingo reae. ²³ Secuatasa que amae mae dios tubiriã jembae rese ra. Emo ndese que amae nda. “Co Dios mbia mae sayã”, jenye que embesa mi nda. Ae je jêingo ñee ñee ùqui. Jemae sayã ndaque. Ae rñi aico ñe e jêje co. ²⁴ Co Dios que ibi chao ra. Mbae ao ja. Ae rei mbae rerecua. Ibi rñinda rerecua. Ibei jenda abe rerecua. Dios siquiã ño nguiã tuchiaqui re mbia chiao. ²⁵ —¿Aba ra mbae chao seje re? i eã ngue Dios quia ra. Ae quiarei mbae meesa. Nandembuquiarusa rei ae. Nande mingsosa rei ae. ²⁶ Mbia mñi ngue Dios chao ra. Aque rei mbia i ja aque. Emo eã ño nandeico nguiã ã. Nande ja chõ nandeico nguiã ã. Dios rei nandeaosa. Nyebe Dios mbae rerecua ja. —Co ra nyeacuquia co mose. Co ra mano co mose, i bei que Dios quia ra. Mbia recuarã ngue Dios mee mee mbia je ra. ²⁷ Dios que mbia mingo ibi rñi nda. † nda mbia Dios requia. † nda mbia Dios icua. Isho eãte Dios riqui a. Nande ja jii eriqui a. ²⁸ Dios rñi ae nandeico nguiã. Erñi ae nandeico nguiã ngata. Jemo abe que ñee nda. “Dios riirĩ ño nandeico ja nguiã ã”, i que jemo nda. ²⁹ Ae bei chõ nandeico nguiã ã. Dios riirĩ. “Dios” nandechĩ nguiã mbia chiao je. Oro ao ji je. Plata ao ji je. Sita ao ji je. ³⁰ Dios que mbia icua teachõ cose ra. Mbia aquiatuã mose. Namõ ño Dios riqui nguiã ñee mbia je co. “Jêhui chõ jêicua si”, i Dios quia mbia jaje co. ³¹ Dios que Jesucristo irabo ra. Jesucristo turã mbei. Jesucristo ra ñee emo je. “Jêso tata cuasu”, i ra ee. “Jêso ibate”, i ra emo je no. Manose chõ nda ñee. Dios mñi ño eicua nguiã. Dios que Jesucristo mbuquera si manonde ra. Nyebe ra Jesucristo emo mondo ibate. Emo

mondo tata cuasu no. ³² —Jesucristo que quera si manonde ra, i que Pablo ee ra. Mbia que iquia iquia chõchĩ nguiã Pablo cheẽ mose. Emo emo ngue ñee ee ra. —Emo mose quiatu ra ndecheẽ urechandu, i que eataque ra. ³³ Pablo que oso mbia recha cote ra. ³⁴ Emo emo ngue siqui erui ra. Ae Jesús cheẽ isi turã, ùqui ngue siqui bei erui ra. Dionisio, i que ùqui mo je ra. Ae rei mbia rerecua mo. Dámaris, i que cuña mo je ra. Emo emo abe que siqui Pablo rui ra.

18

Pablo que siqui Coríntoo ra

¹ Pablo que oso Atenas ndecha cote ra. Ngasẽ ngue sucha tubiriã mo cote ra. Corinto, i que hue je ra. ² Hue que judío mo ndiqui ee ra. Aquila, i que ee ra. Ponto jenda que ae ra. Priscila, i que eninisi je ra. Ùqui ngue ngaẽ namo Italia si ra. Italia recha ramo. Claudio judíos mombo ja mose Roma si. Pablo que oso Aquila chuchua ra. ³ Pablo que tuchua saã saã nguia mbae ire je ra. Eĩ ngue Aquila no nda. Tuchua raã naa mbei mbae ire je. Nyebe Pablo siquichõ nguiã erese. Quiei quiei erese. ⁴ Sábado mose que Pablo riqui oso oso judíos chumunuasa ra. Hue que eriqui bei Dios cheẽ nenei nenei judíos je ra. Judíos eã je abe no.

⁵ Silas que ngasẽ Macedonia si cote ra. Timoteo rese. Pablo que Dios cheẽ senei senei tuchi quia judíos je cote ra. Jesús mbuchecua checua tuchi ee. —Jesús rei Cristo. Ae jësaarõ arõ mbeit e quia, aque rei Jesús, i tuchi que Pablo ee ra. ⁶ Judíos que paama i Pablo je cote ra. Ñee icuã tuchi que ee ra. Nyebe Pablo huïrao mbaaba aba ee. Taso jendecha, i ñene. —“Aemingo bei ra se”, i rei Dios nande je. Jẽ nguiarei Dios cheẽ isi sereã tuchi. “¿Mbaerã Dios cheẽ eresenei eã ure je re?” jenyechĩ nda seje. ¡Dios cheẽ ngue asenei tuchi rei jëje ra jë! Nyebe taendecha. Judíos eã je Dios cheẽ tasenei senei cote, i que Pablo huïrao mbaaba aba ee ra. ⁷ Pablo que oso judíos recha cote ra. Judíos chumunuasa jii esi. Justo chuchúaa. Judío eã ndei Justo. Dios quiato que Justo ra. ⁸ Crispo

que judíos chumunuasa rerecua ra. Aque que Jesús icua cote ra. Echuchua jenda ja abe que Jesús icua cote ra. Corinto jenda tubiriã ngue Dios cheẽ ñandu ra. Mbia tubiriã ngue Jesús icua cote ra. Bautizar i que cote ra. ⁹ Itondaru mo ngue Pablo Jesús rea ra. Ñee ngue Pablo je cuu ra. —Eresiquichechĩ nda mbia si jẽ. Secheẽ esenei senei mbei. Erehuichĩ nda esi jẽ. ¹⁰ Co aico nderea quiatu co. Mbae icuã nda ñ eã ndeje. Secheẽ esenei senei mbei. A jenda ra seicua ja jiri cote, i que Jesús Pablo je cuu ra. ¹¹ Pablo que siqui arete Corinto ra. Un año ndobeichõ jiri que eriqui huee ra. Mbia mbaaquiato quiatu bei Dios rĩ.

¹² Galión ngue Acayo jenda rerecua ra. Aque mose que judíos ñimbicua tuchi Pablo je ra. Oo que erese ra. Curuchoi que ngererecua je ra. ¹³ Judíos que ñee ererecua je ra.

—Pablo que mbia mbaaquiato icuã icuã nguia ra. Dios rĩ. Nandererecua cheẽ ndui eã, i que judíos ra. ¹⁴ Pablo nda ñee nguiã ña. Ererecua Galión nane nguia ñee nguiã esi. Ñee judíos je. —Mbae icuã ndese que Pablo riqui ate. Eĩ nguia nda jeñee achandu nguia ña. ¹⁵ Mbae icuã ngue esaã eãte. Pablo cheẽ je chõ jëingo nguia paama i. Judíos cheẽ ñi ño jëingo nguia paama i Pablo je. Nyebe ra jeñee achanua. Jẽ ae jeñee turã jenyue ae, i que Galión judíos je ra. ¹⁶ Mombo ja que uchuchua si cote ra. ¹⁷ Sóstenes, i que judíos chumunua nuasa rerecua je ra. Judíos eã ngue paama i Sóstenes je ra. Isi icuã ngue ra. Iruã nua tuchi que ra. Ererecua Galión ndésaa que eiruã nua nda. Ererecua que teachõ nda.

Pablo tube Antioquíaa

¹⁸ Pablo que siqui atate Coríntoo ra. — Co acua quia jendecha co, i que uataque je cote ra. Jesús quiato je. Aquila abe que oso erese ra. Priscila abe no. Ngasẽ ngue ama nimíaa nda. Such a tubiriã. Cencrea, i que hue sucha tubiriã je ra. Pablo que ua chisia cote ra. —Acheẽ ngue Dios je, aque que amumbayã nda, i que ua sia cote ra. Siria icha rui que echoi cote ra. Ama ndisha icoi tuchi rui. ¹⁹ Sucha tubiriã je que ngasẽ cote ra. Efeso, i que sucha tubiriã je ra. Aquila

que siquichõ eresebe huee ra. Priscila, i que eninisi je ra. Pablo que oso judío s chumunuásaa ra. Ñee ñee tuchi que judíos je ra. ²⁰—Eico are jiri aa, i rei que judíos ee ra. Pablo que echeẽ mumba bei oso ra. ²¹—Taso Jerusalén. Mbia chumunua mose taico rã Jerusalén. Achube ra mae jendese. Dios sembu mose ra achube mae jendese, i que Pablo ra. Oso que Efeso si cote ra. Ama ndisha rui bei que echoi ra. ²²Ngasẽ ngue Cesaréaa ra. Hue si que Pablo si Jerusalén cote ra. Hue jenda rese que mae nda. Jesús quiato. Hue si que esi Antioquíaa ra. ²³Siqui arete que Antioquíaa ra. Oso que Galacia cote ra. Frigia abe no. Sucha tubiriã ngue embuchesea sea tuchi quia hue jenda ra. Jesús quiato mundua ndua hue jenda.

Apolos Dios cheẽ senei senei

²⁴Aque mose que judío mo ngasẽ huee ra. Efésoo. Apolos, i que ee ra. Alejandría jenda que ae ra. Dios cheẽ nenei neneisa tuchi mbia je. Dios cheẽ icuasa tuchi. ²⁵Apolos que Dios icha icuate ra. Mbia que embaaquiato quiato turã tuchi quia ra. Mbia mbaaquiato turã Jesús rĩ. Juan Bautista cheẽ achõ ngue eicua quia ra. Juan bautizar i mose mbia je. ²⁶Apolos siquicheã tuchi que eriqui mbia mbaaquiato quiato ra. Judíos chumunuásaa. Aquil a que echandu ra. Priscila rese. Nyebe que ñquĩ Apolos rerao mbaaquiato quiato tuchi ra. Dios icha que embuchecua tuchi ee ra. ²⁷Apolos que ose Acáyaa ra. Nyebe Jesús quiato emondo turã. Papel que embesa Acaya jenda je ra. Jesús quiato je Acaya jenda je. —Apolos jëisi turã, i ee. Apolos que ngasẽ cote ra. Ae Jesús icua quia, ñquĩ mbaaquiato quiato tuchi. ²⁸Apolos que judíos cheẽ siquisã tuchi ra. Judíos mbia mbaaquiato chooño mose. Jesús rĩ eã. Nyebe Apolos echeẽ ndiquisã. Dios cheẽ ngue esenei senei nguia ee ra. —Jesús rei Cristo. Ae jësaarõ arõ nguia, aque rei Jesús i tuchi que Dios cheẽ nenei ee ra.

19

Pablo que siqui Efésoo ra

¹Sita ibate bate ite rĩ ngue Pablo si ra. Ngasẽ ngue Efeso cote ra. Apolos siqui mose Corinto. Jesús quiato mo je que Pablo ngasẽ Efésoo ra. ²Pablo que ñee ee ra. —Jẽ Jesús isi mose, ¿Espíritu Turã abe ique jeñiangui re re? i que Pablo ee ra. —Espíritu Turã ndese ureiranuate, i que mbia Pablo je ra. ³Pablo que ñee ee ra. —¿Mbae rĩi bautizar i jëje re? i que ra. —Juan ñee nĩi ngue bautizar i ure je ra, i que Pablo je cote ra. ⁴Pablo que ñee ee ra. —Juan ngue bautizar i mbia je ra. Mbia hui mose huicua si. “Ae ra tu serui, aque jëicua jẽ. Jesucristo chõ aque re”, i que Juan nda, i que Pablo ra. ⁵Pablo cheẽ andu mose que bautizar i Jesús rĩ cote ra. ⁶Pablo que o chono earõ nda. Espíritu Turã ngue ique echiangui re cote ra. Ucheemo ngue esaã saã nguia cote ra. Dios cheẽ ngue embuchecua checua quia mbia je cote ra. ⁷Doce que ñquĩ nda. Jesús quiato.

⁸Pablo que oso oso quia judíos chumunuasa ra. Tres meses. Siquicheã tuchi que equia Dios cheẽ nenei nenei nda. —Ererecua tuchi quiarei Dios. Jesús jëicua rã, i que Pablo quia mbia je ra. ⁹Emo emo ngue Pablo cheẽ ñandu sereã nda. Echeẽ mumba mumba. Jesús rĩ ñee icuã icuã mbei mbia ja je. Nyebe Pablo nyao nguia esi. Pablo que Jesús quiato curuchoi esi ra. Curuchoi que Tiranno chuchúaa ra. Huee que eriqui embaaquiato quiato cote ra. ¹⁰Dos años ngue Pablo riqui huee ra. Nyebe mbia Asia jenda jirandu ja nguia Jesús rese. Judíos jirandu ja erese. Judíos eã abe no.

¹¹Pablo que mbae saã saã tuchi quia Dios quirãcuã je ra. Mbia mae sayã ngue esaã saã nguia ra. ¹²Mbia rasi mbucherõ sacua ngue mbia riqui tiru mbucha mbucha Pablo rese ra. Ñquĩ tiru que ecuruchoi choi quia mbia rasi je cote ra. Ñquĩ tiru ruruchoi mose, mbia rasi que nyerõ nyerõ nguia cote ra. Aba checuayã icuã abe que usẽ usẽ nguia mbia chiã si cote ra. ¹³Judíos mo ngue ngata beite quia ra. Sucha tubiriã mbuchesea sea bei que equia ra. —Aba checuayã icuã mbusẽ aquiature que ure ra, i que equia ra. —Jesús rĩi aba checuayã icuã nandembusẽ, i rei que nyue ra. Nyebe que

ñee aba checuayã icuã mo je ra. —Jesús quirãcuã ñii aico jembusẽ mbia si co. Ae Pablo senei senei nguia, i rei que judíos aba checuayã icuã je ra. ¹⁴ Sacerdote rerecua ririĩ abe que eĩ si ra. Siete eririĩ. Esceva, i que sacerdote rerecua je ra. Judío que ae ra. Ae ririĩ ngue eĩ si rei no nda. ¹⁵ Ñquĩ ngue ñee ndei aba checuayã icuã je ra. Aba checuayã icuã ngue echeẽ mumba ra. —Jesús aicua. Pablo abe aicua. ¿Aba chõ jẽ nde? Jaẽicuayãte se, i que aba checuayã icuã nda. ¹⁶ Aba checuayã nyireco que oo erese cote ra. Ucuu ucuu tuchi que ñquĩ ja rese cote ra. Ñquĩ siete rese. Aba checuayã icuã nyireco quirãcuã tuchi que esi ra. Aba checuayã nyireco que ñquĩ mbasi ja ra. Nyebe ñquĩ ndasi rasi uchã aba checuayã icuã si. Eirao eã ngu e nyoi uchã itaicuee rĩ nda. ¹⁷ Efeso, i que hue sucha tubiriã je ra. Hue jenda que jirandu ja erese ra. Judíos que jirandu ja erese ra. Judíos eã abe no. Nyebe hue jenda siquiche ja. Nyebe mbia ñee turã turã jate Jesús rĩ. ¹⁸ Jesús quiato mo ngue ngaẽ ngaẽ nguia ra. Eya eãte que huĩcuã ndese ra. Nyebe huĩcuã nenei nenei. ¹⁹ Mbia tubiriã ngue mbae icuã papel mbesa ji curucuaẽ nda. Libros de brujería. Munua ja que huee ra. Ñquĩ ngue esei sei mbia ja rësaa cote ra. Mba e isiquia ata tuchi raque que ñquĩ libros isiquia ra. Cincuenta mil plata. ²⁰ Mbia tubiriã ngue Dios cheẽ isi isi quia ra. Dios cheẽ irãtãte que mbia tea quia cote ra.

²¹ Aquere que Pablo ñee nda. —Taso Macedonia. Acaya abe. Aquere ra aso Jerusalén cote. Jerusalén osore ra aso Roma cote, i que ra. ²² Nguesenda nyeremo ngue emondo Macedonia nda. Timoteo. Erasto rese. Pablo que siquichõ are jiri huee ra. Asia.

Efeso jenda paama i ja Pablo je

²³ Aque mose que mbia paama i tuchi Jesús rĩ nda. ²⁴ Demetrio quia rei mbia mbĩcuã icuã nyii. Dios mbuae chuchua que esaã saã nguia ra. Mbae rendi ãtã je que eriqui sucha ñetẽ naa naa nda. Sucha ñetẽ tubiriã ngue esaã saã nguia ra. Dios mbuae chuchuarã. Diana, i que Dios mbuae je ra. Demetrio que mbae isi

tuchi quia sucha ñetẽ ndibishorõ nda. Eresenda tubiriãte que sucha ñetẽ naa naa ra. ²⁵ Nguesenda ja que emunua nda. Dios mbuae chuchua raãsa que emunua ja ra. Ñee ngue ee ra. —Mbae nandeisi turãte rei nguia nandechiao ribishorõ ã. ²⁶ Pablo riqui ñee ñee mbia je co. “Dios mbuae mbia chiao rei eicuãte”, i Pablo quia co. Mbia riqui echeẽ mumbayãte ã. A jendachõ eã ñene. Efeso miĩ eã ñene. Asia jenda abe eriqui echeẽ andu ã. ²⁷ Ñquĩ icuãte nande je. Nandechiao ra mbia isi isiã ñochĩ cote re. Mbia ra hui ja chõchĩ Diana chuchua si cote re. Diana abe si ra mbia hui chõchĩ nde. Nandererecua tuchi que Diana. Mbia chĩcua tuchi que ae. Asia jenda chĩcua tuchi que ae. ¡Mbia ra hui chõchĩ esi jẽ! i que Demetrio ra.

²⁸ Demetrio resenda echeẽ andu mose que paama ite ra. —¡Diana quirãcuãte jẽ! ¡Efeso jenda rerecua quirãcuãte jẽ! i tuchi que mbia tasẽ tasẽ nda. ²⁹ Hue jenda que paama i ja ra. Pare pare i tuchi. Pablo resenda nyeremo ngue eisi ra. Gayo. Aristarco rese. Macedonia jenda. Ñquĩ nyeremo ngue ecuruchoi mbia chumunuásaa ra. ³⁰ —Taique se abe. Tacheẽ ñee mbia je, i rei que Pablo ra. Jesús quiato que Pablo siquisã nda. ³¹ Asia jenda rerecua mo abe que ucheẽ mondo Pablo je ra. —¡Ereiquechĩ nda nde jẽ! i Pablo je. Pablo quiato que ñquĩ nda. ³² Mbia que pare pare i tuchi ra. Tasẽ tasẽ ja que ra. Hue rĩ ja mbia ndua eãte. Mbae miĩ ndese ndua eã. Paama i chooño ja. Eaquiãtuã ño ñumunua ñooño nguia. ³³ Mbia mo ngue mbae senei senei ja Alejandro je ra. Judíos que Alejandro mua mbia ite re cote ra. —Echeẽ mbia ja je, i que ee ra. Alejandro que o mee mbia je ra. —¡Jẽquiriri chõ jẽ! i rei ngue ee re. —Mbia je tacheẽ. I nda paama iã judíos je, i rei ngue re. ³⁴ —Judío chõ Alejandro riqui re, i ja que mbia ra. Nyebe mbia riqui tasẽ tasẽ mbeite re. Dos horas. —¡Diana quirãcuãte jẽ! ¡Efeso jenda rerecua quirãcuãte jẽ! i tuchi que mbia tasẽ tasẽ nda. ³⁵ Secretario rei ererecua mo. Aque que mbia cheẽ siquisã cote ra. Ñee ngue ee cote ra. —Tacheẽ jẽje, Efeso jenda. Efeso jenda chõ nande re. Diana ndei nandererecua. Nande rei Diana

ndaarõsa. Diana naanguia ngue tu ibei si, aque raarõsa chõ nande re. Diana chuchua raarõsa abe chõ nande re. Mbia jirandu jate ùquĩ ndese. ³⁶ Emo eicuayã eãte. Nyebe jêquiriri chõ jẽ. ¡Jêaquiatuã jêsaã saã eã ño jẽ! ³⁷ Ae jêisi seru nae, ùquĩ mbae mbuquiachã eãte dios mbuae chuchúaa. Ûquĩ ñee icuã icuã eãte dios mbuae rĩĩ. Dios mbuae jenderecua rĩĩ. ³⁸ Demetrio ñee icuãse mose emo nii, sã esi nandererecua chuchúaa. Demetrio resenda ñee icuãse mose emo nii, sã echoi nandererecua chuchúaa. Huee chõ ererecua riqui nguiã mbia cheẽ andu. Sã echoi ja ererecua je. Sã ñee ñee ja nyue ererecua résaa. Mbae icuã nii. ³⁹ Mbae mo nii abe mose, jeñee mbia chumunua mose. ⁴⁰ Jesús quiato que nandeisi chooñochĩ nda. Nandechimbicua ñooño ño nguiã. Nandererecua ñee arõte nande je. Echeẽ nda nandesibishorõ eã, i que secretario ra. ⁴¹ Aquere que hui mbia si ra. Mbia mbui que cote ra.

20

Pablo nyoĩ Macedóniaa, Gréciaa abe

¹ Mbia quiriri mose que Pablo Jesús quiato munua nda. Embaaquiato quiato jiri. —Co acua quia co, i que ee cote ra. Macedóniaa ngue echoi cote ra. ² Hue jenda sucha mbuchesea seate que echoi ra. Jesús quiato mundua ndua. Ngasẽ ngue Gréciaa cote ra. ³ Huee que eriqui are jiri ra. Tres nyasi. —Taso Siria ama ndisha rui, i rei que cote ra. Jirandu que judíos icuã ndese cote ra. —Nandeisi, i nda judíos quia Pablo rĩĩ nda. Nyebe Pablo ru nguiã nyebi si Macedonia. ⁴ ã ngue nyoĩ erese ra. Eata rete. Sópater. Berea jenda. Aristarco. Segundo abe. Tesalónica jenda rei ùquĩ. Gayo. Derbe jenda. Timoteo. Tíquico. Trófimo. Asia jenda rei ùquĩ. ⁵ Ûquĩ ja rane nguia nyoĩ nguiã ure si. Troas que echi nguiã ureraarõ. ⁶ Fiesta de Pascua mose que urecu Filipos ra. Aquere que ureso ama ndisha rui cote ra. Cinco días que tu ure je ama ndisha ite re ra. Urecuasẽ namo ngue Troas cote ra. Ae ureraarõ arõ nguia, ùquĩ ngue uresiiti cote ra. Urecu are jiri que hue cote ra. Siete días.

Pablo nyoĩ Troas

⁷ Jesús quiato que ñumunua ja domingo mose cote ra. Mbichae sia sia nyue. Pablo que embaaquiato quiato quia ra. —Taso isamami, i que ra. Nyebe embaaquiato quiato itondiite mose chee. ⁸ Sucha ibátee que echi ñumunua nda. Eironguia ibate tuchi que ra. Ibate tuchi que echi ñumunua nda. Tata rendi tubiriã ngue etesae tuchi ra. ⁹ Mbia mo ngue chĩ ibate ra. Ventana tose. Etiarõ namo ngue ra. Eutico, i que ee ra. Uque que huĩ ngoi ibate ra. Pablo que ñee oco tuchi embeesi esi ra. Eque que tu ngoi ibate si ra. Mano ndei que ra. Tambuchuruã, i rei que emo nda. Eraaque chõ eriqui reaẽ. ¹⁰ Pablo que nguichi u erea ra. Oo tuchi que erese ra. Quiaama ngue ra. —¡Jêsiquichechĩ nda jẽ! Manoãte, i que Pablo mbia je ra. ¹¹ Pablo que osoi nyui ra. Mbichae que echisia sia ra. U que ra. Mbia que embaaquiato quiatube ra. Eresaitõ ndabe chee. Oso que erecha cote ra. ¹² Ae ngoi nae, erasiã ño ngue mbia curuchoichĩ nguiã. Mbia ia tuchi que ngoi je rese cote ra.

Pablo nyoĩ Milétoo

¹³ Pablo que ñee nda. —Ibi rĩ taso se Asón. Hue si ra aso jendese cote. Ama ndisha rui, i que ra. Nyebe ure rane ureso nguiã ama ndisha rui. ¹⁴ Ae urecuasẽ nguiã Pablo je Asón cote. Pablo que oso urerese am a ndisha rui cote ra. Canoa naanguia ye. Urecuasẽ ngue Mitilene cote ra. ¹⁵ Hue si que ureso ra. Isamami ngue ejoõ acua mo urechucuã cote ra. Quío, i que hue ejoõ acua je ra. Isamami nongue que urecuasẽ Samos cote ra. Hue si que ureso Trogíloo ra. Huee que urequeneã urecua ra. Isamami ngue urecuasẽ Milétoo cote ra. ¹⁶ Pablo que quicoi asi Asia si ra. Nyebe uresoã Efésoo. —Tacuasẽ quicoi oso Jerusalén. Fiesta de Pentecostés taicusu oso ngasẽ, i que Pablo ra.

Pablo ñee Jesús quiato rerecua je, Efeso jenda je

¹⁷ Mileto si que Pablo emo mondo Efésoo ra. —Jenyu, i que amei je ra. Jesús quiato rerecua je. ¹⁸ Ûquĩ ngue ngaẽ ee ra. Pablo que ñee ee ra. —Cosete que achu Asia ra. Seicuate raque se. Sechisaã jêicuate raque. ¹⁹ Dios cheẽ ngue asenei senei turã

tuchi quia jêje. Secuasu que asaã saã eãte quia jêje. Acheseo tuchi que sequia mbia rese. Judíos que sembasi mbasi tuchi quia ra. “Taiquia”, i rei que judíos quia seje ra. ²⁰ Dios cheẽ ngue asenei senei mbeite quia jêje. Asiquicheã mbei que sequia erenei nenei jêje. Jembitirõ sacua. Jeñumunua nua mose. Jenyuchúaa ja abe que aico Dios cheẽ nenei nenei jêje. ²¹ Acheẽ tuchi que jêje. Judíos je. Judíos eã je ab e no. “¡Jêicuã si jêhui rã! Jesucristo jêicua rã”, ae tuchi que sequia jêje. ²² Co aso quia Jerusalén co. Co Espíritu Turã sererao quia Jerusalén co. Mañi ño nda seje pee. ²³ Co mii ño aicua nguiã. Espíritu Turã ngue ñee seje ra. Sucha mbuchesea sea mose que eriqui ñee ñee seje. Mbia icuãte ra seje. Sembasi rae. Sematã ndae. Setarõ ndae. Espíritu Turã ngue sembiirandu ra. ²⁴ Sesiquicheãte ùquĩ si. Sã seiquia quiatu. “Dios turã esenei senei mbei quia mbia je”, i que Jesús seje ra. Aque mii ndese chõ aico nguiã ndu a co. Echeẽ mii ndese. I nda echeẽ amumba eã. ²⁵ Dios nandererecu que asenei senei tuchi jêje. Jemae eã mbei ra serese cote. Aicuate se quia co. ²⁶ Jemo siqui sereã mose Jesús rese, se eã ño cote re. Jê ño cote re. Jê ja je chõ ngue asenei senei ndesẽ. ²⁷ Dios cheẽ ngue asenei senei jate jêje. Asiquicheã mbei que sequia erenei nenei jêje. Dios cheẽ mo ngue atibo tibo eãte jêje. ²⁸ ¡Jêingo turã ño nyiese jê! ¡Jesús quiato abe jêteaquiato quia jê! Espíritu Turã ngue ñee jêje resẽ. “Jesús quiato rerecuarã jê”, i que Espíritu Turã jêje resẽ. Jesús quiato jêteaquiato quia jê. Ùquĩ ndibishorõ ngue Jesús nguqui mondo ra. Umano mose. ²⁹ Seso mose ra emo ngaẽ ñee ñooño jêje. Tambiirĩ irĩ, i ra jêje. Eicuã ño ùquĩ nde. Nyacua rã sí. ³⁰ Jendese ra emo ndiqui. Jesús quiato mbaaquiato icuã icuã. Jesús quiato mbiirĩ irĩ. “I nda Jesús quiato siqui nanderese”, i ra ùquĩ. ³¹ Jêteaquiato jê. Jaembaaquiato quiatu tuchi que se. Tres años. Jê ja que jaembaaquiato quiatu. Acheseo tuchi que sequia jendese. ³² Aico jendecha Dios je a. Aico jendecha Dios turã je a. ¡Dios cheẽ turã jemumbayã mbei quia jê! Dios cheẽ nda jembuquirãcuã. Dios cheẽ nda jemingo tuchi Jesús quiato

rese. ³³ Mbae isiquia que achosei chosei ãte quia mbia mbae aẽ. Mbia irao abe que achosei chiãte quia aẽ. ³⁴ Seiuate rei que equia aẽ. Se sí chõ aquiei quiei nguiã icua. Seresenda mbaerã abe que aquiei quiei quia aẽ. ³⁵ Jaembaaquiato quiatu beite que se. “Jêquiei quiei”, ae beite que sequia jêje. “Mbaecha reã je mbae jemee mee”, ae que sequia jêje. Jesús cheẽ ndese jendua. “Ae mbae meeño nguia emo je, eya tuchi chõ aque re. Ae eo jenda isi, aque quia eya tuchiã jiri”, i que Jesús nande je ra, i que Pablo Efeso jenda je ra.

³⁶ Aquere que Pablo ngoi nguiã ndese ra. Ñee ngue Dios je ra. Ùquĩ ndes e ja. ³⁷ Mbia que nyese o ja Pablo rese ra. Quiaama ama ngue ra. Eritii que esiite it e ra. ³⁸ —Jemae iã nda serese cote, i que Pablo ee ra. Nyebe que eya eã tuchi ra. Pablo rese que echoi erasaa ra. Ama ndisha rimia ndese. Pablo so rese mae.

21

Pablo nyo: Jerusalén

¹ Urecuata que ùquĩ ndecha cote ra. Canoa naanguia ye que ureso cote ra. Cos que ureso ra. Isamami ngue ureso Rodas cote ra. Hue si que ureso Pátaraa cote ra. ² Huee que canoa mo chi ure je ra. Fenisia rĩ ngue esi quia ra. Aque ye que urea cote ra. Eye que ureso cote ra. ³ Chipre rese que uremae nda. Ejoõ acua. Ejii rĩ ngue ureso ra. Síriaa que ureso ra. Tiro que ure cu mbiirĩ cote ra. Huee que canoa yenda jea jea ra. ⁴ Jesús quiato que urembirõ hue jenda ra. Siete días que ureico erese ra. Espíritu Turã ngue hue jenda mbucheẽ Pablo je ra. —¡Eresochĩ nda Jerusalén jê! i rei ngue Pablo je re. ⁵ Aquere que ureso cote ra. Jesús quiato que nyo: ja urerese ra. Ama nimia ndese. Eresebe echoi urerese. Nguirĩ abe ruruchoi. Ama ndisha rimia ndes e que urecoi ja urenia ndese ra. Ñee ñee Dios je. ⁶ Urechiquiaama ama ja que cote ra. —Co urecu quia co, ure que ee ra. Canoa ye que ureso cote ra. Hue jenda que nyo: nyebi uchuchúaa cote ra.

⁷ Tiro si que ureso cote ra. Ureso que Tolemaida ra. Huee que urecheẽ ñee Jesús quiato je ra. Ureitõ mii ngue erese ra.

⁸ Isamami ngue ureso cote ra. Cesaréaa que urecuasê nda. Felipe chuchúaa que ureso ra. Ae que Jesús cheê nenei neneisa ra. Ae que mbaecha reã mbu quiarusa je ra. Aque chuchúaa que urecu ra. ⁹ Cuatro que Felipe rucucha ra. Eruã ja. Dios cheê nenei neneisa ja que ũquĩ nda. ¹⁰ Huee urecu are jiri mose que emo ndu ra. Judea si. Agabo, i que ee ra. Dios cheê nenei neneisa que ae abe ra. ¹¹ Ae que tu ure je ra. Pablo numbicuasa que eisi ra. O que echucua eye ra. Hui abe que echucua ra. Pablo numbicuasa je. Ñee ngue cote ra. —Espíritu Turã ndiqui ñee ndeje a. “ƒ nda judíos ndecua pee Jerusalén. Neme nda judíos eã je cote”, i que Espíritu Turã nda, i que Agabo Pablo je ra. ¹² Ure eandu mose que urecheê Pablo je ra. Cesarea jenda abe que ñee ee ra. —¡Eresochĩ nda Jerusalén jê! ure ja rei ngue ee re. ¹³ Pablo que ñee ure je ra. —¿Mbaerã jêingo nyeseo seo serese re? ¿Mbaerã jêingo sembia eãte re? ¿Mbaete ere? Sã secua Jerusalén ae. Sã sei quia Jesús rĩ ae, i que Pablo ra. ¹⁴ Pablo que uresiquisã aroneate ra. Nyebe urecheê eã nguiã e e cote. —Sã Dios ae riqui ñee ñee ee no, ure chee que ra.

¹⁵ Ureico quiatu que cote ra. Ureso que Jerusalén cote ra. ¹⁶ Jesús quiato mo abe que nyoĩ urerese ra. Cesarea jenda. Chipre jenda mo ngue siqui Jerusalén nda. Masón, i que ee ra. Jesús quiato tuchi que ra. Cose tuchi que eriqui Jesús rese ra. Cesarea jenda que urererao Masón nyuchúaa ra. Huee que urecu erese ra.

Pablo oso Jacobo rea

¹⁷ Jesús quiato ia tuchi que urecuasê mose Jerusalén nda. Ureisi turã ngue ra. ¹⁸ Isamami ngue Pablo si Jacobo rea ra. Ure abe que ureso erese ra. Huee que amei ja chi ra. Jesús quiato rerecua. ¹⁹ Pablo que ñee ee ra. Mba e renei nenei ja ee. —Dios que siqui tuchi serese ra. Se echeê nenei nenei mose judíos eã je, i que Pablo Jesús quiato rerecua je ra. ²⁰ Pablo cheê andu mose que ñee turã turã Dios je ra. Ñee ngue Pablo je cote ra. —Jesús quiato tubiriãte que judíos cote ra. “¡Moisés cheê

ndui si chõ nandeico jê!” i tuchi que ũquĩ nguia ra. ²¹ ũquĩ ndiqui ñee icuã icuã nderĩĩ ũquĩ. “Pablo que judíos ataque mbui Moisés cheê si ra”, i equia nderĩĩ ũquĩ. “‘Coche rei Moisés cheê jemumba. ¡Circuncisión jêsaãchĩ jendiirĩ je jê! ¡Judíos ataque chisaã saã nda jêsaãchĩ jê!’, i que Pablo quia judíos je ra”, i rei equia nderĩĩ ũquĩ. ²² ¿Mañi nande ra re? Jesús quiato ra ñumunua ja judíos. Jirandu mose ndereco mose a. ²³ ¡ĩ ere jê! Mbia cuatro que siqui urerese ra. ũquĩ ngue ñee Dios je ra. “Ã nda uresaã ndeje”, i que ũquĩ Dios je ra. ũquĩ nda esaã ee cote. ²⁴ ũquĩ erao Dios chuchúaa. ũquĩ na si esaã nde abe. Nembuturã sacuã. Mbae isiquia emondo ee Dios chuchúaa. Queñi ua sia cote. ƒ ere quiatu. Mbia ra jirandu jate nderese. “Pablo abe riqui Moisés cheê mumbayã tuchichĩ nande rã si”, i ra nderĩĩ cote. ²⁵ Judíos eã je que nandechê Jesús quiato je. Nandechê miĩ ño ngue nandemondo ee. ƒ nande chõ ngue ee. “Mbia soo mondo mondo mose dios mo je, ¡aque soo ra jêuchĩ jê! ¡Eruqui resebe ra soo jêuchĩ jê! ¡Mbae ruqui ra jêuchĩ jê! ¡Jeninisi rese rocoĩ nda jêingochĩ emo ndese jê! ¡Jendu rese rocoĩ nda jêingochĩ emo ndes e jê!” nande que judíos eã je, i que Jesús quiato rerecua Pablo je ra.

Soldados rerecua Pablo isi

²⁶ Pablo que ũquĩ cuatro querao cote ra. Dios chuchúaa que ererao ra. Isamami ngue Pablo ñimbitirõ nda. ũquĩ cuatro rese. Oso que ñee Dios chuchua rerecua je cote ra. —Aque mose ra mbae mo ureiquia Dios je cote, i que Pablo ee ra. ²⁷ Siete días que echi huee ra. Judíos mo ngue mae Pablo rese cote ra. Asia jenda mo. Dios chuchúaa Pablo chĩ mose que judíos mae erese ra. ũquĩ ngue mbia mbũcuã Pablo je ra. Oo que Pablo rese ra. Isi que ra. ²⁸ Tasê tasê ngue ñee mbia je ra. —¡Israel jenda! Jenyu rã urerese. Pablo nandehi rã. Ae quia oso oso beite nguiã ñee icuã icuã judíos rĩĩ. Moisés cheê ni i abe quia eriqui nguiã ñee icuã icuã mbeite. Dios chuchua rĩĩ abe quia eriqui nguiã ñee icuã icuã mbeite. Judíos eã mo abete quia equeruchĩ nguiã

Dios chuchúaa. Dios chuchua mb̄icuāte nyeresē, i que mbia paama i Pablo je ra. ²⁹ Pablo quia ñi siquichĩ nguiã Trófimo ndese. Pablo quia Trófimo querao abareãte nguiã Dios chuchúaa judíos je. Nyebe ngue mbia riqui nguiã ñee icuã icuã ee. Judíos eã nguia ñi ngue Trófimo nde. Efeso jenda quia ñi ngue Trófimo nde. Nyebe ngue mbia riqui nguiã ñee icuã icuã Pablo je. ³⁰ Hue jenda que ñimb̄icuā tuchi Pablo je ra. Oo ja que erese ra. Isi que ra. Mbutiriri que Dios chuchua si ra. Dios chuchua que ematã cote ra. ³¹ Pablo nda mbia iquia nguiã ña. Emo ngue oso ñee soldados rerecua je ra. —Mbia Pablo iquia serite quia pee, i que oso ee ra. ³² Soldados rerecua que soldados munua nda. Oficiales abe no. Nyo: asi que mbia icuã ndea cote ra. Mbia que Pablo iruã nua eã cote ra. Soldados rese mae mose. ³³ Ererecua que oso Pablo rea ra. Pablo isi que ra. —Echucua cadenas je, i que soldados je Pablo rĩ nda. Ererecua que ñee mbia je cote ra. —¿Aba co re? ¿Mbae icuã esaã jēje re? i que mbia je ra. ³⁴ Hue rĩ ja mbia ñee eã ee. Mbia que ñee ata ata ee ra. Tasē tasēte que ñee ee ra. Ñee ñooño ererecua je. —¿Mbae ra aba icua jeñee nde? i chee que ererecua mbia je ra. —Pablo jencya mbirĩ na cuartel, i que ererecua soldados je ra. ³⁵ Pablo ruruchoi que ra. Ngasē ngue eiquesa rurubi cote ra. Hue que mbia icuã icuã sí Pablo je no nda. Nyebe soldados ecuruchoi nguiã sui cote. ³⁶ Mbia que tasē tasē ngaē nguia erui ra. — ¡jēiquia rei ae! i que mbia cuaē nguia erui ra.

Pablo ñee mbia cuabē je

³⁷ Pablo nda emingue nguiã soldados chuchúaa chã. Ae Pablo ñee ño nguiã ererecua je. —Tacheē na, i que ererecua je ra. ³⁸ Ererecua que ñee Pablo je cote ra. —¿Griego cheē ereicuate nde re? Egipto jenda ereico reĩ seje. Ae eicuã icuã ndiqui gobierno je, ¿ũquí nderecua eã nde re? ¿Nde mbia iquia iquiasa rerecua eã nde re? Cuatro mil mbia iquiasa. ¿Nde ererao eã turúquiaa re? i que ererecua Pablo je ra. ³⁹ Pablo que ñee ee ra. —Tei. Judío chō se re. Tarso jenda chō se re. Sucha tubirĩa tuchi

que Tarso de Cilíciaa ra. Tacheē na mbia je, aechĩ nguiã ndeje, i que Pablo ererecua je ra. ⁴⁰ —Eno. Echeē ee, i que ererecua ra. Eironguia ibate rese que Pablo ñi juã nda. O que emee mbia mbuquiriri ra. Mbia quiriri mose que ñee ee ra. Judíos cheē ngue esaã mbia je ra.

22

¹ —Seataque, seandu rã. “Eicuã”, jenyechĩ nguiã seje. Nyebe tacheē jēje, i que Pablo ra. ² Pablo judíos cheē naa mose, mbia que quiriri ja tuchi cote ra. Pablo que ñee mbei mbia je ra. ³ —Judío chō se re. Társoo que achaacuquia ra. Tarso de Cilicia. Aa que atiarō nda. Jerusalén ngue atiarō nda. Gamaliel que sembaaquiatusa ra. Nanderamei ndui si que sembaaquiatusa ra. Eraã si. Dios cheē ngue amumba sereã tuchi ra. Sã jēingo namo ã no. ⁴ Seicuã tuchi que eriqui Jesús quiato je nyii ra. Emo emo ngue aiquia chee ra. Emo emo ngue aru aru quia tarō nda. Mbia ninisi abe que atarō tarō nguia ra. ⁵ Sacerdote rerecua que cartas mondo seje ra. Judíos rerecua abe que cartas mondo seje ra. Damáscoo nda aso nguiã ererao chã. Judíos je nda cartas arao nguiã ña. Hue jenda je. Damáscoo nda aso nguiã ña. Jesús quiato requia requia. Aa nda aru nguiã tarō ña. Aa nda aru nguiã eiruã nua ña. Jenderecua ũquí icuate raque. Jeñee ee ae.

Aico uba Dios rese co cote, i Pablo

⁶ Acuasē nda Damáscoo chã nde. Tenda ibate que tata mo tu seresae ra. Ibate si que eru ra. Tata rendi que seresae tuchi ra. Sembua tuchi que ra. ⁷ Tata rendi rese mae mose que acoi oso íbii ra. Echeē mo ngue achandu ra. “Saulo, Saulo. ¿Mbaerã ndeicuāte riqui seje re?” i que seje ra. ⁸ “¿Aba nde re?” ae que ee ra. “Jesús rei se. Nazaret jenda. Ae je ndeicuāte riqui”, i que seje ra. ⁹ Seresenda que siquiche tuchi ra. Mae ndei ngue tata rese re. Echeē nguia echanuate nguiã. ¹⁰ “¿Mañi ae ra se re, Sererecua?” ae que se ra. “Dios que ndeirabo ra. Ehuã cote. Ecuasē oso cote. Damáscoo. Mbae rĩ nda acheē ja ndeje huee cote”, i que Jesús seje ra. ¹¹ Tata rendi que seresa

mungue ra. Seresayã. Nyebe seresenda sererao nguiã seo rese. Damáscoo.

¹² Huee que emo ndiqu i ra. Ananías, i que ee ra. Moisé s cheẽ ngue emumbayã tuchi quia ra. Judíos hue jenda que ñee turã ja quia ee ra. ¹³ Ananías que tu serea ra. Ñee ngue seje ra. “Saulo, Jesús quiato ereico co cote. Emae cote”, i que seje ra. Seresa turã ngue cote ra. Amae ngue erese cote ra. ¹⁴ Ananías que ñee seje ra. “Nanderu rerecua que Dios ra. Dios que ndeisi cose ra. Ae Dios chosei quia, ãquĩ icua sacuaã ngue Dios ndeisi cose ra. Jesús turã ndese mae sacuaã ngue ndeisi cose ra. Jesús cheẽ andu sacuaã ngue ndeisi cose ra. ¹⁵ Dios cheẽ nda eresenei senei mbia ja je cote. Ae erchandu, ãquĩ nda eresenei senei mbia ja je cote. Ae rese eremae, ãquĩ nda eresenei senei mbia ja je cote. ¹⁶ ¿Mbaerã ereico chõte a re? Ehuã na. Sã Jesús quiato bautizar i ndeje. Echeẽ na Jesucristo je. Sã Dios ndeicuaã mbutiã”, i que Ananías seje ra.

Dios que atea cuu ra, i Pablo

¹⁷ Achube que Jerusalén nda. Aso que ñee Dios je ra. Dios chuchúaa. Huee que Jesús atea cuu ra. ¹⁸ Jesús que atea ra. Ñee ngue seje ra. “Eso asi Jerusalén si. A jenda ra ndecheẽ mumba mumbate, nde serenei nenei mose. Eso erecha” i que Jesús seje ra. ¹⁹ Acheẽ ngue Jesús je ra. “Sererecua, a jenda que seicuate nyii ra. Seicuãte que eriqui nyii ra. Jesús quiato que asirõ sirõ nguia judíos chumunuasa si nyii ra. Atarõ tarõ ngue sequia ra. Airuã nua ngue sequia nyii ra. ²⁰ Mbua Esteban iquia mose, seyate que ãquĩ mose ra. Huee que aico ra. Eiquiasa irao que asaarõ nda”, ae que Jesús je cuu ra. ²¹ Jesús que ñee seje ra. “Eso. Taremondo isho. Secheẽ nda eresenei seneite judíos eã je”, i que Jesús seje ra, i que Pablo mbia je ra.

²² Judíos eã nii ñee mose que mbia nyi-ibute cote ra. Pablo cheẽ andu sereã cote. —iPablo nandeiquia rei jê! ¶ nda eriquiã cote, i que judíos tasẽ tasẽ nda. ²³ Mbua paama i ja Pablo je. Tasẽ tasẽ. Huiãrao mbaaba aba. Ibi tuba ara ara mombo mombo ibate. ²⁴ Soldados rerecua que ñee cote ra. —Pablo jendaõ matã. iNandeiruã

nua jê! ¶ nda ñee, i que ererecua ra. —¿Mbaerã mbia ñee icuã icuã ndeje re? i Pablo je. ²⁵ Soldados que Pablo chucua ra. Iruã nua nda eña nde. Pablo que ñee capitán je cote ra. —¿Mbaerã nda seiruã nua nde? Romano ño se resẽ. Mbae icuã asaã eãte resẽ, i que ra. ²⁶ Capitán ngue oso ererecua mbiirandu cote ra. Pablo cheẽ nguire. —iEreiruã nuachĩ nda jê! Romano ño ae re, i que capitán nda. ²⁷ Ererecua que oso ñee Pablo je cote ra. ¿Romano nde re? i que ee ra. Ae, i que ee ra. ²⁸ Ererecua que ñee mbe ee ra. —Mbae isiquia que amondo tuchi mbia je ra. “Romano” i nonde seje, i que ererecua Pablo je ra. Pablo que ñee ee ra. —Romano mbei chõ se re. Sechiacuquia mosenda bei, i que ra. ²⁹ Pablo iruã nua eã ngue cote ra. Mbua que hui esi cote ra. Mbua siquiche ja tuchi que cote ra. —Pablo nandechucuachĩ. Romano ño eriqui re, i que mbia cote ra. Ererecua abe que siquiche tuchi cote ra. Pablo o cuare.

Ererecua ñu munua Pablo cheẽ andu

³⁰ —¿Mbaerã judíos paama i Pablo je re? i que soldados rerecua ra. Isamami ngue ererecua ataque munua cote ra. Sacerdote rerecua ja. Amei ererecua ja. Pablo que ecuruchoi ererecua achõ je cote ra. ãquĩ ererecua ñee sacuaã ee.

23

¹ Pablo que mae huĩ ererecua ja rese ra. Ñee ngue ee ra. —Seresenda, mbae turã ndese aico bei co. Namo abe. Nyebe sesiquicheã mbei riqui Dios si co, i que Pablo ra. ² Ananías, i sacerdote rerecua je. Aque que ñee Pablo ji jenda je ra. —Pablo churu rese jengua, i que ra. ³ Pablo que ñee ee cote ra. —Dios ra ucuã nderese jê. Ndeturã eresaã ñooñoichĩ nguia. “iMoisés cheẽ nda jemumbachĩ jê!” ere rei que ure je. ¿Mbaerã ereico echeẽ mumba mumba nde re? “Jengua Pablo churu rese”, ere chõchĩ nguia serĩ. Moisés cheẽ mumba, i que Pablo ee ra. ⁴ Pablo cheẽ andusa que ñee asite ee ra. —¿Mbaerã erecheẽ icuã sacerdote rerecua je re? Dios emingo rei a resẽ, i que Pablo je ra. ⁵ Pablo que ñee ee ra. —Sacerdote rerecua eã eriqui rei nguia seje. ¶ nda acheẽ eãte eriã. Aicuayãte quia

ñi se re. “Jenderecua rĩ jẽingochĩ nguiã ñee icuã”, i rei que Dios ñee nande je resẽ, i que Pablo ra.

⁶ Hue rĩ ja ererecua ndua eã. Fariseos, i que ererecua ataque je ra. Saduceos, i que eataque je no nda. Nyebe Pablo ñee nguiã ee. —Seresenda, se rei fariseo. Seru ja rei fariseos no. “Mbia mano je ra quera si”, ae quiatu nguiã co. Ûquĩ je chõ mbia riqui nguiã paama i seje. Ûquĩ je chõ ngue sereru nguiã jẽje, i que Pablo ererecua je ra. ⁷ Pablo cheẽ nguire que ererecua ñee icuã icuã nyue ra. Saduceos que ñee icuã icuã fariseos je ra. Fariseos abe que ñee icuã icuã saduceos je no nda. ⁸ Saduceos que ñee nguia ra. —Mbia raaque ra quera si eã. Angeles eã ibatenda. Mbia aĩ abe eã, i que saduceos quia ra. Fariseos que echeẽ sobeishĩ nda. —Eraaque ra quera si. Angeles siqui ã ndesẽ. Mbia aĩ abe siqui ã ndesẽ, i que fariseos ra. Nyebe ererecua ñee icuã icuã nguiã nyue. ⁹ Tasẽ tasẽ tuchi que nyue ra. Fariseos mo ngue juã ñee nda. Ûquĩ ndei embesasa. Ñee ngue Pablo rĩ nda. —Pablo que mbae icuã saã eãte quia. Emo aĩ ñee ee reae. Angel mo ñee ee re no ae. Nyebe nandeico turã ee no. Ûquĩ mose ra nandeico turã Dios je abe, i que fariseos ra. ¹⁰ Mbia que ñee icuã icuã mbei chõchĩ nguiã nyue. Soldados rerecua ireĩte que eriqui ra. Mbia que Pablo iquia serĩte quia ee ra. Nyebe ñee soldados je. —Jẽso Pablo rea. Jendao rã jenyuchúaa, i que ererecua soldados je ra.

¹¹ Isa que Jesús ru ñee Pablo je ra. —Eresiquiche techĩ nda, Pablo. Serenei nenei ngue se a, eĩ ere si ra oso serenei nenei Roma, i que Jesús Pablo je ra.

Pablo nandeiquia, i rei mbia

¹² Isamami ngue judíos ñee ja nyue ra. —iPablo nandeiquia jẽ! i ja nyue. Mbae mo nda nandeu eã mbei, Pablo iquiayã mbei mose. Nandeyu eã mbei ra Pablo iquiayã mbei mose. Chã Dios nandembasi, Pablo iquiayã mose, i tuch i que judíos ñee nyue ra. ¹³ Ae Pablo iquia serĩte quia, ùquĩ cuabẽte que ra. Cuarenta que ra. ¹⁴ Ûquĩ ngue nyoĩ ja ñee mbia rerecua je ra. Sacerdote rerecua je abe no. —Mbae mo nda

ureu eã mbei, Pablo iquiayã mbei mose. Chã Dios urembasi, Pablo iquiayã mose. ¹⁵ “iPablo embu ure je!” jenyẽ soldados rerecua je. “Pablo rese uremae na”, jenyẽ soldados rerecua mbiĩrĩ irĩ. Ñeenda cúa ra urechiquitirõ erese. Pablo ra ureiquia chã, i rei que judíos ra.

¹⁶ Pablo nongue riirĩ ngue jirandu erese ra. Aque que oso Pablo mbiirandu ra. Soldados chuchúaa. —iMbia ra nyiquitirõ tirõ nderese jẽ! iNdeiquiachĩ nda jẽ! i que Pablo je ra. ¹⁷ Nyebe Pablo ñee soldado mo je ra. —Senongue riirĩ erao ndererecua je. Ñee nda ndererecua je chã, i que Pablo ra. ¹⁸ Nyebe ererao nguiã nguerecua je. —Pablo que acuanĩndu mbu ra. Mbae i chõ nda ndeje, i nguerecua je. ¹⁹ Ererecua que acuanĩndu querao eo rese ra. Pe jiri que eñi ñee ee ra. —iMbae ere u ñee seje re? i que ererecua ra. ²⁰ Acuanĩndu que ñee ererecua je cote ra. —Judíos ra ñee ndeje. “Pablo embu ererecua chumunua mose. Ererecua ra Pablo cheẽ ñandu”, i ra nembĩrĩ irĩ. ²¹ Ñee ñooño nda ndeje. iEcheẽ nda eremumbayãchĩ jẽ! Judíos cuabẽ nda nyiquitirõ tirõ erese. Cuarenta. “Mbae mo nda nandeu eã mbei Pablo iquiayã mbei mose. Nandeyu eã mbei ra Pablo iquiayã mbei mose”, i tuchi judíos, i que acuanĩndu ererecua mbiirandu ra. ²² Soldados rerecua que ñee acuanĩndu je ra. —iEquirĩrĩ chõ oso! iErecheẽchĩ nda emo je jẽ! i que ee ra.

Pablo mondo ererecua Félix je

²³ Ererecua que ñee ererecua ataque mo je cote ra. —Sã soldados icoquiatu. Sã echoi Cesarea itondáruu. Sã doscientos choi ibi rĩ. Sã setenta choi ticuasú ato. Sã doscientos choi ira racuatirõ ji rerecua. Cesarea ra jẽso itondaru, i que soldados rerecua ñee nda. ²⁴ —iTicuasú jẽisi mua Pablo rendacuã jẽ! iPablo jendao turã nguia jẽ! Jendao turã ererecua Félix je, i que soldados rerecua ra. ²⁵ Embesa ji que emondo Félix je ra. i ngue carta mbesa ra: ²⁶ —Se rei Claudio Lisias. Co ambesa quia ndeje co, Félix. Mbia rerecua tuchi quiarei nde. ²⁷ Co amondo quia ndeje co. Pablo, i equia ee. Judíos eisichĩ neaẽ. “Nandeiquia”, i rei ereaẽ. Se chõ ngue asiquisã nguiã. Romano ndei ae. Nyebe mbia asiquisã nguiã esi. ²⁸ Judíos

rerecua chumunua mose que Pablo arao ee ra. “¿Mbaerã mbia icuãt e riqui Pablo je re?” ae rei ngue ñee ererecua je re. ²⁹ “Pablo nandetarõ”, i rei que judíos quia ra. “Pablo nandeiquia”, i rei que judíos quia ra. Pablo siquiã ndaque mbae icuã ndese. Judíos cose ndare cheẽ nguire chõ ngue judíos paama i Pablo je ra. ³⁰ Airandu que erese ra. “Judíos ra Pablo iquia”, i que mbia mo ñee seje ra. Nyebe aico nguiã Pablo mondo ndeje aque. Ae eicuã icuãte riqui Pablo je, ùquĩ je que acheẽ nda. “Jẽso quia ñee Félix je”, ae chõ ngue ee ra. Hasta luego. † ngue carta mbesa ra.

³¹ Soldados que Pablo curuchoi isa ra. Nguerecua cheẽ nguire. Ngasẽ ngue Antípatris ra. ³² Soldados que nyoĩ ibi rĩ, ùquĩ ngue ngaẽ nyebi isamami nda. Ae nyoĩ ticuasú ato, ùquĩ ngue nyoĩ bei ngasẽ Pablo ruruchoi ra. ³³ Ngasẽ ngue Cesaréaa ra. Soldados rerecua chimbresa que emondo mbia rerecua je ra. Pablo abe que emondo mbia rerecua je ra. ³⁴ Mbia rerecua que mae huĩ carta echimbresa rese ra. —¿Ma jenda nde re? i que Pablo je cote ra. —Cilicia jenda rei se, i que Pablo ee ra. ³⁵ —Ae ñee icuã icuã nguia ndeje, ùquĩ ngasẽ mose ra ndecheẽ achandu ja, i que ererecua Pablo je ra. —Pablo jẽteaquiatu tuchi Herodes chuchúaa, i que soldados je cote ra.

24

Judíos ererecua mbicuãse Pablo rĩ

¹ Cinco días mose que sacerdote rerecua ngasẽ Cesaréaa cote ra. Ananías, i equia sacerdote rerecua je. Ererecua ataque mo ngue ngasẽ erese ra. Tértulo abe que ngasẽ erese ra. Abogado rei Tértulo. Ngasẽ ngue ecuaẽ ñee ñooño Félix je ra. Pablo rĩ. ² Soldados que Pablo curucuaẽ ererecua chumunua mose ra. Tértulo que ñee icuã tuchi Pablo rĩ cote ra. Ererecua nda embicuã nguiã Pablo rĩcharã ña. Ñee ngue ererecua je ra. —Ndeturãte eriqui ure je co, Urererecua. Ndeaquiátute eriqui ur e je co. Urembiate equia co. ³ Nyebe “iaanye” ure bei nguiã ndeje co, Félix. ⁴ Ureandu mbirĩ na. Urecheẽ oco eã nda ndeje nye. ⁵ Pablo quiarei siqui chooñoa judíos je. Judíos

mbuchesea sea ja. Embicuã icuã uchue. Nazarenos, i que judíos ataque mo je ra. Ùquĩ nderecua rei Pablo. ⁶ Pablo que Dios chuchua mbicuã serĩte rei ra. Nyebe ureisi nguiã. Urerao rei que judíos rerecua chumunua mose ra. ⁷ Lisias tu chõchĩ soldados rurucuaẽ cote. Ureriquisã. Pablo rirõ icuã ureo si. ⁸ “Jeñee icuãse mose Pablo rĩ, jeñee ño oso Félix je”, i que Lisias ure je ra. Echeẽ Pablo je no. Ereirandu ra Pablo rese cote. Eicuã ndese, i rei que Tértulo Félix je ra. ⁹ — Ae beite, i ja judíos Tértulo cheẽ mose. Ñee icuã icuã ja Pablo rĩ.

Pablo ñee ererecua Félix je

¹⁰ Ererecua que ñoomee Pablo je cote ra. —Nde echeẽ seje cote, i chõ ñoomee nguiã ee. Pablo que ñee ee cote ra. —Urererecua ima nde. Ndeaquiátute. Nyebe sebite riqui nguiã secheẽ mose ndeje. Æ ngue ñee ñooño nguia serĩ nda. Echeẽ tasibishorõ ndeje. ¹¹ Namó jiri que aso Jerusalén nda. Doce días. Acheẽ ñee ngue oso Dios je ra. Echeẽ ñee mbia je ae. Sã mbia nembiirandu ae. “Ae beite” i ra mbia ndeje. ¹² Emo je que aico ñee icuã icuã eãte Dios chuchúaa ra. Mbia que ambucheẽ icuã eã nguia nyue ra. Judíos chumunuásaa que aico eã mbia mbicuã icuã nda. Mbia chuchua ite re abe que aico eã mbia mbicuã icuã no nda. ¹³ Æ ñee ñooño ño nguiã serĩ. Æ mae ãte seicuã mo ndese resẽ. ¹⁴ Aque mĩ ndese chõ aico resẽ. Dios cheẽ yasu rui bei chõ aico nguiã co. Dios cheẽ yasu quiarei eicuã eã. Dios rei ureru rerecua bei. Co aico Dios icua co. Co aico Moisés cheẽ icua co no. Co aico Dios cheẽ mbuchecuaa chimbresa icua co no. ¹⁵ Co aico Dios icua ùquĩ na si co. Mbia raaque ra quera si no. Ùquĩ aicuate. Mbia icuã nda quera si. Mbia turã na si. Quera ja chõ ndae. ¹⁶ Nyebe aico Dios cheẽ ndui bei co. Nyebe sechiã cuaãcuã i eã Dios si. Mbia si abe. ¹⁷ Cosete que aso a si ra. Muchos años. A achube a cote. Mbae mee mee sacua mbaecha reã je. Seresenda je. Dios je abe mbae mee. ¹⁸ Achimbuturã ngue Dios chuchúaa ra. Mbia eãsa. Mbia ambicuã eã. Judíos Asia jenda que mae serese ra. Dios chuchúaa. ¹⁹ Sã ùquĩ ngaẽ serenei ndeje. Seicuã mose, sã ùquĩ ngaẽ ñee ndeje. ²⁰ Sã ã abe ñee ndeje. Seruruchoi rei que

judíos rerecua chumunua mose ra. Mbae i áte que seje ra. “Mbae icuã ngue eresaã nda”, i eã ngue ererecua seje ra. ²¹ “Mbia mano je ra quera si, ae chõ ndei nguiã co. Ûquĩ je chõ ngue sereru nguiã jẽje”, ae que ererecua je ra. Ûquĩ i equia seje reae, i que Pablo Félix je ra. Félix rei ererecua.

²² —Emo mose ra acheẽ ndeje, i que Félix Pablo je ra. Félix jirandu tuchi rei Jesús chimbaaquiato rese reaẽ. —Sã soldados rerecua ru rã. Huee quia nda acheẽ nguiã cote. Mañi ño nda aba ndeje cote, i que ererecua Pablo je ra. ²³ Félix que ñee capitán je cote ra. —Pablo jẽteaquiato bei jẽ. Jẽhui jẽhui jiri esi. Sã equiato ngaẽ ngaẽ erea. Mbae mondo mondo ee, i que Félix ra.

²⁴ Emo mos e jiri que Félix ngasembe Cesaréaa ra. Eresebe que eru ra. Drusila, i que eninisi je ra. Judía rei eninisi. —Pablo jendu rã. Pablo cheẽ tachandu rã. Jesucristo rĩ tachandu, i que Félix ra. ²⁵ Pablo que tu ñee ee ra. —Sã mbia siqui turã Jesús rã si. Sã mbia ñimbirãcuã mbae icuã si. Dios ra mbia icuã mbuchao, embasi sacuã, i tuchi que Pablo Félix je ra. Félix chiã ngue cuaãcuã i Pablo cheẽ mose ra. Nyebe ñee Pablo je. —Eso cote. Serecochĩ mose ra acheembe ndeje, i que Félix Pablo je ra. ²⁶ —Pablo ra mbae isiquia mondo chee seje. Se embui sacuã, i rei que Félix ra. Nyebe Félix “echu” i i bei nguiã Pablo je. ²⁷ Eĩ mbei que Félix quia ra. Dos años. Aquere que Félix ererecua eã cote ra. Porcio Festo que esiquicharõ nda. Félix que Pablo tarõ mbei mĩ nda. —I nda judíos paama iã seje, i que ra.

25

Pablo ñee ererecua Festo je

¹ Festo que ngasẽ Cesaréaa cote ra. Félix rendaque re, mbia rerecuarã. Tres días mose que esi Jerusalén cote ra. ² Huee que sacerdote rerecua ñee icuã ja Pablo rĩ nda. Judíos rerecua abe ñee icuã ja Pablo rĩ. Festo je ñee ñee Pablo rĩ. ³ —Urembia jiri rã. Pablo eru Jerusalén, i ja rei que sacerdote rerecua Festo je ra. Iquia nda eña nde. Ñeenda cúaa. ⁴ —Pablo tarõ ji ñi Cesarea pee. Aruã nda se. Namu jiri ra aso pee, i que Festo ra. ⁵ —Sã jenderecua

abe nyoi serese Cesaréaa. ¿Mbae jenye quia Pablo je re? ¿Mbae icuã esaã nde? Nyao pee teñee seje, i que Festo ra.

⁶ Festo que siqui mbirĩ Jerusalén nda. Ocho o diez días. Hue si que eru nyebi Cesaréaa ra. Isamami ngue esi mbia chumunuásaa ra. Ae que mbia rerecua cote ra. Ngoi que huee ra. —Pablo jendu rã. Echeẽ tachandu cote, i que mbia je cote ra. ⁷ Pablo que ique cote ra. Judíos Jerusalén jenda que ñee icuã icuã Pablo rĩ nda. Maende rocoĩ mbae icuã naa mose. Ñee ñooño erĩ. ⁸ Pablo que ñee echeẽ mose ra. Judíos cheẽ ngue esibishorõ nda. —Mbae icuã mo asaã eãte resẽ. Judíos chimbesa amumbayãte resẽ. Romanos nderecua cheẽ amumbayãte no ndesẽ. Dios chuchua abe ambicua eãte no ndesẽ, i que Pablo ra. ⁹ —¿Ndeso sereãte Jerusalén nde? Mañi ae ra se quia ndeje hue reae, i rei que Festo Pablo je ra. —I nda judíos paama iã seje. Judíos tambia jiri, i que equia ndua ra. ¹⁰ Pablo que ñee ee ra. —Romanos nderecua raque jẽ. Aico raque jẽsaa a. Jẽ nguiatu jeñee seje. A jẽingo raque seicuate ã. Mbae icuã mo asaã eãte judíos je resẽ. ¹¹ Se mbae icuã naa tuchi mose, ¡sei quia se jẽ! Judíos ñee ñooño mose serĩ, ¿mbaerã nda semondobe judíos je re? Semondo aroneate ee. Ererecua tuchi je semondo rã. Sã ae quia ñee seje, i que Pablo Festo je ra. ¹² Festo que ñee nye-cuayã cuayã nguesenda je ra. Aquere que ñee Pablo je cote ra. —“Semondo ererecua tuchi je”, ere que seje. Taremondo ee cote, i que Festo Pablo je ra.

Pablo cheẽ tachandu, i Agripa

¹³ Aquere que Agripa si Cesaréaa ra. Ererecua rei ae. Berenice rese que esi ra. Festo rea. ¹⁴ Huee que itõ mocoĩte ra. Festo que Agripa mbiirandu ja Pablo rĩ nda. —A emo tarõ ji ñi a. Félix que etarõ mĩ nda. ¹⁵ Seso mose Jerusalén, sacerdote rerecua ñee tuchi seje. “Pablo eiquia”, i rei ngue seje re. Judíos rerecua abe ñee icuã icuã tuchi Pablo rĩ. ¹⁶ Acheẽ ndei ngue ee re. “Tei. Mañi ae ra mbia mo iquiachõ nde. Mbia eicua nenei eã mose seje. Ae ñee icuã nguia erĩ, sã ñquĩ ngaẽ ñee ee. Sã ñee nguia nyue sésaa”, ae que ee ra.

17 Judíos que ngaẽ a cote ra. “Isamami jeñee tachandu Pablo je”, ae que ee ra. “Pablo jendu rã”, ae que isamami serimba je cote ra. 18 Pablo ucuayãsa que juã ja rei cote ra. Ñee icuã tuchite reĩ nda Pablo riĩ seje. Pablo chisaã icuã mo ngue embuchecuayã ñochĩ nguiã seje. “Mbia ra Pablo mbicuã tuchichĩ nde”, aechĩ ngue se re. 19 “Judíos rã eã ño Pablo. Judío ndua rã eã ño Pablo riqui nguiã ndua”, i chõ ngue judíos ñee ñee seje ra. Jesús, i que emo je ra. Judíos que ñee icuã icuã tuchi Jesús riĩ nda. “Jesús que quera si manonde ra’, i que Pablo judíos je ra”, i que Festo Agripa je ra. 20 —“¿Mañi ae ra se re?” aete que se ra. Nyebe que acheẽ ee ra. “¿Ndeso sereãte Jerusalén nde? Huee quia nandechẽ”, ae rei que ee ra. 21 “Sã ererecua tuchi quia ñee seje. Semondo ee Roma”, i que Pablo seje ra. “Eno. Aremondo je nda ee re”, ae que ee ra. Nyebe ngue atarõ mbeite miĩ nguiã, i que Festo Agripa je ra. 22 Agripa que ñee ee ra. —Se abe nda aque cheẽ achandu rã ña, i que Festo je ra. —Eno. Isamami nda echeẽ erechandu cote, i que Festo ra.

23 Isamami ngue Agripa huĩrao turã mingue ra. Berenice rese. Ererecua irao. Ererecua ataque chumunua mose que echoi ique ra. Soldados rerecua que chi ja huee ra. Mbia rerecua mo abe que chi ra. —Pablo jendu cote, i que Festo mbia je cote ra. 24 Festo que ñee cote ra. —Tacheẽ ndeje, Agripa. Jẽ abe je tacheẽ, mbia rerecua. A eriqui a cote. Pablo, i equia ee. Ae riĩ judíos riqui ñee mbeite seje. “Eiquia”, i bei seje. Jerusalén jenda abe ñee mbei erĩ. Cesarea jenda rã. “Sã mano”, i bei seje. 25 ¿Mbae riĩ nda aba eiquia re? Mbae icuã mo esaã eãte resẽ. Ae quiarei ñee. “Semondo rã ererecua tuchi je”, i que Pablo seje ra. Nyebe tamondo ee. 26 ¿Mbae i ra aba embesa mondo ee re? Mbae icuã ngue esaã eãte. Nyebe Pablo aru nguiã jẽje a. Ndeje chõ ngue aru nguiã, Agripa. Echeẽ ee. I nda eicuã erembuchecua. I nda eicuã ambesa mondo ererecua tuchi je. 27 ¿Ma nda aba etarõi mondochõ nde? Eicuã mbesa iriã mose, i que Festo Agripa je ra.

26

Pablo ñee ererecua Agripa je

1 Agripa que ñee Pablo je ra. —¿Mbae i mbia quia ndeje re? Nde quia echeẽ cote, i Agripa. Pablo que o sui ñee ee ra. 2 —Secheẽse rete ndeje, Sererecua. Judíos que ñee icuã tuchi quia serĩ nda, Sererecua. 3 Nde quiarei ureicuasa tuchi. Judíos icuasa tuchi nde. Urecheẽ icuã icuã ereicuate nde. Nyebe nderoseĩ nguiatu rã secheẽ andu.

4 Judíos maesate raque se, señetẽ mosenda bei. Serecua quitu. Jerusalén abe. 5 Se rei fariseo. Setiarõ namo mosendachõ ndei fariseo se. Judíos seicuate raque. Fariseos achõ ño ureramei ñee mumbayã mbei. 6 “Mbia raaque ra ambuquera si”, i que Dios ureramei je cose ra. Dios ra ucheẽ nyabiã. Nyebe “ae bei” ae nguiã ee. Ñquĩ niĩ ño judíos riqui nguiã seucuayã ã. Ñquĩ niĩ ño mbia riqui nguiã ñimbicuã seje ã. 7 “Mbia raaque ra ambuquera si”, i que Dios ra. “Ae bei”, i ja Israel jenda quia ee ã. Nyebe Israel jenda riqui bei nguiã echeẽ ndui si ã. “Mbia raaque ra Dios mbuquera si”, ae sequia se abe co. Ñquĩ je chõ judíos icuã icuã ndiqui nguiã seje, Agripa. 8 ¿Jẽ abe je Dios mbia raaque mbuquera aroneate re?

Seicuã tuchi Jesús quiato je nyii, i Pablo

9 Se abe que seicuã icuãse rete riqui Jesús quiato je cose ra. Nazaret jenda chõ Jesús re. 10 Seicuã icuãte que ee Jerusalén nda. Sacerdote rerecua que ñee seje ra. Nyebe ngue aico nguiã Jesús quiato tarõ tarõ mbeite cose. Sacerdote rerecua cheẽ nguire. Jesús quiato iquia iquia mose, “coche rei” ae que sequia ra. 11 Jesús quiato que airuã nua tuchi quia ra. “I nda huĩ Jesús si”, ae rei que sequia ra. Sucha tubiriã ngue ambuchesea sea quia ra. Jesús quiato je seicuã sacua. Judíos chumunuasa mbuchesea sea. Paama ae tuchi que sequia Jesús quiato je nyii ra. Isho tuchi que aico oso oso Jesús quiato requia ra. Seicuã tuchi sacua ee.

Aico uba Dios rese co cote, i Pablo

12 Emo mose ngue aso rei nguiã Damáscoo. Sacerdote rerecua semondo mose. 13 Tacheẽ tuchi ndeje, Sererecua. Tenda nandeite re mose que tata mo

tu seresae ra. Ibate si que seresae ra. Seresenda abe resae. Tata rendi que ureresae tuchichĩ nguiã tenda si. ¹⁴ Tata rendi rese ma e mose que urecoi íbii ra. Echeẽ mo ngue achandu ra. Hebreo cheẽ. “Saulo, Saulo, ¿mbaerã ndeicuaẽte riqui seje re? Nde sí chõ erechimbasi mbasi nguiã aque. Ticuasú rã tuchi quiarei nde aba cheẽ mumba mose. Sã ticuasú riqui nambacua mbuti no. Sã eriqui hui mbaba ira racua echí no. Ñquĩ na tuchi quiarei nde”, i que seje ra. ¹⁵ “¿Aba nde re?” ae que ee ra. “Jesús rei se. Ae je ndeicuaẽte riqui”, i que seje ra. ¹⁶ “Ehuã na. Aico nyecua ndeje a. Serenei nenei sacua mbia je. ‘Jesús rese que amae nda’, ere bei quia mbia je. Mbae mo abe ra ambuchecua ndeje. Ñquĩ abe teresenei senei mbia je. ¹⁷ Judíos eã je taremondo. Secheẽ nenei nenei sacua. Ñquĩ o taisi eicua icua mose ndeje. Judíos o abe taisi eicua icua mose ndeje no. ¹⁸ Taremondo judíos eã je. Terembaaquiату quiatu. Í nda eriquiã mbae icua ndese. Í nda eriqui mbae turã ndese. Í nda eriquiã aba mbirĩ irisa rui. Í nda eriqui Dios rui. Í nda Dios icua. Í nda eicua ambutiã esi. Í nda Dios ñquĩ ngue recoe umbaerã”, i que Jesús seje ra.

Pablo Dios cheẽ senei tuchi Agripa je

¹⁹ Ibatenda cheẽ ngue amumbayã nda, Agripa. ²⁰ Dios cheẽ ngue asenei senei tuchi mbia je ra. Mbia Damasco jenda je. Jerusalén jenda je abe no. Judea rurubinda je abe no. Judíos eã je abe no. “¡Jẽicuã si jẽhui chõ jẽ! Dios icha rui jẽingo. Jẽingo turã. ‘Dios icha rui eriqui’, i nda mbia jẽje chã”, ae que ee ra. Embaaquiату quiatu. ²¹ Nyebe judíos seisi nguiã Dios chuchúaa. Nyebe eriqui nguiã “nandeiquia” i seje. ²² Dios que serea quiatu bei quia ra. Namó abe. Nyebe aico echeẽ nenei nenei mbei mbia ja je. Mbaecha je. Mbaecha reã je abe. Moisés cheẽ ndui si aico ñee ñee mbia je co. Dios cheẽ mbuchecuasa rui si aico ñee ñee mbia je co. ²³ Í ngue Dios cheẽ mbuchecuasa embesa cose ra: “Mbia ra Cristo mbasi mbasi. Aquere ra mbia eiquia. Ae rane nda quera si mbia raaque si. Ae ra mbia mbiirandu ngueco mose

uquera rĩ. Judíos mbiirandu. Judíos eã abe mbii randu”, i que Dios cheẽ mbuchecuasa mbia je cose ra, i que Pablo Agripa je ra.

²⁴ Festo que ñee Pablo je cote ra. — Erequiachã ño nguiã co, Pablo. Embesai rese mae tuchire erequiachãte equia co, Pablo, i que Festo tasẽ Pablo je ra. ²⁵ — Aquiachã eãte se resẽ, Festo. Acheẽ nyecuate raque jẽje. Dios cheẽ tuchi chõ asenei nguiã jẽje co. ²⁶ A Agripa riqui raque a. Nandererecua tuchi. Echeẽ ee. Ae rĩ aico ñee jẽje, ñquĩ ngue Agripa icua tuchi ra. Nyebe sesiquiche eãte riqui nguiã ñee ee. Secheẽ icua jate equia co. Jesús que ñee nyecuayã eã mbia je ra. Jesús mbae saã nyecuayã eã, i que Pablo ra. ²⁷ — ¿Dios cheẽ mbuchecuasa cheẽ ndebite re, Agripa? Ndebite que ra, i que Pablo ee ra. ²⁸ — “Jesús quiato ra nde cote”, ¿erechĩ equia seje re? i que Agripa Pablo je ra. ²⁹ Pablo que ñee ee ra. — Nde mi eã. Seandusa ja. A jengu ja a. Jesús quiatorã na jẽ, se rã si, aechĩ nguiã jẽje. Jengasa ra chi eã nguiã, se rã si, i que Pablo ra.

³⁰ Pablo ñeende que ererecua juã cote ra. Agripa. Festo abe. Berenice abe. Ae chi ngoi erese, ñquĩ abe que juã nda. ³¹ Nyoĩ que pe jiri cote ra. Ñee ñee nyue. — Pablo mbae icua saã eã tuchi chõ nguia re. Eiquia aroneate quia eriqui re. Etarõ abe aroneate quia eriqui re, i que erecua nyue ra. ³² Agripa que ñee Festo je ra. — “Semondo rã ererecua tuchi je”, i chõchĩ Pablo. Í nda aa chõ nandehui esi, ñee eã mose. “Semondo rã pe ererecua tuchi je”, iã mose, i que Agripa ra.

27

Pablo mondo Roma quiti

¹ — Pablo tamondo Italia, i que ererecua ra. — Jẽisi suruchoi, i que soldados rerecua mo je ra. Julio, i que soldados rerecua je ra. Augusto rimba, i que ñquĩ soldados je ra. Emo abe que ecuruchoi isi ra. Se abe que aso erese ra. Lucas rei se. ² Aristarco abe que oso urerese ra. Macedonia jenda rei ae. Tesalónica, i sucha tubiriã je. Ureique ja que canoa cuasu ye ra. Adramitio jenda rei canoa. Asia quiti que urecuata ra. Sucha mbuchesea sea sacua hue jenda.

³ Isamami ngue urecuasẽ Sidón cote ra. Julio turãte que Pablo je ra. Ecuatasa que eriqui ra. Nyebe Pablo si uquiato rea. Equiato que etequiatu ra. ⁴ Urecuata si que ama ndui ra. Quiririã ngue ureriquisã nda. Canoa mbucuatayã. Nyebe ejoõ acua mo uresiichã nguiã. Eibichi que ureso quia cot e ra. —I nda quiririã nandembutiba eã, ure que ra. Chipre, i que ejoõ je ra. ⁵ Cilicia que urechucua cote ra. Panfilia abe que urechucua nda. Urecuasẽ ngue Mira cote ra. Licia, i que ibi je ra. ⁶ Huee que soldados rerecua canoa cuasu nongue tea ra. Alejandría jenda rei canoa. —Oso ra Itáliaa, i que ure je ra. —Aque ye jẽingue, i que ure je ra. Ae ureso nguiã eye cote. ⁷ Ureitõte que oso quia ra. Ureque atate que ama ndisha rasa ra. Urecuasẽ nyee que Gnídoor ra. Quiririã mbeite que ureruba quti ra. Nyebe ejoõ acua mo uresiichã nguiã. Creta, i que ejoõ je ra. Salmón ngue urechucua nda. ⁸ Ejoõ acua que uremama jiri ra. Quiririã icua icua ngue ure je ra. Buenos Puertos que urecuasẽ cote ra. Lasea, i que hue rurubinda je ra. Sucha tubiriãte que ra.

⁹ Ureitõ mocoite que huee ra. Quiririã tuchite chee que ra. Aba ireite que quiririã cote ra. Ama mose. Nyebe que Pablo ñee mbia je ra. ¹⁰ —Nandecuata i i mose ra canoa ñimi nande je. Mbae ra ñimi ja canoa yenda. ¡Nande abe ra nandemanochĩ jẽ! i que Pablo ee ra. ¹¹ Soldados rerecua que Pablo cheẽ mumba ra. Canoanya cheẽ mumbayã. —Nyao rei, i que soldados rerecua ra. ¹² —Canoa ndua icuãte a. Quiririã aronea. Nyao rei a si. Ma nandecuasẽ ãte Fenice. Huee nda nandecu are jiri nguiã. Huee que quiririã eã jiri. Nyao huee, i que ureataque ra. Fenice rei sucha tubiriã. Ejoõ acua jenda.

Quiririã mbia iquia serĩ

¹³ Quiririã ngue uba cote ra. Ichu chooño jiri que cote ra. —Nandecuatasã jirichĩ cote, i que ureataque ra. Canoa que embucuatã cote ra. Ejoõ acua ibi que ureso quia ra. ¹⁴ Urecuata ramo mose que quiririã icua tu ure je ra. Ejoõ acua quti que eru ra. Noreste, i que aque quiririã je ra. ¹⁵ Quiririã ngue canoa mbucuatayã ureruba quti ra.

—Sã quiririã ae nanderuruchebi serao, ure chee que ra. ¹⁶ Ejoõ quitera quti que ureso ra. Ejoõ ngue quiririã nyoote ure si ra. Clauda, i que ejoõ je ra. Canoa ñetẽ ngue urembuti serao quia ra. Canoa cuasu riita rese. Ejoõ quitera quti que canoa ñetẽ urechuchã canoa cuasu ye cote ra. Eusite raque. ¹⁷ Canoa ñetẽ ngue urechuchã canoa cuasu ye ra. Canoa cuasu que echucua chucua ra. —Quiririã nda embuquiat-achĩ nande je re, i que ra. Mbia siquiche tuchi que ra. —¡Eriiri iri quti ra nyaochĩ jẽ! Nandejaã ndae, i que nyue ra. Nyebe que tiru canoa aronda mbuquichi cote ra. —Sã canoa ae si quia nandererao surucuata, i que nyue ra. ¹⁸ Isamami abe que quiririã icua icua mbeite ra. Nyebe mbia mbae mombo mombo nguiã ii. Canoa yenda. Emumbebi sacua. ¹⁹ Aquere que ureitõ si no nda. Isamami ngue mbae uremombo mombo ja cote ra. Canoa mumbebi tuchi cote. ²⁰ Ureitõ mocoĩ mocoĩ tuchi ama ndisha riite re. Itõ nguicoi bei que ure je ra. Quiririã mbei. Pã i bei. Tenda checuayã mbei que ra. Nyasi tata abe checuayã bei que ra. —Nandecuaseã mbeichĩ nda ibi je re. Ama ndisha riite re ra nandemanochĩ nde, ure chee que ra.

²¹ Mbae que ureu eã mocoĩ mocoĩ nda. Nyebe que Pablo juã ñee mbia je ra. Canoa yenda je. —Seresenda, secheẽ ngue jemumbachĩ nda. Secheẽ aba mumbayã mbichĩ. Crétaa nandecuchõ mbichĩ. I nda canoa yenda nandemomboate ii. Mbae mbuquiachã nondechĩ. ²² ¡Jeñimbirãcuã ño jẽ! Nande mo nda mano eã. Canoa nda quiachã. Nande quiatu ra nandequiachã. ²³ Dios rimba rei se. Dios que ángel mo mbu ñee seje isa ra. ²⁴ “¡Eresiquichechĩ nda jẽ, Pablo! Eremano eã ndae. Erecuasẽ nyee r a ererecua Roma jenda je. Nderĩ nda nderesenda mo manoã. Dios ra etequiatu ja,” i que ibatenda seje ra. ²⁵ Seresenda, jeñimbirãcuã ño jẽ! Dios aicua tuchite quia co. Dios ra ucheẽ nyabiã nande je. Angel cheẽ nguire ra nandemanoã. ²⁶ Quiririã nda nandemondo ejoõ acua mo ndese, i que Pablo ra.

²⁷ Ureitō mocoĩ mocoĩte que ama ndisha riite re ra. Catorce días. Quiririã ngue ururucuata chõte quia ra. Adria, i que ama ndisha je ra. —Ama nimia nanderubite rei reae, i que canoa yenda ra. Itondiite mose. ²⁸ Ama ndiite que embuquecha ra. ¿Ecu tuchi ere? i que nyue ra. Treinta y seis metros. Pe jiri que embuquecha si no nda. Veintisiete metros cote. ²⁹ —¡Canoa nda cua ichĩ sita je jẽ! ¡Quiatachĩ nda jẽ! i que mbia nyue ra. Nyebe mbae usi mondo mundo nguiã ii canoa ndiquisã sacua. Mbae usi cuatro. Anclas, i que ũqui je ra. Ae ecuasa chi nguiã canoa ndese embutiba. —Quiatuchu, nyaashĩ, i tuchi que equia ra. ³⁰ —Nandechã nyecuayã, i que canoanya rimba ra. Nyebe canoa ñetẽ mbuquichi mondo ii. —Mbae usi urechucua mondo ii. Urechucua canoa ai rese, i que urembũri iĩ nda. —Nandechã nyecuayã, i chõ mbei que equia nyue ra. ³¹ Pablo que ñee soldados je ra. Ererecua abe je. —Ã chichõ eã mose canoa ye, jeñĩmi ja rae. Ama nda jẽiquia, i que Pablo ra. ³² Ae soldados canoa ñetẽ sã nyisia nguiã. Emondo ii. Hui esi cote.

³³ Nyaashĩ namo mose que Pablo ñee ja mbia je ra. —Mbae mo jẽu jiri cote. Jeniãcuã mocoĩ mocoĩte que. Mbae mo ngue jẽuãte catorce días. Jengueãte que catorce días no. ³⁴ Mbae mo jẽu rã cote ae. ¶ na jẽquirãcuã jiri. Mbae mo nda jeĩ eã jẽje. Jemo nda mano eã, i que Pablo ee ra. ³⁵ Aquere que Pablo mbichae sirõ nda. Iaanye, i que Dios je ra. Mbia resa rae. Nyisia que ra. U que cote ra. ³⁶ Pablo cheẽ ngue mbae osei uquia mbia je ra. Mbia ja que mbae u cote ra. ³⁷ Urecuabẽte que canoa yenda ra. Doscientos setenta y seis que ure ra. ³⁸ Mbia ja que mbae u tuchi ra. Quiata a raanguia que emombo mombo ii cote ra. Canoa mumbebi sacua.

Canoa jaã

³⁹ Ureachashĩ ngue cote ra. Ibi rese que uremae cote ra. —A ureicuayãte, i que mbia ibi je ra. Eicoinda rese que uremae nda. Ama nimia turã. —Nyao nguichi huee. Eicoinda, i rei que ererecua ra. ⁴⁰ Anclas sã ngue echisia sia ra. Anclas recha bei ii. Canoa mbuchaa chaasa que embuquiata ra. Tiru icoi que embuchesecobe quiririã

je ra. Canoa ngue ngata ama nimia turã nguiti cote ra. ⁴¹ Iaãcuã eicoinda que canoa jaã nda. Eriquiraa eãsaa. Canoa ai que jaã tuchi ra. I rebera tubiriã ngue ra. Canoa ndiita mbaaba aba. Eriita que nyiquiso ra. Quiata que ra. ⁴² Soldados que ñee cote ra. —Ã ecuasa riqui ã nae, jã nandẽiquia ja jẽ! ¶ nda echoi eã ita. Oso chee eã, i rei ngue soldados re. ⁴³ Soldados rerecua que Pablo iquia sereã nda. Nyebe ñee nguiã soldados je. —¡Ecuasa mo nda jẽiquiachĩ jẽ! i que soldados je ra. Ererecua que ñee e mbia je cote ra. —Eita aquiatu jẽso ii. Jẽso usẽ ama nimia ndese. ⁴⁴ Eita aquiatuã, jẽso mbebi ira rese, i que soldados rerecua ure je cote ra. Eĩ ure ja que usẽ ama nimia ndese cote ra.

28

Ngasẽ ejoõ ácuua Máltaa

¹ Uresẽ ja que ama nimia ndese ra. —Malta, i que a je ra. Ejoõ acua je, i que hue jenda ure je ra. ² Hue jenda turãte que ure je ra. Tata que emendi ure je ra. Urechee sacua. Tiquindiiseĩte que eriqui ure je ra. ³ Pablo que nyea queru mbuchuuta ra. Nyea mbucha mose que mbei usẽ asi Pablo echi ra. Mbei que Pablo o shũ ra. ⁴ Eo resebe tuchi que eñi nda. Nyebe hue jenda ñee ñee nyue. —Mbia iquia iquiasa Pablo reae. Oso chee que ama ndisha si no. A mbei riqui eshũ a no. Mano nda cote reae. Huiãcuã mose, i rei que hue jenda nyue ra. ⁵ Pablo que mbei mbaba tátaa ra. Erasiã mbei que Pablo je ra. ⁶ Mbia que mae nguiatu Pablo rese ra. —Ma eruru. Embusiate rei rae. Mano ndae, i rei que ra. Mbia que mae nguiatute rei u nguiã erese. Erasiã mbeite que ee ra. Nyebe mbia ucheẽ mbuchebi nguiã. —Dios mo ndei Pablo, i que mbia cote ra.

⁷ Hue robeichõ ngue ererecua mbae ibi ra. Ejoõ acua rerecua. Publio, i que ererecua je ra. Urererao que uchuchúaa ra. Urembuquiaru turãte que ra. —Jẽitõ mocoĩ jiri, i que ure je ra. Tres días que ureitõ erese ra. ⁸ Publio ru rasite que ra. Eracuta que ra. Eruushi ruquite que ra. Pablo que oso erea ra. O que echono earõ nda. Ñee ngue Dios je ra. Nyerõ ngue cote

ra. ⁹ Aquere que mbia rasi ngaẽ ngaẽ ja Pablo je cote ra. Ejoõ jenda ja. Dios que embucherõ ja ra. ¹⁰ Mbia que mbae mee mee tuchi ure je ra. Urecuata mose que mbae chuchã nyuchã tuchi canoa ye ra. Urechiurã.

Pablo ngasẽ Rómaa

¹¹ Ejoõ acua que urecu bei ra. Tres meses. Canoa cuasu mo abe que chi beite aque rĩ nda. Alejandría jenda rei aque canoa. Dios Nyeremo, i que aque canoa je ra. Aque canoa ye que ureso cote ra. ¹² Siracusa, i que sucha tubiriã mo je ra. Huee que urecuasẽ nda. Huee que ureitõ mocoĩ nda. Tres días. ¹³ Hue si que ureso siquiibi cot e ra. Urecuasẽ ngue Regio ra. Huee que ureitõ nda. Isamami ngue quiririã ureichu urequite quti ra. Canoa maña turã. Co mi ngue ureque ama ndiite re ra. Urecuasẽ ngue Puteoli ra. Huee que urequichi bei canoa si cote ra. ¹⁴ Jesús quiato mo ngue uretea huee ra. —Jenguchõ na urerese, i que ure je ra. Ae urecuchõ nguiã una semana erese. Aquere que ureso Roma nguiti cote ra. Ibi rĩ. ¹⁵ Jesús quiato que jirandu urerese cote ra. Roma jenda. Nyebe ecuaẽ nguiã urerobeishĩ. Foro de Apio, huee que urerobeishĩ nda. Tres Tabernas, hue abe que urerobeishĩ ishĩ nda. —Iaanye, i que Pablo mae mose Jesús quiato rese ra. Pablo ia tuchi erobeishĩ mose. ¹⁶ Urecuasẽ ngue Roma cote ra. Sucha tubiriã tuchi que Roma nda. Soldados rerecua que ecuasa mondo ja mbia icuã ndaarõsa je cote ra. Pablo mbuchao que ra. —Ndechuchua chõ eico nde, i que ee ra. Soldado mi ngue Pablo reaquiato bei quia ra.

Pablo Dios cheẽ senei senei Rómaa

¹⁷ Urecuasẽ namo jiri mose que Pablo judíos rerecua munua ja ra. Roma jenda. Pablo que ñee ee ra. —Seresenda, mbae icuã ngue asaã eãte judíos je ra. Nanderamei ñee abe que amumba eãte ra. Judíos que semeeño Romanos je ra. Jerusalén seico mose. ¹⁸ Romanos ngue ñee tuchi seje ra. “Nandehui esi”, i rei ngue serĩ cote re. “¿Mbaerã nda nandei quia re? Mbae icuã mo ngue esaã eãte”, i que serĩ nda.

¹⁹ “jJẽhuichĩ nda esi jẽ!” i bei que judíos quia ra. Romanos je. Judíos quia ñi hui sereãte nguiã sesi. “Semondo ererecua tuchi je”, ae chee que se ra. Ererecua saa ra acheẽ icuã eã ndei judíos rĩ. ²⁰ Nyebe “Jenyu. Tamae jendese. Tacheẽ jẽje”, ae que jẽje ra. Mbia mano je ra quera si, nande chõ ndaque equia co. Uquĩ je chõ secuasa riqui nguiã co, i que Pablo judíos je ra. ²¹ Judíos rerecua que ñee Pablo je ra. —Jerusalén jenda que ucheẽ mbesa eãte imbu ure je ra. Ae ngaẽ ngaẽ nguia hue si, uquĩ abe que ñee icuã eãte quia nderĩ nda. ²² Ndecheẽ urechandu rã. Mangue chooño eã mbia ñee icuã icuã jeni. Jesús quiato rĩ. Nyebe echeẽ ure je, i que Roma jenda Pablo je ra.

²³ —Aque mose ra urechu ndecheẽ andu, i que judíos Pablo je ra. Aque mose que ecuaẽ jate cote ra. Pablo chuchúaa. Isamamimbe. Pablo que embaaquiato quiato tuchi ra. Tenda mondo chee. Jesús rĩ ngue eriqui ñee ñee mbia je ra. Moisés chimbesa que esenei senei ee ra. Dios cheẽ mbuchecuasa chimbesa abe que esenei senei ee ra. † nda mbia Jesús icua. —Dios quiarei ererecua tuchi, i tuchi que Pablo judíos je ra. ²⁴ Emo emo ngue Jesús isi ra. Pablo cheẽ mose judíos je. Eataque que Pablo cheẽ isiteã teã nda. Ichõiño nei equia ee reaã. ²⁵ Pablo cheẽ ndui ja eã ngue ra. —Nyao rei erecha, i que eataque ra. Nyebe Pablo ñee ee. —Espíritu Turã ngue Isaías mbucheẽ turã nanderamei je cose ra. Eĩ ngue ñee nda:

²⁶ Eso rã ñee judíos je: “Secheẽ nda jeñandu rei nguiã.

Jeñandu eã naanguia rae.

Jemae ndei nda erese re.

Jemae eã naanguia ra erese.

²⁷ Jeñia átãte.

Aba cheẽ mumba mumba.

Jendesa jemungue munguete.

Secheẽ jẽicua sereãte.

Jemba sereãte seicha rui.

Nyebe aico nguiã jembucheroãte”, i que Dios ra, ere ee,

i que Isaías chimbesa ra, i que Pablo ra.

²⁸ Pablo que ñee mbei ra. —Tacheẽ jẽje, judíos. Judíos eã je ra Dios cheẽ uresenei senei cote. Uquĩ nguia ra eya tuchi erese.

¶ nda Dios erirõ eicuã si, i que Pablo ra.
²⁹ Pablo cheẽ niĩ ngue judíos choi guiã ñee
icuã icuã nyue ra. ³⁰ Dos años ngue Pablo
riqui huee ra. Roma. Mbae isiquia que
emondo mondo tuchuacha je ra. Huee eico
mose. Pablo iate que eriqui ra. Mbia nyoĩ
nyoĩ mose erea. ³¹ Mbia mo ngue Pablo
cheẽ siquisã eãte ra. Jesucristo riĩ ngue
eriqui ñee ñee mbia je ra. —Dios ra mbia
rerecua tuchi, i que equia mbia je ra. —
¿Mbaerã ereico ñee Jesús riĩ nde? i eã ngue
emo Pablo je ra.

LA CARTA DEL APOSTOL SAN PABLO A LOS ROMANOS

Pablo ucheẽ mbesa mondo Romajenda je

¹ Co aico co mbesa jẽje co. Se rei Pablo. Jesucristo rimba rei se. Dios que seirabo ra. Ucheẽ nenei nenei sacua. Dios que semingo icue ra. Ucheẽ turã nenei nenei sacua. ² –Secheẽ turã tamondo mbia je, i que Dios cose ra. Ucheẽ nenei neneisa je ñee. Echeẽ ngue ique cote ra. ³ Dios cheẽ turã nandembiiranduchĩ Jesucristo rĩĩ cote. Dios riirĩ ndei Jesucristo. David riirina ngue tu ibii cote ra. ⁴ Jesucristo manonde, Espiritu Turã ngue embuquera ra. Dios quirãcuã je que embuquera ra. Dios riirĩ ndei Jesucristo. Nyebe Espiritu Turã embuquera nguiã. Mbia mbiirandu randu sacua Dios riirĩ ndese. ⁵ Dios turãte que ure je ra. Jesucristo rĩĩ. Nyebe ureirabo mingo nguiã ucheẽ nenei nenei sacua. I nda mbia mangue chooñoa jenda abe Jesucristo icua. I nda mbia mangue chooñoa jenda abe Jesucristo cheẽ mum-bayã no. ⁶ Sã jẽ Jesucristo cheẽ jemum-bayãte no. Sã Dios jẽirabo no. Jesucristo rimbarã. ⁷ Co ambesa mondo quia Rómaa jẽje co. Dios chesecua tuchi chõ jẽ nde. Dios que jemingo icue uquiatorã nda. Nanderu chõ Dios re. Nandererecua chõ Jesucristo re. Sã ãquĩ turã mbei riqui jẽje. Sã ãquĩ ndiqui jembia tuchi.

Pablo oso sete raque Rómaa

⁸ –Jesús quiato tuchi chõ ãquĩ ndiqui re, i jate mbia quia jeniã. Mangue chooñoa jenda abe. Nyebe aico nguiã gracias i tuchi Dios je co. ⁹ Dios cheẽ asenei senei mbeite quia mbia je co. Eriirĩ nũ. Dios resa rae aico embesa mbesa jẽje a. Aico ñee mbeite Dios je jeniã co. ¹⁰ Aico ñee ñee mbeite Dios je co. I nda Dios semondo jendea. Semondose mose ra aso jendea. ¹¹ Seso sete raque jendea. Jembaaquiatu quiatu sacua Jesús rĩĩ. Jembirãcuã sacua Jesús rĩĩ. ¹² Seso sete jendea. Nĩmbia sacua nyiese. Nandeico tuchi sacua Jesús rui. Nande Jesús nandeicuate

resẽ. ¹³ Taso jendea, ae beite rei que se quia ra. Taembaaquiatu quiatu Jesús rĩĩ, ae rei se. Eĩ nda Jesús jẽicua secheẽ nguire. Sã mbiamo Jesús icua tuchite secheẽ nguire no. Mbae seriquisã quisã mbeite. Nyebe asoã mbeite nguiã jendea. ¹⁴ Jesús cheẽ nenei nenei si ahui aroneãte. Tasenei senei tuchi mbia ja je. Griego ja je. Mbiamo abe je. Eaquiato je. Eaquiataũ abe je. ¹⁵ Nyebe aico nguiã icoquiatute co, Jesús cheẽ nenei nenei sacua jẽje. Roma jenda je.

Jesús cheẽ quirãcuã tuchi

¹⁶ Aireĩ ireĩ eãte Jesús cheẽ nenei nenei mbia je. Jesús cheẽ quirãcuã tuchi quia ique nguiã aba chiangui rĩ. Aba rirõ sacua mbae icua si. Judíos je rane ngue Jesús cheẽ quirãcuã nda. Judío eã je abe no. ¹⁷ Jesús cheẽ nandembiirandu quia ã. Nande Jesús icua mose, Dios ra nandeisi turã uquiatorã. Mbae turã mo nandesaã eãte raque.

Ae Jesús icua quia nae, Dios ra ãquĩ isi turã tuchi. ãquĩ nda siqui bei cote, i ñi embesa ji re.

Mbia icua tuchi Dios je

¹⁸ Ae siqui Dios rã eãte nae, ãquĩ nda Dios mbasi ja. Ae siqui icuaate quia nae, ãquĩ nda Ibatenda mbasi ja no. ãquĩ nandeicuate quia nande co. Ichõiñoosa reã ñee andu sereãte quia ñene. ¹⁹ Jirandu tuchi rei que Dios rese ra. –Eĩ ae chõ nguiã co, i rei que Dios ee ra. Dios icua sereãte quia ñene. ²⁰ Dios rese mbia mae aroneãte raque. Dios quirãcuã ndese mbia mae aroneãte raque. Mbia ra Dios icua uchiangui re, echiao rese mae mae mose. Dios que mbae chao ja nyii ra. Aque mose bei mbia riqui mae mae Dios chiao rese co. Nyebe eriqui nguiã “Dios rese ureiranuãte”, i aroneãte. ²¹ Jirandu tuchi rei que Dios rese resẽ. Ñee turãyã tuchi chõchĩ Dios rĩĩ. Gracias iã ñochĩ Dios je. Nyebe eriqui nguiã ndua icua icua mbei. Nyebe eriqui nguiã itongui rĩ mbei. ²² “Ureaquiatute” ichõiño ñochĩ equia ãquĩ. Eaquiataũ ño siqui nguiã ãquĩ. ²³ Hui tuchi que Dios si ra. Ae manaã mbeite quia, aque si. Sererecua i chõchĩ mbae ao ao ji je cote. Ae ra mano, ãquĩ je chõ eriquichĩ nguiã

“sererecua”, i. Mbia raanguia je. Quiaa riinda je chõ eriquichĩ nguiã “sererecua” i. Ae mbebe quia. Ae uchã nguia. Ae nguata quia nguie rese. Ûqui je chõ eriquichĩ nguiã “sererecua” i.

²⁴ Nyebe Dios hui nguiã esi cote. Mbae icuã naa naa mbei sacuã cote. ²⁵ Ñee ñooño tuchi Dios rii cote. “Nandererecua” i chõchĩ Dios chiaõ je cote. “Nandererecua” i rocoĩ Dios mii je. “Nandererecua” i bei chõ mbichĩ aba quia Dios mii je. Amén.

²⁶ Nyebe Dios erecha ja nguiã cote. Oco chooño sacuã mbae icuã ndese. Ubi icuã ndese. Cuña mo oco oco nyiese si. Cuña ngu raã naa cuña nongue je. Siqui rocoĩ ngu rese. ²⁷ Hombre mo abe hombre nongue mo oseĩ oseĩ. —Seninisirã nde, i ñee ñee uchue si. Oco oco nyiese. Siqui rocoĩ ngũinisi rese. Icha tuchi Dios si. Nyebe Dios riqui nguiã embasi tuchi co cote.

²⁸ Dios rese jirandu sereã. Nyebe Dios hui nguiã esi. Siqui bei bei sacuã ubi icuã ndese. Nyebe eĩ eĩ nguiã nyue mbae icuã ndese. ²⁹ Eicuã tuchi eriqui ùqui. Ico chooño tuchi equia cuña ndese ùqui. Ndua ndua icuã mbei tuchi equia ùqui. —Aque rã nda se chã, i beite equia emo mbae je ùqui. Mbia mbasi chooñote equia ùqui. Mbaecha ucuayã ñooño tuchi equia ùqui. Mbia iquia iquia chooño tuchi equia ùqui. Paama i chooñote equia uchue ùqui. Mbia mbĩĩrĩ irĩ ñote equia ùqui. Mbia ucuayã ñooño mbeite equia ùqui. ³⁰ Ñee ñooño mbeite equia mbia mo nii ùqui. Dios ucuayã tuchi equia ùqui. Ñee icuã icuã mbeite equia aba cheẽ ndibishorõ ùqui. Ucuasu raã naa ñooñote equia ùqui. “Se quiarei i tuchi”, i beite equia ùqui. Emo mbĩcuã icuã mbeite equia ùqui. Ngu cheẽ mumba mumba chooñote equia ùqui. Usi cheẽ abe mumba mumba chooñote equia ùqui. ³¹ Eaquiata tuchite ùqui. Ucheẽ mumba mumbate ùqui. Emo je eturã eãte riqui ùqui. Emo icuã si eriqui tesareĩate ùqui. Eya eã eãte riqui emo ndese ùqui. ³² —Ae ùqui saã saã nguia mbae icuã nae, ùqui nda amondo tata cuasu, i que Dios ra. Dios cheẽ icuare quiatu eriqui nguiã mbae icuã naa i ite. —Sã emo abe

mbae icuã naa naa nandechabe, i chee chee.

2

Dios mbia cuata tea ja

¹ —Dios ra ùqui mbasi rã ña, erechĩ nda ùqui mbia icuã je. Nde i mose, nde abe ra ndeicuã nyecua mbia je. —Seturãte aico co, jerechĩ nda jẽ! —Ûqui ndiqui mbae icuã naa naa ùqui, nde i mose, ùqui icuã sí chõ eresaã saã nguiã nde abe aque. ² —Ae ùqui icuã saã saã nguia, ùqui tambasi, i mose Dios, Dios ra embasi chooño eã. Maende erese quia ra embasi. ³ —Dios ra ùqui mbasi rã ña, erechĩ nguiã huee. Eraã sí tuchi chõ ereicochĩ nguiã ùqui sí raã naa aque. Nde abe ra Dios nembasi ùqui ndese resẽ. ⁴ Dios ia eãte raque aba icuã ndese. Dios aba mbasi jei eã ndaque aba icuã mosebe. Ñimbirãcuãte aba icuã je. Coche ñene, ereã ñochĩ Dios chimbirãcuã mose ndeje. —Eyayã jé nda huicua ndese chã, i Dios quia nderĩ co. Nyebe eriqui nguiã ñimbirãcuã ndeicuã je. ⁵ Ndechĩã ãtã tuchi chõchĩ. Ndeico sereã tuchi chõchĩ Dios rui. Ndeicuã eremunua tuchi chõ nguia aque re. Dios nembasi nonde. Dios mbia icuã mbasi ja mose ra nde abe mbasi. ⁶ Aque mose ra Dios mbia mbuchao chao. Emo emo nda emondo tata cuãsuu. Emo emo nda emingo bei no. ⁷ Ae eturã mbeite riqui, ùqui nda Dios mingo bei. Nyoĩ sete quia Dios rea re. Siqui bei serete quia mbia mingo beisa rese re. Nyebe ra Dios emingo bei cote. ⁸ Dios ra paama i tuchi mbia icuã je. Mbasi tuchi rae. Mbia mbĩcuãsa tuchi quia ùqui nde. Dios cheẽ mumbate quiatu nguiã. Nyebe ra Dios embasi tuchi. ⁹ Ae siqui mbae icuã ndese, ùqui ja ra Dios mbasi. Judíos icuã nane nda embasi. Judíos eã abe ra embasi no. ¹⁰ Ae siqui mbae turã ndese, ùqui je ra Dios turã mbei. Judíos turã nane. Judíos eã abe cote. Mbia ra ùqui turã icua tuchi. Dios ra ùqui mbia tuchi. ¹¹ Co quiatu, i eã nda Dios mbia mo mii je. Mbia mii ndese ra ebia eã. Mae turã ja chõ nda erese.

¹² Ae jirandu eãte Moisés chimbesa rese nae, ùqui siqui icuã mose ra Dios embasi. Jirandu eãte raque Moisés chimbesa rese. Ae

Moisés chimbese icua nae, ũquĩ siqui icuã mose ra Dios embasi. Moisés chimbese cheẽ nguire ra Dios embasi. ¹³ Ae Dios cheẽ ñandu chooño nguia nae, “taẽisi turã” iã nda Dios ũquĩ je. Ae Dios cheẽ mumbayã nguia nae, ũquĩ nguiatu ra Dios isi turã. ¹⁴ Ae judíos eã nae, ũquĩ Moisés chimbese ñandu eã mbeite raque. Ũquĩ mo ae siqui turã turã mbei mbae turã ndese. —Mbae turã nandesaã, ite eicua. Dios cheẽ andu eãte raque emo mose. ¹⁵ Ae ae chõ mbae turã icua nguia. Mbae icuã abe icua. Mbae icuã naa mose, “eicua asaã ñochĩ”, i tuchi eicua uchiangui re. Mbae turã abe raã mose eicua tuchi uchiangui re no. ¹⁶ Aque mose ra Dios ñee Jesucristo je. Ae icuã mbia saã nyecuayã cuayã nguia nae, ũquĩ nda Jesucristo mbuchecua ja cote. Jesucristo ra mbia icuã mbasi mbae icuã ñi cote.

Judíos Moisés cheẽ mumba mumba

¹⁷ —Judíos chõ ure re, jenye equia ũquĩ. — Moisés chimbese ra nandemingo bei, jenye chõchĩ equia ũquĩ. —Dios quiarei ebia tuchi ure mii ndese, jenye chõchĩ equia ũquĩ. ¹⁸ Ae Dios bite nae, ũquĩ jẽicuate quia jẽ ũquĩ. —Moisés cheẽ ureicuate quia ã. Nyebe mbae turã ureicua jate quia ã, jenye chõchĩ nguia ũquĩ. ¹⁹ —Ure mii ño ñeenda Dios icha ureicuaichĩ, jenye bei chõchĩ equia ũquĩ. —Itondaru jenda uretesaete, jenye chõchĩ equia ũquĩ. ²⁰ —Mbia aquiatuã urembaaquiato quiatu, jenye chõchĩ nguia ũquĩ. —Mbia aracuayã urembaaquiato quiatu, jenye chõchĩ nguia ũquĩ. Jẽ Moisés chimbese jẽicua aba reãte quia ũquĩ. — Moisés chimbese ñee ñooño eãte, jenye raque quia eicua ũquĩ. ²¹ Jẽaracuayã mbia jembaaquiato quiatuchĩ nguia. ¿Mbaerã jeñimbaaquiato iã jẽ nyii re? —Mbae ra jembuquiachãchĩ, jenye chõchĩ equia ũquĩ. Jẽ sí chõ mbae jembuquiachã nguia ũquĩ. ²² —Emo ninisi rese ra jẽingochĩ, jenye chõchĩ equia ũquĩ. Jẽ sí chõ jẽingo nguia emo ninisi rese ũquĩ. —Ae je mbia riqui “Dios” i chooño nae, ũquĩ ndese ra jẽingochĩ, jenye chõchĩ equia ũquĩ. Dios abareã mbae jembuquiachã quiachã ñochĩ nguia ũquĩ. ²³ —Dios cheẽ ureicua tuchi quia ure ã, jenye

chõchĩ equia ũquĩ. Jẽ sí echeẽ jemumbate quia ũquĩ. Nyebe mbia riqui nguia ñee turã eãte Dios rii ã. ²⁴ Nyebe embesa ji cheẽ ndiqui nguia ique ã cote. Jẽ Dios cheẽ mumba mose, judíos eã ndiqui ñee icuã tuchi Dios rii ã.

²⁵ Coche circuncisión jesaã saã nguia Dios je, jẽingo bei mose Dios cheẽ ndese. Jẽingo eã mose Dios cheẽ ndese, circuncisión naa eã naanguia chõ jẽingo nguia ũquĩ. ²⁶ Ae circuncisión saã eã nguia nae, ũquĩ siqui mose Dios cheẽ ndese, circuncisión naande raanguia chõ eriqui nguia ũquĩ. ²⁷ Ae circuncisión saã eã nguia nae, ũquĩ siqui mose Dios cheẽ ndese, Dios ia tuchi chõ ũquĩ ndese re. Eyare rocoĩ jendese. Jẽ nguia Dios cheẽ jemumba mumbate nguia. Dios cheẽ jẽicuate raque. Circuncisión jesaã saãte raque. ²⁸ Ae judíos Dios cheẽ mumba mumba quia nae, judíos tuchi eã ño ũquĩ nde. Circuncisión naa naa ndaque. Ae circuncisión saã nguia nae, ũquĩ siquia mose Espiritu Turã ndese, circuncisión turã eã ño ũquĩ nde. ²⁹ Ae Dios isi tuchi quia uchiangui re, ũquĩ nguiarei judíos tuchi. Ae siqui Espiritu Turã ndese, circuncisión tuchi chõ ũquĩ cote re. Ũquĩ je ra mbia achõ ñee turã eã. Dios abe quia ra ñee turã ee.

3

¹ ¿Mbaerã judiorã sete riqui mbia re? ¿Mbaerã circuncisión sete riqui mbia re? ² Eturete quia mbia je re. Judíos je quiatu ngue Dios ucheẽ mondo nguia. Mbia mo je eã. ³⁻⁴ Judíos mo hui hui raque Dios cheẽ si. Dios quia ra ñee ñooñoã mbei. Echeẽ nguia ra io bei. Mbia hui hui raque esi. Mbia ñee ñooño ndaque. I ñi embesa ji re: Ndecheẽ nda io tuchi mbia resa rae. Mbia icuã mose ndeje, nde quia ra ere tuchi mbia si, i que embesa ji ra. ⁵ Jemo ngue ñee no nda: —Dios turãte riqui nandẽicua je co. Mbae icuã nandesaã saã mbei chõ nguia. Mbia mae sacua Dios turã ndese. Dios nandẽicua mbasi mose, Dios icuãte, i chõchĩ jemo. ¿Mañi nande ra ũquĩ ñee mose re? ⁶ Ichõiño tuchi chõ ũquĩ nde. Dios icuã aroneãte. Dios icuã mose, eĩ nda Dios mbia

icua mbasi aroneate rei. ⁷Jemo ngue ñee ño nda. —¿Nandechē ñooño ño nguia jē! Nandechē ñooño mose, mbia ra ñee turā Dios rīī. “Ñee ñooñoosa reā tuchi quia Dios riqui re,” i ra mbia Dios rīī cote. Nyebe Dios riqui nguia nandembasi āte nandechē ñooño mose, i chōchī jemo. ⁸—Mbae icua nandesaā saā ño. † nda Dios turā nyecua mbia je, i chōchī jemo. Urecheē āte ure ũquī ndesē. Ae ñee nguia ũquī, ũquī nda Dios mbasi.

Mbia mo eturā eāte

⁹Judíos chō nande re. ¿Nandeturā nda eriqui reī mbia mo si re? Tei. Nandeturā eā ño esi re. Nandeicua ja chō ñene. Judíos eā icua ja chō ñene. Judíos icua ja chō eno nde. ¹⁰† ñi embesa ji re:

Emo eturā eāte. Aque mīi mo eā.

¹¹“Dios icha taicua”, iāte emo.

“Dios rese taico”, iāte emo.

¹²Mbia que icha icha jate Dios si ra.

Eicua jate que eriqui ra.

Emo mbae turā mo saā eāte.

Aque mīi mo eā.

¹³Ūquī quiarei mbia raaque tā tāsā rā.

Aba mbia eā.

Sā eriqui ñee icua mbei.

Mbia mbirī irī tuchi ñee ñooño uchuru je.

Mbei rasi rā ño echeē nde.

Aba mbasi.

¹⁴Echeē icua achō tuchi chō ñene.

Mbia mbiacuāsa tuchi chō echeē nde.

¹⁵Mbia iquia choño ño ñene.

¹⁶Mangue choñoa ño eriqui nguia mbae icua naa naa.

Mbia mbiayā ñooño.

¹⁷†co choñoa mbei mbia je.

¹⁸Dios rese ndua eā tuchi, i ñi embesa ji re. ¹⁹Dios que Moisés chimbesa mee ja judíos je ra. Embesa ji mumbayā sacua. Mbia huicua icua ja sacua. —Dios cheē nandemumba tuchi chō nguia re, i nda mbia ja chā. ²⁰Emo ñee aroneate. —Embesa ji amumbayā mbeite quia co. Nyebe ra Dios seisi turā, i aroneate emo. Dios que Moisés chimbesa mee mbia je ra. Mbia huicua icua ja sacua.

Dios icuasa quia ra siqui bei

²¹⁻²²Dios que Jesús turā teacuquia nande je cote ra. Ae que mano nandeicua ndiquicharō sacua nda. Nande Jesús icua

mosé, Dios ra nandeisi turā cote. Eī ja chō Dios mbia je re. Dios bia eā ño mbia mo mīi ndese. —Jē Moisés chimbesa mumbayā mose, taēisi turā, iāte Dios. —Jē Jesús icua mose, ũquī mose quiatu ra jaēisi turā, ite Dios. Embesa ji ñiinda abe que ñee ñee Jesús rīī nyii no nda. ²³Nandeicua ja chō ñene. —Aque eturāte, iā nda Dios nandemo je. ²⁴Nandeicuate raque. Dios quia eturāte nande je re. —Mbae mo jemondo jēicua ndibishorō, i āte Dios. Jesucristo que mano nandeicua ndibishorō ndesē. Nyebe Dios riqui nguia mae turā nanderese co. ²⁵Dios que Jesucristo mondo mbia je ra. Mano sacua mbia icua ndiquicharō. —Jesús que mano seicua ndibishorō nda, nande i mose, ũquī mose ra Dios nandemingo bei. Dios que mae ñooño mbia icua ndese nyii ra. —Seriirī nguia ra mano nguia eicua ndiquicharō, i que ra. Echeē ngue ique cote ra. Dios uturā ndeacuquia mose que echeē ique cote ra. ²⁶Dios riirī ngue mano mbia icua ndiquicharō nda. Mbia mae sacua Dios turā ndese. Dios turā mbeite. Mbia icua isi turā nonde. Mbia Jesús icua mose ra Dios mbia isi turā.

²⁷Nande ae ra nandeicua nandembutiā eā. Dios ae quia nandeicua mbutiā nguia, Jesús icua mose. Nyebe nandeco nguia nandecuasua raā naa aroneate. Moisés chimbesa que nandemumba mumbate quia resē. ²⁸Mbia Jesús icua mose, aque mose quia ra Dios mbia isi turā. —Taēisi turā, jē Moisés chimbesa mumbayā mose, iāte Dios nande je. —Jē Jesús icua mose, ũquī mose quiatu ra jaēisi turā, ite Dios nande je. ²⁹Judíos achō nderecua eā ño Dios re. Judíos eā abe rerecua chō ñene. ³⁰Emo abe eāte Dios. Dios mīi ño ñene. Ae Jesús icua quia nae, ũquī nda Dios isi turā ja. Judíos abe isi, Jesús icua mose. Judíos eā abe isi, Jesús icua mose no. ³¹Nande Jesús icua mose, Dios cheē mbesa ji riqui ua eā mbeite nande je co. Nande Jesús icua mose, Dios cheē nda nandemumbayā tuchi cote.

4

Abraham abe Dios icua

¹Nandendua mbirī na Abraham ndese. Nandei ñiinda tuchi quia Abraham nde.

²Cose que Dios Abraham isi turā nda.

Abraham mbae turã naa naa eã mose que Dios eisi turã nda. Dios icua mose quiatu que Dios eisi turã nda. Nyebe Abraham uturã naa naa aroneãte nguiã. ³ I ñi embesa ji re:

Abraham ngue Dios icua ra.

Nyebe Dios eisi turã nguiã, i ñi embesa ji re. ⁴ Sã emo ndiqui quiei quiei emo je no. Mbae mo ndibishorõ. Ae echa mondo quia ee, mondochõ eã ño nguiã ee. Embae raã naa ndibishoronda chõ ùquĩ nde. Eĩ eã ño Dios re. ⁵ Dios chõ mbia icuã isi turã nguiã. Emo Jesús icua mose, ùquĩ nda Dios isi turã. Emo mbae turã naa naa eã ndaque. Jesús icua mose, aque mose chõ Dios “ndeturãte seje,” i ee. Mbae turã naa naa eã ndaque. ⁶ David abe que ñee nda: “Ae je Dios ñee, ‘ndeturãte seje,’ i mose ee, aque ia tuchi chõ ñene. Mbae turã naa eã ndaque. Dios icuate quia ñene,” i que David ñee nda. ⁷ Co rei David chimbasa co:

Ae icuã Dios mbutiã nae, ùquĩ ia tuchi chõ ñene.

⁸ Ae icuã ndese Dios riqui mae ãte nae, eicuãte raque, Dios ra eisi turã.

Ùquĩ ia tuchi chõ ñene, i ñi David chimbasa re. ⁹ ¿Aba icuã ño nda Dios mbutiã ña? Embia sacua ña. ¿Judíos icuã achõ nda embutiã nde? ¿Ae circuncisión saã nae, ùquĩ achõ icuã nda embutiã nde? Tei. Ùquĩ achõ eã ñene. Abraham Dios icua mose, aque mose tuchi chõ Dios eicuã mbutiã nguiã esi. ¹⁰ Abraham circuncisión naa eã mose chõ Dios eicuã mbutiã nguiã. Circuncisión naa nonde. ¹¹ Abraham Dios icua mose chõ ngue Dios eicuã mbutiã nguiã. Aquere quiatu ngue Abraham circuncisión naa nguiã cote. Circuncisión ndei marca Dios mbae. Dios Abraham isire chõ circuncisión naa nguiã Abraham je. — Abraham ngue aisi turã nda, i ñe Dios re. Ae circuncisión saã eã nae, ùquĩ abe chõ “seru” i nguiã Abraham je, Jesús icua mose. ¹² Ae circuncisión saã nae, ùquĩ abe chõ “seru” i nguiã Abraham je, Jesús icua mose. Ùquĩ nyicua chõ Dios re. Sã Abraham nyicua Dios no. Circuncisión naa eã mose no.

Abraham Dios icua mose, Dios ucheẽ mbuchebiã mbei ee

¹³ Dios que ñee Abraham je cose ra. — Ibi tamondo ja ndeje nembraerã. Nderiirĩ mbaerã abe no, i que ee ra. Secheẽ mumbasa reã je chõ ibi tamondo, iã ño Dios re. — Ae seicua quia, aque je chõ tamondo, i que Dios Abraham ñi nda. ¹⁴ — Nandeico bei mose Moisés chimbasa rui, aque mose ra Dios nandemingo bei, i chõchĩ judíos mo. Ùquĩ mose quiatu ra nandeico rei Jesús icua chooño. Ùquĩ mose quiatu ra Dios cheẽ ique ãte rei nande je. ¹⁵ — ã jesaã saã, i mose Dios, emo echeẽ mumba mose, ùquĩ nda embasi. — ã jesaã saã, iã mose, emo nda embasiã cote.

¹⁶ Dios turãte quia ñene. Nyebe eriqui nguiã mbae mondo chooño nande je eicua mose. Judíos achõ je eã ño eriqui nguiã mbae mondo mondo. Judíos eã je abe chõ eriqui nguiã mbae mondo mondo, Dios icua mose. Sã Abraham Dios icua no. Sã Dios mbae mondo mondo ee no. Nyebe nandeico nguiã “nanderu” i Abraham je co. Ae rane nguiatu ngue Dios icua nguiã. ¹⁷ Nyebe embesa ji riqui nguiã i:

Dios que ñee Abraham je ra.

“Nde ra mbia i tuchi.

Ibi jenda ja i tuchi ra nde”, i que Dios Abraham je ra,

i que embesa ji ra. Dios ra mbia mangu chooñoa jenda ja isi turã, Jesús icua mose. Dios cheẽ sí tuchi chõ ã nde. Dios ae mbia raaque mbuquera nguiã. Ae emoãte namo nae, Dios ae ra ùquĩ nyao no. ¹⁸ — Nderiirina tamee ndeje. Eretiirĩ nda cote. Mbia ja i ra nde cote, i que Dios Abraham je ra. Abraham ngue “nyia, eno”, i Dios cheẽ mose ra. Amei tuchi raque. Tiirĩ aroneãte raque aba je. ¹⁹ Amei tuchite raque. Cien añote raque. Eninisi abe arite raque. Eninisi rie chuimate raque. — Dios ra seriirina mee seje ucheẽ nguire, i que Abraham nda. — Ureimate nyeresẽ. ¿Mañi nda Dios ureriirĩ mee ure je re? i ãte que Abraham nda. ²⁰ Abraham ngue “nducuã” iã mbeite quia Dios cheẽ mose ra. “Nyia, eno”, i beite que equia Dios cheẽ mose ra. Ñee turã mbei que equia Dios rĩ nda. ²¹ — Dios quirãcuã tuchi quia ñene. Ae ra ucheẽ nyabiã mbei ñeende seje, i que Abraham nda. ²² Nyebe Dios Abraham isi turã nguiã. — Abraham

ndiqui seicua tuchite co, i que Dios ra. ²³⁻²⁴ Abraham mii je eã ño Dios riqui nguiã ñee. —Abraham seicuate. Nyebe aico nguiã eisi turã co, i que Dios ra. Abraham mii je eã ño embesa ji riqui nguiã ñee. Nande abe je chõ eriqui nguiã ñee. Nande Dios icua mose, Dios ra nande abe isi turã. Dios sí que Jesús raaque mbuquera ra. ²⁵ Dios que Jesús mbu íbii nande je ra. Mano ngue nandeicua ndiquicharõ nda. Aquere que Dios embuquera si cote ra. Nandembitirõ sacua ngue Dios embuquera ra.

5

Nande Jesús icua mose, Dios riqui nandehi turã

¹ A nandeico Jesucristo icuate ã. Nyebe Dios riqui nguiã nandehi turãte cote. Nyebe Dios riqui nguiã nandembiate cote. ² A nandeico Jesucristo icuate ã. Nyebe Dios riqui turãte nguiã nande je co. Dios turã tuchi. Dios ra nandemingo Jesucristo rã si tuchi cote. Uquĩ ño nandesarõ arõ nguiã ã. ³ Uquĩ mii eã ño nandehi nguiã. Mbia icua icua ndaque ra nande je, uquĩ mose abe chõ nda Dios nandehi no. Mbia icua icua mose nande je, Dios ra nandehi mbucoi turã. Nandeico tochi sacua. ⁴ Nandeico tochi mose, Dios ia tuchi ra nanderese. Dios ia mose nanderese, Dios cheẽ nandesarõ arõ na. Sã echeẽ ique rã nande je. ⁵ Nande Dios cheẽ ndaarõ arõ mose, ae ra ucheẽ nyabiã. Ae quiatu ngue Espiritu Turã mondo nguiã nande je. —Dios riqui nyeseuate jendese co, i Espiritu Turã nguia nande je co.

⁶ Mbae turã ngue nadesaã aroneãte nandehue, aque mose que Cristo mano nande je ra. Nandeicua mbitirõ sacua. ⁷ Mbia mo mano aroneate emo ndibishorõ. Nande turã mose, aque mose abe ra emo mano aroneãte nanderibishorõ. Etura tuchi mo ndibishorõ nguia emo mano sete raque reae. ⁸ Cristo quiatu que mano nanderibishorõ nandeicua tuchi mose ra. Nyebe nandeico nguiã ñee: —Dios riqui nyeseua tuchite nanderese co, i. ⁹ Cristo mano mose que nandeicua mbitirõ cote ra. Ae ra nandemingo icue Dios mbia icua mbasi mose. ¹⁰ Dios riirĩ ngue mano nande je ra. Nande Dios ucuayã mose. Ae quia

ngue eturã mbeite riqui nguiã nande je. Dios que “sequiatorã jẽ”, i nande je cote ra. Nyebe ra nandeico tuchi erese cote. Jesús quiatu ngue quera sichĩ nguiã nande je cote. ¹¹ Nyebe nandeya tuchi riqui nguiã Dios rese co. Jesucristo riĩ. Jesucristo quiatu ngue mano nguiã nande je.

Adán na eã tuchi chõ Jesucristo re

¹² Mbia mii nane ngue siqui nyii ra. Aque rane ngue mbae icua saã nande je ra. Nyebe mbia icua jate riqui nguiã cote. Nyebe Dios riqui nguiã ñee. —Mbia ra mano ja, i cote. ¹³ Mbia que mbae icua saã saã ndei quia nyii ra. Moisés Dios cheẽ mbesa nonde. —Dios cheẽ ngue jemumbachĩ nda, i aroneãte que aque mose ra. Dios cheẽ mbuchecua iriãte quiatu ngue aque mose re. ¹⁴ Adán nane ngue Dios cheẽ mumba cose ra. Aque mose bei chõ ngue mbia mbae icua naa naa nguiã cote. Nyebe mbia riqui nguiã mano mano ja huicua mose cote. Moisés que Dios cheẽ mbesa chee ra. Moisés embesa nonde que mbia mano mano ja huicua mose ra. Jesucristo rã eã tuchi chõ Adán nde.

¹⁵ Adán nane tuchi que mbae icua saã nda. Jesucristo quiatu que mbia rirõ nguia mbae icua si ra. Adán mbae icua naa mose, aque mose bei que mbia mano mano cote ra. Jesucristo mbae turã naa mose, ae que mbia icua mbitirõ tirõ cote ra. Dios turã nii. Jesús chisaã nguia rei Adán chisaã na eã tuchi. ¹⁶ Adán ae rane ngue mbae icua saã cose ra. —Mbia ra mano mano ja cote, i que Dios cote ra. Adán icua ndese maende. Ae Adán saã icua nande je nae, aque je que Jesucristo mano nda. Jesucristo turãte que mbia je cote ra. Nyebe Dios riqui nguiã nandehi turã, nandeicua ndese mae ndocoĩ. ¹⁷ Adán ae que mbae icua saã nyii ra. —Mbia ra mano mano ja cote, Adán mbae icua naande, i que Dios cote ra. Jesucristo ae que mbae turã saã mbia je cote ra. Mbia icua mbutiã sacua esi. Ae Jesús turã icua quia nae, uquĩ nda Dios mingo turã mbei, uquĩ icua ndese mae ndocoĩ.

¹⁸ Adán ae que mbae icua saã nyii ra. —Mbia ra mano mano ja cote, i que Dios cote ra. Adán icua ndese maende. Aquere que

Jesucristo mbae turã naa mbia je cote ra. Mano nguiatu ngue mbia riquicharõ nde. Nyebe Dios riqui nguiã nandemingo bei co cote. Jesús rĩĩ ae ñene. ¹⁹ Adán Dios cheẽ mumba mose, mbia mbũcuã ja que ãquĩ cote ra. Jesucristo Dios cheẽ mumbayã mose chõ mbia tubiriã mbuturã nguiã no. ²⁰ Dios que ñee Moisés je ra. —Secheẽ embesa mbia je, i que ee ra. † nda mbia jirandu tuchi huũcuã ndese. Mbia icuã i i tuchi mose, eĩ ño Dios turã i i tuchi mbia je no nde. ²¹ Adán mbae icuã naa mose, mbia mbũcuã ja chõ ãquĩ nde. —Mbia ra mano mano cote, i que Dios cote ra. Jesucristo que mano nandẽicuã ndiquicharõ cote ra. Aque mose que Dios uturã ndeacuquia tuchi nande je cote ra. Nandembuturã sacuã cote. Nandemingo bei sacuã cote.

6

Nandeyasu chõ nandẽico nguiã ã cote

¹ ¿Mañi nande ra cote re? ¿Mbae icuã nda nandesaã i i re? ¿Dios turã i i sacuã nande je re? ² Tei. Dios biãte ãquĩ. Jesús rese que nandemano ndesẽ. Nandemano ngue mbae icuã naa eã sacuã ndesẽ. ¿Mañi nande ra mbae icuã naa naa si re? ³ ¿Jẽiranuãte bautizar i rese re? —Jesús resenda tuchi chõ ãquĩ ndiqui re, i nda mbia bautizar ire nande je chã. Nande bautizar ire, nandemanonde raanguia chõ ãquĩ nde. Mbae icuã naa eã sacuã cote. ⁴ ¿Mbaerã ño bautizar nande chã? —Amano ngue Jesús rese ra, i chõ bautizar i re. —Seati que Jesús rese ra, i chõ bautizar i re. —Dios que sembuquera si Jesús rese ra, i chõ bautizar i re. Sã Dios quirãcuã Jesús mbuquera eraaque mose no. Eĩ nande chõ siqui nandeyasu ae.

⁵ Nandẽico Cristo rese ã. Nandemano mose Cristo rese, nandereco yasu chõ nandẽico nguiã erese ã. ⁶ Cristo mbucha mose ira rese, nandẽicuã abe que Dios mbucha ira rese ra. Nande mbae icuã oseĩ chiã sacuã ño ãquĩ nde. Mbae icuã nimba nda nandẽico eã cote chã. ⁷ Mbia raaque quia mbae icuã saã aroneãte nguiã. Eĩ nande chõ nguiã mano mose Cristo rese ã. Mbae icuã naa aroneã. ⁸ Nandemano mose Cristo rese ira rese, nandemingo bei

ra uchiese cote. Ae rã si. ⁹ Cristo que mano nda. Quera si que cote ra. Aquere ra mano siã cote. ¹⁰ Aque mii ngue Cristo mano mbia icuã je ra. Quera si que cote ra. Mano si eã ndae. Siqui bei equia Dios rese co. ¹¹ Jendaaque chõ jẽsaã saã mbae icuã je. Jenderecuarã eã mbae icuã cote. Jesucristo rese nandẽico tuchite ã cote. Mbae yasu rã ño nandẽico nguiã Jesucristo rese ã cote.

¹² ¡Mbae icuã ndese ra jẽingochĩ jenderecuarã jẽ! Jẽ mba e icuã oseĩ mose, ¡jẽteachõ ño jẽ! ¹³ ¡Jendete ra jemee meecheĩ mbae icuã je jẽ! Dios je quia jendete jemee. Mbae turã naa sacuã. Cristo rese que jemano ndesẽ. Jẽyasu chõ ngue jẽquera si Cristo rese resẽ. ¹⁴ Nandererecuarã eã nda mbae icuã cote. Moisés chimbesa rui eã ño nandẽico nguiã ã cote. Dios turã ndui ae chõ nandẽico nguiã ã cote.

Mbae turã nimba chõ nandẽico cote

¹⁵ Dios turã ae nandemingo nguiã. ¿Ãquĩ mose ra mbae icuã nandesaã saã nde? Tei. Dios biãte ãquĩ. ¹⁶ Nande nandechimondo mose mbae icuã je, mbae icuã nda nandererecuarã cote. Mbae icuã nda nandẽiquia chee cote. Nande nandechimondo mose Dios je, ae ra nandererecuarã cote. Ae ra nandemingo bei mbae turã ndese cote. ¹⁷ Jẽingo bei que mbae icuã ndese jenderecuarã nyii ra. Mbia Jesús cheẽ nenei nenei mose jẽje, jẽisi turã ño ngue cote ra. ã jẽingo echeẽ mumbayã ã cote. Nyebe aico nguiã gracias ite Dios je co. ¹⁸ Dios que jendirõ mbae icuã si cote ra. Mbae icuã ndese ra jẽingoã cote. Mbae turã ndese bei ra jẽingo cote. ¹⁹ Secheẽ ambuchecua tuchi quia jẽje co. Jẽ eicua tuchi sacuã. Jendete que jemondo tuchi mbae icuã je nyii ra. Jẽ ngue jẽingo i i tuchi mbae icuã ndese nyii ra. Jendete jemondo Dios je cote. Mbae turã naa i i sacuã cote.

²⁰ Mbae icuã mbaerã ño jẽingo nguiã cose. Mbae turã ngue jẽsaã aroneãte quia aque mose ra. ²¹ Jẽireĩte mbae icuã naa naande cote. Jenyisaã saã mbae icuã ñiinda, ãquĩ ngue mbae turã mo mondo ãte jẽje resẽ. Ae mbae icuã saã i ite quia, ãquĩ nda mano. ²² Dios que jendirõ mbae icuã si cote ra. Dios rimba chõ jẽ cote re. Nyebe Dios jemingo nguiã icúe mbae icuã si. Nyebe

ra Dios jemingo bei ibate manonde cote. ²³ Ae mbae icuã saã saã nguia nae, ãquĩ nda Dios mbasi bei manonde. Ae Jesucristo icua quia nae, ãquĩ nguiatu ra Dios turã mingo bei. Mbae turã naa eã ndaque. Dios turãte quia ee re.

7

Eraaque rã ño nandeico nguia Moisés chimbesa je cote

¹ Sã jenderecua ibi jenda mo no. Echeẽ jemumba aroneate no. Jemano mose, jenderecuayã nda cote. ² Sã cuña mo ndiqui ngu rese no. Cuña mo ngu rerequia mose, sã eriqui bei erese. Eru mano mose, aque mose ramo nda siquiã erese cote. Aque mose ramo nda ae ae riqui cote. ³ Ngu reco mose, siqui aroneãte emo ndese. Siqui mose emo ndese, Dios cheẽ mumba chõ ãquĩ nde. Eru mano mose, aque mose quiatu ra ngu mo ndea cote. Dios cheẽ mumba eã ño ãquĩ nde.

⁴ Eraaque rã ño jẽingo nguia Moisés chimbesa je ãquĩ cote. Cristo quiatu que mano jeni nda. Quera si que jeni no nda. Cristo rese chõ jẽingo nguia ãquĩ cote. Dios je mbae turã naa naa sacua ño jẽingo nguia erese ãquĩ cote. ⁵ Nandeico mose mbae icuã ndese nyii, mbae icuã achõ ño ngue nandechosei chosei quia aque mose ra. Nandebi tuchi que Dio s cheẽ mumba mumba aque mose ra. Nyebe que nandeico mbae icuã naa i i tuchi aque mose ra. Eĩ nda nandeicuã nandeiquia rei aque mose. Espiritu Turã nandembiasu eã mose. ⁶ Eraaque rã ño nandeico nguia Moisés chimbesa je ã cote. Moisés chimbesa rui eã ño nandeico nguia ã cote. Dios cheẽ mĩ ndui chõ nandeico nguia ã cote. Espiritu Turã nguiatu ngue nandembiasu nguia. Espiritu Turã ño nandembaaquiatsu nguia ã cote. Moisés chimbesa achõ eã ño cote re.

⁷ —Moisés chimbesa icuãte, ae ãte raque quia co. Moisés chimbesa quiatu que sembiirandu seicuã ndese resẽ. —Eicuãte quia emo mbae osei osei riqui re, i que Moisés chimbesa ra. Eĩ nda seiranuãte rei ãquĩ ndese. Moisés chimbesa eande ndae. Moisés chimbesa ae ngue sembiirandu nguia ãquĩ ndese. —Eicuãte ãquĩ, i seje.

⁸ Moisés chimbesa sembiirandure mbae icuã ndese, mbae icuã achosei i i tuchichĩ cote. —Mbae icuã nda jẽsaã saãchĩ, i mose chõ mbae icuã achosei i i tuchichĩ cote. Emo Moisés chimbesa icuayã mose, mbae icuã abe ra eicuayã no. ⁹ Moisés chimbesa que aicuayãte quia nyii ra. Seturã aico rei aque mose. Moisés chimbesa que aicua cote ra. Eicua mose que echeẽ amumba i i tuchi cote ra. ãquĩ mose que seicuã aicua cote ra. ¹⁰ Mbia mingo bei sacua ndaque Moisés chimbesa. Ae que semingo bei eã nda. Moisés chimbesa amumba mumba bei chõchĩ. Nyebe aico nguia isho tuchi Dios si aque mose. ¹¹ Seicuã ño ngue sembiirĩ irĩ mbei quia nyii ra. Se Moisés chimbesa icua mose, seya eã tuchi que aque mose cote ra. Seicuã nda seiquia chee, ae que se ra. ¹² Moisés chimbesa turãte raque. Dios cheẽ ndaque.

¹³ Moisés chimbesa turãte. ãquĩ je eã ngue Dios paama i seje ra. Seicuã ae quiatu que Dios mbupaama i seje ra. Moisés chimbesa que sembiirandu tuchi seicuã ndese ra. Se Moisés chimbesa turã icua mose, ãquĩ mose que seicuã Dios mbupaama i seje ra. Nyebe Dios Moisés chimbesa mee nguia nande je. Nandeicuã mbuchecua tuchi sacua nande je.

Nandechianqui renda icuã ño nandeisi isi nguia

¹⁴ Moisés chimbesa turãte raque. Se ae seicuã nde. Mbia chõ se re. Moisés chimbesa amumba mumba chõchĩ nguia co. ¹⁵ Mbae turã asaã mbite raque. Mbae icuã asaã eã mbite raque. Mbae icuã nguia seisi isite nguia. Mbae turã uquia reã. ¿Mbaerã aico mbae turã naa eãte re? ¹⁶ Ae asaã sereãte quia nae, ãquĩ asaã mbeichĩ. Moisés chimbesa turãt e raque. Aico echeẽ mumba mumba beichĩ. ¹⁷ Se ae chõ eã ño aico nguia mbae icuã naa naa co. Sechiangui renda icuã nguia “mbae icuã esaã saã”, ite nguia seje co. Nyebe aico nguia mbae turã mo naa eã mbeite co. ¹⁸ Seicuã tuchi chõchĩ se. Seturã mo eã tuchichĩ se. —Mbae turã tasaã, aete raque quia co. Aico mbae icuã naa naa mbei chõchĩ co. ¹⁹ Sebite raque mba e turã.

¿Mbaerã aico mbae turã naa eãte re? Sebiãte raque mbae icuã. ¿Mbaerã aico mbae icuã naa naa mbeite re? ²⁰ Se ae eã mbae icuã asaã saã nguiã. Sechiangui renda icuã nguia “mbae icuã esaã saã” ite nguiã seje. Sechiangui renda icuã ño seisi isi nguiã mbae turã si co.

²¹ “Mbae turã tasaã”, i mose se, mbae icuã ño seriquisã quisãchĩ nguiã co. ²² Sebite raque Dios cheẽ sechiangui re. ²³ —Dios cheẽ ndese taico, ae rei nguiã sechiangui re co. Sechiangui renda icuã nguia seriquisã quisãte nguiã. Nyebe aico nguiã mbae icuã naa i ite. ²⁴⁻²⁵ Dios cheẽ ndese aico sete raque. Sechiangui renda icuã nguia semingo beite nguiã mbae icuã ndese. Seraaquete aico co. Nyebe seya eãte aico co. ¿Aba quia ra seicuã mbitirõ nde? Jesucristo quia ra seicuã mbitirõ cote. Nyebe aico gracias i tuchi Dios je co.

8

Espíritu Turã ndiqui nandembui mbae icuã si

¹ Ae Jesucristo icua quia nae, ùquĩ nda Dios mbasiã mbei. ² Nande Jesucristo icua mose, Espíritu Turã nda nandechiã mbi-asu. Espíritu Turã nda siqui nanderese, mbae icuã naa eã sacuã. Eĩ nda nandemano mbeite rei, mbae icuã naa naa mbei mose. ³ Moisés chimbesa que nanderirõ aroneãte mbae icuã si ra. Echeẽ nguiatu ngue nandemumbayã aroneãte nguiã. Mbiate quiatu ngue nande re. Nandequirãcuã nea. Dios que ndua nanderese ra. Nyebe nguiirĩ mondo nguiã nande je. Mbia rã ngue Jesús ru íbii ra. Mbia icuã jate raque. Ae mii ngue eicuã eã nda. Ae que mano nandecuã ndiquicharõ nda. Nyebe nandererecua eã ño mbae icuã cote re. ⁴ Jesús que mano nande je ra. Nyebe mbae icuã ñimbirãcuã eãte nande je cote. Nyebe Dios cheẽ nandemumbayã arondete namo cote. Espíritu Turã ndui chõ nandeco nguiã cote. Mbia icuã ndui eã ño nandeco nguiã ã cote. ⁵ Ae siqui quia Espíritu Turã ndese nae, ùquĩ ño siqui nguiã Dios cheẽ ndui si. Ae siquíã nguia Espíritu Turã ndese nae, ùquĩ ño siqui nguiã uchiangui renda icuã ndui si. ⁶ Ae siqui quia Espíritu Turã ndese, ùquĩ ia bei ra eriqui. Siqui bei rae.

Ae siquíã nguia Espíritu Turã ndese, ùquĩ nda siquíã. Mano ndae. ⁷ Nandechiangui renda icuã nguia siqui icuã icuã mbeite nguiã Dios je. Nandechiangui renda icuã nguiarei Dios cheẽ mumbayã aroneã. ⁸ Ae siqui bei quia uchiangui renda icuã ndui, ùquĩ siqui aroneãte Dios cheẽ ndui.

⁹ Eĩ jenyete eãte raque jẽ. Espíritu Turã ndui chõ jẽingo nguiã jẽ. Espíritu Turã nguia siqui nguiã jeñiangui re. Espíritu Turã siquíã mose emo ñiangui re, Cristo rimba eã ño ùquĩ nde. ¹⁰ Jesucristo riqui jeñiangui re ùquĩ. Jendete ra mano ndaque mbae icuã je. Espíritu Turã nda jeãingue mingo bei ibate. Dios quiatu ngue jẽisi turã nguiã. ¹¹ Dios que Jesucristo raaque mbuquera ra. Eĩ si ra Dios nanderete raaque mbuquera Espíritu Turã quirãcuã je no. Eĩ si ra nanderete mbiasu, Espíritu Turã siqui mose nandechiangui re.

¹² Nandechiangui renda icuã ndui nandeco aroneãte cote. ¹³ Nandechiangui renda icuã ndui nandeco mose, nandemano mbei ra equia. Espíritu Turã nandebi icuã mbutiã mose, nandemingo bei rae. ¹⁴ Ae je Espíritu Turã ndiqui ñee nae, “eĩ jenyete” i nae, Dios rimba chõ ùquĩ nde. ¹⁵ Nande Espíritu Turã isi mose, aque mose bei chõ Dios riiirĩ nande cote re. Dios rimbachõ eã ño nande cote re. Dios riiirĩ tuchi chõ nande cote re. Nandesiquiche tuchi que equia Dios si nyii ra. Nandesiquicheãte esi namo cote. — Paba, nande chõ nguiã e e co cote. ¹⁶ — Dios riiirĩ tuchite jẽ, i chõ Espíritu Turã nguiã nandembiirandu tuchi. —Dios riiirĩ tuchi rei nande re, nande chõ nguiã nande abe nandechiangui re co. ¹⁷ Dios riiirĩ tuchite quia nande re. Nyebe ra Dios mbae mondo tuchi nande je Jesucristo rese. Sã ñi mbia Jesucristo mbasi cose no, eĩ si ra mbia nandembasi nande abe. Aquere ra nandeco turã mbei erese ibate cote.

Mbae turã mbei jee ra nande je nandeco mose ibate

¹⁸ Mbia ra nandembasi raque a nyii. Dios ra nandererao bei ibate cote. Aque mose ra mbae turã mbei nande je cote. Nyebe ra nandetesarei nanderasi jua si cote. Nandeco bei mose ibate. ¹⁹ Dios

ra huicuaasa mbuchecua ja aque mose. —Co rei seicuaasa co. Co abe no. Co abe no, i ra Dios aque mose. Ūquĩ ño nandesaarõ arõ nguiã ã. Ae Dios chao mbae ja, ũquĩ abe riqui ũquĩ ndaarõ arõ ã. ²⁰ Adán mbae icuã naa namo mose, mbae icuã ja que aquere cote ra. Dios chiao icuã ja cote. Dios que mbae mbucua ja Adán mbae icuã naa namo mose ra. ²¹ Eĩ mbei eã nda mbae. Mbae ra nimbitorõ ja cote. Nimbiasu ra cote, Jesús tu mose íbii cote. Mbae ra maõã cote. Mbae ra shi eã cote. Jesús quiato rese ra mbae nyicuabo ja aque mose cote. ²² Dios chiao ra nyicuabo ja aque mose. Dios chiao ia eãte quia namo nde. Áquẽ ndasi rá ño eriqui nguiã namo. Nyebe ra Dios uchiao mbiasu ja cote. ²³ Dios que Espíritu Turã mondo nande je ra. Nyebe nandeico nguiã ñee, “Dios ra nandembiasu nguiirina tuchi cote”, i. Aque mose ra Dios nandembuchicuabo tuchi uchiao ja rese cote. Namó ño nanderasi rasi re. Nandeya eãte abe no. Nandembuchicuabo mose, nanderete abe ra embiasu. ²⁴ —Jendete tambiasu, i que Dios nanderirõ mose mbae icuã si ra. Ūquĩ ño nandesaarõ arõ nguiã ã. Nanderete yasu eãte namo. Nyebe nandeico nguiã eraarõ arõ ã. ²⁵ —Jendete tambiasu, i que Dios nande je ra. Nyebe nandeico nguiã eraarõ arõ mingue ã.

²⁶ Nandequirãcuã neate nande. Nyebe Espíritu Turã ndiqui tuchi nguiã nanderese. Sã nandeico ñee: “¿Mañi nande ra ñee Dios je re?” i nandechiangui re. Nandechẽ ndequia requia mose chõ nandeico nguiã iabu abu. Nandeiabu mose chõ Espíritu Turã ndiqui nguiã ñee turã Dios je nanderĩ. Nandeuru ñee Dios je nandechiangui re. ²⁷ Dios mbia chiã icua jate quia co. Espíritu Turã ñee mose Dios je nandeuru, Dios echeẽ icua chõ nguiã aque. Dios cheẽ ndui si chõ Espíritu Turã ndiqui nguiã ñee Dios je Dios icuasa rĩ. ²⁸ Ae nyesecua quia Dios rese, ũquĩ je chõ Dios riqui nguiã mbae turã naa ja. Dios quiatu ngue eirabo nguiã. Ndua quiatu ngue erese nyii re.

²⁹ Ae res e Dios riqui nduate nyii nae, ũquĩ ngue Dios mingo icúe nyii ra. Jesu-

cristo rá si embiasu sacuã. Nyebe nandeico nguiã Dios riirĩ tuchi Jesucristo rese cote. Jesucristo rei nanderiqui cote. Nande tubiriãte ra Dios quiato cote. ³⁰ Dios que ndua nanderese nyii ra. Aquere que nandemingo icúe umbaerã cote ra. Nandeisi turã ngue cote ra. —Mbia tamumae turã ja jendese jẽingo mose ibate, i que Dios nande je cote ra.

Mbae mo nda nandembui eã mbei Dios si

³¹ Dios riqui tuchi nanderese co resẽ. Nyebe ra emo ñimbirãcuã eã nande je cote. ³² Dios que nguiirĩ mii mondo nande je ra. Mano sacuã nandeicuã je. Eĩ nda mbae mondo ja nande je no. Sã nguiirĩ mondo nande ja je no. ³³ Dios chesecua tuchi chõ nande re. Emo ñee icuã aroneãte nande je. Dios quiatu ngue nandeisi turã nguiã. ³⁴ Cristo que mano nandeicuã je ra. Quera si que ra. Dios quiatocuti eñi ngoi hue cote. Ñee turã turã nanderĩ Dios je hue cote. Nyebe emo ndiqui nguiã ñee icuã aroneãte nande je cote. ³⁵ Mbae mo Dios mbesareĩ aroneãte nandesĩ. Nyesecua beite quiatu nguiã nanderese co. Nanderasi arondete raque. Mbae nandembia eã arondete raque. Mbi a icuã arondete raque nande je. Nanderiãcuã arondete raque. Nandeirao eã arondete raque. Mbia nandequia arondete raque. Ūquĩ ja ra Dios mbesareĩ eã tuchi nandesĩ. ³⁶ Mbia icuãte riqui nande je ã. Sã embesa ji riqui i no:

Nderĩ ño mbia riqui nguiã ureiquia serĩ mbeite ã.

Oveja iquia iquia rá ño eriqui nguiã ure je ã,

i ñi embesa ji re. ³⁷ Mbia icuã icuãte raque nande je. Ñimbirãcuã eã mbei ra nande je. Jesucristo quia siqui nguiã nanderese co. Nyesecua beite quiatu nguiã nanderese co. ³⁸⁻³⁹ Dios nyesecua tuchite quiatu nguiã nanderese co. Dios hui aroneãte nandesĩ. Mbia nandequia iquia mose, aque mose abe Dios hui aroneãte nandesĩ. Mbae mo nda embui eã nandesĩ. Angeles. Aba checuayã icuã. Mbia rerecua. Ae icuã icuã ndiqui nande je namo. Ae icuã icuã nda nande je emo mose. Ibatenda mo. Ae siqui ibiqui rĩ no. Dios chiao mo. Ūquĩ ja ra

Dios mbui eã nandesí. Dios quia nyesecua tuchi te nguiã nanderese Jesucristo riñ co.

9

Dios que judíos m̄i icúe umbaerã tuchi ra

¹ Jesús icuasa chõ se resẽ. Aico ñee ñooño eãte co resẽ. Espiritu Turã abe riqui semiirandu sechianguí re co resẽ. ² Seya eãte aico co. Seya eãte aico judíos rese co. ³ Se sí raque judío. Judíos ja chõ ure re. Judíos siqui sereãte chõchĩ Jesús rese. Seso sete raque tata cuasu, judíos mingo bei sacua Jesús rese. Eĩ ndei ra sesose rete tata cuasu judíos renda que re. Seresenda tuchi te quia ñene. ⁴ Israel ndei judíos i tuchi. Seririĩ, i rei que Dios judíos je ra. Dios que uquirãcuã teacuquia rei judíos je ra. Dios que contrato saã ndei judíos je ra. Moisés chimbesa que judíos quereco rei ra. —Eĩ jenye chõ ñee seje, i rei que Dios judíos mbaaquiati quiatu ra. —Mbae turã nda asaã saã mbei quia jẽje, i bei que Dios quia judíos je ra. ⁵ Nanderamei ñiinda tuchi quiarei judíos i. Cristo tu mose ibi, judío que ae abe cote ra. Cristo rei Dios tuchi. Mbia rerecua bei tuchi rei Cristo. Amén.

⁶ Dios turã tuchi raque judíos je. Judíos que siquiãte Dios rese cote ra. Dios quiatu que ucheẽ mbuchebiã ndei ee ra. Uquĩ mo nguiatu que judíos tuchi eã nda. Siquiã tuchi que Dios rese ra. ⁷ Abraham ndiriĩ nyeremo ndei que ra. Ismael. Isaac. Uquĩ nyeremo ngue eririĩ ja rei ra. Dios que Isaac m̄i isi ra. —Abraham ndiriĩ, i eã ngue Dios Ismael riiriĩ je ra. —Abraham riiriĩ, i chõ ngue Dios Isaac ndiriĩ je ra. Isaac ndiriĩ jaje que Dios “judíos” i cote ra. ⁸ Abraham ndiriĩ nducucha que Dios isi turã ja eã ndese. Ae Dios cheẽ isi turã nguia, uquĩ je chõ Dios riqui nguiã “seririĩ” i. ⁹ Dios que ñee Abraham je ra. —Tenda nongue ra achu. Aque mose ra ãquẽ naciũ mo nyaacuquia neninisi Sara je, i que Dios Abraham je ra. ¹⁰ ãquẽ ngue tiarõ cote ra. Isaac, i que ee ra. Isaac que ngũinisi tea chee ra. Rebeca, i que eninisi je ra. Eata riru rerequia mose que Dios ñee ee ra. ¹¹⁻¹² —Ae rane nda nyaacuquia ãquẽ, ngõngue rimba tuchi chõ nda aque, i que Dios Rebeca je ñee nda.

Echaacuquia nonde. Eriiriĩ mbae icuã naa nonde. Mbae turã abe naa nonde. —Co chõ taisi, i que Dios ra. —Co chõ taisi, i beite Dios quia co no. Mbia mbae turã naa nonde chõ Dios eirabo nguiã. Dios turãte quia ñene. Nyebe mbia mo irabochõ nguiã. Ebite quia ñene. ¹³ Dios que ñee Rebeca riiriĩ n̄i nda. Uquĩ nyeremo n̄i: Jacob ndese chõ aico nguiã nyesecua. Esaú rese achesequa eãte, i que Dios ra, i que embesa ji ra.

¹⁴ ¿Mbaerã Dios riqui aque m̄i irabo re? ¿Mbaerã eriqui enongue abe isiã nde? ¿Dios icuãte ere? Tei. Eicuã eãte raque. ¹⁵ Sã Dios ñee Moisés je nyii no: Seya eãse mose emo ndese, seya eãte erese. Setutãse mose emo je, seturãte ee, i que Dios Moisés je ra. ¹⁶ —Dios turã naa nda seje chã, i mose emo, uquĩ je eã ño Dios turã ndiqui nguiã. Ae mbae turã saã saã ndei quia, uquĩ je eã ño Dios turã ndiqui nguiã. Ae rese Dios ia eã ndiqui, uquĩ je quiatu Dios turã ndiqui nguiã. ¹⁷ Sã faraón no. Egipto jenda rerecua. Dios que ñee ee ra. —Arem̄i ngue mbia rerecuarã nda. Sequirãcuã ndeacuquia sacua mbia je. Mbia jirandu ja sacua serese, i que Dios faraón je ra. ¹⁸ Dios ia eãse mose emo ndese, eya eã nda erese. Dios emo ñia matãse mose, matã ndae.

Dios ra judíos isi turã sí

¹⁹ Jemo nda ñee seje reae. —Dios ae emo ñiã matã mose, ¿mbaerã nda jeñee asi echiã ãtã je re? i ra jemo ñee seje reae. ²⁰ Dios cheẽ nandesobeishĩ aroneãte. Sã nandembaecua ñio ñee aroneãte uaosa je no. —¿Mbaerã seraã eĩ nde? i aroneãte ñio ñee uaosa je no. ²¹ Ñio aosa ra ñio saã ñooño ño ubi mose no. Ñio turã tuchi raã arondete no. Ñio icuã abe raã arondete tuchu sique je no. Embae quia tuchu re. Tuchu rã ño nande re. Ñio aosa rã ño Dios re. ²² Ae eicuã icuã mbeite riqui Dios je nae, uquĩ je Dios siqui mingue i ite co. Uquĩ nda nyoi je tata cuasu. Uquĩ Dios mbasi serite cote. ²³ Dios mbae turã saã sete ubi je. Nyebe uquirãcuã ndeacuquia nguiã ubi je. Diobi chõ nande re. Dios que nandea uchesecuarã nda. Nandeico sacua erese. ²⁴ Diobi chõ nande re. Dios que nandeirabo ra. Nandemo ndei

judíos. Judíos eã abe abe. Dios chiirabo ja chõ nande re. ²⁵ Sã Oseas Dios cheẽ mbesa no:

Ae serimba eã nyii nae, ùquĩ nda serimbarã cote.

Ae rese mbia nyesequayã nyii, ùquĩ ndese ra achesecua tuchi se cote.

²⁶ “Serenda eã ño jẽ nde”, i que Dios ñee ee nyii ra.

Hue jenda sí je ra Dios ñee cote.

“Serenda chõ jẽ cote re”, i ra Dios si ñee ee cote,

i que Oseas Dios cheẽ mbesa ra.

²⁷ Eĩ ngue Isaías Dios cheẽ mbesa cose ra:

Judíos tubiriã tuchite raque rae.

Siqui ja eã nda Dios rese.

Co mii mii ño nda siqui erese.

²⁸ Dios quia ra uquiatoã mbasi ja ibi jenda cote.

Mbasi jei ra cote, i que Isaías embesa ra.

²⁹ Isaías que ã mbesa cose no nda:

Mbia rese Dios ndua eande rae, eĩ nda judíos ua ja rei.

Dios judíos mo ndecha eande rae, eĩ nda judíos ua ja rei.

Sã Sodoma jenda ua ja no.

Gomorra jenda abe no,

i que Isaías embesa ra.

Judíos siqui sereã Jesús rese

³⁰ Tacheẽ nyecua jẽje. Ae judíos eã nae, ùquĩ ngue “taico Dios rese”, iã ndei ra. Aque mose que Jesús icua cote ra. Jesús icua mose que Dios echiã mbitirõ cote ra.

³¹ Judíos quiatu que ñee ndei ra. —Dios cheẽ ndui si tuchi nandeico. Nandeico mose erui, Dios ra nandemingo bei, i rei que judíos ra. Dios que emingo bei eã nda. Siqui bei eã nguiatu ngue Dios cheẽ ndese re.

³² —Jesucristo nandeicua, i eã ñochĩ judíos. —Nande ae nandeico Dios cheẽ ndui, i chõchĩ. —Nandeico mose erui, Dios ra nandemingo bei, i chõchĩ. Judíos biãte que Jesús riqui ra. Nyebe judíos riqui turã eãte nguiã. ³³ Eĩ ngue embesa ji Dios cheẽ nda:

Serucucha que amii judíos rae ra.

Judíos ra eisiteã.

Judíos ra cuá i nyoi ee.

Ngoi ra echoi cuá i mose ee.

Sita rã ño serucucha ee re.

Ae serucucha icua quia nae, ùquĩ nguia ra ngoi eã nyoi.

“Dios rucucha aisi jirichĩ nguia no”, i eã nda Cristo icuasa mo ñee, i que Dios cheẽ mbesa ji ra.

10

¹ —Sã Dios judíos rirõ mbae icuã si, ae rei quia co. —Paba, judíos emingo Jesucristo rese, ae tuchi rei quia co. ² Judíos siqui sete raque Dios cheẽ ndui. Ñeenda quia eicuayãte nguiã Dios icha. ³ —Dios ra nan-dechiã mbitirõ Jesucristo rii, i eã ñochĩ. Ae ae uchiã mbitirõse chõchĩ. Jesucristo icua sereã nea mbei chõchĩ. Nyebe Dios riqui nguiã echiã mbitirõ eã mbei. ⁴ Jesucristo tu nonde que judíos siquise tuchi Moisés chimbese rese ra. Jesús que tu íbii cote ra. —Moisés chimbese rui jẽingo mose, taembitirõ turã, i ãte que Jesús ra. —Seicua mose quiatu ra jaembitirõ, i que ra.

Sã mbia siqui ja sereã, i Dios

⁵ —Emo mbae icuã mo saã eã mbei emo mose, ùquĩ nda Dios mingo bei, i rei que Moisés ra. ⁶⁻⁷ ã nandeico Jesús icuate ã. Nyebe ae riqui nguiã nandemingo bei i ite ã. Nyebe nandeico nguiã ñee ãte. —Aba quia ra oso Jesús reru ibate si nande je, i ãte. —Aba quia ra oso mbia raaque rea, Jesús mbuquera sacua, i ãte nande mo. ⁸ ã ureico Jesucristo renei nenei mbia je ã. —Jẽ Jesucristo icua mose, jẽingo bei rae, ure equia mbia je ã. Jesucristo icuasa ra ñee: —A Jesucristo cheẽ ndiqui aba jiite a. Echeẽ aba chucua bite aba chiangui re, i ra Jesucristo icuasa ñee. ⁹ —Jesucristo rei sererecua, ere chõ ñee. —Dios que Jesucristo raaque mbuquera ra, ere chõ nguia ndechiangui re. Nde i mose, Dios ra nemingo bei. ¹⁰ Emo Jesucristo icua mose uchiangui re, Dios ra echiã mbitirõ. —Jesucristo icua quia co, i mose, Dios ra esirõ mbae icuã si. ¹¹ —Jesucristo aisi jirichĩ nguia no, i eã nda Jesús icuasa mo ñee, i que embesa ji Dios cheẽ nda. ¹² Dios quia mbia ja rerecua tuchi re. Judíos achõ ndeecua eã. Judíos eã achõ nderecua eã no. Eĩ ja chõ mbia Dios je re. —Mbae mo embu seje, i mose emo Dios je, mondo turã tuchi ra ee. ¹³ Sã embesa ji riqui i no:

“Paba, seicuã embitorõ”, i mose emo, Dios ra ùquĩ mingo bei tuchi, i que embesa ji ra. ¹⁴ Mbia mo Jesús icuayã mose, ñee aroneãte ee. Mbia jiranuã mose Jesús rese, Jesús icua aroneãte. Emo Jesús cheẽ nenei nenei eã mose mbia je, mbia jirandu aroneãte Jesús rese. ¹⁵ Dios mbia mo mondo eã mose echeẽ nenei nenei sacua, echeẽ nenei nenei aroneãte. Sã embesa ji riqui ñee no. Eĩ si chõ ñene:

Aba bite emo tu mose Dios cheẽ nenei nenei ure je.

Ureya tuchite erese,

i que embesa ji cose ra. ¹⁶ Mbia miĩ miĩ ño siquichĩ Dios cheẽ turã ndese ùquĩ. Sã Isaías ñee no:

Dios, mbia que urecheẽ ñandu sereãte ra, i que Isaías embesa ra. ¹⁷ Mbia ra Jesucristo icuayã mbeite, jiranuã mose erese. Mbia ra jiranuãte Jesucristo rese, emo echeẽ nenei neneiã mose ee.

¹⁸ ¿Judíos Dios cheẽ turã ñanuãte re? Ñandu ja rei que ra. Dios cheẽ ngue judíos chandu ja rei resẽ. Mangue chooño eã ngue echoi Dios cheẽ nenei nenei ndesẽ.

¹⁹ ¿Judíos jiranuãte Jesús cheẽ turã ndese re? Jirandu tuchite rei que ra. Sã Moisés Dios cheẽ mbesa no:

Dios rei se. Judíos eã ndese taico turã.

Mbia aquiatuã taisi serimbarã. Judíos nda queteã tuchi serese chã,

i que Moisés Dios cheẽ mbesa ra. ²⁰ Isaías abe que Dios cheẽ mbesa ra. ã ngue embesa ra:

Ae serequia eãte quia, ùquĩ ño ngue serea ra.

Ae ndua eãte quia serese, ùquĩ je chõ achecua nguiã, i que Dios ra,

i que Isaías siquicheãte Dios cheẽ mbesa ra.

²¹ Isaías que ñee judíos je no nda:

Dios riqui ñee jẽje co. “Jẽingo serese”, ae beite raque se quia judíos je co.

Secheẽ mumba bei chõchĩ.

“Jẽingo serese”, ae beite raque quia secheẽ mumbasa je co,

i que Dios ra, i que Isaías Dios cheẽ mbesa ra.

11

Dios ia eãte judíos rese

¹ Dios que hui eã judíos si ra. Judío chõ se no nde. Abraham ndei sei. Benjamín abe rei sei no. ¿Mañi nda Dios hui judíos si re? ² —Serimbarã mbei ra judíos, i que Dios cose ra. Nyebe eriqui nguiã emombo eã mbei. ¿Jẽtesarei chõ Elías cheẽ si Dios je re? Elías que ñee icuãte judíos ataque rĩĩ aque mose ra. ³ —Dios, judíos que ndecheẽ nenei neneisa iquia ja ra. Altar abe que embucoi coi nembae ra. Se ae tuchi aico nderimba co cote. Se abe ra judíos seiquia chee, i rei que Elías Dios je ra. ⁴ Dios que ñee Elías je cote ra. —Nde miĩ eã ño serimba re. Serimba tubiriãte nyeresẽ. Siete mi l serimba que ngoi eãte nguiã ndese ñee ñee Baal naanguia je ra, i que Dios ñee Elías je cose ra. ⁵ Eĩ ño namo abe re. Judíos emo mo ño siqui nguiã Dios rese ã. Ùquĩ miĩ ño Dios chiirabo ùquĩ nde. Uturã je chõ Dios ùquĩ irabo nguiã. ⁶ Mbae turã naa mose eã ño Dios eirabo nguiã. Uturã je ae chõ Dios eirabo nguiã. Mbae turã naa naa ndibishorõ eã ño Dios riqui nguiã aba irabo umbaerã. Mbae turã naa naa ndibishorõ mose, eĩ nda Dios aba irabo eãte rei uturã je. ⁷ Dios quiatorã nande, i rei que judíos ra. Dios quiatoã tuchi que eriqui ra. Jesucristo icua sereãte que equia ra. Co miĩ miĩ ño ngue Dios irabo uquiatorã nda. Eataque que Jesucristo icua sereãte quia ra. ⁸ Sã embesa ji riqui ñee no:

Dios que embaaracua eã nda.

Nyebe mbae icua eãte nguiã, mae mose Dios chiao rese.

Nyebe Dios cheẽ icua eãte nguiã eandu mose no,

i que embesa ji cose ra. Eĩ mbei chõ namo abe re. ⁹ David abe que ucheẽ mbesa ra. Eĩ ngue embesa ra:

Sã eya chooño umbae tubiriã ndese.

“Nandeico turãte ã”, sã i, siqui icuã mose.

Sã Dios embua tuchi embasi mose.

¹⁰ Sã eresa nyiati ati bei.

Mae eã sacua.

Sã mbae usi riqui eituquia bei,

i que David ñee nda.

¹¹ Judíos que Dios cheẽ secha rei ra. Uba je quia ra ecuaẽ Dios rese. Dios si judíos hui mose quiatu que judíos eã siqui arõte Dios rese cote ra. Dios judíos eã mingo bei tuchi sacua cote. Judíos ra queteã tuchi

chee Dios rese cote. Uba si sacua ere se cote. ¹² Judíos que Dios chee isiteã nda. Nyebe mbia judíos eã ja Dios chee andu ja nguiã cote. Judíos Dios chee mumba mose, Dios que uturã teacuquia ja mbia mangue chooñoa jenda ja je cote ra. Judíos uba si mose Dios rese, mbia mangue chooñoa jenda ra siqui tuchi Dios rese cote.

Judíos eã ño Dios chee isi

¹³ Jêje judíos eã je aico Dios chee nenei nenei a. —Judíos eã je eico sechee nenei nenei, i que Dios semondo ra. Nyebe aico nguiã Dios chee nenei nenei sete. ¹⁴ Judío chõ se no nde. Sã jê jêingo Dios rese no jê. Sã judíos abe riqui Dios rese jê na si. Dios erirõ sacua mbae icua si. ¹⁵ Judíos Dios isiteã mose que Dios hui chõ judíos si ra. Judíos eã nguiatu que Dios isi uquiatorã cote ra. —Mbia mo ja sequiã cote, i que Dios judíos eisiteã mose ra. Judíos ra uba si chee Dios rese emo mose cote. Mbia raaque quera si rã tuchi ra aque mose cote. ¹⁶ Sã mbia mo mbichae raã no. Mbichae ñinda uchi turã mose, eruinda abe ra uchi turã no. Mbichae ñinda rã ño Abraham nde. Judío i tuchi chõ Abraham nde. Sã Abraham siqui turã tuchi Dios je no. Nyebe ra eriri abe uba chee Dios rese no. Ei turã mose, erãquiã abe ra eturã no.

¹⁷ Olivo rãquiã na ño judíos re. Judíos siquiã mose Dios rese, olivo rãquiã na ño ngue Dios echisia mombo ra. Uquiã naquiã nendaque re chõ ngue Dios jemã nda. Jê judíos eã. Injertar i raanguia chõ Dios jembucha nguiã ei rese. Jemingo tuchi sacua Dios rese. Olivo rãquiã na eã ndaque jê. ¹⁸ Jenguasu ra jêsaã saãchã judíos je jê! Jê Dios jêisi turã mose jê! Erãquiã injertar i ji rã achõ ño jê nde. Erãquiã nda hui mingo eã. Ei quia nda erãquiã mingo nguiã. Erãquiã na ño jêingo nguiã jê. ¹⁹ —Olivo rãquiã ngue Dios chisia urembucha sacua ei rese, jjenyechã nda jenguasu raã naa jê! ²⁰ Dios que echisia sia Jesucristo icua sereã mose ra. Jê Jesucristo icua mose chõ ngue Dios jembucha olivo i rese ra. Jemingo bei sacua. Nyebe jêingo jenguasu raã naa eã. Jêreĩ ireĩ jiri quia Dios si. ²¹ Dios que olivo rãquiã nyisia mombo Jesús icuayã mos e ra. Eĩ nda Dios jemombo jê abe Jesús

icuayã mose. ²² Jêsaã Dios turãte mbia siqui mose erui no jê! Jêsaã mbia mbasi echee mumba mose no jê! Jêsaã eturãte jêje no jê! Jêingo bei chõ Dios turã ndese jê! Jêingo eã mose Dios rui, Dios ra jemombo. Ira rãquiã sia ji mombo rã si. ²³ Judíos uba si mose Dios rese, Dios ra embucha si esiasa rese. Injertar i si ra ee. Dios mii ño eaquiãtu uquiã naa nde. ²⁴ Judíos eã ño jê nde. Olivos turã naquiã eã ño jê nde. Olivo mbuae rãquiã na ño jê nde. Dios ae que jembucha nguiã olivo i rese. Injertar i jêje. Ae Dios nyisia nyii nae, uquiã nda Dios mbucha si uchisia rese.

Judíos abe ra siqui chee Jesús rese

²⁵ Tachee nyecuayã na jêisaa. Mbia chãicuayã tasenei na jêje. Jenguasu raã naa sacua eã judíos je. Judíos yete tuchi que hui rei Dios si ra. Judíos eã nguia siqui tuchi Dios icua ã cote. Judíos eã Dios chiirabo Jesús icua ja mose, judíos abe ra uba ja ere se cote. ²⁶ Aque mose ra Dios judíos rirõ ja huicua si cote. Sã embesa ji riqui i no: Mbia mbuturãsa ra tu Sion si. Ae ra Jacob riri sirõ ja huicua si. Judíos rirõ ja huicua si.

²⁷ Aque mose ra judíos icua ambutiã ja esi. Sechee nda ique aque mose cote, i que Dios ra, i que embesa ji ra. ²⁸ Judíos yete tuchi chõ Jesús chee turã ucuayã nguiã uquiã. Nyebe Dios uturã ndeacuquia nguiã jêje. Judíos eã je. Dios quia nyesequa beite nguiã judíos rese. Irabo que nyii ra. Eramei ja rii ño Dios judíos irabo nguiã. ²⁹ —Mbae mo tatee jêje, i mose Dios, mondo rae. Dios ra uchimondo sirombe eã. Dios ra hui eã mbei uchiirabo si. ³⁰ Jesucristo que jêicuayãte quia nyii ra. Judíos hui mose Dios si, Dios que uturã teacuquia jêje cote resê. ³¹ Judíos quia Jesucristo icuayãte nguiã cote. Sã Dios ia eãte riqui jendese no, eĩ si ra eya eãte judíos rese cote. Uturã nda eteacuquiabe chee judíos je. ³² Eĩ ja chõ mbia Dios je re. Emo ngue echee mumbayã eãte quia ra. Nyebe eya eãte riqui nguiã nande ja rese.

³³ Dios turã tuchite. Dios aracua tuchite. —Jmberã Dios uquiã naa nde? nande aroneate. Dios chisaã nandeicua aroneate quia ã. ³⁴ Jemo ndua ndua quia Dios rã nde?

¿Emo mose mbia riqui Dios mbaaquiato re?
³⁵ ¿Emo nane mbae mo mondo quia Dios je re? ¿Dios mbae mondo nonde re? ³⁶ Dios ae que mbae chao ja ra. Umbaerã ño echao ja nguiã mbae. Ae quia ecuasú jiri mbae ja si re. Nandechẽ turã mbei ra equia erĩ. Amén.

12

Je sí chõ jeñimondo Dios je

¹ Dios ia eã mbeite riqui nanderese co. Nyebe jẽ sí chõ jeñimee Dios je. Jendeco chõ jemee Dios je. Jeñia turã jemee Dios je. Ebite ùquĩ. Dios que mbae mondo tuchi nande je ra. Eĩ nande chõ ñimondo ee ae. ² ¡Jesús quiatoã na nda jẽingochĩ jẽ! —Nde rã si semundua ndua ramo, Paba, jenyẽ chõ nguia Dios je. Eĩ jenyẽ mose ra Dios ñeenda huñcha teacuquia jẽje. —Eĩ jenyẽ, eĩ jenyẽ chõ, i bei ra Dios quia jẽje cote.

³ Dios turã ngue seirabo ucheẽ nenei nenei sacua jẽje ra. Nyebe aico nguiã jembirandu randu co. —Se jiri quia mbia si re, jenyẽ tuchite chĩ na jẽ! ¡Endua ndua turã ño ndechue jẽ! Dios nembaaquiato tuchi mose, ebite quia nde re. ⁴⁻⁵ Mbae tubiriãte nanderete rese. Nanderesa. Nandeo. Nandeisa. Ùquĩ jate nanderete rese. Mbae mi nda siquiã nanderete rese. Nandeo oco mbae rese. Nandeisa mbae andu. Nanderesa mae mbae rese. Nandechuru ñee. Nanderete quiarei “ã nandesã”, i tuchi nyue. Eĩ si chõ Jesús icuasa nande re. Jesús rete ja chõ nande re. “ã nandesã”, nandete equia nandechue ã. Mbae rese jaajate que Dios uquiato mingo ra. ⁶ Dios turã tuchi que nande je ra. —Co rese eico nde. ã ndese eico nde, i Dios quia nandembuchao chao co. Ùquĩ naa sacua Dios riqui uquirãcuã mee mee nande je co. —Secheẽ esenei senei, i mose Dios emo je, sã aque echeẽ nenei nenei turã echeẽ ndui si. ⁷ —Mbae turã esaã saã mbia je, i mose Dios emo je, sã aque mbae turã naa naa mbei mbia je. —Mbia embaaquiato quiatu, i mose Dios emo je, sã embaaquiato turã tuchi. ⁸ —Seosei uquia mbia je, i mose Dios emo je, sã aque Dios osei uquia turã tuchi mbia je. —Mbae emee mee mbia je, i mose Dios emo je, sã aque abei tuchi. Sã ngueteã

eã tuchi mbae rese ee. Dios emo mi mose ererecuarã, sã ererecuã turã tuchi aque. —Mbae cha reã je mbae esaã saã, Dios i mose emo je, sã aque ia tuchi mbae turã naa naa mbae cha reã je.

⁹ ¡Jenyese cuã chooñochĩ nda jenyese jẽ! ¡Mbae icuã si jenyicuasẽ cuasẽ tuchi quiatu jẽ! ¡Mbae turã ndese chõ jẽingo tuchi jẽ! ¹⁰ ¡Jembi turã ño jenyese jẽ! ¡Jenongue rã nguia jẽingo turã tuchi jenyue jẽ! ¡Jeñee turã turã ño nguia emo ni jẽ! ¡Nderĩ nda erecheẽ turã turãchĩ jẽ! ¹¹ ¡Jeñimbutomo tomochĩ nda jẽ! ¡Jeñimbirãtã tuchi quiatu Dios je jẽ! ¹² Jesucristo cheẽ nda io chee nande je emo mose cote. Ùquĩ ño nandesarõ arõ nguiã ã. Nyebe jẽya tuchi quiatu siqui eraarõ arõ. Mbia jembasi mbasi mose, jenyecuachõ ño nguia ee. Jeñee ñee mbei quiatu quia Dios je. ¹³ Mbae eã mose Jesús quiato je, mbae mo jemondo ee. Mbia mo oso mose jenyuchúaa, ¡jẽisi turã ño jẽ!

¹⁴ Mbia mo icuã icuã mose jẽje, ¡jẽturã ño ee jẽ! —Paba, mbae turã emondo rã ee. Ae icuãte riqui seje, ùquĩ je, jenyẽ chõ Dios je. ¹⁵ Ae eyate riqui, ùquĩ ndese chõ jẽya jẽ abe. Ae nyeseo quia, ùquĩ je ndese abe jenyeseo no. ¹⁶ Hue rĩ ja chõ jẽingo ndua turã. ¡Jenguasu ra jẽsaã saãchĩ emo je jẽ! ¡Jẽseteã ño jẽingo jẽ! ¡Jẽaquiato ra jẽsaã saãchĩ jẽ! ¹⁷ Mbia mo icuã icuã mose jẽje, jenyecuachõ ño nguia ee. Mbae turã ño jẽsaã nguia mbia resa rae. ¹⁸ ¡Jẽingo turã ño mbia je jẽ! † nda jẽingo ubi turã jenyese. ¹⁹ Mbia icuã mose jẽje, ¡jeñee icuãchĩ nda erobeishĩ jẽ! Dios quia ra embasi nguiã eicuã mose. Sã embesa ji riqui i no: Se quia mbia tambasi eicuã mose, i que Dios ra,

i que embesa ji ra. ²⁰ Ae eicuãt e riqui jẽje, ùquĩ jembuquiaru chõ eriãcuã mose. Ùquĩ jembu chõ eisei mose. Eĩ jenyẽ mose ee, eireĩ te ra huñcuã mose cote. ²¹ Mbia icuã mose jẽje, ¡jeñeechĩ nda echeẽ ndibishorõ. Jẽingo turã ño ee. Mbae turã nguia equirãcuã jiri mbae icuã si re. Mbae icuã mombo jiri.

13

Sã mbia riqui turã ererecua ja je

¹ Mbia ja ererecua cheẽ mumbayã nguiatu. Dios ae chõ ererecua mii nguiã. Dios chimii ja chõ mbia rerecua re. ² Ae mbia rerecua cheẽ mumba quia, Dios cheẽ abe mumba chõ nguiã aque. Dios quia emii tare nguiã. Ae ererecua cheẽ mumba mumba quia, ùquĩ nda mbae rasi saã cote. ³ Mbia turã mbusiquiche sacua eã ño ererecua re. Mbia icua mbusiquiche sacua nguia ñene. Nde ndeico turã mose, ererecua ra nembusiquiche eã. Ndeico turã mose, ererecua ra ñee turã mbei ndeje. ⁴ Dios ae chõ ererecua mii nguiã. Nanderaquiaturã turã sacua. Nde mbae icua naa mose, ndesiquiche jiri nda esi chã. Ndeicua mose ra ndeiruã nua arõte. Dios quiatu emii nguiã ererecuarã mbia icua mbasi mbasi sacua. ⁵ Ererecua cheẽ nandemumbayã ño nguia. Nandembaasi asiã sacua achõ eã ño ñene. Nandendua turã sacua abe chõ ñene. ⁶ —Impuestos jëisi isi mbia si, i que Dios ererecua mii nda. Nyebe nandeico nguiã impuestos mondo mondo turã ererecua je. Dio s cheẽ nguire chõ ererecua riqui nguiã eisi isi. ⁷ Jë deber i mose emo je, mbae jembuchebi jei chõ ee. Jë deber i mose impuestos, jemondo chõ ee. Ererecua je jëingo turã ño. Jeñee turã ño erii.

Jenyesequa ja quia jenyiese

⁸ Emo mbae mondo mose jëje, jëingo are arete chĩ nguiã mbae mondo rocoi ee. Deber jenyechĩ nda emo je. ¡Jenyesequa ja quiatu quia jenyiese jë! Jenyesequa mose mbia rese, Moisés chimbesa ja jemumbayã ño nguiã ùquĩ. ⁹ ã ndei Moisés chimbesa ã: Emo ninisi rese ra ereicochĩ. Mbia mo nda ereiquiachĩ. Mbae mo nda erembuquiachãchĩ. Emo je ra erecheẽ ñooñochĩ. Emo mbae ra erechesei choseichĩ, i que Moisés chimbesa ra. Nandechesequa mose mbia rese, nandeico embesa ji cheẽ mumbayã ã. ã ndei Jesucristo cheẽ ã: Sã ereico nyesequa nderete rese no, eĩ ere si chõ nyesequa emo ndese. Nde ã naa mose, Moisés chimbesa ja eremumbayã nguia ã. ¹⁰ Ae nyesequa quia mbia rese, ùquĩ nda

mbae icua saã eã mbei emo je. Emo nyesequa mose mbia rese, Dios cheẽ ndui si chõ eriqui nguiã mbae turã naa naa ùquĩ.

¹¹ Dios rese jëingo tuchi ùquĩ. Nandemae jei ra Jesucristo rese cote. Nandechee ngue equia nyii. —Nandemae je ra Jesucristo rese, nande que equia nyii. Namonda nandemae erese cote. Aichite eñi tu a cote. ¹² Itondaru rã ño mbae icua ja namo nde. Jesucristo ra tu mbae mbuturã cote. Nyaashĩ na nda cote. Nyebe nandeico bei rã mbae turã ndese cote. Dios rese nandeico tuchi rã cote. Mbae icua ndiquisã sacua nandesĩ. ¹³ Nandeico turã ño Dios resa rae. ¡Mbia quiacua ra nandesichãchĩ jë! ¡Nandequiacuachĩ nda jë! ¡Emo ninisi rese ra nandeico icochĩ jë! ¡Mbae icua nda nandechesei choseichĩ je! ¡Nandeicua icuachĩ nda emo mbiicua icua jë! ¡Emo mbae ra nandechesei choseichĩ jë! ¹⁴ Jeñimee tuchi quia Jesucristo je. Ae nda uquirãcuã mee tuchi jëje chã. Mbae icua ndiquisã sacua jësi. Ae icua mbia chosei chosei quia nae, ùquĩ nda jësaã saãchĩ jë Jesús resenda chõ jë ndesẽ.

14

Jeñee asiã mbei jenongue je

¹ Jesús quiato mo Jesús icua tuchiã mose, jëisi turã ño. Jeñee asi asichĩ nda ee. ² Emo emo mbae u ja. Emo emo soo u eã tuchi no. Ae soo u eãte quia nae, embaaquiaturã tuchi iriã ño ùquĩ nde. ³ Ae soo u quia nae, sã ùquĩ ñee asiã mbei soocua reã je. Ae soo u eãte quia nae, sã ùquĩ ñee asiã mbei soocua je no. Dios quiato ja chõ ñene. ⁴ Erecheẽ icua aroneãte ererecua rimba mo je. Ae ae mbae saã nguiã nguerecua je. Dios ae nda ñee nguiã nguimba je. Mbae raã turã mose. Mbae raã icua mose abe no. Dios quirãcuã ae nda nguimba mingo nguiã mbae turã ndese.

⁵ —Nyaashĩ mo ngue Dios irabo mbiicúe cose ra. ùquĩ nyaashĩ mose nandechimbaacua rã, i Jesús quiato mo nguia co. Jesús quiato mo nguia ñee nguiã: —Eĩ ja chõ nyaashĩ ndesẽ, i emo no. Sã Dios quiato ja ae riqui ndua ndua uchiangui re ae. ⁶ Dios quiato mo ñimbaacua mose aque nyaashĩ mose, Dios je chõ eriqui nguiã

ñimbaacua. Dios quiato mo mbae raã naa mose aque nyaashĩ mose, Jesús je chõ eriqui nguiã mbae raã naa aque nyaashĩ mose. Ae soo u quia, Dios je chõ eriqui nguiã soo u. Gracias, i que Dios je nyii ra. Ae soo u eã nguia, Dios je chõ eriqui nguiã soo u eã no. Ae abe gracias i chõ nguiã Dios je ague. ⁷ —Sebi rese chõ taico bei, nande aroneãte. —Semanose mose quia tamano, nande aroneãte. ⁸ Dios ae chõ nandereco mingo nguiã. “Emano”, i mose Dios nande je, nandeico nguiã mano. Nandereco siqui mose, Dios rimbarã ño ñene. Nandemano mose, Dios rimbarã ño nda nandeico nguiã no. ⁹ Cristo que mano nda. Quera si que ra. Mbia rerecuarã ngue quera si ra. Mbia reco rerecuarã. Mbia mano je rerecuarã abe no.

¹⁰ Nandechẽe icuã icuã aroneãte nanderesenda mo je. Emo mose quia ra Dios mae tuchi nanderese cote. Nandechiangui renda ra etea tuchi cote. Ae quia nda nandeicuã tea nguiã. Nandeturã abe rea.

¹¹ ã ndei embesa j i ã:

Dios ndei se. Se rei sereco bei.

Sésaa ra mbia chi ja ngoi ngũĩã ndese.

Ñee jaaja ra seje cote.

“Dios tuchi chõ nde re”, i jaaja ra seje cote, i que Dios ra,

i que embesa ji ra. ¹² Nande ae ae ra mbae nandesenei senei Dios je aque mose. —

ã ngue asaã saã nguia seico mose íbii ra, nande ja ra ee cote.

Jenongue jemb#cuã eã

¹³ Nyebe nandechẽe icuã eã nguia nanderesenda mo nii. ¡Nandembia eãte chĩ nda jẽ! ¡Mbae icuã nda nandesaa uquiachĩ ee jẽ!

¹⁴ Jesucristo que sembaaquiato ra. —Mbae turã ja chõ mbia chiurã nde, i que ra. —¡Co ra jẽuchĩ jẽ! iãte Dios mbae mo nii. —Eicuãte co, i mose emo, sã ae mii eu eã. Ae eu mose, eicuãte ee. ¹⁵ —¡Co nandeu eã jẽ! Eicuãte, i mose nanderesenda mo ndeje, eu eã. Nde eu mose, erechesequa eã ño nguiã nderesenda rese aque. Nderesenda je abe chõ ngue Jesucristo mano ndesẽ. ¿Mbaerã nda nanderesenda eremb#cuã ndechuubi je re?

¹⁶ Ndechuubi turã ndaque ndeje. “Eicuãte” i mose nanderesenda mo, eu eã ae. Nde eu mose, mbia ra erembucheẽ icuã ndechue.

¹⁷ Dios chõ nandererequa cote re. Nyebe nandendua tuchi eã nguia nandechiurã ndese. Ae nandembei quia, ùquĩ abe rese. Dios rese quia nandendua. Ae chõ nandemingo nguiã mbae turã ndese co. Ae chõ nandechiã mbucoi nguiã co. Espiritu turã ae nandembia mingo nguiã co. ¹⁸ Eĩ nande mose Cristo je, Dios ia tuchi ra nanderese. Mbia abe ia ra nanderese. ¹⁹ Nandeico turã nda nandechue chã. Eĩ nande nda Jesús osei osei uquia nandechue chã. ²⁰ — ¡Aque soo ra nandeuchĩ jẽ! i mose Jesús quiato mo, jereuchĩ nda jẽ! Jesús quiato ra eremb#cuã arõte nde eu mose. Mbae turã ja raque mbia chi. “Eicuãte”, i mose Jesús quiato mo, eu eã ae. ²¹ Soo Jesús quiato mb#cuã mose, soo ra nandeu eã. Vno Jesús quiato mb#cuã mose, vno nda nandembei eã. Mbae mo Jesús quiato mo mb#cuã mose, nandeoco eã erese nande abe. Mbae mo Jesús quiato mo mb#cha serĩ mose Dios icha si, ùquĩ ndese nandeicoã nande. Eĩ nda ichayã esi. ²² —So o icuã eã ño ñene, i mose Dios ndeje, echecuachõ ño nguia eu. Endua tuchi mbae mo naa nonde. Eicuã arõ mose ndeje, esaã eã. Eaturã mose ndeje, echecuachõ ño eraã. Nde ùquĩ naa naa mose, ndeya tuchi rae. ²³ Nde ndeiranuã mose mbae mo ndese, esaã eã. —Eaturãte ereae. Eicuãte ere no ae, nde i mose eriisu isu, esaã eã ño. Ndeiranuã eraã ñooño mose, eicuãte ùquĩ. Ndechiisu isu u mose soo, eicuãte ùquĩ. — Eicuãte ereae, nde i mose, ereicochĩ nguiã eu.

15

Nandebi rese ra nandeicochĩ jẽ; nandengue bi rese quia nandeico

¹ Nande mo Jesús icuat e quia co. Ae Jesús icua tuchiãte quia nae, ùquĩ je nandeico turã jiri ae. Nandembaaquiato quiato ae. Nandebi achõ ndese ra nandendua eã. ² Ae nandebite nande ae, ùquĩ ndese nandeicoã. Ae Jesús quiato nongue bite nae, ùquĩ ndese quia nandeico. Ùquĩ mose nandeico nanderesenda mbaaquiato tuchi Jesús riĩ co. ³ Cristo chee que siquiã ubi rese ra. Sã embesa ji riqui ñee Cristo riĩ no:

Paba, ae ndeucuayãte quia nae, ùquĩ ngue ñee icuã mbeite quia seje ra, ì que Cristo ñee ngu je ra, ì que embesa ji ra. ⁴ Dios cheẽ mbesa ji cose ndare chõ nandembaaquiatusa re. Nandemingo mingue sacuaã. Nandembirãcuã sacuaã Jesucristo rĩ. Nyebe nandeico nguiã Jesucristo raarõ arõ mingue ã. ⁵ Dios chõ nandemingo mingue nguiã. Dios chõ nandembirãcuã nguiã. Dios nda jemingo turã mbei nyiese Jesucristo cheẽ ndui si chã. ⁶ Ùquĩ mose ra jẽingo ñee turã mbei Dios je. Hue rĩ ja ra jẽingo ndua turã Dios rese. Dios quia Jesucristo ru re.

Dios iate judíos eã ndese

⁷ Sã Cristo nandeisi turã no, eĩ jenyete si chõ nguia nyiisi turã. Eĩ nda mbia ñee turã Dios rĩ. ⁸ —Eĩ tae tae, ì que Dios judíos i ñiinda ja je cose ra. Nyebe Cristo ru nguiã mbae turã naa naa judíos je cote. —Dios cheẽ ìochĩ cote, ì nda judíos chã. ⁹ Judíos eã abe mundua sacuaã Dios rese que Cristo ru ra. Dios turã ndese emundua sacuaã ño ngue eru nguiã. Co rei David chimbese co: Paba, ndeturã tasenei senei judíos eã je.

Tairasei rasei abe ndeje, ì que David embesa ra. ¹⁰ Co rei embesa ji cheẽ mo co: Judíos eã, jẽya chõ Dios rese. Sã Dios rimba iate erese no, eĩ jenyete chõ jẽ abe jẽya erese, ì que embesa ji ñee nda. ¹¹ Co rei embesa ji cheẽ mo co no: Sã mbia ibi jenda ja ñee turã ja Dios rĩ, ì que embesa ji ra. ¹² Isaías que co mbesa ra:

Isaí riirĩ nguia ra mbia judíos eã nderecuarã tuchi cote. Mbia judíos eã nda “ichõiñosa reã”, ì tuchi ee, ì que Isaías embesa Jesús rĩ nda. ¹³ Ùquĩ jẽingo Dios icuate ùquĩ. Dios nda jembia tuchi mingue chã. Dios nda jeñia mbucoi chã. Dios ae chõ “Cristo jësaarõ arõ”, ì chõ nguiã nandemingo mingue ã. Espiritu Turã ndiqu ì nandembirãcuã tuchi ã. Nandembia mingue Cristo raarõ arõ ã.

¹⁴ Seyate aico jendese co, Seresenda. Jẽingo turãte quia jenyiese ùquĩ. Mbae jẽicua tuchite cote. Jẽ ae jẽingo

ñimbaaquiato quiato turã jenyete ùquĩ. ¹⁵ Aireĩ ireĩ ãte ã mbesa jẽje, Seresenda. Jẽtesareiaã sacuaã ã si. Dios turã ae ngue seirabo nguiã. Mbia mbesarei eã sacuaã Jesús cheẽ si. ¹⁶ Dios que seirabo Jesucristo rimbarã nda. Ucheẽ nenei nenei sacuaã mbia judíos eã je. Mbia judíos eã secheẽ isi turã mose, Espiritu Turã nda emingo icúe Dios mbaerã cote. Ùquĩ mose ra Dios judíos eã isi turã cote. ¹⁷ Se Dios cheẽ nenei nenei mose mbia je, mbia que siqui tuchi erese secheẽ nguire ra. Nyebe ùquĩ ndiqui nguiã sembia tuchi. ¹⁸ Jesucristo que sembirãcuã nda. Ucheẽ nenei nenei sacuaã judíos eã je. Nyebe judíos eã ndiqui nguiã siqui tuchi Dios rese cote. Secheẽ nguire cote. Sechisaã ndese abe maende cote. Mbae mo ñi abe ra acheẽ iã cote. Jesucristo que sembirãcuã, ùquĩ mĩ ño aico nguiã ñee jẽje a. ¹⁹ Espiritu Turã ngue uquirãcuã mee seje ra. Nyebe aico nguiã mbia mae sayã naa naa tuchi mbia je. Ùquĩ mos e que mbia riqui tuchi Dios rese cote ra. Jesucristo cheẽ ngue asenei senei Jerusalén nda. Mbia mangue chooñoa jenda je abe. Ilríco jenda je abe. ²⁰ —Ae mbia riqui Jesucristo cheẽ nenei nenei eãte nae, huee Jesucristo cheẽ tasenei senei se, ae que se ra. Emo Jesucristo cheẽ nenei neneisa, huee taico bei eã, ae que se ra. ²¹ Sã embesa ji riqui ñee no: Ae jiranuãte quia Cristo rese, ùquĩ nda jirandu erese cote. Ùquĩ nda eicua cote, ì que embesa ji ra.

Aso ra Rómaa, ì Pablo

²² Ae mbia riqui Dios cheẽ nenei nenei eãte, huee quiato ngue aico nguiã Dios cheẽ nenei nenei. Nyebe aico nguiã osoãte jendea. ²³ Cose ndarechõ mbei chõ aico rei nguiã “taso jendea”, ì. A jenda mbia que Dios cheẽ ñandu tuchi cote ra. Nyebe taso jendea cote. ²⁴ Seso mose España nda aso jendea. Sembia jiri sacuaã jendese. Taico mbirĩ na jendese huee. Jẽ nda sembucuaata turã mondo hue si cote chã. ²⁵ Jerusalén nane nda aso. Ofrenda mo arao quia Jesús quiato je co. ²⁶ Jesús quiato Macedonia jenda que ofrenda munua nua nda. Jesús quiato Acaya jenda rese. —Jesús

quiato mbaecha reã je mbae nandemondo rã Jerusalén jenda je, i que ñee nyue nyii ra. Ûquĩ ño arao nguiã co. ²⁷ Coche ùquĩ ndiqui nguiã mbae mondo judíos Jesús quiato je. Judíos rane nguia Dios cheẽ senei senei tare nguiã judíos eã je. Nyebe ra judíos eã mbae mo mondo judíos Jerusalén jenda je cote. ²⁸ Nyebe ra ofrenda munua ji arao ee. Jesús quiato mbaecha reã je. Aquere ra aso España quti cote. Aicha ra ñeenda cúa si mae jendese. ²⁹ Jesucristo ra semondo turã jendea. Ae ra nandembia ja uturã je. ³⁰ Seresenda, Jesucristo quiato quia jẽ nde. Espíritu Turã ño jembuchesequa nguiã jenyese ùquĩ. Nyebe jeñee tuchi quia Dios je serĩ. Nandechẽ ja tuchi quiatu ee serĩ. ³¹ —Paba, mbia icuã Judea jenda esiquisã Pablo si. Paba, ndequiatio Jerusalén jenda nda ofrenda isi turã Pablo si chã, jenyẽ chõ Dios je. ³² Ûquĩ mose ra seya tuchi mae jendese cote, Dios “eno” i mose seje. Jendese seico mose ra sequenea auca tuchi cote. ³³ Sã Dios riqui bei jendese. Sã eriqui jembia.

16

Pablo saluda i ja mbia je

¹ Febe jẽisi turã ño. Jesús quiato chõ aque cuña nde. Mbae turã esaã saã mbeite quia Jesús quiato Cencrea jenda je aque. ² Jẽisi turã ño nguia Jesús rĩ. Sã Jesús quiato riqui nyiisi turã no, eĩ jenyẽ chõ Febe isi turã no. Ae que mbae turã saã saã mbeite Jesús quiato je ra. Seje abe no. Nyebe jẽturã ño jẽ abe ee. ³ Aquila je saluda jenyẽ rã seje. Eninisi Priscila je abe no. Serese que ùquĩ ndiqui Jesucristo cheẽ nenei nenei tuchi ra. ⁴ Mbia que eiquia serĩ serĩte rei quia serĩ nda. Siquicheã mbeite que equia ra. Nyebe aico nguiã gracias i tuchi ee. Se ae eã. Jesús quiato judíos eã abe riqui gracias i jate ee ã. ⁵ Ae Jesús quiato ñumunua nua nguia Aquila chuchua, ùquĩ je abe saluda jenyẽ. Epeneto je abe saluda jenyẽ. Sequiatio tuchite que aque ra. Ae rane ngue Cristo isi Acaya jenda ra. ⁶ María je abe saluda jenyẽ. Ae que mbae saã saã tuchi Dios je jẽsaa ra. ⁷ Andrónico je abe saluda jenyẽ. Junias je abe. Se

sí chõ ùquĩ nde. Serese que etarõ ji riqui cárcel nda. Dios cheẽ nenei neneisa tuchi chõ ùquĩ nde. Ûquĩ nane ngue Cristo icua sesi cose ra. ⁸ Amplias je abe saluda jenyẽ. Sequiatio tuchi chõ Dios resenda aque re. ⁹ Urbano je abe saluda jenyẽ. Ae que Dios cheẽ senei senei nguia urerese ra. Sequiatio Estaquis je abe saluda jenyẽ. ¹⁰ Apeles je abe saluda jenyẽ. —Seicuaa tuchi Apeles riqui co, i que Dios Apeles rĩ nda. Aristóbulo chuchua jenda je saluda jenyẽ seje. ¹¹ Herodión je abe saluda jenyẽ. Se sí chõ ae re. Narciso chuchua jenda, ae Jesús quiato nae, ùquĩ je saluda jenyẽ. ¹² Trifena je abe saluda jenyẽ seje. Trifosa je abe. Ûquĩ ndiqui mbae raã naa tuchi Dios je ùquĩ. Nandequiatio Pércida je abe saluda jenyẽ. Ae que mbae saã saã tuchi quia Dios je ra. ¹³ Rufo je abe saluda jenyẽ. Dios chiirabo tuchi chõ ae re. Esi je abe saluda jenyẽ. Taĩ na tuchi que eriqui seje ra. Mbae que esaã ja tuchi quia seje ra. ¹⁴ Asíncrito je saluda jenyẽ seje. Flegonte je abe. Hermas je abe. Patrobas je abe. Hermes je abe. Ae Jesús quiato riqui ùquĩ ndese, ùquĩ je abe saluda jenyẽ. ¹⁵ Filólogo je abe saluda jenyẽ. Julia je abe. Nereo je abe. Enongue je abe. Olimpas je abe. Ae Jesús quiato riqui ùquĩ ndese, ùquĩ je abe saluda jenyẽ. ¹⁶ Jenyiquiaama ama saluda i nyue. Tuchuamo jenda ja Cristo quiato riqui saluda i jẽje ã.

¹⁷ Huee emo ndiqui Jesús quiato mbũcuã sete hue. Hue emo ndiqui “Jesús quiato tambũcha Jesús si”, ite hue. Jenyũcuasẽ ño nguia ùquĩ si. Jesús cheẽ nduĩ si eã ño eriqui nguiã mbia mbaaquiato quiato ùquĩ. ¹⁸ — Ae Jesucristo bite, ùquĩ nandesaã saã, iã ño nguiã ùquĩ. Ubi achõ ño esaã saã nguiã ùquĩ. Echeẽ turã aba reã ño eriqui nguiã mbia je ùquĩ. Ae Jesucristo icua tuchi eãte quia nae, ùquĩ mbũrĩ irĩ ño nguiã ùquĩ. Jenyũcuasẽ tuchi chõ nguia ùquĩ si. Aba mbũrĩ irĩsa tuchi chõ ùquĩ nde. ¹⁹ Jẽ ngue Dios cheẽ jemumbayãte ra. Mbia que jirandu jate jendese ra. Nyebe seyate riqui nguiã jendese co. Jẽingo bei nda equia mbae turã ndese chã. Mbia nda jembũrĩ irĩ eã jiri quia mbae icuã je chã. ²⁰ Dios quiarei aba

mbiasa. Namó jiri ra ae Satanás ndiquisã mbei jësi cote. Sã Jesucristo riqui turã mbei jëje.

²¹ Timoteo ucheë mondo quia saludar i jëje aque. Siqui beite equia serese Dios cheë nenei nenei co. Lucio abe ucheë mondo quia saludar i jëje aque. Jasón abe no. Sosipáter abe no. Se sí chõ ùquĩ nde.

²² Se abe secheë amondo quia saludar i jëje aque. Tercio rei se. Se chõ aico nguiã Pablo cheë mbesa mbesa jëje co. Jesús icuasa ja chõ nande re. ²³ Gayo abe ucheë mondo quia saludar i jëje aque. A aico rã echuchua uque a. Jesús quiato chumunua nuasa bei chõ a re. Gayo chuchua. Erasto abe ucheë mondo quia jëje aque. Ae chõ tesorero sucha tubiriã jenda je. Cuarto nandequiato abe ucheë mondo quia jëje aque. ²⁴ Sã Jesucristo riqui jendeaquiato turã mbei. Amén.

Pablo ñee hui bei sacua cote

²⁵ Nandechë turã mbei chõ nguia Dios rii. Ae ra jembirãcuã tuchi mingó ucheë turã je. Echeë turã ngue asenei senei nguia Jesucristo rii nda. Aque cheë turã ngue mbia icuayãte quia cose nyii ra. Dios que embuchecua eã mbei mbae ao ramo mosenda bei ra. ²⁶ Namó ño Dios ucheë turã mbuchecua nguiã mbia je cote. Jesucristo rii. Dios cheë nenei neneisa que echeë mbuchecua nande je cote ra. Mbesa que nande je ra. Dios que ñee seje ra. — Secheë turã esenei senei mbei quia mbia jaje cote. Siqui sacua secheë ndese. Secheë mumbayã sacua, i que Dios seje cote ra.

²⁷ Dios mii nguiarei siqui bei. Dios mii ño mae ja nguiã mbae ja rese. Sã Jesucristo riqui mbia mbucheë turã mbeite Dios rii. Amén.

PRIMERA CARTA DEL APOSTOL SAN PABLO A LOS CORINTIOS

Pablo embesa Jesús quiato Corinto jenda je

¹ Pablo, i que seje ra. Dios que seirabo Jesucristo renei nenei sacua nda. Aico a mbesa jêje a. Nanderesenda Sóstenes ndese aico embesa jêje a. ² Aico a mbesa jêje a. Jesús icuasa je. Corinto jenda je. Jê ndei Dios quiato jêingo Jesucristo rîi ûqui. Dios riqui jemingo icúe umbaerã ûqui. Sã Dios riqui mangue jenda chooñoa mingó icúe umbaerã no, eĩ si. Ñee mose Jesucristo je. Jesucristo rei ûqui abe rerecua no. Sã nandererecua nande no. ³ Sã Dios nanderu uturã mingó tuchi jendese. Sã Dios jembia bei mingó. Sã Jesucristo abe siqui jembia bei mingó.

Dios turãte riqui jêje co, i Pablo

⁴ Dios turã tuchi que eriqui jêje Jesucristo rîi nda. Nyebe aico nguiã gracias i tuchi Dios je jenîi co. ⁵ Jesucristo quiato chõ jê cote re. Nyebe Dios riqui turã tuchi nguia jêje co cote. Jembaaquiatu tuchi ucheẽ nenei nenei sacua mbia je. Jembaaracua tuchi que ucheẽ nîi nda. ⁶ Ure Jesucristo renei nenei mose jêje que jêisi turãte ra. Jê Jesucristo jêicuate quia ûqui cote. ⁷ Nyebe Dios turã ndiqui nguiã hui âte jêsi co. Jembirãcuã mbeite equia querabe co. Ûqui jêingo Jesucristo raarõ arõ ûqui. ⁸ Dios ra jembirãcuã mbei mingó mbae ua ja chee. Mbia mo nda ñee icua eã jêje Jesucristo tu mose. ⁹ Dios ra jendeaquiatu bei. Ucheẽ nda embuchebiã mbei ñeende jêje. Ae quiatu ngue ñee nguiã jêje. —Taemingo bei seriirî ndese Jesucristo rese, i.

Jesús quiato nyao nyao chõchî nyesi

¹⁰ Seresenda, nandererecua ja chõ Jesucristo resẽ. Jenyao chao mose nyesi, eicuãte ûqui. Hue rîi ja chõ jêingo ndua ndua. Mbae mîi ndese chõ jêingo. ¹¹ Mbia quiatu ngue ñee nguiã seje. —Eicuã icuãte que nyue ra, i que Cloé chuchua jenda ñee sembiirandu jenîi nda. ¹² —Pablo mbae

chõ se re, i chõchî jemo nguiã serîi ûqui. —Apolos mbae chõ se re, i chõchî jemo nguiã ûqui no. —Pedro mbae chõ se re, i chõchî jemo nguiã no. —Cristo mbae chõ se re, i jemo no. ¹³ ¿Cristo mbuchao chao ji ere no? ¿Pablo mano jendiquicharõ nde no? ¿Pablo rîi bautizar i jêje re no? ¹⁴ Se que bautizar ae eã jêje resẽ. Crispo mîi je que bautizar ae ra. Gayo je abe. ¹⁵ —Pablo rîi ño ngue bautizar i nguiã seje, i aroneate jemo ñee serîi. ¹⁶ Estéfanos chuchua jenda abe que bautizar ae ra. Aquere que bautizar ae âte jemo je ra. ¹⁷ Bautizar i sacua eã ngue Cristo semondo ra. Ucheẽ turã nenei nenei sacua ño ngue semondo nguiã. Seaquiato asaã saã eã ño nguiã Dios cheẽ nenei nenei co. Cristo cheẽ ambiasa mingue turã ño nguiã co. Se seaquiato raã naa mose, i nda mbia ndua ndua eãte rei Cristo mano ndese.

Dios cheẽ quirãcuã tuchi Jesús rîi

¹⁸ Ae ra nyoi tata cuásuu, ûqui ndei “ichõiñosa” isa Dios cheẽ nenei neneisa rîi. —Cristo que mano mbia riquicharõ nda, i mose ee, “ichõiño ñene” i chõ nguiã. Nande quiato que Dios nanderirõ nandeicua si ra. Nyebe Dios cheẽ turã ndiqui nguiã uquirãcuã ndeacuquia nande je co. ¹⁹ ã ndei Dios cheẽ mbesa ji ã:

Ae “seaquiato tuchi” i quia, ûqui aquiatu ra ambuquiachã esi.

Ae “searacua tuchi” i quia, ûqui aracua abe ra ambuquiachã esi no,

i que Dios cheẽ mbesa ji ra. ²⁰ Ae uaquiato saã saã nguia, ibi jenda ja chõ ûqui nde. Ae ucheẽ aquiatu saã saã nguia, ibi jenda ja chõ ûqui no nde. Eaquiatoate ûqui, i chõ Dios nguiã ûqui je. ²¹ Mbia ae ra Dios icuayã mbei uaquiato ae je. Dios cheẽ ae je quia nda mbia Dios icua nguiã emo Dios cheẽ nenei nenei mose ee. Ae Dios cheẽ isi nae, ûqui nda Dios sirõ eicuã si. Ichõiño nguiã, i raque mbia ataque Dios cheẽ nîi. ²² —Mbia mae sayã ndese nda uremae na ña, i bei que judíos quia ra. —Urechimbaaquiatu tuchi rã, i bei que judíos eã nguia ñee nyue no nda. ²³ Nande quiato Cristo nandesenei senei nguia ã. Ae mbia mbucha quia ira rese, aque chõ nandesenei senei nguia

nande ã. Ûquĩ sî judíos ireĩte riqui ã. Cristo renei nenei mose, judíos eã ndua eã tuchi chõ nguiã erese ã. ²⁴ Nande quiatu nandebite riqui nguiã Cristo renei nenei mose ã. Dios judíos mo irabo chõ nguiã. Judíos eã mo abe irabo chõ nguiã no. Ûquĩ je chõ ngue Cristo Dios quirãcuã mee nguiã. Ûquĩ je chõ Cristo Dios aquiatu mee nguiã. ²⁵ Dios aquiatuãte, i raque mbia mo ñee Jesús mano je rñ. Dios quia equiatu tuchi jiri riqui nguiã mbia sî co. Dios quirãcuã neate, i raque emo ñee no. Dios quia equirãcuã tuchi jiri riqui nguiã mbia sî co.

²⁶ Dios que jëirabo ja ra. Jëaquiato tuchi eã ndaque ee. Ererecua eã ndaque jë. Mbaecha eã ndaque jë. Dios ae chõ ngue jëirabo nguiã. Ûquĩ ndese jendua jiri. ²⁷ Ae je mbia riqui “equiatuãte” i nae, ùquĩ ño ngue Dios irabo nguiã. Ae ucuasu saã saã nguia nae, ùquĩ ireĩ ireĩ sacua esi. ²⁸ Ae mbia ataque ucuayãte quia nae, ùquĩ ño ngue Dios irabo nguiã. Ae ucuasu saã saã nguia nae, ùquĩ mbutiã sacua. ²⁹ Nyebe nandeico nguiã nandeaquiato raã naa aroneate Dios je ã. Nande mñ mo jiri jiriã. ³⁰ Dios quiato que nandembucha Jesucristo rese ra. Ae quiato que nandembiirandu Dios rese ra. Ae chõ ngue nandechiã mbuturã no nda. Ae chõ ngue nandemingo icúe Dios mbaerã no nda. Ae que mano nanderiquicharõ no nda. ³¹ Sã embesa ji riqui ñee ã no:

Ae Dios saã nande je nae, ùquĩ nñ nandechë turã.

A e nandesã nande ae nae, ùquĩ nñ nandechë turã eã, i que embesa ji ra.

2

Jesucristo mñ Pablo senei senei mbia je

¹ Seresenda, seso mose jendea que Dios cheë asenei senei turã jëje huee resë. Seaquiato asaã saã eã ño nguiã jëje Dios cheë nenei nenei. ² —Jesucristo mñ ño tasenei senei jëje. Jesucristo mano nguia mbia icuã ndiquicharõ nae, ùquĩ mñ ño tasenei senei jëje, ae chõ ngue oso nguiã ñee jëje. ³ Seireĩte que seso mose ñee jëje nyii ra. Semburirite que aque mose ra.

⁴ Seaquiato que asaã saã eãte quia ra. Dios cheë ngue ambuchecua tuchi quia ñee ñee jëje ra. Espiritu Turã nguiato que secheë mbirãcuã tuchi quia ñee ñee jëje ra. Nyebe mbia ñee nguiã. —Dios cheë ño eriqui re, i nguiã secheë mose. ⁵ Dios quirãcuã ae jemingo nguiã Jesucristo rese ùquĩ. Mbiamo aquiato eã ño jemingo nguiã Jesucristo rese ùquĩ.

Espiritu Turã ndiqui mbae icua jate nande je co

⁶ Ae seaquiato, ùquĩ ja chõ asenei senei mbei nguiã Jesús quiato je co. Ae seaquiato nae, ibi jenda rã eã ño seaquiato riqui nguiã co. Ae seaquiato nae, ibi jenda rerecua rã eã ño seaquiato riqui nguiã co. Ûquĩ aquiato quia ra tiã jei.

⁷ Ae ureico ñee ñee nae, ùquĩ nguia mbia mbaaquiato jiri nguiã. Dios cheëte quia ñene. —Secheë nda ambuchecua je nguiã mbia je. Mbiamingo bei sacua, i que Dios nyii mbae ao nonde ra. Dios que esenei eã nyii ra. Namonõ embuchecua nguiã nande je cote. ⁸ Mbiam rerecua que Dios aquiato icua eãte ra. I nda eriirĩ mbucha eãte rei ira rese. ⁹ Sã embesa ji riqui ñee ã no:

Dios ra mbae turã saã tuchi nande je. Uchesequa je.

Ae ra Dios saã nande je, ùquĩ ndese emo iranuate namo.

Emo mae ãte erese namo, i que embesa ji ra. ¹⁰ Nande quia nandeico nguiã irandu erese ã. Espiritu Turã quiato nandembiirandu nguiã. Espiritu Turã nguia mbae icua jate nguiã co. Dios chiao abe icua jate equia co. ¹¹ Ae rese emo ndiqui ndua, mbiamo ùquĩ ndua ndua icuayãte. Ae rese nandeico ndua, nande ae nandeicua nguiã. Ae rese Dios riqui ndua, Espiritu Turã mñ ño eicua nguiã. Dios sí chõ Espiritu Turã nde. ¹² Dios que espiritu mbuae mo monoã nande je ra. Espiritu Turã ño ngue emondo nguiã nande je. Ae Dios saã turã nguia nande je nae, ùquĩ ndese nandembiirandu sacua ño ngue Espiritu Turã mondo nguiã nande je. ¹³ Ae Dios saã turã nguia ure je nae, ùquĩ ure-senei senei nguia ã. ã ndese chõ ngue

Espíritu Turã urembaaquiato nguiã. Mbia cheeño eã ño ñene. Nyebe aico nguiã Dios chisaã nenei nenei Dios quiato je co.

¹⁴ Ae Jesucristo icua eãte, ùquĩ sí Espiritu Turã ñee icuayãte quia ã. Echeẽ mbaranguiatuãte riqui ee ã. Nyebe eriqui nguiã echeẽ isiãte. ¹⁵ Ae Jesucristo icuate nae, ùquĩ nguiã mbae icua jate nguiã ã. Ae eturãte nae, ae eicuãte nae, ùquĩ icua ja equia ã. ¿Mañi Jesús quiato quia re? i chõ mbia nguiã Jesús quiato cheẽ icuayã ã. ¹⁶ Tarembaaquiato, i aroneate mbia mo Dios je. Dios quiato eã mo ndua eãte quia Dios rã si ã. Nande quia nandendua ndua nguiã Cristo ndua rã si ã. Dios resendate quia nandeico nguiã ã.

3

Mbae mi na ño ureico nguiã Dios cheẽ nenei nenei

¹ Jesús resenda jëingo raque ùquĩ. Jëingo tuchiãte quiatu nguiã erese ùquĩ. Ae jembite riqui nae, ùquĩ mi ndese chõ jëingochi nguiã ùquĩ. Ae Cristo bite nae, ùquĩ ndese jëingoã ñochi nguiã ùquĩ. Nyebe jaembaaquiato tuchi aroneate equia co. ² Mbia riiri na ño jëingochi nguiã secheẽ andu mbirĩ mbirĩ cose. Querabe chõ jëingo nguiã secheẽ andu sereã ùquĩ. Nyebe jaembaaquiato quiatu tuchiã nguiã Jesús cheẽ ndese. Ae jembite riqui nae, ùquĩ ndese jëingo mose ra Dios cheẽ jëicuayã mbei. ³ Jëicuã icuãte quia jëingo nguiã jenyue ùquĩ. Jendua turã ja eãte equia ùquĩ. Jeñee turã turã eãte quiatu nguiã jenyue ùquĩ. Nyebe acheẽ nguiã jëje. —Ae Cristo bite nae, ùquĩ ndese jëingoã ñochi nguiã ùquĩ, ae chõ ndei nguiã jëje co. ⁴ —Se rei Pablo mbae, i chõchi jemo nguiã ñee ùquĩ. —Se rei Apolos mbae, i chõchi jemo no. Nyebe jëingo eã nguiã Cristo bi rese ùquĩ.

⁵ ¿Aba chõ se chã? ¿Aba chõ Apolos no ña? Mbia rerecua eã ño ureico nguiã ã. Dios cheẽ nenei neneisa chõ ureico nguiã ã. Ure Dios cheẽ nenei nenei mose jëje que Jesús jëicua resẽ. ⁶ Mbae tiquia ji rã ño jë nde. Sã emo mbae eĩ tiquia no. Sã emo i icherẽ cherẽ erese no. Dios ae chõ embusuri nguiã. Anyae chõ ngue Dios cheẽ

mingue nguiã jendese. Apolos chõ ngue jembaaquiato quiatu nguiã cote. Dios quiarei ucheẽ mbusuri raanguia jeñiangui re. ⁷ Ae echitiquia nae, aque embusuri aroneate. Ae i icherẽ cherẽ erese nae, aque abe embusuri aroneate no. Dios ae embusuri nguiã. ⁸ Ae echitiquia quia, ae i icherẽ cherẽ nguiã erese, eĩ si chõ ùquĩ nde. Dios ra mbae turã mee ee, ae esaã ùquĩ ndibishorõ. ⁹ Ure rei Dios cheẽ naa naasa. Sã chacocho no, eĩ si chõ Dios mbae jë nde. Sã tuchuacha no, eĩ si chõ Dios mbae jë nde.

¹⁰ Dios turã tuchi que seje ra. Seje quiatu ngue ucheẽ mee nguiã. Mbia mbaaquiato quiatu sacua. Tuchua ao aquiato rã ño se re. Tuchua i raanguia chõ asaã nguiã base cote. Aque arõ ño emo ndiqui nguiã tuchua ao hue no. Ae tuchua chao sechisaã arõ nae, sã eraã mingue turã. ¹¹ Tuchua i raanguia chõ Jesucristo riqui nguiã. Ae mi tuchi chõ tuchua i raanguia re. ¹²⁻¹³ Ae arõ tuchua mo nandesã arondete. Sita je eraã mose, siqui turã mbei rae. Oro je eraã mose, siqui turã mbei ra eno. Plata je eraã mose, siqui turã mbei ra eno. Ùquĩ je eraã mose, oquei eã nda Dios tata mbu mose. Ira je eraã mose, oquei chõ ndae. Quiata je eraã mose, oquei chõ nda eno. Nandechisaã nda Dios tea ja. ¹⁴ Nandechisaã siqui i i mose, Dios ra mbae turã mee nande je. ¹⁵ Nandechisaã oquei mose, nandembae ra quiachã nandes. Nande quia ra nandequiachã ndaque. Nandecuasẽ ndaque ra ibate Dios je. Nandechi quiatu ra nandeico cote.

¹⁶ ¿Jëtesarei chõ ere? Dios chuchua chõ nanderete riqui co resẽ. Dios riqui beite nandeye co. Espiritu Turã ndiqui beite nandeye co. ¹⁷ Emo Dios chuchua mbiã mbiã mose, aque ra Dios mbutiã. Nande quia Dios chuchua re. Dios que uchuchua mi icúe umbaerã nda. Nanderete je sichõ nandeico nguiã ñee co. Dios chõ nandemingo nguiã icúe umbaerã co.

¹⁸ —Nandeaquiature, jenyechi nguiã jeñiangui re ùquĩ. Ae eaquiature ibi jenda achõ ndese, sã ùquĩ uquiato raã naa eã. Siqui mingue mose ra Dios embaaquiato turã cote. ¹⁹ Ae eaquiature ibi jenda achõ ndese, “eaquiaturã”, i chõ Dios nguiã ùquĩ je

co. Sã embesa ji riqui ñee no:
 Dios ra ùquĩ aquiatu mbutiã ño cote.
 “Seaquiatu tuchite aico co”, i quiatuchĩ
 ngue nyii re,
 i que embesa ji ra. ²⁰ Sã embesa ji riqui ñee
 nõ:
 Ae rese eaquiatu riqui ndua nae, ùquĩ Dios
 icua tuchite quia co.
 Ndua ndua iru chõ nguiã,
 i que embesa ji ra. ²¹ ¡Mbia aquiatu
 mo ndese ra jeñimbucha choõnochĩ jẽ!
 Dios quiatu que mbae mondo ja jẽje ra.
²² Jembae chõ se re. Apolos abe rei jembae
 no. Pedro abe rei jembae no. Mbae ibi
 jenda ja rei jembae. Dios mbia mingo
 mose, jẽje chõ emingo. Dios mbia mingo
 eã mose, jẽje chõ emingo eã. Ae siqui quia
 namo, jembae ja chõ ùquĩ nde. Ae ra siqui
 aquere, jembae ja chõ ùquĩ no nde. Jembae
 ja chõ ñene. ²³ Cristo mbae chõ jẽ nde. Dios
 mbae chõ Cristo no nde.

4

Ureaquiatu tuchi Jesús chimbaaquiatu si, jenyechĩ nda jẽ

¹—Cristo rimba ja chõ ùquĩ nde, jenye chõ
 seriĩ. Apolos rĩ abe no. —Ae ambuchecua
 eã mbia je nyii, ùquĩ jembuchecua checua
 mbia je seriĩ cote, i que Dios ure je ra.
² Dios rimba mose nande, Dios cheẽ nan-
 demumbayã mbei chõ nguia. ³—Serimba
 turã ño nde re, i ra Dios seje reae. Nducua.
 Aicuayãte se. —¿I se jẽje re? ae ãte se quia
 jẽje co. Ae ãte se quia emo je co no. Dios
 miĩ ño seicua nguia. ⁴ Dios rimba turãte
 aico reae. Dios ae chõ seicua nguia. ⁵—
 Dios rimba turã ño aque re, jjenye jeichĩ
 nda emo niĩ jẽ! Jesucristo tu mose, ae quia
 ra mbae mbuchecua ja. Ae ra nandendua
 ndua mbuchecua ja. Aque mose quia ra
 Dios ñee. —Co rei serimba turã tuchi co, i
 ra Dios mbia mbiirandu aque mose cote.
⁶ Jembaaquiatu sacua ño aico nguia ñee
 jẽje co. Sechue si chõ aico nguia ñee. Apolos
 rĩ abe chõ aico nguia ñee. Dios rimba
 achõ ño ure re. Ure miĩ mo ndui jẽingo
 bei aroneate. Dios rimba ja rui chõ jẽingo.
 Eĩ jenye mose ra embesa ji jemumbayã.
⁷ ¿Mbaerã nda jẽcuasu jẽsaã saã nde? Ae
 jendeco jembaerã nae, Dios chimondo ja

chõ ùquĩ nde. Jẽaquiatu mose, Dios ae jem-
 baaquiatu nguia. —Se ae que sembae asaã
 saã nda, jjenyechĩ nda jẽcuasu raã naa jẽ!

⁸ —Ureaquiatu tuchite cote, jenyechĩ
 ngue ñee nda. —Ureico Dios cheẽ icua jate
 co, jenyechĩ ngue ñee no nda. Ererecua
 tuchi jẽsaã saãchĩ ureririrõ cote. Ererecua
 jẽsaã ñooño na jẽ no. Se abe ra ererecua
 asaã saã ndei jẽ na ndeae. ⁹ Dios ucheẽ
 nenei neneisa quirirõ jiri ure reae. Mbia
 tarõ ji rã ño ureico uremano ndaarõ arõ
 ndeae. —¿Mañi ã nguia re? i tuchi mbia
 quia mae nguia urerese co. Angeles abe
 ñee nyee mae nguia urerese. ¹⁰ Ureico
 tuchi mose Cristo rese, “eaquiatuã”, jenye
 chõchĩ equia ure je ùquĩ. “Ureaquiatute
 ure”, jenye chõchĩ equia jẽ jẽingo mose
 Cristo rese ùquĩ. Urequirãcuã neãte ure,
 jẽ jẽquirãcuã mose. Mbia ureosei chiãte
 ure; jẽ nguia mbia jẽoseite nguia. ¹¹ Mbae
 eã mbeite urembae namo abe. Ureirãcuã
 ãcuãte que eriqui emo mose ra. Ureiseite
 abe que eriqui ra. Ureirao eãte abe no.
 Mbia icua icua mbeite ure je. Urechuchua
 eãte abe no. ¹² Mbae uresaã saã tuchite
 quia ureo je co. Mbia icua icua mbeite
 riqui ure je co. Urecheẽ turã turã mbeite
 equia ure ee ã, ùquĩ ñee icua icua mose ure
 je. Urechecua chõte equia ñimbirãcuã ee
 ã. ¹³ Urecheẽ mingue beite equia ùquĩ ñee
 icua mose ure je ã. Mbae quia rã tuchi chõ
 ureico nguia mbia je ure ã. Mbia ureririrõ
 mbeite quia namo nyee ure ã.

¹⁴ Jẽreĩ ireĩ sacua eã ño aico nguia ã
 mbesa jẽje ã. Jemundua ndua sacua ño
 ñene. Seriirĩte quia jẽ nde. ¹⁵ Jembaaquiatu
 quiatusa tubiriãte raque Cristo rĩ. Se miĩ
 tuchi chõ jendu re. Se rane nguia ngue
 echeẽ turã asenei senei nguia jẽje nyii. Se
 quiatu ngue Cristo aicua uquia nguia jẽje.
 Nyebe aico nguia “seriirĩ” i beite jẽje co.
¹⁶ Nyebe jẽingo se rã si. ¹⁷ Timoteo amondo
 quia jẽje aque. Ae rei sechimbaaquiatu
 tuchi. Nyebe “seriirĩ” ae tuchi nguia ee.
 Ae quiarei siqui turã tuchi Dios rese. Ae
 ra jemundua bei secheẽ ndese. Sechisaã
 ndese abe no. —Eĩ ngue Pablo quia Jesús
 quiato mbaaquiatu quiatu sucha mbuch-
 esea sea mose ra, i ra Timoteo jẽje seriĩ.
¹⁸ Jemo ndiqui uaquiatu raã naa tuchichĩ

ũquĩ. —Pablo ra tu eã mbei urerea, i chõchĩ jemo nguia serĩũ ũquĩ. ¹⁹ Aso jei ra jendea, Dios eno i mose seje. Ae uaquiato saã saã tuchi quia jemo nae, ũquĩ tatea cote. Mañi nda equia mbae raã ndeae. Echeẽ achõ achandu sereã. ²⁰ Dios rimba cheẽ achõ aroneate. Siqui eã mose Dios quirãcuã ndese. ²¹ Manyae ra jẽje seso mose jendea reae. Acheẽ asi asi ra jẽje reae. Aico mingue chõ nda jẽje renoae. Jẽhui mose jẽicuã si, acheẽ asi asi eã nda seso mose jendea.

5

Ae siqui ngu ninisi rese, aque jemombo

¹ Mbae icuã tuchi rese que ureirandu jendese ra. Jemo nda siqui siqui ngu ninisi rese ra. ¿Mbaerã jẽataque jẽtea choõno mbae icuã naa mose re? Ae Jesús quiato ãte nae, ũquĩ ño siqui ãte ngu ninisi rese. ¿Mbaerã Jesús quiato quiatu siqui ngu ninisi rese re? ² Jẽturã jẽsaã saã mbei chõchĩ nguiaã jẽ ũquĩ. Jẽya eã eã ño jẽingochĩ ũquĩ ndese ũquĩ. Jẽireĩ nguã tuchi chõchĩ. Ae siqui ngu ninisi rese, ae jemombo eã ñochĩ jeñumunua nuasa si.

³ Ishote aico raque jẽsi co. Andua beite sequia jendese co. —Ae siqui ngu ninisi rese, aque jemondo Satanás je, ae chõ nguiaã sechiangui re co. Se siqui raanguia jendese. ⁴ Jeñumunua na Jesús quiato hue jenda. Se abe ra andua ndua jendese. Jesucristo quirãcuã abe ra siqui tuchi jendese jeñumunua mose. ⁵ Ae siqui ngu ninisi rese nae, aque jemombo chõ jẽsi. Jesús quiato si. Jemee ño Satanás je. ¶ nda Satanás erete mbasi. ¶ nda eã siqui bei Jesucristo tu mose cote.

⁶ ¿Mbaerã jeingo jẽturã naa naa mbae icuã ndea choõno nde? Levadura rã ño mbae icuã nde. “Levadura ñetẽ nda oso raque mbichae raã namo mose. Mbuchimatã ja rae”. ¿Ũquĩ jeñanuãte quia re? ⁷ Ae eicuãte nae, aque jemombo jẽsi. ¶ nda jẽ abe mbae icuã jẽsaã eã. Dios que Jesucristo iquia nandeicuã ndibishorõ nda. Sã mbia riqui oveja iquia iquia huicuã ndibishorõ no. ⁸ Nyebe nandeico turã na Dios rese, mbae icuã naa naa ndocoĩ. Cochee nandeico. Nandeicuã nandesecha ja.

⁹ —Ae siqui emo ninisi rese, ũquĩ je ra jeñee ñeechĩ, ae que secheẽ mbesa mondo jẽje nyii. ¹⁰ Ae Jesús quiato ãte, ũquĩ ñi eã ño ngue acheẽ nguiaã jẽje. Nandechẽ eã aroneate Jesús quiatoã je nandeico mose íbii. Ae siqui quia emo ninisi rese nae, ae abei chiãte riqui nae, ae mbae mbuquiachã nguia nae, ae siqui Dios abareã ndese nae, ũquĩ je nandechẽ eã aroneate. ¹¹ Jesús quiato mo ũquĩ icuã naa mose, jemombo chõ jẽsi. Jeñee ñeechĩ nda ee. Emo ninisi rese siqui mose. Abei chiã mose. Dios abareã ndese siqui mose. Uchuru rerequia choõnoã mose. Quiacua mose. Mbae mbuquiachã mose. Jesús quiato ũquĩ naa naa mose, jẽhui chõ esi. Jẽquiaru jiri jiriã tuchi ũquĩ ndese. ¹² Jesús quiatoã nandeteaquiato aroneate. Ae Jesús quiato, ũquĩ nguiaatu nandeteaquiato. ¹³ Dios quia ra Jesús icuasa reã mbasi. Ae siqui ngu ninisi rese nae, “Jesús quiato se”, i rei quia nae, aque jemombo chõ jẽsi.

6

Jemo icuã icuã mose nyue, jẽ ae chõ jẽingo

¹ Jemo icuã icuã mose nyue, jẽsochĩ nguiaã ñee Jesús quiatoã nderecua je. Jẽ ae chõ jemae erese ae. Jẽicua ae. Sã Dios quiato achõ ño ñee ũquĩ je. —¡Eĩ jenyẽ jẽ! i ũquĩ je. ² Dios quiato quia ra “¡eĩ jenyẽ jẽ!” i ja Dios quiatoã je emo mose. Jẽ nguia ra “¡eĩ jenyẽ jẽ!” jenyẽ mbia ataque je emo mose. ¿Mbaerã jẽingo “¡eĩ je nye jẽ!” ise reã mbae ñetẽ naa mose re? ³ Angeles je abe chee ra “¡eĩ jenyẽ jẽ!” nande. ¿Ũquĩ ndese jẽiranuãte re? Á ibi jenda je “¡eĩ jenyẽ jẽ!” nande turã ja rã ae. ⁴ Jesús quiato chõ jẽ nde. Ibi jenda mo ñi jemo icuã icuã mose nyue, jẽ ae chõ jemae ũquĩ ndese. Jẽsochĩ nguiaã ñee Jesús quiatoã nderecua je. Dios quiato eãte quia ũquĩ nde. ⁵ Jesús quiato mo ñee icuã icuã mose nyue, ¿jemo jẽaquiatoãte ñee ee re? “¡Eĩ jenyẽ jẽ!” i ee re. Jẽ jẽireĩ ireĩ sacuã ño aico nguiaã ñee jẽje ũquĩ. ⁶ —¿Mañi ure ra re? i aroneate Jesús quiato ñee Jesús quiatoã nderecua je.

⁷ Jemo Jesús quiato mo icuã icuã mose nyue, echĩã turã tuchi ãte quia ñene.

Jeñimbirãcuã ño mbae icuã naa mose jêje. Jeñimbirãcuã ño jembae mbuquiachã mose no. ⁸ Jê abe mbae icuã jêsaã saã ñochĩ, ñimbirãcuã ndocoĩ. Jê abe jendesenda mbae jembuquiachã ñochĩ Jesús quiato mbae, ñimbirãcuã ndocoĩ.

⁹⁻¹⁰ Mbia rerecuarã tuchi ra Dios cote. Aque mose ra mbia icuã siquíã tuchi Dios rese. Ae siqui emo ninisi rese nae. Ae siqui ngüinisiã ndese nae. Ae ndua chooño nguia Dios abareã ndese nae. Ae siqui quia nyiese ngüinisi raã naa nguesenda je nae. Ae mbae mbuquiachã quiachã nguia nae. Ae abei chiãte riqui nae. Ae quiacua quiacua quia nae. Ae ucheẽ mondo chooño mbeite quia mbia je nae. Ûquí nda siquíã tuchi Dios rese. —Eicuã abe ra siqui bei Dios rese, jjenyechĩ nda ñimbiĩrĩ irĩ jê! ¹¹ Eĩ ngue jemo icuã cose ra. Dios ae jembitirõ nguia cote. Dios chõ jemĩ nguia icúe umbaerã cote. Espíritu Turã ngue jêisi turã Jesucristo rĩ cote ra.

Espíritu Turã nyuchua chõ jendete re

¹² —Co rese ra ereicochĩ, i ãte raque Dios quia seje mbae mo ñi. Dios biãte nande mbae raã ja chooño mose. Mbae mo sembĩcuã serĩ mose, asaã eã mbei ra se. ¹³ Nandechĩurã ndei nanderie ye sacuã. Nanderie rei nandechĩu rirurã. Ûquí ja ra Dios mbutiã emo mose cote. Dios mbaerã ño nanderete re. Siqui chooño sacuã eã ño emo ninisi rese chõ nanderete re. Nanderete rerecua chõ Dios re. ¹⁴ Dios quirãcuã ño ngue Jesucristo raaque mbuquera nguia. Eĩ ño nda Dios quirãcuã nanderaaque mbuquera nguia nande abe no. ¹⁵ ¿Jêiranuãte quia jendete rese re? Cristo nanderete mbucha quia uchiese co. Cristo rete chõ nandeco nguia co cote. Cristo rete nandembucha aroneate cuña icuã ndete mo ndese. ¹⁶ Emo siqui mose cuña icuã mo ndese, erete ucha chõ nguia nyiese aque. Erete nyeremo eã ño cote re. Ûquí ndete ja ra co mii cote, i que Dios cose ra. ¹⁷ Emo siqui mose Cristo rese, nguete mbucha chõ nguia erese ùquí cote. Erete mii na ño ùquí cote re. ¹⁸ ¡Jeninisiã ndese ra jêingochĩ jê! Mbae icuã mo naa mose, ùquí nda nanderete mbĩcuãyã jiri. Siqui

mose ngüinisiã ndese, ùquí nguia ra nanderete mbĩcuã tuchi cote. ¹⁹ Espíritu Turã siqui chee jeñiangui re ùquí. Espíritu Turã nyuchua chõ jendete re. Dios mbae chõ jê nde. Jembae ae eã ño jendete re. ²⁰ Eicuã nimba rei ngue jê nyii re. Dios quiatu ngue jêisi nguia cote. Nguiĩrĩ ngue emondo jendibishorõ nda. Nyebe jêingo jendete mee Dios je. Jêaĩ abe jemee ee noae.

7

Pablo mbia mbaaquiato emo ngüinisi rerequia rĩ

¹ Jeñee ngue jembesa mondo seje nyii nae, ùquí tasibishorõ jêje cote. Coche emo siquíã nguia cuña mo ndese. ² Coche mbia ngüinisi ae rerequia nguia. Coche cuña ngu mii nderequia nguia no. Emo ndese siqui chooño eã sacuã ño ùquí nde. ³ Sã eru riqui turã ngüinisi rese. Sã eninisi abe riqui turã ngu rese. Nyao aroneate nyesi. ⁴ Eninisi rete chõ eru mbae cote re. Eru rete chõ eninisi mbae cote no nde. ⁵ Nya i aroneate eru ngüinisi je nguete rese ngueteã. Nya i aroneate eninisi nguete rese ngueteã ngu je no. —Nandechẽ mbei Dios je namo, siqui rocoĩ nyiese, i mose nyue, eturãte ùquí. Sã eriquibe nyiese aquere cote. Ñee ñeende Dios je cote. Siquibe eã mose nyiese, ñimbirãcuã eã arõ ndete. Satanás embĩcuã arõte cote. ⁶ —Jeninisirã jendeco, ae ãte quia jêje co. —Jeninisibi mose, jendeco ae, ae chõ nguia jêje co. ⁷ —Sã Jesús quiato ja ninisiã ndiqui se rã si, ae rei que se ra. Dios cheẽ eã ño ùquí nde. Nandechisaã ae aerã ño Dios mondo nguia nande je. Emo ninisiã siqui turã arondete. Emo ae ngüinisi quereco sete nguia no.

⁸ Ae eninisiãte nae, ùquí je tacheẽ. Eru checha je abe tacheẽ no. Coche jêingo nguia jendu eã. Coche jeninisiã ndiqui nguia no. Se rã si. ⁹ Jeñimbirãcuãyã mose jendete je, jeninisirã mo jêtea ae. Jendurã mo jendeco noae. Mbia mo oseĩ oseĩ rocoĩ.

¹⁰ Ae ngu quereco nae, sã ùquí ngu rechayã mbei. Jesús cheẽ tuchi chõ ùquí nde. Secheẽ ae eã ño ùquí nde. ¹¹ Cuña mo ngu recha mose, sã eriquiã mbei emo ndese. Sã ae ae chõ ndiqui bei, ñimbuca

si eã mose ngu rese. Sã eru abe ngũinisi rechayã mbei.

¹² Se ae tacheẽ cote. Jesús cheẽ eã ño ã cote re. Jesús quiato mose emo, sã eriqui bei ngũinisi rese. Jesús quiatoã ndaque eninisi. Eninisi siquise mose ngu rese, sã eru siquichõ erese. ¹³ Jesús quiato mose cuña mo, sã eriqui bei ngu rese no. Jesús quiatoã ndaque eru. Eru siquise mose ngũinisi rese, sã eninisi siquichõ erese no. ¹⁴ Jesús quiato mose eru, eru ngũinisi mbucha arõte quia Jesús rese co. Jesús quiato mose eninisi, eninisi ngu mbucha arõte quia Jesús rese co no. Eĩ nda eriirĩ abe Jesús icuayãte rei, ùquĩ ande. ¹⁵ Jesús quiato mo ninisi siquíã mose Jesús rese, “seru tasecha” i bei mose, sã eru eriquisã quisã eã. Cuña mo Jesús quiato mo ndu siquíã mose Jesús rese, “seninisi tasecha” i bei mose, sã eninisi ngu riquisã quisã eã no. Ùquĩ naa mose, Jesús quiato mbae icuã saã eãte. —Sã seriirĩ ndiqui turã nyue, i quiatu que Dios nande je ra. ¹⁶ Ae Jesús quiato nae, ùquĩ ngũinisi mingo arõte Jesús rese. Ae Jesús quiato cuña nae, ùquĩ ngu mingo arõte Jesús rese no.

¹⁷ —Eĩ jenyẽ chõ nguia jẽ ae ae, i que Dios nandechiaorã mee mee nande je ra. Ùquĩ ndese nandeico bei quiatu nande ae ae. Dios que ñee nande je nyii, aque mosenda rã si bei chõ nandeico. Ùquĩ ño asenei senei nguia Jesús quiato ishonda jaje abe. ¹⁸ —Echu serui, i mose Dios judío mo je, sã judío bei chõ ae riqui. —Echu serui, i mose Dios judío eã mo je, sã ae riqui judío raã naa eã. ¹⁹ Sebite judíos achõ, iã nda Dios. Sebite judíos eã achõ, iã nda Dios no. Ae Dios cheẽ mumbayãte quia nae, ùquĩ nguia Dios bite re. ²⁰ Eĩ nande que equia Dios ñee namo mose nande je nyii, aque mosenda rã mbei chõ nandeico. ²¹ Mbia rimba mose nde, Dios “eico serui” i mose ndeje, eico chõ erui. Mbia mo nimba raque nde. Erechãchĩ nda ndererecua si. Ndererecua huise mose ndesi, nde ae eico cote ae. ²² —Eico serui, i mose Dios mbia rimba mo je, Dios embui chõ nguia eicuã si cote. —Eico serui, i mose Dios emo ae siqui mose, Cristo rimba chõ aque cote re. ²³ Jesucristo que mano jẽje ra. Nyebe Jesucristo rimba ae chõ jẽingo nguia

ùquĩ cote. Mbia rimba ae eã ño jẽingo nguia ùquĩ cote. ²⁴ Dios que ñee nande je nyii, aque mosenda raanguia bei chõ nandeico Dios rese.

²⁵ Nyucuaaque riĩ tacheẽ ndaque jẽje cote. Dios que ñee ãte seje ùquĩ nã nda. Se ae chõ tacheẽ jẽje. Airandu que Dios ia eã mose serese ra. Nyebe aico nguia ñee ñooño eã tuchi jẽje co. ²⁶ Sã mbia ngũinisirã mo ndea eã namo. Sã nyucuaaque ae riquichõ ngurã mo ndea rocoĩ. Mbia icuãte quiatu eriqui nguia Jesús quiato je ã cote. ²⁷ Neninisi mose, eico bei chõ erese rechayã mbei. Neninisiã mose, nde ae eico bei. ²⁸ Neninisirã ndea mose, eicuã eã ño ùquĩ no nde. Nyucuaaque ngurã mo ndea mose, eicuã eã ño ùquĩ no nde. Mbae icuã nda eĩ eĩ ee ngurã ndea mose cote reae. Nyebe aico nguia ñee jẽje. —Jẽ ae jẽingo jeninisiã, i jẽje. ²⁹ Tacheẽ tuchi rã jẽje, Seresenda. Mbae ra ua jei ja nande je cote. Ae ngũinisi quereco quia, sã ùquĩ ndiqui ngũinisi rerequia eã naanguia. ³⁰ Ae eya eãte riqui, sã ùquĩ ia tuchi raanguia riqui no. Ae eyate riqui, sã ùquĩ ia eãte raanguia riqui no. Ae mbae isi quia, sã ùquĩ ndiqui mbae isiã naanguia no. ³¹ ã nandeico rei nguia ibii ã. ¡Ibi jenda rese ra nandendua tuchichĩ jẽ! ¡ã ibi jenda ja ra ua ja chõ jẽ!

³² —Jeninisiã ño jẽingo, ae que se ra. Jendua ndua eã jiri nda ibi jenda rese chã. Ae eninisiã, ùquĩ ndua ndua bei arõte Dios mii ndese. Ae Dios bite, ùquĩ esaã saã mbei arõte. ³³ Ae eninisi nae, ùquĩ ndua ndua bei arondete ibi jenda achõ ndese. Ae eninisi bite nae, ùquĩ esaã saã mbei arondete. ³⁴ Eĩ si chõ cuña no nde. Eru eã mose, ndua ndua arondete Dios achõ ndese. Ae Dios bite, ùquĩ nda esaã saã mbei ee. Siqui tuchi ra Dios rese. Ae ngu quereco nae, ùquĩ ndua ndua bei arondete ibi jenda achõ ndese. Ae eru bite nae, ùquĩ esaã saã mbei arõte. Siqui rocoĩ Dios rese. ³⁵ Jaendiquisã quisã eãte raque se jeninisirã mo ndea mose. Jemundua sacua Dios rese chõ aico nguia ñee jẽje co. Jendua eã sacua mbae mo ndese chõ ñene. Jeninisi mose jendua bei aroneate Dios rese.

³⁶ —Seriirĩ ndu bite chí cote. Etiarõte chí cote, i mose amei mo, sã eriiĩ ngurã mo nderequia. Eicuã eã ño nguiirĩ ndurã mee ee re. ³⁷ —Sã seriirĩ ndu eã ae riqui. Erurã nda amee eã ee, i tuchi mose amei mo, eturãte ũquĩ abe. ³⁸ Ae nguiirĩ ndurã mo mee ee, eturã ño ũquĩ nde. Ae nguiirĩ ndurã mo mee eã ee, eturã tuchi chõ ũquĩ cote re.

³⁹ Eru mbae bei chõ eninisi re. Nyao aroneate nyesi. Eru mano mose, ngurã mo nderequia arõte Dios quiato mo cote. ⁴⁰ Eru mano mose, siqui turã arondete ngurã mo ndea eã mose cote. Eya tuchi ra siqui ngu eã mose reae. Se chõ acheẽ nguia ũquĩ ndeae. Espíritu Turã abe sembuchee nguia reae.

8

Ae soo mbia mondo rei dios abareã je nae

¹ —Mbia soo mondo mondo quia dios abareã je nae, ¿ũquĩ soo ra nandeu re? jenyee que seje. Ũquĩ tasenei jẽje cote. —Seaquiatute se, nande ja jate raque quia ã. Emo eaquiatu tuchi mose, ucuasu raã naa arondete. Emo nyesequa mose mbia rese, Dios abe rese ra nyesequa bei. ² Seaquiatute se, i mose emo, eaquiatuã ño ũquĩ nde. ³ Emo nyesequa mose Dios rese, Dios ũquĩ icua chõ nguia ũquĩ.

⁴ Mbia soo mondo mondo quia dios abareã je, ¿ũquĩ nda nandeu re? ¿Nandeu eã tuchi chõ nda re? Dios eã tuchi chõ dios abareã nde. Co miĩ tuchi chõ Dios re. ⁵ Dios abareã nguia etubiriãte re. Ibi jenda. Ibei rĩnda abe no. Dios raanguia tubiriãte raque no. ⁶ Dios quia co miĩ tuchi nande je re. Ae quiarei nanderu tuchi. Ae miĩ ngue mbae chao ja tuchi ra. Ae miĩ ngue nandeaõ umbaerã nda. Nandererequa miĩ tuchi chõ siqui nguia co no. Jesucristo, i equia ee. Ae que mbae chao ja tuchi Dios rese ra. Ae miĩ ño nandemingo nguia ã.

⁷ Dios quiato mo iranuate quia ũquĩ ndese ã. Siquiche beite quiatu nguia dios abareã si ũquĩ. Ae soo mbia mondo dios abareã je, ũquĩ mbaeiae riqui reĩ nguia ee. —¿Ũquĩ soo jẽu eã jẽ! i reĩ Dios nguia ee. ⁸ Ae nandeu quia nae, ũquĩ nda nandembuturã eã Dios je. Nandechiu mo nda nandembuturã eã mingõ. Nandechiurã nandehi teã

teã mose, ũquĩ nda nandembucua eã no. ⁹ —¿Ũquĩ soo ra jẽuchĩ jẽ! iãte raque Dios nande je. Mbaeiae eãte raque ũquĩ soo. Mbaeiae nda eriqui reĩ Jesús quiato namonda je raẽ. Jẽ eu mose, ũquĩ abe ra eu chee. —Mbaeiae au chõchĩ, i ra ñimbucua tuchi cote. ¹⁰ Jẽquiaru mose dios abareã chuchua, Jesús quiato namonda ra mae jendese. Ũquĩ abe ra soo u chee, ae mbia mondo Dios abareã je. Maende jendese. Eicuã ndaque eriqui reĩ nguia ee. ¹¹ Jẽ ndaque jẽirandu ũquĩ soo rese. Eicuã eã ndaque eu mose. Jẽu eã ndei. Jẽ eu mose, Jesús quiato namonda abe ra eu chee. Siquichete raque esi. Eĩ jenyee chõchĩ ũquĩ mbucha arõte Dios si. Ũquĩ niĩ abe chõ ngue Jesucristo mano nguia. ¹² Soo mbaeiae riqui reĩ mose ee, jẽu eã uquia ee ae. Jẽ euquia mose Cristo quiato namonda je, eicuãte ũquĩ Cristo je. ¹³ Jesús quiato mo ambucua sereã tuchi chõ nguia se. Se soo u mose, ũquĩ Jesús quiato mo mbucua mose, soo ra auã mbei cote.

9

Mbae mo jembu seje Dios cheẽ nenei nenei ndibishorõ, i ãte Pablo

¹ Jesús cheẽ nenei neneisa tuchi chõ se re. Sererequa mo eãte ibi jenda mo. Amae tuchi que Jesucristo rese se ra. Secheẽ nguire chõ jẽingo nguia Jesucristo icua ũquĩ cote. ² Jesucristo cheẽ nenei neneisa eã ño co re, i arõte raque emo seje. Jẽ quiatu jẽnee aroneate nguia ũquĩ seje. Ũquĩ jẽingo seicua tuchite ũquĩ. Secheẽ nguire quiatu que Jesús jẽicua cote resẽ.

³ Eĩ ae chõ nguia ñee mbia ñee icua mose seje. ⁴ Se abe Jesús quiato sembuquiaru quiaru arondete raque. ⁵ Seninisirã Jesús quiato mo arao rao arondete raque mananguiti. Secuata cuata mose mbia mbiirandu randu Jesús rĩ. Sã Pedro riqui ngũinisi rerao rao no. Jesús nongue abe no. Sã Jesús cheẽ nenei neneisa ja ngũinisi rerao rao no. ⁶ ¿Se miĩ ño nda Jesús quiato sembuquiaru aroneate reĩ jẽje re? Bernabé abe rese. Ure Jesús cheẽ nenei nenei mose. ⁷ Sã soldado siqui choõno eã comandante mbae mee eã mose ee. Sã emo ndiqui mbae tiquia choõnoa no. —Sechitiquia nda au

chã, i chõ nguiã. Sã emo ndiqui ticuasuararõ ñooñoa no. —Equiandi nda ambei chã, i chõ nguiã.

⁸ Secheẽ ae eã ño ãquĩ nde. Embesa ji chõ asenei nguiã jẽje. ⁹ Co rei Moisés chimbesa co:

Jẽ ticuasu mbuquiei quiei mose, echuru jemumbi eã.

Sã ae ae si quia mbae cua,

i que embesa ji ra. Ticuasu achõ je eã ngue Dios ñee nguiã. ¹⁰ Nande abe je chõ ngue ñee nguiã. —Sã Jesús quiato abe riqui mbae mee mee echeẽ nenei neneisa je, i chõ ñene. Ae mbae chitiquia quia nae, “sechitiquia tau”, i chõ nguiã etiquia. Ae mbae a chiqui chiqui quia nae, “sechiiqui tau”, i chõ nguiã eiqui iqui. ¹¹ Dios cheẽ ngue uremingue mingue tuchi quia jendese resẽ. ¿Jẽ urembuquiaru quiaru aroneate quia cote re? ¿Ureiraorã jemee aroneate quia ure je cote re? ¹² Mbae mo jemee mee nguia Jesús cheẽ nenei neneisa mo je ãquĩ. ¿Mbaerã jẽingo emee eã ure abe je quiatu re? —iMbae mo nandei si teã eo si jẽ! ure que equia oso mose jendea ra. Dios si jembucha eã sacua ño ngue mbae mo ureisi teã nguiã jẽsi. ¹³ Sã Dios ñee sacerdotes je cose no. —Ae siqui quia sechuchua sacrificio raã naa nae, sã ãquĩ ndiqui ofrenda u u bei ae, i que Dios ñee cose ra. ¹⁴ Eĩ si chõ ngue Jesús ñee nguiã ucheẽ nenei neneisa je. —Ae secheẽ turã senei senei nguia nae, sã sequiata ataque riqui mbae mee mee mbei ãquĩ je, i que Jesús ra.

¹⁵ Dios cheẽ nenei neneisa tuchi raque se. Mbae mo ngue aisi chõ ãte jẽsi ra. Se ae chõ mbae achao chao nguiã sembaerã co. —Mbae mo jemee seje, ae ãte chõ nguiã co mbesa mbesa jẽje co. Tamano ae, “mbae embu seje”, i rocoĩ jẽje. ¹⁶ Dios cheẽ nenei neneisa tuchi chõ se re. ãquĩ ñi seturã asaã saã aroneate. —Secheẽ esenei senei mbia je, i quiatu Dios nguiã seje. Se erenei nenei eã mose mbia je, Dios ra paama i seje. ¹⁷ Se ae que andua eã nda. —Dios cheẽ tasenei senei, aeã ngue se ae ra. Dios chõ ngue ñee nguiã seje. —Secheẽ esenei senei mbia je, i nguiã seje. Se ae andua mose, eĩ nda Dios mbae mo mee ndei seje ucheẽ nenei nenei ndibishorõ. Dios rimbate quia se re.

¹⁸ ¿Mbae chõ sebite riqui chã? Mbae mo isiã Dios cheẽ nenei nenei ndibishorõ, ãquĩ ño sebi re. —Mbae mo embu seje Dios cheẽ nenei nenei ndibishorõ, ae ãte quia co. ãquĩ nguia sebi re.

¹⁹ Mbia mo nimba eã ndaque se. Mbia rimba asaã saã ño nguiã Dios cheẽ nenei nenei mbia je co. Mbia Jesucristo icua sacua. ²⁰ Seico mose judíos ite re, judío asaã saã ño nguiã. Judíos Jesucristo icua sacua. Ae siqui tuchi quia Moisés chimbesa rui nae, ãquĩ ite re seico mose, Moisés chimbesa asaã saã ño nguiã se abe. ãquĩ Jesucristo icua sacua. —Moisés chimbesa rui eico, i ãte raque Dios seje. ²¹ Ae siquiã nguia Moisés chimbesa cheẽ ndui nae, ãquĩ ite re seico mose, se abe Moisés chimbesa asaã saã eã ño nguiã cote. ãquĩ Jesucristo icua sacua. Cristo mii ñee ño amumba mumbayã nguiã co. ²² Jesús quiato quirãcuã nea ite re seico mose, ãquĩ asaã saã ño nguiã se abe, sequirãcuã nea naa naa. ãquĩ Jesucristo icua sacua. Ae ite re aico oso oso beite nae, ãquĩ na ño aico nguiã se abe. ãquĩ Jesucristo icua sacua. ²³ ãquĩ ja chõ asaã saã nguiã Dios cheẽ turã ñi co. Nandeico turã ja sacua Jesús rese.

²⁴ Sã mbia carrera raã naa no. Mbia ja chõ uchã ndaque. Co mii ño nda premio isi. Aque rã tuchi chõ jẽingo Jesús rese. Premio isi sacua naanguia. ²⁵ Ae ra carrera saã saã nae, ãquĩ mbae icua secha ja chõ nguiã ãquĩ. Premio isi sacua ño eriqui nguiã mbae icua naa eã. Premio nda ua jei raque. Ae Jesús mee arõte quia nande je premio nae, ãquĩ nguia ra ua eã mbei nandesi. ²⁶ Se aico chooñoa nguia Jesús rese co. Jesús rese aico turã tuchi chõ nguiã se co. ²⁷ Mbae asaã saã ño nguiã serete mbirãcuã co. Serete secheẽ mumbayã sacua. Se premio ganar i sacua ño aico nguiã eraã naa co. Premio isiã sebiãte, se Dios cheẽ nenei nenei tuchire. Nyebe aico nguiã siqui tuchi Jesús rese co.

10

Dios raanguia rese ra jẽingochĩ jẽ

¹ ¡Jẽtesareichĩ nda nandei ñiinda si jẽ!
¡Moisés mosenda si jẽ! ¡ãquĩ ngue siqui ja

rei ibeishĩ ndui ra jẽ! ¡Ũquĩ ngue nyoi ja rei Ama Ireĩ ndasa Dios ñee mose ee ra jẽ! ² —Moisés rese nandeico bei, i ja rei que mbia siqui ja mose ibeishĩ ndui ra. — Moisés rese nandeico bei, i ja rei que mbia Ama Ireĩ ndasa mose ra. ³ Ae Dios mee ndei ee echurã nae, ũquĩ ngue mbia ja u u rei ra. ⁴ Ae Dios mee ndei ee embei sacua nae, ũquĩ ngue mbia ja mbei mbei rei ra. I que tuutu quia sita si nae, ũquĩ ngue mbia ja mbei mbei rei ra. Aque sita rei Cristo rã. Cristo que siqui tuchi quia ũquĩ mbia rese ra. ⁵ Ũquĩ ataque rese que Dios ia eã tuchi riqui ra. Siqui turã eã tuchi que equia Dios rui ra. Nyebe Dios eataque iquia iquia nguiã turúquiaa.

⁶ Nandemundua sacua ño ũquĩ nde. Mbae icua osei osei eã sacua nande chõ ũquĩ nde. Sã ũquĩ mbae icua osei osei no. ⁷ Jẽingochĩ nda dios abareã ndese. Sã ũquĩ ndiqui dios abareã ndese no. Sã embesa ji riqui ñee no: “Mbia que quiaru quiaru ra. Mbae abe que embei mbei ra. Aquere que nyuruqui ruqui ticuas raanguia je ra”, i que embesa ji ra. Jẽ nguia jẽingo eã dios abareã ndese. ⁸ Ũquĩ nandei que siqui siqui ngũinisiã ndese no nda. Nyebe Dios eiquia iquia tuchi nguiã. Veintitrés mil que mano aque nyaashĩ mose ra. ¡Mbae icua nda nandesaã saãchĩ ũquĩ na jẽ! ⁹ —Ma Cristo roseite, nandechĩ nda mbae icua naa jẽ. Sã nandei riqui “ma Dios roseite” i nyii no. Sã ñi ngue eriqui mbae icua naa mbei cose no. Sã mbei tásie riqui eiquia iquia no. ¡Ũquĩ nandesaã saã eã tuchi chõ nguia nande jẽ! ¹⁰ ¡Jeñee icua icuãchĩ nda Dios rĩ jẽ! Sã ũquĩ nandei ñee icua icua nguia Dios rĩ no. Nyebe ángel nandei ñiinda iquia iquia tuchi nguiã. ¹¹ Eĩ si tuchi que nandei ñiinda quia nyii ra. Dios que embesa mii nandetesare eã sacua nda. Mbae ua ja serĩ mose chõ Dios riqui nguiã nandembesare eã co. ¹² —Sequirãcuã tuchi chõ se re, i mose emo, ¡sã aque riqui nyicua tuchi quiatu jẽ! Mbae icua jeĩ nonde ee. ¹³ —¡Mbae icua esaã jẽ! i mose diablo jẽje, eĩ si chõ nguiã ñee mbia ataque je. Jẽ mii je eã. Dios quia ra ucheẽ mbuchebiã mbei. Jendeaquiatu bei ra diablo ñee mose jẽje. Jembirãcuã ndae. Jẽ “nya” i sacua mbae icua je.

¹⁴ Seresenda, ¡dios raanguia rese ra jẽingochĩ jẽ! ¹⁵ Jẽaracuate rei jẽ ndesẽ. Secheẽ ndese jemaie quiatu. ¿Acheẽ ñooño se re? Acheẽ ñooño eã se reae. Jẽtea quiatu. ¹⁶ Nande Santa Cena naa naa mose, Cristo ruqui mbei raanguia chõ nandeico nguiã uva rique mbei mbei. —Cristo ruqui nandembitirõ ja bei quia ã, i chõ nguiã uva rique mbei mbei. Mbichae nandesiquio quio quia eu nonde nae, Cristo roo rã ño ũquĩ nde. —Cristo roo nandembitirõ ja bei quia ã, i chõ nguiã mbichae u u. ¹⁷ Nandetubiriãte raque Jesús quiato. Nande ja chõ aque mbichae mii nandeu ja nguiã. Mbae mii na nguiatu nandeico nguiã nande ja ã. ¹⁸ Judíos rese chõ jendua. Ũquĩ sacrificio raã naa mose, sacrificio eu chõ nguiã ã. —Dios resete quia nandeico nguiã ã, i equia ã. ¹⁹ —Dios abareã mbae mo saã arondete, ae ãte raque quia co. Ae soo mbia mondo mondo quia dios abareã je, soo chõ ndaque ũquĩ. ²⁰ Mbia soo mondo mondo mose dios abareã je, Dios tuchi je eã ño eriqui nguiã emee mee. Aba checuayã icua je chõ eriqui nguiã emee mee. ¡Aba checuayã icua ndese ra jẽingo jiri jirichĩ jẽ! ²¹ Jẽ mbae mbei mose aba checuayã ndese, Jesús ruqui mbei raanguia jesaã aronea ño nguiã cote. Jẽquiaru quiaru mose aba checuayã nyuchua, Santa Cena jesaã aronea ño nguiã cote. ²² ¿Mbaerã jẽingo Jesucristo mbupaama ite re? ¿Jẽquirãcuã tuchi chõ eriqui esi jẽ nde?

Jesús quiato ataque rese quia jẽingo ndua

²³ —Ae soo mbia mee mee nguia dios abareã je nae, ũquĩ ndese ra jẽocochĩ, i ãte raque Dios nande je. Dios biãte nande mbae raã ja choño mose. Ũquĩ nii Dios ñee ãte raque nande je. Nande ae chõ nandeicua. Mbae mo Jesús quiato mo mundua icua mose, ũquĩ si nandehui chõ. ²⁴ —Nande ae nandeico Dios rese, jenyechĩ nda jẽ. —Mbia ja quiatu nandemingo erese, jenye quiatu. ²⁵ Soo jëisichõ ño nguia mbae vender ísaa. —¿Dios abareã je co soo jemondo nyii re? ¡jenye chĩ nda ñee ee jẽ! Jëiranua mose, mbaeiae eã ño soo jẽje cote re. Jëisichõ ño nguia jëiranua. ²⁶ Jesucristo mbae chõ ibi re. Mbae ibi jenda ja abe rei

embae no. Ae Jesucristo chao ja nae, ũquĩ ndei nandechiurã ja. ²⁷ —Nyao rã quiaru serese, i mose emo jêje, jêso chõ quiaru erese jêsose mose. Ae ra echara mondo jêje, jêuchõ ño. —¿Co mbia mondo dios abareã je nyii re? jenyechĩ nda ee. Jêiranua mose, mbaeiae eã ño jêje cote re. Jêiranua ño jêquiaru. ²⁸ —Co soo que mbia mondo dios abareã je ra, i mose emo jêje, jêu eã ño cote. Ae ñee jêje nae, aque mbiicuã eã sacua ño jêu eã. Aque soo jêu eã cote, jêirandu mose erese. Jê eu mose, Jesús quiato ra ndua icuã icuã cote. ²⁹ Jendua icuã eã ndaque jê. Emo nguia ndua icuã arõte nguia cote, jirandu mose jê eu rese. —¿Mbaerã nda aque soo au eã sebi mose re? i arõte jemo seje. —¿Mbaerã nda emo ñee amumbayã nde? i arõte jemo seje. ³⁰ —Se “gracias” i mose Dios je aque soo u nonde, eicuã eã ño cote reae. ¿Mbaerã nda emo ñee icuã seje re? i arõte jemo seje. —¿Mbaerã nda au eã eicuã eã mose re? i arõte jemo seje.

³¹ ã ndese chõ jendua. Ae nandesaã saã nguia nae, Dios je chõ nandesaã. Ae nandeu ndeu quia mbae nae, Dios je chõ nandeu. Ae nandembei mbei quia mbae nae, Dios je chõ nandembei no. Mbia ra ñee turã Dios je, nandeico turã mose. ³² iMbia ra jemundua ata atate chĩ jê! —Ã icuã ereae, i mose emo jêje, jũquĩ nda jêsaãchĩ jê! Jê eraã mose, ũquĩ nda ndua icuã Jesús rese cote. Judíos. Judíos eã abe. Jesús quiato abe. Ũquĩ ndua icuã arõ Dios rese, jê eraã mose. ³³ —Se ae taico Dios rese, ae ãte quia co. —Mbia ja quiatu tamingo erese, ae quia co. Dios mbia rirõ sacua eicuã si. Mbia siqui bei sacua Dios rese.

11

¹ Se rã si chõ jêingo. Sã aico Cristo rã si se no.

Eĩ jenyechõ nguia u ñumunua nua mose, i Pablo cuña je

² Acheẽ turãte quia jeni co. Jendua beite quiatu quia serese. Acheẽ ngue jêje nyii, ũquĩ jemumbayã mbeite quia secheẽ ũquĩ.

³ Ae ra ambesa jêje namo, jũquĩ jêicua tuchi quiatu jê! Cristo rei hombre ja rerecua. Hombre rei ngũinisi rerecua no. Sã Dios Cristo rerecua no. ⁴ Mbia ñumunua mose,

sã hombre mo ñee eã Dios je huiite sucha resebe. Sã eãquĩ nyecua chõ siqui Dios cheẽ nenei nenei. Uãquĩ ati mose, aba ireĩte ũquĩ.

⁵ Mbia ñumunua mose, sã cuña mo ñee eã Dios je huiite suchayã. Sã cuña ãquĩ ati ji chõ siqui Dios cheẽ nenei nenei. Cuña uãquĩ ati eã mose, aba ireĩte ũquĩ. Uãquĩ huĩ na ño eriqui nguia uãquĩ ati eã no. ⁶ Cuña mo uãquĩ ati sereã mose, sã uãquĩ huĩ tuchi quiatu no. Eireĩ mose uãquĩ huĩ, sã uãquĩ ati quiatu ua sia rocoĩ no. ⁷ Hombre mo nguia uãquĩ chati aroneate nguia Dios cheẽ nenei nenei. Dios quiatu ngue hombre chao nguia umbaerã. Aquere que cuña mo ao hombre mbaerã cote ra. ⁸ Cuña ndoquieĩ je eã ño ngue Dios hombre ao nguia. Hombre roquieĩ je quiatu ngue Dios cuña mo ao nguia. ⁹ Cuña chirecorã eã ño ngue Dios hombre ao nguia. Hombre chirecorã nguiatu ngue Dios cuña ao nguia. ¹⁰ Nyebe ra cuña uãquĩ ati quiatu. —Seru chõ sererecua re, i chõ nguia uãquĩ ati. Angeles quia maete nguia erese. ¹¹ Jesucristo quiato ja chõ nande re. Hombre achõ nda siqui turã eã cuña eã mose. Cuña achõ nda siqui turã eã hombre eã mose no. ¹² Hombre roquieĩ je chõ ngue Dios cuña ao rei nguia nyii. Cuña abe riqui tiirĩ irĩ hombre co cote. Dios chiao ja chõ ñene. Cuña. Hombre abe. ¹³ Jê ae chõ jendua mae erese. Eicuãte cuña ãquĩ ati iriã ñee Dios je. ¹⁴ Hombre a boco mo siqui mose, aba ireĩte ũquĩ. —Eicuãte ũquĩ, i ja tuchi mbiamo ñooñoa nguia ũquĩ je ã. ¹⁵ Cuña mo nguiatu ea boco siqui mose, ũquĩ nguia earõte re. Ea boco que Dios mee ee ra. Eãquĩ ati sacua. ¹⁶ —Cuña a boco sebiã, i mose jemo, sã ndua chõ Jesús quiato ataque rese. —Sã cuña a boco riquichõ, i ja chõ Jesús quiato nguia serese ũquĩ.

Jenyao chaochĩ nda Santa Cena u mose jê

¹⁷ —Santa Cena naa icuã icuã ño ngue equia ñumunua nua nda, i que mbia mo sembiirandu jeni nda. Nyebe seya eãte riqui nguia jendese. ¹⁸ —Hue rĩ ja eã eriqui ndua ndua ñumunua nua mose ũquĩ, i que emo sembiirandu jeni nda. —Ichõño eã ereae, ae sequia ndua ndua co. ¹⁹ Jeñimbuchao chao chõchĩ equia

ũqui. Mbia Jesús quiato tuchi icua sacua ño jeñimbuchao chao nguiã. ²⁰ Santa Cena naa naa mose, abei chiã tuchi chõ jëingo nguiã jenyue ũqui. Eĩ eã tuchi que Jesucristo nandembaaquiato ra. ²¹ —Se rane sembae tau ja, jenye jaaja chõchĩ nguiã Santa Cena naa naa ũqui. Mbae mee ndocoĩ emo je. Nyebe mbaecha riqui nguiã quiaru tuchi. Mbae mbei tuchi no. Mbaecha reã niacuã mose. ²² Jëquiaru tuchi mose Santa Cena, jëingo icuã ño nguiã Jesús quiato ataque je ũqui. Mbaecha reã ireĩ ireĩ ño nguiã jësi ũqui. ¿Mañi ae ra ñee jëje re? Eicuãte ũqui ndesẽ. Jenyuchua ae ae rei jëquiaru sacua ndesẽ.

Jesús quiaru mose uchimbaaquiato rese

²³ Jesucristo ae sí que sembaaquiato ra. Ñngue asenei ndei jëje nyii resẽ: Judas Jesucristo reacuquia nonde mbia icuã je, aque isa sí que Jesucristo mbichae sirõ nda. ²⁴ Gracias, i que ñee Dios je cote ra. Mbichae que esiquio uchimbaaquiato je cote ra. —¡Co jë! Jëu. Serete rã ño mbichae riquio ji co re. Jeni ño nda serete riquio ji cote. Co jëu mose, jendua ndua bei quia serese, i que Jesús mbichae mondo ee ra. ²⁵ Quiaru jare que Jesús eyuquia rirõ cote ra. Ñee ñgue uchimbaaquiato je cote ra. —Seruqui rã ño uva rique co re. Mbia icuã mbutiã sacua tuchi chõ seruqui re. Dios cheẽ yasu rui si chõ seruqui riqui nguiã mbia icuã mbutiã co. Co mbei mbei mose, jendua ndua bei quia serese, i que Jesús ee ra. ²⁶ Jë co mbichae u mose, jë uva rique mbei mose, Santa Cena, i chõ nguiã ũqui je. Jë Santa Cena naa naa mose, Jesucristo mano nenei nenei ño nguiã mbia je ũqui. Santa Cena jësaã saã mbei quia Jesucristo tu mose chee.

Jendua tuchi Jesús rete rese Santa Cena u mose

²⁷ Emo Santa Cena naa icuã icuã mose, ũqui siqui icuã icuã ño nguiã Jesucristo rete je ũqui. ũqui siqui icuã icuã ño nguiã Jesucristo ruqui je ũqui no. ²⁸ Nyebe nanden-dua ndua tuchi quiato quia Santa Cena naa nonde. ²⁹ Emo Santa Cena naa icuã icuã mose, emo ndua eã mose Jesucristo rete rese, ũqui nda Dios mbasi. ³⁰ ũqui je chõ

jendasi rasi bei riqui nguiã. ũqui je chõ jëingo nguiã mano mano tuchi. ³¹ Nande ae nandereco nandeicua jiri ae. Eĩ nda Dios nandembasiã cote. ³² Jesucristo nandembasi mose, nandemundua sacua ño ũqui nde. Nandembitirõ sacua ño cote re. Dios nandemombo eã sacua tata cuasu chõ ũqui nde. Jesús quiatoã mombo mose tata cuasu.

³³ Nyebe aico nguiã ñee nyecua jëje co. Jë Santa Cena naa naa mose, jeñumunua nua turã ño. Jëingo turã ño jenyue. Jenyisaarõ turã ja chõ Santa Cena u nonde. ³⁴ Jemo niacuã siqui mose, sã quiaru uchuchua, Santa Cena naa nonde. Eĩ jenye mose, Dios ra siqui turã jëje cote, jeñumunua nua mose. Sesu mose jendea ra secheẽ ataque asenei jëje cote.

12

Espíritu Turã ño nandehisaã saã sacua mondo nguiã nande ae ae je

¹ Espiritu Turã ñgue mbae mee jaaja nande ae ae je ra. —Co esaã nde, co rese eico nde, i jaaja que nande je ra. ũqui ndese taembiirandu cote. ² Dios abareã ndese que jëingo tuchi nyii ra. Mbia que jëingo tuchi dios abareã tubiriã ndese nyii ra. Dios abareã aba cheẽ andu aroneãte. ũqui jëingo Jesucristo rese ũqui cote. ³ Ñndese jendua tuchi: —Jesús icuãte riqui Dios je co, i mose emo, echeẽ ae chõ ũqui nde. Espiritu Turã embucheẽ eã ño nguiã ũqui. —Jesús rei Dios tuchi, i mose emo, echeẽ ae eã ño ũqui nde. Espiritu Turã ño embucheẽ nguiã ũqui.

⁴⁻⁶ —Co esaã nde, co rese eico nde, i jaaja que Dios nande ae ae je ra. Espiritu Turã mii ño siqui bei nguiã nande ja rese co. Jesucristo mii ño siqui nguiã nanderese co. Jesucristo mo eãte emo. Dios mii ño siqui nguiã nandembuquirãcuã co no. Dios mo eãte emo. ⁷ Espiritu Turã uquirãcuã teacuquia chõ nguiã nande ae ae je co. Nandeico turã ja tuchi sacua Dios rese. ⁸ Espiritu Turã mii ño siqui nguiã co. Hue rĩ ja eã ño eriqui nguiã uquirãcuã mee nande je. —Nde ra erecheẽ aracua bei quia, i chõ nguiã nandemo je. —Nde ra mbia erembaaquiato turã mbei quia, i chõ nguiã

nandemo je no. ⁹ —Jesucristo ra ereicua tuchi quia nde, i chõ nguiã nandemo je co no. —Mbia rasi ra erembucherõ cherõ mbei quia nde, i chõ nguiã nandemo je co no. ¹⁰ —Mbia mae sayã nda eresaã saã mbei quia nde, i chõ nguiã nandemo je co no. —Dios cheẽ nda eresenei senei tuchi quia mbia je nde, i chõ nguiã nandemo je co no. —Espíritu eicua icua bei quia nde. Eturã icua. Eicua abe icua no, i chõ nguiã nandemo je co no. —Mbiamo ñee esaã saã tuchi quia nde. Mbia cheẽ chumumbara, i chõ nguiã nandemo je co no. —Mbia cheẽ mo eicua icua quia mbia je, i chõ nguiã nandemo je co no. ¹¹ Eĩ ño Espíritu Turã mii nguiã ucheẽ mbuchao chao nande je co. Nandechisaã saã sacua mee mee nande ae ae je co. Eĩ ño Espíritu Turã mii nguiã uquirãcuã mbuchao chao nande je co no. —Co esaã nde, co esaã nde no, i chõ nguiã nande ae ae je co.

Mbae mii na ño nandeico nguiã nande ja

¹² Jesús rete rã ño nandeico nguiã nande ã. Nande tubiriãte raque Jesús quiato. Sã aba rete resenda tubiriãte no. Eresa. Erie. Eo. Erete mii ndaque. Eĩ ño nande no nde. Jesús rete mii na. ¹³ Jesús rete rã ja chõ nande re. Erete mii na ño nande ja re. Judíos mo ño nandeico nguiã nande ã. Judíos eã abe mo ño nandeico nguiã ã no. Mbia rimba mo abe abe nandeico ã no. Mbia rimba eã mo abe abe nandeico ã no. Mbae mii na ño nandeico nguiã Jesús quiato ja ã. Erete mii na. Eĩ ño Espíritu Turã mii nguiã nandemingo ã.

¹⁴ Nanderete mii ae siqui ãte. Nanderete resenda tubiriãte riqui ã. ¹⁵ Nandei achõ ñee aroneate. —Eo eã ñochĩ se. Nyebe erete resenda eã se re, i aroneate nandei ñee. Nanderete resenda bei chõ nandei re. ¹⁶ Nandeisa achõ ñee aroneate. —Eresa eã ñochĩ se. Nyebe erete resenda eã se re, i aroneate nandeisa ñee. Nanderete resenda bei chõ nandeisa re. ¹⁷ Nanderesa achõ mose nanderete resenda, i nda nandeico rei mbae anuate co. Nandeisa achõ mose nanderete resenda, i nda nandeico rei mbae retõ ãte co. ¹⁸ Dios ae que nanderete resenda mii ja ja cose ra. —Co tamii a, co abe tamii a no, i jaaja que nanderete resenda mii mii nda. ¹⁹ Nanderete resenda mii mose,

eĩ ndei ra nanderete eãte. ²⁰ Nanderete resenda ja que Dios mee nande je ra. Nanderete resenda tubiriãte raque. Nanderete mii tuchi chõ ñene. ²¹ —Arerecoã nda se, i aroneate nanderesa ñee nandeo je. —Arerecoã nda se, i aroneate nandeaquĩ nandei je no. ²² Ae nanderete resenda ñetẽ tuchi nae, ae nanderete resenda quirãcuã nea tuchi nae, uquĩ nguiarei nandechireco tuchi. ²³ Ae nanderete resenda aba ireĩte nae, uquĩ nandetea quiatu chõ nguiã. Nandechati turã ño nguiã. ²⁴ Ae nanderete resenda checuate riqui nae, uquĩ nguiatu nandechatiã nguiã. Dios que nanderete resenda saã turã ja ra. Ae nanderete resenda aba ireĩte nae, uquĩ quiatu aba queteamba re. ²⁵ Nyebe nanderete resenda riqui nguiã ñee aroneate nanderete resenda nongue je. —Arerecoã nda se, i aroneate ee. Nyebe nanderete resenda riqui nguiã siqui turã ja nyiese. ²⁶ Nanderete resenda mo ndasi mose, nanderete mbasi ja chõ nguiã. Nande ñee turã mose nanderete resenda mo je, nanderete ia ja tuchi ra erese.

²⁷ ã ño secheẽ tuchi ã nde: Cristo rete rã ño nandeico ja nguiã nande ã. Cristo rete resenda rã ja chõ nandeico nguiã nande ae ae ã. ²⁸ —Co esaã nde, co rese eico nde, i jaaja chõ Dios nguiã iglesia jenda uquiato je ã. —Cristo chimbaaquiato tuchi chõ nde re, i chõ nguiã emo je. —Secheẽ nenei neneisa chõ nde re, i chõ nguiã emo je no. —Mbia mbaaquiatusa chõ nde re, i chõ nguiã emo je no. —Mbia mae sayã esaã saã nguia nde, i chõ nguiã emo je no. —Mbia rasi embucherõ cherõ nguia nde, i chõ nguiã emo je no. —Ayudante eico nde, i chõ nguiã emo je no. —Iglesia rerecuarã nde, i chõ nguiã emo je no. —Mbia cheemo esaã saã nguia nde, i chõ nguiã emo je no. ²⁹ Cristo chimbaaquiato ja eã ño nande re. Dios cheẽ nenei neneisa ja eã ño nande no nde. Mbia mbaaquiatusa ja eã ño nande no nde. Mbia mae sayã naa naasa ja eã ño nande no nde. ³⁰ Mbia rasi mbucherõ cherõsa ja eã ño nande no nde. Mbia cheemo naa naasa ja eã ño nande no nde. Mbia cheemo mbiasa asasa ja eã ño nande no nde. ³¹ Nandechẽ ño Dios je. —Ndequirãcuã emee na seje. Ae je erecheẽ ñee ure je, eĩ nda uquĩ mo asaã saã se abe,

nande quia ñee Dios je. Mbae turã tuchi mo tasenei na jêje.

13

Nandechesecua eã mose, Dios chirirõ ño nande re

¹ Se nyesecua eã mose mbia rese, secheẽ iru iru beite ra eriqui. Mbia cheẽ nda aicua ja raque. Angeles cheẽ abe ra aicua raque no. ² Se nyesecua eã mose mbia rese, mbae turã mo naasa eã ño se re. Dios cheẽ nda ambuchecua checua tuchi raque. Se ra mbae aicua ja raque. Se ra Dios aicua tuchi raque. Ibi ibate mo nda arusuri raque Dios quirãcuã je. ³ Se nyesecua eã mose mbia rese, aico chooño mbei chõ nda se. Sembae ra amee ja raque mbia mbaecha reã je. Mbia ra serei raque, se Dios cheẽ nenei nenei mose.

⁴ Ae nyesecuate quia mbia rese nae, ñquĩ nguia siqui minguate nguia mbia je ã. Ñquĩ nguia eturãte riqui nguia mbia je co. Ñquĩ nguia mae icuã icuã eãte nguia emo mbae rese ã. Ñquĩ nguia “seaquiato tuchite se”, iãte nguia co. ⁵ Ae nyesecua quia mbia rese nae, ñquĩ nguia “se quiatu”, iãte nguia mbae mo je. Ae aba ireite nae, ñquĩ mo esaã saã eãte quia co. Ae nyesecua quia mbia rese nae, ñquĩ nguia paama i jei jei eãte nguia ã. Ñquĩ nguia ndua icuã icuã eãte nguia emo icuã mose ee ã. ⁶ Ae nyesecua quia mbia rese nae, ñquĩ nguia eya eãte riqui nguia, emo mbae icuã naa mose ã. Emo mbae turã naa mose quia eyate riqui nguia ã. ⁷ Ae nyesecua quia mbia rese nae, ñquĩ ñimbirãcuã ño nguia mbae ja je ã. — Hchõ:ño nguia, iã ño nguia mbia cheẽ je. Siqui tochi chõ nguia.

⁸ Dios quiato ra nyesecua bei mbia rese, mbae ua ja chee. Dios cheẽ nda nandesenei senei eã emo mose cote. Mbia cheẽ ata mo nda nandesã eã emo mose cote. Mbia mbaaquiatusa mo eã nda emo mose cote. Ñquĩ nda ua ja chee. Dios quiato quiatu ra nyesecua bei quia. ⁹⁻¹⁰ Mbae mii mii ño nandecua icua nguia namo ã. Jesús tu mose quia ra mbae mii nandecua eã cote. Dios cheẽ mite nandesenei senei nguia namo ã. Jesús tu mose quia ra mbae nandecua ja cote. ¹¹ Señetẽ mose que aico

ñee ñee mbia riirĩ na nda. Mbia riirĩ na ño ngue aico ndua ndua señetẽ mose ra. Mbae que aicua icua chõ nguia mbia riirĩ na no nda. Secuasu mose que señetẽ mosenda asecha ja cote ra. ¹² Mbae cuu rese mae naanguia chõ nandecua nguia mae namo. Jesús tu mose quiatu ra mbae checua ja nande je cote. Mbae mii mii ño aicua icua nguia namo co. Jesús tu mose quia ra mbae aicua ja cote. ¹³ ã nandecua Dios icuate ã. ã nandecua Jesucristo ru raarõ arõ ã. ã nandecua nyesecua jate mbia rese ã. Nandechesecua mose quiarei, ñquĩ eturã tuchi mbae ja si.

14

Mbiamo cheẽ naa naa mose

¹ ¡Jenyesequase tuchi quiatu quia mbia rese jê! Jeñee ño nguia Dios je. —Paba, ndequirãcuã emee na seje. Mbae raã naa sacuã ndeje, jenye bei chõ nguia Dios je. — Ndecheẽ asenei senei sete ndequirãcuã je, jenye chõ nguia ee. ² Jesús quiato mo mbiamo cheẽ naa naa mose, mbia ra eicuayã jate. Dios mii ño nda eicua nguia. Dios mii je chõ eriqui nguia ñee. Uchue si chõ eriqui nguia ñee. Mbia quia echeẽ icuayãte nguia. ³ Ae Dios cheẽ senei senei nguia, ñquĩ nguia ñee nyecuate nguia mbia je. Ñquĩ nguia mbia mbaaracua turãte nguia Jesucristo riĩ. Ñquĩ nguia mbia mingo uquia tuchi nguia Jesucristo rese no. Ñquĩ nguia mbia tuchi nguia Jesucristo rese no. ⁴ Ae mbiamo cheẽ saã saã nguia nae, mbia mingo uquia reã ño nguia Jesucristo rese. Ae ae umingo uquia nguia erese. Ae Dios cheẽ senei senei nguia nae, ñquĩ nguia Jesús quiato mingo uquiate nguia Jesús rese. ⁵ Mbiamo cheẽ nda jesaã aquiato ja raquete seje chã. Dios cheẽ nenei nenei aquiato mose, ñquĩ nguia eturã tuchi re. Ñquĩ nguia eturã tuchi mbiamo cheẽ naa naa si re. Ae mbiamo cheẽ saã saã nguia nae, aque ucheẽ mbiasa mose Jesús quiato je, eturã ño ñquĩ no nde. Jesús quiato mingo uquia chõ nguia Jesús rese ñquĩ.

⁶ Se mbiamo cheẽ naa naa mose jêje, ñquĩ nda jemingo uquia reãte Dios rese. Se ñee nyecua mose jêje, ñquĩ nguia eturãte

re. Ae rese Dios sembiirandu nae, ũquĩ nenei nenei mose jēje, ũquĩ nguia eturāte re. Se Dios cheē mbuchecua tuchi mose jēje, ũquĩ nguia eturāte no nde. Se Dios cheē icua icua tuchi mose jēje, ũquĩ nguia eturāte no nde. Mbiamo cheē naa naa si.
⁷ Sã música no. Emo flauta mbucheē icuā icuā mose, mbia ra tonada icuayāte. Emo guitarra mbucheē icuā icuā mose, mbia ra tonada icuayā no. ⁸ Sã soldados no. Emo corneta mbucheē icuā icuā mose, soldados ra icoquiata. ⁹ Eĩ si chõ jē no nde. Jē mbiamo cheē naa naa mose, mbia ra jeñee icuayāte. Jē mbiamo cheē naa naa mose, mbia eāsa ñee ñee na ño ũquĩ nde. ¹⁰ Mbia cheē ñumumarate eriqui rei. Ucheē ae raā naa mose, echeuate ee. ¹¹ Emo ucheē naa naa mose seje, se icuayā mose, mbiamo ño aico nguia ee. Mbiamo ño ae riqui nguia seje no. ¹² Espiritu Turā quirācuā jenyosei tuchi quia reae. Coche tuchi chõ ũquĩ nde. Jesús quiato mingo tuchi sacuā Jesús rese chõ equirācuā jenyosei jē.

¹³ Nde mbiamo cheē naa naa mose Jesús quiato je, echeē na Dios je. —Paba, ndequirācuā emee na seje. Secheē mbiasa sacuā mbia je, ere chõ Dios je. ¹⁴ Se mbiamo cheē naa mose Dios je, acheē ñee ndaque Dios je. Mañi ae quiatu ñi se quia ñee ee. ¹⁵ Mbiamo cheē abe ra asaã saã ndaque Dios je. Secheē abe ra asaã saã ee no. Mbia secheē icua ja sacuā. Mbiamo cheē abe ra asaã saã se irasei rasei mose. Secheē abe ra asaã saã se irasei rasei mose no. ¹⁶ Nde mbiamo cheē naa naa mose Dios je, mbia ra ndecheē icuayāte. Ae equiatuāte, ũquĩ nda ndecheē icuayāte. Nyebe eriqui nguia ñee aroneate Dios je nderese. Nyebe nandechēē sí chõ nandesaã Dios je. ¹⁷ Coche jēingo nguia ñee Dios je. Jeñee sí quia nda aba saã Dios je re. Jē mbiamo cheē naa naa mose ee, jendesenda quia nda jeñee icuayāte nguia. ũquĩ mose ra jendesenda jemingo uquia reāte Jesús rese. ¹⁸ Mbiamo cheē aicua tuchite raque quia jēsi co. Gracias, aete raque quia Dios je ũquĩ ñi co. ¹⁹ Dios quiato ñumunua mose, acheē nyecuase rete ee. Secheē jua chõ ndaque. Cinco palabras. Mbiamo cheē nda asaã eā ee. Mbiamo cheē icuayāte quia ñene. Emo nda ñee oco raque ee, icuayāte

rae.

²⁰ Mbia riirĩ naate ra jēingochĩ, Sere-senda. Jendua quiatu secheē ndese mbia cuasu rã. Coche jēingo nguia mbia riirĩ na mbae icuā naa ndocoĩ. ²¹ Ā ndei Dios cheē mbesa ji ā:

Mbiamo tamondo rei secheē nenei nenei sacuā ā serimba je.

Secheē nda esenei senei ndei serimba je mbiamo cheē je.

Aquere ra serimba secheē mumba i i tuchi querabe, i que Dios ra,

i que embesa ji ra. ²² Jemo mbiamo cheē naa naa mose, Jesús quiatoā mundua

sacuā Dios rese chõ ũquĩ nde. Jē Dios cheē nenei nenei mose, Jesús quiato mundua sacuā ño Dios rese chõ ũquĩ no nde. ²³ Jesús quiato ñumunua nua mose u, sã mbiamo cheē naa naa ja eā u. Jē mbiamo cheē naa naa ja mose ra Jesús quiatoā ñee jēje.

“Earacuayā” i ra ique mose mae jendese. ²⁴ Coche jēingo nguia Dios cheē nenei nenei ja jeñumunua mose. Jesús quiatoā mo ique mose jendea, ndua ndua tuchi ra huicua ndese. —Seicuā tuchi chõ aico se re, i ra jeñee andu mose. ²⁵ Ae rese ndua ndua uchiangui renda icuā nae, Espiritu Turā ae ra ũquĩ mbuchecua checua nguia ee. Nyebe ra ngoi ngüiā ndese ñee turā Dios je. —Dios riqui tuchi jendese a, i ra ñee jēje.

Mbae jēsaã turā turā ja chõ nguia jeñumunua nua mose

²⁶ —Eĩ jenye quiatu quia ñumunua Jesús riĩ, ae ra jēje cote. Emo irasei rasei. Emo mbia mbaaquiato quiatu Jesús riĩ. Emo Dios cheē icua icua mbia je no. Emo mbiamo cheē naa naa no. Emo mbiamo cheē mbiasa asa ee no. Jenyuuru uru chõ nguia. Mbia mingo ja sacuā Dios rese chõ ũquĩ nde. ²⁷ Mbiamo cheē jēsaã saã mose ñumunua mose, jē nyeremoño ño jeñee ñee. Jenyuuru uru chõ nguia. Sã emo ndiqui echeē mbiasa asa. ²⁸ Jemo echeemo mbiasa aquiata mose, mbiamo cheē nda jēsaã saãchĩ, jeñumunua mose. Jeñumunua eā mose quiatu mbiamo cheē jēsaã saã jē ae Dios je. ²⁹ Ae ra Dios cheē senei senei mbia chumunua mose nae, sã nyeremoño ño ñee. Sã eataque ndua ndua ũquĩ ñee ndese. Eĩ ngue ra, i sacuā. Eĩ eā ngue ra,

i sacuã abe echeẽ icuã mose no. ³⁰ Emo chi mose Jesús quiato ataque mbaa quiatu quiatu, emo nda ñeechi echeẽ cúaa. —Nde abe ã embuchecua mbia je, i mose Dios emo je, sã ñiinda ñee ja rã nyii. ³¹ —Nde abe ã embuchecua mbia je, i mose Dios jemo je, jenyuuru uru chõ nguia ñee. Mbiam Dios cheẽ icua ja sacuã. Mbiam siqui tuchi sacuã Dios rese. ³² —Nde abe ã embuchecua mbia je, i mose Dios emo je, sã emo ndaarõ mbirĩ na huĩ, emo chi mose Dios cheẽ nenei nenei. ³³ Jemo ñee mose jenongue cheẽ cúaa, Dios biãte ũquĩ. Jeñee turã mose nyuuru uru, ũquĩ nguia Dios bite re. Eĩ ja chõ Dios quiato nguia iglesia jenda ja. ³⁴ Jeñumunua nua mose Dios rĩ, cuña mo nda ñeechi. Eĩ si que Moisés chimbesa no nda. Sã cuña ndiqui mbiam cheẽ mumbayã mbei. ³⁵ —Ũquĩ embuchecua seje, i aroneate cuña ñee mbiam chumunua mose. Uchuchua quia cuña ñee ngu je, ñimbaaquiatuse mose. Cuña mo ñee aroneate Jesús quiato chumunua nua ite re. ³⁶ —Ichõiño nguia ¿jenye quia secheẽ mose re? Jẽ nane je eã ngue Dios ñee ndesẽ. Jẽ mii je eã ngue Dios ñee ndesẽ.

³⁷ Secheẽ ae eã ambesa nguia jẽje co. Dios cheẽ ño ambesa nguia jẽje. —Dios que uquirãcuã mee seje ra. Ucheẽ nenei nenei sacuã, i mose jemo ñee, sã ũquĩ nane ñee serĩ. —Dios cheẽ tuchi chõ Pablo senei senei nguia, sã i serĩ. ³⁸ Ũquĩ secheẽ isi sereã mose, jẽhui chõ esi. Sã eaquiataũ ae riqui. ³⁹ ¡Dios cheẽ jẽsenei seneise tuchi quiatu jẽ! Jemo mbiamo cheẽ naa naa mose ¡echeẽ nda jẽsiquisã quisãchi jẽ! ⁴⁰ ¡Mbae jẽsaã turã turã ja chõ nguia jeñumunua nua mose jẽ! Jenyuuru uru turã ño nguia.

15

Cristo quera si mose

¹ Dios cheẽ turã ngue asenei senei nguia jẽje Jesucristo rĩ nae, ũquĩ sí rese chõ aico nguia jemundua ndua co. Ũquĩ ngue jẽisi turãte. Jẽingo beite ũquĩ ndese ũquĩ. ² Ũquĩ ndiqui jẽingo beite ũquĩ, jẽtesareia mose secheẽ si. Ũquĩ jẽingo Jesucristo icua iruã ũquĩ. ³ Ae Dios senei senei seje nae, ũquĩ nane ngue asenei senei jẽje ra: Jesucristo

que mano nandeicuã ndiquicharõ. Embesa ji cheẽ nguire. ⁴ Mbiam que echati rei. Tres días mose que quera si. Embesa ji cheẽ nguire. ⁵ Quera si mose que nyecua Pedro je. Aquere que nyecua uchimbaaquiatu doce je cote. ⁶ Quinientos uquiato je que nyecua cote. Hue equiato chi ja mose ñumunua. Ũquĩ tubiriãte riqui ã. Emo emo ngue mano nda. ⁷ Nyecua que Jacobo abe je cote no. Aquere que nyecua uchimbaaquiatu jaje cote. ⁸ Nyecua nyecua jare mbiam je que nyecua chee se abe je cote ra. Sã cuña ndiqui erã mo mbua no, ũquĩ na si chõ aico rei nguia se co. ⁹ Se quia señetẽ jiri riqui nguia Jesús chimbaaquiatu ataque si co. —Jesús chimbaaquiatu chõ se re, ae eã jiri quia co. Seicuã tuchi quiatu ngue Dios quiato je nyii re. ¹⁰ Dios turã ae semingo turã nguia co cote. Dios turã ñooño eã ño eriqui nguia seje co. Se abe que serecoteã jiri riqui nguia Jesús rese echimbaaquiatu ataque si ra. Mbae raã naa Jesús je. Se ae eã ño ngue aico nguia mbae rese. Dios turã ae ngue semingo nguia mbae rese. ¹¹ —Aba Dios cheẽ senei senei tuchite quia reae, ure ãte equia co. Ũquã ñene. Uresenei senei ja chõ equia ã ndesẽ. Jẽ ngue urechisenei senei jẽisi turãte quia resẽ.

Mbiam raaque quera si mose

¹² —Cristo que quera si manonde ra, ure que equia erenei nenei jẽje. Urecheẽ ngue jẽisi turã ndei nyii. ¿Mbaerã jemo ndiqui ñee cote re? —Mbiam raaque ra querayã mbei, i cote re. ¹³ ¿Cristo raaque bei namo nde? —Mbiam raaque ra querayã mbei, jenyemose, ¿mañi Cristo raaque quera re no? ¹⁴ Cristo raaque quera si eã mose, eĩ nda ureico rei echeẽ nenei nenei iru chõ. Eĩ nda Jesucristo jẽicua iru chõ ndei. ¹⁵ Cristo raaque quera si eã mose, eĩ nda ureico rei ñee ñooño Dios rĩ mbiam je. —Dios que Cristo mbuquera si ra, ure bei equia ã ndesẽ. Mbiam raaque quera si eã mose, i nda Dios Jesucristo raaque mbuquera si eã ndei no. ¹⁶ Mbiam raaque querayã mose, eĩ nda Cristo raaque quera eãte rei no. ¹⁷ Cristo raaque quera eã mose, eĩ nda jẽingo rei Cristo icua iru no. Eĩ nda jẽingo rei jẽicuã nderequia

beite no. ¹⁸ Eĩ nda Cristo quiato quiachã mbei rei manonde no. ¹⁹ A mii eã ño Cristo riqui nguiã nanderese. Nandemanonde abe ra eriqui bei nanderese no. A mii mose, eĩ nda nandeya eã tuchite riqui rei mbia mo si no. ²⁰ Cristo que quera si ra. Ae bei tuchi. Ae rane ngue quera nyii ra. Nyebe ra mbia abe quera si eraã si cote no. ²¹ Adán mii nane ngue mano huicuã je cose ra. Nyebe nandeco nguiã mano mano mbei cote. Eĩ si chõ Cristo mii quera si nguiã cote. Nyebe ra uquiato mbuquera si ja cote. ²² Sã nandeco mano mano ja Adán ndui ã no, eĩ si ra Cristo nandembuquera quera no. ²³ Dios que Cristo rane mbuquera nandesi ra. Cristo tube mose, uquiato raaque ra embuquera ja cote. ²⁴ Cristo tube mose ra mbae ibi jenda ua ja cote. Mbia mo nda siquiã ererecua cote. Cristo ra mbae mee ja Dios je cote. Cristo ra mbia rerecua mbutiã ja cote. ²⁵ Ererecuarã tuchi ra Cristo cote. Uquiatoã nda embuquiachã ja tuchi chee cote, ae siqui mose ererecuarã. ²⁶ Mbia mano mano mose, Cristo biãte ũqui. ũqui abe ra Cristo mbuquiachã tuchi mbia si cote. Mbae icuã ataque ra embuquiachã ja rã nyii. ²⁷ Dios que mbae mee ja Cristo je ra. Cristo mbae rerecua ja tuchi sacua. — Cristo ra mbae rerecua ja tuchi, i ñi embesa ji re. Dios rerecua eã ndaque. Mbae ja rerecua chõ nda Cristo. ²⁸ Dios mbae mee ja mose Cristo je, Cristo ra ñimee Dios je cote no. Eriirĩte quia ñene. Eĩ nda Dios mbia rerecua ja tuchi cote.

²⁹ Emo emo ño bautizar i nguiã eraaque riĩ ũqui. Eraaque quera si eã mose ¿mbaerã ũqui ndiqui bautizar i eraaque riĩ nde? ³⁰ Mbia raaque quera eã mose, eĩ nda ureico rei Dios cheẽ nenei nenei ãte mbia je co. Eĩ nda mbia riqui rei ureiquia serĩ serĩ ãte. ³¹ Mbia “taiquia” i bei beite quia seje ã. Acheẽ ñoño eãte jẽje. Sã seyate riqui jendese co no. ³² Nyacua rã tuchi que Efeso jenda riqui seje ra. ũqui ngue asiquisã tuchi rei quia ñee nda. Eĩ nda asiquisã quisã iru rei no, mbia raaque quera eã mose. Mbia raaque quera eã mose, eĩ nda nandeco rei ñee. —Mbae nandembei choño. Mbae nandeu choño. Mano mbei cote, i. ³³ —Eĩ jenyete quiatu jichĩ nda mbia

jembĩrĩrĩrĩ jẽ! Jeingo mose mbia icuã ndese, jembĩcuã icuã nda jẽ abe cote. ³⁴ Jendua quiatu. Mbae turã nguiatu jẽsaã saã nguia. Mbae icuã jẽsaã eã nguiatu quia. Jemo emo ndiqui Dios icuayãte ũqui. Aba ireĩ tuchi quiarei ũqui.

Jesús quiato rete yasu ja ra cote

³⁵ Jemo nda ñee ndei. —¿Mañi nda eraque quera si re? ¿Mañi nda erete cote re? i ra jemo ñee ndeae. ³⁶ Ndua eã ño nguiã ũqui. Sã nandeco mbae eĩ tiquia no. Mbae eĩ nda soõ suri sacua cote. Eĩ si chõ nda nanderete soõ nandemano mose. Nanderete yasu sacua cote. ³⁷ Sã nandeco mbae eĩ tiquia no. Ei ra nandechitiquiayã. Ieĩ achõ ño nandechitiquia nguiã. Quiata a eĩ. Mbaemo eĩ abe no. Ei quia nda suri nguiã cote. ³⁸ —I ño nda ndei, i chõ Dios nguiã mbae eĩ jaje. ³⁹ Nanderete rã ño mbae eĩ nde. Eĩ ja eã ño mbae rete re. Emo ño mbia rete no nde. Emo ño quiaa riĩnda rete no nde. Ae mbebe quia, erete ae chõ ũqui no nde. Sira ae erete mo no nde. ⁴⁰ Ibatenda ae rei erete mo no. Ibi jenda ae erete mo no. Ibatenda ae rei erete turã mo no. Ibi jenda ae rei erete turã mo no. Eĩ ja eã ño mbae rete re. ⁴¹ Nyasi rendi rã eã ño tenda rendi re. Nyasi tata rendi rã eã abe no. Nyasi tata rendi chiabi abi chõ eno nde. Erendi turã ja raque.

⁴² Eĩ si chõ mbia raaque quera je re. Ae mbia raaque nandechitiquia quia nae, ũqui ndei soõ je ũqui. Ae ra quera si nae, ũqui nda soõ eã mbei cote. Manoa mbei ra eno. ⁴³ Ae nandechitiquia quia nae, eraaque tuchi chõ ũqui nde. Ae ra quera si nae, enininya tuchi chõ ũqui cote re. Etiquia mose, equirãcuã nea tuchi chõ aque mose re. Equera si mose, equirãcuã tuchi chõ aque mose cote re. ⁴⁴ Ñ nanderete nandereco ã nae, erete achõ ño ũqui nde. Quera si mose ra nyiicabo tuchi cote. Mbae ibi jenda ra mano ja. Ae ibi jenda eã nae, ũqui nda manoa no. ⁴⁵ Ñ ndei embesa ji cheẽ ã: “Ae Dios chao Adán nyii nae, aque reco que siqui rei nyii ra”, i que embesa ji ra. Ae tu Adán ndui Jesucristo, mbia mingo beisa rei aque. ⁴⁶ Ñ nanderete nandereco ã nae, mano mano mbei arõte. ũqui nane

nandereco nanderete ã. Aquere quiatu ra nanderetemo nandereco cote. Manoa mbei sacua cote. ⁴⁷ Ae Dios chao Adán nyii nae, ibi je chõ eao nguiã nyii. Nyebe ibi jenda bei ae re. Ae tu Adán ndui nae, Jesucristo i equia ee nae, ibatenda chõ aque re. ⁴⁸ ã nanderete nandereco ã nae, Adán ndete rã si chõ nanderete nandereco nguiã ã. Ibi jenda chõ ã nanderete re. Ae nanderete ra quera si nae, ibatenda rete rã ño nda ùqui cote. ⁴⁹ Ae Dios chao ibi je nyii nae, Adán i equia ee nae, aque rã si chõ nandeico nguiã nande abe namo ã. Aquere ra nandeico ibatenda rete rã cote. ⁵⁰ Nanderoo achõ ño nanderete re. Nanderuqui abe no. Ùqui oso aroneate ibate Dios récuua. Ae mano nguia soõ nae, ùqui nyoï aroneate Dios récuua. Ae mbia riqui manoa mbeite nae, huee nanderoo oso aroneate.

⁵¹ Ae rese mbia riqui jiranuate nae, ùqui tasenei na jêje. Nandemano ja eã ndae. Nandechiicabo ja chõ ndae. ⁵² Corneta pu i mose ra Dios nanderete mbuchiicabo asi cote. Nanderesa pirirã i rã nda Dios nanderete mbuchiicabo asi. Corneta pu i mose ra eraaque abe quera si manoa mbei nonde cote. Aque mose ra nandechiicabo bei nande abe cote. ⁵³ Ae nanderete nandereco namo ã nae, ã nda nyiicabo tuchi cote. Manoa mbei sacua cote. Soõ eã mbei nonde cote. ⁵⁴ Nanderete nyiicabo mose, ùqui mose ra embesa ji cheë io cote: “Nandemano ngue ua tuchi cote ra”, i ñi embesa ji re. ⁵⁵ Nanderasi ra nandeiquiayã cote. Ibicua ra nanderaaroã cote. ⁵⁶ Nandeicuã ño nandemano mbu uquia nguiã nande je co. Moisés chimbesa chõ nandeicuã mbuchecua nguiã nande je co. ⁵⁷ Dios ra nandemano siquisã mbei nandesï cote Jesucristo rii. Nyebe nandeico nguiã gracias i tuchi Dios je ã cote. ⁵⁸ Seresenda jëñimbirãcuã tuchi quiatu quia jê! ¡Jesucristo rese jëingo bei quiatu quia jê! ¡Echeë jësenei senei mbei tuchi quiatu quia jê! Ae jësaã saã nguia Jesucristo rese nae, jësaã iru iruã ño nguiã ùqui.

16

Ofrenda jembae jendecoquiato, i Pablo

¹ Ae ofrenda ra jemondo Jesús icuasa je nae, ùqui tasenei jêje. Acheë ngue Jesús quiato je ra. Galacia jenda je ra. Eraã si chõ jëingo ae. ² Domingo mose bei jëingo mbae rerecúe cúe ae. Ofrendar ã. Ae mbae isi atate quia, sã aque mbae rerecúe ata jiri ae. Ae mbae isi mite quia, sã aque co mii jiri rerecúe ofrendarã ae. Ùqui jemu-nua ino seso nonde jendea ae. Eï mose ra ofrendarã jësaã eã seico mose jendese cote. ³ Secuasë mose huee, jëñimondo sacua mo jëirabo ino, ofrenda rerao sacua. Cartas nandemondo ùqui oo. Ofrenda rese. Ùqui nda amondo Jerusalén ña. Ofrenda rerao sacua hue jenda Jesús quiato je. ⁴ Ofrenda tubiriã mose ra aso se abe erese.

Aso ra jendea, i Pablo

⁵ Macedonia ñi nane nda acua. Aquere ra aso ngasë jêje cote. ⁶ Aico arete jiri ra jendese huee reae. Ama mose bei ra aico jendese huee reae. Eï jenye nda sembucua turã mondo cote, seso mose mbaranguiti. ⁷ Amaeño sereãte jendese secua mose. Aico arese rete jendese huee, Dios eno i mose seje. ⁸ Efeso taico are rã nyii. Fiesta de Pentecostés mose. ⁹ Dios cheë asenei senei arõ tuchite mbia je a. Mbia seanduse rete. Emo emo icuã icuãte riqui Dios cheë nenei nenei mose seje ã no.

¹⁰ Timoteo ngasë mose jêje ¡jëisi turã ño jê! ¡sã eirei nguiã tuchi jësi jê! Se rã si chõ eriqui bei nguiã Dios cheë nenei nenei mbia je aque. ¹¹ ¡Nyebe jemo Timoteo isiteã eã jê! ¡Jembucua turã ño imbu seje jê! Aico eraarõ arõ tuchi se a. Nanderesenda ataque rese.

¹² Acheë ndei que nanderesenda Apolos je ra. —Nde abe eso erea, ae rei que ee jeni nda. Oso sereã ngue namo nda. Oso mose quia nda esi nguiã jendea cote.

Pablo ñee hui bei

¹³ ¡Jendua tuchi quiatu quia jê! ¡Jesucristo jëicua tuchi quiatu quia jê! ¡Jësiquicheã tuchi quiatu quia jê! ¡Jëquirãcuã tuchi quiatu quia jê! ¹⁴ ¡Mbia rese jenyesequa tuchi quiatu quia mbae raã naa mose jê! ¹⁵ Seresenda, jëingo Estéfanos chuchua jenda icua jate ùqui. Ùqui nane tuchi ngue Jesús icua Acaya jenda nyii nae.

Ũquĩ ndiqui mbae mondo mondo bei Jesús quiato je ũquĩ. Ũquĩ ndiqui mbae raã naa mbei Jesús quiato je ũquĩ. ¹⁶ Ũquĩ na si chõ jẽingo. Ũquĩ ñee nda jemumbachĩ. Ae Dios cheẽ senei senei nguia nae jũquĩ ñee nda jemumbachĩ jẽ! ¹⁷ Seya tuchi Estéfanos ngaẽ mose serea. Fortunato abe. Acaico abe. Ũquĩ ngue sembia tuchi ngaẽ jẽingoã mose a ra. Ae jẽsaã aroneate quia seje nae, ũquĩ ño ngue esaã ngaẽ seje a ra. ¹⁸ Ũquĩ ngue sechiã mbucoite Dios rese ra. Jeñia abe mbucoite ereae. Gracias jenyẽ bei ũquĩ je.

¹⁹ Jesús quiato Asia jenda ja chõ saludos mondo quia jẽje aque. Aquila abe saludos mondo quia jẽje aque. Priscila abe. Ae Jesús quiato ñumunua nua nguia ũquĩ nyuchua nae, ũquĩ ja abe saludos mondo quia jẽje Jesucristo rĩĩ aque. ²⁰ Jesús quiato a jenda ja saludos mondo quia jẽje aque. Jenyiquiaama ama ja quiatu quia Jesús rĩĩ.

²¹ Seo je tuchi co saludo ambesa mondo quia jẽje aque. Pablo tuchi chõ se re. ²² Emo nyesequayã mose Jesucristo rese, sã Dios embasi. Echu, Jesucristo. ²³ Jesucristo turã nda siqui jendese chã. ²⁴ Achesequa ja chõ nguiã jendese Jesucristo rĩĩ co. Amén.

SEGUNDA CARTA DEL APOSTOL SAN PABLO A LOS CORINTIOS

Pablo ucheẽ mbesa mondo Corinto jenda je

¹ Pablo chõ se re. Dios chiirabo chõ se re. Jesucristo chimondo chõ se re. Timoteo rese co ambesa mondo quia jêje aque. Jesús quiato Corinto jenda ja je. Acaya jenda ja je abe no. ² Sã Dios uturã mingo tuchi jendese. Sã Dios jembia bei mingo. Sã Jesucristo abe jembia bei mingo.

Pablo mbae rasi saã tuchi

³ Gracias nande bei tuchi quiatu quia Dios je. Jesucristo rute quia ae re. Ae quia eya eãte riqui nguiã nanderese co. Ae chõ nandeya eã mbuquiachã quiachã nguiã co. ⁴ Mbae icuã tu mose ure je chõ Dios riqui nguiã ureya eã mbuquiachã quiachã ure si co. Ure mbia mo mbia sacuã abe chõ ñene. Mbae icuã tu mose ee. ⁵ Cristo rane ngue mbae rasi saã tuchi nyii ra. Mbia urembasi mbasi tuchi quia ure abe Cristo riiã. Cristo riqui urembia tuchi ure abe ãquĩ mose co. ⁶ Ure mbae rasi raã mose, jêje chõ ñene. Ure mbae rasi raã mose nyii, jêingo sacuã Dios rese chõ ñene. † nda jêya bei riqui mbae rasi raã mose. Dios ureya eã mbuquiachã mose, jêya eã mbuquiachã sacuã abe chõ ñene. Eĩ nda jeñimbirãcuã tuchi mbae rasi raã mose. Sã ureico mbae rasi raã ure no. ⁷ —Mbae icuã tu mose ee, ñimbirãcuã turã nda Dios rii, ure beite equia jeniã. Mbae icuã tu mose jêje, Dios ra jêya eã mbuquiachã jêsi. Sã seya eã mbuquiachã sesi no.

⁸ Mbae rasi que uresaã tuchite ureico mose Asia ra. ãquĩ ndese taembiirandu. Mbia que urecuayãte quia ra. Aete ureico ñimbirãcuã eã. —Mbae icuã nda hui eã mbeichi nandesi re, ure rei que equia ra. ⁹ —Mbae icuã nda nandemingoã nyee, ure rei que equia ra. Mbae icuã tuutu bei mose ure je. Ure Dios icua sacuã ño ngue ãquĩ nde. —Nande ae eã ñene, ure i sacuã ño ñene. Sã Dios ae riqui mbia raaque mbuquera uquirãcuã je no. ¹⁰ Mbae icuã ureiquia serĩ nguia nae, ãquĩ si que Dios ae

urerirõ nda. ãquĩ si eriqui urerirõ ndirõ mbeiã. ãquĩ si ra eriqui urerirõ mbei no. ãquĩ ureicuate quiaã. ¹¹ Jê abe jeñee Dios je urerĩ no. Mbia tubiriã ñee mose Dios je urerĩ, Dios ra ãquĩ ñee ñandu. Dios ra uturã mondo tuchi ure je. ãquĩ nda gracias i tuchi Dios je urerĩ cote.

Pablo oso jei eã Corinto

¹² Ure que mbia mo urembirĩ irĩãte quia ra. Jê abe mbirĩ iriã no. Dios resendate que ureico jêje ra. Ureyate mbae turã naa naa mose jêje. Nyebe urechiã iate riqui nguiã. Dios ae chõ ngue uremingo mbae turã ndese huee ra. Ureaquiato ae eã ngue ra. ¹³ Ae urembesa mondo quia jêje nyii, ãquĩ jêicuate raque quia ãquĩ. Urechimbese checuate raque. Urechimbese nda jêicua ja tuchi rã seje chã. ¹⁴ Jê seicua jiri raque quia ãquĩ. Jêya tuchi rã nda urerese Jesucristo tu mose chã. Sã ureyate riqui jendeseã no.

¹⁵ Sã jêyate riqui serese co no. ãquĩ aicuate quia se abe co. Nyebe acheẽ ndei nguiã sechiangui re nyii. —Tasobe rã erea. † nda eyabe jiri sesobe mose erea, ae rei que se nyii ra. ¹⁶ —Seso mose Macedonia, taicha bei oso jendea, ae rei que se ra. — Obei abe nda aichabe erea chã. † nda mbae mo mee seje sembu bei sacuã Judea, ae rei que se no nda. ¹⁷ Se ndua mose ãquĩ ndese, ¿eicuate ãquĩ nde? ¿Acheẽ ñooño ño se quia ãquĩ nde? Se eno i mose, eno ae bei chõ nda se. Secheẽ nda ambuchebiã mbei. Jesús quiatoã ae ãquĩ saã nguiã. ¹⁸ Sã Dios ñee ñooñoa no. Eĩ ure quia ure abe urecheẽ mbuchebiã jêjeã. ¹⁹ Sã Dios rucucha ucheẽ mbuchebiã mbei no. Jesucristo i equia ee. Ae abe eno i bei quia co. Jesucristo sí cheẽ ño ngue asenei senei nguia jêje resẽ. Timoteo rese. Silvano abe rese no. ²⁰ —Mbae turã nda asaã jêje, i tuchi rei que Dios quia nande je nyii ra. Jesús rii ño eriqui nguiã ãquĩ naa naa nande jeã cote. Jesús rii ño nandeico nguiã Amén i Dios jeã cote. ²¹ Dios ae chõ nandembirãcuã mingo nguiã Cristo rese co. Nandemingo icue umbaerã. ²² Dios que nandisirõ umbaerã nda. Umbaerã marca que emi naanguia nanderese ra. Espiritu Turã ngue emondo

nandechiangui re ra. Nanderereco quiatu sacua umbaerã.

²³ Aso eã equia jendea nae, jëireĩ ngũĩ sacua ño asoã nguiã jendea aque mose. Seso sereã ae eã ngue eno nde. Acheẽ ñooño eã ño nguiã jëje co. Dios riqui sechiã icuate co. ²⁴ —Jenderecuarã nda se, ae ãte quia co. —Co rese chõ jëingo ndua, ae aroneate quia jëje co. Taembia chõ Jesús rese. Ûquĩ miñ ño asaã nguiã jëje. Jë ae chõ jeñimbirãcuã nguia Jesús icua ùquĩ.

2

¹ —Aso si eã nda ñee asi asi jëje jembia eã, ae que se ra. ² Seso mose jembia eã, aba quia ra sembia se cote. Jë ño sembia quia resẽ. ³ Nyebe ambesa mondo jëje nyii resẽ. Jë mbae mbitirõ sacua seso nonde jendea. Seso sereãte que oso mae jëicuã ndese ra. Sembia eã sacua. Jë nguia nda sembia nguiã ña. —Seya mose ra jëya jë abe, ae que se ra. ⁴ Ae ambesa mondo jëje nyii nae, ùquĩ mose que seya eã tuchi riqui jendese ra. Acheseo chee que jendese ra. Jembia eã sacua eã ño ngue aque ambesa mondo nguiã jëje. —Pablo ndua tuchichĩ nanderese, i sacua ño ngue ambesa mondo nguiã jëje.

Ae mbae icua saã nguia nyii nae, aque jëisi turã ño cote, i Pablo

⁵ Ae siqui ngu ninisi rese nyii nae, sembia eã tuchi chõ aque re. Se miñ eã ngue sembia eã nda. Jemo abe abe mbia eã ngue ra. ⁶ Mbae rasi que esaã tuchi huñcuã niñ cote ra. Jë emombo mose nyii. Jëisi turã ño cote. ⁷ Aque icua si jëtesarei chõ cote. Jëturã ño ee cote. Jembia jiri. † nda eya eã embucha eã Dios si. ⁸ Jenyesequa tuchi chõ nguia erese jë. Jëturã sí chõ ee jë. ⁹ —Ma secheẽ mumba eã, ae que embesa mondo jëje nyii ra. ¹⁰ Jëtesarei mose aque icua si, se abe atesarei chõ nguiã esi co. Jeniñ ño aico nguiã tesarei esi co. Cristo resa rae chõ aico nguiã tesarei esi. ¹¹ Nandetesarei mose emo icua si, Satanás siquiã sacua nanderese chõ ñene. Sã Satanás ndiqui aba mbirĩ irĩ mbeite no.

Sechiã ngue ngoi eã mbei Troas ra, i ñi Pablo re

¹² Secuasẽ mose Troas Cristo cheẽ nenei nenei sacua, Cristo que mbia mbuchi-isaquia tuchi rei secheẽ andu ra. ¹³ Tito oreãte que seje huee ra. Nyebe sechiã ngoi eã mbeite nguiã. Nyebe “co acua quia co” ae nguiã hue jenda je. Macedóniaa ngue aso cote ra.

Dios uremingo turã mbeite quia Cristo rñ co

¹⁴ Aico gracias i beite Dios je co. Ae chõ uremingo turã mbeite nguiã Cristo rñ co. Ae chõ urembirãcuã nguiã mbae icua si co. Ae chõ ucheẽ senei senei uquia nguiã ure je mangue jenda chooñoa je co. Aba mbushimbura rã tuchi chõ echeẽ nde. Sã aba mbushimbura riqui mbae mbushimbu turã jate no. ¹⁵ Cristo riqui urechiangui re co. Nyebe ureico nguiã aba mbushimbura rãte Dios je ã. Ure Dios cheẽ nenei nenei mose, emo emo ño echeẽ isi nguiã. Siqui bei sacua. Emo emo ño echeẽ isiã nguiã no. Nyoĩ sacua tata cuasu. ¹⁶ Ae ra nyoĩ tata cuasu nae, mbae shimbu icua naanguia chõ Dios cheẽ ndiqui nguiã ee. Ae ra siqui bei quia nae, aba mbushimbura turã naanguia chõ Dios cheẽ ndiqui nguiã ee. ¿Aba chõ eaquiato Dios cheẽ nenei nenei ña? ¹⁷ Ae Dios cheẽ senei senei ñooño nguia nae, ùquĩ na eã ño ureico nguiã Dios cheẽ nenei nenei ure ã. —Mbae mo jembu rã ure je, ureã tuchi chõ nguiã Dios cheẽ nenei nenei mose jëje ã. Sã eataque riqui Dios cheẽ abi abi erenei nenei mose no. Eĩ eã ño ure re. Dios cheẽ uresenei turã ja chõ nguiã ure. Ureico mingue chõ nguiã erenei nenei ure ã. Dios chõ ngue ureirabo nguiã ure. Cristo quiato chõ ure re. Dios resaa chõ ureico nguiã echeẽ nenei nenei ã.

3

Jesús cheẽ yasu nandereco quia ã cote

¹ ¿Urecuasú uresaã saã si rei nguia jëje ã nde? Tei. Jenyñcua ja chõ ure resẽ. ¿Emo nda ureturã senei mbesa mondo jëje re? ¿Emo nda jëturã senei mbesa imbu ure je re no? Tei. Nandechñcua ja chõ equia ã ndesẽ. ² Aico jenderequia beite sechiangui re co. Embesa ji rese mae na ño mbia riqui nguiã mae jendese ã. ³ Urechimbaaquiato chõ jë ndesẽ. Cristo chimbura rã ño jëingo nguiã. Tinta je eã ngue jembesa ra. Espiritu

Turã je chõ ngue jembesa nguiã. Sita eã ngue Cristo mbesa nguiã. Jeñia ño ngue embesa nguiã.

⁴ Cristo chõ ã icua nguiã seje. Dios résaa chõ aico nguiã ñee jêje ã. ⁵ Sequirãcuã ae je ra mbae aicuayã. Dios chõ uquirãcuã mee nguiã seje mbae icua sacuã. ⁶ Dios chõ uquirãcuã mee nguiã seje, ucheẽ yasu renei nenei sacuã. —Embesa ji cheẽ jemumbayã mose ra jaemingo bei, i ãte Dios quia nande je ã. Espíritu Turã ae chõ aba mingo bei nguiã. —Embesa ji cheẽ tamumbayã mbei chõ nguia seico bei sacuã, i mose emo, aque ra siqui bei eã. Espíritu Turã ae nandemingo beisa re.

⁷ Sita mbesa ji Moisés quereco quia nae, mbae nininya tuchi que eriqui aque mose ra. Mbia mae sayã tuchi que Moisés ruba riqui ra. Moisés ruba nininyate quiatu ngue eriqui nguiã ee. Enininya que uque uquete oso quia cote ra. Moisés chimbese mbia mingo bei aroneate. —Mbia siqui icuã mose, mbia ra mano, i que Moisés chimbese mbia mbiirandu ra. ⁸ Mbae nininyate raque aque mose. Ae Jesús cheẽ yasu nandereco namo ã nae, ùquĩ nguiarei enininya tuchi Moisés chimbese si. ⁹ Moisés chimbese quiatu que mbia mbiirandu tuchi huicuã ndese ra. Jesús cheẽ yasu quiarei nandembiirandu nandecuã mbitirõ ndese. Jesús cheẽ yasu quiarei enininya tuchi Moisés chimbese si. ¹⁰ Moisés chimbese quiarei enininya eã jiri Jesús cheẽ yasu si. Jesús cheẽ yasu quiarei i tuchi Moisés chimbese si. ¹¹ Moisés chimbese que siqui bei sacuã eã nda. Jesús cheẽ yasu quia siqui bei sacuã nde. Nyebe Jesús cheẽ yasu enininya tuchi Moisés chimbese si re.

¹² Jesús cheẽ yasu ra siqui bei. Ùquĩ nandecuã quia ã. Nyebe ureico nguiã ñee tuchi jêje ã. Mbae mbuchecua tuchi jêje. ¹³ Moisés rã eã ño ureico nguiã ure ã. Moisés que nguba chatite quia aque mose ra. —I nda judíos mae eã seruba nininya que rese, i. ¹⁴ Judíos que Moisés chimbese icuayãte quia ra. Namu abe eicuayãte. Emo leer i mose Moisés chimbese je judíos je, icuayã mbeite. Ae siqui Cristo rese nae, ùquĩ mi ño Moisés chimbese icua

nguiã. ¹⁵ Namu abe judíos Moisés chimbese icuayãte quia ã. Emo leer i mose ee, echecuayã mbeite riqui ee ã. ¹⁶ Emo uba mose Jesús rese, Moisés chimbese abe ra echecuate ee cote. ¹⁷ Jesús si rei Espíritu Turã. Nandeco mose Espíritu Turã ndese, ae chõ nandembui mingo nguiã Moisés chimbese si ã. ¹⁸ Nande Jesús icua mose, espejo rã ño nanderuba riqui nguiã. Jesús ruba nininya rã i i chõ nande re. Espíritu Turã abe siqui i i chõ nguiã nanderese. Nyebe nandeco i i nguiã Cristo rã ã.

4

¹ Dios turãte eriqui ure je co. —Jesús cheẽ yasu jêsenei senei mbei mbia je, i Dios quia ure je co. Nyebe ureico nguiã ñimondocho ãte echeẽ nenei nenei mbia je ã. ² Mbae icuã asaã saã nyecuayã eãte quia co. Ae aba ireite riqui nae, ùquĩ asaã saã eãte quia co no. Mbia ambirĩ irĩ eãte quia Dios cheẽ nenei nenei co no. Secheẽ ambeta mbeta eãte quia Dios cheẽ je co. Dios cheẽ ndui si tuchi chõ aico nguiã erenei nenei co. Dios résaa chõ aico nguiã erenei nenei co. Secheẽ ñooñoa mbia icuate raque quia uchiangui re ùquĩ. ³ Ae asenei senei mbeite quia Jesús rĩ nae, echecuayã eã ño ùquĩ nde. Ae ra nyo; tata cuasu nae, ùquĩ mi je chõ echecuayã nde. ⁴ Jesús icua eãte quiatu nguiã. Nyebe aba checuayã nderecua riqui nguiã embaaracuayã Cristo cheẽ turã ñi co. Nyebe eriqui nguiã Cristo nininya icuayãte co. Dios rã tuchi rei Cristo. ⁵ Se mbia mbaaquiato quiatu mose, serĩ eã ño aico nguiã ñee ee. Jesucristo rĩ ño ñene. Ae rei mbia rerecuarã tuchi. Jenimba rã ño aico nguiã Jesús rĩ se co. ⁶ Dios que nyaashĩ saã nyii ra. Itondaru beire nyii. Ae sí que nandembaaquiato quiatu Jesucristo rĩ nda. Ae sí que Jesucristo nininya mingue nandechiangui re ra. Dios nininya rei Cristo nininya rã si.

Dios ae rese aico co, i ñi Pablo re

⁷ Ure ae urenininya eãte raque. Tuchu achõ na ño ureico nguiã Jesucristo nininya siquiã mose urerese. Dios ae chõ uquirãcuã mee nguiã ure je co. ⁸ Mbae icuã tã i bei beite raque ure je. Urechimondocho

eã mbei rae. Mbae aba mbecoteã chiichite raque. Urehui eã mbei ra Jesús si. ⁹ Mbia siqui icuã icuãte raque ure je. Dios quia hui ãte nguiã uresi co. Mbia ureririrõte raque. Urembui eã mbei quia nda Dios si re. ¹⁰ Sã mbia icuã icuã ndiqui Jesús je cose no. Sã eiquia no. Eĩ si chõ mbia nguiã ureiquia serĩ serĩte ã no. Mbia mae sacuã Jesús quirãcuã ndese chõ ùquĩ nde. Ae quera si nae, aque quirãcuã ndese mae sacuã ño ùquĩ nde. ¹¹ Ureico raque ure ã. Mbia ureiquia serĩ serĩ mbeite quia Jesús rĩ ã. Jesús quirãcuã siqui sacuã urerete quirãcuã nea ndese chõ ùquĩ nde. Mbia mae sacuã Jesús quirãcuã ndese chõ ùquĩ nde. ¹² Uremano serĩ serĩte equia ã. Jẽingo turã sacuã Jesús rese chõ ùquĩ nde. ¹³ Sã embesa ji ñee no: “Dios icuare chõ aico nguiã ñee”, sã i no. Eĩ si chõ ure no nde. Dios icuare chõ ureico nguiã ñee. ¹⁴ Sã Dios quirãcuã Jesús raaque mbuquera no. Eĩ si ra Dios nandembuquera Jesús rĩ nande abe. Ae ra nandemingo turã ja ujii cote. ¹⁵ Seje mbae icuã icuã mose, jemingo turã sacuã ño ùquĩ nde. I nda Dios uturã mee mbia tubiriã je. I nda mbia tubiriã gracias i tuchi Dios je. Dios iate mbia ùquĩ naa mose.

¹⁶ Nyebe ureico nguiã ñimondocho eã mbei. Urerete si raque quia ngoite qui cote. Urechimbiasu i i chõ nguiã urechiangui re ã. ¹⁷ Ae rasi uresaã nguia ã nae, ùquĩ ndasi ra ua jei chõ. Ùquĩ ndasi raande nyii ra Dios mbae turã mee mbei ure je cote. Dios chimee turã nda ua eã mbei uresi cote. ¹⁸ Ae rese nandeico mae mbae nae, ùquĩ nda ua jei. Ae rese nandeico mae eãte nae, ùquĩ nguia ra ua eã mbei. Nyebe ureico nguiã ndua mbae nandemae sayã ndese.

5

¹ Sã tuchua riqui shii jeite no jẽ. Eĩ si chõ nanderete no nde. Mano jei. Mbia serete iquia mose, tuchua ao ji mo ñi ibate seraarõ arõ pe. Dios chisaã ño hue re. Hue tuchua ra shii eã mbei. Mbia chisaã eã ño ñene. ² Tuchua mo na ndei nanderete. Shii jei. Co serete rerequia mose, aico jiabute co. Co aico oso sete sechuchua ibatenda rea co. ³ I nda serete yasu areco bei pee ibate. ⁴ Tuchua mo na ndei nanderete.

Co serete rerequia mose, aico jiabute co. Seya eãte aico co. Semano sereãte raque. Serete yasu quia areco sete nguiã. Mbae yasu ja ra aque mose seje cote. Amanoa mbei ra aque mose cote. ⁵ Ùquĩ je chõ ngue Dios sererecoquiato nguiã. Semingo turã mbei ra cote. Nyebe Espiritu Turã mondo nguiã seje. Sembiirandu sacuã ùquĩ ndese. Dios Espiritu Turã mondo mose seje, umbae marca mii naanguia serese chõ ùquĩ nde.

⁶ Nyebe aico nguiã ñimondocho eãte co. ã nanderete rerequia bei mose, eĩ nda nandeso aroneate rei ibate siqui Jesús rese. ⁷ Aico beite Dios icua co. Amae ãte raque erese. Ae rese nandeico mae nae, ùquĩ ndese aico ãte co. ⁸ Nyebe aico nguiã ñimondocho eãte co. Co serete ajea bite raque oso sacuã ibate siqui bei nonde Jesús rese. ⁹ Ae Dios bite nae, ùquĩ asaã sete quia ee co. Dios seisi turã nonde chõ ùquĩ nde. Aa seico mose. Pee ibate seico mose abe no. ¹⁰ Cristo resaa ra nandecu ja emo mose. Ae nanderea sacuã. Nandeicua sacuã. Ae mbae turã saã saã nguia siqui mose íbii nae, Cristo ra mbae turã mondo ùquĩ je pee cote. Ae mbae icuã saã saã nguia siqui mose íbii nae, ùquĩ je ra Cristo mbae icuã mondo

Dios ae nandemingo turã nguiã uchiese Jesucristo rĩ co

¹¹ Aba siquichesa tuchi cho Dios re, mbia siqui eã mose erese. Nyebe ureico nguiã mbia mbuti mbuti tuchi co. Dios riqui ureicuate co. Jẽ abe jẽingo ureicuate ùquĩ ndenoae. ¹² ã ureico urecuasu raã naa si ãte raque ã. Jembia sacuã ño ureico nguiã ñee urerĩ sí ã. I nda jeñee aquiato mbia icuã ñee ndibishorõ. Ae uturã saã ñooño nguia nae, ùquĩ ñee ndibishorõ sacuã ño ñene. ¹³ Urearacuayã mose, Dios cheẽ ndese siqui sacuã ño ñene. Urearacua mose, jembaaquiato sacuã ño ùquĩ no nde. ¹⁴ Sã Cristo nyesequa tuchite nanderese no. Ae chõ sembuti mbuti nguiã co no. Cristo que mano nande ja je ra. Nyebe nande abe nandemano ja nguiã erese. ¹⁵ Cristo que mano nande ja je ra. Ae nandebite riqui nae, ùquĩ ndese nandeico eã sacuã ño Cristo

mano nguiã. Ae Cristo bite riqui nae, ùquĩ ndese nandeico sacua nguiatu ngue Cristo mano nguiã. Nande je que Cristo mano nda. Nande je que Cristo quera si no nda.

¹⁶ Jesús quiatoã na eã ño ureico nguiã mae mbia rese ã. Urechesequa chõ nguiã mbia rese ã cote. Urechesequa eãte raque Cristo rese nyii. ¹⁷ Emo ñimbucha mose Cristo rese, mbia yasu rã ño ùquĩ cote re. Ae esaã saã nguia mbae icua nyii nae, ùquĩ si que huĩ ja cote ra. Mbae yasu ja chõ ee cote re. ¹⁸ Dios ae ùquĩ saã ja nguiã nande je co. Dios ae nandemingo turã nguiã uchiese Jesucristo rĩ co. —Mbia emingo mingo bei serese sequia torã jẽ, i que Dios seje ra. ¹⁹ —Sã mbia sequiatorã ja, i que Dios Cristo rĩ nda. Ùquĩ je chõ ngue Cristo mano nguiã. Mbia icua mbutiã sacua esi chõ ngue Cristo mano nguiã. —Mbia emingo mingo bei serese sequiatorã jẽ, i que Dios seje ra. ²⁰ Cristo chõ sembuheẽ nguiã co. Secheẽ ae eã ñene. Dios ñee na jẽje chõ aico nguiã ñee jẽje co: Dios quiatorã ño jẽingo jẽ. ²¹ Mbae icua mo ngue Cristo saã eãte rei ra. Dios que mbae icua naasa saã tuchi ee ra. Dios nandemingo turã mbei sacua ño ùquĩ nde. Sã Dios nandemingo turã mbei nandeico mose Cristo rese no.

6

¹ Dios resenda chõ ureico nguiã Dios cheẽ nenei nenei ã. Dios turã jëisi chooñoa ño nguia jẽ. Jëisi tuchi quiatu jẽ. ² Eĩ ngue embesa ji huĩ Dios cheẽ nda:

“Jeñee mose seje, jeñee ngue achandu ra. Aendirõ ngue mbae icua si ra”, i que Dios mbi a je cose ra,

i ñi embesa ji re. Namõ ño Dios riqui nguiã aba cheẽ anduse co. Namõ ño Dios riqui nguiã mbia rirõse eicua si co no. ³ ã ureico mbia mo mbiĩrĩ irĩ eãt e ã. † nda mbia urecheẽ andu turã Jesús rĩ. ⁴ Mbae uresaã turã sete quia ure ã. —Dios rimba turã ño ùquĩ nde, i nonde mbia ure rĩ. Nyebe ureico nguiã ñimbirãcuã tuchi mbia icua mose ure je ã. Mbae tiã mose abe ure je. ⁵ Ureiruã nua ngue equia ra. Uretarõ tarõ mbei que equia ra. Urerecteã mbei que eriqui ra. Ureque reã tuchi que equia ra. Ureriãcuã tuchi que eriqui no

nda. ⁶ Ùquĩ icua eĩ eĩ mose ure je, ureico turãte que equia ra. Ure que Dios ureicuate quia ra. Urechimbirãcuãte que equia ra. Ureico turãte que equia mbia je no nda. Espiritu Turã ngue siqui tuchi urerese no nda. Urechesequa chooñoa ngue equia mbia rese no nda. ⁷ Dios cheẽ ichoiñoa reã ngue uresenei senei tuchi quia mbia je ra. Dios quirãcuã ngue siqui tuchi quia urerese ra. Ae uturã Jesucristo mee nguia ure je nae, ùquĩ mĩ ño urereaquiato bei nguiã co. ⁸ Emo emo mose mbia riqui ñee turã urerĩ ã. Emo emo mose mbia ñee icua urerĩ no. —Aba mbiĩrĩ irĩsa, i tuchi que mbia quia ure je emo emo mose no nda. — ¡Ae bei jẽ! i tuchi que equia urecheẽ je emo emo mose no nda. ⁹ Mbia riqui ureririrõ ndirõ emo mose ã. Emo emo mose eriqui ureisi turã turãte ã no. Mbia ureiquia arõ arõte raque quia ã. Urereco ureico beite ã. Mbia urembaasi asite raque quia ã. Ureiquia eãte no. ¹⁰ Ureya eãte raque. Dios rese quia ureyate re. Mbaecha reã ndaque ure no. Mbaecha que uresaã uquia tuchi mbia je ra. Mbae eã tuchi raque urembae. Dios rese quia urembae tubiriã tuchi re.

¹¹ Urecheẽ nyecuate que jẽje ra. Urecheẽ ngue jembirĩ iriã tuchi quia ra, Corinto jenda. Ureico nyesequa tuchi jendese a. ¹² Ure que urechao eã jësi ra. Jẽ nguiatu ngue jenyao nguiã ure si. ¹³ Sã mbia mo ndiqui ñee nguiĩrĩ je no. Eĩ ae chõ nguiã ñee jẽje. Jendu rã ño aico nguiã jẽje. Jenyesequa tuchi chõ nguia serese. Sã aico nyesequa jendese no.

Dios chuchua tuchi chõ jendete re

¹⁴ Dios quiatoã ndese ra jeñimbuchachĩ jẽ. Dios quiatoã na eã ño jẽ nde. Sã mbae turã ndiqui mbae icua mbiroã no. Sã nyaashĩ ndiqui itondaru mbiroã no. ¹⁵ Sã Cristo riquiã Satanás ndese no. Eĩ si chõ Cristo quiato siqui aroneate nguiã Cristo quiatoã ndese no. ¹⁶ Sã Dios abareã siqui aroneate Dios chuchua no. Jendete rei Dios chuchua tuchi. Dios riqui tuchi jendete ye ùquĩ. Sã Dios ñee ã no:

Erete ye ra aico. Ererecuarã nda se. Mbia ra siqui serui, sã i Dios no. ¹⁷ Dios cheẽ ño ã no nde: Jëhui chõ mbae icua si. Icuẽ jẽingo.

Mbae icuã ndese ra jẽocochĩ.
 Jaẽisi turã nda se chã.
 18 Jendurã nda se chã.
 Seriirina nda jẽ ña.
 Sequirãcuãte se,
 i que Dios cheẽ mbesa ji ra.

7

1 Dios cheẽ ño ã nde. —Aico bei ra jendese, i que ra. Nyebe nandehui mbae icuã si ñimbitirõ mbei. Cochee chõ nandeco Dios je. Nandereco nandemee tuchi ee.

Seyate aico jendese co cote, i ñi Pablo re

2 Ureisi turã ño jẽ. Mbae icuã mo ngue uresaã ãte jemo je ra jẽ. Ureico que equia jembirĩ irĩ ãte ra jẽ. 3 Jẽicuã i sacuã eã ño aico nguiã ñee jẽje. Achesecua tuchite quia jendese co. Semano mose chee. Sã ñi acheẽ jẽje nyii no. 4 Seyate aico jendese co. Secheẽ nda emumbayã, aete se quia jeni co. Mbia icuã icuã mose seje, seyate aico jendese co.

5 Urechu que aa Macedóniaa, aque mose bei que urerecoteãte ra. Mbae icuã ngue uremingo asi asite rei quia ra. Mbia icuã icuãte que eriqui rei ure je ra. Sechiã ngue ngoi ãte rei quia ra. 6 Dios que sechiã mbocoi Tito ngasẽ mose cote ra. Sã Dios riqui uquiato mbia beite eya eã mose no. 7 Tito mii ndese eã ño seya re. Seya tuchi que sembiirandu mose jendese no nda. Jẽ nane ngue jeñee Tito mbirãcuã nda. Aquere que Tito ru sembirãcuã cote ra. —Hue echi ndua tuchite nderese huee, i que u ñee seje ra. Nyebe seya tuchite riqui nguiã jendese. Jẽtesarei eãte quia equia sesi reaẽ. 8 Ae ambesa mondo jẽje nyii nae, ùquĩ ngue jembia eãte rei ra. Erea ramo mose. —Amondo jirichĩ nguia, ae rei que se quia nyii ra. —Amondo jirichĩ nguia, ae ãte se quia co cote. 9 Seyate aico jendese co cote. Jẽya eã ñi eã ño ñene. Jeñimbitirõ nguiatu ngue re. Maende sechimbesa rese. Sechimbesa jembia eã mose jẽicuã ndese, Dios rese que jendua cote ra. Sechimbesa chõ jemingo turã nguiã cote. 10 Emo ia eã ñooño mose huicuã ndese, ùquĩ nda nyoĩ tata cuasu. Emo ia eã tuchi mose huicuã ndese, hui ra huicuã si cote. Dios ra emingo bei cote. —Ahuĩ jirichĩ nguia seicuã si, iã tuchi rae. 11 Sechimbesa oso mose jẽje, jẽya eã tuchi

que jẽicuã ndese ra. Nyebe Dios ia tuchi riqui nguiã jendese. Jendua tuchi que ra. —Mbae icuã ngue uresaã eãte resẽ, jenyee eãte que ra. Mbae icuã ndese que jemae sereã tuchi cote ra. Jẽireĩ ireĩte que equia mbae icuã si ra. Jemae sete que equia serese ra. Ae siqui ngu ninisi rese nae, aque que jemombo cote ra. Mbae que jẽsaã turã jate ra. Eicuãte i aroneate que emo nguia jẽje ra. 12 Ae siqui ngu ninisi rese nae, aque je eã ngue ambesa mondo nguiã. Eru je eã ño ngue eno nde. Jẽ ja je chõ ngue ambesa mondo nguiã. —Pablo riqui nyesecua tuchichĩ nanderese, i ja nonde chõ ngue ambesa mondo nguiã. 13 Nyebe ureya tuchi riqui nguiã jendese co cote. Jẽ ngue Tito abe jembia cote ra. Jẽ hui mose mbae icuã si. Seirandu mose ùquĩ ndese que seya tuchi se abe cote ra. 14 Sã ñi aico jẽturã nenei nenei Tito je nyii no. Eĩ jenyee si tuchi equia siqui turãte ùquĩ. Nyebe seireĩ ngũiate riqui nguiã ñee jeni ùquĩ. Acheẽ ñooñoa ngue jẽturã ñi Tito je ra. Sã aico ñee ñooñoa emo mose jẽje no. 15 Tito riqui nyesecua i ite jendese co. Ndua beite equia jendese co. Echeẽ nguiatu que jemumbayã tuchi quia ra. Cocheete quiatu que jẽingo ee ra. Jẽisi turãte quiatu que equia ra. 16 — Ùquĩ nda siqui tuchi Dios rese, ae tuchi se quia jeni co. Co seyate aico jendese co.

8

Jembae jemee jiri quia Dios je

1 Jesús quiato Macedonia jenda tasenei jẽje cote, Seresenda. Hue jenda ja iglesias. Dios turã tuchi que eriqui ùquĩ ja je ra. 2 Mbia icuãte que eriqui rei ee ra. Eya beite chõ ngue eriqui ra. Mbaecha reã ndaque. Mbae que emondo tuchi guia Jesús quiato je ra. Mbaecha rã tuchi mbae mondo mbia je. 3 Umbae que emee tuchi ra. Embae tubiriã eã ndaque. Abei tuchi quiatu ngue re. Amae ngue erese ra. 4 —Ure abe ra urembae uremee tuchi Jesús quiato je, i tuchi que seje ra. 5 Mbaechõ eã ngue emee Dios je ra. Nguete rane ngue emee ee ra. Ure je abe que ngueco mee nda. Mbae turã naa naa mbei sacuã ure je Dios rĩ. Aquere que umbae mee tuchi Jesús quiato

je cote ra. ⁶ Macedonia jenda umbae mee tuchi mose Dios je, urendua que jendese cote ra. Nyebe Tito amondobe quia aque. Tito jembae ofrenda munua nua ja sacua. Sã Tito ñee nyii no. —Tamunua nua ja, sã i no. ⁷ Sã jëingo Dios icua tuchi no. Sã jëingo Dios cheë icua jate no. Sã jëaquiatute mbia mbaaquiato no. Sã jëingo sete riqui Dios cheë ndese no. Sã jëingo nyesecuate serese no. Nyebe jembae jemee tuchi quiatu ofrendarã cote.

⁸ —Secheë nguire quiatu jembae jemondo Dios je, ae ãte se quia co. Jë ae chõ jendua mbae mee nonde. Jesús rese jenyesequa tuchi mose, jembae ra jemee mee Jesús quiato je. Sã Macedonia jenda umbae mee mee Jesús quiato je no. ⁹ Nandererequa tuchi chõ Jesucristo re. Jesucristo turã jëicuate quia ùquĩ. Mbaecha tuchi rei que ae ereco mose ibate ra. Mbaecha reã ngue esaã tuchi u íbii nande je ra. Erĩ ño Dios riqui nguia mbae mondo tuchi nande je. Ae mbaecha reã naa mose u íbii. ¹⁰ Tacheë tuchi rã jëje. Tenda nongue mose que jenduate Jesús quiato mbaecha reã ndese ra. Mbae que jemondo sete quia ee ra. Jë nane ngue “ofrenda nandemondo” jenye Macedonia jenda si ra. Cosete que jeñee ñee. Jemondo turã cote. ¹¹ Ae ra jemondo nae, ùquĩ ja jemondo jei eae. Mbae jemondose jiri quia ee. Sã mbae jemondose ee nyii no. Jembae tubiriã mose, jemondo tuchi ee. Jembae mi mose, co mi jemondo ee. ¹² Nande mbae mo meese mose, Diobi tuchi chõ ùquĩ nde. —Mbae tubiriã embu seje, iã nda Dios mbaecha reã je. ¹³ —Jembae jemondo ja tuchi mbaecha reã je, ae ãte quia jëje co. ¹⁴ Sã jembae nyiabiã jiri mbaecha reã mbae rese. Sã jembae tubiriã namo no. Emee sacua ùquĩ je. Emo mose ra ùquĩ mbae tubiriãte no. Emondo sacua jëje jembae eã mose no. ùquĩ mose ra jembae nyiabiã jiri ja cote. ¹⁵ Sã embesa ji riqui ñee no: Ae mbae tubiriãte nae, embae rire eãte que ra. Ae embae miite nae, embae que ua eãte ra, i que embesa ji ra.

Tito ra nyoĩ jendea, i Pablo

¹⁶ Sã aico ndua tuchi jendese co no. Eĩ si tuchi Dios quia Tito mundua jendese co. Nyebe aico nguia gracias ite Dios je co. ¹⁷ Tito si quia jendea aque. Secheë nguire achõ eã esi nguia jendea aque. Ae abe que ndua jendese ra. ¹⁸ Tito rese Jesús quiato mo amondo quia jendea aque. Jesús quiato ñee turã jate quia aque riã aque. Jesús cheë nguiau esenei senei mbeite nguia aque. ¹⁹ Jesús quiato que aque irabo ra. Oso sacua serese. Ofrenda munua nua sacua serese. Sã ureico ofrenda munua nua Dios mbia sacua no. Mbia “abei” i sacua jëje. ²⁰ Ae que siqui beite urerese ofrenda isi isi mose ra. Mbia ñee icua eã sacua ure riã. “Ofrenda que embuquiachã nda”, i eã sacua mbia urerĩ. ²¹ Mbae uresaã turãse rete quia ã. Dios ia tuchi sacua ure rese. Mbia abe ñee icua eã sacua ure riã. ²² Uresenda mo abe uremondo quia ùquĩ ndese aque. Ae quiarei mbae raã naase bei Dios je. Oso sete equia jendea co. ²³ Tito rei seresenda tuchi. Siqui bei que equia serese Dios cheë nenei nenei mose ra. Ae nyoĩ quia jendea Tito rese nae, iglesias chõ emondo nguia jendea ùquĩ. Cristo quiato tuchi chõ ùquĩ nde. ²⁴ ùquĩ jëisi turã ja chõ jë. Sã urecheë ee jeni nyii no. —Jëisi turã ndae. Nyesecua tuchi ra jendese, ure que ee nyii ra. Nyebe jëisi turã ño. Eĩ nda iglesias jenda ja abe “eturã” i jeni.

9

Jembae ofrenda jemunua ja rã emondo sacua mbaecha reã je

¹ Aete aico embesa eã jëje ofrenda riã. — Ae ae chõ nda mbae mo mondo nguia Jesús quiato je, se ñee mose rocoĩ ee, ae que se ra. ² Jë ae chõ mbae jemondose nguia Jesús quiato mbaecha reã je ùquĩ. Jeni ño aico nguia ñee Macedonia jenda je co. —Tenda nongue mosenda bei chõ Acaya jenda riqui nguia mbae mondose Jesús quiato je ùquĩ, ae se quia Macedonia jenda je jeni co. Nyebe ùquĩ abe riqui nguia mbae mee sete ee cote. Jirandure jendese. ³ Aque mbia amondo quia jendea aque. Jë icoquiato sacua. Mbae jemondo sacua Jesús quiato mbaecha reã je. Ureireite ra jë ofrenda mondo eã mose se ñeende jeni nyii. ⁴ Seso

mose jendea, Macedonia jenda mo abe ra nyoi serese reae. Jẽ ofrenda munua eã mbei mose, ureireĩte ra urecuasẽ mose hue. ⁵ Nyebe ã nane amondo nguiã jendea aque. Jembae ofrenda munua ja sacua. Ae rĩ jeñee ndei tenda nongue mose. — Ofrenda jemunua na, ae bei sereãte se. Jẽ ae chõ ofrenda jemunua nua, jenyesequa mose mbia rese.

⁶ Jendua rã ã ndese: Ae mbae mii jiri chitiquia quia, aque ra mbae a ucua mii jiri. Ae mbae chitiquia tuchi quia, aque quia ra mbae a ucua tuchi. ⁷ Mbae ata nandemon-dose mose nandechiangui re, mbae ata nandemondo chõ. Mbae mii nandemon-dose mose nandechiangui re, mbae mii nandemondo chõ. —Mbae amondo jirichĩ, nande mose nandechiangui re, eicuãte ũqui. Ae eyate riqui umbae mee mose emo je nae, Dios bite ũqui. ⁸ Dios quirãcuã tuchite riqui co. Mbae emondo ja arõte quia nande je co. Mbae ua eã mbei sacua nandesĩ. Mbae nandemondo mondo bei sacua Dios quiato mbaecha reã je. ⁹ Sã embesa ji riqui ñee no:

Mbae que Dios quiato mondo mondo bei quia mbaecha reã je ra.

Echisaã turã si ra mbia tesareĩ eã mbei, i que embesa ji ra. ¹⁰ Dios chõ mbae eĩ mondo nguiã nande je etiquia sacua. Dios chõ mbae mondo nguiã nandechiurã no. Dios chõ “jabei chõ jẽ jẽ!” i nguiã nande je. Dios chõ mbae mee nguiã nande je emondo sacua mbia mo je. ¹¹ Dios ra mbae mondo tuchi jẽje. Eĩ nda jẽ mbae jemondo tuchi ofrendarã. Se jeñimee ofrenda mondo mose mbaecha reã je, gracias i tuchi ra Dios je cote. ¹² Nande mbae mo mondo mose Jesús quiato mbaecha reã je, quiaru turã jiri ra equia cote. ũquiñõ eã nda esaã nguia. Gracias i abe ra Dios je. ¹³ Jẽ mbae mo mee mose Jesús quiato mbaecha reã je, mbaecha reã nda ñee turã Dios je jeni cote. —Cristo cheẽ emumbayã tuchi quia ã, i ra jeni cote. —Eriqui mbae mee tuchichĩ mbia ja je, i ra ñee turã jeni cote. ¹⁴ Mbaecha reã nda ñee tuchi jeni Dios je cote. Dios jendeaquiato sacua. Mbaecha reã nda ndua tuchite jendese cote. Jẽ mbae mondore ee nyii. ¹⁵ Dios

quiato que mbae turã tuchi mondo nande je ra. Nyebe nandeico nguiã gracias i ee.

10

Mbia mbaaquiato sacua ño Dios semii nguiã

¹ Se rei Pablo. Tacheẽ nyecua jẽje. Nandeico mingue chõ nguia Cristo rã si jẽ. Cochee chõ nandeico Cristo rã si jẽ. —Cochee chõ Pablo riqui nguiã siqui mose nanderese. Siqui eã mose nanderese, ucuasu esaã saã ño nguiã aque, jenze chõchĩ equia serĩ ũqui. ² Mbae jesaã turã turã ja chõ nguia. I nda acheẽ asi asiã jẽje seso mose jendea. Emo emo ñee icua ño nguiã serĩ. —Dios je eã ño Pablo riqui nguiã mbae raã naa, i serĩ. ũqui je quiato acheẽ asi asi arõte nguiã. ³ Mbia chõ ndaque se. Mbia quirãcuã je eã ño aico nguiã mbae raã naa co. Dios quirãcuã je chõ aico nguiã mbae raã co. ⁴ Sequirãcuã je eã ño aico nguiã mbae raã. Dios quirãcuã je chõ ñene. Nyebe aico nguiã mbia icua ndiquisã quisã co. Mbia icua quirã cuãteraque. ⁵ Ae mbia mundua icua icua nguia Dios rĩ nae, ũqui asiquisã quisã ño nguiã co. Mbia amundua turã ja quia Cristo rĩ co. Cristo cheẽ mumbayã sacua cote. ⁶ Jẽ nane Dios cheẽ jemumbayã na jẽ. Aquere ra Dios cheẽ mumbasa amombo ja cote.

⁷ Mbia chiangui renda rese jemaẽ ãte. Earonda rese chõ jẽingo nguiã mae. —Cristo mbae chõ se re, i mose emo, ae mii eã ño Cristo mbae re. Se abe chõ ñene. ⁸ Se ecuasusã raã naa mose, seireĩ nguiãte. Dios quiato ngue semii nguiã ererecuarã. Jembaaquiato turã sacua ño ngue Dios semii nguiã ererecuarã. Jembicuã sacua eã ño ñene. ⁹ Jaembusiquiche sereãte sechimbese je. ¹⁰ Mbia ñee icuãte raque seje. —Pablo reco mose isho, ñee asi asite equia ucheẽ mbesa mbesa mondo nande je co, i jemo nguia serĩ ũqui. —Siqui mose nanderese, ererecuã raã naa aquiãte cote, i jemo nguia serĩ ũqui. ¹¹ Ae ñee nguia ũqui nae, ũqui je tacheẽ. Co secheẽ asi asi ambesa mondo quia jẽje aque nae, anyae sí ra ñee asi asite seso mose jendea huee.

Secheẽ mbesa ji ra achabiã seso mose jendea huee. ¹² Ae ñee mbeite quia uturã ñi, ùquĩ na eã ño se re. —Aque rã si chõ aico nguiã se co, i beite equia ùquĩ. —Seturãte aico aque si co, i beite equia ùquĩ no. Ûquĩ ñee mose ùquĩ, earacuayãte riqui ùquĩ.

¹³ Seturã nda asaã saã eã. Dios ae chõ “hue eso, pe eso”, i nguiã seje co. Ae chõ ngue semondo nguiã jendea. ¹⁴ Se rane ngue Dios semondo jẽje Cristo cheẽ nenei nenei sacuaã nda. Nyebe hue jenda ja sembaerã, se embaaquiato sacuaã Dios cheẽ ndese. Ae Dios riqui “hue eso” i ãte seje nae, huee ra asoã. ¹⁵ —Sechimbaaquiato chõ ùquĩ nde, ae aronea tuchite quia emo ñimbaaquiato je co. Jẽ Cristo icua i i tuchi mose, jendobeinda quia ra ambaaquiato i i tuchi oso cote reae. ¹⁶ Seso sete jendobei Cristo cheẽ nenei nenei hue jenda je. Sechimbaaquiato ae aroneate emo ñimbaaquiato je. ¹⁷ Emo ñee turãse mose mbae mo ñi, sã Dios rĩ nguiatu ñee turã. ¹⁸ Ae uturã saã saã nguia nae, Dios biãte ùquĩ. Ae rĩ nguiatu Dios riqui ñee turãte nae, ùquĩ nguiatu Diobi tuchi re.

11

Mbia mbaaquiato icuã icuãsa rese ra jẽingo chĩ

¹ Jeñimbirãcuã jiri se ñee mose jẽje jẽ. Seturã tasaã saã jiri ñee jẽje. ² Aqueteãte jendese jẽ. Dios mbaerã jẽ, ae que se ra jẽ. Sã acuanĩ mo ndiqui siqui eã mbei ngu mo ndese no. Sã mbia emee acuanĩdu mo je cote no. Eĩ tae si chõ jemee Cristo je. Cristo mĩ mbaerã nda jẽ cote chã. ³ Sã mbei Eva mbĩrĩ irĩ cose no. Eĩ jenyẽ si arõte jẽ ndeae. Eĩ si arõ mbia jembĩcha Cristo icha si. Jemundua icuãte chõ nda reae. Cristo mĩ ndese chõ jẽingo jẽ. Sã acuanĩ ndiqui ngu mĩ ndese no. ⁴ ¿Mbaerã jenyiisaquia turã mbia jembaaquiato icuã icuã mose re? Mbia Jesús abareã nenei nenei mose jẽje re. Mbia Espĩritu Turã abareã abe renei nenei mose jẽje re. Mbia Jesús cheẽ turã abareã nenei nenei mose jẽje re no. Se que ùquĩ asenei senei ãte quia jẽje resẽ. ⁵ Ûquĩ ñee ndese que jenyiisaquia, ¿mbaerã nda jenyiisaquia eã secheẽ abe rese re? Se

quia Jesús cheẽ aicua tuchi quia ùquĩ si co resẽ. ⁶ Secheẽ turã eã e raque. Seaquiature quia aico nguiã Dios cheẽ ndese co. Jẽingo seicuate ùquĩ ndesẽ.

⁷ —Mbae jemondo seje, ae ãte que se quia Dios cheẽ nenei nenei mose jẽje ra. ¿Eicuãte ùquĩ nde? Aico minguate que se quia jẽje ra. Jẽingo turã sacuaã Cristo rese. ¿Eicuãte ùquĩ nde no? ⁸ Seico mose jendese jembaaquiato quiato mose, mbae mo ngue jemee ãte quia seje ra. Jesús quiato ishonda quiato que mbae mo mee mee nguia seje ra, se siqui mose jendese. ⁹ Seico mose jendese que mbae jemondo eãte seje resẽ. Sembae eã mose que “mbae embu seje” ae ãte jẽje resẽ. Jesús quiato que ngaẽ Macedonia si nae, ùquĩ nguiatu que mbae mee tuchi sembae eã mose resẽ. “Mbae embu seje” ae eã mbei ra jẽje. ¹⁰ Cristo riqui sechiangui re co. Ûquĩ aicuate. Sebite “mbae embu seje” iã mose se jẽje. “Acaya jenda que mbae mee tuchi ndeje ra”, i aroneate emo seje jeni. ¹¹ ¿Mbaerã ño mbae aisiã jẽsi chã? Achesequa eãte quia jendese reae. Tei. Ûquĩ eã ñene. Achesequate rei jendese resẽ.

¹² Mbia ñee eã sacuaã nda mbae aisiã mbei jẽsi resẽ. Ae Jesús abareã senei senei nguia nae, ùquĩ ñee eã sacuaã. “Pablo rã sí chõ ure re” ùquĩ i eã sacuaã. ¹³ Cristo cheẽ nenei neneisa turã eã ño ùquĩ nde. Mbia mbĩrĩ irĩsa chõ ùquĩ nde. Cristo cheẽ nenei neneisa raã ñooño ño nguiã ùquĩ. ¹⁴ Satanás na sí chõ ùquĩ ndiqui nguiã ùquĩ. Satanás uturã saã saã ño nguiã. Angel turã naa naa ño nguiã no. ¹⁵ Ae siqui Satanás ndui nae, ùquĩ nda uturã saã ñooño Satanás na sí. Nyebe ra Dios ùquĩ mbutiã tuchi emo mose.

Pablo mbae rasi saã tuchi

¹⁶ “Earacuayã” jenyechi nda seje jẽ. “Earacuayã” jenyẽ raque seje, seandu rã se. Secuasus tasaã saã mbĩrĩ na jẽje. ¹⁷ Ae aico ñee jẽje namo nae, Dios cheẽ eã ño ùquĩ nde. Earacuayã na ño aico nguiã ñee jẽje. Secuasus asaã saã ño nguiã ñee jẽje co. ¹⁸ Sã mbia riqui ucuasu raã naa jate no. Eĩ tae rã se abe secuasus raã naa jẽje. ¹⁹ Jẽaquiature reĩ jẽ ndeae. Jẽingo ñimbirãcuãte eaquiata jẽ ùquĩ. Seaquiata jẽ abe jeñimbirãcuã ño.

²⁰ Ae icuã icuã mbeite riqui jêje nae, ùquĩ je jêingo ñimbirãcuã mbeite ùquĩ. Jembuquieie quieie chooño mose. Jembae mbutiã chooño mose abe no. Ucuasu raã naa mose abe no. Ucuasu mose jêsiba rese abe no. Ùquĩ je jêingo ñimbirãcuãte ùquĩ. ²¹ Se quiatu que ùquĩ asaã saã eãte quia jêje ra. Aico mingue chõchĩ jêje. Acheẽ asi asi eã ñochĩ jêje. Emo ucuasu raã naa mose, se quia secuasú asaã saã mbite nguiã esi. Earacuayã na ño aico nguiã ñee se co. ²² ¿Hebreos ùquĩ nde? Se abe chõ ñene. ¿Israelitas ùquĩ nde? Se abe chõ ñene. ¿Abraham nducucha ririĩ ùquĩ nde? Se abe chõ eno nde. ²³ ¿Cristo rimba chõ ùquĩ nde? Se quia Cristo rimba tuchi esi re. Earacuayã na ño aico nguiã ñee co. Se quia serecoteã tuchite Dios cheẽ nenei nenei mose esi re. Se quia mbia seiruã nua tuchi nguiã esi. Se quiatu ngue mbia sematã matã tuchi nguiã esi. Se quiatu ngue mbia seiquia serĩ serĩ tuchi nguiã. ²⁴ Judíos que seiruã nua mbei quia ra. Treinta y nueve azotes bei que eriqui seiruã nua nda. Emo mose treinta y nueve no. Emo mose eĩ sí no. Cinco veces chee. ²⁵ Ira que euru uru serese tres veces ra. Emo mose que sei sei sita je ra. Tres veces que barco ñimmi ama ndiite re seja ra. Emo mose que aitõ ama ndiite re barco eã nda. Abebi chõ ngue sequia ra. Nyaashĩ mii abe que amumba quia mbei ra. Barco ñimmi mose seja. ²⁶ Acuata tuchi que sequia ra. Mbae icuã ngue seiquia arõ arõ tuchi quia ra. Secuata mose ama ndui. Seico mose abe sucha cuasu no. Seico mose turuquia rĩ no. Mbia mbae mbuquiachãsa que seiquia arõ arõ tuchi quia no nda. Seresenda abe que seiquia arõ tuchi no nda. Judíos eã abe que seiquia arõte no nda. Jesús quiato chooño abe que seiquia arõte no nda. ²⁷ Serisirõ ngue nyichuarõ arõ tuchi quia ra. Aqueã mocoĩ mocoĩ tuchi que se quia no nda. Seriãcuã mocoĩ mocoĩ tuchi que eriqui ra. Seisei abe tuchi que eriqui ra. Nyiiseĩ ngue airara mocoĩ mocoĩ tuchi quia ra. Seirao eã tuchi que eriqui no nda. ²⁸ Ùquĩ mii eã ngue ra. Jesús quiato rese abe que aico ndua ndua ra. Sã iglesia jenda ja ja siqui tuchi Jesús rese, ae beite sequia ndua co. ²⁹ Jesús quiato mo mbae rasi raã mose, se abe seya

eã ndasite riqui erese co. Emo icuã icuã mose Jesús quiato mo je, se abe paama i rasite aico co.

³⁰ Sequirãcuã ndese eã nda seya riqui nguiã. Sequirãcuã nea ndese chõ nda seya riqui nguiã. ³¹ Acheẽ ñooño eãte quia co. Dios quia secheẽ icuate nguiã. Jesucristo ru chõ Dios re. Sã mbia riqui ñee turã mbei eriĩ. ³² Aretas resenda que serequia rei Damáscú ra. Seiquia sacuã. Ae que alcalde ra. Ae que mbia mondo rei eiquesa raarõ nda. Setarõ nda eña nde. ³³ Hue rĩ ngue asoã mbei ra. Mbia que sembuquichi mbu irairu ye ra. Ventana ni. Eĩ ae que oso chee mbia icuã si ra.

12

Pablo ibatenda tea cuu

¹ Secuasú asaã saã ñochĩ nguia co. Ae rese Dios semumae mae mbeite cuu nae, ùquĩ nguiatu tasenei jêje. ²⁻³ Cosete que Dios sererao ibate cuu ra. Hace catorce años. Serete resebe Dios sererao reae. Seaĩ achõ ere no ae. Aicuayãte se. Dios ae eicua nguiã. ⁴ Dios que sererao ibate ra. Huee que ibatenda cheẽ turã achandu ra. —Ae erechandu nae, ùquĩ nda ereseneichĩ mbia je, i que Dios seja ra. ⁵ Ibatenda cheẽ andure secuasú asaã saã arondete raque se. Sequirãcuã je ra secuasú asaã saã eã. Sequirãcuã nea ndese chõ seya riqui nguiã. Sequirãcuã nea mose quia Dios uquirãcuã mee tuchi nguiã seja cote. ⁶ Secuasú ra asaã saã ndaque, asaã ñooño eã ño se re. Dios quia que uquirãcuã mee seja ra. Mbae ja raã sacuã. Secuasú ra asaã saã eãte jêje. Jê ae chõ nda jemae nguiã serese seicua nonde. Jê ae chõ nda secheẽ jeñandu nguiã seicua no. ⁷ Ae rese Dios semumae cuu nae, ùquĩ eturã tuchite seja. Ùquĩ ndese maende que aico secuasú raã naa arõte raque ra. Nyebe Dios nyu raanguia mondo nguiã sequi rĩ. Satanás sembecoteã sacuã. Dios semingo tochi sacuã. ⁸ —Nyu raanguia esiqui sesi, ae tuchi rei que Cristo je tres veces ra. ⁹ Cristo que ñee seja ra. —Coche rei ñene. Sã ñiño ndei. Seturã nguiatu amondo mbeite nguiã ndeje co. Ndequirãcuã nea mose quiatu sequirãcuã amee tuchi nguiã ndeje, i que Cristo seja ra. Nyebe seyate riqui nguiã sequirãcuã

nea ndese co cote. Ũquĩ mose quia Cristo riqui nguiã uquirãcuã mee tuchi seje co. ¹⁰ Nyebe seyate riqui nguiã sequirãcuã nea mose. Mbia ñee icuã mose abe. Mbia icuã icuã mose seje abe. Mbae eã mose seje abe no. Se mbae icuã irara mose Cristo rĩĩ abe no. Ũquĩ ja mose seyate riqui co. Cristo quiatu uquirãcuã mee tuchite nguiã seje, sequirãcuã nea mose.

Jeñia jembitorõ se oso nonde jendea, i Pablo

¹¹ Sebiãte raque se sí ñee turã mose seriĩ. Jẽ nguiatu jeñee turã mbite raque seriĩ, mbia ñee icuã mose seje. Ae rui jẽingo nae, ũquĩ eaquiato ãte riqui sesi ũquĩ. Seaquiato eã ndaque se abe. Ae rui jẽingo nae, Jesús cheẽ mbuchecuasa chooño ño ũquĩ nde. ¹² Dios cheẽ mbuchecuasa tuchi chõ se re. Seico mose jendese. Aico minguete que sequia seico mose jendese ra. Mbia mae sayã ngue asaã saã tuchi quia ra. Dios quirãcuã ngue siqui tuchi quia serese ra. ¹³ Aico turãte que sequia jẽje ra. Sã aico turãte iglesias ataque jenda je no. Eĩ si. Jẽ mii je chõ ngue “mbae jembu seje” ae eã nguiã. ¿Ũquĩ eicuãte jẽje re? “Mbae jembu seje”, iã mose jẽje.

¹⁴ Aico icoquiato oso nonde jendea a. Co rei tres veces co cote. Co aico oso jendea co. “Mbae jembu seje” aeã tuchi ra jẽje. Mbae achosei chiãte jembae. Jesús rese jẽingo mose, ũquĩ mii ño achosei nguiã. Jendu rã ño aico nguiã jẽje. Sã mbia riirĩ ndiqui mbae mo mondo mondo eã ngu je no. Sã eru chõ ndiqui mbae mondo mondo nguiirĩ je no. ¹⁵ Sembae amondo ja bite raque jẽingo sacuã Cristo rui. Sereco abe amondo bite raque jẽingo sacuã Cristo rui. Sech-esequa tuchi mose jendese, ¿mbaerã jẽingo nyesequa eãte serese jẽ nde? ¹⁶ “Mbae jembu seje”, ae ãte que sequia jẽje. Ũquĩ jẽicuate raque. ¿Mbaerã nguia jẽingo ñee ñooño nde? “Pablo que nandembĩrĩ irĩ nda”, ¿mbaerã jenyere? ¹⁷ ¿Mbaerã jeñee ũquĩ nde? Ae amondo jẽje jembaaquiato sacuã nae, ũquĩ abe que jembĩrĩ irĩ eãte resẽ. Ũquĩ ngue jembae isiãte sembaerã

ndesẽ. ¹⁸ Tito que amondo jendea nanderesenda rese resẽ. Ae abe que jembae isiãte resẽ. Se rã si chõ ngue eriqui jẽje resẽ.

¹⁹ Achiquisã eãte sequia jẽsi co resẽ. Dios résaa chõ aico nguiã ñee jẽje. Cristo rĩĩ ño aico nguiã ñee jẽje. Se mbae mo naa mose jẽje, jẽingo tuchi sacuã Cristo rese chõ ñene. ²⁰ Seso mose jendea, sembia eã arõte. Ae sebite se, ũquĩ jẽsaã eã arõte seje. Ae jembite nae, ũquĩ asaã eã arõte se abe jẽje. Jeñee icuã icuã nda jenyue serésaa reae. Jẽingo icuã icuã ja ra jenyue reae. Jenongue mbae ra jenyosei chosei jẽ sí chõ ndeae. Jenguasu ra jẽsaã ñooño sésaa reae. ²¹ Seso mose jendea ra Dios sembia eã tuchi se mae mose jẽicuã ndese reae. Seireite ra jẽicuã ndese mae mose. Jẽicuã cose ndare si jẽhui eã mbei chõchĩ namo nyee. Ae jeninisiã nae, ũquĩ ndese jẽingo bei chõchĩ ũquĩ. Ae jendu eã nae, ũquĩ ndese abe jẽingo bei chõchĩ ũquĩ no. Mbae aba ireingua rese jẽingo bei chõchĩ ũquĩ.

13

Hui bei Pablo saludar i mbia je

¹ Aso quia jendea aque cote. Co rei tres veces co cote. Emo mii sembiirandu mose mbae icuã ndese, achanduchõ nda se. Emo nyeremo ñee mose, aque mose quiato ra echeẽ achandu cote. ² Ae eicuã saã saã nguia nyii nae, sã aico ñee asi asite ee nyii no. Ũquĩ sí je chõ aico nguiã ã mbesa ã. Huiãcuã ndecha eã mose ra achimbirãcuã eã ee cote. Jẽ ja je chõ aico nguiã ñee ũquĩ. Seico mose raanguia jendese. ³ —¿Ma Cristo quirãcuã ndiqui Pablo rese ma nde? jenyere equia nyii nae. Cristo quirãcuã ndese ra jemaesecheẽ asi mose quiato jẽje cote. Cristo que mbae saã ja tuchi jẽje uquirãcuã je ra. ⁴ Cristo mbia mbucha quia ira rese iquia nyii nae, aque mose que equirãcuã neate rei ra. Dios quirãcuã nguia emingo bei nguiã co cote. Sã Cristo quirãcuã nea ndei nyii no. Eĩ ño urequirãcuã nea ure namo nde. Ureico rei nguiã erese co. Ae chõ uremingo nguiã Dios quirãcuã je co. Ae quirãcuã je ra ureico jembaaquiato quiato. ⁵ Jẽ ae chõ jendua. —¿Cristo aicua quia sechiangui re re? jenyere ja ja chõ jeñiangui

re. Jemae nguia jenyiese sí. Jẽ Cristo icua chooñoa mose, Cristo riqui jeñiangui re ũquí. ¿Ũquí ndese jẽingo iranuate re? ⁶Ure quia Cristo ureicua chooñoa nguia ã. Ũquí ndese nda jẽirandu rã seje chã. ⁷Urecheẽ tuchi quia Dios je jeniã ã. Jẽ mbae icuã naa eã sacuã. Mbia ndua turã sacuã eã ure rĩ ño ureico nguia ñee Dios je jeniã ã. Jẽ mbae icuã naa eã sacuã ño ñene. Mbia ra ñee icuã ndaque ure je. ⁸Mbae icuã mo nandesã aroneate Dios cheẽ ndobeishĩ. Mbae turã nguiatu nandesã Dios cheẽ mose. Dios cheẽ nguia ichõĩño eã nde. ⁹Coche mbia riqui nguia ñee icuã icuã ure je. Jẽ nguia jẽingo bei Cristo quirãcuã ndese. Jẽ nda Cristo jẽicua tuchi rã seje chã. ¹⁰Secheẽ asi asi ambesa quia seso nonde jendea a. Se ñee asi eã sacuã seico mose jendese. Dios quiatu ngue uquirãcuã mee nguia seje. Jembicuã sacuã eã ño ngue Dios uquirãcuã mee nguia seje. Jemingo tuchi sacuã Cristo rese chõ ñene.

¹¹Aico hui secheẽ mbesa mbesa si a cote, Seresenda. Jesucristo jẽicua tuchi quia. Jẽya bei tuchi jẽingo erese. Jẽingo turã mbei chõ nguia jenyiese. Ũquí mose ra Dios siqui tuchi jendese. Ae ra jemingo turã mbei jenyiese. ¹²Saludar jenyete turã mbei quiatu quia jenyete. ¹³Jesús quiato a jenda saludos mondo quia jẽje aque. ¹⁴Sã Jesucristo turã ndiqui bei jendese. Sã Dios riqui nyesequa tuchi jendese. Sã Espiritu Turã ndiqui bei jendese no. Amén.

LA CARTA DEL APOSTOL SAN PABLO A LOS GÁLATAS

llo ucheẽ mbesa mondo Galacia jenda je

¹ Pablo chõ se re. Jesucristo chiirabo chõ se re. Mbia mo ngue seirabo eã nguiã. Dios ae chõ ngue seirabo ra. Ucheẽ nenei nenei sacuã. Ae sí que Jesucristo raaque mbuquera ra. ² Seresenda ja rese chõ aico nguiã ã mbesa jêje a. Jesús quiato Galacia jenda ja je.

³ Sã Dios turã ndiqui bei jendese. Sã ae riqui jembia bei. Nanderu chõ ae re. Sã Jesucristo turã abe riqui jendese. ⁴ Ae quiatu ngue mano nguiã nandecuã ndibishorõ. Nandembui sacuã mbae icuã si. Ae icuã ndese nandeco mae mae nae, ãquĩ si. Nanderu cheẽ nguire chõ ngue Jesucristo mano nguiã nande je. ⁵ Sã mbia riqui ñee turã mbei Dios je. Amén.

Cristo miĩ mbia rirõsa huĩcuã si

⁶ ¿Mbaerã jẽingo hui hui jei Dios si ãquĩ nde? Ae sí chõ ngue “jẽingo Cristo turã ndese” i jêje resẽ. ¿Mbaerã jẽingo Cristo cheẽ abi abi re? Siqui emo ñee ndese re. ⁷ Nyeremo eã ño Cristo icha ñeenda re. Uturã miĩ je chõ Cristo riqui nguiã nandemingo bei. Nandechisaã turã je eã ño Cristo riqui nguiã nandemingo bei co. — Nandechisaã turã je ra Cristo nandemingo bei, i chõchĩ mbia nguiã jêje ãquĩ. ⁸ Acheẽ se quia jêje nyii nae. —Uturã je achõ ño Dios riqui nguiã nandemingo bei co, ae se quia jêje nyii nae. Eĩ mbei chõ ñene. —Hue rĩ eã ño Dios icha re, i mose emo jêje, sã Dios ãquĩ mbasi tuchi. —Hue rĩ eã ño Dios icha re, se abe i mose, sã Dios sembasi tuchi se abe. Angel ibatenda abe mbasi rae, ãquĩ ñee mose. ⁹ Acheẽ namo ngue jêje, ãquĩ taseneimbe jêje: —Nandechisaã turã je chõ Dios riqui nguiã nandemingo bei co, i mose emo, sã Dios ãquĩ mbasi tuchi. Ae acheẽ jêje nyii nae, ãquĩ abi tuchi chõ eriqui nguiã ñee ãquĩ. ¹⁰ “Sã mbia riqui turã seje”, ae ãte quia co. “Dios ae chõ nda seisi turã nguiã”,

ae chõ nguiã co. “Sã mbia riqui turã seje”, se i bei mose, eĩ nda Cristo rimba eãte rei se.

Cristo chimbaaquiato chee que Pablo ra

¹¹ Tacheẽ nyecua jêje, Seresenda. Dios icha asenei nguia jêje nae, secheẽ ae eã ño ãquĩ nde. Mbia cheẽ ae eã ño eno nde. Dios cheẽ ae chõ ñene. ¹² Mbia mo ngue esenei eãte seje ra. Jesucristo miĩ ño ngue esenei nguiã seje. ¹³ Jẽirandu que equia serese cose resẽ. Jesús icuayã mose se nyii. Seico mose judíos ramei ñee ndui. Siqui rocoĩ Jesús cheẽ ndui. Seicuã tuchite que eriqui Dios quiato je nyii ra. “Jesús quiato tambutiã ja tuchi”, ae que se quia aque mose ra. ¹⁴ Moisés cheẽ ndui que aico tuchi rei sembuchecha ja si ra. Seramei ñee ndui que aico tuchi rei quia mbia ja si ra. ¹⁵ Aquere que Dios seisi Jesús quiatorã cote ra. Dios que seirabo cose seã mose nyii ra. Uturã je que seirabo ra. ¹⁶ Dios que nguiirĩ teacuquia seje cote ra. Se Dios rĩirĩ nenei nenei sacuã judíos eã je. “¿Mañi ae ra se re?” ae eã ngue oso ñee mbia mo je ra. Dios nguiirĩ ndeacuquia mose seje. ¹⁷ Jerusalén abe que asoã no nda. “¿Mañi ae ra se re?” ae eã ngue oso hue jenda Jesús chimbaaquiato ñiinda je no nda. Arabia que aso jei se ae ra. Aquere que aso nyebi Damasco ra.

¹⁸ Tres años mose ramo ngue aso Jerusalén cote ra. Pedro rea que aso aque mose ra. Huee que aico erese quince días ra. ¹⁹ Jacobo abe rese que amae huee ra. Jesús nongue que ae ra. ãquĩ miĩ ndese que amae Jesús chimbaaquiato ra. ²⁰ Acheẽ ñooñoa tuchi chõ nguiã ã mbesa jêje a. Dios secheẽ ñandute quia co. ²¹ Jerusalén ngue asecha oso Siria cote ra. Cilicia abe no. ²² Jesús quiato Judea jenda que seicuayã mbeite quia aque mose ra. ²³ Jirandu randuchõ ño ngue equia serese ra. “Ae icuã icuã ndiqui Jesús quiato je nyii nae, aque riqui Jesús renei nenei co cote. Mbia Jesús icua sacuã”, i que equia jirandu randu serese ra. ²⁴ Nyebe eyate riqui nguiã serese cote. Ñee turã turã Dios je.

2

Cristo chimbaaquiato ataque Pablo isi turã

¹ Catorce años mose ramo ngue asobe Jerusalén cote ra. Bernabé rese. Tito abe que arao serese ra. ² Dios ae que “eso Jerusalén” i seje ra. Huee que acheẽ nyecuayã Jesús quiato rerecua ja je ra. Ae asenei senei mbeite quia Dios cheẽ judíos eã je co nae, ùquĩ ñii ngue acheẽ ja Jesús quiato rerecua je ra. Ûquĩ secheẽ icua sacua. Ûquĩ sembaaquiato sacua se Dios cheẽ abi mose. ³ “Circuncisión nandesaa na Tito je”, i ãte que Jesús quiato rerecua quia ra. Judío eã ndaque Tito. ⁴ Jesús quiato chooño abe que chi hue Jesús quiato tuchi mumbara mbara ra. Ndua ndua rei que equia ra. Ure mbae icua naa naa sacua ndaque. “Sã circuncisión naa naa Moisés cheẽ ndui”, i rei que equia urerĩnda. Ebiã tuchi que eriqui ureico mose Cristo mii ndese ra. “Sã eriqui judíos ramei ñee ndui bei”, i chõ ngue equia ra. ⁵ Ûquĩ ñee ngue uresiquisã tuchi quia ra. Jẽingo bei sacua Dios cheẽ turã mii ndese. “Jesucristo turã ae nandemingo bei nguiã co”, jenye sacua. Jẽingo rocoĩ judíos rerecua cheẽ ndui. ⁶ Dios quiato rerecua que sembaaquiato quiato eãte mbae mo ñii nda. “Ã abe esenei senei nguia judíos eã je”, i ãte que ererecua seje ra. Dios quiato rerecua tuchi ùquĩ ndeae. Aicuayãte se. “Ererecua achõ ño taisi turã”, i ãte Dios. Nandechiã ndese quia eriqui nguiã mae ja. ⁷ Jesús quiato rerecua iate que serese ra. Se Dios cheẽ nenei nenei mose judíos eã je. Ererecua que ñee nyue ra. —Sã Dios Pedro mondo judíos je no jẽ. Dios cheẽ nenei nenei sacua no. Eĩ si chõ Dios Pablo mondo quia judíos eã je re. Dios cheẽ nenei nenei sacua ee re, i que ererecua ñee nyue ra. ⁸ Sã Dios Pedro mondo judíos je no. Dios sí chõ ngue semondo nguiã judíos eã je no. Se echeẽ nenei nenei sacua ee. Dios ùquĩ mingo bei nonde. ⁹ —Dios chõ Pablo mondo quia judíos eã je re, i ja que Jesús quiato rerecua ja cote ra. Jacobo. Pedro rese. Juan ndese. Nyebe eriqui nguiã seo isi isi. Bernabé o abe isi no. —Coche jẽingo nguiã Dios cheẽ nenei nenei judíos eã je. Ure Dios cheẽ nenei nenei mose judíos je, i que ñee turã ja ure je ra. ¹⁰ —Mbaecha reã je chõ jẽingo mbae mondo mondo, i mii ño ngue

ure je ra. Ûquĩ ño asaã saã mbei rei nguiã co.

Pablo ñee asi Pedro je Antioquíaa

¹¹ Pedro tu mose Antioquíaa, acheẽ asite que ee ra. Mbae icua nguiatu que esaã huee ra. ¹² Quiaru turãte que equia judíos eã ndese nyii ra. Aquere que judíos mo ngaẽ ngasẽ cote ra. Jacobo resenda. Pedro que quiaru sereã judíos eã ndese cote ra. Eireite que judíos si ra. Nyebe nyiicuasẽ nguiã judíos eã si cote. Ucuasu raã naa esi cote. Judíos abe raque Jesús quiato. ¹³ Nyebe Jesús quiato judíos abe nyiicuasẽ nguiã judíos eã si cote. Pedro rui sí. Ucuasu raã naa judíos eã si cote. Bernabé abe chee que nyiicuasẽ judíos eã si cote ra. Pedro rui si no. ¹⁴ Dios cheẽ ndui si eã ño ngue Pedro riqui nguiã. Judíos nguesenda rese. Nyiicuasẽ mose judíos eã si. Nyebe acheẽ asi nguiã Pedro je mbiásaa. —Nde Jesucristo icua mose, erehui que judíos ramei ñee si cote ra. Judío raque nde. ¿Mbaerã ereico ñee judíos eã je re? “Judíos ramei ñee ndui jẽingo”, i ee re.

Judíos abe ra siqui bei Jesucristo icua mose

¹⁵ Judíos chõ ndaque nande. Judíos eã na eã ndaque nande. Mbia icua na eã ndaque nande. ¹⁶ Emo mii siqui turãyã mbeite quia Moisés cheẽ ndui si co. Dios emingo bei sacua. Moisés cheẽ mumbasa ja tuchi chõ nande re. Jesucristo icua mose quiatu ra Dios nandemingo bei. Nyebe nandeico nguiã Jesucristo icua ã. Dios nandemingo bei sacua. Moisés cheẽ ndui si nandeico eã ndaque, ae que ee ra. ¹⁷ “Cristo que mano nandeicua ñii nda”, nande bei equia ã. ¿Ùquĩ ño nandembicuã nguia re? Tei. Cristo riqui nandembicuã eã mbei co. Cristo quiatu nandembiirandu quia nandeicua ndese co resẽ. ¹⁸ Se Jesucristo icua mose, judíos ramei ñee si que ahui cote ra. Se siqui si mose erui, eicuãte ùquĩ cote. ¹⁹ Moisés cheẽ ngue aicuate rei ra. Ûquĩ ngue seicua mbutiã eã mbei ra. Moisés cheẽ sí chõ ngue sembiirandu Jesucristo rese cote ra. Jesucristo que seicua mbutiã cote ra. Seico bei nonde cote. ²⁰ Cristo mano mose, se abe que amano erese ra. Se ae aicoã nguiã co cote. Cristo riqui

sechiangui re co cote. Equirãcuã je chõ aico nguiã mbae rãã naa co. Dios riirĩ aicuate quia co. Ae chõ ngue nyesequa tuchi nguiã serese. Ae chõ ngue mano nguiã seicuã nĩ. ²¹ Dios turã aisiteã teã eãte quia co. Moisés cheẽ mumbayã mose eã ño Dios riqui nguiã aba icuã mbutiã. Ñquĩnde rae, Jesús manoño.

3

Moisés chimbasa aba mingo bei aronea

¹ ¿Mbaerã jëaquiatuã tuchi riqui re, Galacia jenda? ¿Aba jembaaquiatu icuã tuchi quia Cristo rĩ ñde? Cristo mano ngue asenei tuchi rei jëje resẽ. Jëisi turãte rei que equia nyii. ¿Mbaerã jëingo hui serĩ serĩte esi cote re? ² Moisés cheẽ mumbayã mose eã ño Espíritu Turã ique nguiã jëñiangui re. Jë Jesucristo icua mose chõ ngue re. Se Jesucristo renei mose jëje chõ ngue re. ³ ¿Mbaerã jëaquiatuãte riqui re? Moisés chimbasa que jëicuã mbutiã eã ndesẽ. ¿Mbaerã jëingo siqui beite erese re? Siqui rocoĩ Jesucristo miĩ ndese. ⁴ Mbae rasi que jësaã tuchi quia Jesucristo rĩ nyii resẽ. Jëhui eã ño esi jë. † nda ae rasi jësaã nguia nyii nae, ñquĩ iru eã. ⁵ ¿Mbaerã Dios Espíritu Turã mondo jëje chã? ¿Mbaerã ño Dios mbia mae sayã naa naa jëje chã? ¿Moisés cheẽ jemumbayãte quiatu quia ee re? Tei. Ñquĩ eã ñene. Jë nguia Jesucristo jëicuate nguiã ñquĩ.

⁶ Sã Abraham no. Abraham ngue Dios icuate quia ra. Nyebe Dios Abraham isi turã nguiã. ⁷ Nyebe Dios riqui nguiã “Abraham nducucha” i huĩcuasa je co. ⁸ “Judíos eã abe ra Dios riirĩ icua. Ñquĩ abe ra Dios mingo bei”, i que embesa ji cose ra. “Nderĩ nda aico turã mbia ja je”, i que Dios Abraham je ra”, i que embesa ji ra. ⁹ Sã Abraham Dios icua tuchi no. Sã Dios turãte riqui ee no. Ae Dios icua quia namo nae, ñquĩ je abe chõ Dios turã ndiqui nguiã Abraham ndese.

¹⁰ Sã emo ndiqui ñee no. “Moisés cheẽ ndui taico bei Dios semingo bei nonde”, sã emo ndiqui i no. Ñquĩ nda nyoĩ chõ tata cuasu. Sã embesa ji riqui ñee no. “Emo embesa ji cheẽ mumba mbirĩ mose, echeẽ

mumba tuchi raanguia chõ ñquĩ ñde”, i que embesa ji ra. ¹¹ Dios ra ñee jiri jiriã emo niĩ. “Co que embesa ji cheẽ mumbayã mbei quia ra. Nyebe taisi turã”, i eã nda Dios emo je. Ae je Dios riqui “co taisi turã”, i nae, Dios icuate quiatu nguiã ee ñquĩ. Nyebe ra ñquĩ ñdeco siqui bei. ¹² “Dios cheẽ mumba eã mbei mose quia ra Dios nandemingo bei”, i mose emo, Dios icuayã ño nguiã ñquĩ. ¹³ Cristo que nandembui Moisés cheẽ si cote ra. Nande Moisés cheẽ mumba mose, ñquĩ nda nandemombo eã tata cuasu cote. Cristo quiatu ngue mbae rasi aba ireĩnguia saã tuchi nguiã nande je. Sã embesa ji riqui ñee no. “Aba ireĩnguia tuchi mae mose embucheseco ji ira resenda rese”, i que embesa ji cose ra. Jesús mbucha nonde ira rese. ¹⁴ Dios turã sacuã judíos eã je chõ ngue Jesús mbae rasi aba ireĩnguia saã tuchi nguiã. Dios judíos eã mingo bei sacuã ño ngue re. Sã Dios turãte riqui Abraham je nyii no nae. Eĩ si sacuã Dios turã judíos eã je chõ ngue eno ñde.

Dios contrato saã Abraham je

¹⁵ Sã mbia mo ndiqui contrato raã emo je no. Sã firmar i embesa miĩ no. “Eĩ nguiatu”, i aroneate emo ee cote. Embesa jite quia cote re. ¹⁶ Eĩ si que Dios contrato raã Abraham je no nda. Abraham ndiirĩ je abe no. “Abraham ndiirĩ ja je”, i eã ngue embesa ji ra. “Abraham ndiirĩ je”, i chõ ngue ñee nguiã aque miĩ je. Cristo rĩ ño ngue ñee nguiã. ¹⁷ Tacheẽ nyecua tuchi rã jëje. Dios que contrato saã Abraham je cose ra. — Mbae tasaã ndeje. Nderiirĩ je abe no, i que Dios Abraham je cose ra. Mbesa que aque mose ra. Aquere que Moisés ucheẽ mbesa cote ra. Aquere tuchi 430 años ua mose cote. Moisés cheẽ ngue contrato mbutiã aroneãte ra. Dios cheẽte quiatu ngue contrato re. ¹⁸ Dios que ñee Abraham je cose ra. — Mbae tasaã ño ndeje. Nde mbae mo naa ndocoĩ seje, i que Dios ñee Abraham je cose ra. — Nde Moisés cheẽ mumbayã mose quiatu mbae tasaã ndeje, iã ngue Dios ee ra. — Nde mbae mo naa ndocoĩ, i chõ ngue ee ra. ¹⁹ ¿Mbaerã ño nda Moisés chimbasa cheẽ nandechandu chã? Mbua huĩcuã icua sacuã ño Moisés chimbasa re. Cristo tu mose chõ ngue Moisés chimbasa

cheẽ ua nguiã. Sã Dios contrato naa Abraham ndiirĩ je nyii no. Cristo je chõ eriqui nguiã “Abraham ndiirĩ” i. Dios rane ngue ucheẽ mondo ángeles je ra. Angeles que emondo Moisés je cote ra. Aquere que Moisés embesa mbia je cote ra. Mbia echeẽ mumbayã nonde. ²⁰ Sã Dios contrato naa Abraham je no. Ae sí chõ ngue ñee nguiã Abraham je. “Secheẽ esenei Abraham je”, iã ngue Dios emo mondo ñee Abraham je ra.

Nandeico Cristo icua ã cote; Moisés cheẽ ndui siqui rocoĩ

²¹ Ae contrato Dios saã Abraham je nae, Moisés chimbese ãquĩ mbutiã aroneate quia co. Moisés chimbese aba mingo bei arõ mose, eĩ nda Jesucristo manoate rei. Moisés chimbese aba mingo bei aroneate. Nandechiã abe mbitirõ aroneate no. ²² “Mbia icuã ja chõ ñene”, i que embesa ji ra. Nyebe nandemo mbae mo turã naa aroneate siqui bei sacua. Jesucristo icuasa quia ra Dios mingo bei ucheẽ nguire. Jesucristo icuate quia ñene. Mbae mo naa ndocoĩ Dios je nyii.

²³ Cristo tu nonde que nandeico rei ñee nda. “Moisés cheẽ nandemumbayã” i rei ra. Moisés cheẽ ngue nandemumbayã aroneate quia ra. “Cristo ra tu” i que equia nande je, ãquĩ ño ngue nandesaarõ arõ nguia ra. ²⁴ Mbia mbaaquiatusa rã ño Moisés chimbese re. Mbia mbiirandu que Cristo rese ra. Mbia siqui nonde Cristo mii ndese tu mose cote. Cristo icua nonde. Dios Cristo icuasa isi turã mbei nonde cote. ²⁵ Nandeico Cristo icua ã cote. Nyebe ra nandeicoã Moisés cheẽ ndui cote. ²⁶ Nandeico Jesucristo icua jate ã. Nyebe Dios riirĩ ja chõ nande re. ²⁷ Nandembucha ji nandeico mose Cristo riĩ, Cristo rã sí chõ nandeico nguiã ã cote. ²⁸ Nande Jesucristo icua ja mose, nyiabiã ja chõ nandeico nguiã ã cote. Judíos ra siqui turã judíos eã je cote. Ererecua ra siqui turã ngũimba je cote no. Mbia ra siqui turã ja nyiese no. Aque mii na tuchi chõ nda nandeico ja nguiã Cristo rese cote. ²⁹ Cristo icuasa chõ jẽingo nguiã ãquĩ. Nyebe Abraham ndiirĩ abe chõ jẽingo nguiã ãquĩ no. Ae turã nda Dios saã

Abraham ndiirĩ je nae, jẽje chõ nda eraã nguiã.

4

¹ Sã mbaecha riri mo no. Sã mbae raã aroneate ae ae uñetẽ mose no. Erimba rã si chõ nda eriqui mbia cheẽ mumba eã. Mbaecha riirĩ ndaque. ² Ae rese eriqui ndua nae, ãquĩ ndese eriqui aroneate. Uraarõsa nduasa achõ ndese chõ nda eriqui. Ucuasu mose ramo ño nda eriqui ndua ae ae cote. “Co tasaã”, i cote. ³ Eĩ si chõ nande nyii re. Mbia riirĩ na si. Jesús tu nonde. Mbia cheẽ achõ ndui chõ ngue nandeico nyii ra. Jesús tu nonde. ⁴ Dios que “coche ñene” i cote ra. ãquĩ mose que nguiirĩ mondo mbia je ibii cote ra. Dios riirĩ ngue tu mbiarã nda. Moisés cheẽ ngue emumbayã mbei quia eico mose ibii ra. ⁵ Ae que tu nandembui bei Moisés cheẽ si cote ra. Dios nandererequia sacua nguiirĩ na cote. ⁶ Dios riirĩ ño nande cote re. Nyebe Dios Espiritu Turã mondo nguiã nandechiangui re cote. Nyebe nandeico nguiã Paba i tuchi Dios je namo cote. ⁷ Dios riiri tuchi chõ nande cote re. Erimbachõ eã. Nyebe ra Dios mbae mondo tuchi nande je cote ucheẽ nguire.

Pablo ndua tuchi Jesús quiato rese

⁸ Jẽ ngue Dios jẽicuayãte quia nyii ra. Dios abareã ndese chõ ngue jẽingo aque mose ra. ⁹ ãquĩ jẽingo Dios icuate ãquĩ cote. Dios abe riqui jẽicuate co cote. ¿Mbaerã nguia jẽingo hui serite esi cote re? ¿Mbaerã nda jẽingo sí dios abareã nimbarã nde? Dios abareã quirãcuã eãte nyeresẽ. Mbae mo naa aroneãte nande je resẽ. ¹⁰ “Co tenda mbae mo nandesaã Dios je Dios nandesi turã sacua”, jenyẽ chõchĩ nguiã ãquĩ. “Co nyasi mbae mo nandesaã Dios je Dios nandesi turã sacua”, jenyẽ chõchĩ nguiã ãquĩ no. Eicuã tuchi chõ ãquĩ nde. ¹¹ Jaembaaquiato quiatu iru chõ se reae.

¹² Se rã ño jẽingo ae. Sã aico eãte Moisés chimbese cheẽ ndui sí co no. Sã jẽ abe jẽingo eãte erui nyii no. Sã jẽicuã eãte emo mose seje no. ¹³ Se Jesucristo renei namo mose jẽje, serasite quiatu ngue se aque mose re. ãquĩ jẽicuate quia ãquĩ. ¹⁴ Mbae

rasi que asaã tuchite rei aque mose ra. Serasi que jêucuyã eãte quia aque mose ra. Serasi que jêisiteã eãte quia aque mose no nda. Angeles que jêsaã ño seisi turã aque mose ra. Jesucristo que jêsaã ño seisi turã aque mose ra. ¹⁵ Seisi turã tuchi que se aque mose ra. Jendesa que jemondo bite quia seje aque mose ra. ¿Mbaerã jêingo secheẽ isi sereãte cote re? ¹⁶ Dios cheẽ ngue asenei turã tuchi quia jêje. ¿Ûquĩ je chõ jêingo seucuãyãte cote re? ¹⁷ Ae riqui jembaaquiato icuã icuãte ùquĩ nae, ùquĩ siqui sete raque jendese ùquĩ. Mbae turã nã eã ño ñene. Jembãcha sacua ure si chõ ñene. Jêingo sacua ùquĩ achõ ndese chõ ñene. ¹⁸ Coche rei ùquĩ siqui jendese Dios cheẽ nenei nenei turã mose jêje. Sã eriqui jembaaquiato turã turã mbei. Seicoã mose abe jendese. ¹⁹ ¿Mbaerã jêingo sembia eã tuchi ùquĩ nde? Jêhui serĩ serĩ mose Dios turã si. Sã ãquẽ ndasi riqui cuña je no. Eĩ ño seya eã ndasi nguiã jendese co. Jêingo sacua Cristo rã si. ²⁰ ¿Mañi ae ra se quia jêje re? Aico rã nda jendese chã. Se ñee tuchi nonde jêje. Secheẽ mbesa rocoĩ mondo jêje.

Sã Abraham ndiirĩ nyeremo no

²¹ ¿Mbaerã jêingo ñee nde? “Moisés cheẽ nandemumbayã, Dios nandemingo bei sacua”, ¿mbaerã jêingo i re? Moisés cheẽ jêicuayãte quia reae. ²² Moisés chimbese chõ nandembiirandu nguiã Abraham rese co. Abraham ndiirĩ nyeremo ndei que ra. Co mĩ ngue eninisite riirĩ nda. Sara, i que eninisite je ra. Agar, i que erimba je ra. Aque abe que Abraham nbiirĩ ndei ra. Nyebe Abraham ndiirĩ nyeremo ndei nguiã. ²³ Mbia rã si chõ ngue erimba tiirĩ ee ra. Dios ñeende ee nyii quiatu que eninisite tiirĩ ee ra. —Neninisi ra tiirĩ ndeje, sã Dios i ee nyii no. Ûquĩ io sacua ño eninisite tiirĩ cote ra. ²⁴ Nandemundua sacua ño ùquĩ nde. Contrato rã si chõ Sara re. Contrato mó na ño Agar no nde. Ae contrato Dios saã Moisés je Sinaí no nae, Agar rã si chõ ùquĩ nde. Ae siqui bei quia ùquĩ contrato rui nae, mbia rimbachõ na ño ùquĩ nde. ²⁵ Sinaí rã si chõ Agar re. Arabia jenda chõ Sinaí re. Jerusalén na si chõ Sinaí re. Ae siqui quia Jerusalén nae, erimba rã si chõ ùquĩ nde.

Erimba rã si chõ judíos ja no nde. Jesucristo icua rocoĩ. ²⁶ Jerusalén mo ño chĩ nguiã ibate pe no. Ae mbia hue jenda nae, mbia rimba mo eã ño ùquĩ nde. Hue jenda chõ nande abe no nde. ²⁷ Sã embesa ji riqui ñee no:

Ndeya chõ eico, tiiriã je.

Ndeya chõ eico, ãquẽ ndasi raãsa eã.

Nderiirĩ nda eretea tuchi cote.

Eru chirirõ nguia ra tiirĩ tuchi eru rerecua si cote,

i que embesa ji ra. ²⁸ Dios riirĩ tuchi chõ nande re. “Seriirĩ tuchi ra ùquĩ”, ã i Dios nanderĩ nyii no. Sã ñee Isaac nã nyii no. ²⁹ Sã Dios ñee Abraham je nyii no. “Nderiirina tamondo ndeje Isaac”, sã i ee no. Sã Isaac nyaacuquia Espiritu Turã nã no. Sã Agar riirĩ icua icua Isaac je cote no. Eĩ si chõ namo no nde. Ae siqui tuchi judíos cheẽ ndui nae, ùquĩ icua icua ndiqui namo nande je ã no. ³⁰ ¿Mañi ño embesa ji cheẽ ña? “Erimba emombo chõ. Eriirĩ ndese. Eninisite riirĩ na eã ño erimba riirĩ nde. Erimba riirĩ siqui aroneate eninisite riirĩ ndese”, i que embesa ji ra. Eĩ si chõ ae siqui tuchi quia judíos cheẽ ndui nae. Siqui aroneate Jesús quiatorã. ³¹ Erimba riirĩ na eã tuchi chõ nande re. Eninisite riirĩ na tuchi chõ nande re. Nande Jesús icua mose.

5

Cristo nandembui Moisés chimbese si cote

¹ Cristo que nandembui Moisés chimbese si cote ra. “Moisés chimbese cheẽ nda semingo bei”, jenyechĩ nda jê. Ae ra i ùquĩ, mbia rimba rã ño ùquĩ nde. ² Tacheẽ nye-cua tuchi rã jêje. Circuncisión nda jêsaãchĩ. Moisés chimbese cheẽ ndui ra jêingochĩ cote jê. Cristo mĩ ndese chõ jêingo cote. Jê circuncisión naa mose, jêingo turã eã ño nguiã Cristo rui ùquĩ cote. ³ “Moisés chimbese cheẽ tamumbayã mbei”, i raanguia chõ circuncisión nde. ⁴ “Dios ra seisi turã seico bei mose Moisés cheẽ ndui” i mose jemo, Dios cheẽ abi tuchi chõ ùquĩ nde. Dios turã si nyicuasẽ tuchi chõ ùquĩ nde. ⁵ Espiritu Turã ndiqui nanderese co. Nande Jesucristo nandeicuate quia ã. Nyebe ra Dios nandeisi turã Jesucristo mĩ nã. ⁶ Nandeico mose Jesucristo rese,

eĩ ja chõ nande ee re. Ae circuncisión saã nae, ae circuncisión saã eã no nae, eĩ ja chõ nande ee re. Jesucristo icua mose, ũquí nguia eturã tuchi re. Nandechesecua mose mbia rese, ũquí nguia eturã tuchi no nde. ⁷ Jẽingo turãte rei que equia nyii. ¿Aba jembui Cristo cheẽ si cote re? ⁸ Dios eã ño ngue jembui nguia esi. Dios chõ ngue “jenyu” i nguia jẽje. ⁹ Sã levadura riqui no. Eñetẽ mondo mose mbichae ye, mbuquiche ja rae. ¹⁰ Dios ra jendeaquiatu bei. Mbua mo jembuicha eã sacua esi. Ae jembuicha serite quia esi nae, ũquí nda Dios mbasi. Ererecua raque ra emo. ¹¹ “Circuncisión jẽsaã na”, ae ãte quia mbia mo je co. “Circuncisión jẽsaã na”, se i mose, eĩ nda judíos icua icua eãte rei seje. Eĩ nda judíos paama i ãte rei seje Cristo mano nenei nenei mose mbia je. ¹² Ae “circuncisión jẽsaã na”, i quia jẽje nae, ũquí nda nguete chisia tuchi rã jendecha chã.

¹³ Jesucristo que jembui Moisés cheẽ si ra, Seresenda. Ae icua jenyosei chosei quia nae, ũquí ndese ra jẽingochĩ cote jẽ. Jẽingo turã nguia quia jenyue. Jenyesequa tuchi quiatu quia jenyiese. ¹⁴ Dios cheẽ ja tuchi chõ ã nde: “Sã ereico nyesequa ndechiese no. Eĩ ere si chõ nyesequa emo ndese”, i que Dios cheẽ nda. Nandechesecua mose mbia rese, Dios cheẽ nandemumbayã tuchi chõ nguia ũquí. ¹⁵ Paama jenyechĩ nda jenyue jẽ. Jenyishiu shiuchĩ nda eno jẽ. ũquí naa naa mose ra jẽhuĩ ja ja chee Cristo si.

Ae icua nandehosei chosei quia nae, ũquí si nandehui

¹⁶ Tacheẽ nyecua tuchi jẽje. Espiritu Turã ñee ndui bei jẽingo. Ae icua jenyosei chosei quia nae, ũquí ndese nda jẽingoã cote chã. ¹⁷ Ae mbae icua nandehosei chosei quia nae, Espiritu Turã quiatoã tuchi chõ ũquí nde. ũquí quiatoã tuchi chõ Espiritu Turã no nde. Ae nandehosei chosei quia, nyebe ra ũquí nandesaã eã. ¹⁸ Jẽingo mose Espiritu Turã ndui, “Moisés cheẽ nda nandemingo bei” jenyue eã nda cote. ¹⁹ Ae siqui quia ubi icua ndese nae, mbae icua esaã ata atate quia ã. Siqui siqui chõ nguia ngũinisiã ndese. Cuña abe siqui siqui chõ nguia ngu eã ndese no. Siqui choõno mbia rese.

²⁰ Dios abareã ndese siqui choõno. Brujería abe rese siqui choõno. Mbua ucuãyã cuãyã. Siqui icua icua nyue. Mae icua icua emo ndese. Paama i jei jei emo je. Abei chiã. Mbua mbuqueta queta. ²¹ “I ãchĩ sembae”, i mbia mbae osei osei. Mbua iquia. Quiacua. Siqui choõno mbae ja rese. Ae ã icua ñumumbara saã saã mbeite quia nae, ũquí nderecuarã eã mbei ra Dios.

Espiritu Turã ño aba mingo nguia mbae turã ndese

²² Ae siqui quia Espiritu Turã ndese nae, Espiritu Turã ño emingo nguia mbae turã ndese ã. Nyesequa chõ nguia mbia rese. Eya chõ eriqui nguia. Quicoi coi eã ño nguia. Siqui tochi chõ nguia. Siqui turã ño nguia. Ucheẽ mbuchebi chebiã ño nguia. ²³ Eseteã ño eriqui nguia. Ae ae chõ nyiteaquiatu nguia mbae icua si. Nande ũquí naa naa mose, emo ñee aroneãte nande je cote. ²⁴ Sã Cristo mano nyii no. Eĩ si chõ Cristo quiato undua icua mbutiã nguia no. Cristo mano nyabe.

²⁵ Sã Espiritu Turã ndiqui nandereco mingo turã co no. Eĩ nande sí siqui turã erui jẽ. Ae nandererequia turã bei nonde mbae turã ndese. ²⁶ Nandecuaçu ra nandesaã saãchĩ jẽ. Nandecua techĩ nda nandechue jẽ. “Aque rã eãchĩ se”, nandechĩ nda mae icua icua nandenongue rese jẽ.

6

Jendua chõ nguia nyiese mbae mo naa jenongue je

¹ Emo mbae icua naase i i mose, “Dios rui eico” jenyue chõ ee. Ae jemo siqui tuchi quia Dios rese, ũquí mo ñee ee. Embucuaata turã sí nonde Dios rese. Jeñee mingue mingue chõ nguia ee. “Mbae icua tã i arõte se abe je”, jenyue chõ nguia ndua jẽ abe. ² Jendesenda ia eã ndasi mose, jendua chõ nguia erese mbae mo naa naa ee. Cristo cheẽ mumbayã ja chõ ũquí nde. ³ “Seaquiatute rei ñene”, i mose eaquiatuã mo, ae sí chõ ñimbirĩ irĩ nguia aque. ⁴ Ae ra eresaã mbae mo nae, esaã turã mbei chõ nguia. ũquí mose ra ndeya quiatu tuchi ndechisaã ndese. Mae ndocoĩ emo nyisaã

ndese. ⁵ Nande ae ae nandechimbirãcuã nguiátu nandeya eã ndasi ae ae je.

⁶ Emo siqui mose jembaaquiatu quiatu Cristo rĩ, mbae ja quia jemondo mondo quia ee. ⁷ Erechimbiĩrĩ irĩchĩ nda ndechue si jẽ. Dios abe erembĩrĩ irĩ aroneate. Ae ra erechitiquia mbae mo nae, ũquĩ sí chõ nda ereucua. ⁸ Ae siqui quia ubi achõ ndese nae, ũquĩ nda ua chee. Ae siqui Espíritu Turã ndui nae, ũquĩ nda Espíritu Turã mingo bei. ⁹ Nandechimondocho eã ño nguia mbae turã naa naa mbei jẽ. Nandehui eã mbei chõ nguia esi jẽ. Ũquĩ mose ra Dios mbae mee tuchi jee nande je cote. ¹⁰ Mbae turã nandesaã saã mbei chõ nguia mbia je. Jesús quiato je quia mbae turã nandesaã saã tuchi jiri.

riĩ ño ũquĩ nde. ¹⁸ Sã Jesucristo turã ndiqui bei jendese, Seresenda. Amén.

Pablo hui bei saludar i mbia je

¹¹ Seo ae je chõ co ambesa mondo nguia jẽje aque. Sã letras cuasute. ¹² Ae “circuncisión jẽsaã”, i quia jẽje nae, siqui turã sacua mbia rese chõ ũquĩ nde. Siqui turã ndocoĩ Cristo rese. “Cristo ae ra aba mingo bei” i sereaã. Siquichete quiatu mbia si re. ¹³ Ae circuncisión saã nguia nae, ũquĩ abe riqui eã Moisés cheẽ ndui ũquĩ. “I nda mbia riqui ureru”, i chõ nguia “circuncisión jẽsaã” i jẽje ũquĩ. Ucuasu ra esaã saã jẽ circuncisión naa mose. Eyate ra jendese cote, jẽingo mose erese. ¹⁴ Jesucristo mĩ ndese chõ nda seya se. Ae mano ira rese. Ae mĩ nĩ nda acheẽ ñee mbia je. Mbaemo ndese abe eã nda seya se. Jesucristo mano mose ira rese, se abe que amano mbae icua si ra. Mbae icua abe que mano sesi no nda. ¹⁵ Nandeico mose Cristo rese, eĩ ja chõ nande ee re. Ae circuncisión saã nae, ae circuncisión saã eã no nae, eĩ ja chõ nande ee re. Dios nandechiã mbiasu mose, ũquĩ nguiatu eturã tuchi re. ¹⁶ Ae siqui quia Jesucristo mĩ ndese nae, sã Dios turã ndiqui bei ũquĩ ndese. Sã Dios riqui embia bei. Sã Dios turã ndiqui bei ngũimba ja je. ¹⁷ Secheẽ nda jẽsibishorõchĩ namo jẽ. Emo mose abe jẽ. “Pablo eaquiatuãte”, sã emo i eã cote. Sã mbae rasi airara rara beite quia Cristo rĩ co no. Sã seiruã nuasa cherõ areco serete rese co no jẽ. Jesucristo

LA CARTA DEL APOSTOL SAN PABLO A LOS EFESIOS

Pablo embesa Jesús quiato Efeso jenda je

¹ Se rei Pablo. Dios que seirabo ra. Jesucristo chimbaaquiatu sacuã. Co ambesa mondo quia jêje aque. Jesús icuasa je. Efeso jenda je. ² Sã Dios riqui uturã ndeacuquia bei jêje. Jesucristo abe no. Sã ũquĩ ndiqui jembia bei.

Cristo mbae turã saã ja nande je

³ Nandechê turã mbei chõ nguia Dios rĩ. Jesucristo ru rĩ. Jesucristo rese chõ nandeco nguia ã cote. Ibatenda chõ nandeco nguia ã cote. Nyebe Dios riqui nguia mbae turã naa jate nande je co. ⁴ Dios que nandeirabo nyii ra. Cristo rĩ. Mbae ao ja nonde. Nyesequa tuchi que nanderese ra. Nyebe nandecuã mbutiã ja nguia nandesi. Nandeco turã sacuã enonde. ⁵ Dios que nandeirabo tuchi coose ra. Mbae ao nonde. —Jesucristo rĩ nda seriirina jê, i que nande je nandecuã mose ra. ⁶ Nandechê mbei sacuã Dios turã nĩ. Uturã je chõ nandesi nguia Jesucristo rĩ. ⁷ Jesucristo mĩ ngue mano nanderirõ sacuã mbae icuã si ra. Ae rĩ ño Dios nandecuã mbutiã nguia nande si cote. Dios turãte quia nande je re. ⁸ Dios que uturã teacuquia ja nande je ra. Nyebe eriqui nguia mbae icua jate nande je. ⁹ —Seriirĩ nda amondo mbia je íbii. Ae ra mbia manguê choõoa jenda mingo ja serese cote, i que Dios cose ra. ũquĩ ngue eteacuquia nande je cote ra. Nande eicua sacuã. ¹⁰ Dios icoquiatu mose ra mbae mbuchicuabo ja cote. Nandemunua ja ra ño Cristo nonde. Cristo ra mbae rerecua ja tuchi aque mose cote. Ibi jenda rerecua ja. Ibatenda abe rerecua ja.

¹¹ Ae Cristo saã nande je nae, ũquĩ nĩ ño ngue Dios nandeirabo nguia cose. Mbae tiã mose que Dios nandeirabo nyii ra. Ae sí mbae turã naa naa sacuã nande je. Dios cheẽ nguire mbae riqui nyecua bei ã. ¹² Urecheẽ turã mbei sacuã Dios rĩ ño ngue ureirabo nguia. Ure rane ngue Cristo

ureicua nyii ra. ¹³ Jê abe que Cristo jêicua chee cote ra. Jê echeẽ turã andu mose. —Cristo ra jendirõ jêicuã si, i mose jêje. Jê Cristo icua mose que Espiritu Turã Cristo mbae marca mĩ jendese ra. —Espiritu Turã tamondo Cristo icuasa je, i Dios quia nyii nae, aque sí que Cristo mbae marca mĩ jendese cote ra. ¹⁴ Espiritu Turã ndiqui nandechiangui re co. Nyebe nandeco nguia ñee. —Dios ra mbae mee ja nande je ucheẽ nguire, i. Dios que nandesi Jesús ruqui ribishorõ nda. Nandemingo bei ra erese cote. ũquĩ nĩ ño Espiritu Turã Cristo mbae marca mĩ nguia nanderese. Nandechê turã mbei sacuã Dios rĩ ño ngue ũquĩ nde.

Sã Dios jembirandu uquirãcuã ndese, i Pablo

¹⁵ Airandu que jendese ra. Jesús jêicua tuchite quia ũquĩ. Jenyesequa tuchite equia Dios quiato ja rese ũquĩ. ¹⁶ Nyebe aico nguia ñee hui ãte Dios je. Gracias, i bei ee jeni. ¹⁷ —Paba, ndequiato embaaquiatu tuchi Cristo rĩ. Cristo eicua uquia tuchi ee, ae beite se quia Dios turã je jeni co. ¹⁸ Acheẽ mbeite quia Dios je jeni co. —Paba, ae turã nda eresaã je ndequiato je nae, ũquĩ ndese embirandu jiri namo. Ae turã nda eremeje ee nae, ũquĩ ndese abe embirandu. ¹⁹ Ndequirãcuã ndese abe embirandu, ae beite quia Dios je jeni co. Dios quirãcuã nda ua eã mbei. Equirãcuã ndiqui Jesús quiato chiangui re ja ã. ²⁰ Dios quirãcuã ae que Jesús raaque mbuquera si ra. Dios quirãcuã ae que Jesús mbocoi mĩ ujii ra. ²¹ Dios que Jesús mĩ mbae rerecuarã ja ra. Ae quia rei i tuchi ererecua mo si. Gobierno mo ab e si. Ae quia rei ecuasu tuchi ibi jenda ja si. Ibatenda abe mo si. ²² —Mbae ja rerecua tuchi rei Jesús, i que Dios ra. —Sequiato rerecua ja chõ ae re, i que Dios ra. ²³ Dios quiato rei Jesús rete rã. Jesús riqui uquiato chiangui re co. Manguiti eriqui eã aroneate. Mbae aosa ja chõ ae re.

2

Uturã nĩ Dios aba rirõ aba icuã si

¹ Dios que ngueco mondo jêje cote ra. Jêicuã nĩ ño ngue jêingo nguia eraaque rã

nyii. ² Mbia ataque rã tuchi que jëingo aque mose ra. Mbae icuã naa naa ndesechi. Satanás ñee ndui beite que jëingo nyii ra. Equirãcuãte que eriqui jëje ra. Ae siqui ãte quia Dios rese nae, ùquĩ ño Satanás ñee mumbayã nguiã ã. ³ Eĩ nande que equia cose nyii ra. Ae nandebite riqui mbae icuã nyii nae, ùquĩ ndesechõ ño ngue nandeico ra. Ae rese nandeico ndua beite mbae icuã nyii nae, ùquĩ ndesechõ ño ngue nandeico nyii ra. Mbia ataque rã sí chõ ngue nandeico mbae icuã naa naa nda. Dios nda nandembasi nguiã nandeicuã ñi ña. ⁴ Eyayãte quiatu ngue eriqui rei nguiã nanderese. Nyesecua tuchite quiatu que equia nanderese ra. ⁵ Eraaque raãte raque nande nandeicuã ñi nyii. Nyebe ngueco turã mondo nguiã nande je Cristo raaque mbuquera si mose. Dios turã ae chõ jendirõ nguiã jëicuã si. ⁶ Dios Cristo raaque mbuquera mose que nande abe mbuquera echabe ra. Dios que nandemingo erese ibate cote ra. ⁷ Dios turã tuchi riqui nande je Jesucristo riĩ co. † nda mbia jirandu randu Dios chisaã turã ndese emo mose. Ibátee nandeico mose abe no. ⁸ Jë ngue Jesús jëicua ra. Nyebe que Dios jendirõ jëicuã si ra. Uturã ñi ño ngue jendirõ nguiã jëicuã si. Jë ae jeñimbucha aroneate Jesús rese. Dios ae ngue jembucha nguiã erese. ⁹ Nandechisaã turã ñi eã ño Dios nandembucha nguiã Jesús rese. Nyebe nandemo ndiqui uturã naa naa aroneate. ¹⁰ Dios ae que nandea ra. —Se emingo mose Jesucristo rese, aque mose quia ra mbae turã naa naa cote, i que Dios nanderiĩ cose ra.

Cristo mii ño mbia mingo turã turã nguiã nyiese

¹¹ Dios rese que jëingo ãte nyii ra. Ùquĩ si jëtesareia ño. Judíos eã ño ngue jë ndesë. Nyebe judíos jendirirõ nguiã. Circuncisión ngue jësaã eãte judíos rã ndesë. ¹² Jëingo eãte que Cristo rese nyii resë. Jëingo turã eãte que equia Dios rimba je resë. Dios cheë si que jëingo ishote resë. —Dios ra mbae turã saã nande je, jenye ãte que equia ndua aque mose resë. ¹³ Jesucristo mbae chõ jë cote re. Ishote jëingo raque Dios si cose. Dios que jembucha tuchi

uchiese Jesucristo mano ñi nda. ¹⁴ Cristo mii ño nandemingo turã nguiã nyiese ã. Ae mii ño judíos mingo turã nguiã judíos eã ndese co. Ae mii ño judíos eã mingo turã nguiã judíos rese co no. Ùquĩ ngue siqui icuãte quia nyue Cristo icuayã mose nyii ra. Mbia mii na ño eriqui nguiã siqui turã nyue ã cote. ¹⁵ Umano mose que Jesús judíos mbui mondo Moisés cheë si cote ra. Ae Moisés ñee, judíos echeë mumba eã sacuã nae, ùquĩ si que Jesús embui cote ra. Nyebe judíos siqui turã arõte judíos eã ndese ã cote. Judíos eã abe siqui turã arõte judíos rese cote. Ùquĩ siqui mose Jesús rese, co mii na ño eriqui nguiã ã cote. Mbia mii mbiasu ji rã ño eriqui nguiã ã cote. ¹⁶ Ùquĩ icuã icuã mose nyue que Cristo mano ùquĩ icuã ndiquicharõ nda. Ùquĩ mingo turã ja nonde Dios rese. Siqui turã mose Dios rese, siqui turã nda nyue cote. ¹⁷ Cristo que mano mbia mingo turã sacuã Dios rese ra. Tu que mbia mbiirandu ja nonde nyiese ra. Judíos. Judíos eã abe mbiirandu nonde nyiese. ¹⁸ Cristo que mano nande ja je ra. Judíos je. Judíos eã je abe no. Nyebe Espiritu Turã mii nandemingo ja nguiã nyiese ã. Dios nandesichã ja arõte qui a ã cote. ¹⁹ Mbiamo eã ño jë Dios je cote re. ã jëingo isho eãte Dios si ã cote. Dios riirĩ tuchi chõ jë cote re. Cristo resenda ataque rã sí chõ jëingo nguiã ã cote. ²⁰ Tuchua raã ji mo na ndei jë. Jesús chimbaaquiatu rei tuchia i rã. Dios cheë mbuchecuada cose ndare abe rei tuchu a i rã no. Jesucristo rei ùquĩ i tuchi. ²¹ Nande Jesús icua mose, Dios chuchua turã naanguia chõ nandeico nguiã Jesús je ã. Nande Jesús quiato tubiriã i ite riqui ã. ²² Espiritu Turã ño jemingo nguiã Dios rese jë abe ùquĩ. Nyebe jë abe jëingo Dios chucharã ùquĩ. Dios riqui jeñiangui re ùquĩ.

3

Judíos eã abe ra siqui Dios rese, i Pablo

¹ Se rei Pablo. Jesucristo rimba. A setarõ ji ñi jeni a. Jë judíos eã ñi. —Judíos eã abe riqui Dios rimba ã, ae beite que se quia jeni nda. Nyebe setarõ ji ñi nguiã a. ² —Judíos eã je chõ seturã esenei senei nde,

í que Dios seje ra. Ũquí ndese beite aico co. Jẽirandu equia serese reae. ³—Judíos eã abe ra siqui serese. Secheẽ turã esenei senei ee, í tuchi que Dios sembaaquiato ra. Ũquí ngue asenei jua chõ jẽje ra, se embesa mose ra jẽje nyii. ⁴ Sechimbese rese jemaie mose ra jẽnee cote. —Pablo Dios cheẽ icua tuchi chõ nguia judíos eã nĩ nde, jenyee ra cote. ⁵—Judíos eã abe ra siqui serese judíos rã si tuchi, í eã ngue Dios mbia mo je cose ra. Namõ ño mbia jirandu nguia ũquí ndese. Namõ ño Espíritu Turã Jesús chimbbaaquiato mbiirandu nguia ũquí ndese. Dios cheẽ mbuchecua abe mbiirandu ũquí ndese. ⁶ ã ndei Dios cheẽ mbuchecua ramo ji ã: Judíos eã abe ra siqui Dios rese judíos rã si tuchi cote. Mbia rete mĩ na nda eriqui ja cote. —Mbae turã tasaã jẽje Jesucristo rĩ, í mose Dios, judíos achõ je eã ño eriqui nguia ñee. Judíos eã abe je chõ ñene.

⁷—Ũquí secheẽ esenei senei mbei quia mbia je, í que Dios seje ra. Mbae turã mo asaã eã ndaque Dios je nyii. Uquirãcuã abe que emee seje ũquí naa sacua nda. ⁸ Dios turã tuchite que seje ra. Se mbae raande rocoĩ ee nyii. Nyebe ñee nguia seje. —Secheẽ esenei senei mbei quia judíos eã je. Ae rese mbia riqui jiranuate Cristo turã nae, ũquí esenei senei judíos eã je, í que seje ra. ⁹—Ae turã nda asaã judíos eã je nae, ũquí ndese mbia embiirandu ja cote, í que Dios seje ra. Dios quiarei ndua ndua ũquí nyii. Mbae ao ja nonde nyii. ¹⁰ Mbaerã ño Dios mbia mbiirandu ũquí ndese cote chã. Mbia jirandu sacua Dios aquiato rese chõ ñene. Dios judíos eã mingo turã mose judíos rese, mbia ra nyuruira tuchi mae Dios quirãcuã ndese. Ibatenda abe ra nyuruira tuchi mae erese no. ¹¹ Dios ndua ndua ũquí nyii. —Mbia chumumbarate riqui raque ã. Emo emo nda ambucha nyiese Cristo mano mose, í que Dios cose ra. Ũquí ngue esaã Jesucristo rĩ cote ra. ¹² Nandeico Jesucristo icuate ã cote. Nyebe nandeico nguia siquicheãte ñee Dios je ã cote. ¹³ Ae mbae rasi asaã nguia cárcel co nae, jeni ño ñene. Seyate se mbae rasi raã mose jeni. Jẽ abe jeñimb

chõ nguia serese.

Cristo nyesecua tuchi uquiato rese

¹⁴ Judíos eã abe chõ Dios mingo nguia uchiese. Nyebe aico nguia gracias í bei Dios je co. ¹⁵ ã nandechumumbarate riqui íbii ã nae, ũquí ndu ja chõ Dios re. Ibatenda abe ru chõ ae no nde. ¹⁶ Dios mbae saã ja arõte nande je. Ebite mbae raã mose nande je. Nyebe aico nguia ñee ee jeni a. —Paba, Espíritu Turã emondo tuchi echiangui re. Embuquirãcuã sacua, ae chõ nguia ee a. ¹⁷—Paba, sã Cristo riqui tuchi echiangui re. Sã Cristo icua tuchi. Sã eriqui nyesecua tuchi Cristo rese, ae beite se quia Dios je jeni co. ¹⁸⁻¹⁹ Mbaerã ño Dios riqui nyesecua tuchite nanderese co. Co eriqui nyesecua tuchite nande rese co. Jendua tuchi quiato quia ũquí ndese. Sã Cristo quiato riqui ndua ja ũquí ndese. Sã Dios riqui tuchi jeñiangui re. ²⁰ Dios quirãcuã ndiqui beite nandechiangui re co. Nandembirãcuã mbeite equia co. Nyebe eriqui mbae raã ja arõte nande je co. Ae rese nandeico ndua eãte nae, ũquí abe chee esaã arõte quia nande je co. ²¹ Sã Jesucristo quiato riqui ñee turã mbei Dios je Jesucristo rĩ. Mbae ua ja mose chee. Eĩ si ra equiatio quia ñee turã mbei erĩ. Amén.

4

Hue rĩ ja chõ Espíritu Turã ndiqui nguia Jesús quiato mundua

¹ Setarõ ji aĩ Jesús rĩ a. Secheẽ amondo quia jẽje aque. Jẽingo turã ño nguia Cristo rã si. Dios chiirabote quia jẽ nde. ² Jẽseteã ño jẽingo. Jẽingo tochi chõ nguia. Jendoseĩ nguiatu chõ nguia jenyue. Jenyesequa chõ nguia jenyiese. ³—Hue rĩ ja chõ nandeico ndua jẽ, jenyee chõ nguia jenyue. Sã Espíritu Turã ndiqui jemundua hue rĩ ja. ⁴ Jesús rete mĩ na ño nande re. Espíritu Turã mĩ ño siqui nguia nandechiangui re co no. Jesús mĩ na nda nande ja nandeico. ⁵ Ae mĩ ño nandererequa ja re. Ae mĩ ndese chõ nandeico ja nguia ã. Aque mĩ ño ño ngue bautizar í nguia nande je no. ⁶ Dios mĩ ño nanderu ja re. Ae mĩ ño nandemingo nguia mbae rese. Ae mĩ ño siqui

nguiã nandeite re co no. ⁷ Dios que nandehisaã ae aerã mee nande je ra. Cristo que uturã mee mee nande je ra. Ae ra nandesaã saã, ùquĩ naa naa turã sacuaã. ⁸ Sã embesa ji riqui ñee no:

Cristo que nyui oso ibate ra.

Mbia tarõ ji que equerao ra.

Mbia chisaã ae aerã ngue emee mee mbia je ra,

i que embesa ji ra. ⁹ Jesús que siqui ibátee nyii ra. Aquere que eru nguichí íbii cote ra. ¹⁰ Ae sí que oso nyui ibei robei cote ra. Mbae rerecuarã ja sacuaã ngue ae cote ra. ¹¹ Ae que mbia chisaã ae aerã mee ee ra. —Apóstoles ra jẽ, i que emo emo je ra. —Secheẽ embuchecua checua quia mbia je, i que emo emo je ra. —Mbia sequiatoã je secheẽ turã esenei senei mbei seriĩ, i que emo emo je ra. —Mbia serimba eteaquiato bei, i que emo emo je ra. —Mbia embaaquiato quiato bei quia, i que emo emo je no nda. ¹² Eĩ ngue Dios uquiato mbaaracua racua ja uchisaã ae aerã ndese ra. Ùquĩ mose ra Jesús quiato Jesús ose i i tuchi cote. ¹³ Ùquĩ mose ra nandendua ja Jesucristo rese hue rĩ ja. Ùquĩ mose ra Jesucristo nandeicua i i tuchi. Jesucristo rã nda nandeico chee ùquĩ mose. ¹⁴ Ùquĩ mose ra nandeico ñimbirãcuã tuchi Cristo rese. “Tambiriĩ iriĩ Cristo rĩ” i mose emo nande je, nandeicoã nda ùquĩ ndese. Nandendua ata ata eã nda Cristo rĩ. Ae mii ndese chõ nda nandeico bei. Mbia ririĩ na nda nandeico ndua ata ata eã. ¹⁵ Ùquĩ mose ra nandechẽ ñooño eã. Mbia ra nandembiriĩ iriã. Nandechesecua ja ra equia mbia rese. Cristo rã si chõ nda nandeico turã. Dios quiato rerecua tuchite quia ae re. Sã nandẽquĩ nanderete rerecua no. ¹⁶ Sã nanderete riqui ñimbirãcuã ja no. Eĩ si chõ Cristo rimba nguiã ñimbirãcuã ja siqui turã nyiese. Sã nanderete no. Nanderete resenda siqui turã ja mose, nanderete rasiã ja rae.

Ae icuaã jẽsaã saã nguia nyii nae, ùquĩ jẽsaã saã eãte quia namo ã

¹⁷ Jesús cheẽ tuchi chõ ã nde: Dios icuasa reã na nda jẽngochĩ cote jẽ. Ndua chooño ño nguiã mbae rese ùquĩ. ¹⁸ Eãquĩ ãtã ño ùquĩ nde. Dios cheẽ andu sereã nea

je chõ ùquĩ nde. Nyebe Dios riqui nguiã ngueco mee eã tuchi ùquĩ je. ¹⁹ Mbae icuaã achõ ndese chõ eriqui nguiã ndua ndua. Eireĩ nguiãte mbae icuaã naa naa mose cote. Oo oo tuchi mbae icuaã ja rese. ²⁰ Ùquĩ ngue Cristo jembaaquiato quiato eã jẽ nda. ²¹ Jẽirandu que Jesús rese resẽ. Ae sí chõ ngue jembaaquiato resẽ. Jembaaquiato que ucheẽ turã nii nda. ²² Jeñiangui renda icuaã si jẽhui chõ. Aba mbiicuãsa tuchi chõ ùquĩ nde. Aba mbiiriĩ iriĩ ño ùquĩ nde. ²³ Jendua ndua jembiasu chõ ae. Ae rese jẽingo ndua icuaã icuaã nyii nae, ùquĩ si jẽtesarei chõ cote ae. ²⁴ Jeñimbiasu chõ nguia ae. Ùquĩ mose ra jẽingo Dios rã si. Jẽingo turã tuchi ra equia ee.

²⁵ Jeñee ñooño eã ná nguia jendesenda mo je cote ae. Nyiesenda ja chõ nande cote re. ²⁶ Jẽ paama i mose, paama jenyete turã ño nguia. Paama jenyete ocoã ño nguia. Tenda oso nonde ti jenyete. ²⁷ Jẽ paama i oco mose, diablo ra jembicuãte cote. ²⁸ Ae mbae mbuquiachã quiachã nguia nae, sã mbae mbuquiachã eã cote. Sã ae ae mbae ao ao o je icua cote. Sã eriqui mbae mondo mondo mbaecha reã je cote. ²⁹ Jenyuru jendecochõ ño nguia ñee ndocoĩ mbae icuaã nii jẽ. Mbae turã nii ño jẽingo ñee mbia je jẽ. Emundua ndua sacuaã Dios rese. ³⁰ Espiritu Turã nda jembia eã eãchĩ jẽ jẽ. Ae chõ ngue Cristo mbae marca mii nguiã jendese. Nyebe jẽingo nguiã ñee. —Cristo ra nandembiasu erã si, i. ³¹ Paama jenyechĩ nda emo nii. —I ãchĩ se, jenyechĩ nda emo nii jẽ. Jẽtasẽ tasẽchĩ nda emo je. Jeñee icuaã icuaãchĩ nda emo nii. ³² Jẽturã ño jẽingo jenyete. Jẽseteã ño jẽingo jenyete. Jendesenda icuaã icuaã mose jẽje, jẽtesarei chõ eicuaã si. Sã Dios jẽicuaã mbutiã jẽ Cristo rĩ nyii no.

5

Dios quiato siqui bei mbae turã ndese

¹ Dios ririĩ tuchi chõ jẽingo nguiã ã. Nyesequa tuchi equia jendese co. Erã si chõ jẽingo. ² Jenyesequa tuchi quia mbia rese. Sã Cristo riqui nyesequa tuchite nanderese no. Sã mano nandeicuaã ndiquicharõ oveja rã no. Emano mose que Dios ia tuchi erese ra.

³ Cristo mbae chõ jẽ cote re. Nyebe jẽingo eã emo ninisi rese. Eruã mo ndese abe no. Emo mbae ra jenyosei choseichĩ. Eicuãte ùquĩ. ⁴ Jenyuru jendecochõ ño nguia ñee ndocoĩ mbae icuã ñĩ. Mbae icuã aba ireingua riĩ jeñee eã. Eicuãte ñee mose ùquĩ. Gracias jenyeye quiatu quia Dios je. ⁵ Emo siqui mose ngũinisiã ndese, aque ra siqui eã Cristo rese, Cristo siqui mose ererecua. Ae mbae icuã saã saã mbeite quia nae. Ae emo mbae chosei chosei quia nae, ùquĩ abe ra siqui eã Cristo rese. Emo mbae osei osei mose, Dios abareã ndese siqui raanguia chõ ùquĩ no nde. ⁶ Ae ùquĩ saã saã nguia mbae icuã nae, ùquĩ je ra Dios mbae rasi raanguquia tuchi. “Ichõ:ño ñene” ichĩ nda emo jembĩrĩ irĩ jẽ. ⁷ Ae ùquĩ saã saã nguia mbae icuã nae, ùquĩ ndese ra jẽingochĩ jẽ. ⁸ Itondaruqui re rã ngue jẽingo cose ra. Nyaáshĩ ño jẽingo nguia Jesús rese ã cote. Nyebe jẽingo turã. ⁹ Ae siqui nyaáshĩ nae, ùquĩ siqui turã ño nguia ã. Ñee ñooño eã ño nguia emo je ã. Siqui ãte equia mbae icuã mo ndese ã. ¹⁰ Ae Dios bite riqui nae, ùquĩ ndese chõ jẽingo ñimbaaquiato quiatu. ¹¹ Ae itondaruqui rĩnda saã saã nguia mbae icuã nae, ùquĩ nda jẽsaã saáchĩ erese jẽ. Echiao icuã ñĩ ño jeñee ee emundua jẽ. ¹² Ae ùquĩ saã nyecuayã cuayã nguia mbae icuã nae, aba ireĩte ñee ùquĩ ñĩ. ¹³ Jẽ ùquĩ nyiao icuã mbuchecua mose ee, ndua ndua ra erese cote. Emo emo siqui arõte Cristo rese cote. Itondaruqui rĩnda recha mbae icuã. ¹⁴ Sã embesa ji riqui ñee no: Ae uque saã saã nguia nae, sã ùquĩ ñumumba. Ae siqui quia eraaque rã nae, sã ùquĩ quera si. Ùquĩ mose ra Cristo uturã ndeacuquia ee, i que embesa ji ra.

¹⁵ Cochee tuchi chõ jẽingo Dios rese. Mbia aquiatuã na nda jẽingochĩ. Mbia aquiatu rã nguia jẽingo. ¹⁶ Ae Dios bite riqui nae, ùquĩ ndese chõ jẽingo ñimbecoteã. Mbae icuã icuãte eriqui ã cote. ¹⁷ Jẽaquiatuã eã ño jẽingo Dios rese. Ae Dios bite riqui nae, ùquĩ ndese chõ jẽingo ñimbaaquiato quiatu. ¹⁸ Jẽquiacua quiacuachĩ nda equia jẽ. Jẽquiacua mose mbae icuã jẽsaã saã ja arondete. Espĩritu

Turã nguia tu jemingo tuchi jeñiangui re. ¹⁹ Cristo riĩ jeñee turã tuchi quiatu quia jenyue. Jẽirasei rasei tuchi quiatu quia Dios je. Himnos. Salmos. Jẽya chõ jẽingo irasei rasei Dios je. ²⁰ Dios rei nanderu. Ae chõ mbae ja mee mee nguia nande je co. Nyebe “gracias” jenyeye bei quiatu quia ee Jesucristo riĩ.

Jẽingo turã ja chõ nguia jenyuchua jenda ja je

²¹ Jenongue cheẽ jemumbayã ño nguia. Cristobi tuchi chõ ùquĩ nde. ²² Sã cuña ngu cheẽ mumbayã. Sã eriqui Dios cheẽ mumbayãte no. ²³ Eru quia rei ngũinisi rerecua. Sã Cristo uquiato rerecua no. Cristo quiato rei Cristo rete rã. Cristo quiatu ngue esirõ nguia eicuã si. ²⁴ Sã Cristo quiato riqui echeẽ mumbayãte no. Eĩ si chõ cuña nguia ngu cheẽ mumbayã mbei. ²⁵ Sã eru riqui nyesecua tuchi ngũinisi rese. Sã Cristo nyesecua tuchi uquiato rese no. Sã mano nyee eriquicharõ no. ²⁶ Uquiato no sacua icue chõ ùquĩ nde. Irei que i je ra. Ucheẽ je abe que eirei no nda. ²⁷ Cristo uquiato mbuturã turã ja quia co. Mbae icuã ndese emingo uquia reãte. Nyebe eyate riqui nguia erese co. ²⁸ Sã Cristo riqui nyesecua tuchi uquiato rese no. Eĩ si chõ mbia quia nyesecua ngũinisi rese. Sã emo ndiqui ngueteãte nguete rese no. Emo ngueteã mose ngũinisi rese, nguete rese ngueteã naanguia chõ ùquĩ nde. ²⁹ Emo nda nguete ucuayã eã. Nguete ra equereco turã. Teaquiato turã nda equia. Eĩ si Cristo quia uquiato rerequia turã co no. ³⁰ Cristo rete rã si chõ equiato re. Nande abe chõ Cristo rete rã no nde. ³¹ Dios que ñee nyii ra. Emo ngũinisirã ndea mose, sã nyao usi si. Ngu si abe no. Sã ngũinisi mĩ ndese chõ eriqui. Co mĩ siqui rã ño eriqui nguia nyiese cote. ³² Mbaranguiatuãte raque ùquĩ icua. Nyeremo siqui mose co mĩ na. Cristo riĩ ño eriqui nguia ñee. Equiato riĩ abe no. ³³ Jẽje abe chõ eriqui nguia ñee. Jẽ nyesecua tuchi sacua jeninisi rese. Sã jẽingo nyesecuate jendete rese no. Sã cuña abe riqui ngu cheẽ mumbayã mbei.

6

¹ Mbia riirĩ, jendu cheẽ jemumbayã ño nguia. Jësi cheẽ abe. ²⁻³ ã nguie Dios ñee cose ra: “Jëingo turã ño nguia jësi je jë. Jendu je abe. Jëingo turã mbei ra equia ùquĩ mose. Jendeco ra jëingo arete íbii,” i que Dios mbia je cose ra. ⁴ Eru je tacheẽ cote. Esi abe je. Jeñee icuã icuã tuchite chĩ nda jendiirĩ je jë. Paama i chee ra jëje. Jembaaquiatu turã turã quiatu quia. Jemingo turã quiatu quia Dios rese.

⁵ Mbia rimba je tacheẽ cote. Jenderecua cheẽ jemumbayã ño nguia. Cochee chõ jëingo ee. Jëingo turã ño nguia jenderecua je. Cristo bite ùquĩ. ⁶ Jenderecua mae eã mose jendese, ùquĩ mose abe chõ jëingo embae raã naa turã ee. Mbae jësaã turã ja quiatu quia Dios cheẽ ndui si. Cristo rimbate quia jë nde. ⁷ Jëya chõ jëingo mbae raã naa mose jenderecua je. Dios je chõ jëingo nguiã eraã ùquĩ. Jenderecua ibi jenda mii je eã ño ñene. ⁸ Dios ra mbae turã mee jëje emo mose jenyiao turã ndibishorõ. Jëingo mose mbia rimba. Mbia rimba eã jëingo mose ra re no ae. ⁹ Mbia rerecua je tacheẽ cote. Jëingo turã ño nguia jë abe jenimba je. —Tareiruã nua, jenyechĩ nda embiirĩ irĩ jë. Jë abe chõ jenderecua no nde. Jesucristo rei jenderecua. Jenimba abe rerecua. Eĩ ja chõ mbia Dios je re. Mbia mii ndese ra eriqui turã eã.

Soldados rã si chõ jëingo nyiquisã mbae icuã si

¹⁰ Hui bei nonde ã tacheẽ jëje. Dios quia rei equirãcuã tuchi. Dios quirãcuã je chõ jëingo nguiã ñimbirãcuã. ¹¹ Sã soldado riqui armadura mingue no. Ùquĩ ndei nyiquisã sacua ùquĩ. Eĩ jenye si chõ nguia siqui tuchi Dios rese nyiquisã Satanás si. ¹² Ae icuã icuã ndiqui nande je Jesús rii nae, mbia eã ño ùquĩ nde. Satanás ño ùquĩ nde. Satanás nimba abe no. Aba checuayã icuã abe no. Mbae icuã nderecua ja chõ ùquĩ nde. Equirãcuã tuchi riqui ùquĩ. ¹³ Jëingo tuchi Dios rese ùquĩ icuã si nyiquisã sacua. Jëquirãcuã jëingo tuchi sacua. Jëquirãcuã mbei quia jëingo, Satanás jembicuã eã sacua. ¹⁴⁻¹⁷ Jëquirãcuã tuchi chõ jëingo. Sã soldado riqui icoquiato armadura mingue

no. Eĩ jenye si chõ nguia icoquiato diablo jembicuã eã sacua. Sã soldado riqui ngũmbi cuasa mingue no. Huiisia riinda abe mingue nyiquisã sacua no. Sã soldado riqui huiyao mingue icoquiato no. Sã escudo abe rerecua oo no. Nyiquisã sacua emo uu mombo mose ee. Sã huiite sucha atã abe mingue uãquĩ ndiquisã sacua no. Sã tiquise abe rerecua no. Soldado rã si chõ jëingo icoquiato nyiquisã sacua diablo si. Jeñee ñooño eã ño nguia. Jëingo turã mbei chõ nguia. Jëingoquiato bei quia Dios cheẽ turã nenei nenei mbia je. Dios jëicua tuchi quiatu quia. Dios icua tuchi mose ra diablo tã i eã jëje. Dios quirãcuã ndese quia jëingo tuchi mbae icuã naa eã sacua. Dios cheẽ jëicua tuchi quiatu quia. Ùquĩ mose ra Espiritu Turã siqui tuchi jendese. ¹⁸ Jeñee mbei quiatu quia Dios je. Sã Espiritu Turã jembucheẽ turã mbei quia ee. —Mbae embu seje. ã embu seje, jenye bei quiatu quia Dios je. Dios quiato ja rii ño jëingo ñee Dios je. Dios siqui turã sacua erese. ¹⁹ Serii abe quia jëingo ñee mbei Dios je. Sembucheẽ turã sacua, se echeẽ nenei nenei mose mbia je. Ae rese mbia riqui jiranuate Cristo rii nae, ùquĩ asenei senei nguia mbia je co. ²⁰ Dios que semondo ucheẽ turã nenei nenei sacua nda. Ùquĩ nii ño setarõ ji aĩ nguiã a. Jeñee mbei quiatu quia Dios je serii. Se ireĩ ireĩ eã sacua. Se echeẽ turã nenei nenei mbei sacua mbia je.

Pablo ñee hui bei

²¹ Tiquico si quia jendea aque. Ae ra mbae senei ja jëje jembiiirandu serii. Ae que mbae saã turã mbeite quia serese ra. Dios rimba turã tuchi chõ ae re. ²² Nyebe amondo nguiã jendea aque. Jembiiirandu ja sacua urerese. Jembia tuchi sacua Cristo rese abe. ²³ Jesús quiato chõ jë abe, se rã si re. Sã Paba ibatenda riqui jembia bei tuchi. Sã eriqui jembuchesequa tuchi mbia rese. Sã Jesucristo icua uquia tuchi jëje. ²⁴ Ae nyesequa tuchi quia Jesucristo rese nae, sã Dios turã siqui tuchi ùquĩ ndese. Amén.

LA CARTA DEL APOSTOL SAN PABLO A LOS FILIPENSES

Pablo tarō ji ucheē mbesa mondo Jesús quiato je

¹ Pablo chō se re. Timoteo rese. Jesucristo rimba chō ure re. A ureico ã mbesa jêje a. Felipos jenda Jesucristo quiato ja je a. Jesús quiato rerecua je abe ureico ã mbesa a. Diáconos je abe no. ² Sã Paba Ibatenda turã ndiqui jendese. Sã jembia mingo. Sã Jesucristo abe jembia mingo no.

Pablo ñee Dios je Jesús quiato rñ

³ Sendua ndua mose jendese, seya beite aico jendese co. Gracias ae beite sequia Dios je jeni co. ⁴ Se ñee ñee mose Dios je jeni, seyate riqui co. ⁵ Se Jesucristo cheē nenei namo mosenda bei chō jêingo nguiã ndua bei serese co. Nyebe jêingo nguiã mbae mondo mondo bei seje co. Nyebe seya tuchi riqui nguiã jendese co. ⁶ Dios que ucheē mingue jeñiangui re, ae si ra siqui bei jendese jembitorō tirō. Jesucristo tu chee. Ae bei. Siqui bei ra jendese. Aicuate se quia co. ⁷ Coche aico nguiã ndua ndua eĩ jendese cco. Achesequa tuchite quiatu nguiã jendese. Jẽ ngue jêingo beite quia serese ra. Jendua ndua beite que equia serese ra. Mbae mondo mondo bei seje. Mbia icuã icuã mose seje. Se mbia cheē ndiquisã quisã mose Jesús cheē si. Mbia setarō tarō mose. Ũquĩ mose abe que jêingo beite serese ra. Dios turã ndese que nandeico mae mae mbeite ra. ⁸ Dios resa aico ñee co. Jesucristo rã si aico nyesequa tuchite jendese co. ⁹ Aico ñee mbeite Paba je jeni co. —Paba, ũquĩ embuchesecua i i tuchi mbia ja rese. Ndeaquiato emondo i i tuchi ee, ae beite quia Paba je jeni co. ¹⁰ Eĩ nda mbae turã jêicua. Eĩ nda jêingo bei mbae turã ndese. Eĩ nda Jesucristo ñee asiã jêje tu mose. ¹¹ Eĩ nda Jesucristo jemingo bei mbae turã ndese. Eĩ nda mbae turã jêsaã saã ja Dios je.

Cristo mñ nñ ño aico nguiã se co, i Pablo

¹² ã tasenei jêje. Mbae icuã ngue jêjẽ jêjẽ mbeite quia seje, ũquĩ ngue Jesús cheē mbutiba eã mbei ra. Ũquĩ jêjẽ jêjẽ mose seje, mbia que jirandu tuchite quia Jesucristo rese cote ra. ¹³ A setarō ji ñi cárcel a. —Cristo rñ ño etarō ji ñi nguiã hue, i jate mbia quia serñ ũquĩ. Mbia rerecua chuchua jenda ja. Tuchuamo jenda ja abe. ¹⁴ Jesús quiato jirandu mose setarō ji rese, esiquicheãte riqui Dios cheē nenei nenei ũquĩ cote. Jesús quiato ja riqui Dios cheē nenei nenei tuchi ũquĩ cote. —Dios riqui tuchi urerese co, i equia ũquĩ cote. Maende setarō ji rese.

¹⁵ Emo emo ndiqui Cristo renei ñooño ũquĩ. Ndua icuã icuã ño nguiã ũquĩ. Mae icuã icuã ño nguiã serese ũquĩ. Emo emo ndiqui Cristo renei turã tuchi ũquĩ no. ¹⁶ Ae Cristo senei ñooño nguia nae, ũquĩ icuãte riqui seje ã. —Sã Pablo tarō ji ñiño, i equia serñ ã. Cristo renei ñooño ã. Emo ndese ndua eã. Nyiese chō eriqui nguiã ndua. ¹⁷ Ae Cristo senei turã nguia nae, ũquĩ ndua chō nguiã emo ndese. —Jesucristo cheē nñ ño Pablo tarō ji ñi nguiã hue, i equia ndua serese ũquĩ. ¹⁸ Seyate emo Cristo renei turã mose. Seyate emo Cristo renei ñooño mose no. Cristo rñ nguiatu eriqui nguia ñee. Tachimbua tuchi chō nguia ũquĩ Cristo renei nenei mose.

¹⁹ Jëndese abe seyate aico co. Ũquĩ jêingo ñee Dios je serñ ũquĩ. Espíritu Turã ndiqui serese a no. Ae Jesucristo mbu seje. Nyebe Dios riqui nguiã setarō ji reaquiato tuchi a. Nyebe seya tuchi riqui nguiã a. ²⁰ Sesiquicheã tuchi ra se reae. Seirei nguiã mbei nda eriqui Cristo cheē nenei nenei ña. Cristo bi achō ndese taico bei setarō ji. Mbia nda seiquia rei nguiã, se taico bei Cristo rese. Mbia nda sembusẽ ndei nguiã no, ũquĩ mose abe taico bei erese no. Eĩ ja chō seje re. Eturã ja chō seje no nde. ²¹ Cristo mñ nñ ño aico nguiã se co. Semano mose, eturã tuchi quiarei ũquĩ seje cote. ²² Dios semingobe mose, ae si je chō aico nguiã mbae turã naa naa co. Ma ño eturã jiri riqui seje. Mano mose ereae. Siquibe jiri mose ere no ae. Aicua eãte se. ²³ Ma ño sebi jiri. Semano sete raque

oso sacuã Cristo rese. Ûquĩ nda eturã jiri seje. ²⁴ Se seicobe mose íbii, ùquĩ nda eturã jiri jêje reae. ²⁵ Ûquĩ aicuate se. Seicobe mose, ùquĩ nda eturã jiri jêje reae. Nyebe ra Dios semingobe jiri jendese. Se Cristo icua uquia sacuã jêje. Se jembiaabe jiri sacuã Cristo rese. ²⁶ Anyae ra oso jendea. Aque mose nda jêya tuchi Jesucristo rese chã.

²⁷ Ae uresenei senei nguia Cristo rĩ nae, ùquĩ andure chõ jêingo turã. Airandu turã nda se quia jendese chã. Eĩ nda mbia ñee seje chã. —Hue rĩ ja chõ eriqui ndua turã nye. Huee echĩ mbia cheẽ ndiquisã quisã Jesucristo cheẽ si hue, i nda mbia seje chã. I nda mbia seico mose isho chã. Seico mose abe jendese. ²⁸ ¡Tiri jenyechĩ nda Jesús ucuãya sa si jê! Jêsiquicheã mose, Dios ra ùquĩ mundua tata cuasu rese cote. “Huee ra asochĩ nde”, i chee rae. “Jesús icuasa ra Dios mingo bei”, i ra ùquĩ jeni cote, jêsiquicheã mose esi. ²⁹ Jê Cristo jêicuate quia ùquĩ cote. Ûquĩ miño eã. — Jeñimbirãcuã abe quiatu quia seriĩ, mbia icuã icuã mose jêje, i Cristo quia jêje co. ³⁰ Sã mbia icuã icuãte riqui seje no. Eĩ si chõ mbia icuã icuã ndiqui nguia jêje ùquĩ. Nande jaje bei chõ ñene. Jemae ndei que equia serese cose resẽ. Se mbia icuã ndiquisã quisã mose. Ûquĩ sí rese chõ jêingo nguia jirandu randu serese namo no.

2

Cristo seteã tuchi que tu ra

¹ Jesucristo jembia turãte quia co. Cristo nyesequa mose jendese, jêyate riqui ùquĩ. Espíritu Turã abe riqui jendese ùquĩ. Jendua turãte equia emo ndese ùquĩ. ² Nyebe aico nguia ñee jêje. Seyate aico raque jendese co. ¡Secheẽ jemumbayã tuchi quiatu quia jê! ¡Sembia tuchi quiatu se jê! ¡Jendua ata atachĩ nda jê! ¡Hue rĩ ja chõ jêingo ndua jê! ¡Hue rĩ ja chõ jêingo nyesequa nyiese no jê! ³ ¡Abei chiãte ra jêingochĩ jê! ¡Jenguasu ra jêsaã saãchĩ! ¡Jêseteã ño jêingo! —Nde chõchĩ ndeturã sesi, jjenye chõ jenyue! ⁴ “Se chõ jê” ¡jenyechĩ nda jê! Emo mbaerã abe rese quia nandeico ndua. ⁵ Sã Jesucristo

riqui ndua eãte uchiese no. Erã si chõ nandeico ndua nande abe jê. ⁶ Dios rã si rei que Jesucristo ra. Ñimbuseteã tuchi que u íbii ra. Ererecua rã eã ngue eru íbii ra. —Dios rã si chõ taico bei se, iã ngue u íbii ra. ⁷ Mbia rerecua tuchi rei que Jesucristo ra. Huiico mose ibate. Mbia mo na ngue eru íbii cote ra. Mbia mbaecha reã na ño ngue eriqui íbii cote ra. Mbia rimba rã. ⁸ Mbia mo na ño ngue ae ra. Ibii eico mose cote. Mbia rerecua que esaã saã eãte quia ra. Siqui mingue chõ ngue equia ra. Dios cheẽ ngue emumbayã mbei mano nyee ra. Embucha ji que mano ira rese ra. Aba ireĩte mano ira rese. ⁹ Nyebe Dios riqui nguia Jesucristo mbuchecua beite co cote. Mbia rerecuarã tuchi Dios Jesucristo mingo co cote. ¹⁰ Mbia ra ngoi ja chee nguia ndese Jesucristo je ñee. Ae siqui ja íbii. Ae siqui ja íbate no. Ae siqui ja ibiqui rĩ. Ûquĩ ja ra ñee turã Jesucristo je. ¹¹ —Jesucristo rei mbia rerecua ja, i chee ra ùquĩ ja ñee. Ûquĩ mose ra Dios ia tuchi cote.

Secheẽ jêisi chooño eẽ ño nguia, i Pablo

¹² Secheẽ ngue jemumbayãte quia seico mose jendese. Ishote aico jêsi co. Secheẽ jemumbayã tuchi quiatu quia isho seico mose abe. Cochee jiri quiatu jêingo Dios je. Jêingo bei tuchi quia erese. Jenderao chee ra ibate mbae icuã si. ¹³ Dios quirãcuã ndiqui jeñiangui re ùquĩ. Dios quia mbae turã nyosei uquia nguia jêje. Dios mi ño jemingo nguia ubi rese.

¹⁴ Mbae turã jêsaã turã ja chõ. Ñee icuã icuã ndocoĩ. Teã teã ndocoĩ. ¹⁵ Eĩ nda mbia mo ñee icuã icuã eã jêje. Eĩ nda jêicuã eã emo je. Dios riirĩ ño jê nde. Sã nyasitata riqui mbae resae jate itondáruu no. Eĩ ño jê nde. Nyasitata rã si chõ jê nde. Mbia icuã ndesae ja. ¹⁶ Jêingo mbia mingo beisa renei nenei tuchi mbia je ùquĩ. Nyebe ra seya tuchi jendese Cristo tu mose. Secheẽ jêisi chooño eã ño nguia. Jaembaaquiatu chooño eã ngue Cristo rĩ nda. ¹⁷ Secheẽ nguire jêingo Dios icuate ùquĩ cote. Secheẽ nguire jendete jemee tuchi mose Dios je, seya tuchite ra jendese cote. Mbia nda seiquia rei nguia Jesucristo rĩ, seya bei ra aico jendese, jendete jemee tuchi mose

Dios je. ¹⁸ Jeñimbia chõ nguia serese. Sã seyate aico co no.

Timoteo tamondo jêje Epafrodito rese, i Pablo

¹⁹ Jesús eno i mose, Timoteo tamondo rã jendea. Eĩ nda seya jirandu mose jendese. ²⁰ Timoteo rã si ãte emo ndua tuchi jendese. ²¹ Umbaerã achõ ndese chõ eataque riqui nguiã ndua ndua. —Ã tasaã saã mbei Jesucristo je, i ãte equia ãquĩ. ²² Sã eriirĩ ndiqui mbae raã naa ngu rese no. Eĩ si que Timoteo quia serese ra. Jesucristo cheẽ nenei nenei mose serese. Siqui turã mbeite que equia serese ra. ãquĩ jêicuate quia ãquĩ. ²³ Nyebe ra Timoteo amondo jendea. ã tatea rã nyii. Mbia ra setarõ ji mĩ mbei a reae. Sembusẽ nda re no ae. ãquĩ tatea rã nyii. ãquĩ ndeare ra Timoteo amondo jendea. ²⁴ ã mbeite ndua Dios rese a. Ae ra sembusẽ jei reae. Semondo ra jendea cote reae.

²⁵ Epafrodito abe tamondobe jêje. Ae jemondo seje nyii seraarõ sacua nae. Sere-senda turãte riqui seje co. Dios cheẽ nenei nenei serese. Senongue rã tuchi eriqui seje co. ²⁶ Mae sete equia jendese co cote. —Mbia jiranduchĩ serasi rese re, i equia jenĩ co. Nyebe eya eã ndiqui nguiã nduate jendese cote. ²⁷ Ae bei. Erasi tuchi que eriqui rei ra. Mano serĩ tuchi rei que equia ra. Dios ia eã tuchi que eriqui erese ra. Nyebe embucherõ nguiã. Serĩ abe que Dios embucherõ nda. Sembia jiri sacua. Sã mbae riqui eĩ eĩ ja tuchi sembia eã se no. ²⁸ Nyebe Epafrodito amondo nguiã jêje aque. Jembia sacua erasiã ndese cote. Seya eã nda sasẽ jiri jemaie mose erese cote. ²⁹ Nanderesenda tuchi chõ ae Jesucristo rese re. Ngasẽ mose pee, jêya chõ erese. Jêisi turã ño. Eraanguia rese jêingo turã mbei Jesús quiato. ³⁰ Jesucristo rĩ ngue mano serĩ serĩte ra. Jesucristo cheẽ nenei nenei mose. Siquiche ãte que equia ra. —Amanochĩ nda se re, i ãte que equia ra. Sereaquiato turã tuchi que equia ra. Ishote quiato ngue jêingo nguiã jê. Sereaquiato aronea.

3

Cristo mĩ ndese aico cote, i Pablo

¹ jêya bei chõ jêingo Jesucristo rese jê! Ae asenei senei nguia jêje nyii nae, ãquĩ sí tasenei senei jêje. Sebite secheẽ nenei nenei sí jêje. Jendua bei sacua erese.

² Ae siqui nyacua raãte nae, ãquĩ si jenyicuasẽ ño nguia. Eicuãte riqui ãquĩ. Aba rete sia chooño ño ãquĩ nde. Mbia mbaaquiato turã ndocoĩ. ³ Circuncisión ño nande re. Nandechiangui re chõ nandeico nguiã Dios rerequia nande ã. Nande chõ nandeya riqui nguiã Jesucristo rese ã. —Mbia circuncisión naa mose, aque mose quia ra Dios emingo bei cote, i chõchĩ emo hue jenda nguiã ãquĩ. Nandequiatio jiriã tuchi chõ ãquĩ nde. ⁴ —Dios ra semingo bei, mbae turã naa naa mose, ae rei que se quia nyii ra. —Seturã nĩ nda Dios semingo bei, i chõchĩ emo. Seturã tuchi raque eriqui ãquĩ si. ⁵ Sechacuquia mose, ocho días mose que circuncisión naa seje ra. Israelita chõ se re. Benjamín ndiirĩ nducucha chõ se re. Hebreo chõ se re. Paba abe que hebreo ra. Fariseo que se nyii ra. Moisés chimbese que amumbayã nguia ra. ⁶ Aico asite que se quia Dios rese nyii ra. Jesús quiato que asiquisã tuchi quia nyii ra. —Pablo riqui Moisés chimbesa mumbate co, i aroneate que equia serĩ nda. ⁷ ãquĩ nĩ ngue aico secuasã raã naa tuchi cose ra. Jesús icuayã mose se. Mbae eã tuchi chõ ãquĩ seje cote re. Cristo rese quiato aico nguiã co cote. ⁸ Mbae mo ndese aico queteã eãte co cote. Aico ndua eãte mbae mo ndese co cote. Jesucristo mĩ aicuate quia co cote. ãquĩ eturãte mbae ja si seje cote. Jesucristo rĩ aico hui jate mbae si co cote. Iti rã ño mbae ja riqui nguiã seje cote. Seico bei sacua Cristo rese. ⁹ Cristo rese tuchi chõ aico nguiã co cote. Aico bei rei que Moisés chimbesa rui nyii ra. ãquĩ nĩ eã ño Dios seisi turã nguiã. Se Jesucristo icua mose, ãquĩ mose quiato ngue Dios seisi turã nguiã. Ae Jesucristo icua quia nae, ãquĩ Dios isi turã ño nguiã. ¹⁰ Cristo aicuase tuchichĩ nguia co. Ae quirãcuã Cristo mbuquera si nae, aque quirãcuã nda siqui rã serese chã. Sã Cristo ñimbirãcuã

mbia icuã si no. Eĩ ae rã nda ñimbirãcuã mbia icuã si chã. Sã Cristo mano nandeicuã ndiquicharõ no. Eĩ ae rã nda mano mbae icuã si chã. ¹¹ Eĩ mose ra Dios seraaque mbuquera si mingo bei cote.

Cristo mii ndese aico ndua co cote, i Pablo

¹² Mbae quia asaã ja eãte rei nguiã. Jesús turã na nguia ra aico jee cote. Co Dios riqui sembitirõ tirõ mbeite co. Co aico erui beite co. Jesucristo que seisi seico sacuã ae rã si ra. Jesucristo turã na tuchi aicoã ndaque namo co. Nyebe aico nguiã siqui tuchi erui co. Seico sacuã tuchi chee ae rã si cote. ¹³ Ae ra Dios mee seje, uquiã asiiti ja eãte. Ae eĩ eĩ seje cose, uquiã si aico tesareite co. Ae ra Dios mee seje, uquiã nda asiiti. Uquiã mii ndese chõ aico nguiã ndua co cote. ¹⁴ Ae siqui tuchi quia Jesucristo rese, uquiã je quia ra Dios premio mee. Nyebe aico tuchi nguiã erese co. Premio isi sacuã. ¹⁵ Eĩ nande ja tuchi quiatu quia siqui Jesucristo rese jê! Nande eicua tuchi mose. Jendua ja eã mose hue rĩ, Dios ra ñee jêje. —Ã ndese chõ jêingo, i ra jêje. ¹⁶ Ae nandesiiiti nae, uquiã ndese bei chõ nandeico. Ae rĩ Dios nandembaaquiato quiatu nyii nae, uquiã ndese bei chõ nandeico. ¹⁷ Serui bei jêingo, Seresenda. Ureico bei Jesucristo rui ã. Sã mbia siqui bei urerui. ¹⁸ Mbia tubiriã ndiqui Cristo ucuãyãte ã. Uquiã ae rei que se quia jêje nyii resẽ. Aba mbucheseo serĩ. “Cristo que mano mbia riquicharõ nda”, uquiã andu sereãte. ¹⁹ Uquiã nda nyoĩ ja tata cuãsuu. Ubi rese achõ ño uquiã ndiqui nguiã. Eireĩ nguiãte. Eya chõ eriquichĩ nguiã huicua ndese. Ibi jenda achõ ndese chõ eriquichĩ nguiã ndua. ²⁰ Jesucristo riqui nanderirõ mbae icuã si co. Ibei jenda chõ nande cote re. Jesucristo ra tu ibei si nanderea cote. ã nandeico eraarõ arõ ã namo. ²¹ Jesucristo tu mose nande je ibii, nanderete ra embuchicuabo. Nanderete icuã ño siqui nguiã namo ã. Jesucristo rete nininya chõ siqui nguiã co. Jesucristo ra nanderete mbuchicuabo nguete rã si. Uquirãcuã je ra nanderete mbuchicuabo. Sã mbae mbitirõ ja arõte uquirãcuã je no. Eĩ nda nanderete je.

4

Jêya bei chõ jêingo Cristo rese

¹ Sechesequa, andua tuchite quia jendese a. Amaese tuchi se quia jendese a. Seya tuchite aico jendese a no. jêingo turã tuchi chõ Jesucristo rese jê! ² Evodia je tacheẽ. Síntique abe je tacheẽ. ¿Mbaerã jêingo siqui icuãte nyue re? Jêingo turã ño jenyue ae. Jesús quiato chõ jê ndesẽ. ³ Nde abe je tacheẽ, Seresenda. Uquiã cuña emingo turã nyese. Eteaquiatu bei quia. Uquiã ngue siqui bei serese Jesús cheẽ nenei nenei mose ra. Clemente rese abe no. Eataque rese abe no. Dios que uquiã mbae nombre mii mii libro umbae rese ra. —Uquiã nda siqui bei serese, i que ra. ⁴ Jeñimbia bei Jesucristo rese. jêñimbia tuchi jê! ⁵ Sã mbia mae ja jêturã ndese. Jê abei rese. Achite Jesucristo ñi tu a. ⁶ Pari pari jenyechĩ nda mbae mo je. Jeñee ja quiatu Dios je. — Mbae mo embu ure je, jenye chõ nguia ee. Gracias jenye chõ nguia ee. ⁷ Uquiã mose ra Dios jembia tuchi. —Mañi Dios quia ã mbia tuchi re, i nda mbia mae mose jendese chã. Jesucristo ra jeñia mbucoi tuchi. Jesucristo ra jembia bei mingo no.

Mbae turã ndese chõ jêingo ndua

⁸ Hui bei nonde ã abe tambesa jêje. jMbae icuã ndese ra jenduachĩ jê! Mbae turã ndese chõ jêingo ndua. Ae rĩ nandeico ñee turãte, uquiã ndese chõ jêingo ndua. Ichõiñosa reã ndese chõ jêingo ndua. Ae Dios bite nae, uquiã ndese chõ jêingo ndua. Mbae quishĩ ndese chõ jêingo ndua. Ae rese mbia turã ndiqui mae sete, uquiã ndese chõ jêingo ndua. ⁹ Ae asenei senei nguia jêje nyii, uquiã ndese chõ jêingo jê. Ae eraã ndese jêingo mae mae seje nae, uquiã ño jêsaã saã mbei quia. Uquiã naa naa mose, Dios ra siquijendese. Jembia bei ra equia.

Jesús quiato ofrendas mondo Pablo je

¹⁰ Jendua ramombe equia serese uquiã. Dios sembia tuchite quia uquiã ndese co. Jêtesarei eãte rei que equia sesi nyii ra. Mbae que jemondo aroneate quia seje nyii ra. ¹¹ —Mbae ãte seje. Mbae mo embu seje,

ae ãte se quia jêje co. Sembae eã mose, seyate ãquĩ mose. Sembae ñetẽ mose, seyate ãquĩ mose no. ãquĩ je que achimbaaquiatu se ra. ¹² Sembae eã mose, seyate ãquĩ mose se. Sembae tubiriã mose, seyate ãquĩ mose no. Seya beite aico co. Seriãcuã mose. Serio mose abe no. Sembae tubiriã mose. Sembae eã mose abe no. ¹³ Cristo que uquirãcuã mee seje ra. Equirãcuã je mbae asaã ja arondete. ¹⁴ Coche ngue mbae jemondo nguiã seje. Sembae eã mose. Seyate raque sembale eã mose. ¹⁵ Jẽ ae chõ ngue mbae jemondo mondo bei nguiã seje. Se Jesús cheẽ nenei namo mose bei chõ ngue mbae jemondo mondo nguiã seje. Iglesia mo abe que mbae mee ãte seje ra. Jẽ ae chõ ngue re. Filipos jenda ja. Se Jesús cheẽ nenei nenei namo mose jêje, aque mose bei chõ ngue mbae jemondo mondo seje. Seso ramo mose Macedonia si. ¹⁶ Sã ñi mbae mo jemondo mondo seje Tesalónica seico mose no. Mbae eã mose seje. ¹⁷ — Mbae mo jemondochõ seje, ae ãte quia jêje a. Dios je chõ jẽingo nguiã emondo ãquĩ. Dios ra mbae mondo tuchi jêje eribishorõ. ãquĩ ndese quiatu seya riqui nguiã. ¹⁸ Ae jemondo seje namo Epafrodito rese nae, ãquĩ ngue aisi ja ra. Dios bite jeñimondo. Ofrenda turã tuchi que ãquĩ Dios je ra. Mbaete rei sembale cote re. ¹⁹ Jesucristo resenda chõ jẽ nde. Ae emoate jêje nae, ãquĩ nda Dios mee ja jêje. Dios quia mbae quereco ja nguiã. Equirãcuãte quia ñene. ²⁰ Sã mbia ñee turã mbei Dios riĩ. Nanderu riĩ. Amén.

Hui bei chõ ã cote re

²¹ Jesucristo quiato je saludar jenyẽ ja seje. Ae Jesús quiato riqui serese nae, ãquĩ ucheẽ mondo quia saludar i jêje aque. ²² Jesús quiato a jenda ja ucheẽ mondo quia saludar i jêje aque. César chuchua jenda abe ucheẽ mondo quia jêje aque. Ae siqui quia Jesús rese, ãquĩ. ²³ Sã Jesucristo turã tuchi riqui jẽ ja je. Amén.

LA CARTA DEL APOSTOL SAN PABLO A LOS COLOSENSES

Pablo embesa mbesa Colosas jenda je

¹ Pablo chõ se re. Dios chiirabo chõ se re. Jesucristo que seirabo mingo ucheẽ nenei nenei sacuaõ nda. Timoteo rese aico ã mbesa mbesa jêje a. Nanderesenda Timoteo. ² Dios rimba Colosas jenda je chõ aico nguiã co mbesa mbesa a. Cristo icuasa hue jenda ja je. Ae Cristo icua tuchi quia nae, ãquĩ ja je. Sã Dios turã ndiqui bei jendese. Sã eriqui jembia bei. Sã Jesucristo abe riqui bei jendese.

Pablo ñee Dios je Jesús quiato rã

³ Nandererecua tuchi rei Jesucristo. Dios rei eru. Ureico beite ñee Dios je jeniã ã. Gracias ure beite equia jeniã ã. ⁴ Ureirandu turãte quiatu ngue jendese re. Jesucristo jêicuate quiatu nguiã ure je ãquĩ. Jenyese-cua tuchi quiatu nguiã Dios quiato rese ãquĩ. ⁵ —Cristo rese ra nandeico je ibate, jenyete quiarei equia eicua ãquĩ. ãquĩ ndese que jêirandu tuchite nyii ra. Jesucristo cheẽ nenei nenei namo mose jêje nyii. ⁶ Jesucristo quiato echeẽ senei senei mbeite quia mangue choõõoa jenda ja je ã. Nyebe Jesús quiato riqui nguiã ñimbeta i i tuchi ã. Sã nandeico mbae a ucua ucua no, ei si chõ ñene. Sã eriqui Jesucristo cheẽ nenei nenei jêje nyii no. Sã Jesucristo cheẽ jeña mbitirõ eandu ramo mose no. ⁷ Epafra abe que jembaaquiato quiatu Cristo rã nda. Cristo resenda tuchi chõ ae re. Ae chõ Cristo cheẽ senei senei turã nguiã co. Nanderesenda tuchi chõ ae re. ⁸ Ae que sembiirandu turãte jendese ra. Espiritu Turã ndiqui tuchi jendese ãquĩ. Nyebe jêingo nguiã nyesequa turãte mbia rese ãquĩ.

⁹ Ureirandu mose jendese ãquĩ ndese, aque mose bei chõ ureico nguiã ñee Dios je jeniã ã. Dios jemingo bei sacuaõ ubi rese. Ucheẽ abe rese. Dios uaquiato mee sacuaõ jêje. ¹⁰ Jêingo turã sacuaõ Dios mbia. Jêingo turã sacuaõ mbae turã ja rese. Jê Dios icua i i tuchi sacuaõ. ¹¹ Dios jembirãcuã

tuchi sacuaõ uaquiato je. Jeñimbirãcuã tuchi sacuaõ mbae rasi je. I nda jêingo tochi tuchi mbae ja je. ãquĩ mose ra jêyate no. ¹² Ureico gracias i tuchi Dios je ã. Ae quiato ngue nandembuchiicabo nguiã. Ae ra Dios mee uquiato ja je mbae turã nae, nande abe je ra emee. Dios quia nandererequia turãte nguiã nyaashĩ na co cote. ¹³ Mbae icuaõ nguiatu que nanderereco quia itondãruu nyii ra. Dios que nandembui ãquĩ si cote ra. Nguiirĩ ndese que nandemingo cote ra. ¹⁴ Dios riirĩ ngue nandeisirõ umbaerã mbei ra. Mano ngue nanderiquicharõ nda. Nandeicuaõ ngue embutiã mbei nyesi ra.

Cristo que mano nandemingo turã sacuaõ Dios rese ra

¹⁵ Mbia mae aroneate raque Dios rese. Dios rã sí tuchi chõ Cristo re. Ae rane ngue siqui Dios chiao mbae ja si ra. Ae que nyecua u mbia je cote ra. ¹⁶ Dios ae que mbae chao eã nda. Nguiirĩ ndese quiatu ngue mbae ja ao nguiã. Mbae ibatenda ao ja. Mbae ibi rãnda abe ao ja no. Ae rese nandeico mae ã nae, ãquĩ ja que Dios chao nguiirĩ ndese ra. Ae rese nandeico mae aroneate nae, ãquĩ abe que echao nguiirĩ ndese no nda. Mbia rerecua ja abe no. Aba checuayã ja abe no. ãquĩ ja que Cristo chao ngu rese ra. Cristo mbaerã ño ãquĩ ja re. ¹⁷ Mbae ao ja nonde Cristo riqui rei nyii. Erĩ ño mbae riqui ja nguiã ã cote. ¹⁸ Dios quiato rerecua ja chõ Cristo riqui nguiã co. Sã nandeãquĩ nanderete rerecua no. Cristo rei mbae i tuchi. Mbae i ja. Ae rane ngue quera si manonde ra. Ae rei mbae rerecua ja a tuchi. ¹⁹ —Se rã sí tuchi Cristo jê, i que Dios ra. ²⁰ Cristo mano mose, nandemingo turã sacuaõ Dios rese chõ ñene. Nande mĩ mingo turã sacuaõ eã ño ñene. Mbae ja mingo turã sacuaõ Dios rese chõ Cristo mano nguiã. Mbae ja ibi rãnda. Mbae ibei rãnda ja abe no.

²¹ Ishote que jêingo Dios si nyii ra. Mbae icuaõ naa naa mose. ãquĩ mose que jêingo Dios ucuayãte ra. Jendua ndua icuaõte que equia erĩ nda. Namu nguia eriqui nguiã jemingo turãte uchiese ãquĩ. ²² Cristo quiatu ngue mano nguiã jeniã. Mbia rete raanguia rerequia mose. Mbae rasi

que esaã tuchi umano mose ra. Jeni ño ngue mbae rasi raã nguiã. Jëicuã mbutiã sacua. Jemingo turã sacua icue Dios mbaerã. ²³Nyebe jeñimbirãtã jiri quia Jesús icha rui. Jeñimondocho eã mbei quiatu quia jë. Jëhui eã ño Jesús cheë turã si jë. Jesús cheë turã ngue jeñandu tuchi quia. Mangue chooñoa jenda ja que ehandu ra. Se abe asenei senei tuchi quia Dios cheë nguire co. Pablo chõ se re.

Dios que seirabo ra, i Pablo

²⁴Se mbae rasi raã mose jëje, seyate aico se co. Cristo quiatu ngue mbae rasi saã tuchi nguiã nande je nyii. Se mbae rasi raã mose, Cristo abe chõ mbae rasi saã nguiã serese. Cristo rete rã ño Cristo quiato riqui nguiã. Nyebe seyate riqui nguiã serete mbae rasi raã mose Cristo quiato je. ²⁵Dios que seirabo uquiato mbaaquiato quiatu ja sacua nda. Iglesia jenda ja. Dios cheë mbuchecua ja tuchi sacua jëje. ²⁶⁻²⁷Dios que seirabo judíos eã mbaaquiato quiatu sacua nda. Ae Dios mbuchecua eã mbei judíos je nyii nae, aico ùquĩ mbuchecua Jesús quiato ja je ã cote. ã ndei ã: Cristo riqui jeñiangui re ã cote. Ae mii ño aba mingo arõ nguiã Dios rese co. Ùquĩ ño Dios mbuchecua ramo nguiã uquiato je co. ²⁸Cristo mii ñi ño aico nguiã ñee mbia je co. Mbiaambutu mbuti chõ nguiã Cristo icha rui co. Seaquiato je chõ aico nguiã mbia mbaaquiato quiatu Cristo rii co. ñnda Jesús quiato ja riqui siqui i i tuchi erese. ²⁹Nyebe serecoteã tuchite riqui nguiã ùquĩ ndese co. Dios quia sembirãcuã mbeite nguiã co. Mbia mbuti mbuti sacua Cristo icha rui.

2

¹Co secheë jeñandu rã. Andua ndua tuchite se quia nimbecoteã jendese co. Acheë tuchite se quia Dios je jeni co. Laodicea jenda nii abe no. Ae mae ãte quia serese Jesús quiato nae, ùquĩ nii abe no. Mbia mbaaquiato icuã icuãsa riqui jembui serite Cristo si ùquĩ. ²Jë ja rii aico ñee Dios je co. Jëingo i i sacua Dios rese jeñiangui re. Jenyesequa ja sacua jenyiese. Jendua ja sacua hue rii si. Jëaquiato tuchi sacua Cristo rii. ñnda Cristo jëicua tuchi cote. ³Cristo mii tuchi chõ aba mbaaracua nguiã co. Ae mii

tuchi chõ aba mbaaquiato nguiã Dios rese co. ⁴Mbia jembuirii irii eã sacua ño aico nguiã ñee jëje co. Mbia cheë turã abareãte raque. Jesús cheë ndui eãte quia ñene. ⁵Aico ndua ndua tuchi jendese co. Siqui rocoi jendese. Ae rese airandu jendese nae, sembia tuchi chõ ùquĩ nde. Jëingo turã mose jenyiese. Jë Cristo icua i i tuchi mose. Nyebe seya bei tuchi riqui nguiã jendese co. ⁶Sã Jesucristo jëisi nyii no, eĩ jenye si chõ nguia siqui bei erese. ⁷Sã ira riqui ngao mondo tuchi ibiqui rii no. Ñimbirãcuã tuchi sacua. Eĩ jenye si chõ nguia jë abe jë. Jeñimbirãcuã ño nguia Cristo rui. Cristo jëicua tuchi quiatu quia. Secheë ñinda rui sí. Gracias jenye bei chõ nguia Dios je.

Dios que jembiasu Cristo rii cote ra

⁸Mbia ra jembuirii irii chõ jembuicha nonde Cristo si jë. Ùquĩ ñee turã arõte raque. Ñee iru iru chõ nguiã ùquĩ. Ñimbuca eãte equia Cristo rese ùquĩ. Mbia cheë achõ ño echeë nde. ⁹Dios rã si tuchi rei Cristo. Mbia rete raãte raaque Cristo rete. ¹⁰Ùquĩ jëingo ñimbuca Cristo rese ùquĩ. Cristo rã sí tuchi rei nande cote. Cristo quiarei ererecua tuchi mbia rerecua ja si. ¹¹Cristo que jembui jenyioseisei icuã si cote ra. Jemingo que icue Dios mbaerã cote ra. ¹²Ùquĩ jëingo Dios quirãcuã icuate ùquĩ. Sã mbia Jesús raaque ati rei no. Eĩ si chõ jë Jesús icua mose re. Jendaaque ati rã si chõ jë Jesús icua mose re. Sã Dios Jesús mbuquera si uquirãcuã je no. Eĩ si chõ jë Jesús icua mose re. Jembuquera si rã ño jë Jesús icua mose re. Dios chõ Jesús icua uquia nguiã jëje. ¹³Isho que jëingo rei Dios si cose ra. Jenyioseisei icuã ndese siqui bei mose. Jë jëicuã nderequia bei mose. Dios que ngueco mee jëje cote ra. Jë Cristo icua mose. Dios que jëicuã mbutiã cote ra. ¹⁴Ae icuã nandesã saã nguia Dios je nae, Dios que ùquĩ mbutiã nandesi ra. Ae cheë nandemumba mumba quia mbia nae, ùquĩ ñee ngue Dios mbutiã nandesi cote ra. Dios nandecua mbucha raanguia Cristo rese chõ ñene. Cristo chi mose cruz rese. ¹⁵Cristo mano mose que aba checuayã nderecua quirãcuã mbutiã nda.

Cristo que aba checuayã mbuquirãcuã nea ja ra. Mbia resa rae que embuquirãcuã nea ja ra.

Mbia chisaã saã ndese ra jëingochĩ jë

¹⁶ Sã emo jendiquisã quisã eã mbei mbaeiaie mo si. Jë mbaeiaie u sereã mose, jëu eã ño. Jë euse mose, jëu chõ. Jë jëingose mose mbae mo ndese sábadu mose, jëingo chõ erese. Jë jëingose mose mbae mo ndese nyasi yasu mose, jëingo chõ erese. Jëingo sereã mose erese, jëingoã erese. ¹⁷ Cristo siqui nonde íbii chõ ngue ũquĩ ja nyii re. Mbia Cristo ru raarõ sacua ño ngue ũquĩ nyii re. Cristo tu mose que ũquĩ quiachã ja cote ra. ¹⁸ Mbia jembũrĩ irĩchĩ jembũcha nonde Cristo si jë. Ae useteã saã ñooño nguia nae. Ae “Dios chõ ñene” i quia ángeles je nae. “Se quiatu” i chooño ño nguiã eaquiato rocoĩ. Ndua turã eã ño nguiã Dios rese ũquĩ. Unduasa rese achõ ño eriqui nguiã ucuasu raã naa ũquĩ. ũquĩ nda jembũchachĩ Cristo si jë. ¹⁹ Ñimbucha eã ño nguiã Cristo rese ũquĩ. Ererecua raque Cristo. Sã nandeãquĩ ndiqui nanderete mingo turã ja no. Eĩ si chõ Cristo uquiato mingo turã ja nguiã nyiese ã. Nyebe Cristo quiato riqui nguiã Cristo icua i ite ã. Dios chõ Cristo icua uquia i i nguiã ee.

²⁰ Cristo mano mose que jë abe jemano erese resẽ. Mbia chisaã saã ima si que jëhui turã ndesẽ. ¿Mbaerã nda ũquĩ ñee ndui si jëingo si cote re? ²¹ Sã ũquĩ ndiqui ñee no: “Jëocochĩ nda ã ndese. ã nda jëuchĩ no. ũquĩ nda jëisichĩ jëo je no”, sã eriqui i no. ¿Mbaerã jëingo ũquĩ ñee mumbayãte re? ²² Mbia cheẽ achõ ño ũquĩ ndesẽ. Dios cheẽ eã ño ũquĩ ndesẽ. Nandechĩurã ño mbae ja resẽ. ²³ ũquĩ ñee turã arõte raque. Eeturã arõte raque mbia mbaeiaie uã mose. Mbia mbaeiaie uã mose, eaquiato arõte raque. Siqui mingue arõte raque. ũquĩ nda aba chioseĩ oseĩ icuã mbutiã eã. ũquĩ nda aba mingo eã Dios mĩ ndese.

3

Jendua chã mbae ibatenda rese

¹ Dios que jendaaque mbuquera si Cristo rese resẽ. Nyebe jëingo mbae ibatenda

oseĩ. Mbae ibi jenda oseĩ rocoĩ. Cristo quia chĩ nguiã ngoi ibate ngu jii hue. ² Jendua quiatu quia mbae ibatenda rese. Mbae ibi jenda rese ndua rocoĩ. ³ Jemano ngue Cristo rese resẽ. Dios que jembucha Cristo rese resẽ. Nyebe Dios riqui nguiã jendeco rerecoquiato jëje co. ⁴ Dios chõ nandereco mingo nguiã Cristo rese co. Cristo tube mose ra jendete mbiasu tuchi cote. Jenininya tuchi ra erese cote.

Cose ndare rã eã ño jëingo nguiã ã cote

⁵ Ae icuã jendeco quia jeñiangui re nae, ũquĩ icuã jëquiti chõ jenyiesi. Jenyioseĩ oseĩ icuã jëquiti chõ jenyiesi. Jëingochĩ nda jeninisiã mo ndese. Jendu eã ndese ra jëingochĩ no. “Aque rese nda aico rã ña”, jenyechĩ nda emo nĩ jë. Mbae icuã mo ndese ra jendua ndua jirichĩ jë. Emo mbae ra jenyoseĩ choseĩchĩ jë. Dios abareã ndese siqui raanguia chõ ũquĩ nde. ⁶ ã icuã ja rĩ nda Dios mbia mbasi. Ae echeẽ mumba mumbate quia. ⁷ Jë abe que ã icuã jësaã saã tuchi quia nyii ra. Cristo icuayã mose. ⁸ ã icuã jëjea ja chõ jenyeseĩ cote. Jë paama i. Jëicuã icuã nyue. Jeñee nyecua nyecua emo nĩ. Jenyuru icuã. ã jëjea ja chõ jenyeseĩ. ⁹ Jeñee ñooño chĩ nda jendesenda je jë. Jë mbae oseĩ oseĩ icuã ñiinda que jembuquiachã jenyeseĩ resẽ. Jenyisaã saã ima jësaã eãte quia ũquĩ cote resẽ. ¹⁰ Jeñimbiasu ji chõ jëingo nguiã ũquĩ. Nyebe Cristo riqui nguiã jembaaquiato tuchi Dios rĩ ũquĩ. Jëingo turã sacua Dios rã si. ¹¹ Cristo quia rei mbia mbuchiabi abiã tuchi. Judíos raque. Judíos eã ndaque. Ishonda mo ndaque. Ae eaquiatoate raque. Mbia rimba raque. Mbia rimba eã ndaque. ũquĩ ja Cristo mbuchiabi abiã tuchi. ũquĩ ja chianguĩ re Cristo riquise rete. Cristo siqui mose nandechiangui re, ũquĩ nguia rei eturã tuchi mbae ja si.

¹² Co Dios riqui nyecua tuchi jendese co. Dios que jëirabo mingo icúe umbaerã nda. Nyebe jëingo nguiã siqui turãte. Jëya eã ño jëingo mbae rese. Jëseteã ño jëingo mbae rese. Jëingo tochi chõ nguia. Jendoseĩ nguiato chõ jëingo. ¹³ Jeñimbirãcuã ño nguia jendesenda rese. Jëtesareĩ chõ

nguia jendesenda icuã icuã mose jêje. Sã Cristo tesarei jêicuã si no. ¹⁴ Jenyeseceua tuchi quiatu quia mbia rese jê. Dios cheê tuchi chõ ã nde. Jenyeseceua tuchi mose mbia rese, mbae turã ja rese chõ nda jêingo tuchi cote. ¹⁵ Jeñimbia bei chõ nguia Dios rese. ¶ nda jemingo turã mbei jenyue. Ûquĩ ñi ño Dios jemingo nguiã icúe umbaerã. Jesús rete mii na ño Dios jemingo nguiã ùquĩ. “Coche ñene” jenyue bei chõ nguia Dios je. ¹⁶ Sã Cristo cheê ndiqui tuchi jeñiangui re. Jêaquiatu tuchi nda jêingo chã. Jenongue jembaaquiato quiatu chõ nguia. Jenongue jembuti mbuti quiatu quia Cristo cuti. Jêirasei rasei tuchi quiatu quia Dios je. Himnos. Salmos. Jêya chõ jêingo irasei rasei Dios je. ¹⁷ Jê mbae raã mose, Jesús rii ño jêsaã. Ae jêingo ñee nae, Jesús rii ño jeñee. Gracias jenyue bei chõ nguia Dios je Jesús rii.

Ae jêsaã nguia nae, jêsaã ño Cristo je

¹⁸ Tacheê mbia ninisi je. Jendu cheê jemumbayã ño nguia. Diosbi tuchi chõ ùquĩ nde. ¹⁹ Eru, jenyeseceua tuchi quiatu quia jeninisi rese. Jêingo tochi chõ nguia ee. ²⁰ Mbia riirĩ, jendu cheê jemumbayã mbei chõ nguia. Jêsi cheê abe no. Diosbi tuchi chõ ùquĩ nde. ²¹ Jendiirĩ nda jembupaama ichĩ jenyue jê. ¶ nda ñimondocho eã. ²² Tacheê erimba je cote. Jendereceua cheê jemumbayã mbei quiatu quia. Emae eã mose abe quiatu echeê jemumba eã. Jêseteã jêsaã ñooñoa nguiatu quia ee. Dios je quiatu jêingo mbae raã turã ja. Ae quia mae mbeite nguiã jendese co. ²³ Jê mbae raã mose, jêsaã turã ño nguia. Mbia je eã ño jêingo nguiã mbae raã. Dios je chõ jêingo nguiã eraã. ²⁴ Dios ra mbae turã mee jêje jenyisaã turã ndibishorõ. Cristo je chõ jêingo nguiã mbae ao ao ùquĩ. Jendereceua tuchi chõ ae re. ²⁵ Ae mbae icuã saã nguia nae, Dios abe ra mbae icuã mee ee echisaã icuã ndibishorõ. Dios ra emo mbasi chooño eã. Emo nda eisi turã ñooñoa no.

4

¹ Mbia rereceua je tacheê cote. Jenimba jembuquie; quie; chooño eã ño nguia. Mbae jêsaã turã jiri quiatu quia jenimba je. Jê abe jendereceua riqui Dios co no.

² Jeñee ñee mbei quiatu quia Dios je. Jêtesa tesa bei quiatu quia Dios rese. Gracias jenyue bei quiatu quia ee. ³ Jeñee ñee mbei quiatu quia Dios je ure rii. ¶ nda Dios riqui sembuheê ñee mbei tuchi mbia je Cristo rii. Ae rese mbia riqui jiranuate Cristo rese nae, ùquĩ asenei senei sete mbia je. Nyebe setarõ ji aĩ nguiã a. ⁴ —Paba, sã Pablo Jesucristo mbuchecua checua tuchi quia mbia je, jenyue bei quiatu quia Dios je.

⁵ Jeñimbaaracua chõ nguia siqui turã Jesús quiatoã je. Ae Dios bite nae, ùquĩ ndese chõ jêingo ñimbecoteã. ⁶ Sã embiquesa riqui mbae mbiise no. Eĩ jenyue si chõ nguia ñee turã mbia je. ¶ nda jêaquiatute ñee Jesús quiatoã ñee ndibishorõ.

Pablo ñee hui bei

⁷ Tiquico si quia jendea aque. Ae ra mbae senei ja jêje jembiiirandu serii. Ae que mbae saã turã mbeite quia serese ra. Dios rimba turã tuchi chõ ae re. ⁸ Nyebe amondo nguiã jendea aque. Jembiiirandu ja sacua serese. Jembia tuchi sacua Cristo rese abe. ⁹ Onésimo abe si quia erese aque. Hue jenda sí chõ ae re. Jesús quiato tuchi chõ ae abe re. Ûquĩ nyeremo nda jembiiirandu tuchi a jenda ja rese.

¹⁰ Aristarco tarõ ji ñi serese a. Ae abe saludos mondo quia jêje aque. Marcos abe saludos mondo quia jêje aque. Bernabé nongue riirĩ ño ae re. Ae oso mose jendea, jêisi turã ño secheê nguire. Acheê ngue jêje erii nyii. ¹¹ Jesús Justo abe saludos mondo quia jêje aque no. Ûquĩ mii judíos que siqui tuchi quia serese Dios cheê nenei nenei nda. Ûquĩ ngue sembiate quia mbae raã turã mose serese ra. ¹² Epafra abe saludos mondo quia jêje aque no. Cristo rimba rei ae no. Jendesenda sí chõ ae no nde. Ae ñee mbeite quia Dios je jeni co. Jêingo irãtã sacua Dios rui. Ae Dios bite riqui nae, ùquĩ ndese jêingo tuchi sacua. ¹³ Epafra riqui nyeseceua tuchite jendese co. Aicuate se quia co. Laodicea jenda rese abe eriqui nyeseceua tuchite co. Hierápolis jenda rese abe no. ¹⁴ Lucas abe saludos mondo quia jêje aque no. Aba rasi rea reasa rei ae. Médico rei ae. Jesús cheseceua tuchi chõ ae re. Demas abe saludos mondo

quia jêje aque no. ¹⁵ Jesús quiato Laodicea jenda je saludar jenye rã ure je. Ninfas je abe saludar jenye. Ae ñumunua nua nguia Ninfas chuchua Jesús quiato nae, ãquĩ abe je saludar jenye rã ure je. ¹⁶ Ae ambesa mbesa quia a nae, emondo nonde jêje a nae, ã je leer jenye ja rã. Aquere jemondo rã Jesús quiato Laodicea jenda je. ãquĩ abe leer i sacuã ee. Ae carta ambesa Laodicea jenda je nae, jê abe leer jenye ee no. ¹⁷ Jeñee na Arquipo je. —Ae je Jesús ñee nae, “co esaã seje” i ndeje nae, ãquĩ esaã turã ja chõ, jenye Arquipo je.

¹⁸ Hui bei sacuã co ambesa mbesa quia seo ae je co. Pablo chõ se re. Jendua serese setarõ ji rese. Sã Dios riqui turã tuchi jêje. Amén.

PRIMERA CARTA DEL APOSTOL SAN PABLO A LOS TESALONICENSES

Pablo ã mbesa

¹ Pablo rei se. Silas riqui serese a. Timoteo abe no. A urembesa mondo quia jêje aque, Tesalónica jenda. Ae ñumunua nua mbeite quia Jesús ríí. Jesucristo icuasa chõ jê nde. Dios icuasa abe chõ jê no nde. Dios rei nanderu. Jesucristo rei nandererecua. Sã ùquĩ turã ndiqui bei jêje. Sã ùquĩ ndiqui jembia bei.

Jesús jêicuate quia ùquĩ

² Gracias, ure bei quia Dios je jeniã ã. Jê ja ríí. Ure ñee mose Dios je, jeniã ño ureico nguiã ñee ñee ee ã. ³ Jesús jêicuate quia ùquĩ. Nyebe jêingo beite nguiã mbae turã ndese ùquĩ. Jenyesequate quia Jesús rese ùquĩ. Nyebe jêingo nguiã Dios cheẽ nenei nenei mbei mbia je ùquĩ. Jesús nyebi sí mose, ùquĩ ño jêsaarõ arõ u nguiã hue. Jeñimbirãcuã tuchi equia eraarõ arõ ùquĩ. ⁴ Seresenda, Dios riqui nyesequa tuchi jendese co. Dios que jêirabo umbaerã nda. ⁵ Dios cheẽ turã ngue uresenei senei nguia jêje ra. Urecheẽ achõ je eã. Espíritu Turã abe que jembaaquiatu quiatu ra. —Ichõiño eã tuchi chõ Dios cheẽ nde, ure que equia erenei nenei jêje ra. Ureico mose jendese que ureico turãte jêje ra. ùquĩ ndese que jêingo mae nda. ⁶ Ure rã si que jêingo Dios rui ra. Nandererecua rã si que jêingo ra. Dios cheẽ ngue jêisi tuchi ra. Nyebe que mbia icuã tuchi riqui jêje ra. Mbiam icuã icuã mose jêje que Espíritu Turã ndiqui tuchi jendese ra. Jembia tuchi sacuã. ⁷ Nyebe Jesús icuasa riqui nguiã siqui turã jendui. Jesús icuasa Macedonia jenda. Acaya jenda abe no. ⁸ Nandererecua cheẽ ngue jêsenei senei tuchi quia Macedonia jenda je ra. Acaya jenda je abe no. Ishonda ja je. Mbiam que jirandu ja quia jendese ra. —Dios icuasa rei ùquĩ, i equia jeniã ùquĩ. ¿Mbaerã nda Dios cheẽ asenei ee re? Jembiirandu turã ngue eno. ⁹ ùquĩ nguia ñee turãte nguiã jeniã ùquĩ. —Tesalónica jenda que Pablo isi

turã nda. Pablo resenda abe isi turã. Hui tuchi que Dios raanguia si ra. Si qui bei nonde Dios reco rese cote, i equia jeniã ùquĩ. ¹⁰ —Tesalónica jenda chi Jesús raarõ arõ huee. “Tu ra nyebi ibate si”, i u huee, i equia jeniã ùquĩ. Jesús rei Dios reco riirí. Dios que Jesús raaque mbuquera si ra. Jesús ra nanderiquisã mbae rasi si. Dios mbiam icuã mbasi mose.

2

Dios cheẽ uresenei tuchi jêje

¹ Ureso chooño eã ngue equia jendea ra, Seresenda. Dios cheẽ ngue uresenei tuchi quia jêje ra. Jêisi turã turãte que equia ra. Ureso mose jendea. ² Ureso que Filipos nyii ra. Hue jenda que mbiam icuãte riqui ure je ra. Ureiruã nua ngue ra. ùquĩ jêicuate quia ùquĩ. Aquere que Dios cheẽ turã uresenei senei tuchi jêje cote ra. Ureso mose jendea. Dios que urembusiquiche eã tuchi ra. Mbiam icuã tuchi raque ure je. ³ Dios cheẽ ngue urechabi chabiã tuchi quia erenei nenei nda. Urendua icuã icuã eã ngue equia ñee mose jêje ra. Jembiirí irí eã. ⁴ —Mañi nda equia reae, i que Dios quia ure je nyii ra. Maende ure rese que ureirabo cote ra. Echeẽ turã nenei nenei sacuã. Mbiam mbiam sacuã eã ño ureico nguiã Dios cheẽ nenei nenei jêje. Dios mbiam sacuã ño ñene. Dios riqui mae mbeite urechiangui renda rese co. ⁵ Urecuasú que uresaã saã eãte quia jêje ra. Urecheẽ ñooño eãte que equia jêje ra. Jembiirí irí eãt e que ureico quia ra. —Sã mbiam mbae mo mee mee ure je, ure eãte que equia jembiirí irí nda. Dios riqui maete urerese co. ⁶ —Jenderecuarã nda ure cote jê! ure eãte que equia jêje ra. Ure eãte que equia mbiam mo abe je ra. Cristo chimondo raque ure, echeẽ nenei nenei sacuã jêje. ⁷ Ureico turã ngue equia jêje ra. Sã esi mo ndiqui nguiirí nderequia turã, eĩ ure chõ ngue equia jêje ra. ⁸ Urechesequa tuchi que equia jendese ra. Nyebe Dios cheẽ achõ eã uremee nguiã jêje. Mbae ja uremeese rete raque jêje.

⁹ Urechisaã saã ndese que jêingo mae tuchite ra, Seresenda. Ureico mose jendese. Mbae que uresaã saã mbeite quia ra. Ure ae chõ urechiurã ureisi isi nguiã.

Nyaashĩ mose achõ eã ngue ureico mbae raa naa nda. Itondaru mose ab e que ra. ƒ nda je mbae jemondoã ure je. Ure Dios cheẽ nenei nenei mose jêje. ¹⁰ Jesús icuasa chõ jê cote re. Urecuata turãte que equia jêje ra. Jemae ngue equia urerese ra. Dios abe que mae nguia urerese ra. Ureico mose jendese. Ureico turãte que equia ra. Nyebe emo ñee icuã aroneate urerĩ. ¹¹ Jendu rã ngue ureico jêje resẽ. Sã emo ndiqui nguiirĩ mundua turã no. Sã emo ndiqui nguiirĩ mbucuata turã no. Eĩ si chõ ure re. Jemundua ndua. Jembucuata turã nonde. ¹² Urecheẽ tuchi que equia jêje. —Dios quiato chõ jê cote re. Nyebe jẽingo nguia Dios mbia beite cote. Dios que jẽirabo ra. Dios ra jenderecua tuchi cote. Dios ra uturã mee jêje, ure beite que equia jêje ra.

¹³ Gracias, ure bei equia Dios je jenĩ a. Dios cheẽ nguiatu ngue jẽisi turãte nguia. Ure Dios cheẽ nenei nenei mose jêje, jẽisi turã ngue ra. Mbia cheẽ na eã ngue Dios cheẽ jêje ra. Dios cheẽ ngue jembuturã nda. Jê eisi mose. Gracias ure que Dios je, jê echeẽ isi mose ra. ¹⁴ Sã judíos icuã icuã Jesús quiato Judea jenda je no. Eĩ si chõchĩ mbia icuã icuã jêje no, Seresenda. Jê ji jenda chõ eicuã icuã ndiqui nguia jêje Jesús rĩ ãquĩ. ¹⁵ Judíos sí que Jesús icuã nandererecua ra. Sã Dios cheẽ mbuchecuasa icuã nyii no, eĩ sí que Jesús icuã no nda. Ure abe mombo no. Judíos icuã tuchi que ãquĩ nda. ã eicuãte riqui Dios je ã. Mbia abe je eicuãte riqui ã no. Mbia ja je. ¹⁶ —¿Mbaerã nda jẽso Dios cheẽ nenei nenei Judíos eã je re? i que equia ure je ra. Ureriquisã quisã ndei que equia ra. Dios cheẽ ngue uresenei mbei bei chõ judíos eã je ra. Dios erirõ sacua eicuã si. Judíos que urecheẽ siquisã quisã ño nguia ra. Judíos que huicua saã i i tuchi quia ra. Nyebe que Dios paama i tuchi ee cote ra. Dios ra embasi tuchi cote.

Sesose rete jendea

¹⁷ Seresenda, ishote urecu jẽsi a. Nyebe ureya eãte riqui nguia jendese ã. Uremaese rete quia jendese ã. Urendua beite quia jendese ã. ¹⁸ Uresose rete rei que equia jendea ra. —Taso erea, ae beite

rei que se quia ra. Pablo rei se. Satanás que ureriquisã quisã ño nguia ra. ¹⁹⁻²⁰ Jesucristo ra tu si nyebi nanderea. Seya tuchi aico eraarõ arõ a. Jê nguia uremombia mbia beite nguia ãquĩ. Jẽchĩ Jesús quiato. Nyebe ra ureya jendese Jesús tube mose. Ure Jesús cheẽ nenei nenei mose que jẽisi turã nda. Nyebe ra Jesús ia tuchi urerese eru mose.

3

¹ —Tairandu tuchi rã erese, ure tuchi que equia jenĩ nda. Urendua ndua tuchi que equia jendese ra. Nyebe ure ae ureico nguia Atenas. ² Nyebe que Timoteo amondo rei nguia jendea. Jirandu sacua jendese. Dios rimba tuchi que ae ra. Nanderesenda tuchi que ra. Cristo cheẽ turã nenei neneisa que ae ra. Ae que uremondo jendea jemundua ndua sacua Jesús rese ra. ³ Timoteo que amondo jendea ra. ƒ nda jẽhui eã Dios cheẽ si mbia icuã mose jêje. Mbia icuã tuchi que eriqui jêje ra. Nande je ja que eicuãte riqui ra. Jesús icuasate quia nande re. Nyebe mbia icuãte riqui nguia nande je. ⁴ Ureico que equia jendese nyii, aque mose que ureico rei ñee jêje resẽ. —Mbia icuã tuchi ra eriqui nande je, ure rei que equia jêje nyii resẽ. ¡Sã ngasẽ cote jê! ¡Sã mbia icuã icuã nande je cote jê! ⁵ Nyebe seiranduse beite riqui nguia jendese. Nyebe Timoteo amondo rei nguia jendea. Ureirandu sacua. —¡Quiatu Jesús quiato rea jê! Siqui bei rei equia Jesús rui reae. Aba mbĩrĩ irĩsa embicua eã ndei reae. Dios cheẽ nandesenei ñooño eã ndei ee reae, ae que Timoteo mondo jendea ra.

⁶ Ae que Timoteo tu jẽsi cote ra. Ñee turãte que u jenĩ nda. —Hue que echĩ Dios icua tuchi ra. Hue que echĩ nyesecua tuchi Dios rese ra. Nande abe rese que echĩ nduate huee ra. Eyayãte eriqui rei nanderese, i que Timoteo u urembiirandu jenĩ nda. Ure abe ureyayãte riqui jendese ã. ⁷ —Hue que echĩ Dios icua tuchi ra, i mose que ureya tuchi ra. Mbia icuãte raque ure je. Seresenda, jê urembiate quia ãquĩ. ⁸ Ureya tuchite jendese, jẽingo bei mose nandererecua rese. ⁹ Dios urembia tuchite quia jendese co. Nyebe ureico nguia gracias i ee co. ¹⁰ Dios je que ureico ñee mbei

ra. Nyaashĩ mosechõ eã. Itondaru abe. — Paba, urererao rã mbia rea, ure bei que equia Dios je jeniĩ nda. ¶ nda jembaaquiato ji jẽingo tuchi Dios rese.

¹¹ Dios rei nanderu. Jesucristo rei nandererecua. Ũquĩ je ureico ñee tuchi ã. Urererao sacua jendea. ¹² Sã nandererecua jembuchesequa tuchi jenyiese. Mbia ja rese. Sã ureico nyesequa tuchi jendese no. Eĩ jenye si chõ nguia nyesequa mbia rese jẽ abe no. ¹³ ¶ nda Cristo uquirãcuã mee jẽje. ¶ nda Cristo jemingo icúe umbaerã tuchi. ¶ nda jemingo turã mbei Dios rese. Jesucristo tu mose chee ibate si. Mbia ra ñee icuã aroneate jeniĩ cote. Ñee icuã aroneate ra Dios je jeniĩ. Jesucristo tu mose ra Dios mae jeturã ndese. Jesucristo ra tube quiato ja rese.

4

Jẽingo turã, i Dios mbia je

¹ Seresenda, tacheẽ tuchi jẽje. Jesús cheẽ ngue uresenei senei tuchi quia jẽje ra. Ũquĩ nduĩ chõ jẽingo turã ndei nguia ũquĩ. Jẽingo i i tuchi quiatu eruĩ jẽ. ¶ nda Dios ia tuchi jendese. Secheẽ ae eã ño ã nde. Jesucristo cheẽ ño ñene. ² Nandererecua tuchi chõ Jesús re. Ae chõ urembucheẽ nguia jẽje. Ae cheẽ si jẽingo tesarei ãte ũquĩ. ³ Dios jemingo sete quia icúe umbaerã co. ¶ Emo ninisi rese ra jẽingochĩ jẽ! ¶ Eru eã mo ndese abe ra jẽingochĩ jẽ! ⁴ ¶ Jeninisi ae rese chõ jẽingo! Jeninisi jendeco turã ño nguia. ⁵ Dios icuasa reã ño mbia ninisi oseĩ oseĩ nguia ũquĩ. ¶ Eĩ jenyechĩ nda jẽ jẽ! ⁶ ¶ Jenongue ra jembĩrĩ irĩchĩ eninisi rese jẽ! Ũquĩ naa naa mose ra Dios jembasi tuchi. Nyebe urecheẽ nguia jẽje nyii. ⁷ —Jẽingo turã icúe sembaerã, i que Dios nande je ra jẽ. —Jẽingo icuã icuã, iã equia nande je co. ⁸ ¶ Urecheẽ jẽisi turã ño nguia jẽ! Jẽ urecheẽ isiã mose, eĩ jenye chõ nguia Dios ucuayã. Urecheẽ achõ eã ño uresenei senei nguia jẽje. Dios cheẽ ño ñene. Dios sí que Espiritu Turã mondo nande je ra.

⁹ —Jenyesequa jenyiese, aeã nda jẽje cote. ¿Mbaerã nda acheẽ jẽje re? Dios que ñee jẽje no. Nyebe jẽingo nguia nyesequa jenongue rese ũquĩ cote. ¹⁰ Macedonia jenda rese

jẽingo nyesequa ũquĩ. Jesús quiato rese. Jenyesequa i i tuchi jiri erese jẽ. ¹¹ ¶ Jẽingo turã ño nguia jẽ! ¶ Jẽĩmbecoteã ño nguia jembae rese jẽ! ¶ Jẽquieĩ quieĩ bei equia jẽ! Ũquĩ ngue urecheẽ jẽje nyii resẽ. ¹² Ũquĩ naa mose ra Jesús icuasa reã ñee turã turã jẽje. Ũquĩ naa mose ra mbae tiã eã jẽje no.

Jesús ra tu nyebi íbii

¹³ Mbia raaque rese taembiirandu rã. ¶ nda jẽyayã eã mbia raaque rese. Jesús icuasa reã ngue eyayã tuchite riqui mbia raaque rese ra. —Quera si na nye. Nandemae si na erese re, i eã ño Jesús icuasa reã nguia mbia raaque je ũquĩ. ¹⁴ Jesús que mano ndei nguia nyii. Quera si que ra. Nyebe ra Jesús icuasa raaque abe quera si. Sañi Jesús quera si no. Eĩ si ra Jesús icuasa raaque quera si no. Dios ra embuquera si. Jesús rese ra ecuaẽ. Ũquĩ nandeicuate quia ã. ¹⁵ Nandererecua Jesús cheẽ uresenei senei nguia jẽje ã. Jesús ra tube íbii. Aque mose ra mano je rane nyoĩ erea. Ae nandereco nandeico ã nae, ũquĩ abe ra nyoĩ eruĩ cote. ¹⁶ Cristo ra tu nguichi ibei si. Ererecua rã nda eru ñee mbia je. Angel nderecua ibatenda ra ñeemombo. Corneta abe ra pu i Dios mbae. Cristo nguichi mose íbii. Aque mose tuchi ra Cristo icuasa mano je quera si. Ũquĩ nane nda quera si. ¹⁷ Aquere ra nandereco rerao ũquĩ ndese cote. Ibeishĩ ni nda nandererao ja. Huee ra nandemae tuchi Cristo rese cote. Nandeico bei ra erese cote. ¹⁸ Á ndei Dios cheẽ ã. Jẽĩmundua ndua bei quia erese. ¶ nda jẽya tuchi erese.

5

Jẽquiche je na Jesús ru chã

¹ —Aque mose ra Jesús ru, ae eã nda jẽje, Seresenda. ² Isa chõ mbae mbuquiachãsa riqui nguia tu. Mbia ndua eã mose ra eru. Eĩ si ra Jesús u, mbia ndua eã mose erese. ³ —Ureico turãt e quia ã ndesẽ, i ra mbia. Ajee tuchi ra Jesús ru aque mose. Mbia mbutiã nonde cote. Sã nanimbae rasi riqui tu ajee no nae, eĩ si tuchi ra Jesús u ajee. Emo nda oso chee eã. ⁴ Jẽ nguia jẽingo ãte nguia itondaru ũquĩ, Seresenda. Jẽaquiata eã ño jẽ nde.

Jẽ nguia ra Jesús jembua eã u. Mbae mbuquiachãsa rã eã nda eru jẽje. ⁵ Nyaashĩ na ño jẽingo nguiã jẽ ja ũquĩ. Itondaru rã eã ño nandeico nguiã nande ã. ⁶ Nyebe nandechumumba rã mbei chõ nandeico nguiã tesa. Mbia ataque quiarei uque bei. ⁷ Ae uque quia, ũquĩ ño uque nguiã itondaru. Ae quiacua quiacua quia, ũquĩ ño quiacua nguiã itondaru. ⁸ Nyaashĩ jenda chõ nandre. Nyebe nandechimbaaracua bei quiatu quia nande. Dios nandeicua tuchi quia nande. Nandechesecua tuchi quia erese nande. Dios ra nanderirõ tuchi mbae icuã ja si. Ũquĩ nandeicuate quia ã. Nyebe ra mbae icuã ocoã nanderese. ⁹ Nandembasi sacuã eã ngue Dios nandeirabo ra. Nanderirõ sacuã eicuã si chõ ngue nandeirabo nguia. Jesucristo rĩ nda nanderirõ eicuã si. Jesucristo rei nandererecua. ¹⁰ Ae que mano nande je ra. Nandeico sacuã erese. Tu ra nandererao siqui sacuã erese. Nanderereco siqui mose ra nandererao. Nanderaaque chi mose ra nandererao no. Ëi ja chõ ñene. ¹¹ ã ndei Dios cheẽ ã. Jẽ ño jeñimundua ndua nguiã erese ũquĩ. ¡Ũquĩ jẽsaã saã mbei quia jẽ!

Pablo embaaquiatu

¹² Jesús icuasa rerecua cheẽ nda jemumbachĩ, Seresenda. Jenderecuarã ño Dios emingo nguiã. Jembaaquiatu quiatuchĩ equia ũquĩ. ¹³ Nyebe jẽingo turã ño nguia ee. Jenyesequa tuchi quia erese. Jembaaquiatu quiatu sacuã ño ũquĩ nde. ¡jẽingo turã ño nguia jenyue! ¹⁴ Emo tomei mo siqui mose jendese, jemingo mbae mo ndese. Ae hui serĩ serĩte quia Dios cheẽ si nae, ũquĩ jemingobe erese. Ae equirãcuã neate, ũquĩ jembirãcuã. Jẽingo mingue chõ nguia mbia ja je. ¹⁵ Mbia icuã mose jẽje ¡jẽicuã eã ño ee jẽ! ¡jẽingo turã ño jenyue jẽ! ¡jẽingo turã ño mbia ja je no jẽ! ¹⁶ Jẽya bei jẽingo. ¹⁷ ¡Jeñee ñee mbei quia Dios je jẽ! ¹⁸ Gracias, jenyue quia Dios je mbae ja rĩ. Ebi tuchi quiarei ũquĩ. Jesucristo icuasa chõ jẽ nde. ¹⁹ Espiritu Turã nda jẽsiquisãchĩ jẽ. ²⁰ Dios cheẽ mbuchecuasa cheẽ jeñandu turã ño nguia jẽ. ²¹ —Ma ñee ñooñoa, jenyue tuchi quiatu eicua jẽ. Ñee ñooño eã mose,

erui jẽingo. ²² ¡Mbae icuã ja rese ra jẽingochĩ jẽ!

²³ Aba mombiasa chõ Dios riqui nguiã co. Sã ae si jemingo icúe umbaerã tuchi. Sã ae jemingo turã mbei. Jesucristo tu chee mose ibate si. Mbia ra ñee icuã aroneate jeni cote. ²⁴ Ũquĩ nda Dios saã ja jẽje. Ae quiarei ichõiñosa reã tuchi.

Pablo ñee hui bei

²⁵ Jeñee mbei quia Dios je urerĩ, Seresenda. ²⁶ Mbia nanderesenda jẽquiaam a ama ja ure je hue jenda. ²⁷ ã sechimbesa jẽsenei ja rã nandenongue hue jenda je. — Jẽsenei na, ¡Cristo quia jẽje co. ²⁸ Jesucristo rei nandererecua. Sã ae riqui siqui turã mbei jendese. Amén.

SEGUNDA CARTA DEL APOSTOL SAN PABLO A LOS TESALONICENSES

Pablo chimbesa

¹ Pablo rei se. Silas riqi serese a. Timoteo abe no. Ureico ã mbesa jêje a, Tesalónica jenda. Jê nguia jeñumunua mbeite nguia Jesús je ũquí. Jesucristo icuasa chõ jêingo nguia ũquí. Dios rei nanderu. Jesucristo rei nandererecua. ² Sã ũquí turã ndiqui jêje. Sã ũquí ndiqui jemombia bei.

Dios ra mbia icuã mbasi

³ Gracias, ure beite quia Dios je jeniã ã. Coche ureico nguia ñee Dios je jeniã. Jê nguia jêingo nguia Dios icua tuchite ũquí. Jê nguia jêingo nguia nyesequa tuchite jenyiese ũquí. ⁴ Nyebe ureico nguia ñee turãt e jeniã ã. Ae ñumunua nua nguia Dios je, ũquí ja urembiirandu turã nguia jendese ã. Jêingo mingute quia mbia icuã je ũquí. Jêingo Dios icua tuchite ũquí. Mbã icuãte riqi raque jêje. Mbã icuã mose jêje, jê jêturãte riqi ee ũquí.

⁵ Sã Dios turã tuchi riqi no jê. Sã mbã mbuchecha turã no. Ae ra ñimbiirãcuãte quia mbã icuã icuã mose Jesús rii ee nae, ũquí je ra mbã turã mondo. Mbã ra emondo mbã chisã turã ndibishorõ. Mbã chisã icuã abe ribishorõ no. ⁶ Ae jembasi mbasi quia nae, Dios ra ũquí mbasi tuchi cote. ⁷ Jesucristo ra tu ibate si. I ra eu quia nyecua. Angel cuabẽ ndese ra eru. Jesús ra ángel quirãcuã tuchi queru. Tata rendi rã nda Jesús ru. Eru mose ra mbã icuã icuã eã nande je cote. ⁸ Jesús tu mose ra Dios icuasa reã mbasi mbasi cote. Echeẽ turã mumba mumba ra embasi Dios cheẽ turã Jesucristo rii. ⁹ Jesús ra ucheẽ mumba mumbasa mbasi tuchi. Jesús ra emombo isho. Echeẽ mumba mumbasa ra siquiã mbei Dios rese cote. Dios quirãcuã ndese abe ra eriquiã no. ¹⁰ ũquí nda Jesús saã ucheẽ mumba mumbasa je tu mose. Echiirabo quia ra ñee turã turã mbei erii eru mose. Eicuasa ra ñee turã turã mbei erii eru mose. Jê abe ra jêingo erese. Ure Dios cheẽ nenei mose, jêisi que ra. Nyebe ra jê abe jêingo erese eru mose. ¹¹ Nyebe

ureico nguia ñee ñee mbei Dios je jeniã ã. Ae Dios bite nae, i nda ũquí jêsaã saã mbei quia. ũquí je que Dios “jenyu” i jêje ra. Mbã turã jêsaã saãse rete quia ũquí. Sã Dios uquirãcuã mee jêje. Mbã turã naa naa nonde cote. Jesús icuasa chõ jengu nguia huee. ¹² Jê mbã turã naa naa mose, mbã ra ñee turã turã Jesucristo rii. Jê abe rii nda Jesucristo mbã mbucheẽ turã turã. Dios quia eturãte riqi nguia nande je. Jesucristo abe eturãte nande je. Ae rei nandererecua.

2

Dios ucuãyãsa

¹ Jesucristo rei nandererecua. Ae ra tu nandemunua mbucha uchiese. ũquí ño asenei senei nguia jêje. ² —“Co Jesús ru quia co”, i que Pablo ra, ichõño nda mbã serii jêje. Jeñanduchõ ño ũquí mose. —Co Jesús ru quia co, ae eã se quia embesa jêje a. Mbã mo nda ñee ñooño jêje. —Jesús ra tu cote. Dios que sembiirandu ra, ichõño nda jêje. ũquí jeñanduchõ ño. ³ iMbã ra ñee ñooño chõ jembii rii irii jê! Jesús rane nda tuã nguia. Mbã rane nda hui hui Dios si. Dios ucuãyãsa rane nda tu Jesús si. —Emo mose aque tambutiã, i que Dios aque rii nda. ⁴ Aque ra Dios resenda ucuãyã tuchi. Dios abe ucuãyã tuchi rae. Dios chuchúaa ra eñi ngoi mbã mbii rii irii. —Se rei Dios, ichõño nda hui mbã mbii rii irii. ⁵ Seico mose jendese que asenei ja jêje ra. ¿Jêtesareia ndei equia secheẽ si re? ⁶ Dios ucuãyãsa ra tu emo mose. Eriquisã ji ae riqi nguia aque. Eriquisã iriã mose ra eru. Eriquisãsa jêicua quia ũquí. ⁷ Mbã Dios cheẽ mumba tuchi quia ã cote. Dios ucuãyãsa ra tuchõ eã. Eriquisãsa iriã mose quia ra eru cote. ⁸ Nyecua tuchi ra u mbã je cote. Jesús ra tu erii charã cote. Jesús nininya tuchi ra tu. Aque mose ra Dios ucuãyãsa iquia. ⁹ Satanás nda uquirãcuã mondo Dios ucuãyãsa je. Dios ucuãyãsa mbuquirãcuã sacua. Mbã icuã chumumbara tuchi ra equeru. Ñee ñooño nda u mbã je. Mbã mae sayã nda esaã saã u mbã mbii rii irii sacua. ¹⁰ Dios ucuãyãsa icuã tuchi ra Jesús quiatoã je. Jesús quiatoã

mbĩĩĩ irĩ tuchi ra u. Jesús quiatoã nyesecea eã nguia Dios rese resẽ. Nyebe ra Dios ũquĩ ndiroã eicuã si. Dios ra uquiatoã mbutiã tuchi. ¹¹ Dios rese eriqui nyesecea eãte ã. Nyebe Dios aba mbĩĩĩ irĩsa mondo nguiã ee. Nyebe eriqui nguiã “ae beite”, i aba mbĩĩĩ irĩsa je. ¹² Nyebe ra Dios ñee tuchi Jesús icuasa reã je. Ae mbae icuã saã sete quia, ũquĩ je. —Jẽso tata cuásuu, i ra Dios ee.

Dios chiirabo rei jẽ

¹³ Seresenda, Jesubite jẽingo ũquĩ. Gracias, ure bei quia Dios je jeniã a. Dios que jẽirabo cose nyii ra. Jendirõ sacuã jẽicuã si. Espiritu Turã jemingo sacuã icúe. Jẽ ichõĩñosa reã jẽicua sacuã. Ũquĩ je chõ ngue Dios jẽirabo nguiã. ¹⁴ Jesús cheẽ ngue ure-senei senei nguia jẽje huee ra. Aque mose que Dios “jenyu” i jẽje ra. Jembuquirãcuã sacuã Jesucristo quirãcuã je. ¹⁵ Seresenda, jẽhui jẽhuichĩ nda esi jẽ! ¡Urecheẽ ndui jẽingo bei jẽ! ¡Urechimbese abe rui jẽingo jẽ! ¹⁶ Dios rei nanderu. Ae quia rei eturã tuchi nande je. Ae quia rei nyesecea tuchi nanderese. Ae quia rei nandemombia mbi-asa. Nandeya tuchi nandeico Jesús raarõ arõ ã. Tube ra nyebi uquiato rea. ¹⁷ Sa Jesucristo riqui jemombia mbia bei. Dios abe no. Sã ũquĩ ndiqui tuchi jendese. Jẽhui eã sacuã echeẽ si. † nda jeñee turã mbei quia querabe. † nda jẽingo bei mbae turã ndese querabe.

3

Jeñee Dios je

¹ Seresenda, jeñee mbei quia Dios je ure riĩ. † nda isho ishonda Dios cheẽ andu ja. † nda eandu chooño eã. † nda eisi turã jẽ na si. ² † nda Dios mbia icuã ndiquisã ure si. Mbiam mĩ ño Dios icua nguiã ã. Mbiam ja eã. ³ Nandererecua ñee ñooño eã nguiã co. Uquirãcuã nda emee jẽje ucheẽ nguire. Mbae icuã nda esiquisã jẽsi. ⁴ Urecheẽ ndui si chõ jẽingo nguiã ũquĩ. Ae uresenei senei nguia jẽje, ũquĩ ndese ra Dios jemingo tuchi. Ũquĩ ño aicua nguiã ã. ⁵ ¡Sã nandererecua siqui tuchi jendese jẽ! Jẽirandu sacuã Dios nyesecea rese nanderese. Jẽ abe jẽingo mingue sacuã Jesucristo rã si.

jẽtomeite ra jẽingochĩ jẽ!

⁶ Jesucristo cheẽ tuchi chõ ã nde, Seresenda. Jesús quiato mo tomei mose, jẽhui chõ esi. Jesús quiato siqui sereã mose mbae mo ndese, jẽhui chõ esi no. Jesús cheẽ tuchi chõ ã nde. ⁷ Ure rã si chõ jẽingo. Uretomei ngue uresaã saã eãte quia jẽje ra. ⁸ Jẽ mo ngue urembuquiaru chooño eãte quia resẽ. Mbae mo ño ngue uremondo mondo quia urechiurã ndibishorõ ndesẽ. Urequei quieĩ beite que equia resẽ. Itondaru mose abe. Jẽ mbae mondochõ eã sacuã ure je. ⁹ —Mbae mo embu se, ureã mbei que equia jẽje resẽ. Eturãte raque ũquĩ. Urequei quieĩ chõ ngue equia urembaerã ndesẽ. Jembaaquiatu sacuã. Ure rã si jẽingo sacuã quieĩ quieĩ. ¹⁰ Ureico mose jendese que jaembiirandu rei resẽ. Ae quieĩ quieĩ sereãte quia, ũquĩ nda quiaruã. ¹¹ Ureirandu que jendese ra. Jẽataque nda quieĩ quieĩ eã tuchi quia ra. Siqui chooñose tuchi nda equia ra. Uchuru mondo chooño ñee emo je. ¹² Sã ũquĩ ae riqui quieĩ quieĩ uchurã ao sacuã. Jesucristo cheẽ tuchi chõ ã nde. Nandererecua tuchi chõ a e re. ¹³ Seresenda, jmbae turã ndese chõ jẽingo bei jẽ! ¡jẽhuichĩ nda esi jẽ!

¹⁴ A urecu urecheẽ mbesa mbesa emondo sacuã jẽje a. Jẽ mo urecheẽ mumba mumba mose, ũquĩ ndese jemae tuchi. Jẽhui chõ ũquĩ si. † nda ireĩ ireĩ jiri urecheẽ mumbare. ¹⁵ ¡Ũquĩ nda jẽucuyã cuyãchĩ jẽ! ¡Jeñee turã ño equia ee jẽ! ¡Jembaaquiatu quiatu turã ño jẽ! Jendesenda chõ ñene. Urecheẽ mumba mumbate raque.

Hui bei

¹⁶ Cristo rei aba mombiasa. ¡Sã ae riqui jemombia bei jẽ! Jẽingo mose jenyuchúaa. Jengatásaa abe no. ¡Sã eriqui bei jendese jẽ! ¹⁷ Pablo rei se. Se ae chõ ã ambesa nguiã hui bei a. Sechimbese ae chõ ã nde. Sechimbese jẽicuate quia ũquĩ ndesẽ. Sembae letras. Se bei que ambesa quia hui bei ra. ¹⁸ Sã Jesucristo turã ndiqui bei jẽ ja je.

PRIMERA CARTA DEL APOSTOL SAN PABLO A TIMOTEO

Pablo embesa Timoteo je

¹ Pablo rei se. Jesucristo chimbaaquiatu, Jesucristo chimondo. Dios abe chimondo. Dios ae nanderirō nguiã nandeicua si. Jesucristo chō nandesarō arō nguiã ã. ² Aico ã mbesa ndeje a, Timoteo. Secheẽ nguire chō ereico nguiã Jesús icua aque. Nyebe aico nguiã seriirĩ i ndeje co. Dios rei nanderu. Jesucristo rei nandererecua. Sã ãquĩ turã mbei riqui ndeje. Sã ãquĩ ia eã mbei riqui nderese. Sã ãquĩ nembia tuchi.

Emo ndiqui mbia mbaaquiatu icuã icuã ã, i Pablo

³ Sã acheẽ ndeje seso mose Macedonia no. “Efeso eico” ae que ndeje, huee bei chō eico. Ae ñee ñooño nguia mbia mbaaquiatu icuã icuã hue nae, ãquĩ ñee embutiba. ⁴ ãquĩ siqui bei quia mbia cheẽ ima nenei nenei mbia je ãquĩ. ãquĩ siqui bei quia amei cose ndare nenei nenei mbia je ãquĩ no. ãquĩ ñee embutiba. ãquĩ ñee icuã icuãte quia ãquĩ. ãquĩ ñee ño mbia mbaaquiatu icuã nguiã nyue. ãquĩ ñee nda aba mbaaquiatuã Dios rĩ. ãquĩ mose Dios icua aroneate. ⁵ Sã hue jenda turã mbei riqui Dios je jẽ. Sã hue jenda riqui ndua turã mbei jẽ. Sã hue jenda riqui Dios icua tuchi jẽ. Nyesecua tuchi nda nyiese cote chã. ⁶ Mbia hue jenda mo ndiqui tesarei Dios cheẽ si ãquĩ. Dios cheẽ abi abi. Ñee ñooño mbei equia nyue ãquĩ. ⁷ Moisés cheẽ ndese mbia tambaaquiatu, i raque equia ãquĩ. Moisés cheẽ icua rocoĩ. Equiatu rocoĩ. Echeeño ño ñene.

⁸ Dios que Moisés mbucheẽ turã mbia je ra. Mbia icuã je que embucheẽ nda. Mbia mundua sacua huicua ndese. ⁹ Mbia turã je eã ngue Dios Moisés mbucheẽ nguiã. Mbia turã je eã ngue Dios ley mii nguiã. Dios cheẽ mumbasa je chō ngue emii nguiã. Mbia icuã je. Dios quiatoã je. Mbia teã teã je. Usi ucuãyãsa je. Ngu abe ucuãyãsa je. Mbia iquiasa je. ¹⁰ Ucheẽ mumbasa je chō ngue Dios ley mii nguiã. Ae siqui quia emo

ninisi rese, ãquĩ je. Ae eninisirã saã saã nguia nguesenda mo je, ãquĩ je. Mbia rirõsa je abe no. Ñeeñoñoosa je abe no. Ae eicua icuãte riqui Dios cheẽ turã je, ãquĩ je abe no. ãquĩ ja je chō ngue Dios ley mii nguiã. ¹¹ Dios que ñee ucheẽ turã nii seje ra. — Secheẽ esenei senei mbia je, i que Dios seje ra.

Dios que uturã teacuquia seje ra, i Pablo

¹² “Coche ñene” ae se quia Jesucristo je co. Ae que seirabo ra. Ae que sembuquirãcuã nda. Ae que semondo ucheẽ nenei nenei sacua mbia je ra. ¹³ Seicua tuchi raque ee nyii. Acheẽ icuã icuã ndei que se quia ee nyii ra. Equiato je abe que seicua icuã ndiqui nyii ra. Se Jesús icuayã mose. Seaquiatuã mose. Nyebe Dios ia eãte riqui nguiã serese. Nyebe Dios seicua mbutiã nguiã sesi cote. ¹⁴ Uturã ngue eteacuquia seje ra. Nguiirĩ ngue embuchecua seje ra. Nyebe aico nguiã Jesucristo icua co cote. Nyebe aico nguiã nyesecua Jesucristo rese co cote. ¹⁵ Jesucristo que tu íbii ra. Mbia icuã mbitirō sacua. Émingo bei nonde. Ichõñoa tuchi chō ã nde. Sã mbia “ae beite” i ja ã je. Seicuate raque se quiatu mbia ja si. ¹⁶ Dios ia eãte que eriqui serese ra. Eroseĩ nguiatu tuchi que eriqui seje ra. Nyebe mbia riqui nguiã jirandu ja Dios roseĩ nguiatu rese. Sã Dios semingo bei se abe, i chee ra emo abe ñee ñee. Dios roseĩ nguiatu rese jirandu mose. ¹⁷ Sã mbia riqui ñee turã mbei Dios je. Ae mii ño mbia rerecua tuchi re. Ae mii ño siqui bei tuchi nguiã co. Ae mii ño ererecua nandemae sayã nde. Ae mii ño mbae icua tuchi nguiã. Amén. ¹⁸ Timoteo, seriirĩ na tuchi chō nde re. Dios cheẽ mbuchecua que sembiirandu nderese nyii ra. Nyebe aico nguiã ñee tuchi ndeje ãquĩ ñee na si. Mbae icuã esiquisã quisã mbei chō nguia Jesús quiato si jẽ. ¹⁹ Dios eicua tuchi quia jẽ. Erendua ata atate chĩ nda jẽ. Mbae turã ndese chō eico. Emo emo ngue ndua chooño mbei quia ra. Mbae turã naa naa ndocoĩ. Nyebe eriqui nguiã siqui icuã icuã mbeite. Nyebe tesarei nguiã Dios cheẽ si cote. ²⁰ Eĩ ngue Himeneo nda. Alejandro abe no. Nyebe ngue amondo nguiã Satanás je. Ndua ndua sacua. Ñee icuã icuã eã sacua Dios rĩ.

2

Sã mbia ñee turã ja Dios je, i Pablo

¹ ã tacheẽ Jesús quiato ja je: Mbia ja rĩĩ jẽingo bei ñee Dios je. ¶ nda Dios uturã mee mbia je. Gracias jenyee bei quia Dios je mbia ja rĩĩ. ² Ae ererecua nae, ùquĩ ja rĩĩ abe jẽingo ñee mbei Dios je. Dios uturã mee sacua ee. Ùquĩ mose ra nandeico turã ja cote. Ùquĩ mose ra nandeya bei nandeico cote. Ùquĩ mose ra nandeico tuchi Dios rese cote. ³ Ùquĩ mose ra Dios abe ia tuchi nanderese. Eicua si mbia rirõsa chõ ae re. ⁴ Dios mbia rirõ ja sete quia eicua si co. Dios mbia mbaaquiato quiato sete quia co no. ⁵ Dios mĩ ño siqui nguiã co. Mbia que icha icha jate esi ra. Jesucristo mĩ ño siqui nguiã mbite re co. Mbia mbucha sacua Dios rese. Mbia sí chõ ae re. ⁶ Jesucristo que mano mbia icua ndiquicharõ sacua nda. Ùquĩ ndese que Dios mbia mbiirandu cote ra. ⁷ Ùquĩ nĩ ngue Dios seirabo ra. Semondo que judíos eã je embaaquiato quiato sacua nda. Ùquĩ Dios icua sacua ngue Dios cheẽ asenei senei ee ra. Ae bei. Acheẽ ñooñoa ño nguiã co.

⁸ Sã mbia ja riqui ñee mbei Dios je. Sã o mumbate ñee Dios je. Sã eriqui turã ja. Sã paama iã mbei nyue. ⁹ Sã cuña abe riqui siqui mingue. Sã eriqui ndua tuchi eã jiri huiãrao rese. Uachu rĩnda hui rese abe. Ua rese abe no. Lujo rese abe no. ¹⁰ Sã eriqui quiato ndua Dios rese. Sã eriqui mbae turã naa naa mbia je. ¹¹ Sã cuña quiriri chõ nguia mbia ñumunua mose. Sã eriqui nyiisaquia turã. Sã eriqui mingue. ¹² Mbia ñumunua nua mose, cuña mbia mbaaquiato quiato aroneate. Sã cuña mo ererecua raã naa eã ngu je. Sã eriqui chõ nguia quiriri. ¹³ Adán nane nguiatu ngue Dios chao nguiã. Aquere quiato ngue Eva ao nguiã cote. ¹⁴ Adán nane eã ngue Satanás mbiirĩ irĩ nda. Eva rane nguiatu ngue re. Eva rane ngue mbae icua saã nyii ra. ¹⁵ Dios ra paama i bei eã cuña je. Nguiirĩ nderequia turã mose. Dios icua mose. Siqui tuchi mose Dios rese. Nyesecua mose mbia rese.

3

Sã Jesús quiato rerecua siqui turã

¹ Acheẽ ñooño eã ño se re. Jesús quiato reaquiato sacua ño taico se, i mose emo, eturãte ùquĩ. ² Sã Jesús quiato rerecua riqui siqui turã mbei. Mbia ñee eã sacua ee. Sã ngüinisi mĩ ño nderequia. Sã eriqui ndua turã turã mbei. Sã earacua tuchi riqui. Sã eriqui mbia isi turã turã mbia mo oso mose echuchúaa. Sã eriqui mbia mbaaquiato quiato aracua. ³ Sã eriqui quiacuayã. Sã eicua icua eã mbei riqui emo je. Sã eriqui oo tuchiã mbae isiquia rese. Sã eriqui ico mingue. ⁴ Sã eriqui mbia uchuchua jenda rerequia turã. Sã eriqui nguiirĩ mbaaquiato quiato turã. Aba cheẽ mumbayã sacua. ¶ nda eriirĩ eĩ ñooño eã mbia je. ⁵ Nguiirĩ ndea chooño mose, Dios quiato reaquiato turã aroneate. ⁶ Ae Jesús icua ramote nae, Jesús quiato rerecua aroneate ùquĩ. Ùquĩ mose ucuasu raã naa arõte. Eicua arõte cote. Sã Satanás abe ucuasu raã naa ñimbicua nonde no. ⁷ Sã Jesús quiato rerecua riqui siqui turã mbei Jesús quiatoã abe je. ¶ nda diablo embiirĩ irĩ eã embicua. ¶ nda Jesús quiatoã ñee turã mbei erĩ.

Sã diáconos siqui turã

⁸ Diáconos je abe tacheẽ. Sã diáconos abe siqui turã. Sã eriqui ucheẽ mbuchebiã mbae raã nonde. Sã eriqui quiacuayã. Sã eriqui oo tuchiã mbae isiquia rese. ⁹ Sã diáconos siqui eã tuchi mbae icua mo ndese. Sã Dios mĩ ndese quiato eriqui bei. Sã Dios icua tuchi. ¹⁰ Ae ra diácono nae, sã mbia mae na nguiatu erese nyii. Eturã mose mbia je, sã diácono ae cote. ¹¹ Sã diácono ninisi abe riqui siqui turã mbia je. Sã mbia mbucheẽ ñee eã emo nĩ. Sã eriqui quiacuayã. Sã eriqui ucheẽ mbuchebiã mbae raã nonde. ¹² Sã diácono ngüinisi mĩ ño nderequia. Sã eriqui nguiirĩ nderequia turã. Uchuchua jenda ja abe no. ¹³ Diáconos mbae raã turã turã mbei mose, mbia ra eicua tuchi cote. Dios abe ra embuquirãcuã tuchi Jesucristo renei nenei sacua mbia je.

Ae Dios saã nande je, ùquĩ aba icua ja aroneate raque

¹⁴ Seso jeise rete raque nderea. Seso eã moi ño aico nguiã co mbesa ndeje a. ¹⁵ Nde Jesús quiato rerecuarã irabo aquiato sacuaã ño aico nguiã ã mbesa ndeje a. Iglesia jenda rerecua irabo sacuaã. Dios reco mbae rei iglesia. Iglesia quia rei Dios cheẽ nderequia tuchi mbia ja je. ¹⁶ Ae Dios saã nguia nande je nae, ùquĩ aba icua ja aroneate raque:

Dios que tu mbiarã íbii ra. Jesús, i equia ee. “Eturã tuchi” i que Espíritu Turã erĩ nda.

Angeles abe que mae erese ra.

Ae Jesús quiato nae, ùquĩ ngue esenei senei mbia ataque je ra.

Mbia mangue chooñoa jenda ja que eicua ra.

Aquere que Dios equeraobe ibate cote ra.

4

Mbia ra hui hui Dios cheẽ si

¹ Espíritu Turã ndiqui ñee co: Mbae ua ja nonde ra mbia hui hui tuchi Dios si. Aba mbĩrĩ irĩsa rese ra mbia riqui tuchi. Ùquĩ nda mbia mbaaquiato icuaã icuaã aba checuayã icuaã na. ² Ae uturã saã saã nguia nae, ùquĩ ndui rui ra mbia riqui. Ae ñee ñooño nguia nae, ùquĩ ndui rui ra mbia riqui no. Ùquĩ siqui beite mbae icuaã ndese ùquĩ. Nyebe eriqui nguiã mbae turã icuayãte chee cote. ³ Ùquĩ nda mbia mbaaquiato icuaã icuaã. Jeninisirã nda jendecoã. Jendurã abe ra jendecoã no, i ra equia ñee mbia je. —Mbae ra jẽu chooñocheẽ jẽ, i ra equia mbia mbaaquiato icuaã icuaã. Dios mbae chao ja raque mbia chiurã. —Sã sequiatio mbae ja u, gracias ire seje, i que Dios ra. ⁴ Dios chiao mbae turã ja. Mbae nandeisi teã teã eã ño nguia echiao. Mbae nandeu turã ja chõ nguia. Gracias nande bei chõ nguia Dios je. ⁵ Dios cheẽ nguire mbae turã ja riqui nandechiurã ã. Nande “gracias” i mose Dios je, mbae turã ja chõ eriqui nguiã nande je.

Jesús quiato rerecua turã

⁶ ã secheẽ esenei senei mbei quia Dios quiato je, Timoteo. Nde mbia mbaaquiato turã turã mose. Dios rimba turã tuchi ra nde cote. Jesús cheẽ ndui ra ereico tuchi cote. Dios ra ereicua tuchi cote. Sã ereico beite erese co no. ⁷ Mbia cheẽ

ñooño je cheẽ ndese ra erechiisaquiachĩ jẽ. Echimbirãcuã tuchi quiatu quia siqui Dios rese jẽ. ⁸ Nanderete quirãcuã mose, eturãte raque. Nandeico mose Jesús rese, ùquĩ nguiatu eturã tuchi nanderete quirãcuã si re. Aachõ eã nandeico Jesús rese. Ibate abe quiatu nandeico erese. ⁹ Acheẽ ñooño eã ño se re. Sã mbia “ae beite” i ja secheẽ je. Dios cheẽ ño ñene. ¹⁰ Dios cheẽ ñi ño ureico nguiã quicoi coi ã. Dios cheẽ ñi ño ureico nguiã ñimbirãcuã mbae ja rese ã. Dios reco quiatu ureicuate nguiã ã. Ae que mano mbia ja je ra. Ae eicuate quia nae, ùquĩ nda emingo bei.

¹¹ ã esenei senei mbei quia mbia je. Mbia Dios cheẽ mumbayã sacuaã. ¹² Sã mbia ndecheẽ andu turã. Amei eã ndaque nde. Mbae turã esaã saã nguia Jesús quiato résa. Ùquĩ siqui turã sacuaã nde rã si. Echeẽ turã mbei quia mbia je. Eico turã mbei quia mbae turã ndese. Echesequa tuchi quia mbia rese. Dios eicua tuchi quia. Mbae icuaã ndese ra eremae mae jirichĩ. ¹³ Mbia embaaquiato quiatu bei quia seso mose chee nderea. Dios cheẽ esenei senei mbei quia leer i ee. ¹⁴ Jesús quiato rerecua o chono mose ndearõ, aque mose que Dios nembraaracua tuchi ra. —ã esaã, i que ndeje ra. Ùquĩ si ra eretesareichĩ. ¹⁵ Ùquĩ ndese eico bei. Endua ndua bei quia erese. Ùquĩ mose ra Dios ereicua i i tuchi. Mbia ra jirandu ja nderese. ¹⁶ Emae ño nguia nde ae ndechiese. Echicuasẽ cuasẽ ño nguia mbae icuaã si. Ae eresenei senei nguia mbia je Dios cheẽ nae, ùquĩ emumbayã ño nguia nde abe. Ùquĩ mose ra Dios nemingo turã tuchi. Ndecheẽ andusa abe ra emingo turã tuchi.

5

Jesús quiato siqui turã sacuaã

¹ Erecheẽ icuaã icuãchĩ nda amei je nde embaaquiato quiatu mose jẽ. Amei embaaquiato turã turã ño nguia jẽ. Nderu esaã ño nguia siqui turã ee. Ndenongue rã ño eico mbia yasu je no.

² Ndesi esaã ño nguia ari je jẽ. Ndenongue esaã ño nguia ubichõ nyucuaaque rese jẽ. Endua icuaã icuaã eã ño nguia erĩ jẽ.

³ Eru cheecha mo mbae eã mose, sã Jesús quiato riqui mbae mo mee mee ee. ⁴ Eriirĩ tiarõ mose, sã aque chõ mbae mee mee mbei quia usi je. Eriirĩ nducucha mose, sã aque chõ mbae mee mee ee no. Ngu abe je. Umumbebosa je. Ñquĩ Dios bite. ⁵ Sã eru cheecha mo ae riqui no. Sã embae eãte riqui no. Ae ndua ndua bei mose Dios rese, ñee mbei mose Dios je, sã Dios quiato riqui mbae mee mee mbei ee. ⁶ Ae ebite nae, ñquĩ ndese achõ eru cheecha mo siqui mose, eicuãte ñquĩ. Eraaque rã ño aque riqui nguiã. Eresco siqui raque. ⁷ Ñ esenei senei nguia mbia Jesús quiato hue jenda je. Ñ nda mbia ñee icuã eã erĩ. ⁸ Emo ndua eã mose usi rese, ngu abe rese, eicuãte ñquĩ. Mbae mee mee eã mose ee, eicuãte ñquĩ. Ñquĩ siqui ãte quia Dios rese ñquĩ. Eicuã tuchi chõ ñquĩ Dios quiatoã si re.

⁹ Ari eru cheecha je inscribir jenye rã mámbii. Ae sesenta años eãte nae, ñquĩ je inscribir jenye eã. Ae eru ata nyii nae, ñquĩ je inscribir jenye eã no. Ae eru mii nyii nae, ñquĩ mii je chõ inscribir jenye. ¹⁰ Ae ari turã aba chĩcuate nae, ñquĩ achõ je chõ inscribir jenye. Ae ari nguiirĩ mbutiarõ turã mbeite quia nae. Ae ari mbia isi turãte quia uchuchúaa nae. Ae ari mbae turã saã saã mbeite quia Jesús quiato je nae. Ae ari erasi teaquiato turã mbeite quia nae. Ae ari siqui beite quia mbae turã ndese nae. Ñquĩ ari je chõ inscribir jenye. ¹¹ Eru cheecha ari eã mose, ñquĩ je inscribir jenye eã. Ñquĩ nyao arondete Cristo si. Ae ebite, ñquĩ achõ ndese ndua mose. —Serurã mo tateabe, i ra cote. ¹² Ñquĩ mose ra Dios paama i ee. Ucheẽ mbuchebi chõ nguiã ngu rea mose cote. ¹³ Eru cheecha ari eã mose, siqui eã arõte mbae mo ndese. Tuchua embuchesea sea choõno arõte. Mbia mbuchee ñee ñooño arõte emo nii. Uchuru rerequia choõno eã arõte. ¹⁴ Nyebe aico nguiã ñee eru cheecha, ae ari eãte, ñquĩ je. Sã ngurã mo ndea. Sã tiirĩ. Sã eriqui mbae turã naa naa mbei uchuchúaa. Ñquĩ mose ra Jesús quiatoã ñee eã ee cote. ¹⁵ Emo emo ngue nyao Dios si cote ra. Satanás ndese eriqui ã cote. ¹⁶ Sã Jesús quiato riqui mbae mee mee uchari eru cheecha je. Usi abe je eru

cheecha mose. Iglesia mbae mee mee eã sacua ee. Ae eru cheecha eriiriãte nae, ñquĩ je quiato iglesia mbae mee mee.

¹⁷ Jesús quiato rerecua mbae saã turã turã mbei mose, sã mbia ia tuchi riqui erese. Dios cheẽ nenei nenei turã mose, sã Jesús quiato riqui mbae mee mee mbei ee. ¹⁸ Sã embesa ji riqui ñee no: “Emo nimba ticuasú mbae usi raã mose, echuru ra jenyatichĩ mbae mo je jẽ. Sã ae ae si quia quiaru quiaru”, i que embesa ji ra. “Ae quiei quiei quia emo je nae, sã echa mbae isiquia mo mee ee”, i que embesa ji ra. ¹⁹ — Jesús quiato rerecua que mbae icuã saã nda, i mose emo, echeẽ nda jeñanduchĩ, ae mii ñee mose. Nyeremo ñee mose, ñquĩ ñee ñooñoa arõte cote. ²⁰ Jesús quiato rerecua mo siqui siqui bei mose mbae icuã ndese, echeẽ asi asi ee Jesús quiato ataque résaa. Ñ nda ñquĩ abe siquiche mbae icuã naa naa eã. ²¹ Eĩ ere chõ Jesús quiato rerecua je, siqui mose mbae icuã ndese. Ndequiatote raque. Echeẽ asi ee. Aico ñee ndeje Diosa a. Jesucristo sa abe no. Angeles Dios rimba sa abe no. ²² Jesús quiato rerecuarã nda eremii jeichĩ jẽ. Emae nguiatu turã na erese nyii. Emii jei mose, eicuã arõte emo mose. —Eremii jeichĩ ngue nyii ra, i ra mbia ñee ndeje cote. Mbae turã ndese chõ eico nde abe.

²³ I achõ nda erembeichĩ jẽ. Uva rique rasi ñetẽ abe embei mbei quia nderie rasi mose jẽ.

²⁴ Emo emo nyisaã mbae icuã nyecuate riqui nande je ã. Emo nyisaã icuã ndese quia nandeico nguiã mae ãte namo. Dios eicuã mbasi mose, aque mose ramo nda nandemae ñquĩ nyisaã icuã ndese cote. ²⁵ Eĩ si chõ mbia chisaã turã no nde. Emo emo nyisaã mbae turã nyecuate riqui nande je ã. Emo nyisaã turã ndese quia nandeico nguiã mae ãte raque ã no. Echisaã turã nda nyecua ja chee nande je cote.

6

¹ Ae Jesús quiato ererecua rimba mo nae, sã ñquĩ ndiqui nguerecua cheẽ mumbayã tuchi. Sã eriqui turã nguerecua je. Eĩ mose ra mbia ñee icuã eã Dios cheẽ nii cote. ² Timoteo, mbia rimba embaaquiato

quiato quia. ã echeẽ ee. —Jenderecua Jesús quiato mose, echeẽ jemumbayã ño nguia mbae raã turã turã ee. “Jesús rimba ja chõ nande re” jenyechĩ nda jenderecua ucuãyã cuãyã jẽ. Jenderecua Jesús quiato mose, mbae jẽsaã turã tuchi quiatu quia ee. Jẽingo turã tuchi chõ nguia ee, ere ererecua rimba je ñee.

Nandendua tuchiã jiri quiatu quia mbae isiquia rese

³ ã ndei Jesucristo cheẽ tuchi ã. Emo siqui mose ã ndui, siqui turã nda Dios rã si. Emo mbia mbaaquiato quiatu mose ã abi, Dios cheẽ ndui eã ño ãquĩ ndiqui nguia. ⁴ Ucuasu raã naa ño nguia ãquĩ. Ñee tuchi beite equia ãquĩ. Eaquiato rocoĩ. Mbia mbĩcuã icuãte equia ãquĩ. Mbia mbucheẽ icuã icuãte equia nyue ãquĩ. Mbia mumae icuã icuãte equia nyiese ãquĩ. ⁵ Ndua icuã icuã mbeite equia ñee turã ndocoĩ ãquĩ. Eicuã icuã mbeite riqui emo je ãquĩ. — Mbia ra mbae isiquia mee seje, se Dios cheẽ nenei nenei mose ee, i beite equia ãquĩ. ãquĩ ndese eicoã tuchi, Timoteo. ⁶ Nandeico mose Dios rui, ae ae ra nandembia nandembae mĩ ndese. ⁷ Mbae mo ngue nanderuãte nandechaacuquia mose ra. Eĩ nande si ra nandemano mose mbae mo nderao eã no. ⁸ Nandechiurã nandereco mose, nandeirao abe nandereco mose, nandeya chõ nandeico ãquĩ ndese. ⁹ Ae “mbaecha tuchi ra se” i bei quia ndua ndua, ãquĩ nda nĩmbirãcuã eã mbae icuã si. Mbae icuã tã i mose ee, mbae icuã nda esaã jei. Mbae Isiquia quiatu ebi tuchite riqui nguia. Echioseĩ oseĩ icuã nda equerao chee tata cuásuu. ¹⁰ Ae ndua beite quia mbae isiquia rese, ãquĩ mbae icuã saã ja arondete. Emo emo ndiqui ndua tuchi mbae isiquia rese ã. Nyebe eriqui nguia hui Dios si ã. Nyebe eya eã ndasi tuchi riqui nguia ã.

Dios eicua tuchi, i Pablo ñee Timoteo je

¹¹ Eĩ erechĩ nda nde, Timoteo. Dios rimba tuchi chõ nde re. Mbae turã ndese bei eico. Dios rã mbei chõ eico. Dios eicua bei chõ nguia. Echesequa bei chõ nguia mbia rese. Eico mingue chõ nguia. Ndecuasu ra eresaã saãchĩ nguia jẽ. ¹² Echĩmbirãcuã tuchi

quiato quia Dios cheẽ ndese jẽ. Aba mingo beisa rese quia eico tuchi jẽ. Ae quia ngue ndeirabo nguia nyii. Sã erecheẽ turãte mbia résaa nyii no. —Dios riqui semingo beite co, ere que equia nyii. ãquĩ ndese bei chõ eico. ¹³ Dios ae chõ mbae mingo ja nguia co. Erésaa tacheẽ ndeje. Jesucristo résaa abe tacheẽ ndeje. Sã Jesucristo siquicheã ñee Poncio Pilato je no. ¹⁴ Ae rĩ Dios ñee ndeje nae, ãquĩ emumbayã ja chõ nguia eraã turã. Jesucristo tu mose chee eico echeẽ mumbayã mbei. † nda emo ñee eã ndeje. ¹⁵ Dios quia rei equirãcuã tuchi mbia mo si. Ae quia ererecua tuchi mbia mo si re. Emo mose ra Dios “Jesucristo tamondo íbii mbia rea” i. Aque mose ra Jesucristo nyecua tuchi mbia je. ¹⁶ Dios mĩ nda manoa. Ae mĩ ño siqui bei nguia nyaashĩ na co. Mbia mo nda esichã eã. Mbia mo mae eãte erese emo mose. Emo nda mae eã mbei erese. Sã mbia ñee turã mbei quia erĩ. Sã eriqui ñee turã mbei equirãcuã nĩ. Amén.

¹⁷ Ae mbaechate nae, ãquĩ je echeẽ. Sã ucuasu raã naa eã. Sã eya siquiã umbae mĩ ndese. Embae ra ua emo mose. Sã Dios rese quiatu eya riqui. Ae mĩ ño mbae mee nguia nande je. ¹⁸ Echeẽ mbaecha je. — Mbae turã jẽsaã saã mbei quia jembae je jẽ. Jẽingo turã jiri quia mbaecha reã je. Abei chiãte ra jẽingochĩ jẽ, ere mbaecha mbaaquiato quiatu. ¹⁹ ãquĩ naa naa mose ra Dios mbae mee tuchi ee ibate. ãquĩ naa naa mose ra siqui turã tuchi no.

Pablo ñee hui bei Timoteo je

²⁰ Timoteo, ae rĩ Dios ñee ndeje, ãquĩ emumbayã mbei quia. Mbia ñee ñooño mose nyue, nde abe ra erecheẽchĩ. ãquĩ ñee aba mundua turã eã ño nguia. Uaquiato raã naasa chõ ãquĩ nde. ²¹ Dios cheẽ abi chõ eriqui nguia ãquĩ naa naa ãuuuuu uuuquĩ. Dios icuasa reã ño ãquĩ nde. Sã Dios turã ndiqui bei ndeje. mén.

SEGUNDA CARTA DEL APOSTOL SAN PABLO A TIMOTEO

Pablo embesa Timoteo je

¹ Pablo rei se. Jesucristo chimbaaquiatu rei se. Dios que semondo mbia mbaaquiatu quiatu sacua nda. —Jesucristo icuasa ra siqui bei, i sacua ngue Dios semondo mbia je ra. ² Aico ã mbesa ndeje a, Timoteo. Secheẽ nguire chõ ereico nguiã Jesús icua aque. Nyebe aico nguiã seriirĩ i ndeje co. Dios rei nanderu. Jesucristo rei nandererecua. Sã ãquĩ turã mbei riqui ndeje. Sã ãquĩ ia eã mbei riqui nderese. Sã ãquĩ nembia tuchi.

Pablo Dios oseiquia Timoteo je

³ Gracias, ae bei se quia nderĩ Dios je co. Aico turãte quia Dios je co. Seramei ja rã si. Senduasa tuchi Dios riqui co. Nderĩ aico ñee mbeite Dios je co. Nyaashĩ mose. Isa abe. ⁴ Anduate quia nderese co. Achimbiate rã nda mae nderese chã. Erecheseote que nandechao ramo mose nandechesi ra. ⁵ Ereico Dios icua tuchite aque. Ndesi rã si Eunice. Ndechari abe rã si Loida. ãquĩ ngue Dios icua tuchite quia ra. Eĩ ere si quia Dios icua tuchite nde abe aque. ⁶ Nyebe aico nguiã ñee ndeje a. Seo achono nguia ndearõ nae, aque mose que Dios nembraaracua tuchi ra. Ndearacua eico bei Dios cheẽ ndese. Dios cheẽ nenei nenei mbia je. ⁷ Dios siquiã nguiã nandembu siquiche mbia si ã. Dios nandembirãcuãte quia ã. Dios nandembuchesequate quia mbia rese ã no. Dios nandembaaracuate quia ã no.

⁸ Dios quirãcuã ndese eico bei. ãquĩ mose ra ereireĩ ireĩ eã Jesús renei nenei mbia je. ãquĩ mose ra ereireĩ ireĩ eã setarõ ji si. A setarõ ji ñi Jesús rĩ a. Mbia icuã icuã mose ndeje Jesús rĩ, echimbirãcuã ño. Dios ra nembirãcuã. Sã sembirãcuã no. ⁹ Dios quiatu ngue nanderirõ nguiã nandeicuã si. Dios que nandembuturã mingõ icúe umbaerã nda. Nandeturã je eã ngue nandemingo nguiã icúe umbaerã. Nduate quiatu nguiã nanderese. Mbae

ao ja nonde que nduate nanderese ra. Jesucristo rĩ ño ngue Dios riqui nguiã nyesequa nanderese. ¹⁰ Nyebe Jesucristo mondo nguiã nanderirõ sacua nandeicuã si. Nyebe nandeico nguiã ñee: —Dios nyesequate nanderese, i cote. Jesucristo que nandembusiquicheã u nandemano si ra. Ae riqui nandemingo bei co. Ae riqui ucheẽ isiquia mingõ bei co. Jesucristo tu mose que nandembiirandu ja ãquĩ ndese ra. ¹¹ Ucheẽ turã nenei nenei sacua ngue Dios seirabo ra. Semondo que mbia mbaaquiatu quiatu ra. Mbiamangue chooñoa jenda ja mbaaquiatu quiatu. ¹² ãquĩ je chõ mbia riqui nguiã mbae rasi raanguquia tuchi seje co. Aireĩ ireĩ eãte quia Dios si co. Dios aicuate quia co. Sereco que amee tuchi ee ra. Ae ra sereco teaquiato bei seje. Jesucristo tube chee mose. ¹³ Arembaaquiato turãte que se, ãquĩ ndui eico bei. Dios eicua bei quia Jesucristo rĩ. Mbiamrese echesequa bei quia Jesucristo rĩ. ¹⁴ Ae rĩ Dios ñee ndeje nae, nembraaracua equia nae, ãquĩ ndese eico tuchi. Espiritu Turã nda nembesari eã. Eriqui tuchite nandechiangui re co.

¹⁵ Ereirandu que Asia jenda serecha rese ra. Figelo. Hermógenes. ãquĩ ngue hui ja sesi ra. ¹⁶ Onesiforo quiato que tuutu quia serea sembia ra. Ireĩ ireĩ eãte que equia setarõ ji si ra. Sã Dios turã mbeite riqui ee. Echuchua jenda ja abe je. ¹⁷ Tu mose aa Rómaa que serequia tuchi ra. Ngasẽ nyee que seje ra. ¹⁸ Efeso seico mose abe que eriqui tuchite serese ra. Serese que eriqui Dios cheẽ nenei nenei nda. ã ereicuate quia aque. Sã Dios mbae turã tuchi mondo ee Jesús tu mose.

2

Mbae esaã saã tuchi quia Jesús je, i Pablo Timoteo je

¹ Seriirĩ naate nde, Timoteo. Jesucristo quirãcuã ndese eico ñimbucha tuchi. ² Arembaaquiato quiato que se mbia résa, ãquĩ esenei senei tuchi quia mbia je. Mbiamdua je secheẽ esenei senei. ãquĩ nda esenei senei emo je no ña. ³ Mbae rasi tu mose ndeje, echimbirãcuã ño. Soldado

rã ño eico ñimbirãcuã. Jesús rimba turã ño eico. ⁴ Jesús rimba chõ nde re. Echeẽ emumbayã mbei chõ nguia. Mbae mo ndese ra erendua nduachĩ. Ndererecua mĩ ndese endua bei. ⁵ Sã deporte no. Emo nda ganar i eã, nguerecua cheẽ mumba mose. ⁶ Sã emo ndiqui quiei quiei tuchi úcoo no. Aque mbae tubiriã tuchi rae. Eĩ ere si quiatu mbae raã naa tuchi Jesús je. ⁷ Ae ambesa mbesa quia ndeje ã, ã ndese endua tuchi. Dios ra embuchecua tuchi ndeje.

⁸ Endua tuchi quia Jesucristo rese. Quera si que manonde ra. Mbiate raque. David rucucha raque. Quera si que manonde ra. Ûquĩ asenei senei nguia mbia je co. ⁹ Ûquĩ je chõ mbia riqui nguia mbae rasi raanguquia tuchi seje ã. Ûquĩ ñi ño setarõ mĩ nguia a. Se mbia iquiare rocoĩ nyii setarõ tarõ. Se chõ setarõ ndaque. Dios cheẽ nguia etarõ aroneate re. ¹⁰ Coche mbia icuã ndiqui nguia seje. † nda Dios chiirabo Dios cheẽ isi bei cote. † nda Dios emingo bei cote. † nda ùquĩ siqui bei ibate Jesucristo rese cote. ¹¹ Ñee ñooñoa tuchi chõ mbia cheẽ ã nde: Nandemano ngue Jesucristo rese ra. Nyebe ra nandeico bei erese cote.

¹² Cristo rĩ mbae rasi nandesaã saã mose, Cristo ra nandemĩ ererecuarã, ererecua tuchi mose ae.

“Cristo aicuayãte” nande i mose, Cristo abe ra ñee nande je.

“Se abe jaẽicuayãte” i ra nande je.

¹³ Nandechẽ iru raque ra nande, Dios quia ra ñee iru eã mbei.

Dios quia ra ucheẽ mbuchebi aroneate nande je, i que embesa ji ra.

Ndeico tuchi mose Dios rese, ereireĩ ireĩ eã ndae

¹⁴ ã ndese mbia hue jenda embaaquiato quiatu tuchi. Diósaa embaaquiato quiatu tuchi. Ñee icuã icuã eã nda nyue chã. Ñee icuã icuã mose, emingo turã eã nyiese chõ ùquĩ nde. Mbae turã si embui chõ ùquĩ no nde. ¹⁵ Equiei quiei tuchi chõ nguia Dios je jẽ. † nda Dios “coche ñene” i ndeje. Sã emo ndiqui quiei quiei turãte nguerecua je no. Eireĩ nguiaite ra nguerecua si cote. Eĩ ere si

chõ nguia Dios cheẽ nenei nenei mbia je. Dios cheẽ abi abiã. ¹⁶ Ae uchuru mondo chooñote quia nae, ùquĩ ndese eicoã. Ûquĩ ndiqui isho i ite Dios si ùquĩ. ¹⁷ Ûquĩ ñee mbuchei i ite echoi quia qui. Sã mbae rasi riqui oso i ite no. Eĩ si chõ Himeneo nguia ùquĩ. Fileto rese. ¹⁸ Ûquĩ ndiqui ñee Dios cheẽ abi abi tuchi ùquĩ. —Mbia rete raaque ra quera si eã, i chõño mbei equia ùquĩ. Nyebe eriqui nguia mbia mbui mbuite Dios si ùquĩ. ¹⁹ Sita cuasu mo na ndei Dios cheẽ. Embuquiata aronea. Aque ñi mbei chõ nda echi. Eĩ si chõ Dios cheẽ nande je no nde. Dios cheẽ ño ã nde: “Dios riqui ngũimba icua jate ã,” i que ra. Co abe rei Dios cheẽ co: “Ae ‘Dios rimba rei se’ i quia nae, sã ùquĩ ndiqui nyao ja mbae icuã si”, i que ra.

²⁰ Sã mbae riru chumumbarate riqui mbaecha mo nyuchúaa no. Sã oro ao ji riqui emo no. Sã plata ao ji emo no. Sã ira ao ji emo no. Sã tuchu ao ji emo no. Emo emo ndei iti mombo sacua no. Emo emo mbae turã ndirurã no. ²¹ Sã Jesús quiato riqui mbae turã ndirurã na. Sã eriqui icúe bei Dios mbaerã. Sã nyao tuchi mbae icuã si. Ûquĩ mose ra Jesús ia tuchi erese. ²² Ae icuã acuanindu chosei chosei quia nae, ùquĩ si ehui chõ jẽ. Eico turã ño Dios icha rui jẽ. Dios eicua tuchi chõ nguia jẽ. Echesequa tuchi chõ nguia mbia rese jẽ. Echimbua chõ nguia mbia rese jẽ. Eĩ ño Jesús quiato nguia siqui turã nyiese ã, echiã quishĩ ja mose. ²³ Mbia uchuru mondo chooño mose ñee nyue, nde abechĩ nda jẽ. Mbia mbicuã sacua ño ùquĩ nde. ²⁴ Dios rimba quia mbia mbicuã aroneate re. Etura tuchite quia mbia ja je re. Mbia mbaaquiato quiatu turãte quia ñene. Siqui minguate quia mbia je re. ²⁵ Ae Dios cheẽ isi teã teã, ùquĩ nda embaaquiato quiatu mingue quia. Ûquĩ ñi nda ñee ñee Dios je. Dios emundua si sacua. Dios cheẽ isi turã sacua. ²⁶ † nda echoi oso chee uchã diablo si, ndua si mose Dios cheẽ ndese. Diablo quia eisite nguia co. —Ã esaã jẽ, i beite diablo quia ee co.

3

Mbia ireĩ nguiaite ra mbae icuã naa i i

¹ Jesús quiato ra mbae rasi saã tuchi Jesús tu serĩ mose. Ñquĩ eicua quiatu tuchi, Timoteo. ² Umbae ae ae rese ra mbia ndua cote. Mbae isiquia mĩ ndese chõ nda mbia riqui ndua ndua cote. Mbua ra ucuasu saã saã tuchi. Ñee icuã icuã mbei ra equia emo nĩ. Mbua ra ngu cheẽ mumba mumba tuchi. Usi cheẽ abe no. Mbua ra gracias iã tuchi nyue aque mose. Siqui sereã tuchi ra Dios rese. ³ Mbua ia eã eã nda emo ndese. Ñimbuturã sereã tuchi ra emo je. Emo nda embuqueta queta bei quia. Hui aroneãte ra mbae icuã si. Nyaba nyaba reã tuchi rae. Mbae turã nda eucuyã tuchi. ⁴ Mbua ra embucheẽ ñee ngõngue rĩ. Mbua ra mbae ï ñooño. Mbua ra uaquiato saã ñooño. Ubi achõ ndese ra eriqui. Siqui rocoĩ Dios bi rese. ⁵ Dios quiato ra mbua saã ñooño. Dios quirãcuã icua rocoĩ. Ñquĩ mbua icuã si echao tuchi, Timoteo. ⁶ Ñquĩ mo ndiqui ique ique emo nyuchua ã. Cuña aquiatuã mbĩrĩ irĩ. Ae ndua ndua beite quia huicua ndese cuña nae, ñquĩ mbĩrĩ irĩ. Ñquĩ cuña ndiqui uchioseĩ raã naa mbei mbae icuã ñquĩ. ⁷ Ñquĩ cuña ndiqui “tachimbaaquiato” i beite raque ñquĩ. Ñimbaaquiato aroneate Dios cheẽ ndese. ⁸ Sã brujos Moisés cheẽ mumba no. Janes, i equia ee. Jambres abe no. Eĩ si chõ cuña mbĩrĩ irĩsa nguiã Dios cheẽ mumba mumba ñquĩ. Ndua aquiatuã je chõ ñquĩ nde. Ñquĩ ndiqui emo mingo aroneate Dios cheẽ ndese ñquĩ. ⁹ Mbua ra siqui eã ñquĩ ñee ndui cote. Mbua ra “eaquiatoã” i chee erĩ. Sã “eaquiatoã” i chee Moisés cheẽ mumbasa rĩ brujos no.

Jesús quiato ra mbae rasi saã, i Pablo

¹⁰ Ereico turãte que se rã si ra, Timoteo. Dios cheẽ ngue eresenei senei nguia se rã si ra. Ae asaã saã nguia Dios je nae, ñquĩ ngue eresaã saã nguia nde abe ra. Ae “tasaã Jesús je” ae quia co nae, nde abe eresaã saã turã nguia aque. Dios ereicua tuchite se rã si. Ereico minguate equia aque. Erechesequate equia mbua rese aque. ¹¹ Ereico turãte que equia mbua icuã icuã mose ndeje ra. Sã mbua icuãte riqui seje Antioquíaa no. Icónioo abe. Lístraa abe. Sã ñi aico mbae rasi raã tuchi huee no. Dios que

sereaqiatio ñquĩ si ra. ¹² Ae siquise rete quia Jesucristo rese nae, ñquĩ nda mbae rasi saã tuchi. Mbua icuã icuã tuchi ra ee. ¹³ Ae icuã icuãte riqui Dios je nae, ñquĩ nguia ra eicua i i tuchi cote. Ae mbua mbĩrĩ irĩ nguia nae, ñquĩ ngui a ra mbua mbĩrĩ i i tuchi cote. Ñimbĩrĩ i i tuchi ra equia no. ¹⁴ Nde chõ eico tuchi Dios cheẽ ndese. Ae rese erechimbaaquiato nae, ñquĩ ndese eico tuchi. —Ichoiñoa tuchi que ã nda, erete equia eicua aque. Nembaaquiatusa abe ereicuate quia aque. ¹⁵ Ndeñetẽ mosenda bei chõ ereico nguiã Dios cheẽ icua aque. Dios cheẽ nembaaracuate quia aque. Nyebe ereico Jesucristo icuate aque. Nyebe Dios nderirõ nguiã ndeicua si. ¹⁶ Dios cheẽ turã ja chõ ñene. Dios chimondo ja chõ ñene. Dios cheẽ nguia rei mbua mbaaquiato. Dios cheẽ ngui a rei mbua icuã mbuchecua ee. Dios cheẽ nguia rei “eĩ jenye” i tuchi nande je. Dios cheẽ nguia rei aba mingo Dios bi rese. ¹⁷ ï nda Dios quiato siqui turã tuchi. ï nda eaquiato mbae turã naa naa ja.

4

¹ Aico ñee ndeje Dios nonde a, Timoteo. Jesucristo nonde abe no. Ae r a tube mae ja mbua rese. Mbua reco rese. Mbua mano je rese abe. Ae nonde aico ñee ndeje a. ² Dios cheẽ esenei senei tuchi quia mbua je, Timoteo. Mbua eanduse mose. Mbua eandu sereã mose abe no. Embaaquiato quiato mingue bei chõ nguia. Embuti mbuti bei quiato quia Dios cuti. “Eĩ jenye” ere bei quiato quia mbua je. ³ Namo jiri quiato ra mbua Dios cheẽ turã andu sereã cote. Ubi achõ ndese chõ nda huiisa rerequia tuchi cote. Nyebe ra Dios cheẽ andu sereã. Ae mbua mbaaquiato icuã icuãte quia Dios cheẽ ndui eã nae, ñquĩ ndui chõ nda mbua riqui tuchi cote. ⁴ Nyiisaquia tuchi chõ nda equia mbua ñee ñooño je rese cote. Ñee ñooño eã je rese nyiisaquia rocoĩ. ⁵ Cochee chõ eico nde, Timoteo. Nderoseĩ nguiãtu chõ eico mbua icuã icuã mose ndeje. Equieĩ quieĩ tuchi chõ nguia Dios je. Dios cheẽ esenei senei tuchi chõ nguia mbua je.

⁶ Achuruchate ucua quia co cote. Aico mano utate co cote. ⁷ Mbae que asaã saã

tuchi quia Dios je ra. Ae je Dios riqui ñee seje nae, ũquĩ ngue asaã jate quia ee ra. Ahui eã mbeite que se quia esi ra. ⁸ Dios que sechiã mbuturã nda. Ũquĩde que aico ngata turã nda. Nyebe eriqui nguiã premio nderecoquiato seje pe. Jesucristo tu mose ra Dios mae ja mbia rese cote. Aque mose quia ra premio mee seje cote. Se mii je eã ndae. Ae Jesucristo ru choseite quia nae, ũquĩ ja je abe ra premio mee.

Echu serea, i Pablo Timoteo je

⁹ Echu jei chõ serea, Timoteo. ¹⁰ Demas quiato ngue serecha nguiã. Ibi jenda achõ ndese chõ eriqui nguiã ndua. Ubi mii ndese chõ eriqui nguiã ndua. Nyebe esi nguiã serecha Tesalónicaa. Crescente quiato que oso Galáciaa ra. Tito quiato que oso Dalmáciaa no nda. ¹¹ Lucas mii ño siqui nguiã serese co cote. Marcos abe eru bei seje. Ae nda quiei quiei jiri nguiã serese aa. ¹² Tíquico quiato que amondo Efésoo ra. ¹³ Ae asecha sacho sembae nae, eru bei seje ndechu mose. Asecha que Troas ra. Carpo chuchua. Libros abe eru bei seje. Sechimbesa papeles si ra eretesareichĩ. Eru bei seje. ¹⁴ Alejandro el herrero que mbae icuã saã saã tuchi quia seje ra. Dios ra mbae icuã mee ee eicuã ndibishorõ. ¹⁵ Echiteaquiato quia esi jẽ. Nande Dios cheẽ nenei nenei mose, ebiãte eriqui co. ¹⁶ Mbia sererao mose ererecua je, emo ngue nyaroã tuchi serese ra. Serecha ja chõ ngue ra. Dios nda paama i eã ee ũquĩ nii ña. ¹⁷ Jesús mii ngue serecha eã nda. Ae mii ngue sembirãcuã nda. Se echeẽ turã nenei nenei tuchi sacuã. Ae judíos eã nae, ũquĩ Jesús cheẽ turã andu tuchi sacuã. Nyebe Jesús sembuĩ mondo nguiã mbia icuã si. ¹⁸ Ae ra sereaquiato bei quia mbae icuã si. Sererao chee mose ibate nyiese. Sã mbia riqui ñee turã mbei eriĩ. Amén.

Pablo hui mbae mbesa mbesare

¹⁹ Saludar ere rã Prisca je. Aquila abe je. Onesíforo chuchua jenda ja je abe. ²⁰ Erasto que siquichõ Coríntoo ra. Trófimo ndasi que asecha Milétoo ra. ²¹ Nyiiseĩ tuutu nonde chõ echu. Eubulo saludos mondo quia ndeje aque. Pudente abe no. Lino abe no. Claudia abe no. Jesús quiato ja a jenda

abe no. ²² Sã Jesucristo riqui bei nderese. Sã Dios turã ndiqui bei jendese. Amén.

CARTA DEL APOSTOL SAN PABLO A TITO

Pablo embesa mondo Tito je

¹ Pablo rei se. Dios rimba. Jesucristo chimbaaquiatu. Dios que semondo ñee ñee sacua uchiirabo je ra. Ûquĩ Dios icua tuchi sacua ngue semondo ra. Siqui turã sacua Dios rã si. ² —Sechiirabo ra amingo bei, i que Dios cose ra. Ñee ñooño eã ndae. Ûquĩ ndese embiirandu sacua ño ngue semondo nguiã. ³ Dios rei nanderirõsa mbae icua si. Ae que seirabo ucheẽ nenei nenei sacua mbia je ra. Eĩ ngue Dios ucheẽ mbuchecua mbia je cote ra. ⁴ Aico ã mbesa ndeje a, Tito. Ereico Jesús icuate se rã si aque. Nyebe aico nguiã “seriirĩ” i ndeje co. Nanderu chõ Dios re. Sã nanderu turã ndiqui bei ndeje. Sã Jesucristo abe turã ndiqui ndeje. Sã ùquĩ ia eã tuchi riqui nderese. Sã ùquĩ ndiqui nembia turã tuchi.

Sã Jesús quiato rerecua riqui turã

⁵ Ae nandesaã ja eã huee nae, ùquĩ esaã ja rã nguia nde huee. Amei mo eirabo rabo Jesús quiato rerecuarã. Mbua recua ja ja jenda. Secheende ndeje eirabo rabo ino huee. Nyebe arerecha nguiã huee Crétaa. ⁶ Amei turã ño eirabo rabo Jesús quiato rerecuarã. Eninisi mĩ nderecua chõ eirabo. Ae riirĩ Jesús icua quia nae, ùquĩ mĩ ño eirabo rabo. Ae eriirĩ seteãte riqui nae, ùquĩ ño eirabo rabo. Ae eriirĩ teã eãte nae, ùquĩ ño eirabo rabo. Jesús quiato rerecuarã. ⁷ Jesús quiato rerecua quia Jesús quiato teaquiatu quiatu quia. Ûquĩ siqui icua aroneate. Ucuasu abe raã naa aroneate. Eroseĩ nguiã aroneate. Quiacua aroneate. O rerequia chooñoa aroneate. Mbua mo mbae osei osei aroneate no. ⁸ Mbua nyoĩ mose echuchúaa, isi turã ndae. Siqui turã ndae. Ndua ndua ra mbae ao nonde. Siqui eã nda mbae icua ndese. Dios rã si chõ nda eriqui. Echiichati eã ndae. Jesús quiato rerecua ra eĩ mbei quia. ⁹ Sã eriqui bei Dios cheẽ ndese nan-decheẽ nguire. Ûquĩ mose ra ùquĩ abe mbua

mbaaquiatu quiatu turã. Jesús oseĩ uquia ee. Mbua icua ñee nda embutiba Dios si. Ûquĩ ño eirabo rabo Jesús quiato rerecuarã, Tito. ¹⁰ Mbua teã teã je tubiriãte riqui ã. Judíos teã teã je abe tubiriãte no. Ñee ñooño tuchite equia ã. ¹¹ Ûquĩ nyuru esiquisã tuchi. Mbua mbaaquia tu icua icuate quiatu nguiã ùquĩ. Eru mbiirĩ irĩ. Eninisi abe mbiirĩ irĩ. Eriirĩ ja abe no. —Mbua ra umbae mee mee nande je, i chõ nguiã ã. ¹² Hue jenda mo ngue ñee nda. —Ñee ñooño je chõ ure re, Creta jenda re. Ureicua mbei chõ ure re. Nyacua icua na ño ure re. Uretomei ño ure re. Mbae mburireãsa chõ ure no nde, i que Creta jenda mo nda. ¹³ Ichõiñoa tuchi chõ ñene. Nyebe echeẽ asi tuchi ùquĩ je, Tito. † nda eriqui tuchi Jesús rese. ¹⁴ † nda eriqui eã judíos icua ñee ndese. Mbua tubiriã Dios cheẽ isi teã teãte quia ùquĩ. —Ûquĩ ñee nda jemumbayãchĩ jẽ, ere chõ mbua hue jenda je. ¹⁵ Echĩa mbuturã ji je chõ mbae turã ja riqui nguiã ã. Echĩa mbuturã jiriã je quiatu mbae mo turã eãte re. Dios icuasa reã je mbae mo turã eãte. Ndua turã eã mbei. —Eicua eã, i chõchĩ nguiã mbae icua ndese siqui siqui. ¹⁶ — Dios ureicuate quia ã, ichõiño equia ùquĩ. Echisaã nguia eicuate re. Nyebe nandeico nguiã eicuate, Dios rese siquiã mose. Aba biã tuchi chõ ùquĩ nde. Aba cheẽ mumbasa. Siqui aroneate mbae turã mo ndese.

2

Mbua embaaquiatu turã, i Pablo ñee Tito je

¹ Nde quia mbua embaaquiatu quiatu turã jẽ. Dios cheẽ nduĩ si embaaquiatu quiatu. ² Amei embaaquiatu quiatu. Enyere chõ ñee ee: —Jẽquiacua quiacuachĩ nda jẽ. Jengata turã mbei chõ nguia jẽ. Jëaracua bei chõ nguia jẽ. Dios jëicua tuchi chõ nguia jẽ. Jenyesequa tuchi quia mbua rese jẽ. Jëingo tochi chõ nguia no jẽ, ere chõ ameĩ mbaaquiatu quiatu, Tito. ³ Ari abe embaaquiatu quiatu. Enyere chõ ñee ee: —Jengata turã mbei quia Dios resa rae. Jeñee icua icua techĩ nda mbua mo nĩ jẽ. Jẽquiacua quiacuachĩ nda jẽ. Mbae jësaã turã ño nguia mbua resa ráee jẽ, ere

chõ ari mbaaquiato quiato, Tito. ⁴ Sã ari acuanì mbaaquiato quiato. ¶ nda acuanì nyesecea jaaja ngu rese. ¶ nda nyesecea jaaja nguiirì abe rese. ⁵ ¶ nda acuanì aracua ja ja. ¶ nda ndua ndua ja mbae turã ndese. ¶ nda uchuchua jenda abe mbuturã turã ìno no. ¶ nda eturã mbia je. ¶ nda ngu cheẽ abe mumbayã no. Sã ari eĩ acuanì mbaaquiato quiato. Ûquĩ mose mbia ñee icuã icuã aroneate Dios cheẽ nĩ. ⁶ Acuanĩdu abe embaaquiato quiato quia no. ¶ nda earacua racua ja. ⁷ Nde abe ecuata turã mbei, Tito. Mbae turã esaã uquia mbia je. Ndeico mose mbia mbaaquiato quiato, cochee chõ eico. Echĩmbirãtã tuchi chõ nguia. ⁸ Ndeico mose mbia mbaaquiato quiato, echeẽ turã turã ño nguia ee. ¶ nda mbia ñee icuã eã ndecheẽ mose. ¶ nda Dios cheẽ ndesenda reã ireĩ ireĩ ndecheẽ si. ¶ nda ñee icuã eã jẽje. ⁹ Mbia rimba abe embaaquiato quiato. Enyere chõ ñee ee: —Jenderecua cheẽ nda jemumba mumba techĩ nguia jẽ. Echeẽ nguire jẽingo bei chõ mbae turã ndese jẽ. Jeñeechĩ nda echeẽ ndibishorõ jẽ. ¹⁰ Mbae mo nda jembuquia chãchĩ jẽ. Jẽseteã ño jẽingo mbae turã ndese jẽ. Eĩ jenye mose ra mbia ñee turã Dios cheẽ nĩ, jenye chõ nguia mbia rimba je.

¹¹ Dios que uturã teacuquia mbia je cote ra. Mbia rirõ ja nonde mbae icuã si. ¹² Mbae ja rĩ Dios riqui nandembaaquiato quiato co. Ae echosei chiãte quia nae, ùquĩ nandesecha ja sacuã. Ae icuã nandebite riqui nae, ùquĩ ndecha ja sacuã no. Nandearacua sacuã abe no. Nandeico sacuã mbae turã ndese no. Nandendua bei sacuã Dios rese abe no. Eĩ nande bei quiato quia nande namo. ¹³ Jesucristo ra tu íbii ucheẽ nguire. Enininya tuchi ra tu. Nandeico eraarõ arõ ã. Ae ra nandembiate u. Ae rei Dios tuchi. Nanderirõsa mbae icuã si. ¹⁴ Ae que tu mano nande je ra. Nandeicuã ndibishorõ ngue mano nda. Nandechiã mbuquishĩ ngue umbaerã nda. Nandeico tuchi sacuã mbae turã ndese. ¹⁵ Enyere chõ mbia mbaaquiato quiato, Tito. Ererecua rã ño eico embaaquiato quiato. Echeẽ asi asi jiri quia ee. Sã emo ndiqui ndecheẽ andu sereã nea eã.

3

Dios uturã teacuquia nande je

¹ Echeẽ mbia je, Tito. —Ererecua cheẽ nda jemumba mumba techĩ nguia jẽ. Ererecua cheẽ jeñandu quiato quiato quia jẽ. Jeñĩmbirãtã tuchi quiato mbae turã naa naa nonde jẽ. ² Jeñee icuã icuãchĩ nda emo nĩ jẽ. Jeñee icuã icuãchĩ nda jenyue jẽ. Jeseteã ño jẽingo jẽ. Jenguasura jẽsaã saãchĩ emo je jẽ, ere chõ mbia je, Tito. ³ Nandearacuayã techĩ nande abe nyii. Nandeteã teã techĩ equia nyii. Nandembĩrĩ irĩ ji raanguiate nandeicochĩ nyii. Ae nandechosei chosei quia mbae icuã nyii nae, ùquĩ achõ ndesete nandeicochĩ nyii. Mbae icuã ndese nandeico techĩ nguia nyii. Mbia mbae nandechosei chosei techĩ nguia nyii. Mbia mae icuã icuã techĩ nguia nanderese nyii. Nande abe nandemae icuã icuã techĩ nguia nandechiese nyii no. ⁴ Dios ia eãte que mbia rese aque mose ra. Uya eã ngue eteacuquia nande je ra. Uturã abe que eteacuquia nande je no nda. ⁵ Aque mose que nanderirõ mbae icuã si ra. Eya eãte quiato ngue eriqui nguia nanderese. Nyebe nanderirõ nguia mbae icuã si. Nandeturã nĩ eã ngue re. Nandechiã ngue eirei mbiasu ra. Espĩritu Turã je que nandechiã mbiasu ra. ⁶ Dios que Espĩritu Turã mondo tuchi nande je ra. Jesucristo rĩ ngue emondo nande je ra. Jesucristo rei nanderirõsa tuchi nandeicuã si. ⁷ Dios que Espĩritu Turã mondo nande je ra. Uturã je nandembitirõ sacuã. Nandemingo bei tuchi sacuã no. —Nandemingo bei tuchi rae, sã nandeico i ã no. ⁸ I chõĩñoa tuchi chõ ã nde. ã esenei senei tuchi quia mbia je. ¶ nda mbia emumbayã. ¶ nda Dios icuasa siqui ja mbae turã ndese. Ae rĩ aico ñee jẽje nae, sã mbia ùquĩ ñee mumbayã ja quiato. Aba bite ùquĩ. ⁹ Mbia ñee asi je si ehui chõ. Mbia ñee mbei mose ngãmei ndaque rĩ, ùquĩ abe si ehui chõ. Mbia ñee icuã icuã mose nyue, ùquĩ abe si ehui chõ. Ae Dios senei senei nquia judíos je cose nae, ùquĩ nĩ mbia ñee icuã mose nyue, ùquĩ abe si ehui chõ no. Aba biãte ùquĩ ñee. Aba mbaaquiato ãte ùquĩ.

¹⁰ Emo Jesús quiato mbuqueta queta mose embiicua nonde uchue, ũqui abe si ehui chõ. Eicuãte ũqui, ere ee. Ndecheẽ andu eã mose, echeembe ee. Aquere ehui chõ esi.

¹¹ Aba chiicuate ũqui icua. Ũqui siqui turã aroneate quia ũqui. Huiicua eicuate quia ũqui.

Pablo embesa hui bei

¹² Artemas nda amondo nderea reae. Ae oso eã mose, Tiquico ra amondo ndeje. Ũqui mo ngasẽ mose huee, echu serea Nicápolis cote. Huee taico bei ama mose, ae que se ra. ¹³ Apolos embucuata turã mondo. Zenas ndese. Zenas ndei embesasa. Jesús quiatote ũqui. Mbae mo emondo ee. I nda echoi turã. I nda mbae tia eã ee. ¹⁴ Sã nanderesenda riqui mbae turã naa naa mbei ñimbaaquiatu. Emo mbae ua mose, sã mbae mo mee mee ee. Ũqui naa naa mose, siqui turã ño nguiã ũqui cote. ¹⁵ Ae chi ja serese a nae, ũqui saludos mondo quia ndeje aque. Ae Jesús quiato nyesequate quia urerese hue jenda nae, ũqui je saludar ere ure je. Sã Dios turã ndiqui tuchi jẽ ja rese. Amén.

LA CARTA DEL APOSTOL SAN PABLO A FILEMÓN

Pablo embesa Filemón je

¹ Se rei Pablo. Setarõ ji aĩ a. Mbia que setarõ Jesucristo riĩ nda. Timoteo rese aico ã mbesa mbesa ndeje a, Filemón. Ureresenda tuchi chõ nde re. Jesucristo rimba. ² Ae Jesús quiato ñumunua nua mbei quia ndechuchúaa nae, ùquĩ je abe ureico ã mbesa mbesa a. Apia je abe ureico embesa mbesa a. Arquipo abe je no. Ae que siqui bei ureres ra. Mbia icuã icuã mose ure je Jesús cheẽ ñi. ³ Sã Dios riqui turã mbei jêje. Sã jêya bei riqui erese. Jesucristo rese abe no.

Filemón Jesús quiato tuchi

⁴ Secheẽ mose Dios je, “gracias” ae bei se quia Dios je nderiĩ co. ⁵ Mbia que sembiirandu randu nderese ra. —Filemón ndiqui Jesús icua tuchi co. Co eriqui nyesequa tuchite Jesús rese co. Dios quiato ja rese abe no, i que equia sembiirandu randu nderese ra. ⁶ Aico ñee mbeite Dios je nderiĩ co. Ae je ereico Jesús nenei nenei nae, i nda ùquĩ abe Jesús icua tuchi nde rã si. ⁷ Aque ereico nyesequa tuchi Jesús quiato ja rese aque. Nyebe seya beite riqui nguiã nderese co. Nde que Jesús erechesei uquia quia Jesús quiato je ra.

Onésimo eisi turã, i Pablo ñee

⁸ Cristo chimbaaquiato aico raque co. Sã ererequa riqui ñee ngũimba je no. Ùquĩ asaã arõte raque ndeje. Asaã eã nda se. ⁹ Tacheẽ mingue chõ ndeje. —Mbae esaã seje, tae turã ño ndeje. Ameite se cote. Setarõ ji aĩ Jesús riĩ a no. Se rei Pablo. ¹⁰ Mbae mo esaã Onésimo je. Seico mose aa cárcel que aico Onésimo mbaaquiato quiatu Jesús riĩ nda. Jesús quiato riqui co cote. Seriirĩ tuchi rã ño eriqui nguiã co cote. Jesús icua mose co cote. ¹¹ Nderimbachõ ño ngue eriqui nguiã nyii. Erequeteã eã jiri que equia erese nyii ra. Aqueteãte quia erese co cote. Nde abe ra erequeteãte erese cote. Siqui turãte ra nande je cote. ¹² Aque amondo quia

ndeje aque. Eisi turã mámbii. Sã ereico seisi turãte no. Ùquĩ esaã si ee. ¹³ Amondo sereãte raque. Siquichõ ndei nda serese aa chã. Mbae mee mee sacuã setarõ ji je ndecutiã. A setarõ ji ñi Jesús cheẽ turã ñi a. ¹⁴ Aisi eã nda mingo serese a, nde “eno” iã mose seje. “Eĩ ere chõ”, ae eã nda ndeje. Nde ae chõ eisi turã. Nde ae chõ echeẽ turã ee. Se ae ra arembucheẽ turã eã ee.

¹⁵ Uchã ndei que ndesi nyii ra. Siqui bei ra nderese cote reae. ¹⁶ Nderimbachõ eã nda cote. Ndequiato chõ nda cote. Nderesenda chõ nda cote. Co aico nyesequate erese co. Nde quiatu ra erechesequa tuchi erese cote. Cristo resenda chõ siqui nguiã co cote. Nderese. ¹⁷ Ndequiato tuchi chõ se re. Sã ñi ereico seisi turã turãte no. Eĩ ere si chõ Onésimo isi turã se rã si. ¹⁸ Onésimo deber i mose ndeje, cobrar erechĩ nda ee. Seje quiatu cobrar ere. ¹⁹ Pablo chõ se re. Seo je chõ aico nguiã co mbesa ndeje a. Onésimo deber i mose ndeje, asibishorõ nda mbae mee ndeje. Mbae que asaã tuchite rei quia ndeje ra. Dios cheẽ ngue asenei tuchite quia ndeje ra. Dios nemingo bei sacuã. Nyebe deber ere tuchite raque seje. ²⁰ Nyebe Onésimo eisi turã na seje. f nda seya tuchi jiri nderese. Dios abe ra eyate nderese.

²¹ —Filemón nda secheẽ mumba eã. Secheẽ ndui si tuchi ra Onésimo isi turã, ae tuchi se quia nderiĩ co. ²² Seruacuã jendecoquiato ino mámbii. Dios ra sembusẽ mondo, jeñee mbei mose ee reae. Ùquĩ mose ra aso jendea.

Pablo ñee hui bei

²³ Epafras saludos mondo quia ndeje aque. Ae tarõ ji ñi serese a. Jesucristo cheẽ ñi. ²⁴ Marcos abe saludos mondo quia ndeje aque. Aristarco abe. Demas abe no. Lucas abe no. ã ndiqui Dios cheẽ nenei nenei serese ã. ²⁵ Sã Jesucristo riqui uturã ndeacuquia bei jêje. Amén.

LA CARTA A LOS HEBREOS

Jesucristo mii ño Dios cheẽ mbuchecua nguiã

¹ Dios que ucheẽ mbiassa asa tuchi quia mbia nandei ñiinda je cose ra. Hue rĩ ji eã ngue eriqui ucheẽ mbiassa asa ee ra. Dios cheẽ mbuchecua checuasa atate que aque mose ra. ² Eĩ eã ño namo nde. Jesucristo mii ño Dios cheẽ mbuchecua checua nguiã nande je co cote. Dios nguiirĩte mbucheẽ nande je cote. Ae mii ndese chõ ngue Dios ibi ao nyii ra. Dios que emii mbae ja rerecuarã nda. ³ Dios nininya rã si tuchi chõ Jesucristo nininya re. Dios rã si tuchi chõ ae re. Ae chõ mbae mingo ja nguiã ucheẽ quirãcuã je co. Ae que mano nandecuã mbutiã sacua nda. Aquere eñi ngoi bei ngu rese ibate pe cote.

Jesús quia rei i tuchi ángeles si

⁴ Jesucristo quia rei i tuchi ángeles si. “Seriirĩ tuchi” i chõ Dios nguiã ee. ⁵ Ñ ngue Dios ñee áte ángeles mo je ra: Seriirĩ ño nde re. Ndereco que amee ndeje ra, i áte que Dios ángeles mo je ra. Nderu chõ se re. Seriirĩ ño nde re, i áte que Dios ángeles mo je ra. ⁶ Dios nguiirĩ mbu mose íbii que ñee nda: Sã ángeles riqui adorar i ja seriirĩ je, i que ra. ⁷ Ñ ngue Dios ñee ángeles rĩ nda: Quiririã tu asi rã tuchi chõ ángeles re. Serimba chõ ángeles re. Tata rendi rã tuchi, i que Dios ñee ángeles rĩ nda. ⁸ Nguiirĩ je quiatu que ñee ã nda: Nde rei Dios. Ererecuarã mbei ra nde. Ererecua turã tuchi ereico nde co. ⁹ Mbae turã eresaã sete quia co. Mbae icuã nguia erechosei chiãte nguiã. Nyebe Dios riqui nguiã nembia tuchi nderesenda mo si. ¹⁰ Nde que mbae erechao ja tuchi ibi jenda nyii ra. Ndeo je que ibei erechao no nda. ¹¹ Ñquĩ nda ua ja chee.

Nde quia ra ereico bei.

Tiru ima na ja chee ra ñquĩ.

¹² Sã mbia riqui tiru ima mombo no.

Eyasu rerequia erendaque re.

Eĩ si ra ibi cote. Ibei abe no.

Nde quia ra eĩ mbei ereico.

Eremanoa mbei ra nde quiatu,

i que Dios ñee Jesucristo je ra. ¹³ Ñ ngue

Dios ñee áte ángeles mo je ra:

Ecoi seji. Nde abe ra ererecua serese.

Ae ndeucuãyãte quia nae, ñquĩ je ra nde-quirãcuã ateacuquia tuchi.

Ndequirãcuã tuchi chee ra ñquĩ si,

i áte que Dios ángeles mo je ra. Jesús mii je

que ñee ñquĩ nda. ¹⁴ Dios riirĩ eã ño ángeles

re. Dios rimba chõ ñene. Ae ra Dios mingo

bei, ñquĩ ndaarõ sacua ño ngue Dios ángeles mii nguiã.

2

Nandechayã sacua Dios icha si

¹ Ae nandechandu quia Dios cheẽ nae, ñquĩ ndese nandeco ndua tuchi. I nda nandechayã mbei Dios icha si. ² Ae rĩ ángeles riqui ñee mbia je cose nae, ñee ñooñoa tuchi chõ ñene. Ae ñquĩ ñee mumba nae, mbae rasi que esaã cote ra. ³ Jesucristo sí que ñee nda. —Mbia tamingo bei, i que ra. Mbia que echeẽ senei senei mbiassa nande je cote ra. Nande echeẽ mumba mose ra mbae rasi nandesaã tuchi nande quiatu cote. ⁴ —Jesucristo ñee ñooñoa ño nguia re, i sacua mbia que Dios mbia mae sayã naa naa nda. Milagros tubiriã. —Jesucristo ñee ñooñoa ño nguia re, i sacua mbia que Dios Espíritu Turã mondo mbia je no nda. Ae je Dios Espíritu Turã mondo mondo sete nae, ñquĩ je chõ ngue Espíritu Turã mondo ra.

Mbia rã ngue Jesucristo ru nyii ra

⁵ Ae ra nandeso emo mose nae, hue jenda rerecua eã nda ángeles. ⁶ Sã embesa ji ñi ñee ã no:

¿Mbaerã ereico nduate mbia rese re, Dios?

¿Mbaerã ereico eraarõ tuchi re?

⁷ Angeles que eremingo turã tuchi rei mbia si aque mose ra.

Ñquĩnde ereico bei mbia mingo turã tuchi ángeles si co cote.

Mbia que eremii mbae abe ja rerecuarã cote no nda.

Ndechiao rerecuarã tuchi cote.

⁸ Mbae que eremii ja mbia mbaerã nda, i embesa ji huĩ ñee a. —Mbae rerecuarã ja ra mbia, i mose Dios, mbae ja rii ño ñee nguiã. Mbae mbia cheẽ mumbate raque quia ã. ⁹ Jesús mii ndese chõ nandeico nguiã mae ã. Ae je Dios mbae rasi saanguquia tuchi nae. Ae que ererecuia eã tuchi ángeles si aque mose ra. Dios que mbia mingo bei sete ra. Nyebe “emano mbia rii” i nguiã Jesús je. Emanonde que Dios emii mbia rerecuarã tuchi cote ra. ¹⁰ Dios que mbae chao ja tuchi umbaerã nda. Nyebe mbae rasi raanguquia tuchi nguiã Jesús je cote. Mbia tubiriã mingo bei sacua ño ùquĩ nde. Jesús mbae rasi raã mose, ererecuia turã tuchi sacua ño ùquĩ nde. ¹¹ Jesús que nandembitirõ uturã na sí ra. Nyebe eru riqui nguiã nanderu ja co cote. Nyebe Jesús riqui nguiã “senongue” i ireĩ nguiã nande je. ¹² Sã Jesús cheẽ ñi embesa ji rese a no: Paba ibatenda tasenei senongue je.

Senongue rese tairasei rasei ee, i que Jesús cheẽ mbesa ji huĩ nda.

¹³ Dios taicua tuchi, i abe que Jesús cheẽ huĩ nda.

A aico seriirĩ Dios chimondo rese a, i abe que Jesús cheẽ huĩ nda. ¹⁴ Mbiate quiatu ngue nande re. Nyebe Jesús abe mbiarã no nde. Mano sacua nande je. Mano mose nande je que diablo quirãcuã mbutiã cote ra. Diablo quiarei equirãcuã tuchi aba iquia sacua. ¹⁵ Ae siquiche beite quia umano si nae, mbae icua nimba raanguia chõ ùquĩ nde. Ùquĩ siquiche eã sacua ño ngue Jesús mano nguiã. ¹⁶ Angel sacua eã ngue Jesús ru ra. Mbiarã ño ngue eru nguiã. Judiorã ño ngue eru nguiã. Mbia mbitirõ sacua. ¹⁷ Nyebe Jesús ru nguiã mbiarã nande rã. Ñee turã sacua Dios je nande rii. Dios nandembasi eã sacua nandeicuã nii. Jesús siqui mose mbiarã ngue mano mbia icua nii nda. Mbia icua mbutiã sacua esi. ¹⁸ Mbae icua ngue tã i tuchi rei Jesús je ra. Nyebe ra eriqui tuchi nanderese uquirãcuã mee nande je, mbae icua tã i mose nande je.

3

Jesús quia rei i tuchi Moisés si

¹ Seresenda, Dios que jemii icue umbaerã tuchi ra. Nyebe aico nguiã ñee tuchi Jesucristo rii jêje co. Secheẽ ndese jenyiisaquia tuchi quiatu quia. Jesucristo rei nandererecuia tuchi cote. Sacerdote rerecuia rã tuchi nande je cote. ² Jesucristo que Dios cheẽ mumbayã tuchi quia mbae raã ja echeẽ nguire ra. Sã Moisés abe mbae raã ja Dios cheẽ nguire no. ³ Jesús quia rei i tuchi Moisés si. Ae que Moisés chao ra. Sã emo ndiqui tuchua ao no. Tuchua aosa quia rei i tuchi tuchua uchiao si. ⁴ Mbia mo tuchua chao arondete raque. Dios mii nguia rei mbae ao ja tuchi. ⁵ Moisés que Dios cheẽ mumba eãte rei quia ra. Erimbachõ ño ngue ae ra. —Ã nda Dios saã je mbia je, i chõ ngue Moisés quia ra. ⁶ Cristo quia rei i tuchi Moisés si. Ae quia rei Dios riirĩ tuchi. Dios chuchua rerecuia tuchi chõ ae re. Nande rei Dios chuchua. Ae quia siqui nguiã nandechiangui re co. Nandeico bei mose ndua erese. Nandeya bei nandeico mose abe erese.

Dios quiato ra uquenea ucua nyo: Dios récuua

⁷ Jesús quia i tuchi re. Nyebe Espiritu Turã ndiqui nguiã ñee nande je ã: Dios cheẽ jeñandu rã namo.

⁸ Jeñia átãte ra jëingochĩ jë.

Sã cose ndare chiã átã mbeite riqui Dios cheẽ andu sereã turúquiaa eico mose no.

Ùquĩ icuãte que eriqui Dios je ra.

Dios que ñimbirãcuã ñote quia ee ra.

⁹ Dios que siqui minguete quia ùquĩ mbia je ra.

Cuarenta años chee que ra.

Mbia mae sayã ngue esaã saã mbei quia ee ra.

“Ma Dios siqui minguete nande je”, i rei que mbia jenamei nguia cose ra.

¹⁰ Nyebe Dios paama i nguiã ñee ee.

“Siqui icua mbeite equia uchiangui re ã. Siqui sereãte equia seicha rui ã.

¹¹ Aico paama ite ee co.

Uquenea nda eucua eã mbei nyo: serécuua”, i tuchi que Dios erii nda, i que Espiritu Turã ñee embesa ji huĩ nda.

¹² Cochee chõ jëingo, Seresenda. Jëicha eã

sacuã Dios reco si jeñiangui re. Dios jêicua bei sacua jeñiangui re no. ¹³ —Nandeico i i tuchi quiatu quia Dios rese, jenyê jenyê bei quiatu quia jenyue. Jendeco mose íbii. f nda mbae icua jembii iri eã. f nda jêteã teã eã Dios cheê je no. ¹⁴ Sã nande Cristo nandeicua raque nyii no, eĩ nande bei chõ nguia eicua i i. Uquĩ mose ra Cristo resenda tuchi nande cote. ¹⁵ Sã embesa ji riqui ñee ã no:

Dios cheê jeñandu rã namo.

Jeñia átãte ra jêingochĩ jẽ.

Sã cose ndare chiã átã mbeite riqui Dios cheê andu sereã turúquiaa eico mose no,

i que embesa ji ra. ¹⁶ ¿Aba chõ Dios cheê ñandu sereã eandure cose chã? Ae Moisés querao Egipto si nae, uquĩ ño ngue resẽ. ¹⁷ ¿Aba je chõ Dios paama i cuarenta años cose chã? Ae mbae icua saã saã nae, uquĩ ño ngue resẽ. Nyebe mano mano nguiã turúquiaa. ¹⁸ ¿Aba je chõ Dios ñee tuchi chã? —Jenguenea nda jêucuyã mbei oso serécuaa, i chã. Ae echeê mumba quia nae, uquĩ je chõ ngue re. ¹⁹ Nyebe ngasẽ eã nguiã Dios récuua. Dios icua eãte quiatu ngue re.

4

¹ —Ae seicua quia nae, uquĩ nda nyoi serécuaa, i chõte Dios quia nande je co. Nyebe nandeico cochee. Cochee jêingo eã mose, jemo jengasẽ eã arõte Dios récuua. ² Nande abe je chõ Dios riqui nguiã ñee co. —Ae seicua quia nae, uquĩ nda nyoi serécuaa, i. Moisés reco mosenda achõ je eã ño ngue ñee nguiã. Uquĩ ngue Dios chandu iru choño nda. Dios icua rocoĩ. ³ Ae Dios icua quia nae, uquĩ achõ ño nda nyoi ngasẽ Dios récuua. Uquenea ucua sacua huee. Dios que ñee tuchi ucheê andu sereãsa je cose ra:

Aico paama ite ee co.

Uquenea nda eucua eã mbei nyoi serécuaa, i que ra. —Ma siqui serese, i bei rei que equia eraarõ arõ nda. Ibi ao mosenda bei.

⁴ ã mbesa ji que chĩ nda:

Dios mbae ao jare que uquenea ucua séptimo día ra,

i que embesa ji ra. ⁵ ã abe que chĩ embesa ji rese ra:

Uquenea nda eucua eã mbei nyoi serécuaa, i que embesa ji huĩ no nda. ⁶ Emo emo abe ra Dios icua. Siqui sacua erécuaa. Ae Dios cheê ñandu nyii nae, uquĩ ngue Dios icua eãte ra. Nyebe ngasẽ eãte nguiã Dios récuua. Dios cheê nguiatu ngue emumbate nguiã. ⁷ Nyebe Dios riqui nguiã ñee nande je quiatu co. Nandeico sacua erese namo. Uquĩ echeê mumbare nyii. Sã David Dios cheê mbesa no:

Dios cheê jeñandu rã namo.

Jeñia átãte ra jêingochĩ, i que Dios ra, i que David embesa ra. ⁸ Josué que mbia isrealitas mii aroneate Dios récuua ra. Uquenea ucua sacua. f nda Dios ñee áte rei. —Taemingo serécuaa jenguenea ucua sacua, i áte rei. ⁹ Nyebe ra Dios quiato nyoi ngasẽ Dios récuua. Huee ra uquenea ucua tuchi huee cote. ¹⁰ Ae ra ngasẽ Dios récuua nae, uquĩ nda uquenea ucua tuchi. Sã Dios uquenea ucua tuchi mbae ao jare no.

¹¹ Nandechimbirãcuã tuchi oso nonde Dios récuua. Nandequenea ucua sacua. Ae Dios icuayãte quia cose nae, uquĩ na nda nandeicochĩ nande mo namo jẽ. ¹² Dios cheê nguia rei ereco tuchi. Equirãcuã tuchi. Ique tuchi aba chiangui re. Sã tiquise rimbe riqui ique chõte oso no. Eĩ si chõ Dios cheê nde. Ique tuchi aba ndua nduasa rĩ. Aba ndua nduasa mbuchecua tuchi aba je. Aba chiosei osei abe mbuchecua tuchi aba je no. ¹³ Mbae mo ndese Dios riqui jirandu eã eãte co. Mbae mo nandesã nyecuyã cuayã aroneate quia esi ã.

Jesús ñee turã mbei Dios je nande rñ

¹⁴ Jesús rei Dios riirĩ tuchi. Sacerdote rerecua tuchi chõ eriqui nguiã nande je co. Oso que ibate Dios rea ñee ñee sacua nanderĩ nda. Eriqui ñee ñee mbei Dios je nanderĩ co. Nyebe nandeico tuchi quiatu quia erese. ¹⁵ Diablo tã i mose nande je, Jesús riqui ico tochi tuchi nande je co. Ae rane je quiatu ngue diablo tã i tuchi nguiã nyii. “Ma Jesús mbae icua naa” i nguiã. Mbae icua ngue Jesús saã eã mbei chõ nda. ¹⁶ Nyebe nandesiquicheã nguiatu quia Dios rñchã. Nyesecuate quiatu nguiã nanderese co. Nandesiquicheã nguiatu

quia ñee ñee ee. Eya eã sacua nanderese. Uquiracuã mee sacua nande je, diablo tã i mose nande je.

5

¹ Sacerdote rerecua judío mbae rei mbia chõ. Ae chõ ñee turã mbei nguiã mbia rĩ Dios je. Ae chõ mbae quishĩ ji mondo mondo nguiã Dios je. Dios mbia chisaã saã icuã mbutiã sacua esi. ² Sã sacerdote rerecua abe riqui mbia nande rã si no. Nyebe eriqui nguiã siqui tochte mbia quiracuã nea je. Mbia aquiatuã je abe. Mbia icha icha je abe no. ³ Sã sacerdote abe riqui Dios cheẽ mumba no. Sã eriqui mbae quishĩ ji mondo mondo Dios je no. Dios eicuã mbutiã sacua esi. Mbia chisaã icuã abe mbutiã sacua esi no. ⁴ “Sacerdote rerecua se” i aroneate emo, Dios eirabo eã mose. Dios ae que sacerdote mĩ mĩ nda. Sã Aarón mĩ cose no. ⁵ Eĩ si que Cristo ra. “Sacerdote rerecua se” iã ngue ae ae ra. Dios quiatu ngue emĩ nguiã. Sã Dios cheẽ mbesa ji riqui ñee no:

Seriirĩ ño nde re.

Ndere co que amee ndeje ra,

sã Dios i ñe e ee no. ⁶ Sã embesa j i mo ndiqui ñee no:

Sacerdote bei rei nde.

Melquisedec na tuchi ereico nde co,

sã embesa ji riqui i no. ⁷ Jesús siqui mose a íbii, eya eã tuchi que emo mose ra. Ñee tuchi que Dios je aque mose ra. Nyeseo tuchi que equia Dios je ra. Dios emano ndiquisã sacua esi. Dios que echeẽ ñandu ra. Jesús quiatu que Dios cheẽ mumba sereã mbeite quia ra. ⁸ Dios riirĩte raque Cristo. Mbae rasi que esaã tuchi ra. Ñimbaaquiatu chõ ngue equia ñquĩ ndese Dios cheẽ mumbayã nda. ⁹ Jesús que Dios cheẽ mumbayã tuchi mbae rasi raã tuchi ra. Aquere Jesús riqui mbia mingo bei co. Ae echeẽ mumbayã nguia nae, ñquĩ emingo bei quia co. ¹⁰ Dios quiatu ngue emĩ nguiã sacerdote rerecuarã. Melquisedec na si no.

Jeñimbaaquiatuã mbei chõchĩ equia Cristo rese ã

¹¹ —Mbae tasenei tuchi Jesucristo rĩ jẽje, ae rei que se ra. Jẽ nguia secheẽ jeñandu sereãte nguiã. Nyebe aico nguiã embiasa asa aroneate jẽje co. ¹² Cosete

que jẽingo rei Jesús icua resẽ. ¿Mbaerã jẽingo ñimbaaquiatuã mbeite re? I nguia nda jẽingo nguiã emo mbaaquiatu quiatu chã. Jẽaquiatuã mbei chõchĩ. Dios cheẽ aba chũcua jẽicuayã mbei chõchĩ. Ñquẽ na ño jẽingochĩ ã. Sã ñquẽ ndiqui usi quiandi achõ mbei no. Soo quiatu eu aroneate nguiã. ¹³ Ñquẽ na jẽingo bei mose, jẽaquiatuãte siqui mbae turã ndese. ¹⁴ Ae ñimbaaquiatu quiatu tuchi quia Cristo rĩ nae, ñquĩ nguia rei mbae turã icua tuchi, mbae icuã icua rocoĩ. Mbia cuasu rã ño ñquĩ nde.

6

¹⁻² Ae rese jeñimbaaquiatu nyii nae, aba chũcuate ñquĩ. Ñquĩ mĩte rese jẽingochĩ nguiã. Mbae aba chũcuayã mo abe jẽicua jiri Jesús rĩ ae. Ñ aba chũcua que asenei ja jẽje nyii ra: —Jenyisaã mbae icuã si jẽhui, ae que jẽje nyii ra. —Dios jẽicua, ae que jẽje nyii no nda. Bautismo abe que asenei jẽje nyii ra. —Jẽo jeñono Jesús quiato arõ, ae que jẽje nyii no nda. —Mbia raque ra quera si, ae que jẽje nyii ra. —Mbia Dios quiatoã nda mbae rasi saã tuchi tata cuásuu, ae que jẽje nyii no nda. ³ Ñquĩ aba chũcuate riqui ã ndesẽ. Aba chũcuayã tasenei jẽje cote, Dios “eno” i mose. ⁴ Emo emo ngue siqui rei Dios quiatorã nyii ra. Dios chimee icua raque nyii. Espiritu Turã abe icua raque nyii no. ⁵ Dios cheẽ turã abe icua raque nyii. Dios quiracuã abe icua raque nyii no. ⁶ Ñquĩ hui mose Dios si, uba si aroneate erese cote. Jesús mbucha si chõ nguiã ira rese ñquĩ. Iquia icuia chõ nguiã Jesús je mbia résaa ñquĩ. ⁷ Sã Dios riqui ama mbuchaaqui ibi ja rese no. Eĩ si chõ ndaque equia ucheẽ mbuchecua raque mbia ja je co no. Sã mbia riqui mbae tiquia ibi ia mose no. Suri turã mose, echa iate ra cote. ⁸ Ñui achõ suri mose huee, eicuãte ñquĩ. Eĩ si chõ mbia Dios cheẽ andu chooñosa no nde. Eicuãte ñquĩ. Ñquĩ nda Dios mombo chõ tata cuásuu.

Dios ra ucheẽ mbuchebiã mbeĩ

⁹ Jenĩ aico nguiã ñee eã, Seresenda. Dios cheẽ jeñandu chooño eã nguia jẽ ndeae. Jesús jẽicuate quia ñquĩ. Nyebe jẽingo tuchi quia erese ñquĩ ndeae. ¹⁰ Dios turãte eriqui

co. Tesareiã nda jenyisaã turã si. Jendua ndua mose Dios quiato ataque rese. Mbae jemondo mondo mose ee. Mbae jemondo mondo bei quia ee ùquĩ. ¹¹ Eĩ jenye bei quiatu equia nyesequa bei emondese. ¶ nda Dios mbae mee tuchi je jėje. ¹² Jeñimbirãtã mbei chõ nguia mbae raã jē. Sã Dios quiato cose ndare no. Sã eriqui Dios icua tuchi no. Sã siqui mingue tuchi ee no. Nyebe Dios ucheẽ mbuchebi jiri jiriã tuchi nguia ee. Eriqui beite mbae mee mee ee co.

¹³⁻¹⁴ Sã Dios ñee Abraham je cose no: — Taico turã mbei ndeje. Nderiirĩ nducucha tubiriã ndae, sã i Dios Abraham je no. Ûquĩ mose que Dios jurar i umbae nombre rĩ nda. ¹⁵ —Dios ra seriirina mee seje ucheẽ nguire, i que Abraham nguia eraarõ arõ mingue ra. Dios que eriirĩ mondo chee ee ucheẽ nguire cote ra. ¹⁶ Mbia jurar i mose, Dios rĩ ño eriqui nguia jurar i. — Ûquĩ nda asaã eã, i aroneate cote, jurar ire nyii. ¹⁷ —Nderiirĩ nducucha tubiriã nda ambu, i mose Dios Abraham je, jurar i que ee aque mose ra. ¿Mbaerã ño jurar i chã? —Dios ra ucheẽ mbuchebiã, i sacua mbia chõ ñene. —Dios ra ucheẽ nyabi i eã, nande i sacua ño ñene. ¹⁸ Dios “mbae tasaã jėje” i mose, ñee ñooñoa ño ñene. Dios jurar i mose, jurar i chooñoa ño eno nde. Nyebe eriqui nguia nanderaarõ turãte nandeso mose erichã. —Taemingo bei, i mose Dios nande je, ucheẽ nda embuchebiã. ¹⁹ —Dios ra semingo bei ibate ucheẽ nguire, nande equia ã. Nande ùquĩ icua mose, nandequirãcuãte ra cote. Dios ra nandemingo tuchi uchiese cote. Sã sacerdote si quia Lugar Santísimo Dios rĩchã sacua no. Eĩ nande chõ nguia nande abe Dios rĩchã, nande eicua mose. ²⁰ Jesús rane ngue oso ibate ñeenda mombe nande je ra. Pe eriqui ñee turã mbei Dios je nanderĩ pe. Sã sacerdote riqui ñee turã mbei Dios je mbia rĩ no. Sacerdote rerecua tuchi chõ Jesús nande je re. Melquisedec na si tuchi Jesús riqui co.

7

Jesús i tuchi sacerdotes ataque si

¹ Melquisedec ndei Salem jenda rerecua. Dios mbae sacerdote abe que ae

ra. Abraham tu mose mbia rerecua iquia iquiare, Melquisedec que esobeishi oso ra. Melquisedec que bendecir i ee ra. ² Abraham ngue el décimo mee Melquisedec je ra. “Ererecua Turã” i chõ nguia “Melquisedec” i mose. “Mbia mingo turãsa nyiese” i abe chõ nguia “Melquisedec” i mose no. “Mbia siqui turã nyiese” i chõ nguia “Salem” i mose no. ³ Melquisedec si eãte que ra. Eru eã abe no. Eramei mo eã abe no. Mano eã mbei que ra. Nyebe eriqui nguia Jesucristo rã mbei co. Sã Jesucristo riqui beite sacerdoterã co no.

⁴ Melquisedec quia rei i tuchi Abraham si. Abraham quiatu ngue el décimo mee nguia ee. Ae emee ee décimo sacua nda. ⁵ Abraham ndesenda eã ndaque Melquisedec. Aquere que Dios ñee judíos je ra. —El décimo jemee mee ño nguia sacerdote jendesenda je, i que Dios judíos je ra. Judíos que emee mee sacerdotes je ra. Leví riirĩ ndaque sacerdotes. Judíos sí raque sacerdotes. Abraham ndiirĩ ja raque judíos no. ⁶ Melquisedec que el décimo isi Abraham si ra. Leví riirĩ eã ndaque Melquisedec. —Judíos i tuchi ra nde, i raque Dios Abraham je. Nyebe que Melquisedec bendecir i Abraham je ra. ⁷ Ae bendecir i nae, aque quia rei i tuchi bendecir i ji si. ⁸ Ae mbia décimo isi isi quia uataque si ã nae, mbiachõ ño ùquĩ nde. Ûquĩ mano arondete. Melquisedec quiatu que mano eã mbei ra. ⁹ Abraham décimo mee mose Melquisedec je, erucucha riirĩ décimo mee naanguia chõ ngue ee re. Leví décimo mee naanguia chõ ngue ee re. Sacerdotes Leví riirĩ décimo mee naanguia chõ ngue ee re. Ûquĩ décimo isi isi raque nguesenda si. ¹⁰ Abraham ngue ùquĩ i ja ra. Eriiriã ndaque nyii, décimo mee mose Melquisedec je.

¹¹ Sacerdotes riqui mose que Dios ucheẽ mondo rei judíos je ra. Sacerdotes mbia mingo turã aroneate Dios rese. ¶ nda Jesús tu ãte rei. Ae quia ñi tu nguia sacerdote bei nonde cote. Melquisedec na sí. Aarón na eã. ¹² —Sacerdotes ra nyuru uru eã ngõngue rendaque re cote, i que Dios aque mose cote ra. —Jesús mii

nda siqui sacerdoterã mbei cote, i que Dios cote ra. ¹³⁻¹⁴ Leví riirĩ nducucha eã ndaque Jesús. Judá riirĩ nducucha raque quia ñene. Judá riirĩ nducucha mo siquiã ndaque sacerdoterã cose. —Ūquĩ mo sacerdoterã aroneate, i rei que Moisés nyii ra.

¹⁵ Sacerdotes cose ndare rã eã ño Dios Jesús mĩ nguiã sacerdoterã cote. Jesús quia ra siqui bei sacerdoterã. Melquisedec na si ra eriqui bei. ¹⁶ Moisés chimbesa rui si eã ño Jesús riqui nguiã sacerdoterã co. Leví riirĩ nducucha eã ño ae re. Ae quiatu siqui beite nguiã co. Nyebe eriqui nguiã sacerdote beite co. ¹⁷ Sã Dios ñee ee embesa ji rese no:

Nde quiatu ereico bei nguiã sacerdoterã mbei co.

Melquisedec na si,

sã Dios i ñee ee no. ¹⁸ —Sacerdotes ra nyuuru uru eã ngõngue rendaque re cote, i que Dios aque mose cote ra. Ūquĩ nguiatu ngue mbia mingo aroneate nguiã Dios rese. ¹⁹ Moisés chimbesa quia mbia mingo aroneate nguiã Dios rese. Ae rese nandeico quia namo co cote, aque quia aba mingo arondete nguiã Dios rese co cote. ²⁰⁻²¹ —Sacerdoterã nde, i mose emo je nyii, emo ngue jurar i ãte quia ra. Dios Jesús mĩ mose sacerdoterã, jurar i que aque mose cote ra. Sã embesa ji riqui no:

Dios que jurar i ra. Ucheẽ nda embuchebiã mbei.

“Nde quiatu ereico bei nguiã sacerdoterã mbei co.

Melquisedec na si”,

i que Dios cheẽ huĩ embesa ji rese ra. ²² Ae contrato Dios saã mbia je nyii nae, ūquĩ contrato que mbia mingo eã Dios rese ra. Ae contrato Dios saã Jesús rĩ namo nae, ūquĩ nguia rei eturã tuchi nande je namo cote.

²³ Sacerdote ñiinda atate que eriqui nyii ra. Nyuuru uru que equia ngõngue mano mose ra. ²⁴ Jesús quia siqui nguiã sacerdoterã mbei co cote. Emo nda chĩ eã mbei euru erendaque re emo mose cote. ²⁵ Ae ra Dios siichã Jesús rĩ nae, ūquĩ nda Jesús mingo bei tuchi. Jesús quia siqui beite nguiã co, ñee turã sacua Dios je ūquĩ nĩ.

²⁶ Ae chõ sacerdote turã tuchi riqui nguiã nande je co cote. Dios rã tuchite quia ae re.

Eicuã jiri jiriãte quia ñene. Mbae turã achõ ndese chõ eriqui nguiã. Mbae icuã ngue embicuã aronea tuchi quia ra. Ae quia ibatenda rerecua tuchi riqui nguiã namo co. ²⁷ Jesús quia rei sacerdote rerecua ataque rã eã tuchi. Ūquĩ nguiatu ticuasu quishĩ quishĩ mbeite nguiã sacrificio raã naa. Dios eicuã mbutiã sacua esi. Mbia abe icuã mbutiã sacua esi. Jesús quiatu ngue ticuasu mo quishĩ eãte nguiã sacrificio raã emo mose. Ae sí chõ ngue mano nguiã sacrificio raã sacua. Mbia icuã mbutiã ja sacua ño ngue mano nguiã aque mose. ²⁸ Mbiachõ ño ngue sacerdote rerecua ja ñiinda ra. Ūquĩ ngue mbae turã saã mbei aroneate quia ra. Dios quiatu que Jesús mĩ sacerdoterã mbei cote ra. Ae quia mbae icuã saã jiri jiriã tuchi nguiã.

8

Dios contrato yasu saã Jesús rĩ

¹ Ababi tuchi quia rei Jesús siqui mose sacerdoterã. Sacerdote turã tuchi quia rei ae nande je. Hue eñi ngoi Dios Ibatenda ribisho quti nande je huee. ² Hue eriqui mbae raã naa Dio s chuchua ibatendaa huee. Dios ae chisaã tuchi chõ hue tuchia re. Mbia mo nyisaã eã ño ñene. Nyebe Dios chuchua tuchi chõ hue re. ³ Sacerdote rerecua ja chõ sacrificio raã naa sacua nde. Nyebe Cristo abe sacrificio saã nguiã umano mose. ⁴ Ae sacrificio Cristo saã nae, ūquĩ nguia eturã tuchi sacerdote chisaã si re. Cristo siqui mose íbii, eĩ nda sacerdote eãte rei ae. Moisés chimbesa cheẽ nduĩ achõ ño sacerdotes ibi jenda riqui nguiã sacrificio raã naa ã. ⁵ Ae sacerdotes ibi jenda saã saã nguia mbae nae, ibei jenda rese aba mundua sacua ño ñene. Sã Dios ñee Moisés je Dios chuchua ao nonde no. —Ndeico mose ibi íbatee que sechuchua ibei jenda ateacuquia ndeje, ūquĩ na si chõ sechucharã ibi jenda esaã, i que Dios ñee Moisés je ra. ⁶ Ae contrato Dios saã mbia je nyii nae, mbaranquiatuãte que ūquĩ nda. Ae contrato Dios saã nande je namo Jesús rĩ nae, eturã tuchi chõ ūquĩ cote re. — ã tasaã jẽje. ã abe tasaã jẽje no, i tuchi Dios quia contrato namonda rĩ nande je co. ⁷ Contrato ñiinda mbia mingo bei mose

Dios rese, ñ nda contrato yasu raã eãte rei nande je. ⁸ Dios ia eãte que eriqui mbia aque mosenda rese ra. Sã embesa ji riqui nõ:

Ñ nõ ngue Dios ñee nguiã: Contrato yasu ra asaã je Israel jenda je.

Judá jenda je abe no.

⁹ Contrato asaã nguia ñquĩ namei je nyii nae, ñquĩ contrato rã eã nda eyasu asaã cote.

Mbia arao quia Egipto si nae, ñquĩ mosenda rã eã nda contrato asaã je mbia namondo je.

Mbia cose ndare chõ ngue contrato saã iru seje resẽ.

Contrato raande que secheẽ mumba mumba chõ nda.

Nyebe ñquĩ asecha chõ nguiã, i que Dios ra.

¹⁰ Ae contrato ra asaã je Israel jenda je, ñ ndei e ã:

Secheẽ nda amii tuchi eãquĩ ndese.

Secheẽ nda amondo tuchi echiangui re.

Se ra ererecua turã tuchi ee.

Serimba tuchi ra ñquĩ.

¹¹ Seicua ja tuchi rae. Mbia cuasu ja.

Eñetẽ abe ja chee.

Seicua ja mose, ñquĩ mose emo uataque mbaaquiatu quiatu aroneate serĩĩ cote.

Seicua ja tuchi quiatu ra aque mose.

¹² Ñquĩ icuã nda ambutiã ja esi.

Atesarei bei ra eicuã si,

i que Dios cheẽ huĩ embesa ji rese ra. ¹³ —

Contrato yasu tasaã, i que Dios cote ra.

Contrato ñiinda imate quiatu ngue ee re.

Mbae ima nda ua ja cote.

9

Cristo rei sacerdote tuchi cote; sacerdotes ñiinda rã eã

¹ —Eĩ jenye jenye bei chõ nguia mbae raã naa mose sechuchuaa, i que Dios sacerdote je ra. Contrato ñiinda raã mose. Uchuchua ibi jenda rĩĩ nõ eriqui nguiã ñee, “sechuchua” i mose. ² Dios chuchua que cuartos nyeremo ñi nda. Eiquesa jii que cuarto nongue ñi nda. Lugar Santo, i que hue cuarto je ra. Candelero oro ao ji que chĩ huee ra. Mesa abe que chĩ huee ra. Mbichae Dios chuchua jenda abe que chi huee no nda. ³ Cortina mbuchesecho

que siqui tuchua ite rĩĩ nda. Aque quitera quiti que cuarto nongue ñi nda. Lugar Santísimo, i que hue cuarto je ra. ⁴ Huee que altar mo ñi oro ao ji ra. Mbae shimbu turã ndei sacuaã. Ira ao ji mbae riru mo abe que chĩ huee ra. Oro quiti ji resebe que ra. Contrato Dios cheẽ mbesa ji que chĩ aque mbae riru imi ye ra. Oro ao ji ñio abe que chĩ mbae riru imi ye ra. Mbichae resebe que eñi nda. Maná i equia ee. Aarón chitochocua ruri abe que chĩ mbae riru imi ye no nda. ⁵ Angeles raanguia ao ji que chi ibate mbae riru arõ nda. Querubines, i que ñquĩ je ra. Ujeo que embiitee u mbae riru arõ nda. Sacrificio renda rei mbae riru. Ñquĩ cuartos nyeremo jenda asenei ja aroneate jẽje namo.

⁶ Aque mose que sacerdotes riqui ique ique bei cuarto eiquesa ji ra. Mbae raã naa sacuaã Dios je. ⁷ Cuarto cortina quitera quitinda quiarei mbia mo ique aronea tuchi. Sacerdote rerecua mii nõ ngue i que quia huee ra. Ique chĩbe ibeã ngue equia huee ra. Una vez al año nõ ngue eriqui ique huee ra. Mbae ruqui que esii sii quia huĩque mose huee ra. Dios eicuã mbutiã sacuaã. Mbia icuã abe mbutiã sacuaã. ⁸ Aque mose bei que mbia mo ndiqui ique aroneate Lugar Santísimo nda. Dios rĩchã tuchi sacuaã. Ñquĩ ndese Espiritu Turã ndiqui urembiirandute ã. ⁹ Sacerdotes que ticuasua iquia iquia tuchi rei quia aque mose ra. Ñquĩ ngue mbia chiã mbitirõ eã mbei chõ nda. Mbia mundua ndua sacuaã Cristo ruqui rese chõ ngue ñquĩ nda. Ñquĩ nandeicuate quia ã cote. ¹⁰ Contrato ñiinda que mbia mingo turã aroneate quia ra. Mbae rĩĩ achõ nõ ngue eriqui nguiã ñee. Mbaeia rĩĩ. Mbia chi rĩĩ. Mbia chimbei rĩĩ. Mbia choita rĩĩ. Ñquĩ ñi ja. Ñquĩ ñee ndui si chõ ngue mbia riqui rei nguiã nyii. Cristo tu nonde.

¹¹ Cristo tu mose que contrato ñiinda mbutiã ja cote ra. Contrato yasu que esaã nande je cote ra. Ae mii nõ sacerdote namo cote re. Dios chuchua ibi jenda jie eriqui eã ndaque aa. Ibatenda ye chõ eriqui nguiã mbae raã naa nande je pe. ¹² Cristo quiatu ngue ticuasua ruqui sii sii eã u nguiã nande je. Chivo ruqui abe. Nguqui ae je chõ

ngue nandeïcuã mbutiã nguiã. Mano mii ngue mbia ja je ra. Mbia mingo bei sacua cote. ¹³ Ticuasú ruqui que mbia mbitirõ tirõ ndei quia sacerdote je ra. Chivo ruqui abe. Ticuasú riri ndaque rei ji cusubu abe no. ¹⁴ Cristo ruqui quia rei equirãcuã tuchi ùquĩ mbae ruqui si. Cristo ruqui mii nguia rei nandendua nduasa mbitirõ tuchi. Ae ruqui mii nguia rei nandemingo turã Dios reco rese. —Se ae tamano mbia icuã mbitirõ sacua. Mbia mbae turã naa naa sacua Dios je cote, i que Cristo mano nda. Mbae icuã mo ngue esaã jiri jiriã tuchi ra. Espiritu Turã ngue siqui tuchi erese emano mose ra.

¹⁵ Cristo que contrato yasu saã nande je cote ra. Dios chiirabo erichã tuchi sacua cote. Dios chiirabo siqui tuchi sacua erese Dios cheẽ nguire. Sã Dios ñee ee nyii no. —Jẽingo bei ra serese, i ee no. Ae je Dios contrato saã ndei quia nyii nae, ùquĩ icuã nii ngue Cristo mano nda. ¹⁶ Ae contrato Cristo saã nande je nae, testamento chõ ùquĩ nde. Sã emo testamento mbesa no. Testamento raãsa mano mose, aque ramo mose chõ testamento valer i nguiã cote. ¹⁷ Testamento raãsa manoa mose, testamento chõño ño aque mose re. ¹⁸ Dios contrato ñiinda raã namo mose que ticuasú iquia uquia mbia je ra. ¹⁹ Moisés contrato ñiinda raã mose, Dios cheẽ ngue embuchecua ja mbia je ra. Aquere que ticuasú ruqui isi chivo ruqui rese ra. I je que emombara ra. Eruqui je que Dios cheẽ mbesa ji rii rii cote ra. Mbia ja abe rii rii que ra. Mbae ribichu mbia ji je chõ ngue erii rii nguiã. Ovejara ireĩ je. Ira rãquiã ñetẽ je abe no. ²⁰ Aquere que Moisés ñee mbia je ra. —Ã mbae ruqui ã ndesẽ. Ticuasú que mano nda. Mbae ruqui rei Dios mbae testamento valer i sacua jẽje, i que Moisés ñee mbia je erii rii cote ra. ²¹ Aquere que Dios chuchua abe rii rii cote ra. Dios chuchua teiqui renda abe que esii sii no nda. ²² Contrato ñiinda mose, mbae ruqui achõ je chõ ngue Dios riqui nguiã mbia icuã mbutiã esi. Dios que mbia icuã mbutiã choõño eã nda. Mbae quishĩ mose bei quiatu ngue eriqui nguiã mbia icuã mbutiã mbei esi.

Cristo mii aba icuã mbutiã

²³ Dios chuchua ibi jenda quia rei echuchua ibatenda raanguia. Ibatenda quia rei eturã tuchi ibi jenda si. Ibi jenda que Moisés sii sii mbae ruqui je embitirõ sacua nda. Ibatenda quiatu que embitirõ eã mbae ruqui je ra. Cristo ruqui mii je quiatu que ra. ²⁴ Dios chuchua ibi jenda que Cristo iqueã oso quera si mose ra. Dios chuchua ibatenda quiatu ngue esi nguiã ique cote. Hue eriqui ñee turã mbei Dios je nanderĩ huee. ²⁵ Sacerdote ique ique beite quia Lugar Santísimo co. Una vez al año ño eriqui nguiã ique ique bei huee. Mbae rii rii sacua mbae ruqui je. Nguqui j e eã ño ñene. Cristo quiatu que mano mii nda. Nguqui que eichusẽ tuchi nande je ra. ²⁶ Cristo que tu mii ibi ra. Mano mii sacua nande je. Nandeïcuã mbutiã sacua. Mbae ua serĩ mose que eru mano aa ra. Mano nyiibeĩ ibei eã equia co. ²⁷ Sã mbia riqui mano mii no. Sã Dios riqui ecuata mee aquere no. ²⁸ Eĩ si que Cristo mano aque mii no nda. Mbia icuã ja mbutiã sacua esi. Cristo ra tu si íbii emo mose. Aque mose ra manoa mbia icuã ndiquicharõ cote. Uquiato mingo bei sacua nguiatu ra eru. Ae esaarõ arõ nguiã nae, ùquĩ mingo bei sacua.

10

¹ Moisés chimbesa que mbia mingo turã eã ndaque ra. Mbia mundua ndua sacua Dios ririã mano ndese chõ ngue re. Ticuasú mbia quishĩ nyiibeĩ ibei rei quia nae, ùquĩ nduqui que mbia mingo turã eã no nda. ² Ùquĩ mbia chiã mbitirõ mbei mose, eĩ nda sacerdotes equishĩ nyiibeĩ ibei ãte rei. Eĩ nda ticuasú mii quishĩ ndei mbia mbitirõ ja sacua. Eĩ nda mbia tesareĩ rei huicua si. ³ Mbia ticuasú quishĩ nyiibeĩ ibei mose, ùquĩ ngue embutesareĩate huicua si ra. Munduate quiatu que huicua ndese ra. ⁴ Ticuasú ruqui ra mbia icuã mbutiã eã mbei. Chivo ruqui abe no.

⁵ Cristo ruqui mii nguiatu mbia icuã mbutiã nguiã esi co. Sã Cristo ñee Dios je siqui mose íbii no: Ticuasú ruqui mbia mbitirõ eã mbeite quia ndeje co.

Nyebe que serete ereme se je ra.

Se mano sacua mbia icua ni.

⁶Mbae raaque rei ji abe ndebiãte.

Ticuasu mbia quishĩ quishĩ nguia huicua ni nae, ũquĩ abe ndebiãte no.

⁷Nyebe ngue acheẽ nguiã ndeje: “Ae ndebite nae, ũquĩ ndese seico sacua ño ngue achu nguiã.

Sã embesa ji riqui ñee serĩ no, ũquĩ ñee nguire que achu ra”, ae que ndeje ra, i que Cristo ngu je ra. ⁸Nyebe Dios biãte riqui nguiã sacrificios. Mbia ticuasu quishĩ quishĩ mose huicua ni. Mbae raaque rei ji abe ebiãte no. —Ũquĩ jesaã saã, i raque Moisés chimbesa huĩ. ⁹—Ae ndebite nae, ũquĩ ndese seico sacua ño ngue achu nguiã, sã Cristo i Dios je no. Mbia mbui sacua sacrificios raã naa si chõ ngue eru nguiã. Sacrificio mĩ tuchi que esaã u mano mbia icua ni nda. Cristo ruqui mĩ ño mbia icua mbitirõ mbei nguiã co cote. Sacrificio raã i i rocoĩ. ¹⁰Ae Dios bite nae, ũquĩ ngue Jesucristo saã tuchi u ra. Mano mose mbia ja icua ni. Mano mĩ tuchi que u ra. Nanderirõ mbei que nandecuã si cote ra. ¹¹Sacerdotes riqui beite raque Dios chuchua ã. Ticuasu equishĩ nyibeibeite raque quia mbia icua mbutiã sacua ã. Ũquĩ nda mbia icua mbutiã eã mbei.

¹²Jesucristo quiatu que mano mĩ aque mose bei ra. Mbia icua ndiquicharõ sacua ño ngue re. Aquere eñi ngoi bei Dios ribisho quti nande je hue. ¹³Pe eñi ngoi beite Dios jii pee. Ererecua tuchi ra Dios rese cote. Uquirãcuã nda eteacuquia tuchi chee uquiatoã je cote. ¹⁴Sacrificio mĩ ngue esaã nda. Aque mĩ sacrificio je que uquiato chiã mbitirõ ja bei ra. ¹⁵Sã Espiritu Turã abe riqui ñee ũquĩ no:

¹⁶Ae contrato ra asaã je judíos je nae, ã ndei e ã:

Secheẽ nda amĩ tuchi echiangui re.

Secheẽ nda amĩ tuchi eãquĩ ndese no.

¹⁷Atesarei bei ra eicua si,

i que Espiritu Turã nda. ¹⁸Dios nandecuã mbutiã mose, mbae mo nandequishĩ aroneate quia nandecuã ndiquicharõ ã cote.

Dios nandesichã na

¹⁹Nande abe quiatu Dios nandesichã tuchi quia cote, Seresenda. Sã sacerdote ique Lugar Santísimo no. Eĩ nande si quiatu quia siquicheã ique Diósaa. Jesucristo ruqui rĩ nandequie Diósaa. ²⁰Cristo rete rei cortina mbuchesecco ji rã. Cristo rete mano mose, cortina abe que embui ra. Nyebe nandeco ique arõte Dios rea Lugar Santísimo ã cote. Cose ndare rã eã tuchi chõ cote re. ²¹Jesucristo mĩ ndei sacerdote tuchi nande je cote. Dios quiato ja je cote. ²²Diósaa ra nandesiquicheã ique oso cote. Nandechiã turã ño nandeco oso Dios richã. —Dios ra nandesi turã, nande chõ nguia nandechiangui re. Cristo quiatu ngue nanderii rii nguiã nguqui je nyii. Nandecuã mbutiã sacua nande si. I turã je que nanderei ra. ²³—Taemingo bei, i que Dios nande je ra. Ñeende ũquĩ nda ucheẽ mbuchebiã. Nyebe nandeco quiatu quia ñee: —Dios ra nandemingo bei ucheẽ nguire, i. ²⁴Sã Cristo mbae raã ja tuchi nande je no. Eĩ nande sí chõ nguia siqui turã nyue. Nandenongue nandembucheseccua turã nguiatu quia nyiese. Mbae turã nandesaã uquia bei quiatu quia nandenongue je. ²⁵Cristo quiato ñumunua nua mose, nandetesareiã mbei quiatu quia ñumunua nua. Sã emo emo ndiqui ñumunua nua eãte no. Cristo nandehosei uquia uquia bei quia nanderesenda je. Achite quiatu Cristo ñi nguiã tu a.

²⁶—Mbae icua tasaã, nande i i mose Jesucristo icuare, emo nda manoa nandecuã ndiquicharõ cote. ²⁷Ũquĩ mose, mbae icua nda nandesaã tuchi. Ũquĩ mose, nandeso chee ra tata cuásuu no. Huee ra Dios ucuâyãsa nyoĩ ja. ²⁸Sã mbia Moisés cheẽ mumbasa iquia iquia cose no. —Uremae ngue echeẽ mumbasa rese ra, i mose mbia nyeremo, echeẽ mumbasa que mbia iquia cote ra. Mbia que etiisu isu eã tuchi eiquia ra. ²⁹Dios riirĩ ucuâyãsa quia ra mbae rasi saã tuchi ũquĩ si. Cristo ruqui ucuâyãsa abe no. Ae Espiritu Turã isiteã teãte quia nae, ũquĩ abe no. Cristo ruqui je quiatu ngue Dios ũquĩ mĩ ndei nguiã icúe. ³⁰Sã Dios ñee no: —Se ra mbia icua asibishorõ mbae rasi je, sã i no. —Dios sí ra mbae rasi saanguquia ngũimba je, erimba icua mose ee, i abe que

embesa ji huĩ nda. ³¹ Ae ra Dios mbasi eĩcuã ñi nae, mbasi tochi eã ndae. Aba mbusiquiche tuchi chõ ùquĩ nde.

³² Jẽ Jesucristo icua ramo mose que mbia mbae rasi saanguquia tuchi rei jẽje ra. Jẽingo turã mbei chõ ngue equia Dios rese ra. Jeñĩmbirãcuã mingue que equia aque mose ra. Ùquĩ ndese jendua jiri ae. ³³ Mbia que ñee icuã icuã tuchite quia jemo je ra. Mbia que mbae rasi saanguquia tuchi quia jemo je no nda. Mbia tubiriã ndesaa. Jẽataque abe ia eã ndasi tuchi que eriqui erese ra. Jẽingo tochi tuchi que equia aque mose ra. ³⁴ Jẽya eãte que eriqui mbia tarõ ji rese ra. Mbia jembae rirõ ndirõ mose abe chee que jẽyate riqui Dios rese ra. Jẽirandute quiatu que equia jembae turã ibatenda rese ra. Jembae ibatenda quiatu ra ua eã mbei. ³⁵ Dios jẽicua bei quiatu quia aque mosenda rã mbei. Ùquĩ mose ra Dios mbae turã tuchi mee jẽje. ³⁶ Ae Dios bite nae, ùquĩ ndese bei chõ jẽingo. Ae mbae turã nda Dios mee jẽje nae, ùquĩ jẽsaarõ arõ mingue chõ nguia cote. ³⁷ Achite Jesucristo ñi tu a. ³⁸ Ae chiã Dios mbitirõ nae, Dios icuate quiatu que equia ra. Nyebe ra siqui bei Dios rese. Ae ra huĩ Dios si nae, Dios ia eã tuchi ra erese. ³⁹ Nande quia ra nandehui eã mbei esi. Ae ra huĩ esi nae, ùquĩ nda Dios mbutiã. Nande quiatu Dios nandeicua tuchite nguia ã. Nyebe ra nandemingo bei.

11

Ae Dios icua

¹ Emo Dios icua mose, ¿mbae chõ ùquĩ ña? Ae Dios icua nae, ùquĩ nda ñee. —Ucheẽ nguire ra Dios mbae mondo seje, i rae. — Ae asaarõ arõ nguia nae, ùquĩ nda emondo seje ucheẽ nguire no, i ra eno. Mae eã ndaque erese. ² Dios quiato cose ndare que Dios icua tuchi quia ra. Nyebe mbia riqui nguia jirandu jate erese. ³ Dios que mbae chao ja cose mbae eã mose ra. Mbae mo je eã ngue mbae ao ra. Ucheẽ achõ je chõ ngue mbae ao ra. Nande Dios icua mose, ã abe nandeicuate quia ã. Nandemae ãte raque erese.

⁴ Abel que Dios icua ra. Nyebe que Dios eisi turã nda. Ofrenda turã ngue emondo Dios je ra. Embae ofrenda que eturã

tuchi Caín mbae si ra. Nyebe Dios embae ofrenda isi turã nguia. —Co eturãte riqui seje co, nyebe Dios i nguia Abel ñi. Nyebe mbia riqui nguia jirandu jate Abel rese. ⁵ Enoc que Dios icua ra. Nyebe Dios ererao nguia ibate emano mose rocoĩ. Mbia mbuate que eoreã cote ra. Dios equerao quiatu quia ibate reaẽ. —Co eturãte riqui seje co, i quia Dios quia Enoc ñi nyii reaẽ. ⁶ Emo Dios icua eã mose, ùquĩ nda Dios isi turã eã mbei. —Co Dios reco riqui co, sã i quiatu nyii. —Emo Dios riichã mose, Dios turãte ra ee, sã i quiatu no. Aquere quiatu ra Dios eisi turã cote. ⁷ Noé que Dios icua ra. —Amanda uchi, mbae ati ja chee, i mose Dios, “eno” i que Noé Dios cheẽ mose ra. Mae eã ndaque erese aque mose. Arca que esaã Dios cheẽ nguire ra. Nguirĩ mingue sacua eye. Mbia ataque que Dios icua eãte quia ra. Noé mii ño ngue eicua quia ra. Nyebe Dios Noé isi turã nguia.

⁸ Abraham ngue Dios icua ra. Nyebe Dios cheẽ mumbayã nguia. Dios que ñee ee ra. —Eso rã a si. Ibi mo tamee ndeje mámbii, i que Dios ee ra. Abraham ngue Dios cheẽ mumbayã oso ra. Ae quiti esi nae, jiranuate raque erese nyii. ⁹ —Ibi mo tamondo ndeje, i Dios quia Abraham je nae, huee que eriqui huee cote ra. Ibimo tuchi que ee hue ra. Tei ñetẽ quire chõ ngue eriqui riqui bei huee ra. Nguirĩ ndese. Isaac. Jacob abe no. Ùquĩ je abe que Dios ñee nda. —A ibi tamondo jẽ abe je, i. ¹⁰ Abraham quiatu que Dios icua tuchi quia ra. Nyebe ñee nguia. —Aico chee ra sucha tubiriã túraã. Hue ra ua eã mbei, i que Abraham ndua ndua Dios recua rese ra. ¹¹ Abraham ninisi abe que Dios icua ra. Sara, i equia ee. Nyebe que nguiriã ndea Dios cheẽ nguire ra. Ari tuchite rei que ae ra. —Dios ra seriirina mee seje ucheẽ nguire, i quiatu que equia Dios icua ra. ¹² Amei tuchi raque Abraham, Dios eriirina mee mose ee. Mbia tubiriã i tuchi chõ ae cote re. Contar i ja aronea tuchi chõ erucucha je cote re. Sã nyasitata tubiriãte riqui no. Sã ibi quishĩ tubiriãte riqui no.

¹³ Ùquĩ ngue mano ja Dios mbae mondo ja eã mose ee ra. Ae je “co tamondo jẽje” i Dios ee nae, ùquĩ ndurubi quia ño ngue

mano nda. —Dios ra emondo ure je uremanonde, i que eyate quia ndua ndua ũquĩ ndese ra. Ũquĩ nguiatu que Dios icuate quia ra. —Nandeico mbirĩ ndaque equia íbii ã. Ibatenda chõ nande re, ite que equia eicua ra. ¹⁴ Emo ñee mose ũquĩ, siqui sete quiatu nguiã Dios récuua. ¹⁵ Ũquĩ ndua ndua mose nguecua rese nda nyoí si nyebi re chã ae. ¹⁶ —Nanderecua turã nguiatu nandetea, ite que equia ra. Dios recua je chõ ngue eriqui nguiã ñee. Nyebe Dios ireĩ ireĩ eã nguiã esi. Dios bite “Paba” i mose ee. Dios ũquĩ ndecua turana quereco co.

¹⁷ —Ma Abraham secheẽ mumbayã, i que Dios Abraham nĩ nda. —Nderiirĩ eiquia rã sacrificiorã, i que Dios ee ra. Abraham ngue Dios icua tuchi ra. Nyebe ngue “Isaac taiquia” i rei nguiã nguiirĩ mĩ nĩ. ¹⁸ —Isaac nda tiirĩ tuchi ndeje, i rei que Dios ee nyii ra. ¹⁹ Abraham ngue Dios icua tuchite quia ra. —Dios seriirĩ mbuquera arondete se eiquia mose nyii, i que ndua ndua uchiangui re ra. Abraham nguiirĩ iquia serĩ mose que Dios eo isi ra. Abraham Dios cheẽ mumbayã mose, nguiirĩ iquia raanguia chõ ngue re. Dios embuquera si raanguia chõ ngue eno nde. ²⁰ Isaac que Dios icua ra. Nyebe ñee nguiã nguiirĩ je. —Dios ra mbae turã saã jẽje, i que Jacob je ra. Esaú abe je. ²¹ Jacob que Dios icua ra. Nyebe ñee nguiã José riirĩ ja je umano serĩ mose. —Dios ra mbae turã saã jẽje, i que ee ra. Uchitochoquia rese que nyeco rei nyibi ñee turã Dios je ra. ²² José que Dios icua ra. Nyebe ñee nguiã israelitas je umano serĩ mose. —Dios ra jenderao a Egipto si. Sequiangue abe jendao a si, i que israelitas je ra.

²³ Moisés ru que Dios icua ra. Esi abe. Moisés ñetẽ mose que esi embuchemi tres meses ra. Ererecua eiquia eã sacua. Moisés itãquieĩ turãte quia ee re. Nyebe eru riqui nguiã siquicheãte ererecua si. Esi abe. ²⁴ Moisés abe que Dios icua quia aquere cote ra. Nyebe “Egipto jenda rerecua riirĩ nducucha eã se” i nguiã. ²⁵ “Dios quiato rese taico se. Mbia icuã icuã ndaque ra seje. Dios quiatoã ndese ra aicoã”, i que Moisés ucuasú mose cote ra. Mbae icuã ndese aba

oote raque. Aba mbia mbirĩ ño ñene. ²⁶ —Taico chõ Dios rimba rese. Mbia ra sembasi mbasi raque Cristo riĩ, i que Moisés ra. Nyebe eriquiã nguiã Egipto jenda rerecua rese. Mbaecha tuchi raque ae. —Dios ra mbae turã mee seje, ite quiatu que Moisés ra. ²⁷ Moisés que Dios icua ra. Nyebe esi nguiã Egipto si. Siquiche ãte ererecua paama i si. Ñimbirãcuã turã mbeite que equia ra. Dios rese mae naanguia. Emo mae aroneate raque Dios rese. ²⁸ Moisés que Dios icua quia ra. Nyebe pascua raã nguiã. Aque ramo ngue pascua ra. —Oveja ruqui je jẽiquesa ja jẽsii sii. I nda ángel jendiirĩ i iquia eã, i que Moisés ñee mbia je ra. Angel que israelita riirĩ mo iquia eã tuchi cote ra.

²⁹ Israelitas que Dios icuate quia ra. Nyebe echoi nguiã Ama Ndisha Ireĩ ndasa. Ama iru raanguia que etasa nyoí sobei ra. —Nande abe nandeso iasa emombita, i rei que Egipto jenda abe ra. I que tuchõ eati eiquia ja ra. ³⁰ Israelitas que Dios icua quia Josué reco mose ra. Nyebe echoi nguiã sucha cuasu Jericó mama mama siete días. Nyebe Dios etaronda mbucoi nguiã ee. Muros i equia ee. ³¹ Rahab abe que Dios icua ra. Ae ngu saã saã jate quia mbia je nyii nae, aque. Dios icua tuchi que cote ra. Nyebe manoa nguiã mbia uataque rese. Ae Dios cheẽ mumba mumba quia nae, ũquĩ ndese. Rahab que Dios quiato isi turã nda. Mbuchemi ngue ererecua icuã si ra.

³² ¿Aba riĩ abe ra aba ñee jẽje re? Dios quiato tubiriãte quiatu ñene. Ũquĩ asenei ja aroneate jẽje. Gedeón. Barac. Sansón. Jefté. David. Samuel. Dios cheẽ mbuchecuasa ja riĩ. ³³ Ũquĩ ngue Dios icuate quia ra. Nyebe eriqui nguiã Dios cheẽ nguire mbia mbuti tuchi guerra mose. Siqui turã ngue equia Dios cheẽ nguire ra. Dios que siqui eres e ucheẽ nguire ra. Dios que etequiatu quiatu bei quia nyacua mbaba mose abe ee ra. ³⁴ Ũquĩ ngue Dios icuate quia ra. Nyebe tata rendi erei eã nguiã. Tata sendi cao caote raque. Mbia tiquise rerequia requia mose erese, Dios que etequiatu quia ũquĩ mose no nda. Dios que uquirãcuã mee equirãcuã nea je ra. Dios que embuquirãcuã mbei

guerra mose abe ra. Ganar i sacuã. ³⁵ Cuña abe que Dios icuate quia ra. Nyebe Dios eririã ndaaque mbuquera sí nguiã ee. Emo emo abe que mbae rasi saãte quia Jesús riiã nda. Hui sereãte quiatu que equia esi ra. —Sã sei quia rei. Dios ra sembuquera si nguiã. Serete mbuchiicuabo turã ndae, i que equia ra. ³⁶ Emo emo ngue ñimbirãcuã nguia mbia iquã iquã choõno mose ee ra. Mbia eiruã nua mose abe no. O cuaacua mose abe no. Utarõ tarõ mose abe no. Hui eã mbei chõ ngue Dios si ra. ³⁷ Emo emo ngue mbia iquã iquã rei sita je no nda. Tiquise je abe que eriqui rei eiquã iquã ra. Emo emo ngue echisiamo tuchi ra. Mbae rasi je que eriqui ñimbiracuã tuchi ra. Eirao eã ndei que ra. Mbae ire achõ ño ngue eirao riqui ra. Hue jechõ ngue eriqui aronea tuchi ra. Mbaecha reã ndei que ra. Mbia que mbae rasi saanguquia tuchi rei quia ee ra. Hui eã mbei que equia Dios si ra. ³⁸ Ûquã ngue eturã tuchi mbia ataque si ra. Hue jechõ ngue eriqui aronea tuchi ra. Mbaecua re que eriqui uque uque ra. Emo emo mose que eriqui sita ibate no nda. Emo emo mose que eriqui turuquia rã no nda.

³⁹ Ûquã ngue Dios icua tuchite rei quia ra. —Mbae turã tamondo jêje, i rei Dios quia ee nyii nae, mee jei eã ngue ee ra. Mee je quia ra ee cote. ⁴⁰ Ûquã mii je eã nda Dios mbae turã mee. Nanderese abe chõ eriqui nguiã ndua ndua. Mbae turã nda emondo nande ja je cote, ùquã ndese.

12

Jesús mii ndese nandendua ndua

¹ Sã Dios icuasa tubiriãte cose no. Ûquã na ño nandeico nande abe Dios icua tuchi. Ae nandembuti mbuti quia Dios si nae, ùquã si nandehui. Ae mbae icuã aba mbuchiishã arõte quia nae, ùquã si nandechiicuasẽ ño. Jesús mii ndui chõ nandeico ngata. Nandechimbirãcuã ño nguia siqui erese. ² Jesús mii ndese nandendua ndua. Ae riqui Dios icua uquia nande je co. Ae ra mbae saã ja nande je ucheẽ nguire. Mbae rasi que esaã tuchi ira rese ra. Emo mbucha mose i quia ira rese, aba ireite raque uquã. —Mbae rasi raande ra seyate cote, i que Jesús quia ra.

Mbae rasi raande eñi ngoi bei Dios jii pe cote.

³ Jeñimondochote chã nda siqui mose Dios rese jê. Sã Jesús no. Mbia icuã icuã mose ee, ñimbirãcuã mbei que equia ra. Ñimondochote eã ngue ra. ⁴ Jesús mii ngue mano mbae icuã ndiquisã quisã sacuã mbia si ra. Jêingo mose mbae icuã ndiquisã quisã, aba mo ngue jêiquia eãte jê nguiatu ra. ⁵ ¿Embesa ji si jêtesarei chõ nde? —Seriirite quia jê nde, ite Dios quia jêje co. Sã embesa ji riqui ñee ã no:

Seriirã, Dios mbae rasi saanguquia mose ndeicuã nii, ereisiteã teãchã nda jê.

Dios ñee mose ndeje ndeicuã nii, echeẽ eisi turã ño.

⁶ Ae rese Dios nyesecua nae, mbae rasi ra esaanguquia ee eicuã mose.

Ae Dios isi nguiirina nae, ùquã je ra ñee eicuã nii,

i que embesa ji huã ñee nda. ⁷ Dios “seriirã” i tuchi quia jêje co. Nyebe eriqui nguiã mbae rasi raanguquia jêje jêicuã mose co. Sã mbia ja riqui nguiirã iruã eicuã mose no. ⁸ Dios mbae rasi raanguquia eã mose jêje, eririã nguiatu rei jê. ⁹ Sã nanderu ibi jenda riqui nandeiruã nua nandehetẽ mose no. Nandembaaquiato sacuã. Sã nandeico echeẽ mumbayã cote no. Eĩ nande sí chõ Paba ibatenda je. Ae cheẽ nguiatu nandemumbayã tuchi. Ûquã mose ra nandereco siqui turã tuchi. ¹⁰ Sã nanderu ibi jenda riqui nandembaaquiato jua raque no. Nandeico turã sacuã aa íbii. Dios quiato nandembaaquiato turã tuchi nguiã nanderu ibi jenda si co. Nandechiã mbitirõ sacuã ae rã si. ¹¹ Dios mbae rasi saanguquia mose nande je, nandechosei chiãte raque. Erasite quia ñene. Aquere quiato ra nandechimbitirõ cote. Aque mose quiato ra nandeya cote.

Dios cheẽ nda jêisiteã teãchã jê

¹² Jêo tomei jembirãtã jiri ae. Jêtima abe jembirãtã jiri siqui sacuã Dios rese no ae. Jeñimondochoteã jiri quia siqui Dios rese ae.

¹³ Jêingo tuchi quiato quia erese. Ae ndua ata atate quia nae, ñ nda ùquã abe siqui tuchi chee erese chã. ¹⁴ Jêingo turã mbia ja rese. Dios rã si chõ jêingo. Dios rã si nandeicoã mose, nandemae eã mbei ra

erese. ¹⁵ Jenyiteaquiatu turã ño nguia. I nda jemo Dios turã isiteã eã. Emo mbae icuã naa mose jêje, jêtesarei chõ esi. Jendua icuã icuãchĩ nda jenongue riĩ jê. Ũquĩ mose ra jeñimbicua jate. ¹⁶ Jeninisi ae rese chõ jêingo. Jemo nda siquichĩ emo ninisi rese jê. Dios mbae ra jêisiteã teãchĩ jê. Sã Esaú no. Aque que umbae herencia mondo ja chõ soo ñetê ndibishorõ nda. ¹⁷ Aquere que “sembae herencia taisibe” i rei nyeseo tuchi ra. “Bendecir ere rã seje”, i rei que ngu je ra. Eru que teã teã ño ee echeẽ mose ra. Nyebe Esaú nyeseo tuchi nguia cote.

¹⁸ Dios turã tuchi riqui jêje namo co. Mbia Moisés mosenda je si. Aque mose que mbia riqui titi titi i tuchi siquiche Dios si ra. Aque mose abe que sita ibate sendi sendi ee ra. Itondarute que eriqui ee ra. Ama ngue pirirã pirirã i tuchi quia ee aque mose ra. ¹⁹ Trompeta que nyuihui ee no nda. Dios que ñee ee cote ra. Mbia que Dios cheẽ ñandu sereãte ra. ²⁰ Dios quiatu ngue ñee nguia nyii: —Emo oco mose sita ibate rese, ũquĩ jêiquia. Mbae quiaa riinda abe oco mose erese, ũquĩ abe jêiquia no. Sita je jêiquia. Jeñio no ae, i quiatu que Dios ee nyii ra. ²¹ Aba mbusiquiche tuchi que mae mose ũquĩ ndese ra. —Aico titi titi i tuchi esi co, i chee que Moisés abe ra. ²² Eĩ jenye eã ño jê nde. Dios jembusiquiche ãte quia jê co. Dios recua jêsiichã tuchi quia jê ã. Dios reco chuchua. Jerusalén naanguia ibatenda jêsiichã tuchi quia jê ã. Angeles tubiriã abe jêsiichã tuchi quia ã no. ²³ Dios icuasa ñiinda abe jêsiichã nguia ã no. Ũquĩ mbae nombres mbesa ji chi ibate pe. Dios abe jêsiichã nguia ã no. Ae ra Jesús quiatoã icuã tea tea ja emo mose. Mbasi ja rae. Jesús quiato mano je abe chõ jêsiichã ichã nguia ã no. Ũquĩ ngue Dios mbaturã tuchi cote ra. Eicuã jiri jiriã tuchi chõ cote re. ²⁴ Jesús abe chee jêsiichãte quia ã no. Ae ruqui riĩ ngue Dios contrato yasu raã nande je ra. Ae ruqui rii rii ji jêsiichã nguia ã. Ae ruqui quia rei eturã tuchi Abel ruqui si.

²⁵ Dios riqui ñee jêje co. Echeẽ nda jêisiteã teãchĩ jê. Dios que mbae rasi saanguquia mbia je cose ra. Echeẽ nenei neneisa andu sereã mose a íbii. Ibatenda riqui ñee nande

je co. Ae cheẽ nandechandu sereã mose, mbae rasi ra esaanguquia tuchi nande je cote. ²⁶ Dios cheẽ mose que ibi nyere nyere aque mose coose ra. —Namo nda ibi ambuchere si no. Ibi mii ño eã nda ambuchere. Ibei abe ra ambuchere no. Aque mii nda ambuchere cote, i Dios quia co. ²⁷ —Aque mii nda mbae ambuchere ja, i Dios quia co. Aque mose ra mbae ua ja Dios chiao. Ae ra siqui bei, ũquĩ achõ nda ua eã. Mbae ataque ra ua ja aque mose. ²⁸ Dios rimba rei nande. Nyebe ra nande nandetiã aroneate. Gracias nande tuchi quiatu quia Dios je. Nandeico mingue chõ nguia ee. Ũquĩ mose ra eya tuchi nanderese. ²⁹ Mbia Dios cheẽ mumb a mose, Dios ra paama i tuchi ee. Tata rã tuchi chõ Dios re.

13

Jenyesequa jenyiese

¹ Jenyesequa quia jenyiese jê. Nyiesenda chõ jê nde. ² Mbia ngaẽ mose jenyuchúaa, jêisi turã ño nguia. Emo ngue ángeles mo isi turã uchuchúaa ra. Iranua ndaque erese. Mbia mo eriqui reĩ nguia ee. ³ Etarõ ji rese jêingo ndua. Mbae turã jêsaã saã ño nguia ee. Jêtarõ ji raanguia chõ jê abe erese re. Ae je mbia icuã icuã ndiqui nae, ũquĩ je jêingo turã ño. Sã jê abe jendete riqui no. Sã jê abe jêiruã nua arõte no. ⁴ Emo siqui mose ngüinisi rese, ũquĩ Dios bite. Sã emo ngüinisi resechõ ño siqui. Sã eriquiã emo ndese. Emo siqui mose emo ninisi rese, Dios ra paama i tuchi ũquĩ je. Ae ninisi ãte riqui nae, siqui mose emo ndese, Dios ra paama i tuchi ee no. ⁵ Mbae isiquia rese ra jendua nduachĩ jê. Jembae mii ndese chõ jêya. —Jaendechayã mbei ra se, i quiatu Dios nguia co. ⁶ Ae bei jê. Dios ra nanderechayã mbei. Nyebe nandeico nguia ñee: Dios riqui beite serese co. Mbia mo si ra asiquicheã, nyebe nandeico nguia i ã.

⁷ Jenderequa rese jêingo ndua. Ũquĩ ño ngue Dios cheẽ senei senei jêje ra. Ũquĩ ndiqui Dios icuate ũquĩ. Eĩ jenye Dios icua jê abe ũquĩ na si. Ũquĩ nguia siqui turãte nguia Dios rese ũquĩ. ⁸ Eĩ mbei chõ Jesucristo re. Cose mosenda bei. Namu abe chee. Eĩ mbei ra ae

quia. ⁹ Mbia jembaaquiatu ata ata mose, echeẽ si jẽhuĩ chõ. Mbia jembaaquiatu chooño mose, echeẽ si jẽhuĩ chõ no. Ae je mbia riqui mbaeiaie i nande je nae, ùquĩ si nandehui mose, ùquĩ abe ra nandechiã mbuquirãcuã eã no. Nandechiu abe ra nandechiã mbuquirãcuã eã no. Dios turã ae chõ nandechiã mbuquirãcuã nguiã. ¹⁰ Jesús miĩ ngue mano nande je ra. Sacrificio rei ae miĩ nande je. Cose ndare rã eã namo cote re. Ticuasú ra mano eã nandechiã mbutiã sacua cote. Jesús ruqui miĩ ño nandechiã mbutiã nguiã co cote. ¹¹ Sacerdote rerecua riqui ticuasú ruqui rerao rao Lugar Santísimo aque. Dios mbia icuã mbutiã sacua esi. Isho jiri sucha cuasu si echoi quia ticuasú roo rei rei aque. ¹² Jesús abe que mbae rasi saã isho jiri sucha cuasu si ra. Mano tuchi que mbia mbitirõ sacua nguqui je ra. ¹³ Jesús que aba ireingua saã tuchi ra. Nande abe nandesiquicheã nguiatu quia aba ireingua raã erese. ¹⁴ Nanderecua ibi jenda ra ua chõ. Dios ra nanderecuarã mee nande je ibate. ùquĩ ngua ra ua eã mbei. ¹⁵ Jesús que mano nande je ra. Nyebe nandechẽ turã mbei quia Dios je. Sã nandechuru riqui ñee turã mbei erĩ. ¹⁶ Jẽingo turã ño ngua mbia je. Jembae jemee mee ngua emo je. ùquĩ Dios bite.

¹⁷ Jẽingo turã jenderecua je. Echeẽ jemumbayã. Jenderecua riqui jendeaquiatu quiatu Dios je ùquĩ. —¿Jeteaquiatu turãte equia re? i chee ra Dios ee. Jenderecua cheẽ jemumbayã mose, eyate ra ùquĩ mose. Echeẽ jemumba mose, eya eãte ra jendese. Jẽ abe ra jẽya eãte no.

¹⁸ Jeñee mbei quia Dios je urerĩ. Ureico turã sete equia mbia ja je ã. Ureico ndua icuã icuã eãte emo niĩ ã no. ¹⁹ Jeñee tuchi quiatu quia serĩ Dios je. † nda Dios semondo jei jendea.

Echeẽ hui bei

²⁰ Dios ae aba mombia nguiã. Dios ae que Jesús raaque mbuquera si ra. Jesús ruqui rĩ ngue Dios ucheẽ yasu mee nande je ra. Jesús ruqui rĩ ngue Dios embuquera no nda. Jesús rei oveja raarõsa rã. Nanderaarõ arõ mbei equia co. ²¹ Sã Dios riqui jembuquirãcuã tuchi. † nda jẽingo bei ae

Dios bite ùquĩ ndese. Sã ae riqui tuchi nandechiangui re. Nandemingo tuchi sacua ae ebite ùquĩ ndese. Jesucristo quiatote quiatu nande re. Sã mbia ñee turã mbei quiatu quia erĩ. Amén.

²² Seresenda, aico co mbesa juate jembiirandu sacua a. Secheẽ jemi tuchi rã jẽaquĩ ndese. ²³ Aico jembiirandu Timoteo rese a. Etarõ iriã ndiqui namo co cote. Tu jei mose serea, ae abe ra arao seso mose jendea. ²⁴ Saludos amondo quia jenderequiasa je aque. Jesús quiato ja je saludos amondo quia jẽje aque. ²⁵ Sã Dios siqui turã jẽ ja je. Amén.

LA CARTA DE SANTIAGO

Mbia icúe cúe jenda je Santiago ucheẽ mbesa mondo

¹ Santiago chõ se re. Dios rimba chõ se re. Jesucristo rimba abe chõ se re. Judíos Jesús quiato je chõ aico nguiã ã mbesa mbesa. Judíos isúe cúe jenda je. Saludar ae chõ nguiã ã mbesa jêje.

Dios m̃i ño aba mbaaquiato nguiã

² Mbae icuã tã i mose jêje, jêya bei chõ nguia, Seresenda. ³ —Ma Dios icua tuchite, i mose mbae mo tã i jêje, jêingo tuchi chõ nguia Dios rese ùquĩ mose. Jeñimbirãcuã aquiato sacuã. ⁴ Jeñimbirãcuã mbei chõ nguia Dios icua. † nda Dios riqui jembitorõ tirõ mbei jembuchicucabo mingo. Ùquĩ mose ra jêturã tuchi cote.

⁵ Jêingo turã aquiatuã mose, jeñee ño Dios je. Jeñimbirãcuã aquiatuã mose, jeñee ño Dios je no. Ae ra jembaaquiato. Ae ñee nguia Dios je nae, ùquĩ ja je ra mbae mondo tuchi. Ñee asi asi eã nda ee no. ⁶ Jê ache i mose Dios je, “Dios quia ñene”, jenyetuchi quiato quia. —Dios ra emee ãte rei seje, i mose jemo, eicuãte ùquĩ. Ama ndebera rã ño ùquĩ nde. Sã quiririã ndiqui ama ndebera rerao turã eã no. Sã eriqui embuchebi chebite no. ⁷ Ama ndebera rã emo siqui mose, Dios ra mbae mee eã ùquĩ je. ⁸ Emo ndua ata ata mose, mbae m̃i mo ndese eriqui aroneate.

⁹ Jesús quiato mo embae eã mose, sã eya tuchi chõ siqui. Sequiatote ite quia Dios nguiã ee aque. ¹⁰ Sã Jesús quiato mbaecha ia bei chõ siqui, mbae icuã tã i mose ee. Sã eya riquiã umbae tubiriã ndese. Sã Dios rese quiato eya riqui. Embae ua mose, sã eya riqui ùquĩ mose abe no. Mbaecha mbae ra siqui bei eã. Sã quiata uti riqui soõ jeite no. ¹¹ Tenda rasi mose ee, quiata ra ñimama. Euti abe ra uqui. Eaturã eã mbei ra cote. Eĩ si ra mbaecha. Umbae tubiriã nyabe chõ nda mano.

Mbae icuã tã i mose nande je

¹² —Ã esaã icuã, i mose emo jêje, jêesaãchĩ nda jê! Jêingo mingue chõ nguia ñimbirãcuã. Jeñimbirãcuã mose ra Dios mbae turã mee jêje. Jemingo bei rae. —Ae nyesequa quia serese nae, ùquĩ nda amingo bei, i que Dios cose ra. ¹³ —Ã esaã icuã, i mose emo jêje, Dios eã ño ñee nguiã jêje ùquĩ. —Dios que “ã esaã icuã” i seje ra, jenyechĩ nda jê. —Ã esaã icuã, i eã nda Dios emo je. Dios abe ra mbae icuã saã eã emo ñee mose ee. ¹⁴ Aba chiangui renda icuã nguiarei mbae icuã oseu uquia aba je. Dios eã ñene. ¹⁵ Emo mbae icuã oseu mose, mbae icuã naa arondete cote. Mbae icuã naa naa mbei mose ra Dios embasi cote.

¹⁶ —Mbae icuã esaã, i mose emo jêje, Dios ñee eã nguiã jêje. —Dios chõ ñee nguiã, jenyechĩ nda jê. ¹⁷ Ae mbae turã tuutu beite quia nande je nae, Dios chimondo chõ ùquĩ nde. Dios quiarei eturã mbei tuchi. Eicuã jiri jiriã emo mose. Sã Dios tenda ao no. Nyasi abe no. Ùquĩ nguia nyiabi abi jiri nguiã. Dios quiarei nyiabiã mbei emo mose. Eaturã mbei tuchi eriqui co. ¹⁸ Sã Dios riqui seriirĩ i nande je no. Nande echeẽ icua mose nandechiangui re. —Jê nane je aico seriirĩ i co, i que Dios nane je ra. Dios riirĩ tubiriã tuchi ra ngaẽ nanderui cote.

Dios cheẽ jemumbayã ño nguia eandu mose

¹⁹ Dios quiarei eturã tuchi. Nyebe echeẽ jeñanduse tuchi quiato quia jê. Jendua quiato quia ñee nonde. Paama jenyetei jei techĩ nguiã emo je. ²⁰ Ae Dios bite riqui mbae nae, ùquĩ nandesaã aroneate nande paama i mose. ²¹ Ae Dios ucheẽ mondo quia jeñiangui re nae, ùquĩ jêisi tuchi quiato quia. Jêingo mingue chõ nguia Dios cheẽ je jê. Aba mingo beisa chõ Dios cheẽ nde. Ae mbae icuã ndese mbia riqui nae, ùquĩ icuã tubiriãte eriqui raque. Ùquĩ si jêhui tuchi. Mbae icuã ja si jêhui tuchi.

²² Dios cheẽ nda jeñandu chooño chĩ jê. Echeẽ jemumbayã tuchi quiato jê. Emo Dios cheẽ andu chooño mose, ae sí chõ ñimbiirĩ irĩ nguiã aque. ²³⁻²⁴ Sã emo ndiqui mae ñooño nguba rese espejo je no. Sã eriqui tesarei jei chõ nguba si no. Eĩ si chõ Dios cheẽ andu chooñoosa re. Tesarei jei

chõ nguiã Dios cheẽ si. Echeẽ mumbayã ndocoĩ. ²⁵ Dios cheẽ nguiarei aba mbui tuchi mbae icuã si. Ae siqui tuchite quia Dios cheẽ ndese nae, ùquĩ ndese ra Dios riqui tuchi echeẽ mumbayã mose. Ûquĩ Dios cheẽ ñandu chooñoate quiatu nguiã. Echeẽ emumbayãte quiatu nguiã.

²⁶ —Dios quiato chõ se re, i raque emo. Uchuru rerequia chooñoa mose, Dios quiato raã ñooño ño ùquĩ nde. Ae sí chõ ñimbĩĩrĩ irĩ nguiã ùquĩ. ²⁷ Ae Dios quiato chooñoa tuchi nae, ùquĩ ndiqui mbae turã naa naa ùquĩ. Ûquĩ ndiqui esi cheecha reaquiataute ùquĩ. Ûquĩ ndiqui eru cheecha reaquiataute ùquĩ no. Mbae eã mose eru cheecha mbae. Ûquĩ ndiqui ñimbĩĩcuã icuã eãte mbae icuã mo je ùquĩ.

2

Mbia nandeisi turã ja chõ nguia nyiabiã

¹ Jesucristo quiato chõ jẽ nde. Jenderecua tuchi chõ ae re. Nyebe mbia jẽisi turã ja chõ nguia nyiabiã. ² Sã mbaecha mo ndiqui ngasẽ jeñimunua mose jẽje no. Huiirao turã ndesebe. Eo cuasa turã ndesebe oro. Sã mbaecha reã mo abe riqui ngasẽ jeñimunua mose no. ³ Sã jẽingo mbaecha isi turã no. Sã jẽingo embucoi erenda turã tose no. Sã jẽingo mbaecha reã mbucoi turã eã no. ⁴ Eĩ jenye mose, jẽisi turã ja eã ño nguiã ùquĩ. Jembuchiabi chõ nguiã ùquĩ. Hue rĩ ja eã ño jẽingo nguiã mbia cuata mee ùquĩ. Jendua turã eã ñochĩ nguiã ùquĩ. ⁵ Secheẽ jeñandu rã, Seresenda. Mbia mbaecha reã ngue Dios irabo ra. Dios icua tuchi sacuã. Ûquĩ ndese quiarei Dios o tuchi mbaecha mo si. —Ûquĩ nda siqui tuchi serese se ererecua tuchi mose, i que Dios ñee nyii ra. ⁶ Jẽ ngue mbia mbaecha reã jenguirirõ tuchi ra. Eicuã eãte ùquĩ ndiqui raque jẽje. Mbaecha quiatu eicuãte riqui nguiã jẽje. Jembĩĩrĩ irĩ ño nguiã. Jenderao rao chõ nguiã ererecua je, jẽ mbae mo mee mee sacuã ee. ⁷ Mbaecha chõ ñee icuã icuã nguiã Cristo rĩ. Nandererecua chõ Cristo resẽ.

⁸ —Sã ereico nyesequa ndechiese no. Eĩ ere si chõ nyesequa emo ndese, i que Dios mbia je cose ra. Dios cheẽ i tuchi chõ

ùquĩ nde. Nande ùquĩ ñee mumbayã mose, nandeico turã ndae. ⁹ Nande mbia mo isi turã mose, emo isi icuã mose, eicuãte ùquĩ. Nande mbia isi chiabi abi mose, Dios cheẽ nandemumba chõ nguiã ùquĩ. ¹⁰ Dios cheẽ tubiriãte raque nande je echeẽ mumbayã sacuã. Nande echeẽ mĩ mo mumba mose, echeẽ ja mumba raanguia chõ ùquĩ nde. Echeẽ ataque mumbayã ndaque. ¹¹ Dios cheẽ tubiriãte. —Jẽingochĩ nda emo ninisi rese, i que ra. —Mbia mo nda jẽiquiachĩ, i que ae si ñee nda. Nande emo iquia mose, echeẽ nandemumba chõ nguiã ùquĩ. Nandeicoã ndaque emo ninisi rese. ¹² Dios cheẽ ngue nandembui mbae icuã si cote ra. Nandechesecua sacuã mbia rese. Nyebe nandeico turã mbei chõ nguia mbia je. Dios quiatu ra nandecuata mee tuchi emo mose cote. ¹³ Ae eya eã eãte riqui emo ndese nae, ùquĩ ndese ra Dios ia eã eã nandecuata mee mose. Nandeya eã mose emo ndese, ùquĩ mose ra Dios nandembasiã.

Nande Dios ïcua mose, mbae turã abe nandesã ño nguia

¹⁴ Sã emo ndiqui ñee no. —Dios aicuate quia co, i. Ûquĩ mbae turã naa eã mose, ùquĩ nda Dios sirõ eã mbae icuã si. Dios icua chooño ño ñene. ¹⁵ Sã Jesús quiato mbaecha reã mo ndiqui ngasẽ jẽje no. Sã eirao eã ndiqui no. Sã echĩurã mo eã ndiqui no. ¹⁶ Sã jemo ndiqui ñeeño ee no. —Nde ae chõ ndechĩurã etea. Nde ae chõ ndeiraorã etea. Eso turã ño, i jemo ee. Mbae mo mee ndocoĩ ee. Jeñee iru chooño ño nguiã ee ùquĩ. ¹⁷ Jẽingo turã eã mose emo je, Dios jẽicua chooño ño nguiã ùquĩ. Jẽ Dios jẽicua mose, mbae turã jẽsaã jiri ae.

¹⁸ Sã emo ndiqui ñee no. —Dios aicuate quia co, i. Sã emo ndiqui ñee no. —Mbae turã asaã saã nguia co. Dios aicua chooño eã nguia co, sã emo ndiqui i no. Jẽ Dios icua mose ¿mañi ae ra jẽicua mbae turã naa naa eã mose re? Se quiatu mbae turã asaã saã nguia co. Nyebe ra mbia “eriqui Jesús icuate co”, i serĩ. ¹⁹ —Dios mĩ ño siqui nguiã co, jenye chõ nguiã ùquĩ. Eturãte raque ùquĩ. Aba checuayã abe riqui ñee ndaque Dios mĩ nĩ co no. Siquichete esi ñee ndaque erĩ. ²⁰ ¿Mbaerã jëaracuayã tuchi riqui re? Emo mbae turã naa naa eã mose,

Dios icua chooño ño nguiã ùquĩ. ²¹ Sã nandei Abraham no. —Nderiirĩ emee seje, i mose Dios, Abraham ngue echeẽ mumba eã nda. Nyebe Dios Abraham isi turã mbei nguiã. ²² Abraham ngue Dios icua chooño eã nda. Mbae turã ngue esaã saã mbei quia Dios icua mose ra. Dios cheẽ ngue emumba eã nda. Nyebe nandeco nguiã ñee. “Abraham Dios icuate”, i. ²³ Sã embesa ji riqui ñee no:

Abraham ngue Dios icua ra.

Nyebe que Dios eisi turã mbei ra,

i que embesa ji ra. Ûquĩ ngue ique tuchi cote ra. Nyebe “Dios Quiato” i nguiã Abraham je. ²⁴ Emo Dios icua chooño mose, Dios ra eisi turã eã. Emo Dios icua tuchi mose, sã mbae turã abe raã naa. —Dios icuasa, i nda mbia ee cote chã. ²⁵ Sã Rahab cose no. Cuña icuã. Siqui ata ata bei mbia rese. Aque que Josué chimondo isi turã nda. Mbuchimi turã ngue mondo mbia icuã si ra. Nyebe Dios Rahab isi turã nguiã. ²⁶ Sã nanderete no. Umi umi eã mose, “eraaque” i chõ mbia nguiã ùquĩ je. Ûquĩ na ño mbia mo ndiqui nguiã ã. Mbae turã naa eã. Nyebe nandeco nguiã “Dios icuayãte” i ee ã.

3

Cochee chõ nandechuru nandereco

¹ —Mbia mbaaquiato quiato sacua se, jjenye jaaja techĩ nda equia jẽ! Emo emo mii ño. Mbia ra mae tuchi urerese. Urecuata ra emee tuchi. Mbia mbaaquiato quiatusate quia ure re. ² Dios cheẽ nandechabi chabi chõ nguiã nande ja ã. Emo uchuru rerequia turã mose, nguete ja abe rerequia turã ño nguiã ùquĩ. ³ Sã nandeco freno mii ticuasú churu rese no. Nandechẽe mumbayã sacua ño ùquĩ nde. Sã freno ñetẽ je chõ nandeco ticuasú rete rurucuata nandenduasa quti no. Ticuasú rete cuasute raque. ⁴ Sã lancha cuasute raque no. Sã quiririã quiricuãte riqui raque ee no. Ira ñetẽ je chõ echa riqui nguiã embucuata turã unduasa quti. ⁵ Eĩ ño nandechuru nguiã. Nandechuru mbae saã ata ata chõ nguiã. Eñetẽte raque. Sã tata ñetẽte raque no. Mbae ra esei ja tuchi oso quia.

⁶ Tata rã ño nandechuru re. Nandechuru quiarei mbae icuã ñumumbara raã uquia tuchi nande je. Nandechuru icuã

na eãte nanderete resenda mo. Nandechuru chõ nanderete mbaicuã ja nguiã. Nandechuru chõ nandereco rerequia icuã mbei nguiã. Aba checuayã ño nandechuru rerequia icuã nguiã no. ⁷ Sã nandeco quiaa riinda mo mbuseteã arõte raque no. Ae mbebe quia nae, ùquĩ abe nandembuseteã arõte raque. Mbei abe nandembuseteã arõte raque. Ae siqui ama ñi nae, ùquĩ abe nandembuseteã arõte raque no. Ûquĩ ja que mbia mbuseteã emo mose ra. ⁸ Nandechuru quiato nandembuseteã aroneate nguiã. Nandechuru icuã nguiato nandembuquiriri aroneate nguiã. Mbei tasi je rã tuchi chõ nandechuru riqui nguiã nande je ã. ⁹ Nandechuru je nandeco ñee turã ndaque nanderu Dios je. Nandechuru sí je chõ nandeco nguiã ñee icuã mbia Dios chiao je cote. Ae rã sí raque Dios mbia ao. ¹⁰ Nandechuru sí je nandeco ñee turã ndaque. Ñee icuã abe no. Ûquĩ Dios biãte, Seresenda. ¹¹ Sã icua riqui no. I turã mose, eturã ja bei chõ ñene. I reẽ mose, ereẽ ja bei chõ eno nde. I chumumbara chí aroneate icua mii ye. ¹² Sã isio riqui ia eã ira a mo no. Isio a bei chõ nda ia nguiã. Ira mo nda ia eã enongue a no. Ea sí chõ nda ia nguiã no. Sã nandeco i turã ndea eã i reẽ mbirõ no. Hue icua mii ye ra eñi ja eã. Eĩ si chõ nandechuru no nde. Nandechẽe ñumumbara mose, eicuãte ùquĩ.

Ae je Dios uaquiato mee nae

¹³ Jemo aquiato mose, sã eriqui mbae turã naa naa mbei. Sã eriqui tochi bei no. ¹⁴ —Paama jjenye checuayã mose jjenye, jëaquiato jësaã ñooño ño nguiã ùquĩ no. Jeñee ñooño ño nguiã ùquĩ. Dios cheẽ ndui eã tuchi chõ ùquĩ nde. ¹⁵ Eĩ jjenye eã nda cote, Dios uaquiato mee mose jëje. Paama jjenye checuayã mose jjenye, Dios rã eã ño jẽ nde. Dios quiatoã nyisaã na ño ùquĩ nde. Aba checuayã nyisaã na ño ùquĩ no nde. ¹⁶ Mbia ndua eã mose emo ndese, eicuãte ùquĩ. Mbia paama i checuayã mose nyue, eicuãte ùquĩ no. Ûquĩ mose ra mbia siqui turãya nyue. Mbae icuã icuã mbei ra ee. ¹⁷ Dios uaquiato mee mose nande je, nandechiã turãte ra cote. Nandechiã nda ngoite cote. Cocheete ra nandeco cote. Emo ñee nda

nandemumba eãte cote. Nandeya eã nda mbia rese cote. Mbae ra nandesã turã mbei quia cote. Nandendua ata ata eã nda cote. Nandechẽ nyecuate ra eriqui mbia je cote. ¹⁸ Nande mbia nandemingo turã mose nyiese, nandechiã turã nda nandeico cote.

4

Ae mbae icuã quiatote nae, Dios quiatoã ño ùquĩ nde

¹ ¿Mbaerã ño jẽingo nyao nyao nyiese chã? ¿Mbaerã ño jẽingo ico icuã icuãte nyue chã? Jeñiangui renda icuã ñi ño ñene. “Se chõ jẽ”, jenyee jaaja quiatu nguiã mbae icuã osei osei. ² Jembae eã jenyosei choseichĩ nguiã ã. Jẽ ererequiayã mbei mose, mbia jẽiquia arõ ñochĩ nguiã ã. Mbae jenyosei chosei chõchĩ nguiã ã. Nyebe jẽicuã icuã mbeite riqui nguiã jenyue ã. “Embu seje”, jenyee ãte quiatu nguiã Dios je. Nyebe jẽingo nguiã eisiã. ³ “Embu seje”, jenyee mose Dios je, “embu seje” jenyee icuã icuã ño nguiã ee ã. Mbae mumba choõno sacua ño jẽingo nguiã “embu seje” i Dios je ã. Nyebe Dios riqui nguiã emee eã jẽje. ⁴ Sã cuña mo ndiqui hui ngu si no. Eĩ jenyee si chõchĩ nguiã hui hui Dios si ã. Ae Dios biãte nae, jẽ ùquĩ osei osei mose, Dios quiato aronea ño jẽ cote re. ¿Mañi jenyee quia ùquĩ icuayãte re? ⁵ Sã embesa ji riqui ñee ñoõno ãte no: Espiritu Turã Dios mee nguiã nandechiangui re nae, aque riqui ngueteãte nanderese co.

Nandeico sacua Dios mii ndese, i que embesa ji ra. ⁶ Dios turã i ite riqui nande je co. Sã embesa ji riqui ñee no: Ae ucuasua saã saã nguiã nae, Dios riqui ùquĩ ndiquisãte co. Ae siqui tochte quia nae, ùquĩ je quiatu Dios turã i ite riqui nguiã co, i que embesa ji ra. ⁷ Jẽingo tochi chõ nguiã Dios je. Aba checuayã jẽisiquisã ño nguiã jenyese. Ùquĩ mose ra uchã jẽsi cote. ⁸ Dios jẽsiichã tuchi quiatu quia. Ùquĩ mose ra Dios abe jendichã tuchi. Jẽingo mose mbae icuã ndese, jẽhui chõ esi. Jendua ata ata mose, jeñia jembitorõ ño. ⁹ ¿Mbaerã jẽingo iquia iquia mbae icuã naa mose re? ¿Mbaerã jẽyate riqui mbae icuã naa mose re no? Jenyeseo quiatu quia jẽicuã ñi. Jẽya eã

nguiatu quia jẽicuã ndese no ae. ¹⁰ Jẽingo tochi chõ nguiã Cristo je. Aquere quia ra ae jẽturã mbuchecua mbia je cote.

Nandechẽ icuã eã emo ñi

¹¹ Jeñee icuãchĩ nda emo ñi, Seresenda. Dios cheẽ mumba chõ ùquĩ nde. — Jenyeseo chõ nguiã jenyese, i que Dios ra. Jẽ Dios cheẽ mumba mose, “Dios cheẽ icuã” i raanguia chõ ùquĩ nde. “Dios cheẽ icuã” jenyechĩ nda echeẽ mumbayã ndocõ jẽ. ¹² Dios ae chõ mbia cuata mee nguiã co. Dios mii ño ucheẽ mondo nguiã nande je. Nande echeẽ mumbayã sacua. Dios ae chõ aba rirõ nguiã aba icuã si. Dios ae chõ nda aba mondo tata cuãsuu no. Nande quiarei emo cuata nandemee aroneate.

Mbae mo tasaã isamami, nande aroneate

¹³ Sã nandemo ndiqui ñee no. —Taso mbae mo naa naa pee. Taico are tuchi pee. Mbae mo isi sacua icua. Tenda nongue mose ra achube, i no. Ndua rane eã Dios rese. ¹⁴ Ùquĩ Dios biãte. Nandeiranuate mbae mo ndese. Mbae mo tu arondete tã i nande je. Isamami nandemano arondete. Shimbo rã ño nande re. Sã shimbo riqui quiachã jeite no. ¹⁵ —Mbae mo tasaã, nandechĩ nda nande ae ndua mose rocoĩ Dios rese jẽ. —Dios eno i mose seje, ùquĩ mose quiatu mbae tasaã, nande quiatu quia. ¹⁶ ¿Mbaerã jẽingo tesarei Dios si re? ¿Mbaerã jẽingo “se ae mbae tasaã” i re? Jenguasu jẽsaã saã ño nguiã ùquĩ. Eicuãte ùquĩ. ¹⁷ Ae mbae turã icuate quia nae, sã ùquĩ ndiqui mbae turã naa mbei. Mbae turã naa eã mose, eicuãte ùquĩ cote. Dios biãte ùquĩ cote.

5

Santiago ñee asi mbaecha je

¹ Tacheẽ mbaecha je cote. Jẽya eã ndasi ra jẽsaã tuchi cote, mbaecha. Jenyeseo tuchi quiatu quia. ² Jembae ra ua ja tuchi cote. Chicuaquiarĩ nda jẽirao ua tuchi. ³ Jembae mbae isiquia ra quiachã ja cote. Jembae mbae isiquia rã nda jẽ abe jẽquiachã tuchi cote. Mbae isiquia rese chõ jẽingo nguiã ndua. Dios rese ndua rocoĩ. Mbae isiquia jemunua nua tuchi chõ nguiã Dios jembasi sacua ã cote. ⁴ Mbia

que quiei quiei rei quia jêje resê. Mbae que jemondo turã turãya nguia jembae ishao shaosa je resê. Ûquĩ Dios mbiirandu raanguia chõ nguia jeni. Nyebe ra Dios jembasi uquirãcuã je. ⁵ Sã ticuasú riqui quiaru bei ñimbuquirã no. Eiquia nonde. Eĩ ño jê nde, mbaecha. Jembi rese chõ ngue jêingo bei quia ra. Jêquiaru choõño mbei que equia ra. Siqui rocoĩ Dios rese. Nyebe ra Dios jembasi cote. ⁶ Jê ngue mbia turã jembasi mbasi quia ra. Jê ngue mbia turã jêiquia iquia quia no nda. Mbae icuã mo esaã eãte raque jêje. Nyebe ra Dios paama i tuchi jêje, mbaecha.

Jesucristo jêsaarõ arõ mingue chõ nguia

⁷ Jesucristo ra tube íbii, Seresenda. Jêsaarõ arõ mingue chõ nguia. Sã mbia riqui ama nyaaqui raarõ arõ mingue no. Mbae tiquia nonde no. Aquere ra eriqui minguebe umbae raarõ arõ no. Eucua ucua nonde. ⁸ Eĩ jenyẽ chõ nguia Jesucristo raarõ arõ mingue jê abe. Jêñimbirãcuã ño nguia Jesucristo raarõ arõ. Achite eñi tu a cote. ⁹ Jêñee icuã icuãchĩ nda jenyue, Seresenda. Ûquĩ mose ra Dios jembasi. Namo jiri ra Dios mbia icuã mbasi. ¹⁰ Jêñimbirãcuã mingue chõ nguia. Sã Dios cheẽ mbuchecuaasa mbia cose ndare no. Sã ñimbirãcuã mingue mbia icuã mose ee no. ¹¹ Ae ñimbirãcuã mingue quia nae, ùquĩ je chõ Dios turã ndiqui nguia. Sã Job cose no. Ñimbirãcuã mingue tuchi que equia ra. Aquere que Dios turã tuchi riqui ee cote ra. Ûquĩ jêicuate quia ã. Eĩ si chõ Dios turã tuchi nguia mbia je co.

¹² ã abe jêñandu tuchi. Jêñee ñooñoohĩ nda jê. Jurar jenyechĩ nda emo mose jê. Ibatenda rĩ. Ibi jenda mo ñi abe no. Mbae ja mo ñi nda jurar jenyẽ jirichĩ jê. Eno jenyẽ mose, ùquĩ mĩ mbei chõ jêñee. Tei jenyẽ mose, ùquĩ mĩ mbei chõ jêñee no. Eĩ jenyẽ mose ra Dios ñee asiã jêje.

¹³ Jemo ia eã mose, sã ñee Dios je. Jemo ia mose, sã irasei rasei Dios je no. ¹⁴ Jemo ndasi mose, sã “jenyu” i Jesús quiato rerecua je. Sã ùquĩ ñee Dios je erasi rĩ cote. Sã mbae quira mo quitu erasi ãquĩ ndese Jesús rĩ. ¹⁵ —Jesús ra embucherõ, i mose uchiangui re ñee mose Jesús je, mbucherõ

nda. Erasi mbae icuã naa mose nyii, ùquĩ nda embutiã esi no. ¹⁶ —Mbae icuã ngue asaã eã nda, jenyechĩ nda jê. —Mbae icuã ngue asaã nda, jenyẽ quiatu quia jenyue. Jêñee quiatu quia Dios je jenongue rĩ. Ûquĩ mose ra Dios jembucherõ. Emo turã mo ñee tuchi mose Dios je, Dios ra mbae turã saã tuchi ee. ¹⁷ Sã Elías no. Nande rã si chõ ndaque Elías. Sã ñee tuchi Dios je ama mbuchaaqui eã nonde no. Nyaaqui eã mbei que cote ra. Tres años y medio chee que ra. ¹⁸ Aquere que Elías ñee Dios je cote ra. Ama mbuchaaqui sacua cote. Aque mose que nyaaqui cote ra. Mbae que suri ja cote ra. Mbae ia ja chee no.

¹⁹ Emo icha mose Dios si, sã enongue embuchebibe mingo Dios rui sí. ²⁰ Nde mbia mo mbui mose huicua si, eresiquisã quisã ño nguia eso eã sacua tata cuásuu ùquĩ. Dios ra eicuã mbutiã esi cote.

PRIMERA CARTA DEL APOSTOL SAN PEDRO

Pedro ucheẽ mbesa mondo Jesús quiato ishonda jaaja je

¹ Pedro chõ se re. Jesucristo chimbaaquiatu chõ se re. Aico ã mbesa jêje a. Isho isho jendeco mose jendecua si. Ponto jenda je. Galacia jenda je. Capadocia jenda je. Asia jenda je. Bitinia jenda je. Jê ja je aico ã mbesa a. ² Dios que jêirabo umbaerã nyii jeã mose ra. Espíritu Turã ngue jemii icúe Dios mbaerã cote ra. Jê echeẽ mumbayã sacuã. Jesucristo ruqui jembitorõ sacuã abe jêicuã si no. Sã Dios riqui turã i i tuchi jendese. Sã eriqui jembia i i tuchi no.

Dios ra mbae turã mee ja nande je

³ Nandechẽ turã mbei quia Dios rii. Jesu cristo rute quia ae re. Ae que eya eãte riqui nanderese ra. Nyebe nandeisi nguiã mbi-asu nguiirina cote. Dios Jesucristo raaque mbuquera mose, aque mose que nandembiasu nande abe ra. Nyebe nandeico nguiã ñee ã. “Dios cheẽ nda io turã ja nande je”, i ã. ⁴ Dios ra nandemingo bei. Eriirite quia nande re. Nyebe ra mbae mee ja nande je nandeico mose ibate. Mbae icuã ndese ra nandemae eã tuchi aque mose cote. ⁵ Jêingo Dios icuate ùquĩ. Nyebe ae riqui nguiã jendeaquiatu tuchi uquirãcuã je co. Dios que mbae mbuquiche ja nande je ra. Nandererao sacuã ibate. Mbae ua ja mose ra nandererao ja ibate cote. Co eriqui raã nguiã nandereaquiatu co. ⁶ Nyebe jêyate riqui nguiã ùquĩ. Mbae rasi tu mbirĩ arõte raque jêje. ⁷ Sã mbia riqui oro mbuchi no. Equia rirõ sacuã esi. Eĩ ño Dios nguiã jêje co no. Jê Dios icua tuchi sacuã ño mbae rasi riqui re. Nyebe Dios jêicua. Mbae rasi raã naa ndaque. Eaturã tuchi chõ ùquĩ oro si re. Oro quia ra ua emo mose. Jê nguia ra jêhua eã mbei Dios icua mose. Jesucristo tu mose nda Dios ñee turã tuchi jenii ña. ⁸ Jêingo nyesequate Jesucristo rese ùquĩ. Jemae eãte raque quia erese ùquĩ. Jêingo eicuate jeñiangui re ùquĩ. Jêya tuchite riqui

erese ùquĩ. ⁹ Jêingo Jesucristo icuate ùquĩ. Nyebe ra Dios jêã mingo turã mbei cote.

¹⁰ Sã Dios cheẽ mbuchecuada ñee cose no. —Mbia ra mae jee Dios turã ndese, i que ñee nda. Nanderii ño ngue eriqui nguiã ñee. —Mañi nda Dios quia reae. Uturã je ra mbia mingo bei reae, i que Dios cheẽ mbuchecuada ndua ndua cose ra. ¹¹ Espíritu Turã ngue siqui quia Dios cheẽ mbuchecuada chiangui re ra. Mbiirandu randu que equia Cristo rii nda. —Cristo ra mbae rasi saã tuchi. Aquere ra equirãcuã tuchi mbia rerecua mose ae cote, i que Espíritu Turã Dios cheẽ mbuchecuada mbiirandu nyii ra. —Manosete ra ùquĩ ndeae. Aba rii eriqui “Cristo” i remi, i tuchi que Dios cheẽ mbuchecuada quia ndua ndua ra.

Dios que jemii icúe umbaerã nda

¹² Dios que embiirandu ra. —Jê jêtiamba quiatu ra Cristo mbae rasi saã mbia mingo bei sacuã. Jêtiamba quiatu ra Cristo mbae rasi saã mbia namonda je. Mbia emo mosenda je, i que Dios ra. Nanderii ño ngue eriqui nguiã “namonda” i. Nyebe mbia riqui nguiã ùquĩ ja renei nenei jêje Cristo rii cote. Espíritu Turã abe riqui erenei nenei jêje co cote. Angeles abe ùquĩ icua sete raque quia Cristo rii ùquĩ. ¹³ Jendua tuchi rã nguia mbae raã nonde. Jêtesa bei quiatu quia. Jesucristo tu mose, eturã tuchi ra ae jêje aque mose. ùquĩ ndese quia jêingo bei tesa eraarõ. ¹⁴ Ae jenyosei chosei quia nyii nae, Dios icuayã mose nyii nae, ùquĩ ndese jêingo ndua eã cote. Dios cheẽ jemumba eã ño nguia cote. ¹⁵ Dios quiarei jemingo icúe umbaerã tuchi. Nyebe jêingo turã tuchi ae rã si. ¹⁶ Sã Dios cheẽ mbesa ji riqui no: —Jêturã ño jêingo se rã si, i ñi embesa ji re. ¹⁷ ùquĩ jêingo “Paba” i Dios je ùquĩ. Nyebe jêingo irei irei jiri esi jêingo mose íbii. Dios ra mae nandechiao ja ja rese. Emo chiao rese ra mae eã eã. ¹⁸ Nandei ñiinda que siqui chooño nguia cose ra. Dios rese siqui rocoĩ. Eĩ nande que equia nande abe nyii no nda. Dios que nanderirõ ùquĩ si cote ra. Dios que mbae isiquia mondo eã nanderirõ sacuã nandeicuã si ra. Oro que emondo eã no nda. Plata abe no. ¹⁹ Cristo ruqui quiatu ngue nanderirõ

nguiã nandecuã si. Aba queteamba tuchi chõ Cristo ruqui re. Cristo mano mose nande je que eruqui uchẽ tuchi ra. Sã sacerdote oveja turã ño icuia no. ²⁰—Cristo ra mano mbia icuã ndiquicharõ, i que Dios nyii mbae ao nonde ra. Namõ ño ùquĩ io nguiã jẽje cote. Namõ ño Cristo mano nguiã jẽje cote. ²¹Cristo chõ Dios icua uquia nguiã jẽje ùquĩ. Dios chõ ngue Cristo raaque mbuquera nguiã. Dios chõ uquirãcuã mee nguiã Cristo je. Nyebe jẽingo nguiã Dios icua ùquĩ cote. Nyebe jẽingo nguiã ñee. “Dios ra nandemingo bei ibate” i ùquĩ.

²² Dios cheẽ jẽisi turã mingo ùquĩ cote. Nyebe jeñia mbitirõ nguiã mbushĩ cote. Nyebe jẽingo nguiã nyesecua arõte mbia rese cote. Jenyesecua tuchi quiatu quia jenyese jẽ. Nandechiangui re chõ nandeco nyesecua tuchi mbia rese jẽ. ²³ Nyaacuquia si je raanguia chõ jẽ cote re. Nandechaacuquia que equia nyii nae, mbia chõ ngue nanderu nyii ra. Nandechaacuquia sire, Dios que nanderu tuchi cote ra. Dios cheẽ ño nandembuchaacuquia si nguiã. Echeẽ nda ua eã bei. Siqui bei rae. ²⁴ Sã embesa ji riqui ñee no: Quiata rã tuchi chõ mbia ja riqui nguiã ã. Sã quiata riqui mano jeite no. Quiata uti rã ño mbia riqui nguiã ã no. Etura mbirĩ ño chĩ ndaque nyii. Aquere chõ ñimama cote. Mano cote. ²⁵ Dios cheẽ nguia ra ua eã mbei, i que embesa ji ra. Dios cheẽ sí chõ ngue jeñandu nguiã Jesucristo rĩ. Jemingo bei sacua.

2

Jẽo tuchi chõ nguia Dios cheẽ ndese

¹ Nyebe jẽhui mbae icuã ja si. Jẽ nda mbia jemburĩ rĩchĩ nguia jẽ. Jenguasu ra jẽsaã saãchĩ. Emo mbae ra jenyosei choseichĩ nguia jẽ. Jeñee icuã icuãchĩ nda equia emo nĩ jẽ. ² Sã ãquẽ itãqueĩ ndiqui uchũ achã asite no. Eĩ jenyese bei chõ nguia oo Dios cheẽ ndese. Eĩ nda jẽquirãcuã tuchi riqui Dios rese. Sã ãquẽ quirãcuã ndiqui quiambure no. ³ Dios turã ngue jẽsaã ndei resẽ.

Sita turã na ño Cristo re

⁴ Jesucristo ra siqui bei. Jesucristo rei sita turã na. Sã mbia riqui sita mo ndirirõ no. Eĩ si chõ mbia nguiã Jesucristo ririrõ ndei ã. Dios queteamba tuchi quiatu Jesucristo re. Dios chiirabo tuchi chõ ae re. Jesucristo jẽsiichã i i tuchi quiatu quia jẽ. ⁵ Sita turã na ño jẽingo nguiã jẽ abe ùquĩ. Sã Dios chuchua ao ji sita turã je no. Dios chuchua ao ji rã ño jẽ no nde. Jeñee turã mbei quiatu quia Dios je. Jẽ sí chõ jendete jemondo quia ee. Jẽingo bei quiatu quia icúe embaerã. Ùquĩ mose ra Dios jẽisi turã mbei Jesucristo rĩ cote. ⁶ Nyebe Dios cheẽ mbesa ji riqui nguiã ñee:

Jesucristo ra amĩ Zión.

Tuchua i turã na tuchi chõ Jesucristo re.

Sechiirabo tuchi chõ ae re.

Aba queteamba tuchi chõ ae re.

Ae Jesucristo icuate quia nae, ùquĩ mo nda ñee eã.

“Jesucristo rui aico jirichĩ co”, iã nda emo, i que embesa ji ra. ⁷ Sã mbia mo tuchua ao sita turã je no. Ùquĩ sita turã na ño Jesucristo riqui nguiã co. Ùquĩ jẽingo Jesucristo icuate ùquĩ. Nyebe jengueteamba tuchi ae riqui nguiã co. Ae Jesucristo icua eãte quia nae, ùquĩ je ra embesa ji cheẽ io tuchi cote. ã ndei embesa ji cheẽ ã:

Ae tuchua aosa quirirõ sita nae, aque quia ra tuchua i turã tuchi cote, i que embesa ji ra. ⁸ Sã embesa ji riqui ñee no:

Sã sita riqui pãtã i emo cúe je no jẽ.

Embucoi no jẽ,

i que embesa ji ra. Eĩ si chõ nda mbia pãtã i raanguia Jesucristo cheẽ je. Jesucristo cheẽ mumbayã sereãte quia ñene. “Echeẽ mumbasa ra pãtã i raanguia”, i que Dios ñiinda mosenda bei ra.

Dios mbaerã tuchi chõ jẽ nde

⁹ Dios que jẽirabo umbaerã tuchi ra. Sacerdotes rã ño jẽingo nguiã Dios je ùquĩ. Dios que jemingo icúe umbaerã nda. Jẽ mbia mbiirandu randu bei sacua Dios chiao turã nĩ. Ae quiatu que jendirõ itondaru si ra. Jẽingo sacua nyaashĩ Dios rese cote. ¹⁰ Mbia chĩmbutereãte que jẽ nyii ra. Dios quiato tuchi chõ namo jẽ cote re. Emo ngue ndua eãte quia jendese nyii ra. Dios quia ndua tuchi nguiã jendese co cote.

Dios rimba chõ jẽ nde; nyebe jẽingo turã

¹¹ Achesequa tuchite quia jendese co. Isho ishote jẽingo jendecua si ũquĩ. Ae mbia chosei chosei quia mbae icuã nae, ũquĩ ndese ra jemaie maechĩ. Eicuãte riqui nandeaĩ je ũquĩ. ¹² Ae Dios icua eãte quia nae, ũquĩ ndesaa jẽingo turã ño nguia. Ũquĩ ndiqui ñee icuã icuãte raque jeni ũquĩ. Jẽicuã mose rocoĩ. Ũquĩ nda mae jee jẽturã ndese. Ñee turã jee ra Dios riĩ, Jesús tu mose.

¹³ Mbia rerecua ja cheẽ jemumbayã ño nguia Dios je. Ae ererecua tuchi ererecua ja si nae, aque cheẽ abe jemumbayã ño nguia no. ¹⁴ Sã ererecua tuchi riqui mbia rerecuarã miĩ jaaja no. Mbia icuã mbasi mbasi sacua. Mbia turã ndeaquiato sacua abe no. Ũquĩ ñee abe jemumbayã ño nguia no. ¹⁵ Jẽingo turã ño nguia jẽ. Jẽingo turã mose ra mbia aquiato ñee icuã aroneate jẽje. Dios bite ũquĩ. ¹⁶ Jesucristo que jembui mbae ja si cote ra. Jenderecua eãte raque mbae mo cote. —Mbae icuã tasaã. Sererecua eãte rei ñene, jenyechĩ ndae. Dios rimba chõ jẽingo. ¹⁷ Jẽingo turã ño nguia mbia ja je. Jenyesequa chõ nguia jendesenda Jesús quiato rese. Jẽireĩ ireĩ jiri Dios si. Mbia rerecua cheẽ nda jemumba mumbachĩ jẽ.

Cristo rã si chõ jẽingo ñimbirãcuã turã mbae rasi je

¹⁸ Mbia rimba je tacheẽ cote. Jenderecua cheẽ jemumbayã ño nguia jẽ. Jẽireĩ ireĩ jiri quia esi jẽ. Jenderecua icuã mose abe chõ echeẽ jemumbayã nguia. “Jenderecua turã mose achõ ño echeẽ jemumbayã”, ae eã nguia jẽje co. ¹⁹ Mbia icuã icuã ñooño mose nande je, nanderoseĩ nguia chõ nandeico. Dios bite ũquĩ. Dios riĩ nanderoseĩ nguia mose, ebite ũquĩ. ²⁰ Mbae turã jẽsaã saã mbei chõ nguia. Mbia jẽirua nua mose jẽturã niĩ, jendoseĩ nguia chõ jẽingo. Ũquĩ mose ra Dios ia tuchi jendese. Mbae icuã mo nda jẽsaãchĩ. Jẽ mbae icuã naa mose, Dios biãte ũquĩ. Mbia jẽirua nua mose jẽicuã niĩ, jendoseĩ nguia raque rae, Dios biãte ũquĩ. Jẽicuã niĩ ño ñene. ²¹ Nyebe Dios “jẽingo serui”,

i nguia nande je. Sã Cristo roseĩ nguia tuchi mbae rasi raã mose nande je no. Nande abe nanderoseĩ nguia sacua eraã si. ²² Cristo que mbae icuã mo saã eã tuchi ra. Mbia mo ngue embiĩ iriã tuchi quia ra. ²³ Mbia ñee icuã mose Cristo je, ae que ñee icuã eã mbei mbia cheẽ ndibishorõ nda. Mbia Cristo mbaasi asi mose, “tasaã se”, iã tuchi que equia ra. “Dios quiarei”, i chõ ngue equia ra. ²⁴ Jesús mano mose ira mbuchicuasanda ji rese, nandeicuã ndiquicharõ ño ngue mano nguia. Eraque rã nandeico sacua mbae icuã je chõ ngue re. Nandeico sacua mbae turã ndese chõ ngue re. Cristo mbae rasi raã mose, jembitorõ sacua ño ũquĩ nde. ²⁵ Ovejas quiachã je rã ño ngue jẽingo nguia nyii. Jenyebi que oso ngasẽ Cristo rea cote ra. Ovejas raarõsa rã ño ae riqui nguia jẽje co cote. Ae chõ jendeaquiato nguia co.

3

Jendu cheẽ jemumbayã ño nguia, i cuña je

¹ Mbia ninisi je tacheẽ cote. Jendu cheẽ nda jemumbachĩ jẽ. Jesús quiatoã ndaque jendu. Echeẽ jemumbayã ño. Jendu nda Jesús icua chee cote chã. Jẽingo turã mose ee. Jẽ Jesús cheẽ nenei neneinde rocoĩ ee. Jesús nda eicua cote chã. ² Jẽingo turã ndese ra jendu mae nyee. Echeẽ jemumbayã mose. ³ —Mbae je nda serete ambarõ na ña, jenyechĩ nda ndua ndua jẽ. Jẽo resenda rese. Jẽhui rese abe no. Tiru turã ndese abe no. Jẽa uma ji turã ndese abe no. Ũquĩ miĩ ndese chõ nda jẽingochĩ ndua beite jẽ. ⁴ Jẽiangui re quiato jẽingo turã. Jẽingo tochi chõ nguia. I nda jẽturã ua eã mbei jẽsi. Ũquĩ nguia Dios bite re. ⁵ Sã cuña mo no. Dios quiato cose no. Ũquĩ nguia que eturãte riqui uchiangui re quiato ra. Ngu cheẽ abe mumbayã no. Ndua rocoĩ nguete resenda umbarõsa rese. ⁶ Sã Sara Abraham ñee mumbayã no. Sererecua i ee. Jẽingo turã mose, Sara rã nda jẽ cote. Mbae mo si ra jẽsiquichechĩ cote jẽ.

Jẽingo turã ño nguia jeninisi je

⁷ Tacheẽ eninisi rerecua je cote. Jẽaquiato chõ jẽingo turã jeninisi je. Jeninisi jemingo turã. Jẽingo tochi chõ nguia ee. Jẽ nguia

jeatã jiri esi re. Dios quia eturãte jẽ ja je re. Jeninisi rese. Dios que jendeco mingo nyiese ra. Jeninisi rese. Nyebe jẽingo nguiã siqui turã jeninisi je. Ũquĩ mose ra Dios jeñee andu bei, jeñee mose ee.

Mbia icuã icuã mose jẽje jẽturã mose, jẽya chõ jẽingo

⁸ Jẽingo turã ja chõ nguia jenyue no. Jẽya eã jiri jẽingo jenyiese no. Hue rĩ ja chõ jẽingo ndua ja. Jenyesequa ja chõ nguia nyiese. Jẽseteã ño jẽingo nyue. ⁹ Mbia icuã mose jẽje, jẽicuãchĩ nda jẽ abe ee. Mbia ñee icuã mose jẽje, jeñee icuãchĩ nda jẽ abe ee. Jeñee turã nguiatu quia ee jẽ. Jẽingo serui, i chõ ngue Dios jẽje re. Dios ñee turã mbei sacua jeni ño ngue re. ¹⁰ Sã embesa ji riqui ñee no: Jẽingo turãse mose, jeñee icuã eã emo ni. Jẽingo chooño sereã mose, jeñee ñooño eã emo je no.

¹¹ Jenyicuasẽ ño nguia mbae icuã si. Mbae turã ño jẽsaã nguia. Jẽturã ño nguia mbia ja je jẽ.

¹² Ae siqui turã nguia nae, ũquĩ Dios teaquiutu bei quia co.

Ũquĩ ñee Dios chandu turã mbei quia co. Ae siqui quia mbae icuã ndese nae, Dios biã tuchi chõ ũquĩ nde, i que embesa ji ra.

¹³ Jẽingo turã mose ¿mañi nda emo mbae icuã naa jẽje re? ¹⁴ Mbia icuã icuã mose jẽje mbae turã naa mose, jẽya tuchi chõ ũquĩ mose re. —Mbae icuã nda asaã ndeje jẽ, i mose jẽje, jẽsiquicheã ño esi. ¹⁵ Jesucristo jemingo tuchi chõ nguia jeñiangui re jenderecuarã. Emo ñee mose jẽje, jeñee aquiutu chõ ee. —¿Mbaerã ereico Jesucristo rese re? i mose emo jẽje, jeñee aquiutu chõ ee. Jẽingo mingue chõ ee. ¹⁶ Jẽingo turã mbei. Diosbi rese jẽingo bei. † nda jẽya bei riqui. † nda “mbae turã asaã eã ñochĩ”, jenyee eã. Ae ñee icuã icuã nguia jeni nae, ũquĩ nda ireĩ ireĩte quia ucheẽ icuã si cote. Ireĩ ireĩ nda jẽingo turã mose Cristo rese. ¹⁷ Mbae rasi jẽsaã mose jẽturã ni, ũquĩ nguiarei Diosbi tuchi. Mbae rasi jẽsaã mose jẽicuã ni, ũquĩ nguiarei Dios biã tuchi. Mbae icuã niite quia ñene. ¹⁸ Cristo abe que mbae rasi saã nande je ra. Mbae

icuã naande rocoĩ. Ae raque eturã. Mbae rasi que esaã nandeicuã ndiquicharõ nda. Nandemingo sacua Dios rese. Cristo rete que mano nda. Espiritu Turã ngue embuquera si ra. ¹⁹ Aque mose que Cristo si Dios cheẽ nenei nenei mbia aĩ tarõ ji je ra. ²⁰ Ũquĩ ngue Dios cheẽ mumba mumba quia nyii ra. Noé Dios cheẽ nenei nenei mose ee. Dios roseĩ nguiatu tuchi que eriqui mbia riisu isu aque mose ra. Noé siqui bei mose arca raã naa. Aquere que mbia mĩte ique arca ye ra. Ocho que mbia ra. Siqui bei sacua ama ndicuasus mose. ²¹ Sã ama Noé mumbebi mingo no. Eĩ si chõ bautismo co no. Nandeĩ mbuchasu mose, aque quia ra nandemingo eã Dios rese. Nandechiã mbitirõ ji mose, aque mose quia ra Dios nandemingo bei cote. Bautismo tuchi chõ ũquĩ nde. ²² Jesucristo quera sire que esi ibate ra. Hue eriqui beite Dios jii hue cote. Mbae ja rerecuu tuchi chõ ae cote re. Angeles rerecuu. Ibatenda rerecuu ja.

4

Mbae jẽsaã turã ja

¹ Sã Cristo mbae rasi saã tuchi siqui mose ibii no. Eĩ jenyee si chõ nguia ñimbirãcuã nguiatu mbae rasi raã mose. Ae mbae rasi saã tuchi quia nae, ũquĩ nda mbae icuã saã eã mbei cote. ² Ae Dios bite nae, ũquĩ ndese ra eriqui bei cote. Ae echoseite quia nae, ũquĩ naa ndocoĩ. ³ Mbia ataque rã tuchi que nandeico nyii ra. Nandeicuã tuchite que eriqui nyii ra. Ae nandechosei quia nae, ũquĩ ndese achõ ño ngue nandeico nyii ra. Nandequiacua quiacua que equia nyii ra. Nandechimbusarei chooño mbei que equia nyii ra. Dios abareã ndese que nandeico ndua tuchi nyii ra. Hue chõ cote. Nandehui que ũquĩ ja si cote ra. ⁴ —¿Mbaerã jẽingo bei eã mbae icuã naa naa urerese re? i nanderesenda ñiinda quia nande je ã. Nyebe eriqui nguiã ñee icuã icuãte nande je ã. ⁵ —¿Mbaerã ũquĩ jẽsaã nde? i chee ra Dios ũquĩ je cote. Dios mae mose mbia chisaã saã ja rese. Aque mose ra Dios mbia mano je abe chisaã ndea ja. Mbia reco abe chisaã ndea ja. ⁶ Ae mano mbia nyii nae, ũquĩ je

que Jesucristo Dios cheẽ nenei nenei nda. Eã siqui turã sacua Dios rã si. Erete mano ndaque huicuã je.

⁷ Achite mbae ñi ua ja a cote. Nyebe jẽingo mbae turã naa naa ja bei. Nyebe jẽingo ñee ñee mbei Dios je. ⁸ Jenyesequa tuchi quiatu quia jenyese. Uqui mose ra jẽtesarei jenongue icua si. ⁹ Jenongue jẽisi turã ño nguia nyo mose jenyuchua. Jẽya chõ jẽingo eisi mose. ¹⁰ Dios que nandehisaã saana mee nande ae ae je ra. Uqui jẽsaã turã turã ño nguia jẽataque je. Dios uquiatu mee mose jẽje mbae mo naa sacua, uqui jẽsaã turã turã ño nguia jẽataque je. ¹¹ Emo Dios cheẽ nenei nenei mose, sã Dios cheẽ tuchi chõ esenei senei nguia. Jemo mbae turã naa naa mose uataque je, sã eriqui eraã turã Dios quiracuã ñi. Ae jẽsaã saã nguia mbae nae, Dios je chõ jẽsaã. ñnda mbia ñee turã mbei Dios rĩ. Jesucristo rĩ abe no. Sã mbia ñee turã mbei Dios rĩ. Amén.

Mbae icua tuutu mose jẽje, jẽya cho jẽingo

¹² Mbae icua tuutu mose jẽje, “¿mbaerã eriqui seje re?” jenyechĩ nda nyuruirate, Seresenda. Eĩ mbei chõ mbae icua nguia tuutu Jesús quiato je. ¹³ Mbae icua tuutu mose jẽje, jẽya chõ jẽingo. “Cristo rã si chõ nandeco nguia mbae rasi raã”, jenyechõ nguia ñimbia. Cristo nininya tu mose, aque mose abe nda jẽya tuchi chã. ¹⁴ Mbia ñee icua icua mose jẽje Cristo rĩ, coche ñene. Jẽya chõ jẽingo. Espiritu Turã ño jẽichu ichu nguia uqui. ¹⁵ Mbia jembaasi asi chooño mose Cristo rĩ, jẽya chõ jẽingo. Jẽicua ñi mbia jembaasi asi mose, uqui quiatu aba ireite re. Jẽ mbia mo iquia mose. Jẽ mbae mo mbuquiachã mose. Jẽ mbia mo mbupaama i mose. Jẽ uqui icua mo naa mose, aba ireite uqui. ¹⁶ Mbia jembaasi asi mose Cristo rĩ, jẽireĩ ireichĩ nda uqui mose. Cristo resendate quia jẽ nde. Nyebe jẽya chõ jẽingo. ¹⁷ Dios ra mae ja chee mbia chisaã ja rese. Achite Dios ñi mae uquiato chisaã ndese a. Nandehisaã ndese chee ra Dios mae. Uquiato chisaã ndese chee. Mañi nda uquiatoã nyisaã je remi. Uqui quiatu ra embasi tuchi nandesĩ quiatu. Dios cheẽ turã quiatu nge eisiãchĩ nguia.

¹⁸ Dios quiato riqui ñimbiracuãyã arõ arõte mbae icua tuutu bei mose ee ã. Dios quiatote raque. Dios quiatoã quiatu ra ñimbiracuãyã tuchi mbae icua si. Dios ra emondo chee tata cuasu. ¹⁹ “Mbae rasi jẽsaã”, i mose Dios nande je, nandesaã turã ño nguia ee. Mbae turã nandesaã i i chõ nguia ee. Nandereco nandemee tuchi nandeaosa Dios je. Ae ra ucheẽ mbuchebiã mbei nande je.

5

Jesús quiato jẽteaquiato turã ño nguia

¹ Jeñimunua je rerecua ja je tacheẽ cote. Cristo quiato rerecua chõ se no nde. Cristo mbae rasi raã ndese que amae se ra. Cristo nininya nyecua mose, se abe ra aico bei erese cote. ² Ae Jesús quiato siqui quia jendese nae, uqui jẽteaquiato turã nguia. Sã ovejas raarõsa riqui ovejas raarõ turã no. Eĩ jenyechõ nguia Jesús quiato raarõ. Jẽtea teã eã ño nguia mbia mbaaquiato quiatu. Jendua ndua eã ño nguia mbae isiquia rese. ³ Jẽingo tochi chõ nguia Jesús quiato chimunua nua je. Mbiacha ra jẽsaã saã techĩ ee jẽ. Jẽingo turã ño nguia eresa rae. ñnda jẽ na sí eriqui. ⁴ Jesucristo quiarei mbia reaquiatusa tuchi nande si. Ae tu mose, mbae turã tuchi mo nda emee jẽje premio. Uqui nda ua eã mbei. ⁵ Acuanindu je tacheẽ cote. Amei ñee jemumbayã ño nguia jẽ. Jẽ ja jẽataque cheẽ jemumbayã ño nguia jẽ. Jẽingo tochi ja chõ nguia jenyue jẽ. Sã embesa ji riqui ñee no:

Ae ucuasu saã saã nguia nae, Dios biã tuchi chõ uqui nde.

Ae siqui tochi quia nae, uqui je quiatu ra Dios turã mbei riqui,

i que embesa ji ra.

⁶ Jẽingo tochi chõ nguia Dios je jẽ. Equiracuã tuchi chõ ae re. Ae ra mbia mumae turã nyee jendese emo mose cote. ⁷ Jendua ndua ia eã si jẽhui chõ. Jemee ño Dios je. Ae riqui ndua beite jendese co. Jendeaquiato beite quia co. ⁸ Jeñimbaaracua chõ nguia jẽ. Jẽtesa bei chõ nguia jẽ. Aba checuayã nderecua riqui ngata beite co jẽ. “Mbia tambicuã icua”, i beite equia co. Sã nyacua no. Sã nyacua risha riqui ureĩ mbocheite “mbae tau” i

no. ⁹ Aba checuayã nderecua jësiquisã ño nguia jenyese. Dios jëicua tuchi chõ nguia jeñiangui re. Sã jendesenda ishonda ja riqui mbae rasi raã tuchi no. Jë na si no. ¹⁰ Sã Dios turãte riqui nande je no. Mbae rasi ra jësaã ndaque nyii. Aquere ra Dios jembitirõ cote. Jembirãcuã tuchi cote. Dios sí chõ ngue ñee nguia nande je. “Taemingo bei serese ibate Jesucristo rii”, i nguia nande je. ¹¹ Dios quiarei equirãcuã mbei. Etura mbei. Amén.

Pedro ñee hui bei sacua cote

¹² Co ambesa quia jëje co. Jemingo i i sacua Dios rese. Jembaaquiatu sacua Dios turã nii. Jëingo bei chõ nguia erese. Co ambesa mondo quia jëje aque. Silvano ndese aque. Jesús quiato turã tuchi chõ Silvano nde. Nanderesenda re. ¹³ Jesús quiato Babilonia jenda saludos mondo quia jëje aque. Dios chiirabo chõ ã nde. Jë na si. Marcos abe saludos mondo quia jëje aque no. Seriirĩ na ño aico nguia ee co. ¹⁴ Saludar jenye turã turã ño jenyue mambi. Jenongue ritii abe jësiite ite chõ nguia mambi. Jesucristo quiato jate quia jë nde. Sã jëya beite riqui. Amén.

SEGUNDA CARTA DEL APOSTOL SAN PEDRO

Pedro ucheẽ mbesa mondo Jesús quiato je

¹ Simón Pedro chõ se re. Jesucristo rimba chõ se re. Jesucristo chimbaaquiatu chõ se re. Aico co mbesa mbesa jẽje co. Ure rã si chõ jẽingo nguiã Jesucristo icua ùquĩ. Nandebi tuchi Jesucristo icua mose. Dios turã tuchi nandemingo mose Jesucristo rese. ² Sã Dios turã ndiqui tuchi jendese. Sã Dios jembia tuchi mingo. Jesucristo jẽicua i i tuchi bei oso quia.

Jeñimbaaquiatu i i tuchi Dios rĩ

³ Jesucristo nandẽicuate quia ã. Nyebe Dios riqui nguiã mbae raã ja tuchi nande je co. Nandemingo bei sacua. Nandẽico sacua erã sí. Uquirãcuã je eriqui mbae raã ja tuchi nande je co. Uturã ngue emee nande je ra. ⁴ Dios que ucheẽ turã mee nande je ra: —Co tasaã jẽje. ã tasaã jẽje. Co abe, i tuchi que equia nande je ra. Ùquĩ ngue esaã ja nande je cote ra. Jesucristo rã si que nanderaã nda. Ae mbae icuã mbia chosei chosei quia nae, ùquĩ si eriqui nanderiquisã quisã co. ⁵ Jẽingo Dios icuate ùquĩ. Jẽingo turã ño nguia jẽ. Jeñimbaaquiatu i i tuchi quiato quia Dios rĩ jẽ. ⁶ Jendeco jẽingo turã ño nguia i co jẽ. Jẽingo mingue chõ nguia jẽ. Dios rã si chõ jẽingo jẽ. ⁷ Jẽingo turã ño nguia jenyue. Jenyesequa chõ nguia jenyese no. ⁸ Eĩ jenyese mose, eturãte ùquĩ. Eĩ jenyese i i tuchi chõ nguia jẽ. Ùquĩ mose ra Jesucristo jẽicua chooño eã. Mbae ra jesaã saã tuchi quia ee. ⁹ Eĩ jenyese eã mose, mbia resayã na ño jẽingo nguiã ùquĩ. Eĩ jenyese eã mose, jẽtesarei chõ ndei equia jeñia irei ji si ùquĩ. Jesús jẽicua cose ndare mbutiã mose. ¹⁰ Ùquĩ jesaã saã tuchi chõ nguia jẽ. Jẽ ùquĩ naa mose, jẽ sí chõ nda jenyẽicua quia. “Dios chiirabo chõ nande re”, jenyese tuchi ra equia. Jẽhui eã mbei ra equia Dios si cote. ¹¹ Dios ra

jẽisi tuchi mingo Jesús récuua cote. Huee ra jẽingo bei erese.

¹² Nyebe ra aico bei jemundua ndua ùquĩ ndese. Jẽicuate raque. Jẽingo turãte raque Dios cheẽ ndese. ¹³ Coche aico rei jemundua ndua ùquĩ ndese a. Sereco siqui mose a ra aico jemundua ndua bei ùquĩ ndese. ¹⁴ Jesucristo que ñee seje ra: —Ereico arete eã nda íbii, i que sembiirandu ra. ¹⁵ Taemundua ndua bei erese. † nda jẽtesareiã mbei esi semanonde abe.

Se sí amae Jesucristo rese, i Pedro

¹⁶ Jesucristo quirãcuã ngue uresenei senei tuchi quia jẽje ra. —Jesucristo ra tube íbii, ure tuchi que equia jẽje ra. Ichoiñosa reã ñeetuchi chõ ùquĩ nde. Mbua ñee ñooño je eã tuchi chõ ùquĩ nde. Se sí chõ ngue amae Jesucristo nininya rese ra. ¹⁷⁻¹⁸ Dios que unininya mee ee sita íbatee ereco mose ra. Se abe reco mose huee que ra. Serésaa que Dios unininya mee Jesucristo je ra. —Seriirĩ ño co re. Sechesequa chõ co re. Seyate erese, i que Ibatenda ñee aque mose ra. Echeẽ ngue achandu se abe ra. ¹⁹ Eĩ sí tuchi que Dios cheẽ mbuchecuaa chimbesa nyii ra. Echeẽ mbesa ji chooño eã ño ùquĩ nde. Jẽingo tuchi quia echeẽ mbesa ji rese. Mbae resaesa tuchi chõ echeẽ mbesa ji re. Sã tata rendi riqui itondaru resaete nyaashĩ nyee no. Jẽingo tuchi mose echeẽ mbesa ji rese, Cristo ra jendique tesae tuchi quia jẽje. Sã nyasitata riqui nanderesae no. ²⁰⁻²¹ Dios cheẽ mbuchecuaa mo ngue ñee ñooño eãte quia emo mose ra. Ucheẽ ae que embesa mbesa eãte quia ra. Espíritu Turã ño ngue embucheẽ nguia ra. Espíritu Turã ño ngue Dios cheẽ mbesa mbesa uquia quia ee ra.

2

Ae mbia mbĩrĩ irĩ nguia embaaquiatu quiato mose

¹ Mbua mo ngue Dios cheẽ mbuchecuaa saã ñooñote quia cose ra. Espíritu Turã ae que embucheẽ eã nda. Eĩ sí ra emo jembĩrĩ irĩ ñooño name. Ñee ñooño nda equia Dios rĩ jẽje. Hui huite chõ nda equia Jesucristo si. Ae mano nguia erĩ. Nyebe ra Dios ùquĩ

mbutiã asi. ² Mbia ra siqui tuchi mbae icuã ndese ùquĩ ñee nguire. Mbia ra siqui chooño ño cuña mo ndese ùquĩ ñee nguire. Nyebe ra mbia ñee icuã icuã Jesús cheẽ turã ñi. ³ Ûquĩ nda mbae isiquia choosei osei tuchi chõ nguia jembae. Nyebe ra jembaaquiatu icuã icuã. Dios que ñee ùquĩ ñi coose ra. —Ûquĩ nda ambasi tuchi je, i que ra. Achite ùquĩ ñi a cote.

⁴ Angeles mbae icuã naa mose, ùquĩ nyee que Dios tiisu isu ãte quia ra. Ecuã ji que emombo tata cuásuu ra. Itondáruu que emombo ra. Siqui bei sacuã huee, Jesús tu chee mae eicuã ndese. ⁵ Mbia cose ndare abe que Dios tiisu isu ãte quia ra. Noé mosenda. Ûquĩ ngue eicuãte riqui ee ra. Nyebe que Dios ama mbuchaaqui tuchi ee ra. Ama mbicuasu mbia iquia ja sacuã. Noé mii ngue Dios iquia eã nda. Mbia siete rese. Dios cheẽ nenei neneisate quiatu ngue Noé nde. ⁶ Sodoma jenda abe que Dios tiisu isu ãte quia ra. Gomorra jenda abe no. Mbia icuã tuchite quiatu ngue re. Nyebe Dios ùquĩ ndei ja nguia tata je. Echuchua ja resebe. —Eĩchĩ nda nande abe je re, nandeico eã mose erese, i sacuã mbia icuã. ⁷ Lot mii ngue Dios iquia eã nda. Eturãte quiatu ngue eriqui nguia Dios je. Eya eãte que eriqui mbia hue jenda mbae icuã naa naa mose ra. ⁸ Mbia mbae icuã naa naa mbei mose que Lot ia eã mbeite riqui ra. Ae mii ño ngue echiã turã Dios je ra. Nyebe Dios ae mii iquia eã nguia. ⁹ Ae siqui beite quia Dios rese nae, Dios riqui ùquĩ ndequiatu beite co. Mbae icuã jea je esi tã i mose ee. Ae mbae icuã saã nguia nae, ùquĩ nda Dios mbasi tuchi. Jesucristo ra tu chee mae eicuã ndese. ¹⁰ Ae siqui quia mbae icuã ndese ubi nae, ùquĩ nda Dios mbasi tuchi. Ae aba cheẽ mumba quia, ùquĩ abe ra Dios mbasi no. Ae eĩ ñooñote quia mbia je nae, ùquĩ. Ae ñee ñooñote quia mbae ibatenda je nae, ùquĩ abe no. ¹¹ Mbae ibatenda rii ngue ángeles ñee icuã eãte quia Dios je ra. Angeles quirãcuãte raque mbia si. ¹² ã mbia quiarei mbae quiaa riinda rã tuchi. Ndua turã eã mbae rese. Siqui chooño. Ñee icuã ñooño mbae icua rocoĩ. Mbae quiaa riinda rã ño nda ã mano cote.

Dios ra eiquia tuchi. ¹³ ã nda mbae rasi saã tuchi quia cote. Ubi icuã mii ndese chõ eriqui nguia ndua ã. Jembãrĩ irĩ ño nguia ã. Quiaru chooño ño nguia jendese ã. Jesús quiato raã ñooño jẽje. Aba ireingua tuchi chõ ùquĩ nde. ¹⁴ Maeño aronea cuña mo ndese. Hui aroneate equia mbae icuã si ã. Ubichõ aroneate equia cuña iquia iquia chooño je rese ã. Mbae osei osei jate equia ã. Dios ra embasi tuchi cote. ¹⁵ Ishote eriqui Dios si ã. Nyicuasẽ equia Dios si ã. Sã Balaam ndiqui nyicuasẽte esi no. Beor riirĩ. Sã mbae icuã naa mbae isiquia isi nonde no jẽ. ¹⁶ Sã burra ñee asite ee no. “Mbae icuã tasaã”, i mose ndua ndua. Sã mbae icuã naa eã burra ñeende ee cote no.

¹⁷ Icuã iru rã ño ã mbia re. Sã quiririã ndiqui ibeishĩ mbucuatate no. Eĩ si chõ ã mbia re. Hue bei eã chí. Nyebe ra Dios emombo bei itondáruu. ¹⁸ Uchisaã mbae icuã ñi ñee ñee ja mbia je. Ucuasu raã naate equia ã. Mbia mbãrĩ irĩ mbeite equia mbae icuã je ã. Ae hui ramo ndei mbae icuã si nae, ùquĩ abe mbãrĩ irĩte equia mbae icuã je ã. ¹⁹ —Jẽingo mose urerese, jẽingo turã ndae, i bei rei equia mbia je ã. Mbae icuã nimba sí chõ ñee ñee nguia ee ùquĩ. Ae ruĩ nandeico quia nae, ùquĩ nimba quiatu nande re. ²⁰ Sã emo Jesucristo icua raque nyii no. Sã mbae icuã naa eã ndaque ee aque mose no. Mbae icuã embãrĩ irĩ mose ùquĩnde, eicuã tuchi ra cote. Mbae icuã nimba tuchi ra ae cote. Ñiinda si. ²¹ Dios quia nda ùquĩ icuayã mbei nyii re chã. Dios icuare quiatu ngue hui nguia echeẽ si. ²² Siqui mbãrĩ ndaque Jesús rese. Hui esi aquere cote. Sã ñooño ndiqui ñemo ndaque no. Sã oso raque ucúe ndecha no. Nyebe jei chõ u ucúe u cote. Sã teasu socoi mo ndiqui raque nyasu no. Aquere ñimoo moo ño utuchu je cote. Eĩ ño mbia re, ae siqui juate quia Jesús rese. Aquere siqui jei chõ mbae icuã ndese.

3

Jesucristo ra tube

¹ A aico segunda carta mbesa jẽje a. Jemundua turã sacuã ño ùquĩ nde. Ae acheẽ jẽje nyii nae, ùquĩ ndese jemundua sacuã ño aico nguia ã mbesa jẽje a. ² Ae Dios

quiato senei senei mbia je nyii nae, ũquĩ ndese jendua. Ae Jesús chimbaaquiatu ñee mbia je nae, ũquĩ ñee jemumbayã ño. ³ ã ndese jendua: Jesucristo tu nonde ra mbia riqui iquia chooño Dios je. Ñee icuã icuã nda equia Dios je. Ae ebite mbae icuã nae, ũquĩ achõ ndese chõ nda eriqui. ⁴ Ũquĩ nda ñee jêje: —Sã Jesús tu ãte no jê. Sã ucheẽ mbuchebi chõ jê. Sã eĩ mbei chõ Dios chĩaã ima jê, i ra ũquĩ ñee icuã icuã jêje. ⁵ Cose ndare rese nduayã. Dios que ibei chao ucheẽ je chõ cose ra. Ibi abe que echao i ite re ra. ⁶ Aquere que Dios ama mbicuas ra. Mbae iquia ja nonde cote. ⁷ Dios riqui ibei rerecoquiatu co. Ibi abe no. ã nandeco irõ erese ã nae, Dios ra emendi cote. Aquere mose ra mbia Jesús quiatoã oquei ja.

⁸ Co abe rese jendua, Seresenda: Nyaashĩ mii na ño mil años Dios je re. Mil años na ño nyaashĩ mii Dios je no nde. ⁹ —Jesús ra tu ãte rei no. Ucheẽ embuchebi rei quia mambi, i raque emo emo nguia Jesús rĩã. Ico minguete equia mbia je pe. —Emo nda quiachãya Dios si chã. Siqui ja nda erese chã, i equia eriisu isu pe no. Nyebe eriqui nguia tu jei eãte. ¹⁰ Mbia mbuate ra Jesús ru. Sã mbae mbuquiachãsa riqui tu itondiite mose no. Eĩ si ra Jesús u mbia mbua. Ũquĩ mose ra ibei ua cote. Mbae rieu ra aba mundi tuchi. Nyasitata ra membe. Ibi abe ra oquiei tuchi. Mbae ja ra oquiei ibi jenda.

¹¹ Nyebe Dios nandesiichã tuchi quiatu quia. Dios rã si quiatu nandeco mbae turã ndese. ¹² Jesucristo ru jenyosei quiatu quia. Ae Dios bite nae, ũquĩ ndese quiatu jêingo. † nda Jesucristo ru jei. Ũquĩ mose ra ibei oquiei ja. Nyasitata abe ra membe tata je. ¹³ Aquere ra Dios ibei mbiasu cote. Ibi abe ra embiasu ucheẽ nguire no. Ũquĩ ño nandesaarõ arõ nguia ã. Ũquĩ mose ra mbae turã achõ cote.

¹⁴ Nyebe jêingo turã ño Dios rese. Mbae icuã je ra jeñimbũcuãchĩ jê. Jeñimbũcuã eã mose ra Dios iate jendese eru mose chã. ¹⁵ Dios siqui minguete quia mbia je co. Mbia rirõ sacua eicuã si chõ ũquĩ nde. Eĩ si chõ ngue Pablo abe embesa nguia jêje

no. Ae Dios ñee Pablo je nae, ũquĩ sí que Pablo mbesa jêje ra. Nanderesenda tuchi chõ Pablo re. Nandechesecua chõ nguia erese ã. ¹⁶ Pablo carta mbesa mbesa bei mose, mbia mundua ndua sacua ã ndese chõ ñene. Aba chiicuayãte raque Pablo chimbesa emo emo. Ae equiatuãte Dios rese nae, ũquĩ Pablo cheẽ nyabi chabi chõ nguia. Sã embesa ji ataque abi abi no. Nyebe ũquĩ sí chõ ñimbũcuã icuã nguia ũquĩ. ¹⁷ Sechesecua, a aico jembiirandu jei a. Mbia icuã jembui eã sacua Dios si. Mbia icuã nda jembũrĩ irĩchĩ jê. Jêingoquiatu tuchi quiatu jê. Huee jêingo turãte Dios rese namo hue. ¹⁸ Jesucristo rei nanderesecua tuchi. Jêicua i i tuchi quiatu jê. Jenyeseecua i i tuchi quiatu erese jê. Ae que nanderirõ mbae icuã si ra. Eturã mbeite que eriqui nande je ra. Sã mbia ñee turã mbei quia erĩ. Amén.

PRIMERA CARTA DEL APOSTOL SAN JUAN

Mbia mingosa

¹ Ae siqui quia mbae tiã mose nyii nae, aque tasenei jêje. Ae riqui beite namo co no. Ae cheë ngue urechandu chandu bei quia ra. Uremae mae mbei que equia erese ra. Ureoco oco que equia erese no nda. Jesucristo, i equia ee. Dios cheë, i abe equia ee. Mbia mingosa, i abe equia ee no. ² Mbia mingosa que siqui ngu rese nyii ra. Tu que nyecua ure je íbii cote ra. Uremae ngue equia erese ra. Uresenei senei equia jêje ã. ³ Ae rese uremae nae, aque uresenei senei nguia jêje ã. Ae urechandu nae, ùquĩ abe uresenei senei nguia jêje ã. Jê abe nda jêingo urerese chã. Sã ureico Dios rese ure no. Jesucristo abe rese. ⁴ Jêya tuchi sacua ño ureico nguia ã mbesa jêje ã.

Dios rei nyaashĩ na

⁵ Jesucristo que urembiirandu Dios rese nyii ra. Ùquĩ si chõ uresaã saã nguia jembirandu sacua ã: Dios rei nyaashĩ na. Itondaru rã jiri jiriã tuchi chõ ae re. ⁶ “Dios resenda rei se” nandechĩ nda nandeico eã mose erui jê. Nande i mose, nandechë ñooño ño nguia ùquĩ. Nande i mose, mbia mbĩrĩ irĩsa chõ nande re. ⁷ Dios rã nandeico mose nyaashĩ, nandeico turã ño nguia nandechiese ùquĩ. Dios rã nandeico mose nyaashĩ, Jesús ruqui nandeicua mbutiã ja quia nandesĩ ã no. ⁸ “Mbae icua asaã eãte rese” nande i mose, nandechimbĩrĩ irĩ ño nguia ùquĩ. Nande i mose, ñee ñooñosa tuchi chõ nande re. ⁹ Nandeicua nandesenei mose Dios je, ae ra eturã nande je. Nandeicua nda embutiã ja nandesĩ ucheë nguire. ¹⁰ “Mbae icua asaã eãte resẽ” nande i mose, “Dios ñee ñooñosa” nandesã ño nguia ee. Nande i mose, Dios cheë iqueã ño nguia nandechiangui re ùquĩ.

2

Jesús ñee turã Dios je nanderĩ

¹ Mbae icua jêsaã eã sacua ño aico nguia co mbesa jêje co, seriirĩ. Jemo mbae icua naa mose, Jesucristo ra ñee turã Dios je aque rĩ. Eicua mbutiã sacua esi. Jesucristo quia rei eturã mbei. ² Jesucristo rĩ ño Dios nandeicua mbutiã nguia nandesĩ. Ae rei nandeicua ndibishoronda. Nande mii icua ndibishoronda eã ño ñene. Mbia ja icua ndibishoronda chõ ñene. ³ Nande Dios cheë mumba eã mose, “Dios aicuate quia co” nande ra nandechiangui re cote. ⁴ “Dios aicuate quia co” i mose emo, Dios cheë mumba mose, ñee ñooño je chõ ùquĩ nde. ⁵ Ae Dios cheë mumba eãte nae, ùquĩ nguiatu nyesecuate nguia Dios rese ùquĩ. ⁶ Ae “aico tuchi Dios rese co” i quia nae, sã ùquĩ siqui tuchi quiatu quia Jesús rã.

Dios cheë yasu

⁷ Dios cheë yasu eã ño ambesa nguia jêje co, Sechsecua. Dios cheë ñiinda sí chõ ambesa mbesa nguia jêje a. Jê echeë mumbayã sacua. Ae jeñandu nyii nae, ùquĩ. ⁸ Jêingo Jesucristo icuate ã cote. Nyebe eyasu raãte eriqui nguia jêje. Jesucristo que nyesecua mbia rese ra. Jê abe jêingo nyesecua jenyiese ã cote. Itondaru eãte riqui jêje ã cote. Nyaashĩ ja chõ jêje cote re. ⁹ Nyaashĩ aico co, i mose emo, nguesenda ucuãya cuãya mose, itondaru bei chõ siqui nguia ùquĩ je aque. ¹⁰ Ae nyesecuate quia nguesenda rese nae, ùquĩ ndiqui nyaashĩ mbei ùquĩ. Ùquĩ nda siqui icua eã. ¹¹ Ae nguesenda ucuãyãte quia nae, ùquĩ ndiqui itondaru bei ùquĩ. Itondaru eresa chati chõ nguia ùquĩ. Nyebe eriqui nguia nguico icuayãte ùquĩ.

¹² Jesucristo rĩ ngue Dios jêicua mbutiã jêsi ra, Seriirĩ. Nyebe aico nguia co mbesa mbesa jêje a. ¹³ Ae siqui beite quia nyii nae, aque jêicuate quia ùquĩ, Mbiaru. Nyebe aico nguia co mbesa jêje a. Jêingo mbia mbĩrĩ irĩsa riquisã quisã ùquĩ, Acuanindu. Nyebe aico nguia co mbesa jêje a. Nanderu jêicuate quia ùquĩ, Echo. Nyebe aico nguia co mbesa jêje a. ¹⁴ Ae siqui beite quia nyii nae, aque jêicuate quia ùquĩ, Mbiaru. Nyebe aico nguia co mbesa jêje a. Jêirãtãte jêingo jeñiangui re ùquĩ,

Acuanindu. Dios cheẽ ngue jẽisi turãte jeñiangui re ra. Jẽingo mbia mbĩrĩ irĩsa riquisã quisãte ũquĩ. Nyebe aico nguiã co mbesa jẽje a.

¹⁵ Jenyesequate chĩ nda mbae ibi jenda ja rese jẽ. Mbae ibi jenda ja rese jenyese-cua mose, jenyesequa eãte ra Dios rese. ¹⁶ Ibi jenda icuã ja chõ ñene. Nanderesa mbae icuã oseĩ oseĩ mose, eicuãte ũquĩ. Nanderete abe mbae icuã oseĩ oseĩ mose, eicuãte ũquĩ no. Nandecuasu abe nandesã saã mose, eicuãte ũquĩ no. Ibi jendachõ ño ũquĩ nde. ¹⁷ Mbae icuã nda ua ja ibi jenda. Ae mbia choseĩ choseĩ quia ibi jenda nae, ũquĩ abe ra ua no. Ae Dios cheẽ mumba eãte quia nae, ũquĩ nguia ra siqui bei.

Cristo ucuãyãsa

¹⁸ Achite mbae ñi ua ja a, Seriiĩ. Cristo ucuãyãsa ra tu mbia mbĩrĩ irĩ, i que jeñandu nyii, ngaẽ ngaẽte que cote ra. Nyebe ureico nguiã ñee, “mbae ra ua ja cote” i. ¹⁹ Cristo ucuãyãsa tubiriãte riqui ã. Nanderesenda rei que nyii ra. Nanderesenda chooño ño ngue ra. Nanderesenda tuchi mose, eĩ nda hui ãte rei nandesĩ. Hui chõ ngue echoĩ uresi ra. “Eresenda eã ño eriqui re” i sacua mbia. ²⁰ Jẽje quiatu que Cristo Espiritu Turã mondo nguiã. Nyebe jẽingo nguiã mbae icua jate ũquĩ. ²¹ Ae bei, jenye eã ño nguiã ichõĩñosa je ũquĩ. Dios quia ichõĩñosa reã tuchi re. Dios cheẽ jẽicuate quia ũquĩ. Nyebe aico nguiã ã mbesa mbesa jẽaquiату je a. Eaquiатуã je eã aico nguiã ã mbesa mbesa a. ²² ¿Aba chõ ichõĩñosa chã? “Dios chimondo eã ndei Jesús” ae i quia nae, ũquĩ ño ñene. Ae siqui sereãte quia Paba rui nae, Jesús abe rui nae, Cristo ucuãyãsa chõ ũquĩ nde. ²³ Ae siqui sereãte quia Dios riirĩ ndui nae, Dios abe rui eriqui ãte ũquĩ. Ae Jesús isi turã nguia nae, eru abe eisi turã ño nguiã no. ²⁴ Ae rese jẽingo jirandu beite nyii nae, ũquĩ ndese jẽingo bei. ũquĩ ique tuchi mose jeñiangui re, jẽingo bei ra Dios riirĩ ndese. Eru rese abe no. ²⁵ Taemingo bei, i que nande je ra.

²⁶ Ae jembĩrĩ irĩ serĩte quia nae, ũquĩ ñi ño aico nguiã ã mbesa mbesa jẽje. Jembĩ-irandu sacua. ²⁷ “¿Aba quiatu ra nandembaaquiату quiatu re?” jenye aroneate quia

ũquĩ. Espiritu Turã ndiqui tuchi jeñiangui re jembaaquiату quiatu ũquĩ. Jesucristo que emondo jẽje ra. Ae chõ jembaaquiату quiatu nguiã mbae ja rĩ ũquĩ. Ñee ñooñoa tuchi chõ ñene. Cristo rese jẽ ngo bei, Espiritu Turã ñee nguire.

²⁸ Seriiĩ, jẽingo bei equia erese jẽ. Nandesiquicheã nda esi eru mose chã. Nandeireĩ ngũĩã nda eru mose no ña. ²⁹ Jesucristo quia rei eturã tuchi. Mbae raã turã ja bei. Ae mbae saã turã mbei quia nae, eririĩ ño ũquĩ nde.

3

Seriiĩ, i Dios nande je

¹ Dios que nyesequa tuchite nanderese ra. Seriiĩ i tuchi que nande je ra. Nyebe mbia Dios quiatoã ndiqui nandeicua eãte ã. Dios abe icua eãte equia ã. ² Dios riirĩ ndei nande, Sechesequa. Dios ra nandembu-turã tuchi core. ũquĩ nandeicua eãte raque quia ã. Jesucristo tu mose, nandemae tuchi ra erese cote. Erã si ra nandeico tuchi cote. ³ “Jesucristo ra tu sembuturã” ae i icuate quia uchiangui re nae, ũquĩ ndiqui siqui turã tuchi ũquĩ. Jesucristo rã sí.

⁴ Mbae icuã naa naasa rei Dios cheẽ mumbasa. Eicuãte Dios cheẽ mumba. ⁵ Jesucristo que tu mano nandeicua mbutiã nandesĩ ra. Mbae icuã ngue esaã jiri jiriã tuchi quia ra. ũquĩ jẽicuate quia ã. ⁶ Ae siqui quia Jesucristo rese nae, ũquĩ nda mbae icuã mo saã eã. Ae siqui quia mbae icuã ndese, ũquĩ nguia eicua eãte nguiã. ⁷ Seriiĩ, emo nda jembĩrĩ irĩchĩ ñee ñooño jẽje jẽ. Ae mbae turã saã saã nguia, eturã ño ũquĩ nde. Jesucristo rã sí chõ ũquĩ nde. ⁸ Ae mbae icuã saã saã nguia, diablo rimba chõ ũquĩ nde. Diablo riqui mbae icuã naa naa mbei co. Cose ndare bei. Diablo chiao mbuquiachã sacua ño ngue Dios riirĩ ndu ra. ⁹ Nande Dios riirĩ mose, mbae icuã nandesã aroneate. Dios quiatu ngue nguico mee nguiã nande je. Nyebe nandeico nguiã mbae icuã naa aroneate ã. Eriirĩte quia nande re. ¹⁰ Ae Dios riirĩ nae, ae Dios riirĩã no nae, ũquĩ abe aba chĩcuate. Emo nyesequa eã mose ngõngue rese, diablo riirĩ

ño ũquĩ nde. Emo mbae turã naa naa eã mose, diablo ririĩ ño ũquĩ no nde.

Nandechesecua chõ nguia nandechiese

¹¹ Cose ndare bei que jẽingo ã andu ra: nandechesecua bei chõ nguia nandechiese. ¹² Caín na nda jẽingochĩ jẽ. Diabolo resenda chõ ae re. Nyebe ngõngue iquia nguia. ¿Mbaerã ño ngõngue iquia chã? Echisaã saã icuãte quiatu ngue eriqui nguia. Enongue chisaã nguiatu ngue eturãte riqui nguia. ¹³ Jesús quiatoã jẽucuaã mose, jenyuruirate chĩ nda mae erese jẽ. ¹⁴ Nanderaaque rã eã ño nandeco nguia ã cote. Dios nandereco mingo tuchi quia co cote. Nandenongue rese nandeco nyesecua ã cote. Nyebe nandeco nguia “nanderaaque rã eã ño nandeco nguia ã cote,” i. Ae nyesecua eãte quia ngõngue rese, eraaque rã mbei tuchi chõ ũquĩ ndiqui nguia ũquĩ. ¹⁵ Emo ngõngue ucuãã mose, mbia iquiasa rã tuchi chõ ũquĩ nde. Dios ra aba iquiasa mingo bei eã. ¹⁶ Jesús que mano nande je ra. Nyebe nandeco nguia “Jesús riqui nyesecuate nanderese co” i. Eĩ nande quiatu quia nyesecua nandenongue rese. Nandeteã teã eã ño mano sacua nandenongue riĩ. ¹⁷ Nandequeteã tuchi aroneate nandembae rese mbaecha reã mo je. Emo ia eã eã mose mbaecha reã mo ndese, ¿mañi ño nda equia nyesecua Dios rese uchiangui re? ¹⁸ “Aico nyesecuate mbia rese co” nande chooñochĩ nda equia jẽ. Mbae turã quiatu nandesaã saã tuchi quia ee.

Nandereĩ ireĩ eãte equia ñee Dios je ã

¹⁹ Nandechesecua mose mbia rese, Dios resendate quia nande re. Nandechiã ngoi turãte. ²⁰ Nandechiangui renda nandemundua ndua mose nandecuã ndese, Dios quia rei equirãcuã tuchi ũquĩ si. Ae quia mbae icua jate nguia. ²¹ Nandechiangui renda nandemundua eã mose nandecuã mo ndese, nandereĩ ireĩ eãte quia ñee Dios je ã. ²² “Mbae mo embu seje” nande mose Dios je, mondo ra nande je. Echeẽ nguia nandemumbayãte nguia ã. Nyebe ra emondo nande je. ²³ A ndei Dios cheẽ ã, nande emumbayã sacua ã: “Serucucha jẽicua Jesucristo jẽ. Jenyesequa chõ

jenyese Jesucristo cheẽ nguire jẽ”, i Dios quia nande je co. ²⁴ Nande echeẽ mumbayã mose, nandeco beite quia erese ã. Ae abe riqui beite nanderese co. Espiritu Turã Dios mondo quia nande je nae, aque chõ nandembiirandu nguia ũquĩ ndese. —Dios riqui beite jeñiangui re co, i Espiritu Turã nguia nande je co.

4

Eĩ nande ra Dios quiato icua; Dios quiatoã abe icua

¹ —Aico Dios cheẽ nenei nenei co, i ja jate raque mbia quia ã. Ñee ñooñote quiatu nguia ã. ũquĩ ñee nda jẽisi chooñochĩ nguia jẽ. —¿Ma Dios cheẽ nenei neneisa tuchi mnde? jenyete tuchi rã eicua nyii. ² “Jesucristo que tu ibate si mbiarã nda” i mose ũquĩ, Espiritu Turã ndiqui erese ũquĩ cote. Eĩ jenyete ra eicua. ³ “Jesucristo que tu mbiarã nda” i eã mose, Espiritu Turã siqui eã tuchi chõ nguia erese. Cristo ucuããsa chõ ũquĩ nde. Se rei Cristo, ichõiño ño nguia ã. Cristo ucuããsa ra tu, i jeñandu quia nyii nae, aque riqui a cote. ⁴ Dios resenda rei jẽ, Seririĩ. Ae siqui jeñiangui re co nae, ae quia rei equirãcuã tuchi ibi jenda si. Ae Dios cheẽ senei ñooño nguia nae, jẽ quiatu que jẽquirãcuã tuchi ũquĩ si ra. ⁵ Dios quiatoã ño ũquĩ nde. Ibi jendachõ ño ũquĩ nde. Ibi jendachõ ni ño eriqui nguia ñee mbia je. Mbia ibi jenda achõ ño echeẽ ñandu nguia. ⁶ Nande quiatu Dios resenda tuchi re. Ae Dios icua quia nae, ũquĩ ndiqui nandechẽ andu ũquĩ. Ae Dios icua eãte quia nae, ũquĩ nguiatu nandechẽ andu sereãte nguia ũquĩ. Eĩ nande ra Dios quiato icua. Dios quiatoã abe icua.

Dios nyesecua tuchi mbia rese

⁷ Sechesecua, nandechesecua ja chõ nandechiese jẽ. Dios chõ nandembuchesequa nguia nandechiese. Nandechesecua mose nandechiese, Dios ririĩ ño nande re. ũquĩ mose chõ nandeco nguia Dios icua ã. ⁸ Nandechesecua eã mose nandechiese, ã nguia nandeco nguia Dios icua eãte ã. Dios quia siqui nguia nyesecuate nanderese co. ⁹ Dios que nguiirĩ mĩ mbu íbii ra. Nandemingo bei tuchi sacua

eriĩ. Nyebe nandeico nguiã “Dios riqui nyesequate nanderese co” i. ¹⁰ Dios ae nyesequa aquiatute. Nande rane nguia nandehesecua eãte nguiã erese. Ae rane nguiatu ngue nyesequa nguiã nanderese. Nyebe nguiirĩ mondo nguiã nandeicua ndiquicharõ sacua. ¹¹ Sechesecua, Dios nyesequa tuchite quia nanderese co resẽ. Nyebe nande abe quiatu nandehesecua nandehiese. ¹² Nandehesecua mose nandehiese, Dios riqui tuchi nandehiangui re co. Dios riqui nandembuchesecua tuchi nandehiese co. Aba mo mae eã ndaque erese.

¹³ ã nandeico tuchi Dios rese ã. Ae abe siqui tuchi quia nandehiangui re co. Espiritu Turã ngue Dios mondo nande je, ae chõ nandembiirandu nguiã ũquĩ ndese co. ¹⁴ Dios que nguiirĩ mondo mbia rirõ ja sacua huicua si ra. Uremae ngue erese ra. ã ureico erenei nenei ja mbia je ã. ¹⁵ “Jesús rei Dio s ririĩ” nande i mose, Dios riqui tuchi nandehiangui re co. ũquĩ mose nande abe nandeico tuchi erese ã. ¹⁶ Dios riqui nyesequa tuchite nanderese co. ũquĩ nandeicua tuchi quia ã cote. Nandehesecua bei mose Dios rese, ã nandeico tuchi erese ã. Ae abe riqui tuchi nandehiangui re co. ¹⁷ Nandeico mose Dios rese, ae riqui nandembuchesecua uchiese co. Nandehesecua tuchi mose erese, nandeico siquicheãte esi ã. Nandesiquiche ãte ra esi mbia icua mbasi mose. Nandembasi ãte ra mbia chabe. Jesucristo raãte quiatu nandeico nguiã nande ã. ¹⁸ Nandesiquiche mose Dios si, nandehesecua tuchi ãte quiatu nguiã erese nandehiangui re ã. Nandehesecua tuchi mose erese, nandesiquicheã nda esi. Nandesiquiche mose Dios si, nandesiquiche chõ nda nandembasi. ¹⁹ Dios rane ngue nyesequa nanderese nyii ra. Nyebe nande abe nandeico nguiã nyesequa erese ã cote. ²⁰ “Achesecua quia Dios rese co” i mose emo, ngõngue ucuãyã mose, ñee ñooño je chõ ũquĩ nde. Nandehesecua eã mose nandenongue rese, Dios abe rese chõ nandeico nguiã nyesequa eã no. Dios rese quia nandeico nguiã mae aroneate. ²¹ ã i que ñee nande je ra: Ae nyesequa quia Dios rese nae, sã nyesequa ngõngue

abe rese.

5

Jesús quiato “qui jẽ” i mbae icua je

¹ “Dios chimondo rei Jesús” nande i mose, Dios ririĩ ño nande re. Emo ndese nandehesecua mose, eriirĩ abe rese ra nandehesecua. ² Nandehesecua mose Dios rese, echeẽ nandemumba eã mose, Dios ririĩ ja rese abe chõ nandeico nguiã nyesequa ã. ³ Dios rese nandehesecua mose, echeẽ nandembayãte quia ã. Echeẽ mbaranguiatuã eãte riqui nande je co. ⁴ Dios ririĩ mose nande, ibi jenda icua nandesiquisã quisã ño nguiã nandehesi ã. Nandeico Jesucristo icuate ã. Nyebe nandeico nguiã “qui jẽ” i mbae icua ibi jenda je. ⁵ Jesús icuasa achõ nda “qui jẽ” i mbae icua ibi jenda je. —Dios chimondo rei Jesús, i je ra “qui jẽ” i ibi jenda icua je no.

Dios siqui ñee mbei Jesús quiato chianguire

⁶ Jesucristo que tu íbii ra. I je que Juan bautizar i ee ra. Eruqui que uchẽ emano mose ra. ũquĩ Espiritu Turã senei senei nguia nande je ã. Ae ñee ñooño eãte quia co. ⁷⁻⁸ Tres riqui nandembiirandu randu Jesús rii ã. Espiritu Turã nane. I abe no. Jesús ruqui abe no. ũquĩ ja riqui nandembiirandu randu Jesús rii ã. Hue rii ja chõ ũquĩ tres riqui nguiã ñee. ⁹ Eĩ sí que Dios ñee Jesús rii nande je ra. “Ae bei”, nande chõ nguia ee. Sã nandeico mbia cheẽ mo isi turã no. Dios cheẽ nguiatu nandehiangui tuchi. ¹⁰ Ae Dios ririĩ icua quia nae, ũquĩ je quia Dios riqui nguiã ñee mbei echianguire Jesús rii. Ae “eno” i ãte quia Dios cheẽ je nae, “ichõiñosa chõ Dios cheẽ nde”, isa chõ ũquĩ nde. “Eno” i ãte quiatu nguiã Dios ñee mose Jesús rii. ¹¹ Dios nandemingo bei quia co. Nguiirĩ nii ño eriqui nguiã nandemingo bei co. ũquĩ nii ño Dios riqui nguiã ñee nande je. ¹² Ae chianguire Dios ririĩ ndiqui nae, ũquĩ nda Dios mingo bei. Ae chianguire eriqui eãte nae, ũquĩ nguiatu ra emingo bei eã.

Juan embesa hui bei

¹³ A aico ã mbesa jẽje a. Dios ririĩ icuasa je a. “Dios ra semingo bei” jeny sacua eicua

jeñiangui re. ¹⁴ Nandesiquicheã nguia ñee Dios je ã. “Mbae mo embu seje”, i mose ee, mondo ra nande je. Nandendua mose ae rã sí, mondo ra nande je. ¹⁵ Nande ache i mose ee ra nandeandu. “Aque embu seje”, i mose ra emondo nande je. Nandeico ùquĩ icuate ã. ¹⁶ Nandemae mose nandenongue rese mbae icuã naa naa mose, nandechẽ Dios je erĩ. Dios ra emingo turã cote. Aque mii mbae icuã ndiqui mbia mbuquiachã icuã mbei co. Emo aque icuã naa mose, “jeñee Dios je erĩ”, ae ãte quia jẽje co. Ûquĩ nda quiachã mbei chõ. ¹⁷ Mbae icuã naa naa mose rei eicuã tuchi. Aque mii mbae icuã nguiarei mbia mbuquiachã mbei mondo tata cuásuu.

¹⁸ Dios riirĩ mose nande, nandeico ãte quia mbae icuã ndese ã. Jesús riqui nanderaarõ mbeite mbae icuã si co. Satanás nandembiiçuã eã sacuã. ¹⁹ Nande rei Dios resenda. Ûquĩ nandeicuate quia ã. Mbia ataque quiarei Satanás ndesenda tuchi. Eicuã ndesenda tuchi. ²⁰ Dios riirĩ ngue tu nandembaaquiatu sacuã Dios rĩ nda. Dios ichõiñosa reã nii. Ichõiñosa reã ño eriirĩ abe no nde. Ae rese nandeico tuchit e quia ã. Aba mingo beisa chõ ae re.

²¹ Seriiĩ, Dios aba reã ndese ra jẽingochĩ. Amén.

SEGUNDA CARTA DEL APOSTOL SAN JUAN

Achesequate jendese, i Juan

¹ Juan ndei se. Ameite se. A aico ã mbesa mbesa ndeje a, Ari. Dios chiirabo tuchi chõ nde re. Nderiirĩ je abe aico ã mbesa mbesa a. Co aico nyesequa tuchi jendese co. Dios rese quia jẽingo tuchite nguiã ùquĩ. Nyebe Dios quiato riqui nguiã nyesequa jate jendese ùquĩ. ² Achesequa tuchite quia jendese co. Dios cheẽ nguiatu siqui beite quia nandechiangui re co.

³ Dios rei nanderu. Jesucristo rei eriirĩ. Sã ùquĩ ndiqui turã jendese. Sã ùquĩ ia eã tuchi riqui jendese. Sã ùquĩ ndiqui jembia bei tuchi. Ùquĩ ndiqui nyesequa tuchi jendese ùquĩ. Ùquĩ ñee ñooño eã tuchi quia ùquĩ.

⁴ Nderiirĩ mo ngue chi tuchi Dios cheẽ ndese seje ra. Seya tuchi que ùquĩ mose ra. ⁵ Nandechesequa ja chõ nguia nandechiese. Dios cheẽ yasu eã ño ã nde. Dios cheẽ ñiinda bei chõ ñene. ⁶ Nandechesequa mose nandechiese, nandeico Dios cheẽ ndui sí ã. —Jenyesequa chõ jenyiese, i quiatu ngue Dios nande je re. Cose ndare bei chõ jẽingo nguiã ùquĩ andu ã.

Aba mbĩrĩ irĩsa

⁷ Mbia tubiriã ndiqui aba mbĩrĩ irĩte ã cote. Jesucristo que tu ibate si mbiarã nda, i sereã nea. Cristo ucuayãsa, i chõ ùquĩ je re. Aba mbĩrĩ irĩsa, i abe que ùquĩ je ra. ⁸ Cochee chõ jẽingo. Mbae jẽsaã iru iru eã sacua Dios je. Ùquĩ mose ra Dios jenyisaã sibishorõ turã tuchi jẽje. ⁹ Emo icha mose Cristo cheẽ si, Dios resenda eã ño ùquĩ nde. Emo siqui bei mose Cristo cheẽ ndese, Dios resenda tuchi chõ ùquĩ nde. Cristo resenda abe no. ¹⁰ Emo mbia mbaaquiato quiato mose Cristo cheẽ ndui si eã, ùquĩ jẽisi turã eã ño nguia jenyuchúaa. Jeñee turã turã aroneate ee. ¹¹ Ae ñee turã nguia ee ùquĩ ñii nae, ae abe chõ eicuã ndiqui nguiã erã sí.

Juan embesa hui bei

¹² Mbae tasenei ja tuchi jẽje, ae rei que se ra. Ambesa oco sereãte mondo jẽje. Tambuchecua tuchi chõ oso ñee jẽje, ae que se ra. Nandeya tuchi sacua nandechiese.

¹³ Dios chiirabo tuchi chõ ndenongue re. Eriirĩ ja saludos mondo quia ndeje aque. Amén.

TERCERA CARTA DEL APOSTOL SAN JUAN

Gayo turâte que eriqui Dios je ra

¹ Juan ndei se. Ameite se. A aico ã mbesa mbesa ndeje a, Gayo. Aico nyesequa tuchite nderese co. ² Sechesequa, acheẽ mbeite quia Dios je nderĩ co. Dios neringo turã sacua. Nderete abe mingo turã sacua no. Sã ereico siqui tuchite Dios rese no. ³ Seya tuchi que jirandu mose nderese ra. Nanderesenda mo ngue ngaẽ sembiirandu nderese ra. —Gayo riqui tuchi Dios rese aque, i que sembiirandu ra. ⁴ —Nderiirĩ nyi tuchi Dios rese pee, i mose seje, sembia beite equia co. Uqui nguiatu sembia tuchi nguiã mbae mo si co.

⁵ Sechesequa, ereico turã tuchi nanderesenda je huee. Ishonda je abe no. Mbae turã eresaã saã mbeite quia ee huee. ⁶ Urechumunua mose que Dios quiato mo urembiirandu ndeturã ndese ra. —Nyesequa tuchi que urerese ra, i que ecuaẽ ñee ure je ra. Mbae turã emondo mondo bei ee, embucuata turã sacua. Eĩ mose ra Dios ia tuchi nderese. ⁷ Jesús rĩ nguiatu uqui ndiqui nguiã ngata mbia mbaaquiato quiatu. Mbae mo nda eisi chooño eã Jesús icuasa reã mo si. ⁸ Nyebe nande chõ mbae nandemee mee ee. Dios cheẽ nenei neneisate quia uqui nde.

Diótfes ucuasu raã ñooño

⁹ Papel jua que ambesa rei mondo jeñumunua ji je ra. Diótfes quiatu seosei chiãte nguiã. —Se mii ño ererecuarã, ite. ¹⁰ Huee seso mose ra Diótfes icua asenei jẽ ja je. Ae icua esaã ure je nae, uqui. Nanderesenda abe isi teã teã nyee. Emo eisi turã sete mose, ñee asi asi chõ nguiã aque abe je no. Mombo chõ nguiã hue si no. ¹¹ Sechesequa, ereicochĩ nda eicua mo ndui. Etura ndui chõ eico. Etura nduinda quiarei Dios resenda. Ae siqui quia eicua ndui, uqui ndei Dios resenda eã.

Etura tuchi, i Demetrio je

¹² Demetrio quiarei etura tuchi. Co eriqui tuchi Dios rese co. Mbia ja abe ñee

turâte quia erĩ uqui. Se abe acheẽ turâte quia erĩ co. Acheẽ ñooño ãte que se quia jẽje resẽ.

Juan embesa hui bei

¹³ Mbae tasenei ja tuchi ndeje, ae rei que se ra. Ambesa oco sereãte mondo ndeje. ¹⁴ Namu jiri ra amae nderese reae. Aque mose ra nandechẽ tuchi nandechue. ¹⁵ Sã Dios nembia turã mbei mingo. Nandequiato a jenda ja saludos mondo quia ndeje aque. Saludar ere sequiato hue jenda ja je.

LA CARTA DEL APOSTOL SAN JUDAS

Judas embesa Dios chiirabo je

¹ Judas rei se. Jesucristo rimba. Jacobo nongue rei se. ã ambesa quia jêje a. Dios chiirabo je. Dios que jêirabo ino icúe umbaerã nda. Dios riqui nyesequa tuchi jendese co. Dios riqui jenderecoquiato bei Jesucristo mbaerã co. ² Sã Dios riqui ndua bei jendese. Sã eriqui jembia bei. Sã eriqui nyesequa bei jendese.

Ae Jesús quiato saã ñooño nguia

³ Jesucristo nandemingo beisa riñ ngue ambesa seese rei nguia jêjê. Ae mbia mbaa tambesa jêje. Jêingo eã nonde erese. Ûquĩ ñee icuã icuã mose Dios cheẽ ñii, echeẽ jêsibishorõ. —Dios cheẽ tuchi chõ ñene, jenye tuchi quiatu quia Dios cheẽ ndiquisã quisã mbia icuã si. Dios quiatu ngue ucheẽ mondo ja nguia nguesenda ja je. ⁴ Dios quiato raã naasa mo ndiqui mbia mbaaquiato icuã icuãte ùquĩ. Ûquĩ siquiã tuchi chõ nguia Dios rese ùquĩ. —Sã Dios riqui aba icuã mbutiã uturã je c o no jê. Nyebe mbae icuã nandesã i i chõ jê, i chõchĩ nguia ùquĩ. Jesucristo cheẽ ndui eã tuchi chõ ùquĩ nde. Nandererequa cheẽ ndui eã. Cosete que Dios ùquĩ mbicúe embasi sacua nda. Mbasi mbasi bei ra equia cote.

⁵ Mbae tasenei na jêje. Jêicuate raque. Taemunduabe erese. Dios ngue judíos sirõ ja rei nguia Egipto si cose. Mbua hue jenda icuã icuã mose ee. Ûquĩnde que siqui sereã Dios rese cote ra. Nyebe Dios eiquia nguia. ⁶ Sã ángeles mo je Dios ñee ndei no jê. “Aa jêingo aa”, sã i rei ee no jê. Sã Dios cheẽ mumba chõ no jê. Sã Dios riqui etarõi nderequa itondaruqui re co no. Embasi mbasi bei sacua cote. ⁷ Sã Sodoma jenda no. Sã Gomorra jenda no. Sã ùquĩ ndurubinda ja no. Siqui chooño eã. Mbae icuã naamba amba. Siqui siqui emo ninisi rese. Eruã mo ndese abe no. Nyebe que Dios ùquĩ mombo tata cuásuu ra. Mbae rasi ra

esaã mbei u huee cote. Mbua mundua ndua sacua ño ùquĩ nde.

⁸ Ae Dios quiato saã saã nguia nae, ùquĩ ndiqui ndua icuã icuã mbei ùquĩ. Nyebe eriqui nguia nguete mbicua ùquĩ. Aba cheẽ mumba. Ñee icuã ángeles ibatenda abe riñ no. ⁹ Sã Miguel ángel rerequa no. Sã ñee asi asi nyue diablo rese no. Moisés rete riñ. —Mbae icuã tasaã ndeje, i eã ngue diablo je ra. —Dios quiatu ra mbae rasi saanguquia ndeje, i chõ ngue ñee diablo je ra. ¹⁰ Ae Dios quiato saã saã nguia nae, ùquĩ ndiqui ñee ñooño mbae uchicua yã ñii ã. Ae eicuate quia mbae nae, ùquĩ ndese siqui turã eã. Siqui chooño eã ùquĩ ndese. Nyebe ra Dios embasi tuchi cote. Quiaa riinda quia mbae icua jiri nguia ùquĩ si. ¹¹ Aba mbua eã tuchi chõ ùquĩ nde. Caín na tuchi chõ eriqui nguia mbae icuã naa naa ùquĩ. Balaam abe rã si chõ eriqui nguia icha icha Dios si ùquĩ. Mbae isiquia achõ ndese siqui sacua. Aba cheẽ mumba mumba bei chõ nguia Coré rã ùquĩ. Nyebe ra Dios mbae rasi saanguquia ee Coré rã si. ¹² Ae Jesús quiato saã saã nguia nae, aba ireingua tuchi chõ ùquĩ nde. Jeñumunua nua mose quiaru sacua nyese, ùquĩ ndiqui quiaru chooño ño ùquĩ. Mbae abe mbei chooño. Ico chooñoa abe mbua mo je. Mbua reaquiatusa mo na eã. Nguete mii ño ùquĩ teaquiato nguia ùquĩ. Sã ibei rondei riqui raque pã i mose no. Sã eriqui nyaaquiã no jê. Sã quiririã ndiqui ibei rondei rerao no jê. Ûquĩ na ño Dios quiato raã naasa riqui nguia ã. Mbae iabae je rã abe chõ eriqui nguia ã. Ira shi rã abe no. Ira riqui ji rã abe no. ¹³ Ama ndebera rã abe chõ ùquĩ ndiqui nguia ùquĩ. Mbua mbaaquiato quiatu mose, i richoi rã ño ùquĩ nde. Sã nyasitata riqui oso ngũenda recha no. Eĩ si chõ ùquĩ nguia ùquĩ. Nyebe ra mbae rasi raã tuchi itondaruqui re.

¹⁴ Enoc abe que ñee ùquĩ icuã ñii nda. Adán ndiirĩ nducucha rei ae. Eĩ ngue ñee nda: “Dios ra tu ngũimba tubiriã ndese. ¹⁵ Mbua icuã mbasi ja ra eu. Ae icuã mbua saã saã nguia nae, ùquĩ ndese ra mae ja. ‘Mbae icuã asaã áte resê’, i aroneate ra ùquĩ cote. Ae ñee icuã nguia Dios riñ nae, Dios

ra echeẽ icuã senei a e sí je cote. ‘Eĩ ere que equia ñee icuã serĩ nda’, i ra Dios ee. Echisaã icuã tuchi chõ ãquĩ nde”, i que Enoc ñee cose ra. ¹⁶ Echiichati tuchi chõ ãquĩ nde. Ñee icuã mbei equia emo niĩ ãquĩ. Ae rese eriqui sete nae, ãquĩ miĩ ndese chõ eriqui nguiã ndua ãquĩ. Ucuasu raã ñooño. Uchuru mondo chooño. Ñee turã abareã nea emo je. Mbiĩrĩ irĩ ño nguiã ñee turã abareã nea ee.

Ã jësaã saã, i Judas Jesús quiato je

¹⁷ Jë nguia rei Jesús quiato tuchi. Jesús chimbaaquiato cheẽ si jëtesarei eã. ã ndei echeẽ ã: ¹⁸ “Mbae ua ja nonde ra mbia iquia iquia Dios cheẽ je. Ae icuã ndese eriqui sete nae, ãquĩ miĩ ndese chõ nda eriqui nguiã ndua”, i que Jesús chimbaaquiato ñee cose ra. ¹⁹ Mbia mbuqueta quetasa tuchi chõ ãquĩ nde. Ae ebite mbae icuã nae, ãquĩ ndese achõ ño eriqui nguiã ndua. Espíritu Turã siqui áte echiangui re. ²⁰ Jë nguia jeñimbirãcuã tuchi quia Dios rui. Dios jëicua tuchi. Jeñee mbei Dios je. Sã Espíritu Turã ndiqui jembucheẽ mbei Dios je. ²¹ Jëingo bei quia Dios rese. † nda jeñee. —Nyesecua tuchi chõ equia nanderese re, i. Jesucristo ia eã tuchi que nanderese ra. Nyebe ra nandemingo bei tu mose. ãquĩ jësaarõ mbei quia. ²² Ae Dios tiisu isu quia nae, ãquĩ jembuti mbuti quiato quia Dios cuti. ²³ Mbia icuã mo abe jemingo Dios rese. Tata si erirõ naanguia jemingo Dios rese. Eicuã tuchi raque. Jëingo tuchi quiato quia Dios rese. ãquĩ icuã uba eã sacuã jendese.

Judas ñee turã Dios rĩ

²⁴ Dios miĩ ño jendeaquiato bei nguiã jembucha eã sacuã. Dios miĩ ño jeñiangui renda icuã mbuchicuabo nguiã jemingo sacuã uchiese. Dios miĩ ño jembia bei nguiã no. ²⁵ Dios miĩ ño mbae icua ja nguiã. Dios miĩ ño nandemingo bei nguiã Jesucristo rĩ no. Ae je ra mbia ñee turã mbei quia. Ae rei eturã tuchi. Ae rei ererecua tuchi. Ae rei equirãcuã tuchi. Eĩ mbei chõ ae re. Amén.

APOCALIPSIS O REVELACIÓN A SAN JUAN

Jesucristo mbae mbuchecua

¹ Juan ño se re. Mbae tasenei jêje. Ae ra nyecua namo nae, ùquĩ tasenei jêje. Dios rane ngue embuchecua Jesucristo je ra. Jesucristo que ángel mbu sembiirandu sacua ere se cote ra. Se jembiirandu sacua ere se cote. ² Nyebe aico nguiã Dios cheẽ mbuchecua checua jêje co. Ae Jesucristo senei senei nguia seje nae, ùquĩ ño asenei senei nguiã jêje co. Ae rese semumae nae, ùquĩ abe chõ asenei senei nguiã jêje co. ³ Ae ra mae mae nguia sechimbesa rese nae, Dios turã tuchi ra eriqui ùquĩ je. Ae ra nyiisaquia turã sechimbesa rese nae, Dios turã tuchi ra eriqui ùquĩ je no. Achite secheẽ ñi ique a cote.

Juan ucheẽ mbesa mondo siete iglesias je

⁴ Se rei Juan. Jê siete iglesias Asia jenda je aico ã mbesa a. Sã Dios riqui uturã ndeacuquia cuquia jêje. Sã Dios riqui jembia bei mingo. Ae chõ siqui bei nguiã co. Ae siqui beite quia nyii no. Ae ra tu emo mose no. Sã Espiritu Turã abe riqui uturã ndeacuquia cuquia jêje. Ae chõ siqui nguiã mangue choñoa ja co. Mbae raã naa Dios je. ⁵ Sã Jesucristo abe uturã mee jêje. Ae que nandembiirandu turã tuchi Dios rese ra. Ae rane ngue quera si manonde ra. Ae quia rei equirãcuã tuchi mbia rerecua mo si. Ae riqui nyesequa tuchite nanderese co. Ae que nandembui nandecuã si nguqui je ra. ⁶ Ae que nandemingo bei ngu res e erimbarã nda. Nande mbae raã naa sacua Dios je. Sã mbia riqui ñee turã turã mbei Jesucristo je. Ae ra ererecua bei. Amén. ⁷ Jesucristo ra tu ibei si. Mbua ra mae ja tuchi equichi rese. Mangue jenda choñoa tuchi ra mae ja erese. Ae Jesús iquia nyii nae, ùquĩ abe ra mae erese no. Mbua ra siquichete nyeseo mae mose erese. Ae bei. Amén.

⁸ —Co aico beite querabe co. Mbae eã mose que aico se rane nyii ra. Mbae ua ja mose abe ra aico bei querabe no, i que Dios ra. Equirãcuã mbeite riqui co. Ae chõ siqui

bei nguiã co. Ae siqui beite quia nyii. Ae ra tu sí emo mose.

Juan mae Jesús rese cuu

⁹ Se rei Juan. Jendesenda chõ se re. Nandeico ñimbirãcuã jate mbia icuã icuã mose nande je ã. Jesucristo riĩ. Ae sí chõ nandembiirãcuã nguiã co. Ae sí chõ nandererecua ja riqui nguiã co no. Ama ndisha joõ ngue mbia sereru aa ra. Aa semingo ishho mbia si a. Se Dios cheẽ nenei nenei eã sacua. Mbua mbiirandu eã sacua Jesucristo rese. Patmos, i que a ejoõ acua je ra. ¹⁰ Aa sereco mose que Espiritu Turã mbae reacuquia seje cuu ra. Domingo mo mose. Emo ngue ñeemombo seje sequite quti cuu ra. Echeẽ ngue serasate ra. ¹¹ —Se ae que aico bei mbae eã mose nyii resẽ. Mbae ua ja mose abe ra aico bei no, i que seje ra. —Ae ra eretea cuu nae, ùquĩ embesa papel rese. Ndechimbesa emondo rã siete iglesias Asia jenda je. Efeso, Esmirna, Pérgamo, Tiatira, Sardis, Filadelfia, Laodicea. Ùquĩ jenda ja je ndechimbesa emondo, i que ñee seje cuu ra.

¹² —¿Aba ñee nguia seje re? ae que uba mae nda. Siete candeleros oro ao ji rese que amae nda. ¹³ Ùquĩ ite re que mbia raanguia mo ñi juã nda. Dios riiri ño eriqui reaẽ. Huirao oco que ecunua nda. Eichuã ati tuchi que eirao ra. Oro ao ji chõ ngue eishia cuasa ra. ¹⁴ Eashĩ tuchi que ra. Tata rendi rã tuchi que eresa ra. ¹⁵ Ei nininyate que ra. Bronce rã. Ama ndieu rã ño ngue echeẽ nda. ¹⁶ Nyasitata siete que equereco oo ra. Uquiatocuti que ererequia ra. Espada que equereco uchúruu ra. Erimbe tuchi que ra. Erimbe chobei que ra. Eruba nininya tuchi que ra. Sã tenda nininyate riqui nandeite re mose no.

¹⁷ Semae mose erese que sesiquiche tuchi ra. Mbua raaque rã ngue aso ngoi ejii ra. Oco que serese oo uquiatocutinda je ra. Ñee ngue seje ra. —Eresiquichechĩ nguiã sesi. Ae siqui beite quia querabe nae, ae chõ se re. ¹⁸ Seraaque rei que nyii ra. Aico bei querab e co cote. Mbua mingo beisa chõ se re. Secheẽ mose ra mbua mano. Secheẽ mose ra mbua riqui bei querabe no. ¹⁹ Ae rese eremae nae, ùquĩ embesa rã. Ae ateacuquia cuquia quia ndeje namo nae,

ũquĩ abe embesa no. Ae ra nyecua nyecua emo mose nae, ũquĩ nonde embesa jei rã. ²⁰ Siete candeleros rese que eremae namo, siete iglesias rã ño ũquĩ nde. Siete nyasitata rese que eremae séoo, siete iglesias rerecua rã ño ũquĩ no nde. Jesús quiato rerecua rã ño ũquĩ nde, i que ñee seje ra.

2

Cristo ucheẽ mondo uquiato Efeso jenda je

¹ Jesús que ñeembe seje ra. —Dios quiato rerecua Efeso jenda je ã embesa rã. Ñ embesa rã mondo ee: “Cristo que ñee jêje ra. Ae siete nyasitata quereco oo nae, aque. Ae ngata quia siete candelero ite rĩ nae, aque sí chõ ñee nguiã jêje aque. ² Ñe ngue Cristo ñee jêje ra: ‘Jenyisaã turã aicuate quia co. Ñ jêingo quiei quiei tuchite seje ã. Jeñimbirãcuã tuchite quia mbae icuã si ã. Ñ jêingo jiri jiriãte mbae icuã ndese ã. Ae sequiatio rerecua saã ñooño nguia nae, jê ngue ũquĩ jêisiã nda. “Ma Jesús quiatote”, jenyete turã tuchi que ra. “Ichõiñosa chõ ñene” jenyete chõ ngue erĩ nda. ³ Jeñimbirãcuã turãte que equia ra. Mbae rasi que jêsaã nguia serĩ nda. Jêquiei quiei tuchite que seje ra. Jêhui eã mbeite equia sesi ã. Ñquĩ jêsaã turã jate rei nguiã ã. ⁴ Ñ nguiatu sembia eãte nguiã ã. Jenyese-cua eã jirichĩ equia serese jê nguiatu ã cote. Seicua ramo mose que jêote serese nyii. Jenyesequate que equia serese nyii. Eĩ jenyete eã ñochĩ equia ã cote. ⁵ Jendua rã ũquĩ ndese ae. Jenyesequabe jiri serese ae. Jemba eã mose serese, jaembutiã nda u. Sequiatio eã nda jê cote, jemba eã mose serese. ⁶ Ñ abe sembiante quia jendese ã. Ae siqui quia Nicolás rese nae, ũquĩ nyisaã jêucuyãtequia ũquĩ. Se abe aucuyãte quia co no. Ñquĩ nyisaã icuãte riqui ũquĩ. ⁷ Jêisa mose, Espíritu Turã ñee jeñandu rã. Ae Espíritu Turã ndiqui ñee iglesias je nae, ũquĩ jeñandu rã: Ae “qui jê” i beite quia Satanás quirãcuã je nae, ũquĩ nda amingo turã mbeite Dios rese’, i que Cristo jêje ra”, ere chõ embesa mondo sequiatio Efeso jenda je.

Cristo ucheẽ mondo uquiato Esmirna jenda je

⁸ Dios quiato rerecua Esmirna jenda je ã embesa rã. Ñ embesa rã mondo ee: “Cristo que ñee jêje ra. Ae rane ño ngue siqui bei mbae eã mose nyii ra. Mbae ua ja mose abe ra eriqui bei no. Ae que mano ndei nyii ra. Manonde eriqui beit e co no. Aque sí chõ ñee nguiã jêje co. ⁹ Ñe ngue Cristo ñee jêje ra: ‘Jenyisaã turã aicuate quia co. Mbae icuã icuãte riqui jêje serĩ ũquĩ. Mbaecha reãte jêingo ũquĩ. Dios quiatu siqui tuchite nguiã jendese co. Ae Dios chiirabo saã ñooño nguia nae, ũquĩ ndiqui ñee icuã mbeite jeni ũquĩ. Satanás chiirabochõ ño ũquĩ nde. ¹⁰ Ae ra jêsaã saã mbae rasi nae, ũquĩ mo si ra jêsiquichechĩ jê. Satanás nda jemo tarõ mi. “Ma nyao Dios si”, i sacua ño ũquĩ nde. Diez días ra jêingo mbae rasi raã naa. Ñquĩ mose, jêingo bei Dios rese. Mbae ra jêiquia serĩ. Ñquĩ mose nda jaemingo bei Dios rese cote chã. ¹¹ Jêisa mose, Espíritu Turã ñee jeñandu rã. Ae Espíritu Turã ndiqui ñee iglesias je nae, ũquĩ jeñandu rã: Ae “qui jê” i beite quia Satanás quirãcuã je nae, ũquĩ nda Dios mondo eã tata cuásuu’, i que Cristo jêje ra”, ere chõ embesa mondo sequiatio Esmirna jenda je.

Cristo ucheẽ mondo uquiato Pérgamo jenda je

¹² Dios quiato rerecua Pérgamo jenda je ã embesa rã. Ñ embesa rã mondo ee: “Cristo que ñee jêje ra. Ae espada rimbe chobei quereco nae, aque sí chõ ñee nguiã jêje co. ¹³ Ñe ngue Cristo ñee jêje ra: ‘Sucha tubiriã jendecua aicuate quia co. Mbae hue jenda siqui tuchite quia Satanás ndese ũquĩ. Jê ae chõ jêingo nguiã serese ũquĩ. Jêhui eãte equia sesi ũquĩ. Mbae icuã sequiatio iquia raque huee jendécuaa. Antipas, i rei ngue aque sequiatio je re. ¹⁴ Ñ nguiatu sembia eãte nguiã ã. Balaam na tuchi chõ jemo jemo ndiqui nguiã ũquĩ. Balaam nguiarei Balac mbaaquiato icuã icuã nyii. Balac Israel jenda mbaicua icuã nonde. Nyebe Israel jenda riqui nguiã siqui tuchi cuña icuã ndese. Dios abareã ndese abe no. Jemo abe chõ mbae jembicua icuã nguiã

ũquĩ. ¹⁵ Ae siqui quia Nicolás rese nae, ũquĩ mo siqui chõchĩ nguiã jendese ũquĩ. Ũquĩ ñee aucuãyã tuchi quia co. ¹⁶ Jendua si rá jëicuã ndese. Nicolás resenda jemombo chõ. Jemombo eã mose ra achu icuãte ee. Co espada areco sechúruu co nae, aque ra areco reco tuchi erese. ¹⁷ Jëisa mose, Espíritu Turã ñee jeñandu rá. Ae Espíritu Turã ndiqui ñee iglesias je nae, ũquĩ jeñandu rá: Ae “qui jë” i beite quia Satanás quirãcuã je nae, ũquĩ nda amingo tuchi Dios cheë ndese. Dios cheë nda ũquĩ mingo bei. Ũquĩ je ra sitashĩ ñetë mo amee. Sita ñetë ndese ra nombre yasu ambesa mii. Eme sacua ee. Emo nda sechimbesa icuayãte nombre yasu. Ae je ra amee, ũquĩ achõ nda eicua’, i que Cristo jëje ra”, ere chõ embesa mondo sequiato Pérgamo jenda je.

Cristo ucheë mondo uquiato Tiatira jenda je

¹⁸ Dios quiato rerecua Tiatira jenda je ã embesa rá. ã embesa rá mondo ee: “Dios rucucha que ñee jëje ra. Ae resa tata rendi saãte quia nae, aque. Ae i nininyate eriqui bronze rá nae, aque sí chõ ñee nguiã jëje co. ¹⁹ ã ngue Cristo ñee jëje ra: ‘Jenyisaã turã aicuate quia co. Jenyesequate quia mbia rese ũquĩ. Mbae jësaã saã turãte quia Dios je ũquĩ. Ũquĩ jëingo Dios icua tuchite ũquĩ. Jeñimbirãcuã turãte equia mbae icuã si ũquĩ no. Jenyisaã turã tuchite riqui cose ndare si ũquĩ. ²⁰ ã nguiatu sembia eãte nguiã ã. Jezabel naanguia siqui chõchĩ nguiã jendese ũquĩ. ¿Mbaerã aque cuña jëteachõ nde? Emombo rocoĩ jenyesei. Dios cheë esenei senei ñooño ño nguiã aque. Sequiato mbaaquiato icuã icuã ño nguiã aque. Sequiato mingo chooño ño nguiã cuña icuã ndese aque. Sequiato mingo chooño ño nguiã dios aba reã ndese aque no. ²¹ Jezabel naanguia que atiisu isu chõ nyii ra. “Sã ndua sí huicua ndese. Sã eriqui chooñoa mbia rese”, ae rei que se nyii ra. Hui eã mbei chõ equia ũquĩ si aque re. ²² Nyebe ra ambasi tuchi cote. Ae siqui siqui quia erese nae, ũquĩ abe ra mbae rasi saã tuchi cote, ndua si eã mose huicua ndese. ²³ Ae siqui Jezabel icuã ndui nae,

ũquĩ abe ra aiquia. Ũquĩ mose ra sequiato jirandu ja sequirãcuã ndese. “Jesús mbia chiangui renda icua ja chõ nguiã re. Mbia ndua ndua eicua ja chõ nguiã re”, i ra sequiato serii cote. Jëingo bei mose mbae icuã ndese, se abe ra mbae icuã amee jëje. ²⁴ Ae siqui eã nguiã Jezabel cheë ndui jemo nae, ũquĩ je chõ tacheë cote. Jë nguiatu que jeñimee ãte Satanás je ra. Nyebe ra acheë tuchiã jëje. “Mbae mo ndese ra jëingochĩ jë”, ae eã nda jëje mbae mo nii cote. ²⁵ Ae jëicuate quia serii nae, ũquĩ ndese jëingo bei querabe. Achu chee nda jëje chã. ²⁶⁻²⁷ Sã seru uquirãcuã me e seje no. Ae ra secheë mumbayã mbeite quia nae, ae ra “qui jë” i beite quia Satanás quirãcuã je nae, ũquĩ je ra sequirãcuã amee tuchi. Ũquĩ nda mbia rerecuarã cote. Ũquĩ nda mbia icuã mbasi mbasi tuchi quia cote. Sã emo ñio iquia iquia ira je no. ²⁸ Nyasitata turã na nda aico ũquĩ je. ²⁹ Jëisa mose, Espíritu Turã ñee jeñandu rá. Ae Espíritu Turã ndiqui ñee iglesias je nae, ũquĩ jeñandu rá’, i que Cristo jëje ra”, ere chõ embesa mondo sequiato Tiatira jenda je.

3

Cristo ucheë mondo uquiato Sardis jenda je

¹ Dios quiato rerecua Sardis jenda je ã embesa rá. ã embesa rá mondo ee: “Cristo que ñee jëje ra. Ae siete nyasitata quereco oo nae, aque. Ae rese Espíritu Turã ndiqui nae, aque. ã ngue Cristo ñee jëje ra:

‘Jenyisaã aicuate quia co. Mbia raaque raãte chõ jëingochĩ nguiã ũquĩ. Siqui eã Dios rese. Jëingo arõte raque equia Dios rese mbia je ũquĩ. ² Secheë ndese jenyi-isaquia rá. Jeñimbirãcuã ño nguiã siqui i Dios rese. Jëhui serii serite chõchĩ nguiã Dios si ũquĩ. Jenyisaã ndese aico mae maete co. Jenyisaã saã icuãte riqui Dios je ũquĩ. ³ Jendua jiri mbae rese ae. Ae rese jeñimbaaquiato nae, ũquĩ ndui jëingo tuchi jiri ae. Jëicuã si jëhui tuchi jiri ae. Jë secheë mumba mose, jaembuate ra ngasë jëje. Jendua eã mose ra asochĩ jëje re. Sã mbae mbuquiachãsa riqui aba mbuate no. ⁴ Jemo mii mii mbae icuã saã saã eãte quia

ũquĩ. Ũquĩ ño nda siqui bei serese. Eiraoshĩ nda amee ũquĩ je. Mbae icuã ndese quiatu que eriqui oco oco ãte ra. ⁵ Ae “qui jê” i beite quia Satanás quirãcuã je nae, ũquĩ nda huĩraoshĩ quereco quia serese. Ũquĩ nda siqui bei serese ibate. Ũquĩ mbae nombres ra achusi eã mbei. “Ã ndei sequiatio tuchi ã”, ae ra Paba je. Angeles abe je. ⁶ Jêisa mose, Espíritu Turã ñee jeñandu rã. Ae Espíritu Turã ndiqui ñee iglesias je nae, ũquĩ jeñandu rã’, i que Cristo jêje ra”, ere chõ embesa mondo sequiatio Sardis jenda je.

Cristo ucheẽ mondo uquiato Filadelfia jenda je

⁷ Dios quiato rerecua Filadelfia jenda je ã embesa rã. ã embesa rã mondo ee: “Cristo que ñee jêje ra. Ae ñee ñooño eãte quia querabe nae. Ae mbae icuã saã eã mbeite quia nae. Ae ererecua tuchi riqui David rã si nae. Cristo eiquesa mbuquiata mose, emo ematã aroneate. Cristo ematã mose, emo embuquiata aroneate no. ⁸ ã ngue Cristo ñee jêje ra. ‘Jenyisaã aicuate quia co. Jêquirãcuã miite jêingo raque ũquĩ. Seisi teã eãte que equia ra. Ũquĩ jêingo secheẽ mumbayãte ũquĩ. Nyebe que mbae ambuquiata mi eiquesa rã jêje ra. Jêingo tuchi sacuã serese. Emo nda ematã eã. ⁹ Judíos ñee ñooño je ra amumae turã nyee jendese. Ũquĩ ndiqui Dios chiirabo raã ñooñote ũquĩ. Ũquĩ eriqui tuchite Satanás rese ũquĩ. Ũquĩ nda ñee turã nyee seje jeni. “Dios nyese-cua tuchi chõ nguia ã ndese re. Judíos eã ndaque”, i chee ra jeni. Ngoi turã nyee ra jendese ñee seje. ¹⁰ Jeñimbirãcuã turãte equia secheẽ nguire ũquĩ. Nyebe ra jaendeaquiato turãte serequia. Mbia mangue chooñoa jenda mbae rasi raã ja mose ra jaendeaquiato tuchi serequia. ¹¹ Achu jei ra se. Ae jêicuate quia seriã nae, ũquĩ ndese jêingo bei querabe. f nda emo jembui eã Cristo si. ¹² Ae “qui jê” i beite quia Satanás quirãcuã je nae, ũquĩ nda amingo bei Dios récuã. Sembae marca ra amiã tuchi ũquĩ ndese. “Dios quiato” i tuchi ra mbia quia ũquĩ je. “Dios recua jenda” i tuchi ra mbia quia ũquĩ je no. “Jerusalén yasu”, i chõ nguia Dios recua je ã. Jerusalén

yasu ra nguichi u ibate si. ¹³ Jêisa mose, Espíritu Turã ñee jeñandu rã. Ae Espíritu Turã ndiqui ñee iglesias je nae, ũquĩ jeñandu rã’, i que Cristo jêje ra”, ere chõ embesa mondo sequiatio Filadelfia jenda je.

Cristo ucheẽ mondo uquiato Laodicea jenda je

¹⁴ Dios quiato rerecua Laodicea jenda je ã embesa rã. ã embesa rã mondo ee: “Cristo que ñee jêje ra. Ae ñee ñooño eãte quia querabe nae. Ae rane siqui quia mbae eã mose nyii nae. Ae ucheẽ mbuchebiã mbeite quia nae. ¹⁵ ã ngue Cristo ñee jêje ra: ‘Jenyisaã aicuate quia co. Seya eãte aico jendese co. Jêhui tuchi ãte raque equia sesi ũquĩ. Jêingo tuchi eã ñochĩ equia serese ũquĩ no. Eĩ jenye jenyete chõchĩ equia ũquĩ. I ribebe rã ño jêingochĩ ũquĩ. ¹⁶ Sã emo ndiqui i ribebe mbei aroneate no. Mombo chõ nda uchuru si. Eĩ ae ra jemombo sechuru si no. ¹⁷ “ã ureico tuchite Dios rese ã”, jenye chooño ñochĩ equia ñimbiãrĩ irĩ ũquĩ. Aba mbia eã tuchi chõ jêingo nguia ũquĩ. Mbaecha reã na ño jêingochĩ nguia Dios je ũquĩ. Eresayã na ño jêingochĩ nguia Dios je ũquĩ. Jêirao eã na ño jêingochĩ nguia Dios je ũquĩ no. ¹⁸ Jêingo chõ nguia serese ae. f nda oro turã naanguia amee jêje. f nda mbae amee tuchi jêje. f nda tirushĩ naanguia amee tuchi jêje. f nda jêireĩ nguia te jêirao eã si. f nda Dios cheẽ ambuchecua tuchi jêje. ¹⁹ Ae rese aico nyese-cuate nae, ũquĩ icuã icuã mose chõ aico nguia eiruã nua. Emundua si sacuã mbae turã ndese. Jêicuã si jêhui. Jendua sí Dios rese. ²⁰ Aico jêiquesa mbuu mbuu a. Jemo seandu mose, huĩquesa mbuquiata mose seje, aique ra ee. Aico bei ra erese cote. Aquiaru quiaru ra se quia erese cote. Ũquĩ abe ra quiaru quiaru quia serese cote no. ²¹ Ae “qui jê” i bei quia Satanás quirãcuã je nae, ũquĩ nda siqui bei serese se ererecua tuchi mose. Ũquĩ abe ra amiã mbia rerecuarã. Sã ñi aico “qui jê” i beite Satanás quirãcuã je nyii no. Sã ñi Paba semiã mbia rerecuarã no. ²² Jêisa mose, Espíritu Turã ñee jeñandu rã. Ae Espíritu Turã ndiqui ñee iglesias je nae, ũquĩ jeñandu rã’, i que Cristo

jêje ra”, ere chõ embesa mondo sequiato Laodicea jenda je, i que Cristo ñee seje ra.

4

Mbia ibatenda ñee turã ja Dios rñ

¹ Aquere que amae ibate quti ra. Eiquesa raanguia que nyeequia mñ seje ibei ra. Ae ñeemombo sequite quti serasate nyii nae, aque que ñee si seje cote ra. — Echu rã ibate. Mbae tateacuquia ndeje. Ae ra jeĩ jeĩ mbia je nae, ũquĩ tateacuquia rã ndeje, i que seje ra. ² Aque mose tuchi que Espiritu Turã mbae teacuquia seje cuu ra. Dios rese que amae cuu ra. Huee que eñi ngoi trono tose ibate ra. ³ Enininya tuchi que seje ra. Sita rendi rã jaspe rã. Cornalina na abe no. Ibei asa que chĩ trono mama nda. Ibei asa nininya tuchite que chĩ nda. Esmeralda rã. ⁴ Veinticuatro tronos que chĩ Dios mama nda. Veinticuatro amei ngue chĩ tronos tose ja ja ra. Huĩraoshĩ ngue ecunui ja ja ra. Coronas oro ao ji que chĩchĩ ja eãquĩ ndese ra. ⁵ Ama ngue sieu tuchi Dios mbae trónoo nda. Ama ngue ñee tuchi trónoo nda. Pirirã pirirã i tuchi que equia trónoo nda. Siete tata rendi que chĩ Dios ruba quti ra. ũquĩ ndei Espiritu Turã na ũquĩ. ⁶ Ama ndisa raanguia que chĩ Dios ruba quti no nda. Eibera tuchi que ra. Mbae reco cuatro que chĩ Dios mama nda. Eresa ata atate que ũquĩ nda. Eruba quti que eresa ra. Equite quti abe que eresa no nda. ⁷ Nyacua rã tuchi que ũquĩ mo nda. Ticuasú riirĩ na ngue enongue no nda. Mbia ruba rã ngue enongue no nda. Nguira risha rã ngue enongue no nda. Aque que mbebe quia ra. ⁸ Seis ja ja que ũquĩ jeo ra. Eresa ata ata tuchi que ejeo rese ra. ũquĩ cuatro que ñee turã mbeite quia Dios rñ nda. Isa abe que eriqui ñee turãte Dios rñ nda. Eĩ ngue equia ñe e nda: Ndeturãte. Ndeturãte. Ndequirãcuãte ereico co, Dios.

Co ereico beite co.

Nyii que ereico beite no nda.

Mbae ua ja mose abe ra ereico beite no, i que ũquĩ nguia ñee ñee Dios je ra. ⁹ ũquĩ ndeco cuatro que ñee turã mbeite quia Dios je ra. Ae siqui beite quia co, aque je. ¹⁰ Amei

veinticuatro abe que ngoi ngoi quia ngũĩã ndese ra. Ñee turã turã Dios je. Umbae coronas que echono chono ja Dios jii ra. ¹¹ Eĩ ngue equia ñee ñee Dios je ra: Urererecua turãt e ereico co, Dios. Nyebe ureico nguia ñee turã mbeite ndeje

ã. Mbae que erechao jate nembraerã nda. Erendua turãt e que mbae ao nonde nyii no nda, i que ũquĩ nguia ñee turã turãte Dios je ra.

5

Emo libro equia aronea

¹ Dios que libro quereco quia oo cuu ra. Uquiatocuti que enunui trono tose ra. Libro mbesa ji. Equitera quti abe que embesa ji ra. Siete sellos je que ematã ji ra. ² Angel quirãcuã mo ngue ñee nda. —¿Aba ra sellos ndoso libro equia re? i que ángel ñeemombo ra. ³ Mbia mo ngue sellos ndoso aroneate ra. Ibatenda. Ibi jenda. Ibiqui riinda. ũquĩ mo ngue sellos ndoso aroneate cuu ra. Nyebe mbia riqui nguia mae aroneate libro rese. ⁴ Nyebe que acheseo tuchi cuu ra. Mbia ja libro equia aronea mose. Mbia ja mae aronea mose erese. ⁵ ũquĩ amei mo ngue ñee seje ra. —Erecheseochĩ nguia. Jesucristo ra libro equia. Ae quia equirãcuãte re. Ae quia Dios chiirabo rerecua tuchi re. David riirĩ tuchi chõ ae re. Ae quiatu que mbae rasi saã tuchi mbia icuã ndiquicharõ nda. Ae quia ra sellos ndoso. Ae quia ra libro equia, i que amei ñee seje cuu ra. ⁶ Jesucristo que chĩ huee cuu ra. Oveja iquia ji rã ngue eñi seje huee cuu ra. Siete que erambashĩ nda. Siete que eresa no nda. Siete eresa rei Espiritu Turã. Sã Espiritu Turã mae mbae ja rese no. Jesucristo que chĩ Dios ruba quti ra. Mbae reco cuatro joõ ngue eñi nda. Amei abe joõ ngue eñi no nda. ⁷ Dios que libro mondo Jesucristo oo cote ra. Dios chĩ mose trono tose. ⁸ Jesucristo libro isi mose que ũquĩ mbae cuatro ngoi ngũĩã ndese ejii ra. Amei veinticuatro rese. Arpas que amei quereco reco ja ra. Mbae riru oro ao ji abe no. Incienso resebe. Incienso, i que mbae mbushimbusa oquieĩ mose ra. Dios quiato ñee mose Dios je, eĩ sí chõ incienso ee re.

⁹ Ũquĩ ameĩ ngue iraseĩ raseĩ canto yasu mo je ra. ã ño ngue iraseĩ raseĩ nguiã: Nde e que mbia ndeĩquia ra. Nde que mbia mangue choñoa jenda ereisi Dios mbaerã nda. Mbia cheemo ja ja eriqui nae, ũquĩ abe que ereisi ja Dios mbaerã no nda. Mbia mbuae ja abe no. Nyebe nde mĩ ño libro ereisi arõte nguiã co. Nde mĩ ño sellos erendoso arõte nguiã co. Libro rese mae sacuã. ¹⁰ Nde que uremĩ Dios rimbarã nda. Ure mbae raã naa sacuã Dios je. Mbia ibi jenda rerecuarã nda ureico cote, i que ameĩ iraseĩ raseĩ Jesucristo je ra. ¹¹ Angeles cheẽ ngue achandu cot e ra. Angeles que chi ũquĩ mama tuchi cuu ra. Dios mama. Mbae reco cuatro abe mama. Ameĩ veinticuatro abe mama no. Angeles tubiriã tuchi que ra. Millones y millones tuchi que ángeles ra. ¹² Ũquĩ ngue ñee nyecuate Jesucristo je re: Oveja riirĩ na ño ereico nguiã nde. Mbia que ndeĩquia mbae icuã ndiquicharõ nda. Nyebe mbia riqui nguiã ñee turãte ndeje co cote. Nyebe mbia riqui nguiã ñee turãte nderĩ co cote no. Ndequirãcuã nĩ. Ndeaquiatu rĩ abe no, i que ángeles ñee turã Jesucristo je cuu ra. ¹³ Mbae que ñee turã jate quia Jesucristo rĩ cuu ra. Ibatenda ñee turã ja erĩ. Ibi jenda abe no. Ibiquri rĩnda abe no. Ama ndisha rĩnda abe no. Eĩ ngue ũquĩ nguia ñee turã jate Jesucristo je ra. Dios abe je: Jẽquirãcuã jẽingo beite ã. Mbia rerecua jẽingo beite ã no. Mbae jenyiao ra ñee turã mbeite quia jẽje, i que Dios chiaio quia ñee jate ee cuu ra. ¹⁴ Ae beite, i que mbae reco cuatro ra. Ameĩ veinticuatro abe que ngoi ja ngũĩã ndese ñee turã Dios je ra. Ae ereco siqui beite quia co, aque je.

6

Jesucristo sellos ndoso

¹ Jesucristo que chĩ oveja riirĩ na cuu ra. Ae que sello mo ndoso libro si cote ra. Ae mbae reco cuatro chi nae, ũquĩ mo ngue ñee

cote ra. —Echu, i que ñeemombo ra. Ama ndieu rã ngue echeẽ nda. ² Caballo shĩ mo ndese que amae cote ra. Ae chĩ eátoo nae, nguira mo ngue ecunui oo ra. Corona abe que emo mee ee ra. Oso que guerra raã naa cote ra. Equirãcuãte que eriqui mbia mo si ra.

³ Jesucristo que segundo sello ndoso cote ra. Ae mbae reco cuatro chi nae, ũquĩ mo ngue ñee endoso mose cote ra. —Echu, i que ra. ⁴ Caballo nongue gue usẽ u seje cote ra. Era ireĩ tuchi que aque ra. Ae chĩ eátoo nae, aque je que emo espada cuasu mee nda. Aque que mbia mbũcuã icuã jate nyue ra. Nyebe mbia riqui nguiã nyĩquia iquia.

⁵ Jesucristo que sello nongue ndoso cote ra. Tercer sello. Ae mbae reco cuatro chi nae, ũquĩ mo ngue ñee endoso mose cote ra. —Echu, i que ra. Caballo rondeĩ que usẽ u seje cote ra. Ae chĩ eátoo nae, aque que balanza mo cunui oo ra. Mbae mbuchehasa. ⁶ Emo ngue chĩ ũquĩ mbae reco cuatro ite re ra. Aque que ñee nda: —Mbia chi u ra ua jiri. Un kilo de trigo rei una jornada. Tres kilos quiata a rei una jornada no. Mbae quira quiatu ra ua eã. Vino ndese, i que ra.

⁷ Jesucristo que sello nongue ndoso cote ra. Cuarto sello. Ae mbae reco cuatro chi nae, ũquĩ mo ngue ñee nda: —Echu, i que ra. ⁸ Caballo nongue que usẽ u seje cote ra. Eracho que aque ra. Ae chĩ eátoo nae, ERAAQUE i que aque je ra. Emo ngue oso erui no nda. ERAAQUE TÃSA i que aque je no nda. Ũquĩ ngue mbia ibi jenda mbutiã tuchi la cuarta parte ra. Mbia iquia iquia tuchi que equia guerra je ra. Mbae rasi je. Eriãcuã je. Quiaa rĩnda icuã je abe no.

⁹ Jesucristo que sello nongue ndoso cote ra. Quinto sello. Mbae rese que amae altar qui re cote ra. Mbia chĩquia iquia aingue rese que amae nda. Ae mbia iquia iquia Dios cheẽ nĩ nyii nae, ũquĩ aingue rese que amae nda. Ũquĩ ñimbirãcuã tuchi chõ nguia mbae rasi je Jesucristo rĩ nyii reaẽ. ¹⁰ Ũquĩ ngue tasẽ tasẽ ñee Dios je ra: —Mbae eresaã turã jate quia nde co, Dios. Mbae ja rerecua chõ nde re. ¿Manosete ra urerĩchare erembasi re no, Dios? i que ñee ja Dios je ra. ¹¹ Dios que tirushĩ mee

mee ũquĩ ja je cote ra. Ñee ngue ee cote ra: —Mbarandiri. Mbia icuã nda jêataque abe iquia. Sã jêiquia nyii no. Ũquĩ sacuã jêingo chombe jiri, i que Dios ñee e e ra.

¹² Jesucristo que sello nongue ndoso cote ra. Sexto sello. Ibi que nyere nyere tuchi aque mose cote ra. Tenda que ñimoo tuchi cote ra. Mbae ruqui rã tuchi que nyasi no nda. ¹³ Nyasitata que ngoi ngoi ngaẽ ibii cote ra. Sã ira a riqui uqui quiririã ñimbuqui no. ¹⁴ Ibei abe que ua cote ra. Sã emo ndiqui papel acua acua no. Sita ibate abe que siri siri ja nyesi ra. Ama ndisha joõ abe que echoi siri siri ja ra. ¹⁵ Mbia que ñimi ñimi ja ibicua ye ra. Sita imi ye abe. Mbia rerecua. Mbia rimba abe. Mbaecha abe. Soldados rerecua abe. Mbia que ñimi ñimi jate cuu ra. Esiquichete quia ñene. ¹⁶ Mbia siquiche mose que ñee ñee jate sita ibate je cuu ra: —Jenyu ngoi urearõ ureiquia. † nda Dios mbae rasi saanguquia eã ure je. † nda Jesucristo mbae rasi saanguquia eã ure je no. ¹⁷ Dios riqui mbae rasi raanguquia uquiato eã je co. Aba quia ra ñimbirãcuã ã je, i que mbia quia siquichete cuu ra.

7

Angeles Dios mbae marca m̃i m̃i mbia je

¹ Aquere que cuatro ángeles atea cuu ra. Emo ngue chí juã tenda chuisa quitira. Enongue que tenda sosa quitira no nda. Enongue que sur quitira no nda. Enongue que norte quitira no nda. Ũquĩ ngue quiririã isi tuchi quia ra. † chu eã sacuã. Mangue jenda chooñoa quitinda abe ichu eã sacuã. Ama ndisha quitira abe. † nda quiririã ira rãquiã mo ichu eã tuchi. ² Angel nongue mo ndese abe que amae no nda. Tenda chuisa quitira que eru quia ra. Dios mbae marca que equereco ra. Ñeemombo que ũquĩ ángeles cuatro je ra. ³ —Mbae rasi ra jemondo jeichĩ ibi je jẽ. Ama ndisha abe je. Ira abe je. Dios rimba ruba rese Dios mbae marca urem̃i m̃i na nyii, i que ñeemombo ángeles cuatro je ra. ⁴ Ciento cuarenta y cuatro mil ndese que Dios mbae marca m̃i nda. Judíos chumumbara ja que ra.

⁵ Judá riirĩ ndei doce mil.
Rubén ndiirĩ ndei doce mil.
Gad ndiirĩ ndei doce mil.

⁶ Aser riirĩ ndei doce mil.
Neftalí riirĩ ndei doce mil.
Manasés riirĩ ndei doce mil.
⁷ Simeón ndiirĩ ndei doce mil.
Leví riirĩ ndei doce mil.
Isacar ndiirĩ ndei doce mil.
⁸ Zabulón ndiirĩ ndei doce mil.
José riirĩ ndei doce mil.
Benjamín ndiirĩ ndei doce mil.

Ũquĩ ja rese que ángeles Dios mbae marca m̃i m̃i nda.

Mbia tubiriã iraoshĩ

⁹ Aquere que mbia cuabẽte atea cuu ra. Contar i ja aroneate que ee cuu ra. Ecuabẽte quiatu ngue re. Mbia chumumbarate que ra. Mangue chooñoa jenda abe tubiriãte que ra. Echeẽ ñumumbarate que ra. Dios ruba quitira que ũquĩ chí jate juã nda. Cristo ruba quitira abe no. Eiraoshĩ ja que chí ra. Sindo que equeru ja oo ra. ¹⁰ Ũquĩ ngue tasẽ tasẽte u ñee Dios je ra. Cristo abe je. ã i chõ ngue equia ñee nda:

Nde ae ereico nguiã mbia rirõ eicuã si co.

Nde ereico trono tose mbia rerecuarã co.

Jesucristo rese chõ ereico nguiã mbia rirõ ndirõ eicuã si co,

i que ũquĩ ja ñee Dios je ra. ¹¹ Angeles que ñumbui jate u Dios mama cuu ra. Mbae reco cuatro abe mama. Ae amei yeinticuatro chí nae, ũquĩ abe mama no. Ũquĩ ángeles que ngoi jate ngũiã ndese Dios ruba quitira. Ngũiã ndese que echi ñee turã jate Dio s je ra:

¹² Dios turã tuchite riqui mbia je co.

Sã mbia riqui ñee turã mbei erĩ.

Dios aquiatu tuchite riqui co.

Sã mbia riqui “gracias” i bei ee.

Dios quirãcuã tuchite riqui co,

i jate que ñee turã Dios je ra. ¹³ Ũquĩ amei mo ngue ñee seje cote ra: —¿Aba ã nde?

Ae eiraoshĩ chí a. ¿Ma si ecuaẽ a re no?

i que ñee seje cuu ra. ¹⁴ —Ereicuate nde resẽ, Amei, ae que ee ra. Ae que eicua seje cote ra. —Ã ngue mbae rasi saã tuchi quia resẽ.

Tiru irei ji rã ño ã ñia ndiqui nguiã ã cote.

Jesucristo echiã mbitirõ nguqui je resẽ. ¹⁵ Nyebe eriqui beite nguiã Dios rese ã.

Nyebe eriqui nguiã mbae raã naa mbei Dios je echuchúaa ã.

Dios ra siqui bei erese. Teaquiato bei ra mingo. ¹⁶ Ũquĩ

nda ngũiãcuã irara eã mbei. Huĩsei abe ra

eirara eã no. Tenda abe ra eiro eã. Huiiriei abe ra eucuyã eã cote. ¹⁷ Jesucristo quia ra eteaquiatu bei mingo. Sã oveja raarõsa riqui oveja reaquiutate no. Sã eriqui oveja rerao rao mbiu no. Eĩ si ra Jesucristo ùquĩ ndeaquiatu mingo. Dios ra echeseo mbutiba bei cote, i que amei ñee seje ra.

8

Mbae rei ji shimbu turã ndetashĩ ngasẽ oso Dios je

¹ Jesucristo que sello nongue ndoso libro si cote ra. Séptimo sello. Mbae ibatenda que quiriri tuchi sello ndoso mose ra. Quiriri arete que ra. Media hora chee. ² Siete ángeles chi quia Dios ruba quti nae, ùquĩ ndese que amaembe cuu ra. Emo ngue trompeta mee ja ja ùquĩ je ra. Siete que trompetas ra. ³ Angel mo ngue tu incienso riru mo nderu ra. Oro ao ji. Tiba que uã altar jii ra. Emo ngue incienso tubiriã mondo ee cuu ra. Altar mo ngue chí oro ao ji ra. Aque arõ ngue ángel incienso ñono nda. Dios ruba quti. Ae Dios quiato ñee ñee nguia Dios je nae, ùquĩ ñee ngue ngasẽ nguia Dios je ra. Incienso rei jí shimbu turã ndese. ⁴ Incienso retashĩ ngue nyui oso quia ángel o si ra. Dios quiato cheẽ mbirõ ngue eriqui oso ngasẽ Dios je ra. ⁵ Angel que incienso riru mombisẽ tata reteĩ je ra. Altar jenda je. Ichusẽ ngue ibi quti cuu ra. Ama ngue sieu tuchi cote ra. Pirirã pirirã i tuchi que ra. Ibi abe que nyere cuu no nda.

Angeles trompetas mbucheẽ

⁶ Ae siete ángeles trompetas quereco nae, ùquĩ ngue icoquiatu cote ra. Trompeta mbucheẽ sacua.

⁷ Emo ngue trompeta mbucheẽ cote ra. Iquitã ngue ngoi ngoi tuchi íbii cote ra. Tata abe que ngoi ngoi ra. Ireĩ tuchi que cote ra. Mbae ruqui rã. Ibi tercera parte que oquiei tuchi ra. Ira tercera parte abe que oquiei ra. Mbae ruri abe que oquiei ja no nda.

⁸ Segundo ángel que trompeta mbucheẽ cote no nda. Aque mose tuchi que mbae mo ndu ngoi ama ndisha ye ra. Ecuasu tuchi que ra. Sita ibate rã. Sendi que u ama ndisha ite re ra. Ama ndisha tercera parte ireĩ tuchi que cote ra. Mbae ruqui rã. ⁹ Ama

ndisha rinda tercera parte que mano ja ra. Ae ngata quia ama ndisha rui barcos nae, ùquĩ tercera parte abe que ñimi imi ja no nda.

¹⁰ Tercer ángel que trompeta mbucheẽ cote no nda. Aque mose que nyasitata cuasu mo ndu ngoi íbii ra. Tata rendi rã ngue erendi ra. Ngoi que ama tercera parte ye ra. Eriecua tercera parte ye ja abe que ngoi no nda. I mbiicua tuchi que ra. ¹¹ Etei, i que equia aque nyasitata je ra. Nyasitata que ama tercera parte mbotei tuchi ra. Itei tuchi que cot e ra. Nyeb e mbia riqui nguiã mano mano tuchi iu mose cuu.

¹² Cuarto ángel que trompeta mbucheẽ cote no nda. Aque mose que mbae mo tenda mbuchecuyãte tercera parte ra. Nyasi tercera parte abe. Nyasitata tercera parte abe no. Nyebe mbae checuyã tuchi riqui nguiã mbia je nyaashĩ mose tercera parte. Isa mose abe nyasi mbae tesae eã tercera parte. Nyasitata abe no.

¹³ Nguira risha rese que amae cuu cote ra. Mbebe que equia ibate tuchi searõ nda. Ñeemombo mombo que equia ra: —Aba mbia eã tuchi mbia ibi jenda. Mbae rasi ra esaã tuchi cote. Angeles ataque nyuihuĩ mose. Angeles tres trompetas mbucheẽ mose, mbia ra mbae rasi saã tuchi cote, i que nguira risha ñee nda.

9

¹ Quinto ángel que trompeta mbucheẽ cote no nda. Aque mose que nyasitata mo ngoi u íbii seje cuu ra. Mbia raãte que aque nyasitata ra. Nyasitata que ibicua atiquia jea ra. Abismo, i que hue ibicua je ra. ² Eequia mose que tatashĩ usẽ tuchi ra. Sã tata riqui nyuuta rosot e tetashĩ no. Tatashĩ ngue tenda choote ra. Mbae mbuchecuyã jate que ra. ³ Tatashĩ si que tucu mbuae ngaẽ tuchi usẽ cote ra. Tucu mbuae que ibi mboo ja tuchi nyoĩ manguie chooñoa nda. Mbia i i tuchi que equia ra. Quiraẽ ndasi rã tuchi que eriqui mbia je ra. ⁴ Emo ngue ñee tucu mbuae je ra: —Ira mo nda jẽuchĩ jẽ. Ira ruri j a abe. Mbae ruri ja abe no. Quiata abe no. Mbia Dios quiatoã achõ ño jembasi mbasi quia. Ae Dios mbae marca quereco eã nguia nguba rese nae, ùquĩ. ⁵ Ùquĩ je mbae rasi jẽsaanguquia tuchi

cinco meses. Jēiquia eã ño, i que ñee tucu mbuae je ra. Quiraẽ ndasi rã tuchi que tucu rasi riqui mbia je ra. ⁶ Aque mose ra mbia “nandemano” i tuchi rei nguiã nyue. Mano aroneate rae.

⁷ Caballo rã tuchi que tucu mbuae ra. Sã caballo riqui icoquiato guerra raã naa sacua no. Corona naanguia que siqui tucu mbuae ãquĩ ndese ja ja ra. Oro ao ji ereae. Mbia ruba raãte que tucu mbuae ruba ra. ⁸ Cuña a raãte que ea ra. Nyacuareĩ naate que ereĩ nda. ⁹ Eishia ãtã tuchi que ra. Hierro rã. Mbia eiõ aronea. Guerra ndieu rã tuchi que ebebe mose ra. ¹⁰ Sã quiraẽ ndiqui mbia i ngocoi je no. Eĩ si que equia mbia i i ngocoi je ra. Mbia mbasi mbasi que equia cinco meses ra. ¹¹ Angel icuã mō ngue tucu mbuae rerecua ra. Ae ibicua atiquia jea nae, aque que ererecua ra. Abadón, i que hebreo cheẽ nguia ee ra. Apolión, i que griego cheẽ nguia ee no nda. —Mbia iquiasa, i chõ nguiã embae nombres je.

¹² Tucu mbuae que ua chee cote ra. Mbae rasi ñiinda chõ ùquĩ nde. Mbae rasi nyeremo tasenei jêje cote.

¹³ Sexto ángel que trompeta mbucheẽ cote no nda. Aque mose que emo ñee altar jii Dios mbae ra. Oro ao ji rei altar. ¹⁴ Ñee ngue ángel je ra. Ae trompeta mbucheẽ namo nae, aque je. —Cuatro ángeles embui rã mondo. Aecua jí chí Ama Eufraates nae, ùquĩ embui rã mondo, i que ee ra. ¹⁵ Cuatro ángeles que embui mondo cote ra. Aque mose sacua ngue Dios ùquĩ nderecoquiato ra. Ùquĩ ngue mbia iquia iquia tuchi tercera parte cuu ra. ¹⁶ Soldados tubiriã tuchi que ùquĩ ángeles nimba cuu ra. Doscientos millones tuchi que ra, i que achandu ra. ¹⁷ Caballo átoo que soldados chí ja ra. Eishia riquisã ja ja que mbae ãtã ñi nda. Eishia aosa mbiitã jí que ra. Eireĩ. Erubi. Echo. Nyacua ãquĩ na ngue caballos seje cuu ra. Tata que emombo mombo ja quia uchuru rĩ nda. Tatashĩ abe. Azufre abe no. ¹⁸ Ùquĩ tres que mbae rasi tuchi ra. Tata. Tatashĩ. Azufre. Ae caballos mombo mombo quia uchuru rĩ nae, ùquĩ. Ùquĩ ngue mbia iquia iquia tuchi quia tercera parte ra. ¹⁹ Ngocoi je que eriqui mbia mbasi mbasi tuchi ra.

Mbei tasi je rã tuchi que erocoi ra. Uchuru je abe que eriqui mbia mbasi mbasi tuchi ra.

²⁰⁻²¹ Nyebe mbia riqui nguiã mano mano tuchi ùquĩ ndasi je. Mbia ataque quiatu que siqui beite quia huiicua ndese ra. Eicuã icuã mbei nyue. Nyiquia iquia. Brujería raã naa mbei. Siqui icuã icuã cuña mo ndese. Mbae mbuquiachã quiachã mbei. Uchisaã icuã si hui eã mbei. Siqui beite que equia aba checuayã ndese ra. Uchiao Dios abareã ndese abe no. Oro ao ji. Plata ao ji. Bronce ao ji. Sita ao ji. Ira ao ji abe no. Ùquĩ ja rese chõ ngue eriqui ra. Ùquĩ mae aroneate raque Dios abareã. Mbae andu aroneate raque. Ngata aroneate raque no.

10

Angel libro mo quereco

¹ Angel mo ngue nguichi ibei si seje cuu ra. Equirãcuãte que ra. Ibeishĩ ngue equeru huiraorã nda. Ibei asa que chí eãquĩ mama nda. Eruba nininyate que tenda rã sí ra. Etima abe nininyate que ra. Sã tata nininyate riqui no. ² Libro ñetẽ mo ngue equereco oo ra. Eequia ji que equereco ra. Utima ndibisho que emii ama ndisha ye ra. Utima ndibisho que emii íbii no nda. ³ Tasẽ tuchi que ra. Sã nyacua riqui curu curu no. Erasẽ mose que ama ñee siete veces ra. ⁴ —Ae rese ama ndieu sembiirandu nae, aque tambesa rã, ae rei que se cote ra. Ibatenda mo ngue ñee ño seje ra. —Ae ama ñee erechandu nae, ùquĩ nda erembesachĩ. Eresenei seneichĩ nda emo je. Echeẽ emocoño ño, i que seje ra. ⁵ Ae ángel tima ndibisho chí ama ndisha ye nae, aque que oo uquiatocutinda mee ibate quitu ra. ⁶ Ñee ngue cote ra: — Dios que sembu ra. Ae siqui i beite quia co nae. Ae ibei chao nae. Ae ibi chao nae. Ae ama ndisha chao nae. Ae mbae chao ja tuchite nae. Aque que sembu co renei nenei sacua nda. Achite mbae ja ñi ua a cote. ⁷ Séptimo ángel nda nyuihuí cote. Trompeta mbucheẽ. Dios cheẽ ique ja mose r a nyuihuí cote. Ae Dios ñee uquiato ñiinda je nae, ùquĩ nda ique ja echeẽ cote. Mbia rerecuarã tuchi ra Jesús cote, i que ángel quirãcuã ñee seje cuu ra.

⁸ Ae cheẽ achandu ibatenda nyii nae, aque que ñeembe seje ra. —Eso rã libro ñetẽ isi. Ae tima chĩ ama ndisha ye nae, ae tima ndibisho chĩ íbii nae, aque si libro ñetẽ eisi rã. Eequia ji eisi, i que seje ra. ⁹ Ae aso nguiã ñee ángel je. —Libro ñetẽ emee na seje, ae que ee ra. Ae emee nguiã ñee seje cote. —Co libro ñetẽ jẽ. Eu ja. Irao raãte raque ra eachã namo mose. Etei tuchite quiatu ra nderie je cote, i que seje ra. ¹⁰ Angel que libro ñetẽ mee seje cote ra. Au que se ra. Etura tuchi que sechuru je ra. Irao rã. Se eu tuchi mose quiatu que eteite serie je cote ra. ¹¹ Emo ngue ñee seje cote ra. —Dios cheẽ nda eresenei senei sí mbia ja je. “Co ra Dios saã. Ñ nda Dios saã no”, ere ra mbia je. Ishonda abe je. Mangue chooñoa jenda abe je. Mbia cheẽ ñumumbara abe je. Mbia rerecua jate abe je, i que seje cuu ra.

11

Dios quiato nyeremo Dios cheẽ senei senei

¹ Dios que uu mo mondo séoo cuu ra. Ñee ngue seje ra. —Eso Dios chuchua mbuchecha checha. Altar abe embuchecha. Ae mbia chi huee ñee ñee Dios je nae, ũquĩ abe je contar ere rã. ² Itaicuee ra erembuchechachĩ jẽ. Patio ra erembuchechachĩ jẽ. Ũquĩ ngue amee mbia sequiatoã je ra. Sequiatoã nda irõ irõ Jerusalén ndese cuarenta y dos meses chee. ³ Sequiato nyeremo je ra sequirãcuã amee. Ũquĩ nda secheẽ senei senei tuchi quia mbia je 1,260 días chee. Tiru rondei ra ũquĩ quereco quia, i que seje ra.

⁴ Dios quiato nyeremo ndei olivos i nyeremo na sí. Candeleros nyeremo na sí no. Sã Dios mbae reaquiato ja no. Uquiato nyeremo abe ra eteaquiato no. ⁵ Dios ra uquirãcuã mee ũquĩ nyeremo je. Emo embasi serĩ mose, tata ra embu embu uchuru si. Ucuãyãsa mbasi tuchi sacua. Eĩ nda mbia mano mano, ũquĩ Dios quiato nyeremo ucuãyã mose. ⁶ Ũquĩ Dios quiato nyeremo ama mbuchaaqui eã arõte, Dios cheẽ nenei nenei mbei mose mbia je. Mbae ruqui rã nda ama naa. Mbia ra embasi

mbasi arõte uquirãcuã je. Ibi jend a mbasise mose, mbasi tuchi rae. ⁷ Ũquĩ Dios quiato nyeremo Dios cheẽ nenei nenei ja mose mbia ja je, icuã nda tu icuãte ee cote. Ibicua yenda. Icuã nda Dios quiato nyeremo iquia cote. ⁸⁻⁹ Emo ũquĩ Dios quiato raaque nyati aroneate. Erete tiquia iriã nda chichõ itaicuee rĩ. Mbia mangue chooñoa jenda abe tuchi r a mae ja eraaque rese. Tres días y medio chee rae. Jerusalén ndei ra ũquĩ. Ae mbia Jesucristo mbucha ira rese nae, huee. Hue jenda quiarei eicuã tuchi mbia. Sodoma jenda rã. Egipto jenda rã abe no. ¹⁰ Ae mbia siqui quia ibi rĩ nae, ũquĩ ia tuchi rae. Dios quiato nyeremo mano mose. —Ae nandechiao icuã siquisã quisã nguia nae, ũquĩ ngue mano cote ra, i r a eyate ñee nyue. Nyebe ra eriqui mbae mondo mondo tuchi nyue. ¹¹ Dios quiato nyeremo ndaaque que chi tres días y medio cuu ra. Aquere que Dios embuquera sí seque re cuu ra. Júã ngue cuu ra. Mbia que siquiche ja tuchi mae erese ra. ¹² Ibatenda que ñee nyecua ũquĩ Dios quiato nyeremo je cote ra. —Jenyu aa quiatu ibate, i que Dios ñee ee ra. Nyoĩ que ibate ibei ye cuu ra. Eucuãyãsa que mae mbeite u echui rese ra. ¹³ Aque mose tuchi que ibi nyere icuã nda. Sucha tubiriã ndibisho que ngoi ngoi jate ra. Mbia tubiriãte que mano nda. Siete mil que mbia mano nda. Mbia ataque que siquichete ra. Ñee turã turãte que equia Dios ibatenda je cote ra. ¹⁴ Segundo mbae rasi chõ ã nde. Tercero quia tasenei jẽje cote.

Séptima trompeta mbuchee cote

¹⁵ Séptimo ángel que trompeta mbuchee cote no nda. Ũquĩ mose que mbia ñeemombo ja ja ibatenda ra. Eĩ ngue tasẽ tasẽ nda: Mbia mo ibi jenda mo nda siquiã ererecuarã cote. Dios ae chõ nda siqui ererecuarã cote. Nguiĩ ndese. Ae ae chõ nda siqui ererecuarã mbei cote, i que ibatenda tasẽ tasẽ cuu ra.

¹⁶ Ae amei veinticuatro siqui beite quia Dios jii nae, ũquĩ ngue ngoi nguiã ndese ñee Dios je cuu ra. Eĩ ño ngue ñee nguiã:

¹⁷ Gracias ure tuchi quia ndeje co, Dios.

Ndequirãcuã mbae saã ja arõte quia co.
 Ereico beite que equia nyii ra. Namó abe
 no. Ereico beite ra eno.
 Ereico ndequirãcuã naanguquiate mbia je
 co cote.
 Ereico mbia rerecuarã tuchi co cote.
 18 Mbia rerecuã que paama ite ndeje ra.
 Co mose ra ndequiatoã erembasi cote.
 Ndequiatoã mano je abe ra erembasi cote.
 Ndequiato abe ra erembuquera cote.
 Mbae turã mee mee sacuã ee.
 Ae ndecheẽ senei senei mbeite quia mbia
 je nae.
 Ae ñee turã turã nguia ndeje nae.
 Ndequiato cuasu je. Ndequiato ñetẽ je abe
 no.
 Ndequiato ja je ra mbae turã eremee mee
 cote.
 Ae mbia mbãcuã icuã nguia nae, ùquĩ nda
 erembutiã co mose cote,
 i que veinticuatro amei ñee turã Dios je
 cuu ra. 19 Dios chuchua ibatenda iquesa
 que quiata seje cuu ra. Caja Dios chuchua
 jenda que nyecua seje cuu ra. Aque rei
 contrato riru Dios mbae aque. Aquere que
 ama pirirã pirirã i ra. Ama ngue sieute ra.
 Ama ngue ñeete ra. Ibi que nyere ra. Iquitã
 abe que ngoi ngoi chee ra.

12

Dragón icuã icuã cuña je

1 Mbia mae sayã mo ndese que amae
 ibate cuu ra. Cuña nguasu tuchi mo ngue
 ra. Tenda que eirao ra. Nyasi que chí
 ei quti ra. Corona ngue equerecõ uãquĩ
 ndese ra. Nyasitata doce que chí corona
 ndese ra. 2 Nañimbae que cuña nda. Tasẽ
 tasẽ tuchi que equia nguĩrĩ ndasi je ra.
 3 Aquere que amae mbia mae sayã mo
 ndese ibate no nda. Dragón ireĩ mo ndese
 que amae nda. Siete que aque dragón ãquĩ
 cuu ra. Diez que erambashĩ nda. Corona
 ngue chí eãquĩ ja rese ra. 4 Dragón ngue ny-
 asitata tubĩrĩã siichã tuchi imbu íbii ngocoi
 je ra. Cuña ji que eñi eraarõ cote ra. —
 Sã nyaacuquia. Eriirĩ tau, i que huĩ ejii ra.
 5 Nyaacuquia que cote ra. Erãcoẽ ngue ra.
 Mbia ja rerecuarã tuchi ra aque. Emo ngue
 eriirĩ isi ra. Querao que Dios je íbátee ra.
 6 Cuña ngue uchã oso turuquia ñi nda. Dios
 echuchua saã ño nguia huee reaẽ. Huee

que eriqui 1,260 días ra. Huee que emo
 ndiqui embuquiaru quiaru ra.

7 Amae ngue guerra rese ibate cuu ra.
 Dragón icuã icuãte que ángeles je ra. Miguel
 nimba ángeles abe que ucua ucu a dragón
 nimba ángeles rese no nda. Nyiquia serĩ
 jate que cuu ra. 8 Dragón ngue ganar i
 aroneate umbae ángeles rese ra. Nyebe
 eriqui aroneate nguĩã ibate cote. 9 Dios
 que dragón mombo bei ibate si cote ra.
 Mbei ima ndei dragón. Diablo. Satanás,
 i abe que ee ra. Ae chõ mbia mangu
 choõnoa jenda mbãrĩ irĩ mbeite nguĩã co.
 Dios que ae mombo íbii cuu ra. Ngũimba
 rese. 10 Ibatenda ia tuchi que Dios emombo
 mose ra. Ibatenda mo ñee ngue achandu
 cuu ra: —Coche ñene. Dios riqui mbia rirõ
 mbei huĩcuã si co cote. Namó tuchi mbia
 riqui mae Dios quirãcuã ndese co. Cristo
 riqui mbia rerecuã tuchi co cote. Dios
 quiatu que diablo mombo nguĩã. Ae Dios
 mbuqueta queta beite quia equiato rĩ nyii.
 11 Ûquĩ Dios quiato que diablo siquisãte
 quia Jesús ruqui je ra. Jesús cheẽ je abe
 no. Ae ùquĩ senei mbeite quia mbia je Jesús
 cheẽ nae, ùquĩ je chõ eriqui nguĩã eriquisã
 quisã. Ûquĩ Dios quiato que siquicheãte
 quia umano si ra. “Tamano ndei Dios je”,
 i jate que equia ra. 12 Mbia ibatenda ia
 tuchite cote. Mbia ibi jenda quiatuchĩ eya
 eãte. Mbia ama ndisha yenda abe no. Dia-
 blo quiatu que nguichichĩ u nguĩã jẽje, ibi
 jenda. Paama i tuchite equia co. Achite
 quiatu Dios ñi nguĩã embasi a cote, i que
 ibatenda mo ñee cuu ra.
 13 Dios dragón mombo mose íbii, dragón
 icuã icuã ngue cuña je cote ra. Ae eriirĩ
 nacuẽ nyaacuquia nae, aque cuña je que
 dragón icuã icuã cote ra. 14 Emo ngue mbae
 jeo nyeremo mondo cuña je ejeorã nda.
 Nguira risha jeo raanguia. Cuña mbebe
 sacuã. Eso chee sacuã turuquia rĩ. Ae Dios
 saã echuchuarã turúquiaa nyii nae, huee
 eso chee sacuã diablo si. Mbei si. Emo
 embuquiaru sacuã tres años y medio huee.
 15 Mbei que i mombo tuchi uchuru rĩ nda.
 Iãcuana. Cuña iquia sacuã ndaque chõ ùquĩ
 iãcuã nde. 16 Ibi ia eãte que cuña ndese ra.
 Nyebe ibi nyiequia nguĩã i mocõ ja dragón
 nyuru jenda. 17-18 Nyebe dragón paama i

tuchi nguiã cuña je. Eicuã icuã mbeite que eriqui cuña ndiirĩ ataque ja je cote ra. Ae Dios cheẽ mumba eãte quia nae, ãquĩ je chõ eriqui nguiã cuña ndiirĩ i. Ae siqui beite quia Jesús cheẽ ndui nae, ãquĩ je dragón icuã icuã mbeite riqui co.

13

Icuã nyeremo

¹ Ama ndisha rimia ndese que aĩ juã cuu ra. Mbae mo ndese abe que amae huee ra. Icuã mo ngue usẽ u quia ama ndisha si seje cuu ra. Siete que eãquĩ nda. Diez que erambashĩ nda. Corona ngue chĩ erambashĩ ndese ja ra. Eãquĩ ndese que nombre mo mbesa ji ñi nda. Aque nombre icuãte que Dios je ra. ² Nyacua risha rá ngue icuã nda. Oso i rá tuchi que ei ra. Echuru que nyacua churu rá nda. Dragón ngue uquirãcuã mee tuchi icuã je ra. —Ererecuará nde, i tuchi que dragón icuã je ra. ³ Icuã ãquĩ mo sia ji tuchi rei ngue re. Manombi chõ ndei ngue re. Nyerõ ñochĩ ngue re. Nyebe mbia mangu e chooñoa jenda nyuruira jate nguiã mae erese cote. Mbiam que siqui jate erui cote ra. ⁴ Mbiam que ñee turã turãte quia dragón je ra. Uquirãcuã mee mose icuã je. Icuã je abe que eriqui ñee turã turãte ra: — Co icuã turã na eãte mbiam mo. Ae mii ño equirãcuã ndiqui nguiã mbiam si co, i jate que mbiam quia ee ra.

⁵ Icuã ngue ucuasu saã saã tuchi quia Dios je ra. —Dios tuchi chõ se re, i tuchi que equia mbiam je ra. Dragón ngue emii mbiam rerecuará cuarenta y dos meses ra. ⁶ Aque mose bei que eriqui ñee icuã icuã Dios rii nda. Echuchua rii abe no. Dios rimba ibatenda rii abe no. ⁷ Dragón ngue uquirãcuã mee tuchi icuã je ra. Icuã icuã icuãte que eriqui Dios quiato je cote ra. Dios quiato iquia iquia cheete que equia ra. Icuã ngue mbiam mangue chooñoa jenda rerecuatuchi cote ra. Mbiam cheemo abe rerecuatuchi que cote ra. ⁸ Mbiam Dios quiatoã ja tuchi que siqui icuã ndese ra. Ae embae nombre mbesa iriãte riqui Jesús mbae libro rese nae, ãquĩ ngue siqui jate icuã ndese ra. Dios quiato mbae nombre que Jesús mbesa mbae ao ja nond e coose ra. Jesús mano nonde erii. ⁹ Jëisa mose,

secheẽ jeñandu rá. ¹⁰ Dios mbae icua ja chõ nguiã, mbae tã i nonde equiato je. —Co sequiato ra mbiam iquia tiquise je, i mose Dios, mbiam ra eiquia tiquise je. —Co sequiato ra mbiam tarõ, i mose Dios, mbiam ra etarõ no. Sã Jesucristo rimba ñimbirãcuã ño. Sã Jesucristo icua tuchi. Icuã icuã icuã mose ee. ¹¹ Aquere que amae icuã mo ndese no nda. Ibi si qu e co icuã ndu ra. Erambashĩ nyeremo ngue ra. Cordero nambashĩ na si que ra. Dragón ñee na si que echeẽ no nda. ¹² Equirãcuã tuchi que ra. Icuã ñiinda rá sí. —Icuã ñiinda rimbarã ño jëingo, i tuchi que equia mbiam mingo ja icuã ñiinda rese ra. Ae ãquĩ sia ji nyerõ nguia nae, aque. ¹³ Mbiam mae sayã ngue esaã saã tuchi quia ra. Tata que embucoi ibei si mbiam resa rae ra. ¹⁴ Mbiam mae sayã ngue esaã saã tuchi icuã ñiinda rese eico mose ra. Eĩ ngue equia mbiam mbirĩ irĩ tuchi ra. —Icuã ñiinda raanguia mo mbae mo jenyao jë, i que ñee mbiam je ra. Mbiam que echao ra. Ae ãquĩ sia ji tiquise je nae, ae nyerõ nguia nae, aque raanguia que mbiam chao ra. ¹⁵ Icuã ngue ereco mee mbae ao ji je ra. Mbucuatara que ra. Mbucheẽ ngue ra. Mbiam rá ngue eriqui cote ra. Ae ngoi sereãte quia nguiã ndese mbae ao ji resaa nae, mbae ao ji que ãquĩ iquia cote ra. ¹⁶ Icuã ngue umbae marca mii jate mbiam rese ra. Mbiam ruba rese. Mbiam o rese equiatocutinda. Mbiam riiirĩ ndese. Mbiam cuasu rese. Mbaecha rese. Mbaecha reã abe rese. Mbiam rimba rese. Mbiam rimba eã ndese abe no. Icuã ngue marcar i ja mbiam ja je cuu ra. ¹⁷ Mbiam mo marcar iriã mose, ãquĩ mbae mo isi aroneate. Mbae mo je vender i aroneate no. Icuã mbae marca nderequia eã mose. Icuã mbae número abe rerequia eã mose no. ¹⁸ Ae ndua tuchi eãte quia nae, ãquĩ nda ã icua eã. Ae mbae icuate quia nae, sã ãquĩ icuã mbae número icua. Mbiam mo nii ño ñene. Embae número rei 666.

14

Mbiam 144,000 irasei rasei Dios je

¹ Mbae mo ndese abe que amae cuu ra. Jesucristo que chĩ juã Ibi Ibate Sión seje cuu ra. Ae je eriqui Cordero i. Mbiam cuabẽ tuchi que chi erese ra, 144-000 que mbiam

chi erese ra. Ũquĩ nduba rese ja ja que Jesucristo mbae nombre mbesa ji ñi nda. Dios mbae nombre mbesa ji abe no. ²Mbae rieu que achandu bei quia ibatenda ra. Tororomba ata ata rieu raãte que ra. Ama ndieu abe raãte que ra. Sã mbia tubiriãte riqui arpas mbucheẽ ñee no jẽ, ũquĩ naate que erieu riqui ra. ³Ũquĩ mbia cuabẽte que irasei rasei quia Dios rėsaa ra. Mbae reco cuatro rėsaa abe no. Amei veiticuatro rėsaa abe que eriqui irasei rasei no nda. Eirasei rasei yasu que ra. Mbia mo ngue ñimbaaquiatu aroneate quia eirasei rasei yasu je ra. Mbia 144,000 achõ ño ngue ñimbaaquiatu aque irasei rasei yasu je ra. Dios ũquĩ sirõ nguiatu quia mbae icuã si reaẽ. ⁴Ũquĩ ngue ñimbicua eãte quia mbae icuã je ra. Ñimbicua eã siqui cuña mo ndese no. Siqui turã mbei equia Jesucristo rese ũquĩ. Dios que esirõ mbei mbia ibi jenda si ra. Ofrenda turã na tuchi chõ ũquĩ Dios je re. Jesucristo abe je. ⁵Ũquĩ nguiarei ñee ñooño eã tuchi ũquĩ. Ũquĩ turã tuchite eriqui Dios je ã.

Tres ángeles ñee mbia je

⁶Amae ngue ángel nongue rese cuu ra. Mbebe mbebe que equia ibei rĩ cuu ra. Dios cheẽ turã ua eã je que equereco quia ra. Erenei nenei sacua mbia ja je. Mangu chooñoa jenda ja je. Mbia cheẽ ñumumbara abe ja je. ⁷Aque ángel que ñee nda: —Jẽireĩ ireĩ jiri Dios si. Jeñee turã turã jiri quia ee. Achite Dios ñi mae ja mbia rese a. Uquiatoã mbasi nonde. Dios quiatu ngue mbae chao ja nguiã. Ibei. Ibi. Ama ndisha. Ama ndicõĩ. Nyebe ra mbia ñee turã ee, i que ángel ñee cuu ra.

⁸Ángel nongue abe que siqui seje cuu ra. Aque que ñee cote ra: —Sucha tubiriã Babilonia ngue quiachãte cote ra. Babilonia nda mbia mbicua eã cote. Mbia mbicua tuchichi equia nyii, i que aque ángel ñee cuu ra.

⁹Ángel nongue abe rese que amae no nda. Ñee asite que ra: —Icuã ndese chõ nda jẽngochĩ jẽ. Icuã naanguia mbae ao ji rese abe chõ nda jẽngochĩ jẽ. Icuã mbae marca ra jemichĩ jenduba rese jẽ. Jẽo abe rese ra jemichĩ jẽ. ¹⁰Emo emi mose, Dios

ra paama i tuchi ee. Emo emi mose, Dios ra embasi tuchi. Dios ra ũquĩ mbasi bei tata je. Azufre je abe no. Mbasi bei ra ángeles resa rae. Jesucristo resa rae abe no. ¹¹Ũquĩ nda Dios mbasi bei. Mbae rasi ra eucua mbirĩ jiriã. Siqui quiatu que equia icuã ndui mbaerã nda. Icuã naanguia ao ji abe rese quiatu que eriqui ra. Icuã mbae marca abe rese quiatu que eriqui mbaerã no nda.

¹²Dios quiato tuchi ra ũquĩ saã eã. Sã eriqui beite Dios cheẽ ndui. Sã eriqui ñimbirãcuã mbeite, i que ángel ñee cuu ra.

¹³Ibatenda mo ngue ñee seje cuu ra: — ã embesa rã: “Jesús quiato mo mano mose, eyate riqui co”, ere chõ mi embesa. Espíritu Turã ñee abe chõ ũquĩ nde. Jesús quiato mo mano mose, uquenea nda eucua cote. Ae mbae turã esaã saã nguia nyii nae, ũquĩ si ra Dios tesareia mbei, i que ibatenda ñee seje ra.

Dios uquiatoã mbasi mose, mbae a riamí amí na ño nda esaã ee

¹⁴Ibeishĩ ndese que amae cuu cote ra. Emo ngue chĩ ngoi ibeishĩ tose ra. Jesucristo rã tuchi que ra. Corona ngue chĩ eãquĩ ndese oro ao ji ra. Tiquise raanguia rimbete que equereco oo ra. Quiata a ucua ucua sacua. ¹⁵Ángel mo ngue tu usẽ Dios chuchua si ra. Ñeemombo que Jesucristo raanguia je ra. —Mbae eucua ucua tiquise raanguia je cote. Mbae a quiche jate mangu chooñoa jenda ja, i que ee ra. ¹⁶Ae chĩ ibeishĩ tose nae, aque que tiquise raanguia mee ibi quitu ra. Aque mose tuchi chõ ngue mbae a ibi jenda ishao ja tuchi cote rã.

¹⁷Ángel mo abe que usẽ u Dios chuchua ibatenda si ra. Tiquise raanguia rimbete que equereco no nda. Uvas ucua ucua sacua. ¹⁸Ángel mo ngue tu altar si cot e ra. Tata raarõsa altar jenda rei aque ángel. Ñeemombo que tiquise raanguia rerequiasa je ra: —Uvas eucua ucua tiquise raanguia je cote. Mangu chooñoa jenda ja eucua ucua. Equiche jate, i que ra. ¹⁹Ángel que tiquise raanguia mee ibi arõ cote ra. Aque mose tuchi chõ ngue uvas ibi jenda ishao ja tuchi ra. Uvas ishao ji que emondo ja tuchia mo nda. Eriamí amí sacua. Dios

uquiatoã mbasi mose, mbae a riami ami na ño ũquĩ nde. ²⁰ Isho jiri que eriqui uvas riami ami sucha tubiriã si ra. Dios uquiatoã mbasi mose, uvas riami ami na ño ũquĩ nde. Eruqui riquiraa tuchi que ra. Caballo mbuchecha tuchi que eruqui riquiraa ra. Trescientos kilómetros tuchi que eruqui seje cuu ra.

15

Angeles mbae rasi siete quereco ja eriru ye

¹ Aba siquichesa mo ndese que amae ibei rĩ cuu ra. Mbia mbiirandu sacuaã. Siete angeles rese que amae nda. Mbae rasi chumumbarate que ecurucuaẽ cuaẽ nguia íbii ra. Siete que mbae rasi ra. Mbae rasi tuchi. Ũquĩ siete mbae rasi ua mose, Dios ra mbae rasi mbu si eã cote.

² Ama ndisha icoi mo ndese que amae nda. Enininya tuchi que ra. Vidrio raanguia. Tata abe raanguia. Ae siquiã mbei icuaã ndui Jesús quiato nae, ũquĩ ndese que amae no nda. Icuã naanguia rese abe siquiã. Icuã mbae número abe que equerecoã nda. Ũquĩ ndese que amae ama ndisha arõ nda. Arpas Dios mbae je que echi tocar i ra. ³ Ae Moisés irasei rasei nyii nae, ũquĩ sí je que echi irasei rasei ra. Ae mbia irasei rasei Jesús je nae, ũquĩ sí je que echi irasei rasei ra. ã nguie irasei rasei ra:

Ndechiao turã tuchite, Dios.

Ndequirãcuã tuchite ereico co.

Mbia erembuchiabi jiri jiriãte quia co.

Erecheẽ iru iru eãte quia co.

Mbia rerecua jate ereico co.

⁴ Mbia ra ireĩ ireĩ ja ndesi mae mose ndechiao rese.

Ñee turã ja ra nderĩ.

Nde mii ño ererecua tuchi re.

Mbia ra ngaẽ ja tuchi nderea. Ñee turã sacuaã ndeje.

Ndechiao turã ndese quiatu nguie mbia mae nguia,

i que mbia irasei rasei ama ndisha arõ cuu ra.

⁵ Aquere que mbae mo abe atea cuu ra. Dios chuchua ibatenda eiquesa que quiata seje cuu ra. ⁶ Siete ángeles mbae rasi quereco quia nae, ũquĩ nguie usẽ nyoi

Dios chuchua si cote ra. Eiraoshĩ tuchi que nyoi usẽ nda. Oro que equereco huishia ati ra. ⁷ Ae rese ama e mbae reco cuatro nyii nae, ũquĩ m o nguie mbae riru mee mee ja ũquĩ ángeles siete je ra. Oro ao ji rei mbae riru. Mbae rasi mbisẽte que chi eriru ja ye ra. Dios mbia mbasi tuchi sacuaã. ⁸ Dios nininya tuchi que seje cuu ra. Equirãcuã tuchi que ra. Nyebe que tatashĩ Dios chuchua mboo ja tuchi ra. Mbia mo nguie ique aroneate rã huee ra. Ũquĩ ángeles mbae rasi icherẽ cherẽ ja eã mose.

16

Angeles mbae rasi icherẽ cherẽ ja

¹ Dios chuchua jenda mo nguie ñee asite ũquĩ ángeles je cuu ra. —Jẽso mbae rasi icherẽ cherẽ ibi jenda ja rese. Dios embasi sacuaã, i que ñee siete ángeles je ra.

² Angel ñiinda que oso umbae mbae riru yenda icherẽ íbii ja ra. Ae siqui quia icuaã ndese nae, ae ngoi coi quia nguiaã ndese icuaã naanguia je nae, ũquĩ ire rasi rasi que cote ra. Mbae asi tubiriã nguie erese cote ra. Nyerõ aroneate que ra.

³ Segundo ángel que umbae mbae riru yenda icherẽ ama ndisha ja ye ra. Mbia raaque ruqui rã nguie ama ndisha cote ra. Ama ndisha rãnda que mano ja tuchi mbae cote ra.

⁴ Tercer ángel que umbae mbae riru yenda icherẽ ama ñi nda. Ama ndicoĩ ñi abe que eicherẽ no nda. Mbae ruqui rã tuchi que ama ja cote ra. ⁵ Angel ama ndaarõsa que ñee Dios je cuu ra. —Coche rei mbia icuaã erembasi. Dios turã tuchi chõ nde re. Ndeturã mbeite que eriqui ra.

⁶ Ũquĩ mbia icuaã nguiatu nguie ndequiato iquia iquiate nguia nyii. Ndecheẽ nenei neneisa abe iquia iquia. Coche rei mbae rasi eresaanguia ũquĩ je cote. Coche rei mbae ruqui eresaanguia ee, i que ángel ñee turã Dios je ra. ⁷ Altar jenda mo abe que ñee Dios je cuu ra. —Ae bei. Coche mbia icuaã erembasi nguiaã cote. Ndeturã mbeite chõ ereico nguiaã nde, i que Dios je ra.

⁸ Cuarto ángel que umbae mbae riru yenda icherẽ tenda rese ra. Nyebe tenda riqui nguiaã mbia rei ja ngacu je cote.

⁹ Tenda que mbia sei tuchi quia embasi ra.

Ũquĩ mose abe que mbia riqui ñee turã eãte Dios je ra. Dios embasi raque. Mbia que uba eã mbei Dios rese ra. Ñee icuã icuã mbei chõ ngue equia eriĩ nda.

¹⁰ Quinto ángel que umbae mbae riru yenda icherẽ icuã nenda rese ra. Itondaru tuchi que icuã nimba ja je mbia cote ra. Mbia que hueecõ shiu shiu tuchi quia mbae rasi mose ee ra. ¹¹ Ũquĩ mose abe que mbia uba eã Dios rese ra. Huiicuã ngue esecha eãte quia ra. Ñee icuã mbeite que equia Dios rĩĩ nda. Ngasi rerequia mose abe que eriqui ñee icuã mbeite Dios rĩĩ nda.

¹² Sexto ángel que umbae mbae riru yenda icherẽ Río Eufrates ye ra. Ama nguasu tuchi que aque ra. Aque ama ngu e iru cot e ra. Tenda chuisa quitinda soldados iasa sacuã. ¹³ Aba checuayã icuã tres rese que amae nda. Emo ngue tu usẽ dragón nyuru si ra. Enongue que tu usẽ icuã nyuru si ra. Enongue que tu usẽ Dios cheẽ nenei ñooñosa churu si no nda. Nyui rã tuchi que ũquĩ aba checuayã icuã nda. ¹⁴ Ũquĩ aba checuayã icuã ngue mbia mae sayã saã saã tuchi quia milagros ra. Ñee ja que mbia rerecua ja je ra. Ñumunua ja sacuã pelear i sacuã Dios rese. ¹⁵ Sã Jesús ñee no: “Mbia ndua eã mose serese ra achu. Jêtesa tesa bei equia serese jẽ. Jẽingoquiato bei equia jẽ. † nda jẽireĩ ngũĩã sechu mose”, sã Jesús i no. ¹⁶ Aba checuayã icuã ngue mbia rerecua munua ja huee ra. Pelear i sacuã Dios rese. Armagedón, i que hebreo cheẽ hue je ra.

¹⁷ Séptimo ángel que umbae mbae riru yenda icherẽ quiririãsa ra. Aque mose que Dios ñeemombo uchuchua ibatenda si ra. —Mbae rasi icherẽ ji jate cote, i que Dios ñeemombo ra. ¹⁸ Ama ngue pirirã pirirã i tuchite cote ra. Ama ngue sieu tuchi quia no nda. Ibei que ñee tuchi quia ra. Ibi abe que nyere tuchi quia no nda. Emo mose rã eã tuchi que ra. ¹⁹ Sucha tubiriã Babilonia ngue obo obo nyibite rĩ nda. Tres partes. Hue jenda tuchua que ngoi ja tuchi ra. Mbia chuchua que ngoi ngoi ja mangue chooñoa jenda aque mose ra. Dios quiato ngue tesareĩãte nguiã Babilonia jenda chisaã icuã si. Nyebe eriqui

nguiã paama i tuchi ee cote. Embasi mbasi uquirãcuã je cote. ²⁰ Islas abe que quiachã quiachã ja ama jenda ra. Ibi ibate abe que quiachamba chamba ja no nda. ²¹ Iquitã nguasu que ngoi ngoi quia mbia iquia iquia ra. Cuarenta kilos ja ja que ũquĩ iquitã nda. Iquitã ngue mbia iquia iquia tuchi quia ra. Nyebe mbia riqui nguiã ñee icuã icuã tuchi Dios rĩĩ. Ñee turã ndocoĩ ee.

17

Cuña icuã mbae rasi saã tuchi

¹ Ae mbae riru quereco ángeles nae, ũquĩ mo ngue tu ñee seje ra. —Nyao serese. Mbae tateacuquia ndeje. Babilonia jenda ra mbae rasi saã tuchi cote. Ae cuña siqui chooñote quia mbia ja rese nae, aque ra mbae rasi saã tuchi cote. Ama ndisha jie eñi ngoi mar hue. ² Mbia rerecua que siqui siqui jate quia erese ra. Mbia ataque abe no. Ae que mbia mbicuã jate quia ra, i que ángel ñee seje cuu ra. ³ Angel que sererao turuquia rĩ cuu ra. Huee que amae cuña icuã ndese ra. Icuã ireĩ átoo que eñi nda. Embesa ji tubiriãte que chí icuã ndese ra. Nombres mbesa ji icuã tuchi que ũquĩ Dios je ra. Icuã ãquĩ atate que ra. Siete que eãquĩ nda. Diez que erambashĩ no nda. ⁴ Mbia rerecua irao raãte que cuña icuã irao ra. Eirao ireĩ turãte que ra. Oro tubiriãte que equereco adorno nda. Perlas abe no. Sita ñetẽ aba queteamba abe no. Mbae riru abe que equereco oo ra. Oro ao ji. Huiicuã ngue equereco ja quia aque mbae riru ye cuu ra. ⁵ Embesa ji que chí eruba rese ra. Aba chícuayã tuchi que ra. ã i chõ ngue huĩ nguiã: “Babilonia ño co re. Sucha tubiriã icuã ño co re. Cuña icuã nderecua ja chõ co re. Mbae icuã nderecua ja chõ co re”, i chõ ngue embesa ji huĩ nguiã eruba rese. ⁶ Quiacuate quia cuña icuã ndiqui reaẽ. Jesús quiato uninya ruqui quia embei quia quiacua nonde reaẽ. Achuruira tuchi que mae erese cuu ra.

⁷ Angel que ñee seje cote ra. —¿Mbaerã ereico nyuruirate mae erese re? Tarem-biirandu cuña icuã ndese. Ae átoo eñi nae, aque rese abe tarem-biirandu. Ae siete eãquĩ ndiqui nae. Ae erambashĩ diez riqui nae. ⁸ Ae rese eremae icuã cuu nae,

aque ngue siqui rei nguiã cose. Emoate namo cote. Siquibe rae. Usẽ nda ibicua si. Aque icuã quera si mose, Jesús quiatoã nda nyuruira tuchi mae erese. Ae embae nombre mbesa ji eãte Jesús mbae libro rese nae, ùquĩ. Icuã nda oso mbae rasi raã tuchi tata cuasu cote. ⁹ Earacua achõ nda ã secheẽ icua: Eãquĩ siete rã sí rei ibi ibate siete. Cuña icuã ñi ngoi ibi ibate siete tose hue. ¹⁰ Eãquĩ siete rã sí rei mbia rerecua siete no. Cinco que mano nda. Aque mii ndiqui namo co. Emo mii nda siqui emo mose cote. Aque ra siqui mbirĩ ño mbia rerecuarã. ¹¹ Ûquĩ siete mo ndei icuã ireĩ mo. Siqui que equia nyii ra. Emoate namo cote. Siqui i ra ùquĩ siete ua mose cote no. Mbia rerecua octavo ra ae cote. Ae ra oso bei tata cuasu aquere cote. ¹² Ae erambashĩ ndese eremae diez nae, mbia rerecua diez rã sí chõ ùquĩ nde. Mbia rerecua eã ño ùquĩ namo nde. Emo mose quia ra mbia rerecua cote. Ererecua mbirĩ ño ndae. Icuã ndese quiatu ra ererecua. ¹³ Hue rĩ sí tuchi ra ùquĩ ererecua ndua ndua. —Ererecuarã ño icuã jẽ, i ja ra ùquĩ ererecua. Uquirãcuã nda emee ja icuã je. ¹⁴ Ûquĩ nda pelear i ja Cristo rese cote. Cristo quia ra i tuchi ùquĩ ja si. Ae quia mbia rerecua tuchi re. Ae quia equirãcuã tuchi mbia mo si re. Ae siqui Cristo rese nae, Cristo chiirabo chõ ùquĩ nde. Etura tuchi chõ ùquĩ Cristo je re, i que ángel seje cuu ra.

¹⁵ Ñee si que seje ra. —Ae ama ndisha rese eremae mar nae, ae ji cuña icuã ñi ngoi nae, mbia chumumbara rã sí chõ ùquĩ nde. Mangue chooñoa jenda ja rã ño ùquĩ nde. Sucha tubiriã jenda ja rã ño ùquĩ nde. ¹⁶ Erambashĩ diez rese que eremae nae, mbia rerecua diez na sí chõ ùquĩ nde. Ûquĩ nda cuña icuã ucuãyãte cote. Ûquĩ nda cuña icuã secha icuã cote. Erete checua ra esecha cote. Eroo ra eu. Erete ra esei tata je cote. ¹⁷ Dios que ñee nyii ra. —Mbia rerecua icuã tuchi ra cuña icuã je, i que Dios nyii ra. Echeẽ ndui sí ra eicuã icuã cuña icuã je cote. Dios que eicua nyii ra. Hue rĩ sí ra ùquĩ ererecua diez ndua. Umbae ra emondo ja icuã je. Icuã mii nda mbia rerecuarã ja cote. Aque mose ra Dios cheẽ

ique. ¹⁸ Cuña icuã ndese ereico mae nae, sucha tubiriã na si chõ aque cuña nde. Hue sucha rei ererecua tuchi sucha ataque si. Mangue chooñoa jenda rerecua ja rei hue sucha, i que ángel seje ra.

18

Babilonia jenda ra mbae rasi saã tuchi

¹ Aquere que amae ángel mo ndese ra. Nguichi que u quia ibei si ra. Equirãcuã tuchi que ra. Enininya tuchi que ra. Ibi resae tuchi qu e eu quia ra. ² Angel que ñeemombo mombo tuchi ra. —Sucha tubiriã Babilonia jenda que ngoi ja cote ra. Mbia tiãte que huee cote ra. Aba checuayã icuã achõ ño chi nguiã hue cote. ³ Hue sucha tubiriã Babilonia jenda que mbia mbicua jate quia ra. Mbia mbui mbui tuchi que equia Dios si ra. Ubi icuã achõ ndese chõ ngue eriqui ndua tuchi ra. “Ûquĩ na nda se chã” i ja ja que equia mbae ja je ra, i que ángel ñee cuu ra. ⁴ Ibatenda mo ngue ñee cuu ra. —Ae serimba jemo nae, hue si jenyao. † nda hue jenda chisaã icuã jësaã eã jë abe. † nda mbae rasi jësaã eã jë, hue jenda mbae rasi raã mose. ⁵ Hue jenda que mbae icuã saã saã tuchite quia ra. Dios tesareiatẽ quia hue jenda icuã si co. ⁶ Hue jenda que mbia ataque mbasi mbasi tuchi quia ra. Ûquĩ sí ra mbae rasi saã tuchi cote. Dios ra mbae rasi saanguquia i i tuchi quia ee cote. ⁷ Hue jenda que ucuasu saã saã tuchi quia ra. Ubi achõ ndese chõ ngue eriqui ndua ra. “Co ai aico turãte co. Mbae rasi tu aroneate seje”, i ja jate rei que equia ra. Nyebe ra Dios mbae rasi saanguquia tuchi ee cote. ⁸ Aque mose tuchi ra mbae icuã tu tuchi ùquĩ mbua cote. Mbae rasi icuã nda esaã tuchi. Eriãcuã ndasi tuchi ra cote. Echuchua ra oquieĩ ja. Mbia ra mano ja. Dios quiatu ra mbae icuã saanguquia tuchi mbia je eicuã nii cote. Dios quiarei equirãcuã tuchi, i que ángel ñee cuu ra. ⁹ Ae ererecua mbae icuã saã nguia Babilonia jenda rese nae, ùquĩ ia eã tuchi ra erese cote. Nyeseo tuchi ra erese mbae rasi raã tuchi mose. Echuchua oquieĩ rese mae mose. ¹⁰ Isho chõ nda echi mae mbae rasi raã ndese. Esiquichete quia ñene. Ñee nda ee mbae rasi raã mose. —Ureya eãte

riqui jendese ã. Babilonia sucha tubiriã jenda rei ngue jẽ nyii re. Sucha eã tuchite que jenyuchu a cote ra. Mbae rasi tu asi chõchĩ nguia jẽje ã, i ra maesa erese ñee ee. ¹¹ Comerciantes mangue choõnoa jenda ja abe ra eya eãte, Babilonia jenda mbae rasi raã mose. Nyeseo tuchi ra erese. Mbia quia nda embae isi eãte nguia cote. Nyebe ra eya eãte cote. ¹² ã je nda vender i nguia ña:

oro
plata
sita ñetẽ aba queteamba huirã
perlas
tiru turã tuchi
tiru ireĩ
tiru seda
ira simbu turã mo
marfil ao ji
ira turã ao ji
bronce ao ji
hierro ao ji
sitashĩ ao ji
¹³ canela
aba mbushimbusa
perfumes
tuchua mbusimbusa
vino
mbae quira
mbae cui
trigo
ovejas
caballos
ira nambacua
mbia nimba

ũquĩ ja je nda vender i nguia ee chã.

¹⁴ Mbia ra ñee Babilonia jenda je cote. — Ae mbae jenyoseite quia nae, ũquĩ mo nda tu ãte jẽje cote. Jembae tubiriãte riqui nyii nae, ũquĩ mo nda jendecoã cote, i ra mbia ee cote. ¹⁵ Ae ã mondo mondo quia vender i Babilonia jenda je nyii nae, ũquĩ abe ra chi mae isho erese no. Esiquichete ra chi mae mbae rasi raã ndese. Nyeseo ra erese. ¹⁶ Ñee nda Babilonia jenda je. — Ureya eãte riqui jendese ã. Babilonia sucha tubiriã jenda rei ngue jẽ nyii re. Sucha eã tuchite jenyuchua cote. Jẽrao turã tubiriãt e rei ngue nyii re. Oro ao ji tubiriãte rei ngue adornos jembae nyii no nde.

¹⁷ Jembae ua asi chõchĩ jẽ mbae rasi raã mose, i ra ee. Ae comerciantes nyoĩ choi quia canoa ye nae, ae nyoĩ choi quia barco

ye nae, ũquĩ nda chi isho mae Babilonia jenda mbae rasi raã ndese. ¹⁸ Babilonia sucha tubiriã oquieĩ mose ra ũquĩ nyi isho mae erese. — Sucha tubiriã tuchichĩ Babilonia. Babilonia na eãte emo, i ra nyeseo sucha tubiriã oquieĩ mose Babilonia jenda. ¹⁹ Ibi tuba ra emombo mombo uãquĩ ndese. Nyeseo tuchi rae. Sucha tubiriã oquieĩ mose Babilonia jenda. Ñeemombo mombo ra Babilonia jenda je. — Ureya eãte riqui jendese ã. Mbaechate que jẽingochĩ nyii ra. Ure abe que mbaechate ureico jeniĩ nyii no nda. Mbae ua asi tuchi chõchĩ co mose cote, i ra ñee Babilonia jenda je. ²⁰ Babilonia sucha tubiriã ua mose ra ibatenda iate cote. Jesús chimbaaquiatu abe ra eya cote. Ae Dios cheẽ senei senei quia nae, ũquĩ abe ra eyate cote. Dios quia ra mbae rasi mondo tuchi Babilonia jenda je uquiato rĩ.

²¹ Angel quirãcuã mo ndese que amae cuu ra. Sita cuasu mo ngue esui mombo ama ndisha ye cuu ra. Ñee ngue cote ra. — Eĩ nda Dios sucha tubiriã Babilonia mombo. Sã sita amombo ama ndisha ye no. Sucha tubiriã eã mbei ra Babilonia cote. ²² Nyebe ra mbia música saã eã mbei huee cote. Mbia ra irasei rasei eã mbei huee cote no. Mbia ra nyuao eã mbei mbae rese huee cote. Mbia ra mbua tocho eã mbei huee cote no. ²³ Lamparina mo nda mbae tesae eã huĩ huee cote. Emo nda ngũinisirã isiã mbei huee cote. Mbia mbaecha hue jenda que aba chũcuate riqui nyii ra. Hue jenda que mbia ataque mbũrĩ i rĩ jate rei quia brujería je nyii no nda. ²⁴ Hue jenda que Dios quiato iquia iquia bei quia ra. Dios cheẽ mbuchecuasa que eiquia iquia tuchi quia ra. Nyebe ra Dios mbae rasi raanguquia tuchi hue jenda je cote.

19

¹ Aquere que mbia cheẽ tubiriãte achandu ibate cuu ra. Ñeemombo mombo que ñee turã Dios je ra.

Dios turã tuchite riqui mbia je co.

Dios ae riqui mbia rirõ eicuã si co.

Dios ae chõ equirãcuã ndiqui nguia co.

² Ae siqui sereãte quia Dios rese nae, ũquĩ nda Dios mbasi.

Mae tuchi ra erese embasi nonde.

Sã Dios mbae rasi saanguquia cuña icuã je namo no.

Aque que siqui siqui jate quia mbia rese ra. Mbia mbiacuã icuã ja.

Ae que Dios quiato iquia iquia quia no nda. Nyebe Dios embasi nguiã cote,

i que ibatenda cheẽ tubiriãte cuu ra.

³ Aquere que ñee si ra. —Dios turã tuchi riqui mbia je co. Cuña icuã ndiqui oquieibeite hue, i que ñee nda. ⁴ Aquere que veinticuatro amei ñee turãte Dios je cote ra. Mbae reco cuatro rese. Ngoi que nguiã ndese Dios nonde ra. Dios chí mose ngoi umbae trono tose. Ñee turã ngue Dios je ra. —Amén. Dios turã tuchi riqui mbia je co, i que ñee turã Dios je ra. ⁵ Emo ñee ngue achandu ibate ra. —Ae Dios quiato jẽ nae, jeñee turã ja erĩ. Ae Dios cheẽ jemumba eãte quia jẽ nae, jeñee turã ja erĩ no. Ae ecuasua nae, ae eñetẽ nae, jeñee turã ja chõ nguia erĩ, i que ibatenda mo ñee cuu ra.

Jesús quiato ra quiaru erese ibate

⁶ Mbae mo ndieu que achandu cote ra. Iãcuã ndieu rã. Ama sieu rã. Mbia tubiriã ñee ño ndei ngue re. Ño ngue mbia ñee nguiã:

Dios turã tuchi riqui mbia je co.

Equiracuã tuchite riqui co.

Ae riqui mbia rerecua tuchi co cote.

⁷ Nandechimbia tuchi quia erese jẽ.

Nandechẽ turã ño nguia erĩ jẽ.

Jesús ra uquiato isi bei cote.

Sã emo ndiqui ngūinisirã isi bei no.

Sã eninisi icoquiato ngurã ndaarõ arõ no.

⁸ Sã eninisi tirushĩ turã mingue eru eisi bei nonde no.

Eĩ si ra Jesús uquiato isi cote, eru ngūinisirã isi rã,

i que ibatenda ñee cuu ra. Tirushĩ turã ndei Jesús quiato reco turã na.

⁹ Angel que ñee seje cote ra. —Co embesa rã: “Jesús ngūinisirã isi raanguia chõ nda esaã uquiato je ibate cote. Ae je ra ñee ‘jenyu serese quiaru’ i aque mose nae, Dios turã tuchi ra ũquĩ je”, ere embesa mi, i que ángel seje ra. —Dios cheẽ tuchi chõ ũquĩ nde, i que ángel seje ra. ¹⁰ Senia ndese que acoi rei ángel ndésaa ra. Adorar i sacua ee. Angel que ñee ño seje ra. —Adorar erechĩ nda seje jẽ. Dios rimba chõ se re. Nde rã sí.

Ndequiato rã sí. Ae siqui tuchi quia Jesús rui nae, ũquĩ mo na ño se re. Dios mi je chõ adorar ere. Ae Dios cheẽ senei senei nguia mbia je nae, Jesús mbuchecua sacua mbia je chõ ũquĩ nde, i que ángel seje ra.

Ae siqui caballosĩ átoo

¹¹ Ibei que obo seje cuu ra. Caballosĩ mo ndese que amae huee ra. Emo ngue chí eátoo ra. “Ñee ñoñosa reã” i que aque je ra. Ererecua turãte que ae ra. Ae que guerra saã saã nguia mbae turã ndiquisã quisã nda. ¹² Tata rã tuchi que eresa ra. Corona tubiriãte que eãquĩ ndese ra. Embae nombre mbesa ji que chí ndei ra. Mbia mo ngue embae nombre icua eãte quia ra. ¹³ Eirao mondo ji eruqui ye que equereco ra. “Dios cheẽ” i que embae nombre ra. Jesús chõ eriqui reaẽ. ¹⁴ Ejército ibatenda que nyoĩ jate eruĩ ra. Eiraoshĩ turã achõte que nyoĩ eruĩ ra. Caballo átoo que echoĩ quia eruĩ ra. ¹⁵ Ae rui ejército nyoĩ nae, aque que tiquise mo nguereco uchúruu ra. Ae teã teã nguia Dios je nae, ũquĩ mbasi sacua ño tiquise rerequia nguiã uchúruu aque. Ae ra mbae rasi saanguquia tuchi Dios quiato eã je cote. Dios ra paama i tuchi mbia je aque mose. Mbia quia siqui sereãte nguiã Dios quirãcuã ndese. ¹⁶ Ae chí caballo átoo nae, aque irao rese que embesa ji ñi nda. Eu rese abe que embesa ji ñi nda. ERERECUA TUCHI i que embesa ji huĩ nda.

¹⁷ Angel mo ngue chí juã tenda re cuu ra. Urubu je que eñi ñeemombo mombo ra. Ae mbebe ja quia. —Jenyu ja quiaru. Dios ra jembuquiaru ja tuchi cote. ¹⁸ Mbia chumumbara roo ra jẽu cote. Mbia rerecua roo. Soldados rerecua roo. Mbia quirãcuã ndoo. Caballo roo abe no. Caballo ato jenda roo abe no. Mbia cuasu roo abe no. Mbia riirĩ ndoo abe no. Ae ererecua riqui nae, ũquĩ ndoo abe no. Ae ererecua eã ndiqui nae, ũquĩ ndoo abe no. ũquĩ ndoo ra jẽu ja cote, i que ángel urubu je ra. ¹⁹ Icuã ndese que amae cote ra. Mbia rerecua tubiriã ndese uquiato rese. Ejército tubiriãte que chi erese ra. ũquĩ ñumunu a ño nguia eicuã icuã nonde Jesús je reaẽ. Ae siqui caballosĩ átoo, aque je. Jesús rimba soldados je abe no. ²⁰ Jesús que icuã

isi tarõ nda. Dios cheẽ nenei ñooñosa abe no. Aque chõ mbia mae sayã saã saã ño nguia icuã ndeco mose nyii reaẽ. Aque chõ mbia mbĩĩrĩ irĩ nguia reaẽ. Ae mbia marca quereco quia icuã mbae nae, ùquĩ mbĩĩrĩ irĩ ño equia reaẽ. Ae adorar i quia icuã naanguia mbae ao ji je nae, ùquĩ mbĩĩrĩ irĩ ño equia reaẽ. Nyebe Jesús icuã mombo nguia tata cuásuu cote. Dios cheẽ nenei ñooñosa rese. Azufre rese eriqui sendi hue. ²¹ Jesús que icuã nimba i quia ja cote ra. Ae equereco quia tiquise uchúruu nae, aque je que eiquia ja cuu ra. Urubu ja que eroo u tuchi quia ra.

20

Dios ra Satanás tarõ mi mil años

¹ Aquere que amae ángel mo ndese cuu ra. Nguichi que u quia ibate si ra. Cadena cuasu que equereco ra. Llave abe que equereco ibicua mbuquiata sacua nda. Abismo i equia hue ibicua je. ² Angel que dragón isi nyucua ra. Satanás, i que equia dragón je ra. Mbei ima, i abe que equia ee ra. Diablo, i abe que equia ee no nda. Aque que ángel nyucua mil años cuu ra. ³ Angel que dragón mombo ibicua ye ra. Tarõ ngue llave je huee ibicua ye ra. Eiquesa que ematã nda. I nda dragón mbia mangu chooñoa jenda mbĩĩrĩ irĩ si eã. Mil años ua mose, ángel nda embui mbĩĩrĩ na mondo.

⁴ Jesús quiato i quia ji rese que amae nda. Ae ãquĩ mbia nyisia sia quia Jesús rĩ. Mbia rerecuarã tuchi que ùquĩ cuu ra. Siqui eãte quiatu ngue icuã ndese re. Icuã naanguia mbae ao ji je abe que eriqui adorar i ãte ra. Icuã mbae marca abe que equerecoãte quia nguba rese no nda. O abe rese. Ùquĩ ndaaque que quera si cuu ra. Cristo que emi ererecuarã mil años nda. ⁵ Ùquĩ ndei mbia quera je rane ùquĩ. Mbia raaque ataque que quera eã aque mose ra. —Mil años ua mose ra Dios mbia ataque mbuquera cote, i que seje cuu ra. ⁶ Ae rane nda Dios mbuquera nyii nae, ùquĩ ia tuchi rae. Dios quiato tuchi chõ ùquĩ nde. Ùquĩ nda nyoi eã mbei tata cuasu. Siqui bei ra Dios rese. Cristo abe rese. Ererecuarã mbei ra eriqui Cristo rese mil años.

⁷ Mil años ua mose, Dios ra Satanás mbui si mondo ibicua si. ⁸ Satanás nda mbia mangu chooñoa jenda mbĩĩrĩ irĩ ja quia cote. Gog abe mbĩĩrĩ irĩ. Magog abe mbĩĩrĩ irĩ no. Dios quiatoã ja mbĩĩrĩ irĩ. Etubiriã tuchite ùquĩ. Satanás nda ùquĩ munua nua ja quia. Guerra raã naa sacua Dios je. ⁹ Mbia tubiriã tuchi ra Satanás munua nua nguia ibi jenda ja cote. Ùquĩ nda Jesús quiato mama tuchi cote. Jerusalén ab e mama tuchi rae. (Dios nduasa tuchi chõ Jerusalén nde.) Dios ra tata mbu ibei si cote. Tata ra ùquĩ sei ja cote. ¹⁰ Diablo quiatu nda mbia mbĩĩrĩ irĩte nguia. Nyebe ra Dios emombo tata cuásuu cote. Ae eriqui icuã mombo. Ae eriqui icuã naanguia mbae ao ji abe mombo. Ùquĩ nda siqui bei huee tata cuásuu. Tata sendi quia azufre mumbara. Mbae rasi ra esaã saã mbei huee. Nyaashĩ mose. Isa abe chee. Usẽ eã mbei ra hue si.

Dios mbia uquiatoã mbasi mose

¹¹ Mbae mo ndese abe que amae cuu ra. Dios que chí ngoi trono tose ra. Trono cuasu tuchi que ra. Eshĩ ngue ra. Mbae que uchã ja Dios si aque mose ra. Ibi jenda. Ibei jenda abe no. —Tachimi Dios si, i rei que mbae ja ra. ¹² Amae ngue mbia raaque rese ra, ae mano ndei quia nyii. Mbia cuasu rese. Mbia riirĩ abe rese. Chi ja que júã Dios resa rae cuu ra. Emo ngue libros ata equia ra. Libro nongue abe que eequia ra. Ae mbia ra siqui bei nae, ùquĩ mbae nombres que chí aque libro rese ra. Ae mbia saã saã nguia mbae nyii nae, ùquĩ mbesa mbesa ji qu e chi ùquĩ libros rese ra. Dios que mbia chisaã mbuchechea checha cote ra. Embasi sacua. ¹³ Ae mbia mano ama ñi nae, ùquĩ ja que chi ra. Ae mbia mano ibii no nae, ùquĩ abe que chi ja no nda. Ae mano mano mangu e chooñoa jenda nae, ùquĩ abe que chi ja no nda. Dios que ùquĩ nyisaã mbuchechea checha ja cuu ra. Embasi sacua. ¹⁴ Aquere ra mbia mano eã mbei cote. Dios quiatoã nda siqui bei tata cuásuu no. ¹⁵ Ae embae nombre mbesa iriãte aque libro rese nae, ùquĩ ngue Dios mombo ja tata cuásuu seje cuu ra.

21

Dios ibi mbiasu, ibei abe

¹ Aquere que amae mbae yasu rese cuu ra. Ibei yasu rese. Ibi abe yasu rese. Ibei ñiinda quiachã ño nguia reaẽ. Ibi ñiinda abe no. Ama ndisha mo eãte que cote ra. ² Se rei Juan. Mbae que nguichi u quia ibate si seje cuu ra. Jerusalén yasu chõ nguichi u quia seje cuu reaẽ. Dios recua. Mbae mbuturã ji jate que ra. Sã emo ninisirã quiche riqui i ngurã je no. ³ Ibatenda mo ngue ñee cuu ra: —Sã jẽ. Sã Dios riqui mbia mumbara co cote jẽ. Siqui bei ra equia erese. Mbia rerecua turãte ra eriqui ee. Erimbarã tuchi ra mbia cote. ⁴ Dios ra mbia mbia tuchi cote. Mbia mo nda manõã tuchi cote. Emo ndasiã nda cote. Emo nda nyeseo eã cote. Emo ia eã eã nda cote. Cose ndare rã eã nda mbae cote, i que ibatenda ñee cuu ra.

⁵ Dios que ñee cote ra: —Sã jẽ. Sã aico mbae mbiasu jate co jẽ, i que ra. —Ã secheẽ embesa ja rã. Ae rĩ aico ñee nae, ñquĩ nda asaã ja, i que ñee seje ra. ⁶ Ñeembe que seje ra: —Equiche que eno. Co aico beite querabe co. Mbae eã mose abe que aico se rane nyii ra. Mbae ua ja mose abe ra aico bei querabe no. Emo isei mose, i turã nda amondo ee. I mbia mingo beisa ra amondo ee. “Mbae embu i ribishorõ”, ae eã nda ee. ⁷ Ae “qui jẽ” i quia Satanás je nae, ñquĩ je ra mbae turã ja amondo. Ñquĩ nderecua tuchi ra se. Seririĩ tuchi ra ñquĩ. ⁸ Ñ ja ra nyoi tata cuásuu: Esiquiche. Jesús icuasa reã. Mbia nyaba chaba reã. Mbia iquiasa. Ae siqui chooñote quia emo ninisi rese. Ae brujería saã saã nguia. Ae siqui quia Dios abareã ndese. Ae ñee ñooño nguia. Ñquĩ ja ra nyoi tata cuásuu. Huee ra tata rasi raã mbei. Asufre mumbara, i que ra.

Jerusalén yasu

⁹ Ae siete ángeles mbae rasi quereco mbae riru ye nae, ñquĩ mo ndese que amae cuu ra. Ñee ngue seje ra: —Quiatuchu. Mbae tateacuquia ndeje. Jesucristo ninisirã tateacuquia ndeje, i que seje cuu ra. ¹⁰ Aque ángel que sererao ibi ibátee mo cuu ra. Huee que mbae nguichi u quia ibate si seje cuu ra. Jerusalén yasu chõ nguichi u quia seje cuu reaẽ. Dios recua.

Sucha cuasu. ¹¹ Jerusalén yasu nininyate que ra. Dios nininya rã si. Sita rendi rã ño ngue eturã nda. Eibera turã ño ngue ra. ¹² Etaronda que sucha cuasu mama ja huĩ nda. Muralla, i que etaronda je ra. Eicoi tuchi que ra. Ibate tuchi que ra. Doce que eiquesa ra. Angel mii ngue chi eiquesa raarõ ja ja ra. Embesa mbesa ji ja que eiquesa ra. Doce tribus mbae nombre que chi jaaja eiquesa rese ra. ¹³ Eiquesa tres que chi tenda chuisa quiti ra. Tenda sosa quiti tres no. Norte quiti tres no. Sur quiti tres no. ¹⁴ Doce sita cuasu que chi muralla qui ñi nda. Etaronda irã. Doce apóstoles mbae nombres mbesa ji que chi ñquĩ sita rese ra.

¹⁵ Angel que uu mo nguereco oro ao ji ra. Dios recua mbuchecha sacua. Eiquesa abe mbuchecha sacua no. Etaronda abe mbuchecha sacua no. ¹⁶ Angel que Dios recua mbuchecha uu je ra. Cuadrado tuchi que Dios recua ra. Eoco que 2,200 kilómetros ra. Eicoi que 2,200 kilómetros no nda. Ibate quitinda abe que 2,200 kilómetros no nda. ¹⁷ Angel que muralla abe mbuchecha ra. Sesenta y cuatro metros que eicoi ra. Sã mbia riqui mbae mo mbuchecha no. Eĩ sí que ángel muralla mbuchecha no nda. ¹⁸ Oro ao ji rei sucha cuasu. Eibera tuchi que ra. Muralla rei sita ao ji. Jaspe ao ji. Aba queteamba tuchi rei jaspe. ¹⁹ Sita cuasu chi quia muralla irã nae, ñquĩ arõ ngue sita ñetẽ nininya chichi ja ra. Embarõsa chõ ngue ñquĩ nde. Jaspe mbitee ji rane ngue ra. Zafiro mbitee ji que chi jaspe arõ cote ra. Agata mbitee ji que chi cote ra. Esmeralda abe no. ²⁰ Onice. Cornalina. Cristólito. Berilo. Topacio. Crisoprasa. Jacinto. Amatista. Ñquĩ ja sita ñetẽ nininya que chi ja ja sita cuasu arõ nda. ²¹ Eiquesa riquisã jate que perla ao ji chi ra. Perla mii mii ja que chi eiquesa riquisã nda. Oro ao ji que calle mbite renda ra. Oro ao ji achõ ngue ra.

²² Dios chuchua templo mo eãte que huee ra. Mbia quiatu que ñee mbei quia Dios je mangue chooñoa nda. Jesucristo abe je. ²³ Tenda eãte abe que eriqui Dios récuua seje cuu ra. Nyasi eãte abe que seje cuu ra. Dios nininya ae chõ ngue mbae

tesae ja quia ra. Jesucristo nininya abe no. ²⁴ Dios nininya ra uquiato tesae ja ino huee. Mangue chooñoa jenda ja. Mbia rerecua ra ñee turã turã ja Dios recua rĩĩ cote. ²⁵ Dios recua chiquesa tarõ iriã mbei rae. Itondaru eã mbei ra huee. ²⁶ Mbia mangue chooñoa jenda ja ra ñee turã turã Dios recua rĩĩ. Mbae turã ja ra chi huee. ²⁷ Mbia icuã nda iqueã mbei huee. Mbia mbĩĩĩ irĩsa abe ra ique eã mbei huee no. Ae embae nombre mbesa ji Jesucristo mba e libro rese nae, ùquĩ achõ ño nda ique Dios récuua.

22

¹ Angel que ama mo abe teacuquia seje cuu no nda. Mbia mingo beisa que aque ama nda. Ama ndiibera tuchi que ra. Dios mbae que aque ama nda. Jesucristo mbae abe no. Sucha tubiriã ite rĩ ngue iãcuã irãtã mo ñi nda. ² Ama nimia nguiti ja que ira ñi nda. Mbia mingo beisa que ùquĩ ira ra. Ùquĩ ngue ia beite quia doce veces en el año nda. Nyasi mbuchechea quiatu bei que eriqui ia ia bei ra. Ùquĩ iraro que mbia chumumbara mbucherõ cherõ tuchi quia ra. ³ Mbia rasi eã mbei ra huee cote. Dios ra siqui tuchi huee. Jesucristo rese. Cordero, i equia ee. Erimba ra ñee turã mbei quia ee huee. ⁴ Mae mae ja ra Dios ruba rese. Dios mbae nombre mbesa ji ra equereco nguba rese ja ja. ⁵ Itondaru eã mbei ra huee. Tenda aroneate huee. Tata abe aroneate huee no. Dios nininya ae chõ nda mbae tesae ja hui nguia huee. Ererecua turã tuchi ra Dios quiato ja huee.

Achite Jesús ñi tu a cote

⁶ Angel que ñee seje ra: —Acheẽ ñooño eã ño nguia co. Ae rĩĩ aico ñee nae, ùquĩ nda Dios saã ja. Sã Dios ucheẽ mbuchecuaa mondo mbia je cose no. Eĩ si que sembu namo no nda. Ae ra nyecua namo jiri nae, ùquĩ ndeacuquia sacua mbia je chõ ngue sembu nguia. ⁷ “Se ra achu jei”, i que Jesús ra, i que ángel ñee seje ra. Ae ra ã mumba eã Dios cheẽ mbesa ji nae, ùquĩ ia tuchi rae.

⁸ Se rei Juan. ã ndese que amae nda. ã ngue achandu no nda. Aque ángel ã teacuquia quia seje nae, aque jii que acoi

rei senia ndese ra. Adorar i sacua ee. ⁹ Ñee ngue seje ra. —i Adorar erechi nda seje jẽ! Dios miĩ je chõ adorar ere. Dios rimba chõ se re. Nde rã sí. Ndequiato rã sí. Ae Dios cheẽ mbuchecua checua quia nae, ùquĩ na si. Ae ã mbesa ji mumba eãte quia nae, ùquĩ na sí, i que ángel ñee seje ra.

¹⁰ Angel que ñee si seje no nda: — Ae erembesa co libro nae, ùquĩ nda erembuchecuayã cuayãchĩ mbia si jẽ. Eteaquiatu ee. Ae rĩĩ erembesa nae, achite eñi tu a cote. ¹¹ Sã mbia icuã mbae icuã naa naa ño na. Ae siqui quia mbae rondei rese nae, sã eriqui rã erese. Ae siqui quia mbae turã ndese nae, siqui i i tuchi ra mbae turã ndese. Ae siqui Dios rese nae, siqui i i tuchi ra erese cote, i que ángel seje ra.

¹² Jesús que ñee nda: —Achu jei ra se. Ae mbae turã saã saã nguia nae, ùquĩ je ra mbae turã aru. Echisaã na sí. ¹³ Co aico beite querabe co. Mbae eã mose que aico se rane nyii ra. Mbae ua ja mose abe ra aico bei querabe no, i que Jesús ra.

¹⁴ Ae echiã irei ji Jesús ruqui je nae, ùquĩ ia bei ra eriqui. Eirao ituquia jí na ndei echiã irei jí. Ùquĩ nda ique Dios récuua. Siqui turã mbei ra equia huee. ¹⁵ Dios quiatoã nda iqueã huee Dios récuua. Ae brujería saã saã nguia nae. Ae siqui chooñote quia cuña mo ndese nae. Ae mbia iquia nae. Ae siqui quia dios mbuae rese nae. Idolo rese nae. Ae mbia mbĩĩĩ irĩ nguia nae. Ùquĩ mo nda iqueã tuchi Dios récuua.

¹⁶ Jesús que ñee nda: —Angel serimba que amondo ra. ã nenei nenei sacua iglesias ja je. David i chõ se re. David nducucha chõ se no nde. Nyasitata nininya rã ño se re, i que Jesús ra.

¹⁷ Espíritu Turã ndiqui “quiatuchu” i co. Jesús ninisirã abe riqui “quiatuchu” i co no. Sã secheẽ andusa abe “quiatuchu” i. Emo isei mose, sã ecuaẽ i mbei Jesús mbae. I mbia mingo beisa ra Jesús mondo ee. Embei mose, siqui bei rae. —Mbae embu i ribishorõ seje, i eã nda Jesús ee.

¹⁸ Ae ã ñandu quia Dios cheẽ co libro resenda nae, ùquĩ je tacheẽ tuchi: Emo co libro resenda mbirõ mose emo ñee je, Dio s ra ùquĩ mbasi tuchi. Ae mbae rasi chi ja

co libro rese a nae, ũquĩ nda esaã ja tuchi.
19 “Dios cheẽ eã ño co re”, i mose co libro
resenda je, ũquĩ abe ra Dios mbasi tuchi.
Ũquĩ nda Dios mingó bei eã nguécuaa.

20 Jesucristo cheẽ ño ã nde: —Achu jei ra
se, i equia co. Amén. Echu cote, Jesucristo.

21 Jesucristo rei nandererecua. Sã uturã
mondo tuchi jêje. Amén.